


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

Tí Nuevo Testamento cuènte Inchéni Jesucristo C'óna Nquìva

New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
b9b09122-b3f6-59f0-9594-749907b32b5b

Contents

SAN MATEO	1
SAN MARCOS	47
SAN LUCAS	77
SAN JUAN	125
LOS HECHOS	161
ROMANOS	202
1 CORINTIOS	219
2 CORINTIOS	236
GALATAS	247
EFESIOS	253
FILIPENSES	259
COLOSENSES	263
1 TESALONICENSES	267
2 TESALONICENSES	271
1 TIMOTEO	273
2 TIMOTEO	278
TITO	282
FILEMÓN	284
HEBREOS	285
SANTIAGO	298
1 PEDRO	302
2 PEDRO	307
1 JUAN	310
2 JUAN	314
3 JUAN	315
SAN JUDAS	316
APOCALIPSIS	318

Tí tan jína chrónka ch'in Mateo

*Tí sín k'uaxrjenixin ch'in Jesús
(Lc. 3.23–38)*

¹ Tíhi mé chrónka nkexro kaín tí sín k'uaxrjenixin ch'in Jesucristo. Mé jehe ch'an k'uaxrjenixin ch'an tí ch'in David la ko tí ch'in Abraham. ² Ch'in Abraham mé it'é tí ch'in Isaac la ko ch'in Isaac mé it'é tí ch'in Jacob la jehe ch'an mé it'é tí ch'in Judá la ko kaín kichó ch'an. ³ Ch'in Judá mé it'é tí ch'in Fares la ko ch'in Zara la tí iné sín mé it'in Tamar. Ch'in Fares mé it'é tí ch'in Esrom la jehe ch'an mé it'é tí ch'in Aram. ⁴ Ch'in Aram mé it'é tí ch'in Aminadab la jehe mé it'é tí ch'in Naasón la jehe mé it'é tí ch'in Salmón. ⁵ Ch'in Salmón mé it'é tí ch'in Booz la iné mé tjan Rahab. Ch'in Booz mé it'é tí ch'in Obed la iné tí ch'in Obed mé tjan Rut. Tí ch'in Obed mé it'é tí ch'in Isaí. ⁶ Ch'in Isaí mé it'é tí rey David la jehe ch'an la ko tí tjan k'uéchjién ch'in Uriás mé táha it'é la ko iné tí ch'in Salomón.

⁷ Ch'in Salomón mé it'é tí ch'in Roboam la jehe mé it'é tí ch'in Abías la jehe ch'an mé it'é tí ch'in Asa. ⁸ Ch'in Asa mé it'é tí ch'in Josafat la ch'in Josafat mé it'é tí ch'in Joram la ch'in Joram mé it'é tí ch'in Uzías. ⁹ Ch'in Uzías mé it'é tí ch'in Jotam la ch'in Jotam mé it'é tí ch'in Acáz la ch'in Acáz mé it'é tí ch'in Ezequías. ¹⁰ Ezequías mé it'é tí ch'in Manasés la ch'in Manasés mé it'é tí ch'in Amón la ch'in Amón mé it'é tí ch'in Josías. ¹¹ Ch'in Josías mé it'é tí ch'in Jeconías la ko kichó ch'an. Tí sín a mé k'uéjó sín tí yaon a ntá xrínghya ikui tí sín Babilonia sákjuíko sín tí sín israelita kíxin ts'ejóchjina sín tí chjasén sín Babilonia.

¹² Ntá kjuixin sákjuí sín mé ch'in Jeconías mé it'é tí ch'in Salatiel la ch'in Salatiel mé it'é tí ch'in Zorobabel. ¹³ Ch'in Zorobabel mé it'é tí ch'in Abiud la ch'in Abiud mé it'é tí ch'in Eliaquim la ko ch'in Eliaquim mé it'é tí ch'in Azor. ¹⁴ Ch'in Azor mé it'é tí ch'in Sadoc la ko ch'in Sadoc mé it'é tí ch'in Aquim la ko ch'in Aquim mé it'é tí ch'in Eliud. ¹⁵ Ch'in Eliud mé it'é tí ch'in Eleazar la ch'in Eleazar mé it'é tí ch'in Matán la ch'in Matán mé it'é tí ch'in Jacob. ¹⁶ Ch'in Jacob mé it'é tí ch'in José la ch'in José mé k'óna xii tjan María la jehe tjan María mé iné tí ch'in Jesús. Tí ch'in Jesús la mé nchek'in sín Cristo.

¹⁷ Mé xikaha catorce t'áchrji k'uaxrjenixin tí ch'in Abraham ntá kjuák'e ch'in David la í jnko catorce t'áchrji k'uaxrjenixin tí ch'in David la ntá tí sín Babilonia sákjuíko tí sín israelita chjasén sín la ntá í jnko catorce t'áchrji k'uéjó la ntá kokjihi Cristo.

*Kokjihi Jesucristo
(Lc. 2.1–7)*

¹⁸ Tí kokjihi Jesucristo mé xikihí kónhen. Tí tjan María iné ch'an mé tsotéhe tjan ch'in José. A ntá naḡa kuákjahya kichó sín ntá kónoxín kíxin jehe tjan la ó tjejá tjan kíxin tíha la kjuachaxién Nchakuen Dios. ¹⁹ Ch'in José mé tí nkexro ts'óna xii tjan María, mé ijnko chojni jina la tjinkakonhya ch'an noxín chrók'óxroan ch'an tjan ntá kjuenkayáxin ch'an imó chrókjuákehe ch'an tjan kíxin tjinkaon ch'an kíxin ninkexró tsonoehya. ²⁰ Ntá tí naḡa tjenkayáxin ch'an kíxin xikaha sich'e ch'an ntá kotáchrini ch'an chrónkaxin titáya k'uúkuén ch'an ikui ijnko ángel kuente Ìnchéni nixja, chrónka kíxin:

—José jaha mé k'uaxrjenixian David. Tóxakuanhya la ko chrakonhya chrókjuákjá tjan María ts'óna ichjián kíxin tí xjan tsochónta tjan la kjuachaxin kuente Nchakuen Dios ikui mé k'óna tí xjan a. ²¹ Sinchekokjihi tjan ijnko xjan ntoa la its'in xjan Jesús mé xikaha its'in xjan kíxin jehe xjan tsjakjin ijé chojni —mé xikaha chrónka tí ch'in ángel.

²² Kaín tíha kónhen kíxin tsoxiteyá tí nkehe chrónka Ìnchéni k'uéniexja tí sín k'uéchrónka itén ch'an ósé. Mé ntáchro xikihí:

²³ Ijnko tjan naḡa chóntahya chojni ntoa mé tsjak'eyá tjan la tsochónta tjan ijnko xjan, la sinchek'in sín ch'an Emanuel,*

la tíha t'axrjéxin kíxin Dios tjejókoni. Mé xikaha chrónka itén Dios.

²⁴ Ntá k'uàya ch'in José ntá kjuínchexiteyá ch'an tí nkehe k'uetoan tí ángel kuente Ìnchéni la kuákja ch'an tjan María ts'óna ichjién ch'an. ²⁵ A ntá kjónté xikaha la naḡa kójnkojiéhya sín tí naḡa kokjiéhya xjan la ntá tí xjan mé kjuínchek'in sín Jesús.

2

Tí sín mago kjuútsjehe sín xjan

¹ Tí kokjiéxin ch'in Jesús tí chjasin Belén estado Judea la tí yaon a kjuák'e ijnko ch'in rey it'in Herodes mé k'uétuénhen ch'an tí nación a. A ntá xrínghya iso chojni ntoa kjuáxin ijnko

* 1:23 Isaías 7.14

chjasin nó tjtioxin yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé. ² Ntá kjuanchankí sín kixin:

—¿Nketí tjen tí xjan tsikokíhí ts'óna tí rey ts'etueñhen tí sín judío? K'uíkonxínni tí konotsé kuènte ch'án nó tjtioxin yaon na ntá ó kjuíni kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xikaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén. ⁴ Ntá tí ch'ín rey k'uetqan kixin síxrakoa kaín tí sín nchat'a t'etqan la kaín tí sín tjako tí ley la ntá kjuanchankíhí sín ch'án nketí chrókokjéxín tí nkexro Cristo. ⁵ Ntá jehe sín kjuátehe sín kixin:

—Tsokjéxín xjan chjasin Belén estado Judea mé xikaha tsíkjin tí sín tsíchronka itén Dios. Ntáchro xikíhi:

⁶ Jaha chjasin Belén nonte Judá,
jaha la jehya ijnko chjasin imá ntsí;
kixin tí nonte ts'axrxéjín tí nkexro ańtsí t'etqan,

la jehe ch'án ts'ayakonhen tí chjasin kuèntana mé chjasin Israel.*

Mé xikaha nixja itén Dios.

⁷ Ntá imó k'uíyehé ch'ín Herodes tí sín mago la kjuanchankíhí ch'án sín nkesá kjuankíxín k'uíkon sín tí konotsé. ⁸ Ntá chrónka sín ntá tuénxín k'uetqan ch'án kixin sátsji sín chjasin Belén la ntáchro ch'án kixin:

—Sátjirá ntiha la tjéyará tí xjan la tió ts'itjará xjan la tsochxonkará kixin ntá kjaxian janhan sátsjia ntiha tsotjaha xjan kjuasáya —mé xikaha k'uetqan ch'ín Herodes.

⁹ Ntá kuínhin tí sín mago tí nkehe k'uetqan tí ch'ín rey ntá sákjuí sín la xik'ikon sín tí konotsé inaá la kjuítaon va ntja la ntá chréhe sín hasta kjuák'e va chritaon tí nchia tjen tí xjan a. ¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín. ¹¹ La k'uíxénhen sín tí nchia la k'uíkon sín tí xjan kjuák'eko tí tjan María iné xjan. Ntá k'uejoxin toch'ín sín la chjéhe sín kjuasáya ntá kuakitjéhe sín tí nkehe kjuíkao sín la kjuanjón sín chica oro la ko ihntí tsochéxín chjinqo la ko xroqan xraxé náxrxón. ¹² Ntá chr'éxín kotáchríén sín chrónkaxín kixin chrókjanhya sín tí tjen ch'ín Herodes. Méxra kjanxin sín í jnko ntja la sákjuí sín chjasén sín.

Ch'ín José la ko tjan María sákjuí sín chjasin Egipto

¹³ Ntá tió kjuixín sákjuí tí sín mago la ntá kotáchríén ch'ín José chrónkaxín titàya k'uíkon ch'án ijnko ángel kuènte Ìnchéni chrónka kixin:

—T'áyá sátsjikoa xjan la ko iné xjan la sátsjirá chjasin Egipto la ntahó ts'ejorá hasta tsoxrxjankajia, kixin tí ch'ín Herodes xritjeyá tí xjan chrók'oyán ch'án xjan —mé xikaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko iné xjan la sákjuí sín chjasin Egipto tí tie a. ¹⁵ Ntahó k'uejó sín hasta ik'uén ch'ín Herodes. Mé xikaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchronka itén ch'án. Mé ntáchro sín kixin: “Chjasin Egipto kjuák'e xjanna ntá k'uíyahá ch'án”.†

Ch'ín Herodes mé k'uetqan its'en xjan

¹⁶ A ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'uetqan ch'án kixin its'en kaín tí chánjan ntoa síin chjasin Belén ó chóna iyó nánó la ko tí xjan naxá chónthahya iyó nánó. Mé xikaha k'uetqan ch'án kixin ó xraxínkaon ch'án nkehe kuínhin ch'án chrónka tí sín mago. ¹⁷ Mé xikaha ó xiteyá tí nkehe tsíkjin tí ch'ín Jeremías ntáchro ch'án kixin:

¹⁸ Kuínhin sín itén chojní chjasin Ramá
mé tsjánka sín.

Tiha mé tí tjan Raquel la tsjánkamá tjan xjeen tjan.

Kohya nkexro sinchechéhe tjan kixin ó kaín xjan tsík'en xjan.‡

Mé xikaha chrónka itén Dios.

¹⁹ Ntá tió kjuixín k'uén ch'ín Herodes ntá ijnko ángel kuènte Ìnchéni mé k'uíkonxín ch'ín José kotáchríén ch'án tí kjuák'e ch'án chjasin Egipto mé ntáchro kixin:

²⁰ —T'áyá sátsjikoa tí xjan la ko tí iné xjan la tsokjan chjasin Israel kixin ó kjuixín k'uén tí nkexro chrók'oyán tí xjan a —mé xikaha k'uetqan tí ch'ín ángel.

²¹ Ntá ch'ín José mé k'uàya ch'án la sákjuíko ch'án tí xjan la ko tí iné xjan la sákjuí sín chjasin Israel. ²² A ntá kuínhin ch'ín José kixin ch'ín Arquelao xjeen ch'ín Herodes mé k'uetqan ch'án tí estado Judea la ntá chrakon ch'án la sáchrókjuíhya ch'án ntiha. A ntá kotáchríén ch'án chrónkaxín Dios kixin sáchrókjuí ch'án estado Galilea. ²³ Ntá tió kjuíji sín ntiha ntá sákjuí sín

* 2:6 Miqueas 5.2 † 2:15 Oseas 11.1 ‡ 2:18 Jeremías 31.15

ijnko chjasin it'in Nazaret la ntaha k'uéjó sín. Mé xíkaha xiteyá tí nkehe tsíchrónka tí sín k'uéniexja itén Dios senó. K'uéntáchro sín kíxin jehe ch'an mé tsíkítexín sín nazareno.

3

Juan el Bautista mé kjuák'e ch'an nteje

(Mr. 1.1–8; Lc. 3.1–9, 15–17; Jn. 1.19–28)

¹ A ntá tí yaon a kjuák'e ch'in Juan Bautista nteje Judea la kjuako ch'an. ² Ntáchro ch'an kíxin:

—Títoherá ijiará la tjínkírá tí nkehe tjenkayáxinrá kíxin í séhya itsi kjuachaxién Dios.

³ Tí ch'in Isaiás, mé ijnko ch'in tsíchrónka itén Dios, mé tsíkjin ch'an kuente tí ch'in Juan mé chrónka ch'an kíxin:

Tsinhin sín itén ijnko nkexro tsjak'e nteje ts'éya tsontáchro kíxin:

“Tóxakonhanrá ncheyóxinrá ntja tsixín Inchéni.

Takitjehérá ijnko ntja ntoí.”*

⁴ Tí iké ch'in Juan mé tsík'óna kaxree kocamello la ko tí nkehe chr'ínkat'óxin ch'an mé tsík'óna tjoa. A ntá tí nkehe kjóne ch'an mé kochjoá la ko itsjen kotsjenta tónoxín nteje. ⁵ Itsjé chojni kuixín sín chjasin Jerusalén la ko í so chjasin siin estado Judea la ko chjinaxón tí ntarío Jordán kíxin tsinhin sín nkexrí tjechrónka ch'an. ⁶ Ntá chrónka sín ijié sín ntá ch'in Juan kukítexín ch'an sín tí ntarío Jordán.

⁷ Ntá xrinahya k'uikon ch'in Juan ikui nchónhya tí sín fariseo la ko tí sín saduceo kíxin tjinkaon chrókuikite sín la ntá ntáchro ch'an kíxin:

—Jahará tsik'axrjeníxinrá konche. ¿Xá nkexro kjuintanohará kíxin chrókuikéhérá tí kjuaninkaon kuente Dios ó tsí? ⁸ T'ichjánxin kíxin chrók'uejorá jnkojina chrókjuakóxinrá kíxin chaxín kjuítóxinhrá tí nkehe tjenkayáxinrá. ⁹ Jahará nchehnerá ntáchrórá kíxin k'uaxrjeníxinrá ch'in Abraham. Janhan ntáxrjan kíxin kjónté tí xro í la Dios tsjacha chrókjuich'éna ch'an chojni k'uaxrjeníxin ch'in Abraham. ¹⁰ Tí chica hacha ó tjechónhen tsochrínjinxín tí nta. A ntá kain xín nta t'ónahya to jina mé tsochrínjin kíxin tsoche. ¹¹ Janhan mé intá tikítexián chojni kíxin tsjajoxín sín kíxin ó kjuítóxinhnín sín ntíé sín. A ntá tí nkexro itsi chr'éxin mé tsíkítexínrá tí Nchakuen Dios la ko xrohi. Antsí tjetóxin t'etqan ch'an a ntá janhan la kánhyó. Méxra chrókósuána sáchrókjuikían tokaté ch'an. ¹² Jehe ch'an la ó tjeextraá ch'an pala sinchetjuáxin ch'an noatrigo kíxin tí ntachjiji trigo la ókjé ts'ejo ch'an a ntá tí noatrigo la tsjenájín ch'an la ts'enkachjina ch'an. A ntá tí ntachjiji trigo la tsjakaxín ch'an ijnko xrohi ts'ankahya jnkochríxin —mé xíkaha kjuako ch'in Juan.

Kuikite ch'in Jesús

(Mr. 1.9-11; Lc. 3.21-22)

¹³ Ntá ch'in Jesús kjuixín ch'an nó estado Galilea ikui ch'an tí ntarío Jordán tí tjen ch'in Juan kixín ch'in Juan tsíkíte tí jehe ch'an. ¹⁴ A ntá tí saoxín chrohya ch'in Juan chrókuikite tí ch'in Jesús ntáchro ch'an kíxin:

—Náhi. Jeheni t'ichjánxinhinni jaha chrókuikite tí jeheni. A ntá jaha k'uinka kíxin jeheni chrókuikítia tí jaha —ichro ch'in Juan.

¹⁵ Ntá kjuátéhe ch'in Jesús kíxin:

—A ntá jie la títohé tí xíkaha tjenkayáxian kíxin t'ichjánxin tsikiteni kíxin sinchexiteyáni tí nkehe k'uetqan Dios.

Ntá ch'in Juan kuitekaon ch'an la xíkaha kjuich'e ch'an. ¹⁶ Ntá tió kuikite tí ch'in Jesús la ntá xrinahya titáya xitjehe nkajní la k'uikon ch'an tí Nchakuen Dios, éxi kontóá tsjehe, k'uinkajinxín nkaya nkajní ntá kjuák'e chrítaón kja ch'in Jesús. ¹⁷ Ntá xrinahya kuínhin sín ijnko tan kuixín nkaya nkajní ntáchro kíxin:

—Tíhi mé xjanna la imá tjuahá ch'an la imá chána kíxin nchexiteyàna ch'an.

4

Ch'in Tsochren chrókjuachroe ch'in Jesús

(Mr. 1.12-13; Lc. 4.1-13)

¹ Ntá tí Nchakuen Dios mé sákjuiko ch'in Jesús tí nteje a ntá ch'in Tsochren tjinkaon chrókjuachroe ch'in Jesús. ² Tí nteje a mé kjuák'e ch'an kjónehya ch'an cuarenta yaon la ko cuarenta tie la ntá chr'éxin kónohe ch'an ik'uén ch'an kjinta. ³ Ntá ch'in Tsochren mé kóchjinehe tí ch'in Jesús kíxin tjinkaon chrókjuachaxín ch'an. Ntáchro ch'an kíxin:

—Tí chaxín jaha Xjeen Dios la ntáche tí xro í kíxin chrók'óna niqtja.

⁴ Ntá kjuátéhe ch'in Jesús ntáchro kíxin:

* 3:3 Isaiás 40.3

—Náhi. Ntáchro xroon itén Dios kixin: “Jehya niqtja ó chrók'uejóchónxin chojni. Náhi. Kaín tí tán nixja Dios tjejóchónxin chojni”^{*} —ichro ch'án.

⁵Ntá ch'in Tsochren mé sákjuiko ch'in Jesús tí chjasin tjóá mé chjasin Jerusalén, la sákjuiko ch'án tí chrítaón tí kja ninko a ⁶la ntáchro ch'án kixin:

—Tí chaxín Xjeen Dios jaha la tjtq̄h' t'anótjenxian tí noi ntíhi kixin ntáchro xroon itén Dios kixin:

Dios mé ts'etuenhen tí sín ángel kuènte ch'án kixin ts'ayakonhan sín.

Tsotsé sín itjá

kixin tsotéhya totá ts'itja xro tí ts'anótjen†

—ichro ch'in Tsochren.

⁷Ntá kjuátehe ch'in Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjinihya chrókjuásixián kjuaxroon kjuachaxin kuènte Ìnchéni Dios”‡ —ichro ch'in Jesús.

⁸A ntá tió kjuixixín sákjuiko ch'in Tsochren tí ch'in Jesús ijnko jnā imá noi ntá kjuako tí Jínahya kaín xín tí nacióon siín chjasintajni la ko tí nkehe t'etq̄an kuènte. ⁹La ntáchro ch'in Tsochren kixin:

—Kaín tíha mé tsotjaha tí tsjak'éxian tóch'ian tsjikosáyana tí janhan —mé xikaha ichro ch'in Tsochren.

¹⁰Ntá kjuátehe ch'in Jesús ntáchro ch'án kixin:

—Sátjia Satanás kixin xroon itén Dios ntáchro kixin: “Chrókjuíkosáyehé Ìnchéni Dios la jehó ch'án chrókjuich'ehé xra”§ —ichro ch'in Jesús.

¹¹A ntá ch'in Tsochren mé kuitq̄he tí ch'in Jesús la iso tí sín ángel ikui tsjinkitsa tí jehé ch'án.

Ch'in Jesús kjuankixin ch'án tí xra kuènte ch'án estado Galilea

(Mr. 1.14-15; Lc. 4.14-15)

¹²A ntá ch'in Jesús mé kuínhin ch'án kixin tí ch'in Juan mé tjechjina ch'án ntqechiso a, a ntá jehé ch'án mé sákjuí ch'án estado Galilea. ¹³Kuitq̄ehya ch'án chjasin Nazaret ntíha. Náhi. Sákjuí ch'án chjasin Capernaum la kjuák'e ch'án ntíha. Tí chjasin a mé tjen chrínta ntayaon chjino estado Zabulón la ko estado Neftalí. ¹⁴Mé xikaha kjuich'e ch'án kixin tsoxiteyá tí nkehe tsíkjin ch'in Isaías, ijnko nkexro k'uéchrónka itén Dios. Ntáchro ch'án kixin:

¹⁵Tí estado Zabulón la ko Neftalí tí ntja

chrínta ntayaon la tí nó chók'á tjtq̄xín yaon tí ntario Jordán,

mé tí estado Galilea tí tjejó tí sín jehya judío.

¹⁶Mé ntíha tjejó tí sín siín tí sitié mé ts'ikon sín ijnko xrohi jíé,

la tí sín éxi tsík'en xritjejó sín

mé ts'inkaséyanxín ts'ejó sín.

¹⁷Ntá kjuankixin kjuako ch'in Jesús ntáchro ch'án kixin:

—Tjtóxínhinrā ntjarā. Tsákjarā ijnko ntja nixín kixin kjuachaxin kuènte Dios tjen nkaya nkajni la í séhya tsi.

Ch'in Jesús k'uíyehé noó chojni k'uétsé koche

(Mr. 1.16-20; Lc. 5.1-11)

¹⁸Ntá sákjuí ch'in Jesús chrínta ntayaon Galilea ntá xrínahya k'uíkon ch'án yaá sín jnkokoá kichó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehé sín mé koche xritsé sín. Ntá tinkák'e sín nchísén chrínkí ntā. ¹⁹Ntá ch'in Jesús nixjehé sín ntáchro ch'án kixin:

—Chréhérā tí janhan ntá tsotjharā xra tsjéyará chojni.

²⁰Ntá tuénxín kuitq̄he sín tí nchísén k'uétséya sín koche, ntá sákjuíko sín ch'án.

²¹Ntá kjínhya kjuíji ch'án ntá k'uíkon ch'án ijnko yaá sín, jnkokoá kichó sín, mé tí ch'in Jacobo la ko ch'in Juan, mé xjeen tí ch'in Zebedeo. Tjejóko sín it'é sín tí ntabáro la tjejótjenite sín tí nchísén tséya sín koche. Ntá kjaxin tí sín a k'uíyehé ch'in Jesús. ²²La ntá tuénxín kuitq̄he sín tí ntabáro la ko tí it'é sín ntá sákjuíchréhe sín tí ch'in Jesús.

Kjuakohé ch'in Jesús nchónhya chojni

(Lc. 6.17-19)

²³Ntá sákjuí ch'in Jesús nkuixín tí estado Galilea la kjuakoxín ch'án tí ninko Israel siín jnkojnko chjasin mé kjuako ch'án tí tan jina chrónka nkexrí tí kjuachaxin kuènte Dios la ko kjuínchekitq̄he ch'án jina kaín chojni chóna kaín xín chin la ko kaín kjuatjoté. ²⁴Ntá kaín xín tí sín tjejó tí estado Siria mé kuínhin sín kuènte Jesús la kjuíkq̄o sín kaín xín tí sín níhi

* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16 § 4:10 Deuteronomio 6.13

chónta kaín chin la ko tí sín imá tjetéhe sín la ko tí sín chónta nchakuen tí jínahya la ko tí sín t'aniáte sín la ko tí sín sixénká toté sín, la ntá ch'in Jesús mé kjuínchekitohe ch'án sín jína. ²⁵Ntá itsjé chojni kjuíchréhe tí ch'in Jesús, mé kjuixín sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjetoxin yaon tí ntario Jordán.

5

Kjuakoxin ch'in Jesús ijnko jna

¹ K'uikon ch'in Jesús kixin k'uejó nchónhya chojni la ntá chrin ch'án ijnko jna la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjeóntaxin sín tí tjen ch'án. ² Ntá ch'in Jesús kjuankixin kjuakohé ch'án sín kixin:

*Tí nkexro tjejó náxrjón
(Lc. 6.20-23)*

³—Náxrjón tjejó tí sín nohe kixin t'ichjánxinhin sín nkehe kuente Dios kixin ntá jehe sín mé tsochónta sín tí kjuachaxin kuente Dios.

⁴ Náxrjón tjejó tí sín t'áva kixin Dios mé sinchehéhe asén sín.

⁵ Náxrjón tjejó tí sín hnkehya asén kixin jehe sín mé ts'áyéhe sín tí nonte tsjanjon Dios.

⁶ Náxrjón tjejó tí sín éxi yóhe chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhe sín Dios ntá Dios tsjinkitsa sín kixin ts'áyéhe sín tí nkehe tjinkaon sín.

⁷ Náxrjón tjejó tí sín tikonóhe kichó sín kixin ntá Dios kjaxin tsjikonóhe tí jehe sín.

⁸ Náxrjón tjejó tí sín kótjóá asén kixin ntá jehe sín sátsjik'ikon sín Dios.

⁹ Náxrjón tjejó tí sín tjinkaon kjuaxroxin kixin Dios sinchek'in ch'án xjeen ch'án tí jehe sín.

¹⁰ Náxrjón tjejó tí sín kjónté tjejótxasótexin sín kixin kjuínchexiteyéhe sín Dios kixin ntá jehe sín mé kuente sín nkaya nkajni.

¹¹ Náxrjón tjejórá kjónté t'antaxínhanrá sín la ko ntachakonrá sín la ko kaín nkehe náxrjónhya ntácho sín kixin tinkachónkirá tí janhan. ¹² Chrókócháhará la ko kjuaxroxin chrók'uejorá kixin ntá chr'éxin jahará ts'ayéhérá ijnko nkehe antsí má jína nkaya nkajni. Mé xikaha kjuasóte tí sín k'uejó óse k'uechrónka sín tí itén Dios.

*Jahará la éxi yóhe xjinta la ko éxi xrohi t'inkaséyanxín chjasintajni
(Mr. 9.50; Lc. 14.34-35)*

¹³ Jahará mé yóhe éxi xjinta chjasintajni. A ntá tí chrók'uánkéhé tí jni tí xjinta la ntá xitjahya chrókójni inaá. Ninkehó chrókjuich'ehya xra la chrók'uikítjij nója la ko chrókuinkátja chojni.

¹⁴ A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá. ¹⁵ La ko kohya nkexro sinchek'ákjen ijnko lámpara ntá tsjak'e chrínki ijnko ntacajón. Íchá jína tsjak'e ch'án xrohi noi kixin ntá ts'inkaséyanxín kaín nkexro siin tí nchia tíha. ¹⁶ Mé xikaha tí jahará chrókóyóhará éxi tí xrohi t'inkaséyanxín kixin ts'íkon kaín chojni tí xra jína tjejoch'erá la ntá chrókjuanchehe sín kjuasáyé It'eni tjen nkaya nkajni.

Kjuako ch'in Jesús kuente tí ley

¹⁷ Jahará chróntáchróhyará kixin k'uinka kixin tsjakjían tí ley tsík'etgoan ch'in Moisés la ko tí nkehe kjuako tí sín k'uechrónka itén Dios. Náhi. Jehya xikaha k'uinka kixin tsjakjían tíha. Náhi. K'uinka janhan kixin tsjákoxian nkehe chaxín t'axrxjén tíha. ¹⁸ Chaxin xrxjanka kixin tí naxa tjen nkajni la ko chjasintajni la kohya ninkehó ley tsjinhya, mé tsjinhya nijnko punto la nijnko letra kuente tí ley tsjinxjian tsoxiteyá káin tí nkehe t'ichjánxín tsoxiteyá. ¹⁹ Mé xikaha tí nkexro tsitekakonhya tí nkehe k'uetgoan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsí tí kjuachaxin kuente Dios. A ntá tí nkexro tsitekaon la ko tsjakohé ókjé nkexro tsitekaon sín, mé antsí imá ts'etgoan sín tí tsí kjuachaxin kuente Dios. ²⁰ Méxra tjonkará kixin t'ichjánxín kixin antsí jína ts'ejorá la tsoyóahyará tí sín tjako ley la ko tí sín fariseo kixin tí tsoyóahyará sín la ntá xitjahya tsákjára tí kjuachaxin kuente Dios tjen nkaya nkajni.

*Kjuako ch'in Jesús kuente tí kjuanínkaon
(Lc. 12.57-59)*

²¹ Jahará tsíkinhínrá kixin tí sín óse tsík'ítuenhen sín kixin: "T'oyánhyará kíchuára* kixin tí nkexro t'óyan kichó mé t'ichjánxín tsjasóte sín." ²² A ntá janhan tjonkará kixin jnkojín nkexro tsoninkakonhen kichó mé t'ichjánxín tsjasóte. A ntá tí nkexro t'antaxínhin kichó la mé tí sín t'etgoan mé sinchekítogéxín ijje ch'án. La ntá tí nkexro tsootáche kichó kixin tsixénká ch'án la tíha mé sátsji tsjasótexin tí siin xrohi. ²³ A ntá tí tsjikuehérá Dios nkehe tsochjehérá

* 5:21 Éxodo 20.13; Deuteronomio 5.17

ch'án ntá tsjasanrá tí altar ntá tsoxráxinkáonrá tí jnkojín kichuárá kjuánjengoará sín²⁴ la ntá tí xíkaha la títoghérá tí nkehe tí altar la sátsjirá tsonixjehérá ch'án jnkojína kixin í tsokohya kjuanínkaon. La ntá tsjixin la ntá tsjihará tsjánjonrá tí nkehe tjinkáonrá tsjánjonrá.

²⁵ Tí síin jnkojín nkexro tjanchia jie tí jahará la tjinkaon chrókjuikoará ch'án juzgado, a ntá íchá jína jnkokoá chrókjuenkayáxinrá, jehe ch'án la ko jahará, ntía ó, kixin ntá sáchrókjuihará tí tjen ch'in juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policia kixin ts'ixenhenrá ntogechiso. ²⁶ A ntá chaxín tjonkará kixin tí ts'ikjahará sín ntogechiso la ts'axrxéjinxhará ntiha tsjixinjian tsjenkeherá sín kaín xín chichaon chontará.

Ch'in Jesús kjuako kixin chrókjuasinhya sín jie, chróchóntahya sín chojni chjin ókjé

²⁷ Jahará tsikinínrá tí nkehe tsik'ítuenhen tí sín ósé ntáchro kixin: “Chrókjuásinhyará jie, chróchóntahyará chojni chjin ókjé.”[†] ²⁸ A ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jie nkaya asén ch'án.

²⁹ A ntá tí ikuan chjina chrókjuásixián jie la chrókuakitsjenkiá ikuan la chróchr'an ikjín kixin íchá jína ts'ítjáyán it'o cuerpo kuéntá kixin jehya kuenté cuerpo kuéntá sátsji tsjasótéxín tí síin xrohi. ³⁰ A ntá tí itja chjina chrókjuásixián jie la chrókochrínjian tí tjá a la chróchr'an ikjín kixin íchá jína ts'ítjáyán it'o cuerpo kuéntá kixin jehya kuenté cuerpo sáchrókjuí tsjasóte tí síin xrohi.

Ch'in Jesús kjuako kixin chrók'uitjéhya kichó sín

(Mt. 19.9; Mr. 10.11-12; Lc. 16.18)

³¹ Kjaxín tsik'ítuenhen tí sín ósé kixin tí nkexro tjinkaon chrók'uitjéhi ichjién t'ichjánxin ts'óna xroon tsakja tí ichjién kixin ts'ítjéxín kichó sín.[†] ³² A ntá janhan tjonkará kixin ijnko nkexro tsjákehe ichjién tí chróchóntahya tjan ókjé nkexro la jehe ch'án kuitohe ch'án tjan kixin tsjasín tjan jie. A ntá tí nkexro tsotéhe ijnko tjan tsikítsinke la kjaxín ó kjuasin ch'án jie.

Ch'in Jesús kjuako kixin chjínhya chrók'uákjenxinni ihnié Dios

³³ Kjaxín tsikinínrá tsik'ítuenhen tí sín ósé kixin: “T'ichjánxin sijnchexiteyará tí nkehe tsintáchrórá kixin chrók'uákjenxinhyará ihnié Inchéni chjini.”[§] ³⁴ A ntá janhan mé tjonkará kixin chrók'uákjenxinhyará ihnié Dios ninkehó la ko chrók'uákjenxinhyará nkajni kixin ntaha tjen Dios t'etóan. ³⁵ La ko chrók'uákjenxinhyará chjasintajni kixin ntaha tjeókjén toté ch'án la ko chrók'uákjenxinhyará chjasín Jerusalén kixin ntiha la itjen tí Rey t'etóan. ³⁶ La tjenkayáxixinhyará ikjárá ó kixin jahará xitjahya tsjakérá ijnko kaxjhi tjóá o njnko kaxjhi tié. ³⁷ Tí nkehe tsontáchrórá chaxín la chaxín la tí nkehe náhi la náhi la kohya nkehe chrókjuakét'oxinrá chróchronkará. A ntá ichrén nkehe tjakét'oxinrá tsochronkará la táha mé jínahya.

Ch'in Jesús tjako ch'án kuénte tí sín t'ítjáyenyha ichrén kjuanínkaon

(Lc. 6.29-30)

³⁸ Jahará mé ó tsikinínrá tsik'ítuenhen tí sín ósé kixin tí takitsjenki sín ikonrá la kjaxinrá chrókuakitsjenkirá ikon sín. A ntá tí chrókuakitsjenki sín nenórá la kjaxinrá chrókuakitsjenkirá neno sín kjaxín.* ³⁹ A ntá janhan mé tjonkará kixin tí jnkojín nkexro ichrén nkehe jínahya sit'ahará la jahará ch'ehyará xíkaha. Náhi. Tí chjéhe ijnko nkexro ijnko tuagan la ntá tjóka tí í jnko nánko tuagan. ⁴⁰ La tí síin jnkojín nkexro tjanchia jie la tjinkaon sín chrókuakitsjaha sín camisá la títoghé sín sátsjiko sín tí ka t'ínkayate kjaxín. ⁴¹ La tí t'etuanhanrá sín tsámárá nkehe ijnko kilómetro la tjakét'oxinrá í yaá kilómetro. ⁴² Tí jnkojín nkexro tsjanchia nkehe la tí tjinkaon ch'án nkehe la chróntáchrohyará kixin “náhi”, chrókjuinchejénrá ch'án.

Tjuèhérá tí sín nínkakonhanrá sín

(Lc. 6.27-28, 32-36)

⁴³ Kjaxín ó tsikinínrá tsik'ítuenhen tí sín ósé kixin: “Tjuèhérá tí nkexro choxinrá la tsóninkákonhénrá tí sín jínahya kjuít'ahará.”[†] ⁴⁴ A ntá janhan mé tjonkará kixin chrójtjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkitsará tí sín tjinkakonhya tí jahará la chrónixjehérá Dios kixin chrókjuinkitsa ch'án tí sín t'ántaxinhanrá la ko tí sín t'ahará tí jínahya. ⁴⁵ Tí xíkaha sich'erá la ntá jahará chaxín xjeen It'eni tjen nkaya nkajni kixin jehe ch'án mé t'etóan ch'án tsjítton yaon ts'ínkaséyehenhen tí sín jínahya la ko tí sín jína la ko kjaxín t'etóan ch'án kixin ts'aniá ichrin tí sín tí sín jína la ko tí sín jínahya. ⁴⁶ Tí jehó tjuèhérá tí nkexro tjuàhará, ¿la ntá nkehe chrókjuachará? A ntá kjaxín tí sín nchejénki la xíkaha ch'e sín. ⁴⁷ La tí jehó nixjehérá tí sín kichuárá la ntá, ¿á chaxín imá

[†] 5:27 Éxodo 20.14; Deuteronomio 23.21 [‡] 5:31 Deuteronomio 24.1-4 [§] 5:33 Números 30.2; Deuteronomio 23.21

* 5:38 Éxodo 21.24; Levítico 24.20; Deuteronomio 19.21 [†] 5:43 Levítico 19.18

jína tíha ní? Kíxin tí xíkaha la kjaxin tí sín chónhya Dios la xíkaha ich'e sín. ⁴⁸ Kjaxinrá jahará ntoá chrók'uejorá káxin It'éní tjen nkaya nkajní la antsí má ntoá tjen ch'án.

6

Kjuako ch'in Jesús kuènté tí xra jína

¹ Chrókjuásixinhyará kjuaxroan tí nkehe tinkachónkirá káxin tjinkáonrá chrók'uikon chojni ó. A ntá jahará tí xíkaha chrókjuich'erá ntá It'éní tjen nkaya nkajní la ninkehó nkehe tsotjáhyará ch'án. ² Tí tjinkítsará ijnko chojni nóa la ninkexró chróchenkahará. Jahará chrókóyóghyará tí sín ntoáhya tjenkayáxin ixri t'óxroan káxin mé xíkaha ch'e sín t'óxroan sín nkaxenhen njnko la ko tí ntá káxin chrók'uikon chojni la chrókjuikosáyehe sín tí jehe sín káxin jína tjejóch'e sín. A ntá janhan ntáxrjan káxin ó kjuixin k'uáyéhe sín nkehe la í ts'áyéhya sín inaá. ³ A ntá tí jahará tío chrókjuinkítsará ijnko chojni chaxín nóa la ichá jína káxin chrókónoehya ninkexró kjónté ijnko nkexro tjuá jína. ⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'éní ts'ikon ch'án káxin xíkaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'in Jesús nkexrí tsonixjeheni Dios
(Lc. 11.2-4)

⁵ A ntá tío nixjehérá Dios la jehya éxí tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin tqté sín nkaxenhen njnko la ko ts'ejó sín esquina calle kuènte ntain káxin ts'ikon kaín chojni káxin tjeónixjehé sín Dios. Ntá janhan chaxín ntáxrjan káxin jehe sín la xíkaha kjuich'e sín la ó kjuixin k'uáyéhe sín nkehe la í ts'áyéhya sín inaá. ⁶ A ntá tío nixjehérá Dios la t'ixenhénrá nchia ntógará la t'ikjehérá tí puerta la nixjehérá It'éní káxin ntaha tjekoará ch'án. A ntá jehe ch'án ts'ikon káxin xíkaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ Ntá tío chrónixjehérá Dios la chrókjateehya chrónixjará káxin chrókóyóghyará éxí tí sín chónhya Dios káxin jehe sín tjenkayáxin sín káxin nchónhya tsonixja sín, la mé xíkaha mé chrókuinhin Dios, ichro sín. ⁸ A ntá jahará chrókóyóghyará éxí tí jehe sín. It'éní ó nohe ch'án nkehe t'ichjánxinhanrá kjónté naxá tjanchéhyará ch'án. ⁹ Méxra xíkahi chróntáchrórá: It'éní tjen nkaya nkajní jaha imá tjóá.

¹⁰ Chrókui tí kjuachaxin kuènta.

Chrókjuich'e tí nkehe tóxrjínhan jaha ntihi chjasintajni éxí tjech'e nkaya nkajní.

¹¹ Ijie la tsánjuan tí niqtja t'ichjánxinhiní.

¹² T'oxíka tí nkehe jínahya kjuich'eni káxin kjaxin jeheni ts'itjáyenheni tí nkehe kjuich'eheni chojni.

¹³ Tjtoéhyani káxin xrahya chrókjuasinni jie. Nchekaáni kaín tí jínahya chrókónheni,

káxin jaha mé kuèntá tí kjuachaxin káxin ó noheni káxin jaha tjetétoan tí kjuachaxin jnkochríxín. Amén.

¹⁴ Tí jahará ts'itjáyanhanrá tí nkexro kjuasinhánrá ichrén jie la mé kjaxin It'éní tjen nkaya nkajní mé ts'ikon ch'án káxin xíkaha kjuich'erá la ntá kjaxin jehe ch'án ts'óxíka ch'án tí jie kjuásinrá. ¹⁵ A ntá tí jahará ts'itjáyanhyará tí jie kjuasinhánrá í jnko chojni la ntá kjaxin It'éní tjen nkaya nkajní ts'ikon káxin xíkaha kjuich'erá k'uitjáyanhyará la ntá kjaxin jehe ch'án la ts'óxíkahya ch'án tí jie chontará.

Ch'in Jesús kjuako káxin chrók'óxroanhya sín káxin kjónehya sín

¹⁶ A ntá tí jahará tí naxá kjóntehyará káxin tjinkáonrá tsonixjehérá Dios la ntá chrók'uejohyará éxí t'avará éxí ch'e tí sín jehya jnkojínxón tjenkayáxin sín. Mé xíkaha ch'e sín káxin tjinkaon sín ts'ikon chojni káxin naxá kjónehya sín. Tí xíkaha ch'e sín la janhan ntáxrjan káxin ó kjuixin k'uáyéhe sín nkehe la í ts'áyéhya sín inaá. ¹⁷ A ntá tí jahará kjónté naxá kjóntehyará káxin tjinkáonrá tsonixjehérá Dios la t'ontirá ikonrá la tjéntoará kjará ¹⁸ káxin tsonoehya chojni káxin naxá kjóntehyará. Jehó It'éní tjekoará ntiha mé jehe ch'án nohe ch'án xíkaha ntá tsjanjon ch'án nkehe ts'ayéhérá.

Tí nkehe chaxín tje te síin nkaya nkajní
(Lc. 12.33-34)

¹⁹ Jahará chrókjuásitonhyará nkehe tje te ntihi chjasintajni káxin ntihi la ts'ín kué tí nkehe tje te sinchek'itjáyanhanrá va la ko tsóchjisen tí chichaon la ko xíchee ts'ixenhen tsaáhará.

²⁰ Íchá jína tjásitonrá tí nkehe tje te nkaya nkajní káxin ntaha kohya iko sinchek'itjáyan nkehe la tsóchjisenhya tí nkehe la ko kohya xíchee ts'ixenhen tseé. ²¹ A ntá tí nkaya nkajní tsóchontará nkehe tje te la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo
(Lc. 11.34-36)

²² "Tí ikonrá mé éxí yóhē ijnko xrohi t'inkáséyanxín tí cuerpo kuèntará. Tí jína ikonrá la ntá kjaxin kuènté tí cuerpo kuèntará mé chóna xrohi. ²³ A ntá tí ikonrá la jínahya la ntá kuènté tí cuerpo kuèntará la sítié tjen. A ntá tí chrókjuak'ehya tí xrohi la ntá antsí má chrókjuinchetie tí sítié.

Dios la ko tí chichaon

(Lc. 16.13)

²⁴ 'Kohya ninxeró tsjacha sich'ehe xra yaá lamó. Tí xikaha chrókjuich'e ch'án la ntá ijnko tsonínkakonhen ch'án la tí ijnko tsojtjuèhe ch'án o ijnko la tsitekakonhen ch'án la tí ijnko la tsitekakuenhya ch'án. Méxra xitjahya chrókjuich'ehe chojni xra Dios tí tjinkaon sín chróchóna sín itsjé chichaon.

Dios mé t'áyakonhen tí xjeen ch'án

(Lc. 12.22-31)

²⁵ A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uitsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuèntará, a ntá kánhyó sínkí tí ka chrók'uitsará? ²⁶ Xráinkáonrá nkexrí siín tí koxroxé xritjaka. Jehé va la t'enkahya va noa la ko tjáhya va la ko chóntahya va nketí ts'inkachjinayá va tí noa, la kjánchó It'eni tjen nkaya nkajní la tjanjon ch'án nkehe sine va. A ntá jahará mé antsí tjeotan a ntá tí koxroxé la kénhyó. ²⁷ ¿Á tjejó jnkojinrá tjenkayáxinrá kixin tí chrókóxakonhanrá imá a ntá naxa chrók'uankirá it'ó metro ntétoxinrá inaá?

²⁸ ¿Nkekuènté kixin imá tóxakonhanrá ikará ó? Tsjehérá nkexrí sí'tánkí tí catsjo siín nteje. Tí itsjo la ní ch'ehya xra la ko tjonhya. ²⁹ La tjonkará kixin kjónté ch'ín rey Salomón k'uéchóna itsjé chichaon la naxa kjuíncheyóehya ch'án nkexrí náxrjón tsjehé tí tsjo a. ³⁰ A ntá tí Dios la nchek'itsa tí ka yoa siín nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuènté titekákonhyará ch'án? ³¹ Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uitsará. ³² Kain tí nkehe la tí sín chónhya Dios mé tóxakonhen sín tíha. A ntá jahará chontará It'eni tjen nkaya nkajní la mé nohe ch'án kain nkehe t'ichjánxinhanrá. ³³ A ntá senó mé chrókjuéyará tí kjuachaxin kuènté Dios la chrókjuinchexiteyará tí nkehe jína tjinkaon ch'án, a ntá jehé ch'án mé tsjanjon ch'án kain nkehe t'ichjánxinhanrá. ³⁴ Tóxakuanhyará tí nkehe tsonhen ntóye xikaha kixin ntóye la ijnko yaon táha la jnkojnko yaon tjikao kjuaxikaon kuènte.

7

Chrók'uantaxienhyará kichuará

(Lc. 6.37-38, 41-42)

¹ 'Chrókuékahyará ókjé chojni jie kixin ntá Dios kjaxin chrókjuanchahya jie tí jahará. ² A ntá Dios la tsjanchia ch'án jie tí jahará tí tsékará ókjé chojni jie. A ntá tí xikaha sich'erá la mé xikaha tsonhanrá kjaxin. ³ ¿A ntá nkekuènté tsjehé tí chjinínó ntsí tjenkánkí ikon tí kichuá tí naxa ántosán tí inta jie tjenkánkí ikuan? ⁴ A ntá tí chonta jaha tí nta jie tjenkánkí ikuan, ¿a ntá nkexrí kixin chróntáche tí kichuá kixin: "Títoghé tsakitsjenkíni tí chjinínó ntsí tjenkánkí tí kuan?" ⁵ A ntá jaha la ntoáhya tjenkayáxian. Senó chrókuakitsjenkiá tí nta jie tjenkánkí ikuan kixin ntá chrók'uiquan tsakitsjenkiá chjinínó ntsí tjenkánkí ikon tí kichuá.

⁶ 'Chróhjeéhyará tí nkehe tsikótjótá tí konja kixin jehé va tsokjan va tsonínkakonhanrá va ntá sinchekuenrá va. La ko kjaxin chróhjeéhyará tí chohino tí xro perla tjeote kixin tsinkátja va la tsokuen.

Tjanchia la tjéyá la t'inka puerta

(Lc. 11.9-13; 6.31)

⁷ 'Tjanchiará nkehe la Dios tsojtjehará. Tjéyará nkehe la ts'itjará. T'inkará puerta la ntá tsoxitjehé. ⁸ Kixin tí nkexro tjanchia nkehe la ts'áyehé tí nkehe la tí nkexro tjejá nkehe la ts'itja la tí nkexro t'inka puerta la tsoxitjehé.

⁹ '¿Á tjejó jnkojin nkexro ntihi chrókjuanjon xro chrókjóné xjeen tí chrókjuanchia xjan niotja? Kja náhi. ¹⁰ Q tí chrókjuanchia xjan ijnko koche la, ¿á chróhjehe ch'án tí xjeen ch'án konche chrókjóné ní? Kja náhi. ¹¹ A ntá jahará kjónté jínahyará la ó nohará nkehe jína chjehérá xjaanrá. A ntá It'eni tjen nkaya nkajní kjaxin antsí tsochjéhe ch'án nkehe jína tí nkexro tsjanchia nkehe.

¹² 'Méxra xikaha chrókjuikosáyehérá kichuará éxí yóhē nkexrí tjinkáonrá chrókjuikosáyahará sín mé xikaha k'uetqan ch'ín Moisés la ko xikaha ntáchro tí xroon kuènté tí sín k'uéchónka itén Dios ósé.

*Tí puerta tekahya**(Lc. 13.24)*

¹³ T'ixeenxínrá tí puerta tekahya. Kíxín tí puerta la ko tí ntja ts'itjáyanxín chojni la imá iton la ko teka la nchónhya chojni sátsji tí ntja ntiha. ¹⁴ A ntá tí puerta la ko tí ntja sátsjixínni tí kjuachón la tekahya ntiha la ko tsjéhya chojni ts'itja tí ntja a.

*Tí to mé tjátsoanxínni tí nta**(Lc. 6.43-44)*

¹⁵ Méxra tóxakonhanrá tí ts'ikonrá itsi tí sín ch'ia tsonáchro sín kíxín kjaxin sín nixja sín itén Dios. Jehé sín la chrítaón ó tjoé kolélo ó, a ntá nkaya la kolobo jjehe. ¹⁶ Jahará la chrókjuátsoanxínrá tí jehé sín kíxín tí xra ch'e sín kíxín tí ntach'i la xitjahya chrók'óna to uva la ko tí kach'j xitjahya chrók'óna to higo. ¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína. ¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína. ¹⁹ Kaínxín tí nta t'ónahya to jína mé tsochrínjin la tsoche. ²⁰ Mé xikaha chrókjuátsoanxínrá jahará tí sín jehya jína kíxín tí xra tjejóch'e sín.

*Jehya kaín chojni ts'ixenhen tí kjuachaxién Dios tjen nkaya nkajní**(Lc. 13.25-27)*

²¹ Kénhya chojni tsonáchro: “Ìnchéni, Ìnchéni”, mé ts'ixenhen sín tí kjuachaxién Dios tjen nkaya nkajní. Náhí. Jehó tí nkexro sinchexitéyá tí nkehe tóxrínjin T'aná t'etqan tjen nkaya nkajní. ²² Tsjixraká tí yaon a la ntá itsjé sín tsonáchro sín kíxín: “Ìnchéni, Ìnchéni, k'uénixjaxínni ihnjá la ko tí ihnjá mé kuakitsjexínni nchakuen tí jínahya la ko kjuachaxién ihnjá kjuasixínni nchónhya kjuaxroan.” ²³ A ntá janhan tsjatahā kíxín: “Janhan la chonhya tí jahará. Tjtonará sátsjirá kíxín jahará imá jínahyará.”

*Ch'ín Jesús kjuíncheyóexin ch'án kíxín yaá nchia**(Lc. 6.47-49; Mr. 1.22)*

²⁴ Méxra tí nkexro tinhin tí nkehe ntáxrjan la titekaon ch'án la jehé ch'án mé éxí yóhé ijnko nkexro chóna kjuaxrexinkaon jína la kjuích'éna nchia chrítaón tjo. ²⁵ A ntá xrinahya xrakoa chrin, ikui yeé ntánniche la tjjan chjéhe xrinto la kjónté xikaha la xikahya tí nchia kíxín itjo tjekjen nchia. ²⁶ A ntá tí nkexro tinhin tí xrjanka la titekakonhya mé jehé la éxí yóhé ijnko nkexro lontj la kjuích'éna ch'án ijnko nchia tí síin nchesen. ²⁷ La ntá xrinahya xrakoa chrin ntá antsí kóyeé ntánniche tí tsaka la ko chjéhe xrinto la ntá xíka tí nchia, la ijnko kjuachrakon kónhen tíha.

²⁸ A ntá tíó kjuixin nixja ch'ín Jesús la ntá imá chrakon tí chojni kíxín nkexrí kjuako ch'án. ²⁹ Kíxín kjuako ch'án éxí ijnko nkexro chóna imá kjuachaxin la tóyóehya ch'án tí sín maestro kjuako tí ley.

8*Ch'ín Jesús kjuínchekitohe jína ijnko chojni chóna chin lepra**(Mr. 1.40-45; Lc. 5.12-16)*

¹ A ntá ch'ín Jesús k'uínkajinxín ch'án tí jnā la chréhe nchónhya chojni. ² La ntá kóchjina ijnko ch'ín nihi chóna chin lepra la kjuák'exín toch'in ch'án nkayakon ch'ín Jesús la ntáchro ch'án kíxín:

—Ìnchéni tí tjínkavan la jína chrókjuínchekitohéni jína —ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntáchro ch'án kíxín:

—Méxra xikaha tjínkavan. Ntá jie sintakitoha jína.

A ntá tuénxín kuitóhe ch'án jína la ó kjuiin tí chin k'uéchóna ch'án.

⁴ La ntá ntáchro ch'ín Jesús kíxín:

—Ninkexró chenkahya ntihi. Jehó sátsja tjákohé tí ch'ín nchat'á kíxín kuitóha jína la ko sátsjioa tí nkehe tsík'etqan ch'ín Moisés* kíxín ntá xikaha tsoñoexín kaín xín chojni kíxín ó kuitóha jína —mé xikaha k'uetoan ch'ín Jesús.

*Ch'ín Jesús kjuínchekitohe jína ijnko nkexro ch'ehe xra ijnko capitán romano**(Lc. 7.1-10)*

⁵ A ntá tíó k'uixenhen ch'ín Jesús chjasin Capernaum la ntá xrinahya kóchjina ijnko capitán romano la chrónba ch'án ⁶ ntáchro ch'án kíxín:

—Ìnchéni ntóeni itjen ijnko ch'ín ch'ehe ni xra mé nihi ch'án, tjetsínka ch'án, tsík'en toté ch'án la imá tjotéhe ch'án —ichro ch'án.

⁷ A ntá ch'ín Jesús kjuátehe ch'án ntáchro ch'án kíxín:

—¿Á sátsja sintakitoha jína tí ch'ín a? —ichro ch'án.

⁸ Ntá tí ch'ín capitán kjuátehe kíxín:

* 8:4 Levítico 14.1-32

—Náhi, Ìnchéni, tósuèheni kixin chrók'uixenhén ntoneni kixin jehya chojni jínani. Jehó chrók'juánjuan kjuachaxin kuéntá, ntá tí ch'ín ch'e'heni xra chrók'uitóhe ch'án jína. ⁹ Janhan na kjaxin chonta chojni t'etuanna la ko kjaxin janhan tétuanhan tí sín soldado. Tió tétuanhan ijnko sín sátsji sín la ntá ó sátsji sín. La kjaxin tió tétuanhan ijnko sín kixin xrakoa sín la mé tji sín. La ko tió tétuanhan ijnko nkexro ch'ena xra kixin sich'e xra la ich'e xra —ichro ch'án.

¹⁰ Ntá kuínhin ch'ín Jesús ntá kóxakonhen ch'án kixin xikaha chro tí ch'ín a, ntá nixjehe ch'án tí sín chréhe ch'án ntáchro ch'án kixin:

—Chaxin ntáxrjan kixin kuénté tí nació Israel la k'uitjahya janhan ninkexró tinkáchónki xikaha éxi tinkáchónki tí ch'ín i. ¹¹ Janhan xrjanca kixin nchónhya chojni ókjé tjiixin tí tjitóxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuénte Dios. ¹² A ntá itsjé tí sín chrók'uejó tí tjen tí kjuachaxin kuénte Dios la ts'axrjéxin sín ntiha, sátsji sín tí sítié la ntaha tsotsjánka sín la sinetaón neno sín.

¹³ La ntá ch'ín Jesús mé nixjehe ch'án tí ch'ín capitán ntáchro ch'án kixin:

—Sátjia ntó. Éxi kuitekávan jaha la tsoxiteyá tsonhen tíha —ichro ch'án.

La ntá tí ch'ín ch'e xra la o tuénxin tí hora a tsíkitohe ch'án jína.

Ch'ín Jesús kjuínchekitohe ich'ee ch'ín Pedro jína

(Mr. 1.29-31; Lc. 4.38-39)

¹⁴ A ntá sákjuí ch'ín Jesús tí ntóe ch'ín Pedro la ntaha k'uikon ch'án kixin tí ich'ee ch'ín Pedro la níhi tjan tjesínka tjan la chónta tjan sóa. ¹⁵ Ntá itsé ch'án itja tjan la ntá kjuínhin tjan tí sóa la ntá k'uínkatjen tjan la kjuankíxin yaxínhin tjan kixin tsjanjon tjan nkehe sine sín.

Ch'ín Jesús kjuínchekitohe nchónhya tí sín níhi jína

(Mr. 1.32-34; Lc. 4.40-41)

¹⁶ La ntá tí ó kóntanone ntá kjuikohe sín ch'ín Jesús nchónhya chojni chónta nchakuen tí jínahya. La ntá jnkokoá nixja ch'án la k'uaxrjéxin tí nchakuen tí jínahya tí jehé sín la kjaxin kjuínchekitohe ch'án jína káin tí sinníhi. ¹⁷ Mé xikaha kjuích'e ch'án kixin tsoxiteyá tí nkehe tsichrónta tí ch'ín Isaias tí ch'ín k'uéchrónka itén Dios. Mé ntáchro ch'án xikíhi: “Jehé ch'án kuákja ch'án tí chin chóntani la ko jehé ch'án kuámá ch'án tí kjuatjoté.”† Mé xikaha ichro itén Dios.

Tí sín tjínkaon tsochréhe tí ch'ín Jesús

(Lc. 9.57-62)

¹⁸ Tió k'uikon ch'ín Jesús kixin nchónhya chojni k'uántatjen sín ch'án la ntá k'uetóan ch'án kixin ts'átóye sín í jnko chrínta ntá. ¹⁹ La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kixin:

—Maestro tjínkaonni chróchréheni tí jaha kjónté nketi tjínkávan sátsjia —ichro tí ch'ín a.

²⁰ La ntá kjuátehe ch'ín Jesús ntáchro ch'án kixin:

—Tí koxrónta chónta va itjuéé va la ko tí koxroxé chónta va kaké va. A ntá tí Xjeen Dios K'óna Chojni mé chóntahya nketi ts'ók'èxin ch'án.

²¹ A ntá ijnko tí chojni k'uájiko ch'án, mé ntáchro ch'án kixin:

—Ìnchéni, títóhéni senó sátsjikjaváni it'éni —ichro ch'án.

²² La ntá kjuátehe ch'ín Jesús ntáchro ch'án kixin:

—Náhi, chréhé tí janhan. Títóhé kixin tí chojni tsík'en la jnkokón sín tsík'en tsjavá kichó sín —mé xikaha ichro ch'ín Jesús.

Ch'ín Jesús kjuínchek'ixrata tí xríntó la ko tí ntá

(Mr. 4.35-41; Lc. 8.22-25)

²³ Ntá ch'ín Jesús k'uixenhen tí ntábárcó la k'uixenko ch'án tí sín k'uájiko ch'án. ²⁴ La ntá xrinahya imá síchrica ntá la ó chjina sítikia ntá tí ntábárcó. La kjánchó ch'ín Jesús la tjejava ch'án. ²⁵ La ntá tí sín k'uájiko ch'án kjuínchek'aya sín ch'án la ntáchro sín kixin:

—Ìnchéni nchekaáni kixin tí ntábárcó la ó meró ts'aniánkí ntá —ichro sín.

²⁶ Ntá kjuátehe ch'án ntáchro ch'án kixin:

—¿Nkeuénté kixin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xikaha ntá k'uaya ch'án la k'uetuénhen ch'án tí xríntó la ko tí ntayaon la ntá tuénxin k'uixrata. ²⁷ La ntá imá chrakon sín la ntáchro sín kixin:

—¿Xá nkexro tíhi? Kjónté xríntó la ko ntayaon la mé nchexiteyéhe ch'án —ichro sín.

Tí sín chónta nchakuen tí jínahya tí nonte Gadara

(Mr. 5.1-20; Lc. 8.26-39)

²⁸ Ntá tió k'uatóye ch'ín Jesús tí ntayaon a ntá kjuíji sín tí nonte Gadara. La ntá yaá chojni chónta nchakuen tí jínahya k'uaxrjéxin tóyé chojni tsík'en la kóchjinehe sín ch'án. Jehé sín mé

imá jiehe sín la kohya ninkexró tjacha ts'atsínka tí ntja ntiha. ²⁹ La ntá kjuankíxin k'óyako sín ntáchro sín kíxin:

—Tjiatéhya jaha tí jeheni jaha Jesús mé Xjeen Dios. ¿Á k'uinka ntihi kíxin sínchekjasóteni kjónte naxá kjuixrakáhya tí yaon tsjasóteni? —ichro sín.

³⁰ Á ntá ntiha kánhyó kjín sín itsjé cochíno xrine va. ³¹ La ntá tí nchakuen tí jínahya mé chrónóghé tí ch'ín Jesús kíxin:

—Tí tsétqan kíxin sátsjini la chrókuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kíxin:

—Tí xikaha la sátsjia —ichro ch'án.

La ntá tí nchakuen tí jínahya a mé k'uaxrjéxin tí chojni la k'uixenhen tí cochíno. La ntá kaín xín tí cochíno kuinká va, k'uínkajínxin va ntiha kjuítsínkayá va tsáka, ntá kjuítsínkankí va ntá, kjuínhin va ntá.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchénta tí nchakuen tí jínahya. ³⁴ Á ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kíxin xikaha tsíkónhen la chrónóghé sín ch'án kíxin sáchrókjuí ch'án ókjé.

9

Ch'ín Jesús kjuínchekitqhe jína ijnko chojni tsík'en toté

(Mr. 2.1-12; Lc. 5.17-26)

¹ La ntá kjuíxin tíha ntá ch'ín Jesús mé k'uixenhen ch'án ijnko ntabárcq la k'uátsínka ch'án í jnko lado chrínta ntá la kjuíji ch'án chjasén ch'án. ² Á ntá ntiha kuíkqo sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kíxin chaxín tinkáchónki sín ch'án la ntá nixjehe ch'án tí sjíníhi ntáchro ch'án kíxin:

—Xjeenni nchechéhé asán. Tí jie chonta la ó kjuíxin kjuínhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kíxin:

—Tí ch'ín i mé ncheyóhe ch'án asén ch'án Dios kíxin xikaha nixja ch'án.

⁴ Ntá ch'ín Jesús mé ó nohe ch'án kíxin nkehe tí kjo sín asén sín ntá ntáchro ch'án kíxin:

—¿Nkeuènté kíxin xikaha jínahya tjenkayáxinrá? ⁵ ¿Nkehe antsí xrahya chróntátjan ch'án?

¿Á antsí xrahya chróntátjan ch'án kíxin ó kjuíxin kjuínhin ch'án tí jie yamá ch'án o á antsí xrahya chróntátjan ch'án kíxin chrók'uínkatjen ch'án sáchrókjuí ch'án? ⁶ Méxra tsjáqoxian kíxin tí Xjeen Dios K'óna Chojni mé ntihi chjasintajni chóna kjuachaxin tsjakjínhin ijje chojni.

Ntá ntáche ch'án tí sjíníhi a kíxin:

—Ijie la t'ínkatjen tjatsíyan kaniqa na sátsjia ntqo —ichro ch'án.

⁷ Ntá tí ch'ín tsík'en toté na tuénxín k'uínkatjen ch'án la sákjuí ch'án ntqo ch'án. ⁸ Ntá kaín tí sín siín ntiha k'uíkon sín kíxin xikaha kónhen la imá chrakon sín la kjuanchehe sín Dios kjuasáya kíxin tí nkexro imá kjuáqoxín ch'án kjuachaxin kuènte Dios.

Ch'ín Jesús k'uíyehé ch'án tí ch'ín Mateo

(Mr. 2.13-17; Lc. 5.27-32)

⁹ Á ntá ch'ín Jesús sákjuíxin ch'án ntiha la k'uíkon ch'án ijnko ch'ín it'ín Mateo tjetjāxin ch'án ntiha nchekjénki ch'án. Ntá ntáchro ch'ín Jesús kíxin:

—Chréhé tí janhan —ichro ch'án.

Ntá ch'ín Mateo tuénxín k'uínkatjen ch'án chréhé ch'án tí ch'ín Jesús.

¹⁰ Á ntá chr'éxin ch'ín Jesús kjuák'e ch'án ntqo tí ch'ín Mateo la ntaha xranjon nkehe sine ch'án la ntá itsjé tí sín nchekjénki la ko í so sín chóna jie mé kjuíji sín la kjaxín kjóneko sín tí ch'ín Jesús la ko tí sín k'uájiko ch'án. ¹¹ La ntá tí sín fariseo kjaxín k'uíkon sín xikaha la kjuanchankíhi sín tí sín k'uájiko ch'ín Jesús, ntáchro sín kíxin:

—¿Nkeuènté kíxin tí ch'ín maestro kuèntará mé neko ch'án tí sín nchekjénki la ko tí í so sín chóna jie? —ichro sín.

¹² Ntá ch'ín Jesús la kuínhin ch'án nkehe tí tjo sín la ntáchro ch'án kíxin:

—Tí sín niehya la t'ichjánxienhya sín nkexro sich'e xroan. Náhí. Jehó tí chojni níhi mé t'ichjánxínhin sín nkexro sich'ehe sín xroan. ¹³ Sátjirá la ts'ítjará nkexrí t'axrjéxin tí nkehe ntáchro xroon itén Dios. Mé ntáchro kíxin: “Janhan tjínkavan kíxin chrókjuíkonóghérá chojni la tjínkakonhya kíxin chrók'oyánrá iko chrókjuánjonrá.”* Mé xikaha ichro itén Dios. Janhan na k'uínkahya ntihi kíxin chrók'uíyaha chojni jína tjejó. Náhí. K'uinka kíxin ts'iyaha tí chojni chóna jie kíxin chrókuitqhe sín tí ijje sín ntá chrókjuíki sín tí tjenkayáxin sín —ichro ch'án.

* 9:13 Oseas 6.6

Kjuanchankí sín kuènte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhí sín ch'án, ntáchro sín kixin:

—Jeheni la ko tí sín fariseo la jnkoyaxon nehyaní, a ntá tí sín xrikoá la, ¿nkekuènte xikahya ch'e sín? —ichro sín.

¹⁵ Ntá kjuátehe ch'ín Jesús, ntáchro ch'án kixin:

—¿Xá chrók'uává kaín tí sín tsik'íyehé sín tsochjina tsothehe ijnko chojni kixin naxa tjen tí ch'ín tsikótehe tjejóko sín ntiha? A ntá tsixraká ijnko yaon tsotsé sín tí ch'ín tsikótehe sátsjiko sín ch'án ntá kaín tí sín tsikóchjina mé ts'ává sín la í sinehya sín.

¹⁶ Nijnko chojni chrókjuak'eniéhe tí ka ó ntaxin it'ò ka nixin kixin ntá chrókjuixéhe tí ka nixin chrók'uitjjan tí ka ntaxin ntá antsí má chrók'uichje. ¹⁷ La ko kjaxin éxí yóhe chrókjuikahya chojni xranvino nixin ijnko tjuaxran ó ntaxin kixin tí xikaha chrókjuich'e sín ntá chrók'uichje tí tjuaxran ntaxin. Ntá chrók'uitjýan tí xran la ko chrók'uitjýan tí tjuaxran. Ntá tí xranvino nixin chrókjuika ijnko tjuaxran nixin la ntá xikaha la yóí nkehe chrók'uitjýanhya.

Ch'ín Jesús kjuínchexechón tí tjachjin xjeen ch'ín Jairo la ko kjuínchekitohe jina ijnko tjan kuákóxin iké ch'án

(Mr. 5.21-43; Lc. 8.40-56)

¹⁸ Ntá naxa tjenixja ch'ín Jesús la ntá ikjui ijnko ch'ín t'etóan kuènte tí sín judío la kjuák'exín toh'ín ch'án nkayakon tí ch'ín Jesús la chrónóehé ch'án kixin:

—Tí xjanna na ntá kjuixin k'uén. Xrjanóaha sáchrókjuini chrókjuakétja tjá jehe tjan ntá chróxechón tjan —ichro ch'án.

¹⁹ Ntá k'uínkatjen ch'ín Jesús ntá sákjuíko ch'án tí ch'ín a la ko sákjuíkotoxin ch'án tí sín k'uájiko ch'án. ²⁰ A ntá itjen ijnko chojni chjin níhi tjan, ó teyó nánó chóna tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákóxin tjan tí iké ch'án ²¹ kixin tjenkayáxin tjan kixin kjónté chrínta iké ch'án ó chrókuákóxin tjan, la táhó chrókuitóexin tjan jina. ²² Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítóha jina kixin kuítekáván tí janhan —ichro ch'án.

Na ntá tuénxín ó kuítóhe tjan jina.

²³ Ntá tió kjuíji ch'ín Jesús ntóe tí ch'ín judío t'etóan la k'uíkon ch'án kixin ó yaxínhin tí sín músico kixin ó sátsjixravá xjan. La kaín tí chojni tsikójnkontsé la tsjánkamá sín xjan. ²⁴ La ntá ntáchro ch'ín Jesús kixin:

—Tí xjan méhe títóherá, kixin tsik'enhya xjan, la tjejua xjan ó —ichro ch'án.

Ntá kjuanoá sín ch'án. ²⁵ A ntá tí k'uaxrje kaín chojni la ntá ch'ín Jesús la k'uixenhen ch'án la itsé ch'án itja tí tjan a la ntá tuénxín k'uínkatjen tjan. ²⁶ Ntá kuenté chjasin ntiha la kuínhin sín kixin xikaha kónhen.

Ch'ín Jesús kjuínchekitohe jina yaá sín t'ikonhya

²⁷ Ntá sákjuíxin ch'ín Jesús ntiha la ntá yaá chojni t'ikonhya kjuichréhe tí jehe ch'án la k'uíyehé sín ch'án ntáchro sín kixin:

—Tíkonóehéni jaha tsik'axrjeníxin David.

²⁸ Ntá k'uixenhen ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhí sín ch'án, ntáchro ch'án kixin:

—¿Á títekáván kixin tsjácha sít'a xikaha? —mé xikaha kjuanchankí ch'án.

Ntá kjuátehe sín kixin:

—Jeén, Ínchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xikaha kuítekáván la tsóxiteyá —mé xikaha ichro ch'án.

³⁰ La ntá tuénxín ó jina t'ikon sín. Ntá ch'ín Jesús k'uetuénhen sín ch'án kixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxin chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitohe jina ijnko ch'ín nósín

³² Tió sákjuí tí sín k'uék'ikonhya, a ntá iso chojni kjuikao sín ijnko ch'ín nósín ch'án la chóna ch'án nchakuen tí jínahya. ³³ Ntá ch'ín Jesús kuakitsje tí nchakuen tí jínahya ntá tí ch'ín nósín la ó kjuankixin nixja ch'án. Ntá kaín chojni la k'uíkon sín la ntáchro sín kixin:

—Nunca t'ikonhyéni ijnko kjuaxroan xikaha kuenté tí nación Israel —ichro sín.

³⁴ A ntá tí sín fariseo ntáchro sín kixin:

—Tí nkexro t'etuenhen tí nchakuen tí jínahya tsíkjanjon kjuachaxin mé xíkaha takitsje tí ch'ín i tí nchakuen tí jínahya —mé xíkaha ichro sín.

Ch'ín Jesús kuikonóhe ch'án chojni

³⁵ Ntá k'uátsínka ch'ín Jesús itsjé chjasin jié la ko chjasin ntsí la kjuakoxin ch'án jnkojnko nínko Israel. Chrónka ch'án tí tan jína nkexrí tjen tí kjuachaxin kuènte Dios. La ntá kjuínchekitohe ch'án jína chojni níhi chóna kain xín chin la ko chojni chóna kjuatjoté. ³⁶ K'uikon ch'án kixin nchónhaya chojni k'uéjóté sín ntá kuikonóhe ch'án sín kixin imá tóxakonhen sín la k'uéjóté sín éxí kolélo chónahya nkexro t'ayakonhen. ³⁷ Ntá ntáche ch'án tí sín k'uájiko ch'án kixin:

—Chaxín ntáxrjan janhan kixin imá tsík'óna, kjánchó chojni sich'e xrá mé tsjéhya. ³⁸ Chrókuanchehérá tí Ìnché tí nonte kixin chróchr'án ch'án itsjé chojni chrókuich'e xrá —mé xíkaha ichro ch'ín Jesús.

10

Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kain tí nchakuen tí jínahya t'etuenhen asén chojni la ko sinchekitohe sín jína kain chojni chóna kain chin la ko kain xín kjuatjoté.

² Na mé tí teyó sín k'uájiko ch'án mé it'ín sín xíkíhi: saoxín mé ch'ín Simón na mé kjaxin it'ín ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo. ³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkí la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'ín ch'án Tadeo. ⁴ La ko kjaxin ch'ín Simón, mé kuènte tí sín cananista, la ko kjaxin ch'ín Judas Iscariote, mé tí nkexro chr'éxin kjuínchekji tí ch'ín Jesús.

Ch'ín Jesús k'uetuenhen tí teyó sín kixin sátsjikako sín kjuachaxin kuènte Dios

(Mr. 6.7-13; Lc. 9.1-6)

⁵ Ntá k'uetuenhen ch'ín Jesús tí teyó sín kixin sátsji sín la k'uetóan ch'án kixin: —Tjíhýará tí tjejó tí sín jehya judío la ko t'ixènyhará tí chjasin siín estado Samaria. ⁶ Náhí. Íchá jína sátsjírá tí tjejó tí chojni éxí kolélo kjuíchroè kuènte nación Israel. ⁷ Sátsjírá tjákoherá sín kixin kjuachaxièn Dios tjen nkaya nkajni la í séhya tsi. ⁸ Sínchekitohérá jína chojni níhi la ko sínchekitohérá jína tí sín chóna chin lepra la ko sínchexechómra chojni tsík'en la takítsjerá tí nchakuen tí jínahya. Jahará kjaxin kujtonhanrá tí kjuachaxièn Dios, méxrá chrókuachahýará jahará kjaxin.

⁹ Chrókuikuahýará ninkehó chichaon oro la ko ninkehó chichaon plata la ko ninkehó chichaon cobre ¹⁰ la ko tí sátsjírá ntja la chrókuikuahýará ka bolsa la chrókuikuahýará yaá ka chrók'uínkayaterá la ko chrókuankahýará tokátará la ko chrókuikuahýará nta tjíxinrá. Tí nkexro ch'e xrá la jehí siín kjuachaxin ntíha chrókjóné.

¹¹ A ntá tió tsjasánra ijnko chjasin jié o ijnko chjasin ntsí la tjéyará ijnko nkexro tsjanjon kjuachaxin la ntóe sín ntaho chrókuitohará ntá tsjixin tí xrá ntá sátsjírá. ¹² A ntá tió t'ixènhénra ntóe sín la nixjehérá sín tjákoxinrá jnkojína. ¹³ A ntá tí chaxín jína asén sín la ts'áyéhe sín tí kjuaxróxin, a ntá tí náhi la sátsjikorá tí kjuaxróxin. ¹⁴ A ntá tí tsochrohya sín tsjanjon sín kjuachaxin tsitohará la tjínkakónhaya sín tsinhin sín tí nkehe tsochronkará na mé t'axrxéxinrá tí ntóe sín o tí chjasén sín la t'oxènjimrá tí inche chóna totará. ¹⁵ A ntá chaxín tjonkará kixin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchóna sín jié la kánhyó tsjasóte sín, a ntá tí sín chjasin a la antsi tsjasóte sín kixin k'uéjóté xróxinha sín tí tan chrókuaáxin sín.

Ókjé sín tsoínkakónhen tí sín kuènte Cristo

¹⁶ Janhan tsochr'an tí jahará éxí yóhe chróchr'an kolélo ts'ejóyakan kolóbo. Listo chrók'uejorá éxí konche xíkaha la chrók'uejorá éxí kontóá chrókójíahýará. ¹⁷ Chrókóxakónhanrá kixin itsi chojni tsotsé sín tí jahará la sátsjikoará sín tí tjejó tí sín t'etóan la ko nkaxenhen tí nínkóe sín tsjatiáxinrá sín. ¹⁸ La ntá tsjikaánra sín tí tjejó tí sín t'etóan la ko tí siín tí sín rey kixin tinkachónkirá tí janhan. Ntá jína tsochronkará kixin tinkachónkirá tí janhan nkayakon tí jehe sín la ko nkayakon tí sín chónhaya Dios. ¹⁹ A ntá tió sátsjikoará sín tí tjejó tí sín t'etóan la tóxakuanýará nkehe tsontáchrórá o nkexrí tsonixjará kixin tió tsjixraká tí hora la ntá Dios mé tsjinkítsará tsonixjará. ²⁰ Kixin jehya jahará tsonixjará. Náhí. Tí Nchakuen It'éní mé tsochrónka nkehe tsonixjará.

²¹ Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsoínkakónhen tí it'é kixin its'en. ²² Kainxín chojni chjasintajni tsoínkakónhanrá sín kixin tinkachónkirá tí janhan. A ntá tí nkexro tsítóehya tsínkáchónki

sín tí janhan hasta tsjéje chjasintajni mé tsaá. ²³ Tió má chónkíhará sín ijnko chjasin la ntá sátsjirá í jnko chjasin. La ntá chaxín tsòxrjanka kixin tí Xjeen Dios K'óna Chojni mé tsokjan tí naxá tjixinhya ts'atsínkará kaín tí chjasin Israel.

²⁴ Tí nkexro xrakohe la kánhyó tjeotan la tí maestro la antsí tjeotan, la ko kjaxin tí nkexro ch'e xra la tjeotanhya la antsí tjeotan tí lamo. ²⁵ A ntá tí nkexro xrakohe chrókuaxoxin ch'án éxí tí nkexro kjuakohe ch'án la ko tí nkexro ch'e xra chrókuaxoxin ch'án éxí tí lámóe ch'án ch'ehe ch'án xra. Tí ch'ín inché nchia la kjaxin nchek'in sín Beelzebú la kjaxin tí sín kjéhya xikaha nchek'in sín.

Nkexro tí chróchrakonhénra
(Lc. 12.2-9)

²⁶ Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin. ²⁷ Tí nkehe tjonkará sítie la t'ichjánxin tsóchronkará tió itsi xrohi t'inkaséyanxin tí yaon. La ko tí nkehe tjonkará ijie ninkexró noehya la t'ichjánxin chronkará chrókuinhin kaín sín. ²⁸ Chróchrakuénhyará tí sín t'óyán cuérpé chojni kixin asén chojni xitjahya ts'óyán sín. Íchá jina chróchrakonhénra tí nkexro tsjacha sinchek'itjáyaxin cuérpé chojni la ko asén chojni tí xrohi ts'ankahya.

²⁹ ¿Á chrókóxiñinhyá yaá koxroxe ntsínsi ijnko chichaon ntsí? A ntá kjónté xikaha la chrók'uanótjenhya ninjko tí jehe va nonte tí chrókjuanjonyha It'eni kjuachaxin. ³⁰ A ntá kjónté tí kaxihí chóna ikjárá la ó nohe ch'án nkekjaínka chontará. ³¹ A ntá jahará chróchrakonhyará kixin tóyóahará tí koxroxe kixin antsí sínkí tí jahará, a ntá tí koxroxe, kjónté nchónhya va, la kánhyó sínkí tíha.

Tí sín tósuèhya tsochrónka sín kixin tinkáchónki sín Cristo nkayakon chojni
(Lc. 12.8-9)

³² Kaín tí chojni tsochrónka kixin tinkáchónkina sín nkayakon chojni la janhan mé kjaxin tsòxrjanka kixin choxian tí jehe sín nkayakon T'aná tjen nkaya nkajni. ³³ A ntá tí nkexro sinchemána tsontácho sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajni.

Jnkokoáhya tsjenkayáxin chojni kixin ó kui Inchéni Jesús
(Lc. 12.51-53; 14.26-27)

³⁴ Tjenkayáxinhyará kixin k'uinkakian kjuaxróxin chjasintajni. Náhí. Janhan k'uinkakianhya kjuaxróxin. Tsjanjonko kichó chojni kixin k'uinka janhan. ³⁵ Janhan k'uinka kixin tsóninkakonhen chojni it'é, la ko tí xjeen sín chjin mé tsóninkakonhen iné, la ko tí tikintá tsóninkakonhen ich'ee. ³⁶ Mé xikaha tí sín tsóninkakonhen kichó la mé tí sín naxá kjéhya sín.

³⁷ A ntá tí nkexro antsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuéntana, la ko tí nkexro antsí tjuèhe xjeen sín la kánhyó tjuana sín la mé xitjahya ts'óna sín kuéntana. ³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuéntana. ³⁹ Tí nkexro tjinkaon kixin kohya nkehe chrókónhen sín mé ts'itjáyán sín, a ntá tí nkexro chrókjuinçek'itjáyaxin asén kixin tinkáchónki sín tí janhan la mé tsaá sín.

Tí nkexro ts'áyéhe nkehe
(Mr. 9.41)

⁴⁰ Tí nkexro chrókjuanjon kjuachaxin chrók'uejorá la mé éxí chrók'uáyéhe sín tí janhan la ko tí nkexro chrók'uáyéhe tí janhan la éxí yóhe chrók'uáyéhe sín tí nkexro ichr'ánna k'uinka. ⁴¹ La tí nkexro chrókjuanjon kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxí ts'áyéhe tí nkexro kjuako. La ko tí nkexro chrókjuanjon kjuachaxin tsjak'e ijnko chojni jina kixin jina ch'án mé xikaha ts'áyéhe sín nkehe éxí ts'áyéhe tí nkexro jina. ⁴² A ntá tí nkexro sín chhekítjonhen ijnko vaso ntá kin kjónté ijnko chojni noehya má, chrèhé tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jina kixin xikaha kjuich'e ch'án.

11

Ch'ín Juan Bautista k'uetuñenhen iso sín
(Lc. 7.18-35)

¹ Ntá ch'ín Jesús kjuixin kjuakohe ch'án tí teyó sín xriko ch'án la ntá sákuixin ch'án ntiha la sákuijkako ch'án iso chjasin chjinaxón ntiha.

² A ntá ch'ín Juan mé tjechjina ch'án ntqechiso ntá xrinahya kuínhin ch'án nkerí xra tjech'e Cristo. La ntá k'uetuñenhen ch'án iyó tí sín k'uek'ajiko ch'án kixin sátsjitsjehe sín tí ch'ín Jesús.

³ Ntá sákuíu sín kjuíji sín ntiha ntá kjuanchankíhi sín ch'án ntácho sín kixin:

—¿Á jaha tí nkexro itsi ní ọ á naxa tsochónhenni í jnko nkexro? —ichro sín.

⁴ A ntá kjuátehe ch'ín Jesús, ntáchro ch'án kixin:

—Sátjírà tjiçhenkará tí ch'ín Juan tí nkehe k'uikonrá la ko tí nkehe kuínhínrà. ⁵ Çhenkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéçhónta çhin lepra la ó kótjóa sín kuítøhe sín jína la ko tí sín k'uékiénhya la ó tìnhin sín jie. Kjaxin tí sín tsík'en na ó xechón sín inaá la ko kaín tí sín nòà mé síxraçøhe sín tí tan jína tsaáxin sín. ⁶ Méxra imá náxrijón tí nkexro kohya nkehe t'inkákønhen tinkáchónki tí janhan.

⁷ Tió sákjuí sín ntá ch'ín Jesús kjuankixin níxjehe ch'án tí sín k'uéjío la çhrónka ch'án kuènte ch'ín Juan ntáchro ch'án kixin:

—Tí sákjuítsehérà ch'ín Juan nteje la, çnkexrí k'uikonrá tí jehe ch'án? ¿Á k'uikonrá ch'án éxí ijnko tji nchexrayehe xrijto? ⁸ Tí náhí, la çnkehe k'uikonrá? ¿Á k'uikonrá ch'án éxí ijnko nkexro tsík'itsa jína? Jahará ó nohará kixin chojni tsík'itsa jína la tjejó sín tí nchia kuènte tí sín rey. ⁹ ¿A ntá nkehe k'uikonrá? ¿Á ijnko nkexro çhrónka itén Dios? Jehe çaxín la antsi çhónta ch'án kjuachaxin la tí sín k'uéçhrónka itén Dios la kánhyó. ¹⁰ Ch'ín Juan mé tí nkexro kui éxí xikaha çhrónka xroon itén Dios ósé. Mé ntáçhro xikihí: Janhan mé tsochr'an ijnko nkexro tsoçhrónka itan kuèntana tsitónxin ntja, kixin tsjasiyóxin ch'án ntja kuènta.*

Mé xikaha çhrónka itén Dios. ¹¹ Ntá ijnko nkehe çaxín tsojtjonkará kixin kaín tí nkexro k'uéjío senó la kánhyó tjetooan sín la antsi tjetooan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxièn Dios tjen nkaya nkajní la antsi tjetooan sín la ntá jehe ch'ín Juan la kénhyó.

¹² Tí ikui ch'ín Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá çhónta kjuachaxin mé tsjacha sín. ¹³ Kaín tí sín profeta la ko tí ley kuènte ch'ín Moisés mé çhrónka nkexrí tí kjuachaxin kuènte Dios hasta ikui ch'ín Juan. ¹⁴ A ntá tí jahará çhrókuítekaónki tíhi; kixin ch'ín Juan la mé ikui kixin tí xra kuènte ch'ín Elías tsjintaxín síç'e ch'án kixin ch'ín Elías la t'ichjánxin çhrókui ch'án inaá. ¹⁵ Tí nkexro tjinkaon çhrókuinhan la çhrókuinhan.

¹⁶ ¿Nkexrí çhrókuintayóaxian tí chojni tjejó ijie? Tóyøhe sín tí çánjan tjejójaxin sín ntasin tsítán sín la t'íyehe sín kichó sín ¹⁷ ntáçhro sín kixin: “K'uánoani flauta kjánchó jahará la tçhyará. Itsjeni isón kuènte chojni tsík'en la ntá k'uaváhyará la ko tsjankahyará.” ¹⁸ Kixin tí ikui ch'ín Juan la kjónehya ch'án la k'uíhya ch'án vino la jahará ntáçhrorá kixin ijnko nçhakuen tí jínahya mé çhónta ch'án. ¹⁹ A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáçhrorá kixin imá itsjé kjóne ch'án la imá ik'ui ch'án la ko imá t'ito ch'án tí chojni çhónta jie la ko tí sín nchekjènkí, ichrorá. A ntá tí kjuachaxin kuènte Dios mé tjakoxin tí xjeen ch'án.

Tí çjasin titekaonhya

(Lc. 10.13-15)

²⁰ Ntá ch'ín Jesús mé kjuankixin ch'án ntáche ch'án tí sín tjejó iso tí çjasin imá kjuasixin ch'án kjuaxroan kixin kjónté xikaha la naxa kuinkáchónkihya sín Dios. ²¹ Ntá ntáçhro ch'án kixin:

—Nòará jahará tjejorá çjasin Corazín la ko nòará jahará tjejorá çjasin Betsaida. Tí çhrók'uixin tí kjuaxroan tí çjasin Tiro la ko çjasin Sidón éxí k'uikonrá jahará ntá tí çhrókøjehe sín la tjoka çhrókuinkáchónki sín Dios la tjoka çhrókjuakoxin sín çhrók'uinkáya sín ka tié la ko nteso çhrókjuinçek'ia sín asén sín. ²² Ntá ntáxrijan kixin tí yaon tsitøexin ijie chojni á ntá jahará antsi tsjasótíarà, a ntá tí sín çjasin Tiro la ko çjasin Sidón la kénhyó tsjasóte sín. ²³ A ntá jahará chojni çjasin Capernaum tjenkayáxinrà kixin imá nohará a ntá sátsjírà nkaya nkajní, ichrorá, kjánchó çaxínhya. Jahará la tsjasinkajinxinrà ntiha sátsjírà tsjasótíarà tí síin tí sín tsík'en. Tí çhrókjuásian tí kjuaxroan tí çjasin Sodoma éxí kjuásian çjasánrà la tí çjasin la kjá naxa çhrók'uixin sín naxa çhrók'uitjányanhya sín tí yaon ijie kixin tjoka çhrókuitekaon sín. ²⁴ A ntá tjonkará kixin tió sinchekitøexin Dios ijie chojni la antsi tsjasótíarà la tí sín çjasin Sodoma la kénhyó tsjasóte sín.

Xrákirá tí tjén janhan la ts'øk'áhará

(Lc. 10.21-22)

²⁵ Ntá tí yaon a ch'ín Jesús mé níxjehe ch'án It'é ch'án ntáçhro ch'án kixin:

—Tjánçháha kjuasáya It'èni mé Ínché nkaya nkajní la ko çjasintajni kixin jaha kjuánjonhya kjuachaxin çhrók'uitja tí sín imá nohe a ntá kjuánjuan kjuachaxin kixin ts'tija tí sín noehya.

²⁶ Mé xikaha It'èni jaha kóxrjínhan kixin xikaha tsonhen —ichro ch'ín Jesús.

²⁷ Ntá ntáçhro ch'ín Jesús kixin:

* **11:10** Malaquías 3.1

—T'aná mé ch'jina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsík'jeyá ch'án tsochóxin sín ch'án. ²⁸ Xrákirá kaín rá tí tjén janhan tí jahará imá tsikórxjérá kjuich'erá xra la yamará nkehe iye la ntá janhan mé sintak'ok'áhará. ²⁹ Tákjárá tí xra kuèntana la ts'itjará kuèntana kixin janhan mé jina asenná la ntáhnkehya. Ntahá mé ts'itjará ts'ok'èxin asánrá. ³⁰ Tí xra tsotjahará la xrahya la tí nkehe tsotjahará la yehya.

12

Tí sín k'uajiko ch'ín Jesús mé ik'uín sín iso noatrigó ijnko yaon t'ok'éhe tí sín Israel
(Mr. 2.23-28; Lc. 6.1-5)

¹ A ntá ijnko yaon la ch'ín Jesús k'uátsínka ch'án ijnko nonte siín noatrigó tí yaon t'ok'éhe tí sín Israel. Na ntá tí sín xriko ch'án mé tsik'en sín kjinta la ntá kjuankixin sín ik'uín sín iso noatrigó a kixin sine sín. ² A ntá iso tí sín fariseo k'uínko sín kixin xikaha kjuich'e tí sín xriko ch'ín Jesús la ntá ntáχρο sín kixin:

—Tsjehe tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsonhen xra tí yaon í —ichro sín.

³ Ntá kjuátehe ch'ín Jesús kixin:

—Jahará ¿a kjuínchekuáxinhyará tí xroon chrónka nkehe kjuich'e ch'ín David la ko tí sín k'uájiko ch'án tió k'uén sín kjinta? ⁴ A ntá jehe sín mé k'uixenhen sín tí nchia kuènte Dios la kaín sín kjóne sín tí niotja tsikóyaon kuènte Dios kjónté kohya kjuachaxin sine ch'án ní tí sín k'uájiko ch'án. Jehó siín kjuachaxin sine tí sín nchát'á. ⁵ Jahará ¿a nchekuáxinhyará tí xroon tsíkjin ch'ín Moisés ntáχρο kixin tí sín nchát'á kuènte njnko mé t'ok'éhya sín tí yaon sábadó la kjónté xikaha la jehya jje tíha? ⁶ Ntáxrjan kixin itjén janhan la antsí má chonta kjuachaxin la ntá tí njnko la kénhyó. ⁷ Jahará la tiénxinhyará nkexrí t'axrxjén tí nkehe ntáχρο xroon itén Dios. Mé ntáχρο kixin: “Janhan Dios tjínkavan kixin chrókujkonóehérá chojni la tjínkakhonhya kixin chrók'oyánrá iko chrókjuánjonrá.”* Tí chrókuiénxinrá tíha la ntá chrókónínkakuènhýará tí janhan kixin ninkehó jje chontahya. ⁸ A ntá tí Xjeen Dios K'óna Chojni mé chóna kjuachaxin ts'etqan nkexrí tsonhen tí yaon t'ok'éheni —ichro ch'ín Jesús.

Ch'ín Jesús kjuínchekitohe jina ijnko chojni tsixámá tja
(Mr. 3.1-6; Lc. 6.6-11)

⁹ Ntá ch'ín Jesús mé sákjuixin ch'án ntiha la k'uixenhen ch'án ijnko njnko Israel. ¹⁰ Mé ntiha itjen ijnko ch'ín tsixámá tja. Na ntá tjejóntaxín iso sín fariseo a tjínkaon sín tsanchia sín jje. La ntá kjuanchankíhi sín ch'án kixin:

—¿Á siín kjuachaxin sinchekitohe jina ijnko chojni níhi tí yaon t'ok'éheni ní? —ichro sín.

¹¹ Ntá kjuátehe ch'ín Jesús ntáχρο ch'án kixin:

—Jnkojín tí jahará chontará ijnko kolélo chrókjuítsínkáyá ijnko tòye tí yaon t'ok'éheni ¿a chrókjuíhyará chrókuaiksetsjetoánrá va tòye ní? ¹² Kjánchó tí chojni antsí má tjeje sínkí a ntá tí kolélo la kénhyó. Méxra jina sich'eni tí xra jina kjónté tí yaon t'ok'éheni.

¹³ Méxra nixjehe ch'án tí ch'ín níhi a, ntáχρο ch'án kixin:

—Tjéntoá tja —ichro ch'án.

A ntá tí ch'ín níhi tja kjuentoá tja ch'án la ó kjuixin kuitqhe jina éxi tí í jnko tja ch'án xikaha. ¹⁴ Ntá tí sín fariseo kónínkaon sín k'uaxrxjén sín ntiha sákjuí sín la kjuenkayáxin sín nkexrí ts'óyan sín tí ch'ín Jesús.

Itén Dios senó chrónka kuènte ch'ín Jesús

¹⁵ A ntá ch'ín Jesús mé kónohe ch'án kixin xikaha tjenkayáxin sín la ntá sákjuixin ch'án ntiha la itsjé sín chréhe sín ch'án. Kjuínchekitohe ch'án jina kaín tí sinníhi ¹⁶ la k'uetqan ch'án kixin tsochrónkahya sín noxín kixin nkexro tí jehe ch'án. ¹⁷ Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsintáχρο ch'án xikíhi:

¹⁸ Ntihi tjen tí nkexro ch'ena xra la janhan mé kjuéyá ch'án,

janhan tjuáha ch'án la chàna kixin itjen ch'án.

Tsotjahá ch'án tí nchakuenná

la jehe ch'án mé tsochrónka ch'án nkexrí sintakitoaxián ijje chojni chjasintajni.

¹⁹ Tsonínkakuènhya ch'án chojni la chjíníhya ts'óyako ch'án,

la ko kohya nkexro tsinhin itén ch'án tí ntja.

²⁰ Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe sínhchikoá.

Jehe ch'án naxá sich'e ch'án xra tsjixrakájia tí yaon ts'etqan ch'án.

* 12:7 Oseas 6.6

21 La kaín xín chojni chjasintajni mé tsitekaon sín tí jehe ch'án.†
Mé xíkaha chrónka itén Dios ósé.

*Tí sín fariseo mé ntáχρο sín kixin ch'ín Tsochren t'etuenhen asén tí ch'ín Jesús
(Mr. 3.19-30; Lc. 11.14-23; 12.10)*

22 Ntá iso chojni sákjuokohe sín ch'ín Jesús ijnko ch'ín t'ikonyha la ko nixjahya kixin chóna ch'án nchakuen tí jínahya. A ntá ch'ín Jesús mé kjuínchekitohe ch'án jína la ntá jína nixja ch'án la ko jína t'ikon ch'án. 23 Ntá kaín xín chojni la chrakon sín la tjanckankíhi kichó sín ntáχρο sín kixin:

—¿Á Jehya xjeen David tíhi? —ichro sín.

24 Ntá kuínhin tí sín fariseo la ntáχρο sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuènte ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

25 Ntá ó kónohe ch'ín Jesús tí nkehe tjenkayáxin sín ntá ntáχρο ch'án kixin:

—Jnkojín gobierno jnkoqóáhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoxán sín, la ko kjaxin tí sín jnkoqóá chjasin o tí sín jnkoqóá nchia jnkokónhya tjenkayáxin sín la kjaxin xíkaha ts'itjáyán sín. 26 A ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin naça chrók'uetóan. 27 Jahará ntáχροrá kixin janhan kuakítsjexián tí nchakuen tí jínahya kjuachaxin kuènte ch'ín Beelzebú. A ntá tí chaxín xíkaha la ntá jnkexo chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehe sín mé tjakoqxín sín kixin ntoáhya tjenkayáxinrá. 28 A ntá janhan mé kuakítsjexián tí nchakuen tí jínahya kjuachaxin kuènte Nchakuen Dios la tíha mé chrókónoaxínrá kixin tí kjuachaxién Dios mé ó kui tí tjejórá.

29 ¿Nkexrí chrók'ui xenhen ijnko nkexo ijnko ntóe ijnko ch'ín jjehe la chrókuakitsjehe ch'án tí nkehe chóna ch'án? Senó la chrókónteto ch'án kixin jína chrókueéhe sín ch'án.

30 Tí nkexo titekakonyha tí janhan la mé nínkakonna sín. A ntá tí nkexo tjinkakonyha tí janhan mé t'inkákonhen tí xrá it'a.

31 Méxra xrjanka kixin Dios tsjakjiin jnkojnko jje tjasin chojni la ko kaín nkehe jínahya nixja sín. A ntá tí t'ántaxínhin sín Nchakuen Dios la xitjahya tsjiin ijje sín. 32 La ko xrjanka kixin kaín nkehe t'ántaxínhírá tí Xjeen Dios K'óna Chojni la tsjakjiin Dios. A ntá tí ts'antaxínhírá Nchakuen Dios la ntá mé í tsjiinhyha tí ijjará kjónté ntihi chjasintajni la ko kjónté tí chr'éxin.

*Tí nta chrókjuatsqanxín sín tí to jína
(Lc. 6.43-45)*

33 Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsqanxíni tí to a. 34 Jahará tsík'axrjeníxinrá konche. ¿Nkexrí jína chróntáχροrá jahará tí jehya jínará? Tí nixja ir'vará la éxí ntáχρο asánrá mé nixja ir'vará. 35 Ijnko chojni jína mé jína nixja kixin jína asén ch'án. A ntá ijnko chojni jínahya mé nixja tí nkehe jínahya kixin tí asén ch'án kjaxin jínahya. 36 Ntá tjonkará kixin itsi tí yaon tsjixixín tió sinchekitoexín Dios ijje chojni ntá tsonohará kaín nkehe chjíní tsínixjará. 37 Kixin tí nkehe nixjará tsjakoxín á kjuásínrá jje ní o náhi.

*Tí sín jehya jína tjanchehe sín ch'ín Jesús kixin tsjakoxín ch'án ijnko kjuaxroan jje
(Mr. 8.12; Lc. 11.29-32)*

38 Ntá iso tí sín fariseo la ko tí sín maestro tjako tí ley mé nixjéhe sín ch'ín Jesús ntáχρο sín kixin:

—Maestro, tjinkaonni chrók'ui konni chrókjuásian ijnko kjuaxroan náxrjón tsonoxíni kixin nkexo jaha —ichro sín.

39 Ntá kjuátéhe ch'ín Jesús ntáχρο ch'án kixin:

—Tí sín jínahya la ko tí sín kuitóhe Dios mé tjanchia sín chrókjuásian kjuaxroan náxrjón. Kjánchó tsjakoxínhyha í jnko kjuaxroan la jehó tí kjuaxroan kónhen ch'ín Jonás, tí nkexo k'uéchronka itén Dios ósé. 40 Éxí yóhe kjuák'e ch'ín Jonás iní yaon la iní tie nkaxenhen tsee koche jje mé xíkaha tí Xjeen Dios K'óna Chojni tsjak'e nkaxenhen tóye tsoxravá iní yaon la iní tie. 41 A ntá tí yaon tsitoxén ijje chojni la ntá tí sín chjasin Nínive mé tsjanchia sín jje kixin tí sín tjejó jie, kixin tí sín chjasin Nínive mé kuitóhe sín ijje sín tió kuínhin sín itén Dios chrónka ch'ín Jonás. A ntá ijje itjén janhan la antsí má chonta kjuachaxin. A ntá tí ch'ín Jonás la kénhyó k'uéchóna ch'án kjuachaxin, kjánchó jahará kuitekákonyhará tí janhan. 42 Kjaxin tí yaon tsitoxén ijje chojni la tí tjan reina k'uetóan kjuixín nó Sur mé tsjanchia tjan jie kixin tí sín tjejó ijje kixin jehe tjan kjuixín imá ikjín kixin chrókuinhin tjan tí kjuaxrexinkaon jína k'uékjako ch'ín Salomón. A ntá ijje itjén janhan la janhan antsí má nóna a ntá ch'ín Salomón la kénhyó k'uénohe ch'án.

† 12:21 12.18–21 Isaías 42.1-4

Tió tsokjan tí nchakuen tí jínahya

(Lc. 11.24-26)

⁴³ **A** ntá ijnko nchakuen tí jínahya tsík'axrjexín ijnko chojni la mé ixri tí nonte xámá xrit-jeyá nketi náxrjón ts'ok'éhe. **A** ntá k'uitjahya nketi náxrjón ts'ok'éhe. ⁴⁴ La ntá kjuenkayáxin kixin: “Axri tsokjan ntona k'uaxrjéxian”, ichro. **A** ntá tió ikjan tí nchakuen la t'ikon éxi ijnko nchia kohya ninkexró la éxi ijnko chojni tsík'ánjón ntóe la náxrjón tsjehe tí nkaxenhen nchia. ⁴⁵ **A** ntá k'uikon tí jínahya xíkaha tjen nchia la ntá sákjuakajín í jnko yato nchakuen tí jínahya antsí má jínahya. **A** ntá kaín k'uixenhen tí ntiha. **A** ntá antsí má jínahya kónhen tí ch'ín a, **a** ntá tí senó la kénhyó. Mé xíkaha tsonhen kaín tí sin siín ijie titekakonhya.

Tí iné la ko kichó ch'ín Jesús

(Mr. 3.31-35; Lc. 8.19-21)

⁴⁶ **N**tá ch'ín Jesús naxa tjenixjehé ch'án chojni la ntá xrínahya kjujji iné ch'án la ko kichó ch'án. **N**tá kuitóhe sín ntója ó la tjinkaon sín chrónixjehé sín ch'ín Jesús. ⁴⁷ **N**tá ijnko nkexro ntiha sákjuichénka tí ch'ín Jesús, ntáchro ch'án kixin:

—Íná la ko kichua tjejó sín ntója la tjinkaon sín chrónixjaha sín tí jaha.

⁴⁸ **A** ntá ch'ín Jesús kjuátehe ch'án nixjehé ch'án tí nkexro chrónka a, ntáchro ch'án kixin:

—¿Xá nkexro tí naná la ko nkexro tí kichiná? —ichro ch'án.

⁴⁹ **N**tá kjuakoqxin tja ch'án tí sín xriko ch'án la ntáchro ch'án kixin:

—Tí sín í la mé naná la ko kichiná. ⁵⁰ Tí jnkojín sín í nchexiteyá nkehe tjinkaon T'aná tjen nkaya nkajni na mé táha mé naná la ko kichiná mé xíkaha t'ikuán tí jehe sín —ichro ch'án.

13

Ch'ín Jesús mé kjuíncheyóexin ch'án éxi ijnko chojni t'enka nontee

(Mr. 4.1-9; Lc. 8.4-8)

¹ **A** ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjajin ch'án chrínta ntayaon. ² **N**tá k'uixikóchjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntabárcó kjuák'etjajin ch'án la kaín sín na tí chrínta ntá ó kuitóhe sín. ³ **A** ntá nchónhya nkehe kjuako ch'án kjuíncheyóexin ch'án, ntáchro ch'án kixin:

—Éxi ijnko ch'ín sákjuik'enka nontee ⁴ mé xíkaha sákjuik'enka ch'án iso tí noatrigó a. **N**tá iso noa la tsik'ánótjen ntja ntá ikui koxroxé k'uunka va noa. ⁵ **A** ntá iso noa na mé k'uitji chrík'á xró tí kohya itsjé nche ntá tjoka k'uayan kixin ntaha tjínhya chóna nche. ⁶ **N**tá tí kjuítón yaon la ntá tí ka la xámá kixin njnkahya chóna nuée. ⁷ **A** ntá í so noa kjuitsínkak'á tí siín kach'í na k'uánkí tí kach'í a na ntá í xitjahya k'uánkí tí noatrigó a kixin tsík'ate tí kach'í. ⁸ **A** ntá tí noa tsik'itji nche jína na ntá tió k'uánkí la mé k'óna jína. Iso tí no na jnkokoqá noatje mé k'óna ciento neno noa, **a** ntá í jnko mé k'óna sesenta neno noa, **a** ntá í jnko mé k'óna treinta. ⁹ **T**í nkexro tjinkaon chrókuinhin la chrókuinhin —ichro ch'ín Jesús.

Nkekuénté kjuíncheyóexin ch'ín Jesús

(Mr. 4.10-12; Lc. 8.9-10)

¹⁰ **N**tá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuénté xíkaha nixjehé sín ncheyóexián? —ichro sín.

¹¹ **A** ntá ch'ín Jesús kjuátehe ch'án ntáchro ch'án kixin:

—Jahará la Dios me tsjinkítsa tsonohará tí nkehe noehya í so chojni kuénte tí kjuachaxin kuénte Dios. **A** ntá tí jehe sín a la náhi. ¹² **T**í nkexro ó chóna nkehe la antsí ts'áyéhe sín kixin antsí má tsochóna sín. **A** ntá tí nkexro chónahya la kjónté tí ntsí chóna sín la ts'axrjehe sín. ¹³ Mé xíkaha kjuíntayóaxuán kjuákuaxian sín kixin jehe sín t'ikon sín la ntá kjónté tjátsoanhya sín la tjejótinhin sín **a** ntá kjónté kienxínhya sín. ¹⁴ Mé xíkaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xíkahi:

Jehe sín tsinhin sín **a** ntá tsienxínhya sín
la ts'ikon sín la tsjatsqanhya sín tí nkehe ts'ikon sín.

¹⁵ **I**má icha asén tí sín chjasin í.

Chóna sín ntatsjon kjánchó ts'ík'ehé
la chóna sín ikon sín kjánchó t'ikonhya sín,
kixin chrók'uikonhya sín
la chrókuienhya sín la ko
xitjahya kienxín sín,

kixin í tjinkakonhya sín chrókjan sín kixin janhan mé chrókujntakitóha sín jína.*
Mé xíkaha tsíkjin ch'ín Isaías.

¹⁶ **N**tá ntáchro ch'ín Jesús inaá kixin:

* 13:15 13.14-15 Isaías 6.9-10

—A ntá jahará la imá náxrjón tjejorá kixin t'ikonrá la ko tinhínrá. ¹⁷ Chaxín xrxjanka kixin itsjé tí sín k'uéchrónka itén Dios la ko tí sín jína mé k'uétjinkaon sín chrók'uikon sín tí nkehe t'ikonrá la ntá k'uíkonhya sín la ko k'uétjinkaon sín chrókuinhin sín tí nkehe tjejotinhínrá la ntá kuíenhya sín.

Ch'in Jesús chrónkaxín nkexrí t'axrxjén tí nkexro sákujuik'enka
(Mr. 4.13-20; Lc. 8.11-15)

¹⁸ Tinhínrá nkexrí t'axrxjén tí ch'in sákujuik'enka nontee. ¹⁹ Tí nkexro kuínhin tí itén Dios chrónka nkexrí tí kjuachaxin kuénte Dios la ntá kíenxínhya sín la yóhé tí noa xénjintja ntjá. Ó kui ch'in Tsochren ntá kjuínchek'itjáyan ch'án tí itan jína kuínhin sín. ²⁰ A ntá tí tje kjuítsinkak'á xro la mé t'axrxjén kixin tí chojni kuínhin itén Dios la tjoka kóxrjínhin sín la kuinkáchónki sín. ²¹ Kjánchó nínkahya chóna nuèe na ntá itsi tí kjuaxróxinhya o tsochónkíhi sín chojni chrók'oyán sín kixin tí itén Dios kuítekaon sín, a ntá tsítgehe sín tí tinkáchónki sín Dios. ²² A ntá tí tje kjuítsinkak'á kach'lj na mé éxi yóhé ijnko chojni kuínhin itan jína kjánchó tjitoxjénhya ntje sín kixin tóxakonhen sín tí xra chóna sín chjasintajni la ko tjinkaon sín tsochóna sín itsje nkehe. Kaín tíha mé t'inkákonhen tí itén Dios kuínhin sín la ntá xíkaha xitjahya sich'ehe sín xra Dios. ²³ A ntá tí tje k'uínka tí nonte chóna nche jína na mé yóhé tí chojni kuínhin tí itén Dios na ko kíenxín sín la ntá xíkaha jína ch'ehe sín Dios xra. Na iso sín la yóhé éxi tí tje k'óna ijnko ciento neno noa la iso sín la yóhé tí k'óna sesenta neno noa la iso sín la yóhé tí k'óna treinta neno noa —mé xíkaha chrónka ch'in Jesús.

Ch'in Jesús kjuíncheyóexin ch'án éxi tí kajnto k'uánkikué tí noatrigó

²⁴ Ntá ch'in Jesús kjuíncheyóexin ch'án inaá ntáchro ch'án kixin:
—Tí kjuachaxin kuénte Dios mé yóhé ijnko ch'in k'uénka noa jína nontee ch'án. ²⁵ A ntá tío k'uéjójua kaín sín ntá ikui ijnko nkexro nínkakonhen sín la k'uénka ch'án kajnto chrík'á tí noa a la ntá sákuju ch'án. ²⁶ La ntá tí noatrigó k'uánki la ntá ó sítntaa la ntá ntíha kjaxin kónoxixin k'uánki tí kajnto. ²⁷ Ntá tí sín ch'e xra mé sákuínixjehe sín tí lámge sín la ntáchro sín kixin: “Tí noa k'uènká nontaa la noa jína tíha. A ntá ¿nketi kjuixín tí kajnto tsík'ayan?” ichro sín kjuanchankí sín. ²⁸ Ntá kjuátehe tí inché tí nonte ntáchro kixin: “Kjá ijnko nkexro nínkakonna mé kjuich'e xíkaha”, ichro ch'án. Ntá tí sín ch'e xra mé kjuanchankí sín kixin: “¿A tjinkávan kixin sátsjini tsakítsjenkíni tí kajnto?” ichro sín. ²⁹ A ntá kjuátehe ch'án kixin: “Náhi. Tí sátsjia tsakítsjenkiá tí kajnto la kjá chóna tí katrigo ts'axrxjenki. ³⁰ Íchá jína títohé kixin ts'ánkikué tsjixin tsojtájiani. Ntá ts'etuehenni tí sín tsojtá kixin senó ts'ejo sín tí kajnto la sinchenteto sín kixin tsoche la ntá chr'éxin tsojtá sín tí noatrigó ntá ts'inkachjina tí noa a” —mé xíkaha chrónka ch'in Jesús.

Ch'in Jesús kjuíncheyóexin ch'án éxi tí xroqñ ijnko ntayoa it'in mostaza
(Mr. 4.30-32; Lc. 13.18-19)

³¹ Ntá ch'in Jesús kjaxin kjuíncheyóexin inaá ntáchro ch'án kixin:
—Tí kjuachaxin kuénte Dios mé éxi yóhé ijnko tje mostaza k'uénka ijnko chojni nontee ch'án. ³² Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánki ijnko nta imá jíe la tí í so nta la kánhyó. Ntá koxroxé xritjaká mé itsi va sich'éna va kaké va tí chrík'á tí chaon nta.

Ch'in Jesús kjuíncheyóexin ch'án éxi tí xroqñ t'ánkixin niqtja
(Lc. 13.20-21)

³³ Kjaxin kjuíncheyóexin ch'án tíhi mé ntáchro ch'án kixin:
—Tí kjuachaxin kuénte Dios mé éxi yóhé tí xroqñ t'ánkixin niqtja. Kjuínkíjxín ijnko chojni chjin iní medida harina ntá tí ch'o mé k'uánki.

Tí nkehe kjuíncheyóexin ch'in Jesús tí nixja ch'án
(Mr. 4.33-34)

³⁴ Ch'in Jesús kjuákohe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuíncheyóexin ch'án. ³⁵ Mé xíkaha kjuako ch'án kixin tsoxiteyá tí nkehe tsíchrónka ijnko nkexro k'uéchrónka itén Dios ntáchro xíkíhi:
Mé tsoníxjixiñ sñntayóaxión nkehe
tsontáxrjan tí nkehe nínkexró noehya desde k'óna chjasintajni.†

Ch'in Jesús chrónkaxín ch'án nkexrí t'axrxjén tí kjuíncheyóexin ch'án tí kajnto la ko tí noatrigó

³⁶ Ntá kjuixín nixjehe ch'in Jesús tí sín a ntá sákuju sín kaín sín la jehe ch'án k'uixenhen ch'án nchia. Ntá kóchjina tí sín k'uájiko ch'án la ntáchro sín kixin:

—Chronkaxián nkexrí t'axrxjén tí kajnto k'uánkikué tí noa trigo tí nonte —ichro sín.

³⁷ Ntá ch'in Jesús kjuátehe ch'án ntáchro ch'án kixin:

—Tí nkexro k'u'enka tí noa jína mé tí Xjeen Dios K'óna Chojni. ³⁸ A ntá tí nonte mé chjasintajni tíha. Tí noa jína mé éxi yóhe tí chojni kuákja kjuachaxin kuènte Dios. La ntá tí kajnto mé éxi yóhe tí chojni t'etuenhen Tsochren. ³⁹ Tí nkexro nínkakonhenni mé k'u'enka tí kajnto mé Tsochren tíha. A ntá tí tsojtá sín la mé tsjeje chjasintajni. A ntá tí sín tsojtá la mé tí sín ángel. ⁴⁰ Éxi xrenájín tí kajnto la tsoche mé xikaha tsonhen tíó tsjixixín tsjeje chjasintajni. ⁴¹ Tí Xjeen Dios K'óna Chojni mé ts'etuenhen tí sín ángel kíxin tsakitsjexín sín tí tjet'etqan Dios kaín tí chojni tjachroe í so chojni la ko tí sín ch'e tí nkehe jínahya. ⁴² La tsochr'án sín sátsji sín tí tja síin xrohi la ntaha tsotsjánka sín la sinetaón neno sín. ⁴³ Ntá kaín xín tí sín nchexiteyá tí nkehe tjínkaon Dios mé éxi tí yaon xikaha tsotsjehe sín tí tjet'etqan It'èni Dios. Tí nkexro tjínkaon chrókuinhin la chrókuinhin —mé xikaha ichro ch'ín Jesús.

Ch'ín Jesús kjuíncheyóexin ch'án éxi ijnko nkehe tjete tjemá

⁴⁴ Tí kjuachaxin kuènte Dios mé éxi yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'emá ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uena ch'án tí nonte a.

Ch'ín Jesús kjuíncheyóexin éxi ijnko xro perla tjete

⁴⁵ Ntá ntáchro ch'ín Jesús kíxin:
—Kjaxín tí kjuachaxin kuènte Dios mé éxi yóhe ijnko nkexro tjejá xro perla náxrjón. ⁴⁶ Ntá tíó ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kíxin ts'ena ch'án tí xro perla.

Ch'ín Jesús kjuíncheyóexin éxi ijnko nchísén tséya sín koche

⁴⁷ Ntáchro ch'ín Jesús kíxin:
—Kjaxín tí kjuachaxin kuènte Dios mé éxi yóhe ijnko nchísén tséya chojni koche t'enkí sín tí ntaýon la ntá tsotsé nchónhya clase koche. ⁴⁸ Ntá tíó tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntá la ntaha ts'ejótjaxín sín la tsíchéhe sín koche jína la t'enka sín ntaxra. La ntá tí jehya koche jína la it'e sín. ⁴⁹ Mé xikaha tsonhen tíó tsjeje chjasintajni. Sátsji tí sín ángel la tsakitsjekjan sín chojni jínahya la tsítóhe tí chojni jína. ⁵⁰ La tsochr'án sín tí sín jínahya sátsji sín tí tjen tja tí síin xrohi la ntaha tsotsjánka sín la ko sinetaón neno sín.

Tí nkehe tjete níxin la tí nkehe tjete ntaxin

⁵¹ Ntá ch'ín Jesús mé kjuanchankí ch'án kíxin:
—¿Á tiénxinrá jahará kaín tí nkehe ní? —ichro ch'án.
Ntá kjuátehe sín kíxin:
—Jeén, Ìnchéni, ó kíenxínni —ichro sín.

⁵² Ntá ntáchro ch'ín Jesús kíxin:
—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehé ch'án la éxi yóhe ijnko ínché nchia chóna itsjé nkehe tjete tjejóchjina la ntá nohe ch'án tsakitsje tí nkehe tjete níxin la tí nkehe tjete ntaxin —mé xikaha ichro ch'ín Jesús.

Ch'ín Jesús kjuák'e ch'án chjasin Nazaret

(Mr. 6.1-6; Lc. 4.16-30)

⁵³ Ntá kjuixín níxja ch'ín Jesús kjuíncheyóexin ch'án tíha na ntá sákjuíxin ch'án ntiha. ⁵⁴ La ntá sákjuí ch'án chjasén ch'án Nazaret. Ntaha kjuankíxin kjuakoxín ch'án tí nínko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kíxin:

—Tí ch'ín i la, ¿nketí tsíxrakóhe ch'án kíxin imá nohe ch'án la ko nkexrí kíxin tjasin ch'án kjuaxroan? ⁵⁵ ¿Á jehya tíhi xjeen tí ch'ín carpintero la íné ch'án mé María? La ko chóximni tí kíchó ch'án a mé ch'ín Jacobo la ko ch'ín José la ko ch'ín Simón la ko ch'ín Judas. ⁵⁶ Kjaxín tí sín chjín kíchó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro sín.

⁵⁷ Mé xikaha chrohya sín tsitekakonhen sín ch'án. Ntá ntáchro ch'ín Jesús kíxin:
—Nkuíxín tjikosáyehe chojni ijnko nkexro chrónka itén Dios. A ntá tí sín chjasén ch'án la ko kaín tí sín ntqé ch'án mé tjikosáyeheya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntiha kíxin kuítekakuenhya sín ch'án.

14

Ik'uén ch'ín Juan Bautista

(Mr. 6.14-29; Lc. 9.7-9)

¹ A ntá tí yaon a ntá tí ch'ín Herodes mé tí nkexro k'uetoan tí estado Galilea mé kuínhin ch'án nkexrí ichro ch'ín Jesús. ² Ntá níxjehé ch'án tí sín ch'ehe ch'án xra, ntáchro ch'án kíxin:
—Kjá tíha la ch'ín Juan Bautista ó tsíxechón ch'án inaá. Mé xikaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etōan kixin ch'ín Juan tsōtetoxín cadena la ko tsjak'echjina ch'án. Mé xikaha kjuich'eh ch'án kixin xikaha tsikjanchia tí tjan Herodías, tí tjan ichjién tí ch'ín Felipe, kichó ch'án. ⁴ Tí ch'ín Juan tsintáche ch'án tí ch'ín Herodes kixin:

—Jehya jina tsochonta tí ichjién tí kichuá —mé xikaha tsintácho ch'án.

⁵ Ntá ch'ín Herodes tjinkaon ch'án chrók'óyán ch'án tí ch'ín Juan kjánchó chrakonhen ch'án tí chojni kixin kaín sín ntácho sín kixin ch'ín Juan mé nixja itén Dios, ichro sín. ⁶ A ntá tí yāon kia tsikjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsik'íyehé ch'án. A ntá imá kóxrjinhin ch'ín Herodes nkexrí ité tjan. ⁷ La ntá nixjehé ch'án tjan k'uáqjenxin ch'án ihnié Dios ntácho ch'án kixin tsochjéhe ch'án tjan kjónté jnkójin nkehe tsjanchia tjan, ichro ch'án. ⁸ Ntá jehé tjan la senó kjuikjanchankíhi tjan iné tjan ntá iné tjan tsintácho kixin ikja ch'ín Juan mé tsjanchia tjan ntá jehé tjan mé nixjehé tjan tí ch'ín Herodes inaá ntácho tjan kixin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kixin xikaha kjuanchia tjan. Na ntá kaín tí sín siín ntiha ó kuínhin sín kixin kjuínchenohe ch'án Dios kixin ichrén nkehe tsjanchia tjan tsjanjon ch'án. ¹⁰ Méxra k'uetōan ch'án kixin ts'óchrínjin sín ikja ch'ín Juan tí tjan ch'án ntōechiso. ¹¹ Ntá kjuikāo sín kjuikōyá sín tí kja ch'ín Juan ijnko plato la chjéhe sín tí tjan tjarisoá ntá jehé tjan la sákjuikénhen tjan iné tjan.

¹² Ntá tí sín k'uék'ajiko ch'án a mé sákjuikakitsje sín tí cuérpōé ch'án la sákjuikjává sín. La ntá chr'éxin la sákjuí sín sákjuichénka sín tí ch'ín Jesús kixin xikaha tsikónhen ntiha.

Ch'ín Jesús kjuínchekjine ch'án in'ó mil chojni

(Mr. 6.30-44; Lc. 9.10-17; Jn. 6.1-14)

¹³ Ntá tí kuínhin ch'ín Jesús kixin xikaha tsikónhen la ntá jehó ch'án sákjuí ch'án k'ujit'ōtjen ch'án ijnko ntabárcō la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjan ch'án la ntá k'uaxrjexín sín chjasén sín la ntá totó sín sákjuichréhe sín ch'án. ¹⁴ A ntá k'uaxrjexín ch'ín Jesús tí ntabárcō a, a ntá k'uíkon ch'án kixin nchónhya chojni siín ntiha ntá kuikónóhe ch'án tí jehé sín na ntá kjuikchitōhe ch'án jina tí sín nihi tsikjiko sín. ¹⁵ La ntá ó k'uúxin tie na ntá tí sín k'uájiko ch'ín Jesús a mé kóchjinehe sín ch'án, ntácho sín kixin:

—Ntá ó kóntó la kohya nkexro tjejó ntihi. Na ntá jaha chrókuétuēnhén sín kixin sátsji sín tí chjasin ntsí chjinaxón tsjik'ena sín nkehe sine sín —ichro sín.

¹⁶ Ntá kjuátēhe ch'ín Jesús, ntácho ch'án kixin:

—T'ichjánxinhya sátsji sín. Chjehérá sín nkehe sine sín —ichro ch'án.

¹⁷ Ntá kjuátēhe sín kixin:

—Chóntahyani itsejé nkehe. Jehó in'ó niōtja la ko yaá koche chóntani —ichro sín.

¹⁸ Ntá ntácho ch'ín Jesús kixin:

—Xrakoanará tí nkehe méhe ntihi —ichro ch'án.

¹⁹ Ntá k'uetōan ch'án kixin kaín xín sín ts'ixitjāxin sín tí chrítaón kaxi a. Ntá kuákja ch'án tí in'ó niōtja la ko tí yaá koche ntá kōnta ch'án nkajní la kjuanchehe ch'án kjuasáyé Dios. Ntá kóchrít'ō ch'án tí niōtja chjéhe ch'án tí sín k'uájiko ch'án la jehé sín mé k'óikayēhe sín chjéhe sín tí chojni siín a. ²⁰ Ntá kaín sín kjuixin kjóne sín kókjehé sín. Ntá kjuixin ntá tí sín k'uájiko ch'ín Jesús kjuenájín kaín tí nkehe sixēhe sín la mé teyó ntaxra kaón. ²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjāín tí sín a.

Ch'ín Jesús mé tjetjitaón ch'án nta

(Mr. 6.45-52; Jn. 6.16-21)

²² Ntá kjuixin tíha ntá k'uetuēnhén ch'ín Jesús tí sín k'uájiko ch'án kixin ts'it'ōtjen sín tí ntabárcō ts'atōyē sín í jnko nánko ntayaon. Ntá jehé ch'án naxa kuítōhe ch'án nixjehé ch'án tí sín siín ntiha. ²³ Ntá kjuixin xikayēhe sín na ntá jehó ch'án chrin ch'án ijnko jna tsonixjehé ch'án It'é ch'án tjan nkaya nkajní. Na ntá ó k'uúxin tie la jehó ch'ín Jesús itjen ch'án ntiha. ²⁴ La ntá tí ntabárcō na mé tjenkátaón ntā jnkōsiné ntayaon. Ntá imá chjéhe ntā tí ntabárcō kixin tí xríntō la chjéhe la xitjahya sátsji ntabárcō. ²⁵ Na ntá las tres nantōye a mé sákjuichréhe ch'án sín. Totó ch'án mé sákjuitōnxin ch'án tí ntayaon la ntá kóchjinehe ch'án tí tjejó sín. ²⁶ Na ntá tí sín k'uájiko ch'án mé k'uíkon sín kixin tjetjitaón ch'án tí ntayaon na ntá imá chrakon sín la k'óyako sín. Ntácho sín kixin kjuacha sín ichro sín, chrakon sín.

²⁷ Na ntá nixjehé ch'ín Jesús tí jehé sín ntá ntácho ch'án kixin:

—Nchefuérte asánrá, chrakonhyará. Janhan kjuihá —ichro ch'án.

²⁸ Ntá ch'ín Pedro mé nixjehé ch'án Ìnchéni, ntácho ch'án kixin:

—Ìnchéni tí chaxín jaha la ntá chrókjuánjuan kjuachaxin chrókjuitaónni tí ntā tsjijini tí tjan jaha —ichro ch'án.

²⁹ Ntá ntácho ch'ín Jesús kixin:

—Xrákiá.

Ntá k'uínkajinxin ch'ín Pedro tí ntabárcō la kjuankíxin ch'án tjetjitaón ch'án ntá sákjuchréhe ch'án tí tjen ch'ín Jesús. ³⁰ A ntá xrínahya ntá kónohe ch'án kíxin imá chjéhe xríntō chrítaón ntá, ntá chrakon ch'án la kjuankíxin tinkák'aniánkí ch'án ntá, ntá k'uèya ch'án ntáchro ch'án kíxin:

—Ínchéni, nchekaáni —ichro ch'án.

³¹ A ntá tuénxin ch'ín Jesús mé itsé ch'án tja ch'ín Pedro la ntáchro ch'án kíxin:

—Intsíkoá tinkachónkia tí janhan. ¿Nkekuènté títékákonhya? —ichro ch'án.

³² Na ntá tió k'ujit'ótjen sín yóí sín tí ntabárcō la ntá tuénxin k'uíxratá tí xríntō. ³³ Ntá kaín xín tí sín tjejóxehen tí ntabárcō mé k'uéjoxin tochr'in sín nkayakon ch'ín Jesús la ntáchro sín kíxin:

—Jaha mé chaxín Xjeen Dios —ichro sín.

Ch'ín Jesús mé kjuínchekitōhe jína tí chojni níhi nonte Genesaret
(Mr. 6.53-56)

³⁴ Ntá tió k'uátōye sín tí ntayaon ntá kjuíji sín tí nonte Genesaret. ³⁵ Ntá tí sín síin ntiha tjoka kjuátōgan sín kíxin jehe ch'ín Jesús tíha, ntá kuínhin tí sín chjasin chjinxón ntiha la ntá kjuíkōo sín kaín tí sín níhi tí tjen ch'án. ³⁶ Na ntá chrónóehē sín ch'án kíxin chrókuitōhe ch'án kíxin kjónté chrínta iké ch'án chrókúákóxin sín, la ntá kaín tí sín kuákóxin iké ch'án mé kuitōhe sín jína.

15

Tí jie tjasin chojni
(Mr. 7.1-23)

¹ A ntá chjasin Jerusalén kjuíxin iso sín fariseo la ko iso tí sín maestro tjako tí ley la kjuíchréhe sín tí ch'ín Jesús. Ntá kjuanchankíhi sín ch'án kíxin:

² —¿Nkekuènté kíxin tí sín xrikoa la nchexiteyáhya sín tí nkehe k'uékinkáchónkí tí sín tsík'axrjeníxinni kíxin t'óntiha sín itja sín ntá kjónté ine sín? —ichro tí sín fariseo a.

³ A ntá kjuanchankí ch'ín Jesús kíxin:

—¿Nkekuènté jahará kjaxin títékákonhyará nkehe tsík'etoan Dios? A ntá jahará tjinkáonrá naxa chrókuinkáchónkirá tí nkehe kuinkáchónkí tí sín tsík'axrjeníxinrá. ⁴ Ntáchro Dios kíxin: “Tsochontehérá kjuasáya it'ará la ko inárá”, la ko ntáchro ch'án kíxin: “Tí nkexro t'ántaxínhjin it'é la ko iné la chrók'uen.”* ⁵ A ntá jahará tsíntáchrórá kíxin ó nchoxon kíxin ijnko nkexro tsochéna it'é la ko iné kíxin: “It'éni, inéni, chrokjuahya tsjinkitsani tí jaha kíxin kaín nkehe chóntani la ó chjéheni Dios.” ⁶ A ntá jnkojín nkexro tsontáchrō ch'án tíhi ntá í t'ichjájinxínhya tsjinkitsa tí it'é la ko tí iné, mé xíkaha tsixrorá. Mé xíkaha jahará kjuítōhérá tí nkehe k'uétōgan Dios kíxin tjinkáonrá chrókjuích'erá éxi kjuích'e tí sín tsík'axrjeníxinrá. ⁷ Jahará la jehya jnkojínxón tjenkayáxinrá. Ntóá tsíntáchrō tí ch'ín Isaías, tí nkexro k'uéchrónka itén Dios ósé. Mé chrónka ch'án kíxin nkexri tjejorá la xíkaha tsíkjin ch'án kíxin:

⁸ Tí chojni tí chjasin í ir'va ó xraxinkakonxín sín tí janhan

a ntá tí asén sín la ikjín kuitōhe sín tí janhan.

⁹ Méxra ó chónko tóchjina sín xraxinkaon sín tí janhan

kíxin tí nkehe tjako sín la tí nkehe tsík'etoan chojni ó.†

Mé xíkaha ichro itén Dios.

¹⁰ Ntá k'uíyehē ch'ín Jesús tí chojni inaá la ntáchro ch'án kíxin:

—Chrókuihínrá la ko chrókuiéxinrá. ¹¹ Kaín nkehe ine chojni la ó nchoxon, jehya jie. Tí jie la tí nkehe t'axrjéxin ir'va chojni —mé xíkaha ichro ch'ín Jesús.

¹² A ntá tí sín k'uájiko ch'ín Jesús mé kóchjinehe ch'án la ntáchro sín kíxin:

—¿Á noha kíxin tí sín fariseo mé kónínkaon sín tí kuínhin sín tí nkehe ntáche sín? —ichro sín.

¹³ Ntá kjuátēhe ch'án ntáchro ch'án kíxin:

—Kaín tí ka jehya T'aná tjen nkaya nkajni k'uēnkaxin la mé ts'axrjeníkíxin nuèe. ¹⁴ Nté títōhé sín. Tí jehe sín la ntakótán sín la t'etūenhen sín í so sín ntakótán. A ntá tió ijnko chojni ntakótán tjitaón ntja la ntá yóí sín ts'anótjenyá sín ichrén tōye —ichro ch'án.

¹⁵ Ntá ntáchro ch'ín Pedro kíxin:

—Chrónka nkexrí t'axrjéxin tíha —ichro ch'án.

¹⁶ Ntá kjuátēhe ch'ín Jesús ntáchro ch'án kíxin:

—¿Á kjaxinrá jahará tiénxinhyará? ¹⁷ ¿Á tiénxinhyará kíxin kaín tí nkehe ineni na sáti nkaya tseeni na ko xík'axrjéxin tí cuérpōeni inaá? ¹⁸ A ntá tí nkehe t'axrjéxin ir'va chojni la t'axrjéxin asén chojni la tíha la mé tí jie tjasixín chojni. ¹⁹ Kaín tíha mé t'axrjeníxin asén chojni, mé tí jínahya tjenkayáxin sín la ko tí t'óyán kíchó sín la ko tí tjachēhē kíchó sín la ko tí

* 15:4 Éxodo 20.12; 21.17; Levítico 20.9 † 15:9 15.8-9 Isaías 29.13

chónta sín í jnko chojni chjin ókjé la ko teé sín la ko tí kjuach'ia la ko tí t'ántaxínhín kíchó sín.
²⁰ Tí nkehe a mé tjasíxín chojni jie. A ntá tí sineni kjónté nchexiteyáhyani ts'ónti tjani la tíha la jehya jie —mé xíkaha ichro ch'ín Jesús.

Ijnko tjan jehya sín israelita mé kuínkáchónki tí ch'ín Jesús
 (Mr. 7.24-30)

²¹ Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón. ²² Ntá ikúi ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uéya tjan ntáchro tjan kíxín:

—Ínchéni, Xjeen David, tikonóehéni kíxín tí xjeenni chjin la mé níhi tjan chónta tjan ijnko nchakuen tí jínahya —ichro tí tjan a.

²³ A ntá ch'ín Jesús la ninkehó kjuátéehya ch'án. A ntá tí sín k'uájiko ch'án na kóchjina sín la ntáche sín ch'án kíxín:

—Tétuénhén tjan sátsji tjan kíxín tinkák'óyako tjan chréhe tjan tí jeheni —ichro sín.

²⁴ Ntá ntáchro ch'ín Jesús kíxín:

—Dios mé ichr'ánna tsjéyá jehó tí kolélo kjuíchroe kuénte nacióon Israel —ichro ch'án.

²⁵ A ntá tí tjan a kóchjina la kjuák'exín toch'ín tjan nkayakon tí ch'ín Jesús la ntáchro tjan kíxín:

—Ínchéni, tjínkítsani —ichro tjan.

²⁶ A ntá ch'ín Jesús kjuátéhe ch'án ntáchro ch'án kíxín:

—Jehya tí jína chrókuakítsjahá niótja tí xjan ntá chrótjahá konjā chrókjóne va —ichro ch'án.

²⁷ A ntá jehe tjan la ntáchro tjan kíxín:

—Chaxín xíkaha, inchéni. Kjánchó kjónté tí konjā na tí nkehe tsjixènjinnkí mesa kuénte ínché la ine va —ichro tjan.

²⁸ Ntá ntáchro ch'ín Jesús kíxín:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítóhe jína.

Ch'ín Jesús mé kjuínchekitohe jína nchónhya chojni níhi

²⁹ Ntá ch'ín Jesús mé sákjuíxín ch'án ntiha la kjuíji ch'án chrínta ntayaon Galilea. Ntá chríin ch'án ijnko jná la ntiha kjuák'etjaxín ch'án. ³⁰ Ntá kójnkotsé itsjé chojni tí tjan ch'án la kjuíkáo sín tí sinníhi, mé tí sín xitjahya tji la ko tí sín t'íkónhya la ko tí sín nixjahya la ko tí sín tsixénká la kaín xín tí í so sinníhi. K'uejo sín tí sinníhi toté tí ch'ín Jesús kíxín jehe ch'án mé sinchekitohe ch'án sín jína. ³¹ Kaín chojni la imá chrakon sín kíxín k'uíkon sín kíxín tí sín k'uénixjahya la ó nixja sín la tí sín tsixénká la tsíkitohe sín jína la tí sín xitjahya tji la ó tji sín la ko tí sín k'uék'íkónhya la ó t'íkon sín. Méxra kjuanchehe sín kjuasáyé tí Dios kuénte tí sín Israel.

Ch'ín Jesús mé kjuínchekjine noó mil chojni
 (Mr. 8.1-10)

³² Ntá k'uíyehé ch'ín Jesús tí sín k'uájiko ch'án la ntáchro ch'án kíxín:

—Imá tikonóahá kaín tí chojni kíxín ó ní yaon tjejókoni sín ntá kjuèhe sín nkehe sine sín. Tjinkakonhya chrókuétuñhān sín sáchrókjui sín ntqé sín kíxín naxā nehya sín la ntjā ó tsotjénxín sín kjinta —ichro ch'án.

³³ Ntá ntáchro tí sín k'uájiko ch'án kíxín:

—Ntá jaha la ó noha kíxín nteje tjejóni la kohya nkehe tsochjéheni kaín xín tí chojni a —ichro sín.

³⁴ Ntá ch'ín Jesús mé kjuanchankíhi sín, ntáchro ch'an kíxín:

—¿Nkekjaín niótja chontará? —ichro ch'án.

Ntá ntáchro sín kíxín:

—Yato niótja chóntani la ko iso koche ntsínsí —ichro sín.

³⁵ Ntá ch'ín Jesús k'uetqan ch'án kíxín kaín xín sín ts'ixitjaxín sín nonte, ichro ch'án. ³⁶ Ntá kuákja ch'án tí yato niótja la ko tí koche ntsínsí la kjuanchehe ch'án kjuasáyé Dios. Ntá kóchrít'o ch'án tí niótja a la ntá k'uetqenhen ch'án tí sín k'uájiko ch'án kíxín ts'óxíkayehé sín tí niótja la ko tí koche kaín xín tí sín síin a, sine sín. ³⁷ Na mé kaín xín sín kjóne sín na kókjehé sín ntá kjuenájín sín yato ntaxra tot'o tí nkehe naxā tsixehé. ³⁸ A ntá tí sín kjóne mé noó mil chojni nto. A ntá tí chojni chjin la ko chánjan la mé kuákjahya sín cuenta nkekjaín tí sín a. ³⁹ Ntá ch'ín Jesús mé nixjehé ch'án sín sákjuí sín la ntá k'uit'ótjen ch'án ntabarco la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrxjón
 (Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxín sín ch'án la kjuanchehe sín ch'án kixin chrókjuakoxín ch'án ijnko kjuaxroan kixin á chaxín jehe ch'án tsíkixín ch'án tí tjen Dios. ² A ntá ch'ín Jesús na kjuátjehe ch'án, ntáchro ch'án kixin:

—Jahará ntáchrórá kixin ijie ntá kónjín ó tsi ijnko yaon jína kixin kjátse nkajní. ³ La ntá nchítjen ntáchrórá kixin ijie la náxrjónhya kixin kjátse nkajní la tjenkáya tjuj. Méxra jahará ntoáhya tjenkayáxinrá. Ó nohará tjátsoanrá tí nkajní, á ntá tjátsoanhyará tí kjuaxroan sitónhen jie. ⁴ Tí sín jínahya la tí sín titekakonhya la tjanchia sín ijnko kjuaxroan jie. A ntá ts'ikonhyará í jnko kjuaxroan, jehó tí kjuaxroan kuènte ch'ín Jonás mé ts'ikonrá —mé xikaha ichro ch'ín Jesús.

Ntá kuítjehe ch'án sín la sákjuí ch'án.

Ch'ín Jesús ntáchro kixin chrókuitekakonhya sín tí nkehe tjako tí sín fariseo
(Mr. 8.14-21)

⁵ Ntá tí sín k'uájiko ch'ín Jesús mé k'uátöye sín ntayaon la ntá k'uitjáyenhen sín tsíkjikohya sín niotja. ⁶ Ntá ntáchro ch'ín Jesús kixin:

—Chrókóxakonhanrá kixin tí xroan ts'ánkixín niotje tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kichó sín ntachro sín kixin:

—Mé xikaha ichro ch'án kixin tsíkjikohyani niotja —ichro sín.

⁸ Ntá kónohe ch'ín Jesús kixin nkehe tí kjo sín kichó sín, ntá ntáchro ch'án kixin:

—¿Nkeuènté tjórá kixin chontahyará niotja? Jahará la intsíkoá tinkachónkirá tí janhan.

⁹ Jahará zá naxá tiénxinhyará la ko á xráxinkákonhyará tí in'ó niotja k'óxikayeheni kjóne tí in'ó mil chojni la ko á xráxinkákonhyará nkekjaín ntaxra kjuenájinnrá tí nkehe tsíxehe?

¹⁰ La ko zá xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájinnrá tí nkehe tsíxehe? ¹¹ A ntá ¿nkeuènté kixin kuiénxinhyará kixin janhan la jehya kuènte niotja tjénixja tió ntáxrjan kixin chrókóxakonhanrá kixin tí xroan ts'ánkixín niotje tí sín fariseo la ko tí sín saduceo? —mé xikaha ichro ch'ín Jesús.

¹² Na ntá kuiénxín sín kixin nixjahya ch'án kuènte tí xroan t'ánkixín niotja. Náhi. Tjenixja ch'án kixin chrókóxakonhen sín kixin tí nkehe tjako tí sín fariseo la ko tí sín saduceo.

Chrónka ch'ín Pedro kixin ch'ín Jesús mé tí nkexro Cristo
(Mr. 8.27-30; Lc. 9.18-21)

¹³ Kjuíji ch'ín Jesús chjino tí chjasin Cesarea de Filipino ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátjehe sín ntáchro sín kixin:

—Iso sín mé ntáchro sín kixin Juan Bautista, ichro sín. A ntá í so sín na mé ntáchro sín kixin Elías, ichro sín. A ntá í so sín mé ntáchro sín kixin Jeremías ó í jnko nkexro k'u'échrónka itén Dios —ichro sín.

¹⁵ Ntá ntáchro ch'ín Jesús kixin:

—¿A ntá jahará nkechrórá kixin nkexro tí janhan? —ichro ch'án.

¹⁶ A ntá ch'ín Simón Pedro kjuátjehe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátjehe ch'ín Jesús ntáchro ch'án kixin:

—Náxrjón tjen jaha Simón xjeen Jonás kixin kohya nijnko chojni kjuakóha tíha. Jehó T'aná tjen nkaya nkajní mé kjuakóha tíha. ¹⁸ Méxra ntáxrjan kixin jaha mé Pedro mé t'axrjéxín kixin ijnko xro la chrítaón tí xro mé sit'ána nínko la kjónté tí kjuachaxin kuènte kjuach'én la tsjachahya sinchek'itjáyán. ¹⁹ Méxra jaha mé tsojtjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjáxin nkaya nkajní tsochóntahya kjuachaxin. A ntá tí nkehe tsjánjuan kjuachaxin tsonhen ntihi chjasintajni la ntá kjáxin nkaya nkajní siín kjuachaxin.

²⁰ Ntá ch'ín Jesús mé k'uétuènenhen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

Ch'ín Jesús chrónka ch'án kixin its'en ch'án
(Mr. 8.31—9.1; Lc. 9.22-27)

²¹ Ntá ch'ín Jesús kjuankixín ch'án chénka ch'án tí sín k'uájiko ch'án kixin t'ichjánxín satsji ch'án chjasin Jerusalén la ntaha la tí sín t'etöan kuènte nínko la tí sín nchat'á tjetöan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyán sín ch'án kjánchó tí nixin yaon mé tsoxechón ch'án inaá. ²² Ntá ch'ín Pedro mé kuakitsjenta ch'án tí ch'ín Jesús la kjuankixín nixjehje ch'án ntáchro ch'án kixin:

—Kjá Dios tsjanjonhya kjuachaxin xikaha tsonhan Ìnchéni kixin jaha la xitjahya tsjasóte xikaha —ichro ch'ín Pedro.

²³ A ntá ch'ín Jesús mé kuinkátjá ch'án la nixjehe ch'án tí ch'ín Pedro, ntáchro ch'án kixin: —Sátja ntáha, Sátanas. Tjiaitéhya tí jaha tí nkehe tsonna. Jaha chrók'uínkakahén tí nkehe tjinkaon Dios. Jaha tjenkayáxinhya éxi tjinkaon Dios. Náhi. Tjenkayáxian éxi tjenkayáxin chojni ó —ichro ch'ín Jesús.

²⁴ Ntá nixjehe ch'ín Jesús tí í so sín k'uájiko ch'án, ntáchro ch'án kixin:

—Jnkojínrá tjinkaónrá tsochréhérá tí janhan la t'ichjánxin tsjtohérá kaín tí nkehe tjaké asánrá, ntá tsámárá tí ntacruz kuéntará, a ntá tsochréhérá tí janhan. ²⁵ A ntá tí nkexro tjinkaon Jehó sinchekaá asén la ts'itjáyán. A ntá tí nkexro chrókjuinçek'itjáyánxín asén kixin tinkáchónki sín tí janhan la tsaá. ²⁶ ¿A ntá nkehe tsonhen tí chrókjuacha ijnko chojni chróchónta kaín nkehe siín chjasintajni a ntá tí kjuachón chrókjuinçek'itjáyán? ¿Nkehe chrókjuenka chojni kixin chróchónta tí kjuachón? ²⁷ Tí Xjeen Dios K'óna Chojni tsikao ch'án tí kjuachaxin jié kuénte It'é ch'án tjen nkaya nkajni la kaín tí sín ángel tsikao ch'án na ntá tsjenkehe ch'án jnkojinko chojni nkexrí tí xra kjuich'e jnkojinko tí jehe sín. ²⁸ Chaxin xrxanka kixin isorá tjejorá ntihi la nağa ts'ényhará nağa ts'ikonjjará kixin nkexrí tí kjuachaxin tsochónta tí Xjeen Dios K'óna Chojni tí tsikao ch'án kjuachaxin jié —ichro ch'ín Jesús.

17

Ch'ín Jesús mé k'uixitóxin nkexrí tsjehe ch'án
(Mr. 9.2-13; Lc. 9.28-36)

¹ Ntá injón yaon chr'éxin ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jna imá noi. ² Ntá ntiha tjejó sín ntá xrinahya k'uikon sín kixin ch'ín Jesús mé k'uixitóxin nkexrí tsjehe ch'án. Tí nkayakon ch'án la imá tjájni tsjehe éxi yaon la ko iké ch'án la k'óna imá tjóá la tsjehe éxi yóhe ijnko xrohi t'inkaséyan. ³ Na ntá xrinahya k'uikon sín itjen ch'ín Moisés la ko tí ch'ín Elías tjejótjo sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kixin:

—Ìnchéni, jina kixin tjejóni ntihi. Tí tjinkávan la chrókjuich'énnani ini nchia la mé ijnko kuéntá jaha la ijnko kuénte ch'ín Moisés la í jnko kuénte ch'ín Elías —ichro ch'án.

⁵ Ntá nağa tjenixja ch'ín Pedro na ntá xrinahya ikui ijnko tjuí imá t'inkaséyan kjuák'etja chrítaón tí jna tjejó sín. Ntá xrinahya chríkjan tí tjuí kuínhin sín itén ijnko nkexro nixja na mé ntáchro kixin:

—Tíhi mé xjanna. Imá tjuahá ch'án la ko chàna kixin itjen ch'án. Chrókuinhínrá tí nkehe tjako ch'án —ichro Dios.

⁶ Kuínhin tí sín k'uájiko ch'án xikaha la ntá kjuítsínka sín nonte kixin imá chrakon sín. ⁷ Na ntá ch'ín Jesús mé kóchjina tí tjejó sín la kuákóxin sín ch'án la ntáchro ch'án kixin:

—T'áya chrakonhyará —ichro ch'án.

⁸ Na ntá xrinahya k'uikon sín kixin kohya ninkexró. Jehó ch'ín Jesús mé tjen.

⁹ Na ntá tí k'uínkajinxín sín tí jna ntá k'uetoan ch'ín Jesús, ntáchro ch'án kixin:

—Ninkexró chenkahyará tí nkehe k'uikonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkeuènté ntáchro tí sín maestro tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe. ¹² Kjánchó ó xrxanka kixin chaxín ó kui ch'ín Elías la tí sín chjasintajni la mé kjuátspanhya sín ch'án la kjuínčekjasóte sín ch'án éxi kóxrjnhín sín. Mé xikaha kjaxin tí Xjeen Dios K'óna Chojni la mé kjaxin sinčekjasóte tí jehe sín —mé xikaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuénte Juan Bautista.

Ch'ín Jesús mé kjuínčekitohe jina ijnko xjan t'aniáte
(Mr. 9.14-29; Lc. 9.37-43)

¹⁴ Ntá tíó k'uíji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toh'ín ch'án nkayakon ch'án. La ntáchro ch'án kixin:

¹⁵ —Ìnchéni, tikonóhéni kixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án ntá. ¹⁶ Ntá kjuíkəoni ch'án ntihi la tí sín xrikoá la kjuachahya sín kjuínčekitohe ch'án jina.

¹⁷ A ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjasínrá jie. ¿Xá hasta nkesá tjínkáonrá naxá ts'ejóni? ¿Hasta nkesá tsjácha tsjak'é tsjáohará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'u'etuenhen ch'án tí nchakuen tí jínahya la ntá k'uaxrxéjin tí nchakuen tí jínahya tí chánjan la tuénxín kuítóhe xjan jína.

¹⁹ Ntá kjuixín sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkeuènté kixin kjuachahyani kuakitsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakitsjerá nchakuen tí jínahya kixin intsíkoá tinkachónkirá tí janhan. Chaxín xrxanka kixin tí chrókuinkachónkirá kaín asánrá kjónté intsíkoá éxi ijnko tje mostaza intsi la ntá chróntácherá tí jná kixin: “Sátjixian ntihi la sátsjia ókjé”, chróchrorá chróntácherá tí jná la ntá tí jná sáchrókjuixín ntiha. Mé xikaha kaín nkehe chrókjuachará chrókjuich'érá tí chaxín tinkachónkirá tí janhan. ²¹ A ntá tí tsakitsjerá ijnko nchakuen tí jínahya la t'ichjánxín tsonixjehérá Dios la ko sintehyará.

Ch'ín Jesús chrónka ch'án inaá kixin its'en ch'án

(Mr. 9.30-32; Lc. 9.43-45)

²² Naxá k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí síin chojni t'etoan sinchekjasóte sín ch'án ²³ la ts'óyan sín ch'án. A ntá tí yaon níxin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenká ch'án tí nkehe kjuanchia tí sín kuènte nijnko

²⁴ Ntá tíó kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènkí kuènte nijnko mé sákjuitsjehe sín tí ch'ín Pedro la kjuanchankí sín kixin:

—Tí maestro kuèntá la, ¿a tjenkàhya ch'án tí nkehe tjanchia tí sín nchekjènkí kuènte nijnko? —ichro sín.

²⁵ Ntá kjuátèhe ch'ín Pedro, ntáchro ch'án kixin:

—Kjá tjenká ch'án —ichro ch'án.

Ntá k'uixenhen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenká tí nkehe tjanchia tí sín t'etoan chjasintajni, á tí sín kuènte ntiho ó á tí sín tsíkjixín ókjé? —ichro ch'ín Jesús.

²⁶ Ntá kjuátèhe ch'ín Pedro, ntáchro ch'án kixin:

—Tí sín tsíkjixín ókjé mé tjenká sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxínhya chrókjuenká sín. ²⁷ Kjánchó tjínkakonhya tsonínkaon ninkexró ntihi. La ntá sátsjia tí ntayaon sátsjikoá tí ichjón chóna gancho tséxin sín koche la ntaha itésé tí chjón chrínki ntayaon. Ntá tsákjá tí koche sáoxin sítsé gancho. Ntá takitjehe nkaya ir'va va la ts'itja ijnko chíchao. Táha mé tsjacha tsjenká kaín tí tjasikáha sín la ko tí tjasíkehé sín jaha. Táha mé sátjikoá tjenka —ichro ch'ín Jesús.

18

¿Nkexro tí imá ts'etoan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsi má ts'etoan tí kjuachaxín kuènte nkaya nkajni? —ichro sín.

² Ntá ch'ín Jesús mé k'uíyèhe ch'án ijnko chánjan la kjuak'e jnkosiné tí tjejó tí jehe sín ³ la ntáchro ch'án kixin:

—Chaxín xrxanka kixin tí ts'ónahyará éxi ijnko xjan ntsí ntá xitjahya tsákjárá tí kjuachaxín kuènte Dios. ⁴ Tí jnkójín nkexro ts'óna éxi tí chánjan ihnkehya la mé antsi tjeoan ntiha.

⁵ A ntá tí nkexro ts'áyéhe ijnko chánjan kixin tinkáchónki sín tí janhan la mé xikaha éxi chrók'uáyéhe sín tí janhan —mé xikaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ Tí jnkójín nkexro chrókjuachroe ijnko chánjan ntsí tinkáchónki tí janhan la íchá jína chrókjuincheteyá sín ch'án ijnko xro tsík'óna xrochre ntá chrókjuikakánkí ch'án ntayaon nijnka. ⁷ Imá náxrxónhya tjejó tí sín chjasintajni kixin síin nkehe tjasixín chojni jie. Xráxín la jehí síin, a ntá nóa tí nkexro tjasin tí nkehe tsjasixín chojni jie.

⁸ Tí itjá o totá tjasixián jie na chrókójína chrókochrínjan chróchr'an ikjín kixin íchá jína chróchonta kjuachón kjónté it'óó itjá o it'óó totá. Á ntá tí yóí itjá o yóí totá chróchonta

tsjásixián jje la tíha mé sátsjixián tí síche xrohi jnkochrixin. ⁹ La ko kjaxin tí ikuan tjásixian jje na chrókójina chrókuakitsjenkiá tí ikuan chróchr'an ikjin kixin kjónté náyo ikuan na chróchonta kjuachón. A ntá tí yóí ikuan chróchonta tsjásixián jje la tíha mé sátsjixián tí síche xrohi jnkochrixin.

Kjuíncheyóexin ch'ín Jesús éxí ijnko kolélo tsík'itjáyán
(Lc. 15.3-7)

¹⁰ Chrókókjoniéhyará nijnko tí chánjan ntsínsí. Tjonkará kixin nkaya nkajní la tí sín ángel kuente tí xjanntsi la xráxin tjejó sín tí tjen T'aná nkaya nkajní. ¹¹ Tí Xjeen Dios K'óna Chojní la mé ikui kixin chrókjuinchekaá tí chojni xrichroe.

¹² ¿Jahará nkechrórá? Ijnko chojni chóna ijnko ciento kolélo ntá chrók'uitjáyán ijnko va na ¿á chrókuitóehya ch'an tí noventa y nueve va tí jna ó a ntá á chrókjuikjeyáhya ch'an tí ijnko tí ko k'uitjáyán ní? ¹³ A ntá tí tsjacha ch'an ts'itja ch'an va ntá antsí tsóchehé ch'an kixin tí kolélo k'uitja ch'an la ntá kánhyó tsóchehé ch'an kixin tjejó tí noventa y nueve ko tsík'itjáyánhya va. ¹⁴ Mé xikaha kjaxin It'eni tjen nkaya nkajní la tjinkakonhya ch'an kixin chrók'uitjáyán ninkexró kjónté ijnko chojni kánhyó tjeotan.

Chrók'uitjáyánhanrá tí jje kjuasinhanrá kichuárá
(Lc. 17.3)

¹⁵ Tí kichuá tí chrókjuit'aha ichrén nkehe jínahya la ntá jahvá chrónixjehé ch'an la nchexraxinkaon ch'an tí jje kjuasin ch'an. A ntá tí kjuacha nixjehé tí kichuá la í kohya kjuanínkaon. ¹⁶ A ntá tí tahya ch'an kuentá nkechrúa la ntá ntáche á jnko o yaá chojni sátijska kixin tsinhin sín á chaxin titekakonhya ch'an. ¹⁷ A ntá tí kjónté xikaha náxa titekakuenhya ch'an sín la ntá chenska tí sín tsikójkotsé nkehe tí jje kjuasin ch'an la ntá tí náxa titekakuenhya ch'an tí sín tsikójkotsé la ntá ts'ikonrá ch'an éxí ijnko chojni tinkáchónkihya Dios o éxí ijnko chojni nchekjènkí.

¹⁸ Chaxin ntáxrxjan kixin tí tsjanjonhyará kjuachaxin nkehe tsonhen ntihi chjasintajni la ntá kjaxin nkaya nkajní tsjanjonhya Dios kjuachaxin la ko tí tsjanjónrá kjuachaxin nkehe tsonhen ntihi chjasintajni la kjaxin ntaha nkaya nkajní tsjanjon Dios kjuachaxin.

¹⁹ Kjaxin ntáxrxjan kixin tí tjejó yaará ntihi chjasintajni la tí jnkokoá tjejótkjayáxinrá chrókjuancheherá Dios ijnko nkehe tjinkáonrá la ntá jehé ch'an mé tsotjáhará ch'an. ²⁰ Kixin tí tjejó yaá o iy'á chojni tjejó jnkokoá t'ákjenxin sín niná la janhan koína tjéntaxian tí tjejó sín ntiha.

²¹ Ntá kóchjina ch'ín Pedro mé kjuanchankí ch'an ntáchro ch'an kixin:

—Ínchéni, ¿nkekjaín veces chrók'uitjáyénhenni tí jje kjuasin kichó ní? ¿Á yato veces ó ní? —ichro ch'an.

²² Ntá kjuátéhe ch'ín Jesús, ntáchro ch'an kixin:

—Náhi, jehya yato veces ó. Náhi, hasta setenta veces tí yato.

Ch'ín Jesús kjuíncheyóexin ch'an ijnko chojni ch'exón xra k'uitjáyénhya ch'an ijje kichó ch'an

²³ Tí kjuachaxin kuente Dios la éxí yóhe ijnko rey tjinkaon ch'an tsjentoáko ch'an kuentá tí sín ch'ehe ch'an xra. ²⁴ Ntá kjuankixin ch'an tsítsínkaxin cuenta la ntá xrináhya kóchjina ijnko ch'ín ch'e xra síká nchónhya millones chichaon. ²⁵ Tí ch'ín a mé chóntahya ch'an chichaon ts'ókjenhen ch'an tí ch'ín rey la ntá tí ch'ín rey mé k'uetjoan ch'an kixin tí nkexro a mé tsóxi ch'an la koí tí ichjién ch'an la ko xjeen ch'an la ko kaín nkehe kuente ch'an kixin ntá xikaha mé tsoxenka kaín tí síká ch'an. ²⁶ A ntá tí nkexro ch'e xra mé kjuák'exín toch'in ch'an nkayakon tí rey la chrónóehé ch'an, ntáchro ch'an kixin: “Jaha Ínchéni tikonóehéni la kjónté kjaxón tsjenkahaní kaín tí síkáhani”, ichro ch'an. ²⁷ A ntá tí ch'ín rey kuikonóehé ch'an tí ch'ín a kjónté itsje síká ch'an, ntá kuitóhe ch'an sákjuí. ²⁸ A ntá tí sákjuí tí ch'ín a ntá xrináhya xéta ch'an ijnko nkexro ch'eko ch'an xra mé ijnko nkexro síkéhe ch'an iso chichaon. La ntá tí ch'ín a mé tsénkíhi ch'an isin la ntáchro ch'an kixin: “¡Tsjénkana tí nkehe tjasíkana ní o náhi!” ichro ch'an. ²⁹ A ntá tí ch'ín chóxin ch'an mé kjuák'exín toch'in ch'an nkayakon ch'an la chrónóehé ch'an ntáchro ch'an kixin: “Tikonóehéni ijje la kjónté kjaxón tsjenkahaní kaín tí nkehe síkáhani”, ichro ch'an. ³⁰ A ntá jehé ch'an la kuikonóehya ch'an. K'uetjoan ch'an kixin tí ch'ín a mé tsjak'echjina ch'an tsjixinjian tsjenka ch'an kaín tí síká ch'an. ³¹ Ntá tí í so sín ch'exón xra mé k'uíkon sín la ntá imá kóxakonhen sín la sákjuíchéna sín tí lámoe sín nkexrí kaá kónhen tí ch'ín síká. ³² A ntá tí lamo mé k'uetjoan tsjik'íyehé sín tí nkexro jínahya la ntá ntáchro ch'an kixin: “Imá jínahya jaha. Janhan mé kjuíntak'itjáyánhan tí nkehe tjasíkana kixin jaha chrónóna. ³³ A ntá jaha mé kjaxin chrókjuikonóehé tí nkexro choxian éxí janhan kuikonógha tí jaha”, ichro tí ch'ín lamo. ³⁴ A ntá imá kónínkaon tí lamo a la k'uetjoan ch'an kixin tsjasóte tí ch'ín a tsjixinjian tsjenka ch'an kaín tí síká ch'an.

³⁵ A ntá tí ch'ín Jesús ntáchro ch'an kixin:

—Mé xikaha T'aná tjen nkaya nkajni xikaha sit'ahará jahará tí jehya kaín asánrá ts'itjáyanhará tí jje chóna kichuárá —ichro ch'in Jesús.

19

Tjako ch'in Jesús kuènte tí sín t'itjihi kichó

(Mr. 10.1-12; Lc. 16.18)

¹ A ntá kjuixin nixja ch'in Jesús kaín tíha, ntá sákjuixin ch'an estado Galilea la kjuíji ch'an estado Judea nó tóhe tí ntario Jordán. ² Ntá nchónhya chojni kjuíjichréhe sín ch'an ntá ntiha mé kjuínchekitohe ch'an jina tí chojni níhi.

³ Ntá iso sín fariseo mé kóchjinehe sín tí ch'in Jesús kjuanchankíhi sín ch'an kixin tsotsjehe sín nkexrí tsixro ch'an, ntáchro sín kixin:

—¿Á siín kjuachaxin tsjákehe jnkojín chojni ichjién kjónté kohya jje jíé? —mé xikaha kjuanchankí sín.

⁴ Ntá kjuátehe ch'in Jesús ntáchro ch'an kixin:

—¿Á nunca kjuínchekuáxinhará jahará kixin ntáchro xroon itén Dios kixin tí nkexro kjuích'ena kaín chojni siín chjasintajni tí xrankixín, la tí nkexro mé "kjuích'ena ch'an chojni ntoa ko chojni chjin"?* ⁵ La ko ntáchro kixin: "Mé xikaha tí chojni ntoa la tsítóhe sín it'é sín la ko iné sín la tsakja sín ichjién sín la yóí sín la éxí ó jnko chojni xikaha ts'óna sín."† ⁶ Mé xikaha la í jehya yaá chojni tí jehe sín. Náhí. Ó jnko chojni k'óna tí jehe sín la mé Dios kjuanjón kjuachaxin kixin kuákja kichó sín, la í xitjahya ts'itjihi kichó sín.

⁷ Ntá tí sín fariseo mé kjuanchankíhi sín ch'an kixin:

—¿Ntá nkexrí kixin tí ch'in Moisés k'uetqan kixin ts'óna ijnko xroon tsakja tí ichjién kixin tsjákeexín kichó sín?‡ —ichro tí sín fariseo.

⁸ Ntá ntáchro ch'in Jesús kixin:

—A ntá jahará titekákonhyará. Méxra ch'in Moisés kjuanjón ch'an kjuachaxin kixin ts'óna tí xroon ts'itjiéxín kichuárá. Kjánchó tí xrankixín la xikaha kónhen. ⁹ Méxra ntáxrxjan kixin jnkojín sín tjákehe ichjién tí kjuasinhyá jje, chóntahya tjan í jnko chojni, ntá kjuákehe ch'an tjan ntá tsakja ch'an í jnko chjin mé xikaha la ó jje tíha. La ko kjaxin tí ijnko chojni chjin tsikitsinkehe ntá tsakja í jnko chojni la kjaxin jje tíha.

¹⁰ La ntá tí sín k'uájiko ch'in Jesús ntáchro sín kixin:

—Tí xikaha tjanjónko kichó sín chrók'uitjihi kichó sín la íchá jina chrókóteghya sín.

¹¹ Ntá ntáchro ch'in Jesús kixin:

—Kénhya chojni tsjacha tienxín tíha. Jehó tí sín kjuanjón Dios kjuachaxin tienxín sín. ¹² Siín iso chojni tí tsík'ónaxín sín la chóntahya sín kojé sín la xitjahya tsochóna sín ichjién sín. La í so sín la chrokjuaaha tsakja kichó sín kixin ókjé chojni kjaxin kjuích'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'an xra. Tí sín tsjacha sich'e tíha la chrókjuich'e sín xikaha.

Ch'in Jesús mé kjuíncheyaon ch'an chánjan

(Mr. 10.13-16; Lc. 18.15-17)

¹³ Ntá ikjui chojni kjuíkqo sín iso xjan kixin tjinkaon sín tsjak'etja tja ch'in Jesús chritaón tí chánjan la sincheyaon ch'an sín. Ntá tí sín k'uájiko ch'an mé kóninkakonhen sín tí sín kjuíkqo tí xjan. ¹⁴ A ntá ntáchro ch'in Jesús kixin:

—Nté tjtóhéra tsoxrakoa xjan tí tjén janhan la t'ínkakuènyará xjan kixin tí sín kuènte kjuachaxin nkaya nkajni la mé tóyóhe éxí tí jehe xjan —ichro ch'an.

¹⁵ Ntá kjuak'etja tja ch'an chritaón tí xjan la ntá kjuixin ntá sákjuí ch'an ókjé.

Jnko ch'in ntasoá rico mé kjuínixjehe ch'an tí ch'in Jesús

(Mr. 10.17-31; Lc. 18.18-30)

¹⁶ A ntá ijnko ch'in ntasoá sákjuítsjehe ch'an tí ch'in Jesús la kjuanchankíhi ch'an kixin:

—Jaha la ijnko Maestro jina. La ntá çneke jina chrókjuich'eni kixin chróchóntani kjuachón jnkochrín? —ichro ch'an.

¹⁷ Ntá ch'in Jesús kjuátehe ch'an, ntáchro ch'an kixin:

—¿Nkeuènté ntáchrua kixin jina tí janhan? Jehó jnkokoá nkexro la mé jina la tíha mé Dios. A ntá tí tjinkávan tsochonta kjuachón jnkochrín la titekávan tí nkehe k'uetqan Dios —ichro ch'in Jesús.

¹⁸ Ntá ntáchro tí ch'in ntasoá kixin:

—¿Nkehe tíha? —ichro ch'an.

Ntá ntáchro ch'in Jesús kixin:

* 19:4 19:4: Génesis 1.27; 5.2 † 19:5 Génesis 2.24 ‡ 19:7 Deuteronomio 24.1-4

—Chrók'oyánhya chojni la ko chrókjuich'iyehya nijnko chojni chjin la ko chrókueehya la ko chrókjuich'énahya kjuach'ia kuente ókjé chojni ¹⁹ la ko chrókjuikosáyehé it'á la ko iná la ko chrórtjuehé kichuá éxi tjuèxian asán. ^S —mé xikaha ichro ch'ín Jesús.

²⁰ Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿A ntá nkehe tí naxá t'itjáyan? —ichro ch'án.

²¹ Ntá ntáchro ch'ín Jesús kixin:

—Tí tjinkávan antsí toá sinchexiteyá la sátjia sinchekjia kaín tí nkehe chonta la sinchekjionhén tí sín nóa. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xikaha ntá t'ává ch'án sákjuí ch'án kixin imá itsjé nkehe chóna ch'án.

²³ Ntá ch'ín Jesús mé nixjehé ch'án tí sín k'uájiko ch'án, ntáchro ch'án kixin:

—Chaxín tjonkará kixin tí chojni chóna imá itsjé nkehe na imá xra ts'áyéhe sín tí kjuachaxin kuente nkaya nkajní. ²⁴ Kjatée xrxanka kixin antsí xrahya chrók'uatsínka ijnko kocamello ijnko tjar'i ntachica tjexrja. A ntá antsí xra kixin tí sín chóna itsjé nkehe chrók'uáyéhe tí kjuachaxin kuente Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xikaha la ¿xá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xikaha sich'e. A ntá Dios mé tsjacha sich'e xikaha —ichro ch'ín Jesús.

²⁷ Ntá ntáchro ch'ín Pedro kixin:

—Inchéni, jeheni kaín ní la kuitóheni kaín nkehe chónani kixin tsochréheni tí jaha. A ntá ¿nkehe ts'áyéheni? —ichro ch'án.

²⁸ Ntá kjuátehe ch'ín Jesús kixin:

—Chaxín ntáxrxan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochóna kjuachaxin jíé la ntá kjaxinrá jahará chréherá tí janhan la ts'ejorá teyó trono sinchekitoexinrá ijíé kaín tí sín tsik'axrxenixin tí teyó xjeen ch'ín Israel. ²⁹ La ko kaín tí sín kuitóhe sín ntóe sín la ko kuitóhe sín tí kichó sín la ko kuitóhe sín it'é sín o iné sín la ko kuitóhe sín ichjién sín la ko xjeen sín la ko nontee sín kixin tinkáchónki sín tí janhan, na ntá antsí má tsochóna sín la ko kjaxin tsochóna sín kjuachón jnkochrxin. ³⁰ A ntá nchónhya tí sín t'etóan ijie, mé tsjixixín tsochréhe sín. A ntá nchónhya tí sín t'ituenhen ijie la tí sín a mé ts'etóan sín tí ntiha.

20

Ch'ín Jesús kjuíncheyóexin ch'án éxi tí sín ch'e xra

¹ Tí kjuachaxin kuente Dios la éxi yóhe ijnko chojni chóna xra nontee ch'án la ntá ijnko yaon imá nchítjen sákjuikjeyá ch'án chojni tsotjéhe ch'án to uva. ² Ntá tí k'uitja ch'án tí sín sich'ehe ch'án xra ntá ikjo ch'án sín kixin ijnko denario tsjenkehe ch'án sín tí xra sich'e sín nontee ch'án tí yaon a. ³ Ntá chr'éxin como las nueve nchítjen ntá sákjuí ch'án ntasin la k'uikon ch'án í so sín tjejó ntasin chónahya sín xra. ⁴ Ntá nixjehé ch'án sín ntáchro ch'án kixin: “Kjaxinrá sáchrókjuirá chrókjuich'erá xra nonteeni la jina chrókjuénkahará”, ichro ch'án. La ntá jehe sín sákjuí sín. ⁵ A ntá tí inché nonte la sákjuí ch'án inaá chonkixin naxá xik'itja ch'án í so sín ch'ehe ch'án xra la nta tí las tres kónjin la xikaha naxá xik'itja ch'án í so sín inaá. ⁶ A ntá las cinco kónjin sáxikji ch'án ntasin inaá la k'uitja ch'án í so chojni ntaha chónahya sín xra la ntá kjuanchankíhi ch'án sín kixin: “¿Nkekuènté tjejorá ntíhi ch'ehyará xra kuenté yaon? —ichro ch'án.

⁷ Ntá ntáchro sín kixin: “Kohya nkexro kjuanjon xra chrókjuich'eni”, ichro sín. Ntá ntáchro ch'án kixin: “Kjaxinrá chrókjuirá chrókjuich'erá xra nonteeni la jina chrókjuénkahará”, ichro ch'án. ⁸ A ntá ó kóntó ntá tí inché nonte mé nixjehé ch'án tí sín t'etóan sítónhen xra nontee ch'án la ntáchro ch'án kixin: “T'iyehé kaín tí sín kjuich'e xra tjénkehé sín. Tjankixian tjénkehé tí chojni kjuixixín k'uixenhen xra la chr'éxin tjénkehé tí sín saoxín k'uixenhen xra”, ichro ch'án. ⁹ A ntá kóhjina kaín tí sín k'uixenhen xra las cinco kónjin la kójnko sín k'uáyéhe sín jnkójnko denario. ¹⁰ Ntá chr'éxin, tió kóhjina tí sín k'uixenhen xra nchítjen la ntá kjuenkayáxin sín kixin antsí itsjé chichaon chrókjuacha sín, ichro sín. Kjánchó kjaxin sín k'uáyéhe sín jnkójnko denario ó. ¹¹ A ntá tí kjuachahya sín tjete ntá kjuankixin sín kónínkakonhen sín tí inché nonte ¹² la ntáchro sín kixin: “Tí sín ikui kjuixixín la kjuich'e sín xra jnkokóá hora la ntá kjaxin kjuénkehé sín jnkokón éxi kjuacha tí jeheni. La ntá jeheni kjuich'eni xra kjónté sóa la

kuenté yaon kjuich'eni xra", ichro sín. ¹³ A ntá kjuátehe tí inché nonte nixjehe ch'án ijnko tí jehe sín, ntácho ch'án kxín: "Janhan la kjuít'ayahará ninkehó. Ó kuitóexínni kxín ijnko denario tsjénkahará tí yaon. ¹⁴ Ntá tsákjá ch'ichákoan la sátja. Janhan tjínkavan tsjénkaha tí sín k'uixenhen kjuixixín éxi tí kjuénkaha jaha. ¹⁵ ¿Á chontahya janhan kjuachaxin xikaha chrókjuénkaha sín kxín tíha la ch'ichákoanna? ¿Nkeuenté tóchjinóxínhan jaha kxín xikaha kjuénkaha sín?" ichro ch'án. ¹⁶ Mé xikaha iso tí sín tsjixixín chréhe sín la tí sín a senóxin ntíha la ntá itsjé tí sín senó la mé tsjixixín tsochréhe sín ntíha kxín nchónhya sín k'uíyaha kjánchó tsjéhya sín k'uítja —ichro ch'ín Jesús.

Chrónka ch'ín Jesús inaá kxín its'en ch'án

(Mr. 10.32-34; Lc. 18.31-34)

¹⁷ Ntá ch'ín Jesús sákjuí ch'án ntja nó chjasin Jerusalén la ntá k'uaxrjentako ch'án tí teyó sín k'uájiko ch'án la ntácho ch'án kxín:

¹⁸ —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí síin tí sín ncha'tá t'etoan la ko tí sín maestro tí tjako ley. Ntá jehe sín ts'etqan sín kxín its'en ch'án. ¹⁹ Ntá tsjikaán sín ch'án tí síin chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkanı sín ch'án ijnko ntacruz kjánchó yaon níxin mé tsoxechón ch'án inaá —mé xikaha chrónka ch'ín Jesús.

Tí nkehe kjuanchia tí iné ch'ín Jacobo la ko ch'ín Juan

(Mr. 10.35-45)

²⁰ A ntá tí iné tí xjeen ch'ín Zebedeo mé kjuíkao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóhehe tjan ch'án. ²¹ Ntá ch'ín Jesús kjuanchankíhi ch'án tjan kxín:

—¿Nkehe tjínkávan? —ichro ch'án.

Ntá kjuátehe tjan ntácho tjan kxín:

—Tió tsétoanxián tí kjuachaxián jié la tsánjuan kjuachaxin kxín tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

²² Ntá kjuátehe ch'ín Jesús, ntácho ch'án kxín:

—Jahará la noahará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxi tsikite janhan? —ichro ch'án.

Ntá kjuátehe sín, ntácho sín kxín:

—Kja tsjachani —ichro sín.

²³ Ntá ntácho ch'ín Jesús kxín:

—Chaxin kjónté chrókjuachará chrók'uirá éxi tí nkehe itsjá its'ia la ko chrókuikiterá éxi tsikite janhan, kjánchó janhan xitjahya tsánjuan kjuachaxin kxín ijnkorá chrókjuak'erá tjaná chjina la í jnkorá chrókjuak'erá tjaná ikjon kxín janhan la tónahya tocar kxín tsánjuan tíha. Jehó T'aná tjan nkaya nkajni mé nohe kxín nkexro tsíkjejá ch'án ts'áyéhe tíha —ichro ch'ín Jesús.

²⁴ Ntá kuínhin tí ite sín kxín xikaha tsíkanchia tí sín a ntá kónínkakohenhén sín tí yaá a. ²⁵ A ntá ch'ín Jesús mé k'uíyehé ch'án tí jehe sín ntá ntácho ch'án kxín:

—Jahará ó nohará kxín tí sín t'etoan chjasintajni la imá t'etuénhen sín kain chojni la tí sín t'etoan imá nchehnkehe asén sín kxín ihyé sín t'etoan sín. ²⁶ Kjánchó jahará la xikahya chrókjuich'erá. Náhi. Tí jnkojínrá tjínkáonrá chrókuétoanrá la chrókjuínk'isará tí í so sín. ²⁷ A ntá tí jnkojínrá tjínkáonrá chrókuétoanrá mé t'ichjánxin senó chrókjuákoxínrá chrókjuich'eherá kichuárá xra. ²⁸ Mé xikaha tí Xjeen Dios K'óna Chojni mé kuihya kxín chojni chrókjuich'ehe xra. Náhi. Ikui ch'án kxín sich'ehe ch'án sín xra la ko ts'enyákonhen chojni kxín tsaáxin nchónhya sín.

Ch'ín Jesús kjuínchekitohe jina yaá chojni t'ikonhya

(Mr. 10.46-52; Lc. 18.35-43)

²⁹ Ntá k'uaxrjéxin sín chjasin Jericó la nchónhya chojni chréhe tí ch'ín Jesús. ³⁰ Ntá ntaha chrínta ntja tjejótjixin yaá sín t'ikonhya. La ntá kuínhin sín kxín k'uatsínka ch'ín Jesús la ntá kjuankxín t'iyehé sín ch'án ntácho sín kxín:

—Ínchéni, jaha tsík'axrjeníxian David, tjíkonóhéni —ichro sín.

³¹ Ntá nchónhya chojni mé ntáche sín tí sín t'ikonhya kxín:

—Tánirá tí jahará —ichro sín.

Ntá tí jehe sín antsí itsén k'uéya sín, ntácho sín kxín:

—Ínchéni, jaha tsík'axrjeníxian David, tjíkonóhéni —ichro sín.

³² Ntá ch'ín Jesús kjuák'echónhen ch'án ntá k'uíyehé ch'án tí sín t'ikonhya la kjuanchankíhi ch'án sín ntácho ch'án kxín:

—¿Xá nkehe tí tjínkáonrá chrókjuít'ahará? —ichro ch'án.

³³ Ntá jehe sín kjuátēhe sín ntáchro sín kíxin:

—Jaha Ìnchéni, tjincaonni chrókjuínchek'ikuanni —ichro sín.

³⁴ Ntá ch'ín Jesús mé kuikonóhē ch'án tí jehe sín la kjuínchekuáóxín tja ch'án tí ikon tí sín t'ikonhya. Ntá tuénxín k'uikon sín la chréhe sín tí ch'ín Jesús.

21

K'uixenhen ch'ín Jesús chjasin Jerusalén

(Mr. 11.1-11; Lc. 19.28-40; Jn. 12.12-19)

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfagē itjen chjinaxón tí jna Olivo. Ntá ch'ín Jesús k'uetuenhen ch'án iyó tí sín k'uájiko ch'án ² ntáchro ch'án kíxin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehérá va ntá tsjúkuaná va ntihi. ³ A ntá tí jnkojín nkexro tsjančankíhará nkekuéntē tjasintankehérá va la ntá tsonťáchrórá kíxin “Ìnchéni t'ichjánxínhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xíkaha kónhen kíxin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kíxin:

“Tsjeherá ó kui tí ch'ín Rey kuéntará.

Ihnkehya ch'án la ijnko kolócho ó tjejken ch'án,

mé ijnko kolóchóxjan, xjeen ijnko kolócho támá nkehe.”*

Mé xíkaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uetōan ch'ín Jesús. ⁷ Ntá kjuíkao sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús. ⁸ Ntá itsjé chojni kuakitsje sín ka titsáte sín na kjuentoá sín ka tinkák'ikjínxín sín ka tí ntja ts'atsínkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntja a. ⁹ Ntá iso sín tsítaon ntja la ko í so sín chréhe iton ch'án mé kjuankíxin sín itsje sín kíxin:

—Tjancheheni kjuasáyé tí nkexro k'uaxrjeníxin tí rey David. Jína tí nkexro kjuixín kjuachaxién ihnié Ìnchéni. Tjancheheni kjuasáyé Dios —ichro sín itsje sín.

¹⁰ Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóxakohen sín la itsjé sín kjuanchankí sín kíxin:

—¿Xá nkexro tíhi? —ichro sín.

¹¹ La ntá nchónhya sín kjuátēhe sín ntáchro sín kíxin:

—Tíhi mé tí nkexro Jesús chrónka itén Dios kjuixín ch'án chjasin Nazaret estado Galilea —ichro sín.

Ch'ín Jesús kjuínchetjóá tí nínko

(Mr. 11.15-19; Lc. 19.45-48; Jn. 2.13-22)

¹² A ntá ch'ín Jesús mé k'uixenhen ch'án tí nínko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjínkitóxixín sín chichaon la ko tí silla tjejókjen tí sín nchekji kontóá. ¹³ La ntá ntáchro ch'án kíxin:

—Tí xroon itén Dios tsíkjin sín ósé mé ntáchro kíxin: “Tí ntōna imé it'in nchia tsonixjanaxian sín.” A ntá jahará tí nchia í tsíkjich'énará itjueé xíchee† —mé xíkaha ichro ch'ín Jesús.

¹⁴ Ntaha nkaxenhen nínko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jina. ¹⁵ A ntá tí sín nchat'á tjeoan la ko tí sín maestro tjako tí ley mé k'uikon sín kaín tí kjuaxroan kjuích'e ch'án la ko kuínhin sín kíxin iso chánjan mé itsje sín nkaxenhen nínko ntáchro sín kíxin: “Chjéheni kjuasáyé tí nkexro k'uaxrjeníxin rey David”, ichro sín. Ntá kuínhin tí sín a xíkaha ntá kónínkaon sín ¹⁶ la nixjehe sín tí ch'ín Jesús ntáchro sín kíxin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kíxin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xíkíhi chro: Jaha kjuánjuan kjuachaxin kíxin tí sín chánjan hyé la ko chánjan naxá tjejótakí mé tsotsje sín‡

—mé xíkaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjeníxin ch'án chjasin Jerusalén la sákjuí ch'án chjasin Betania la ntiha k'ók'éhe ch'án tí tie a.

* 21:5 Isaías 62.11; Zacarías 9.9 † 21:13 Isaías 56.7; Jeremías 7.11 ‡ 21:16 Salmo 8.2

Ch'in Jesús kónínkakonhen ch'án ijnko nta t'óna to higo
(Mr. 11.12-14, 20-26)

¹⁸ A ntá tí kóyaon nchítjen ntá kjan sín chjasin Jerusalén ínaá la ikui sín ntíja ntá ch'in Jesús mé ik'uén ch'án kjinta. ¹⁹ Ntá k'uíkon ch'án itjen ijnko nta t'óna to higo chjino ntíja. La ntá sákjuítseje ch'án tí nta, ntá k'uíkon ch'án kixin jehó ka itsa tí nta, naxá k'ónahya to. A ntá jehe ch'án mé nixjehe ch'án tí nta, ntá chro ch'án kixin:

—Í nunca ts'ónahya to ínaá —ichro ch'án.

Ntá tí nta t'óna to higo mé tuénxín xámá. ²⁰ Ntá tí sín k'uájiko ch'in Jesús mé k'uíkon sín kixin xikaha kónhen tí nta, ntá chrakon sín la kjuanchankíhi sín tí ch'in Jesús kixin:

—¿Nkeuènté kixin tí nta t'óna to higo tuénxín xámá? —ichro sín.

²¹ Ntá kjuátéhe ch'in Jesús, ntá chro ch'án kixin:

—Ntá chaxín ntáxrxjan kixin tí tinkachónkirá Dios chaxín la ntá jehya jehó tí nta xikaha kónhen, la kjaxín chrónixjehera tí jna i kixin: “Sátjixian ntihi sátkjijankiá ntayaon”, la mé xikaha tsonhen. ²² Tí tinkachónkirá Dios kaín nkehe tsjancheherá ch'án la ts'ayéherá —ichro ch'in Jesús.

Tí kjuachaxin chóna ch'in Jesús
(Mr. 11.27-33; Lc. 20.1-8)

²³ Ntá kjuixin ntá ch'in Jesús mé k'uíxnen ch'án tí nínko ntiha. Ntá tío tjetjako ch'án ntá kóchjina iso tí sín nchát'a t'etqan la ko tí sín táda judío t'etqan la kjuanchankíhi sín ch'án ntá chro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátéhe ch'in Jesús ntá chro ch'án kixin:

—Ntá kjaxian janhan tsjánchánkíhará ijnko nkehe síná tsjateherá ntá janhan tsotjonkará nkehe tí kjuachaxin chonta tjet'á tí xra i. ²⁵ ¿A ntá nkexro k'uétuénhen ch'in Juan kixin tsikite ch'án chojni? ¿A Dios ní o á chojni ó? —mé kjuanchankí ch'in Jesús.

Ntá jehe sín itjo sín kichó sín kixin:

—A ntá tí tsontáchroni kixin Dios tsík'etuénhen tí ch'in Juan ntá tsjanchankí tí ch'in a kixin nkeuènté kuítekakuénhyani ch'án. ²⁶ A ntá tí tsontáchroni kixin chojni ó tsík'etuénhen ch'án la ntá chrakonhenni tí chojni kixin kaín sín kuítekaon sín kixin ch'in Juan la nixja ch'án itén Dios —ichro sín.

²⁷ A ntá kjuátéhe sín ntáche sín tí ch'in Jesús kixin:

—Náhi, noehyani —ichro sín.

Ntá ntá chro ch'án kixin:

—La ko kjaxin janhan tsóxrjankahya nkexro kjuanjon kjuachaxin kixin tjet'á tí xra —ichro ch'án.

Ch'in Jesús mé kjuíncheyóxin ch'án kixin éxi yaá xjan

²⁸ Ntá ntá chro ch'in Jesús kixin:

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehe ch'án ijnko xjan ntá chro ch'án kixin: “Xjeenni ijie la sátsjia t'akjínjían to uva nontqeni”, ichro ch'án. ²⁹ Ntá kjuátéhe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uixitoxin tí kjuenkayáxin ch'án la sákjuíkjih'e ch'án tí xra a. ³⁰ A ntá tí it'é xjan a mé kjuínixjehe ch'án tí í jnko xjan la jnkokón k'uétuénhen ch'án la kjuátéhe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'in Jesús.

³¹ Ntá kjuanchankí ch'in Jesús kixin:

—¿Nkexéhe tí yaá chánjan kjuínchexiteyá tí nkehe k'uétuénhen it'é? —ichro ch'án.

Ntá kjuátéhe sín kixin:

—Tí xjan saó —ichro sín.

Ntá ntá chro ch'in Jesús kixin:

—Méxra chaxín tjonkará kixin tí sín nchekjènkí la ko tí chojni chjin ch'iyehé nchónhya chojni ntoá la saoxín ts'ixenhen sín tí kjuachaxin t'etqan Dios la ntá jahará la náhi. ³² Kixin ch'in Juan Bautista mé ikui ch'án kjuakohará ch'án nkexri chrók'uejorá la ntá jahará kuítekákuenhyará tí chrónka ch'án. A ntá tí sín nchekjènkí la ko tí chojni chjin ch'iyehé nchónhya chojni ntoá mé kuítekaon sín. A ntá jahará kjónté xikaha k'uíkonrá la kjuítóxiénhyará tí tjenkayáxinrá la ko kuítekákonyará —ichro ch'in Jesús.

Ch'in Jesús kjuíncheyóxin ch'án kixin éxi chojni ch'e xra la jínahya qsén sín
(Mr. 12.1-12; Lc. 20.9-19)

³³ Ntá ch'in Jesús ntá chro ch'án kixin:

—Tsinhínrá ijnko nkehe sintayóaxian. Éxi ijnko ch'in k'uénkaxin ch'án itsjé ntanoa t'óna to uva nontqé ch'án. Ntá kjuich'éna ch'án ijnko corral. La ko ijnko tjo kjuich'éna ch'án

tòye kixin ts'énya sín inté to uva. La ko kjuích'éna ch'án ijnko tjat'ò noi kixin ts'ít'ótjen ch'án tsotsjehe ch'án nkúixín.⁵

⁶ A nta kjuínchekjen ch'án tí nontee ch'án iso tí sín ch'e xrá nta kjuixin nta sákjuí ch'án imá ikjín. ³⁴ A nta tí kjuixraká tí yaon k'óna nkehe nta jehe ch'án mé ichr'án ch'án iso tí chojni ch'ehe ch'án xrá kixin tsjikjanchehe sín tí sín ch'e xrá nontee ch'án kixin tsjanjon sín tí nkehe tsakja ch'án. ³⁵ A nta tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'óyán sín la í so la ixrò k'uíchexín sín. ³⁶ A nta tí inché nonte a xíchr'án ch'án iso chojni ch'ehe ch'án xrá inaá, a nta tí sín ch'e xrá la kjaxin xikahó kjuích'ehe sín tí sín kjuíj.

³⁷ A nta xikaha tsikónhen nta kjuenkayáxin ch'án ichr'án ch'án tí xjeen ch'án, la kjá chróhóntehe sín kjuasáyé tí xjeen ch'án, ichro ch'án. ³⁸ A nta tí k'uíkon tí sín ch'e xrá tí xjeen ch'án la nta jehó sín kjuenkayáxin sín kixin: “Tí ch'ín i mé ts'áyéhe ch'án kaín nkehe. Ts'óyánni ch'án kixin nta tsitgekoni kaín tí nkehe kuènte ch'án”, ichro sín. ³⁹ Nta itsé sín tí xjeen ch'án nta kuakitsjexín sín ch'án tí nonte ntaha nta k'óyán sín ch'án—mé xikaha kjuako ch'ín Jesús.

⁴⁰ Nta kjuanchankíhi ch'ín Jesús tí sín kóchjina, ntáchro ch'án kixin:

—Tió itsi tí inché tí nonte a la, ¿nkehe sich'ehe ch'án tí sín ch'e xrá? —ichro ch'ín Jesús.

⁴¹ Nta kjuátgehe sín kixin:

—Mé tsjiji ch'án la tsikónóehya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

⁴² Nta ntáchro ch'ín Jesús kixin:

—¿Á nunca kjuínchekuáxinhará tí xroon itén Dios tsíkjin sín ósé? Mé ntáchro xíkíhi:

Tí xró náxjrónhya kuítenta tí sín ch'éna tjat'ò,

a nta mé jie k'óna tí xró tjeoan.

Mé xikaha kjuích'e Inchéni Dios,

na nta tíha mé ijnko nkehe kjuachrakon k'uíkonni.*

Mé xikaha ichro itén Dios.

⁴³ Nta ntáchro ch'ín Jesús kixin:

—Tjonkará kixin Dios tsakitsjehará tí kjuachaxin kuènte ch'án la nta sinchek'áyéhe ch'án tí sín ch'e xrá jína. ⁴⁴ A nta jnkójín nkexro tsjísínka chrítaón tí xró i mé tsókuen ch'án la tí ts'ánótjen tí xró tsoxratja ijnko chojni la jehe sín ts'óna inche —mé xikaha ichro ch'ín Jesús.

⁴⁵ Nta tí sín nchát'á tjeoan la ko tí sín fariseo mé kuínhin xikaha kjuíncheyóexin ch'ín Jesús nta kienxín sín kixin kaín tí ntáchro ch'án kjuíncheyóexin ch'án kixin tí jehe sín xikaha tsónhen sín. ⁴⁶ La nta tjinkaon sín chrójkjuínchekjasóte sín ch'án kjánchó chrakónhen sín tí chojni kixin kaín sín ntáchro sín kixin chaxín tí nkehe nixja ch'ín Jesús la kuènte Dios.

22

Ch'ín Jesús kjuíncheyóexin éxí ijnko kia kótehe sín

¹ Nta ch'ín Jesús mé kjuankixin nixja ch'án inaá la kjuíncheyóexin ch'án ntáchro ch'án kixin:

² —Tí kjuachaxin kuènte Dios mé éxí yóhé ijnko ch'ín rey kjuasin ch'án ijnko kia kixin tsótehe xjeen ch'án. ³ K'uétuénhen ch'án tí sín ch'ehe ch'án xrá kixin tsjik'íyehé sín tí sín kjueyá ch'án, kjánchó jehe sín mé tjinkakonhya sín tsóchjina sín. ⁴ A nta k'uétuénhen ch'án inaá í so tí sín ch'ehe ch'án xrá ntáchro ch'án kixin: “Chenka tí sín ó k'uíyahá kixin kaín tí nkehe sineni la ó tjechónhen. Ó kuétóan its'en tí koxinta la ko í so ko tsanķa la kaín nkehe la ó síchónhen. A nta chróxrakoa sín tí sín kia”, mé xikaha k'uétóan ch'án. ⁵ A nta tí sín tsík'íyehé ch'án mé ántosén sín. Ijnko sín la sákjuí nontee la í jnko la sákjuí ch'án í jnko xrá chóna ch'án. ⁶ La í so tí sín a mé tsítsé sín tí sín tsík'etúenhen tí ch'ín rey la k'óka tí sín a hasta ik'uén tí jehe sín. ⁷ Nta tí ch'ín rey mé kónínkaon ch'án nta k'uétuénhen ch'án tí sín soldado kixin its'en tí sín kjuáya la ko tsóche tí chjasén sín. ⁸ Nta nixjehé ch'án tí sín ch'ehe ch'án xrá inaá ntáchro ch'án kixin: “Kaín nkehe la ó síchónhen kixin tí nkexro tsótehe la nta tí sín k'uíyahá kuítekakonhya sín la kjuíhya sín. ⁹ Méxra sátsjirá tí esquina tí ntja jie la t'jyehérá kaín tí sín tsóxetará kixin itsji sín ti kia”, ichro ch'án. ¹⁰ Nta tí sín ch'e xrá mé sákjuí sín la k'uíyehé sín kaín tí sín t'átsínka tí ntja ntíha, mé chojni jína la ko chojni jínahya hasta k'uíxíkaón chojni tí nchia ntíha.

¹¹ Nta tí ch'ín rey mé kuitsjehe kaín tí sín tsík'íyehé ch'án la nta k'uíkon ch'án ijnko ch'ín ntíha chónahya ka jína kuènte tí kia a. ¹² La nta nixjehé ch'án, ntáchro ch'án kixin: “Amigo, ¿nkexrí k'uixénhén kixin tsík'ítsahya kuènte kíe chojni tsótehe?” ichro ch'án. Nta tí ch'ín a kjuátgeheya ch'án ninkehó. ¹³ A nta tí ch'ín rey mé k'uíyehé ch'án tí sín ch'ehe ch'án xrá la ntáchro ch'án kixin: “Sínchenteto tóte la ko itja tí ch'ín a la ite ntója sítié la nta ntíha a mé tsotsjánka ch'án la sinetaón ch'án neno ch'án.”

¹⁴ Ntá ntáchro ch'in Jesús kixin:

—Nchónhya sín k'uíyaha la séhya sín k'uítja —mé xikaha kjuako ch'an Jesús.

Ch'in Jesús ntáchro ch'an kixin ó nchoxon tsjenkehe sín gobierno
(Mr. 12.13-17; Lc. 20.20-26)

¹⁵ Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxín sín tí ch'in Jesús kixin ách'e ichrén jig tsjasin ch'an la ntá tsjanchia sín jig. ¹⁶ Ntá ichr'an sín iso tí sín ch'ehe sín xra la iso tí sín ch'ehe tí ch'in Herodes xra kixin tsjachaxín sín tí ch'in Jesús. Ntá tí sín a nixjehe sín ch'an ntáchro sín kixin:

—Maestro, ó noheni kixin tí nkehe ntáchrua jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kixin á jína sín. ¹⁷ A ntá jaha chrónka nkehe tjenkayáxian. ¿Á jína chrókjuenkeheni tí gobierno romano o náhi? —ichro sín kjuanchankí sín.

¹⁸ Ntá ch'in Jesús kónohe ch'an kixin ntoáhya tjenkayáxin sín ntá ntáchro ch'an kixin:

—Jahará ntoáhya tjenkayáxinrã. ¿Nkeuente chrókjuáchaxínrání? ¹⁹ Tjãkonará tí chichaon tjenkehérã sín méhe —mé xikaha k'uetjoan ch'in Jesús.

Ntá kjuikohe sín ch'an tí chichaon a. ²⁰ Ntá k'uíkon ch'in Jesús ntá kjuanchankí ch'an kixin: —¿Nkexro tí tsík'axrxjén tjenkání tí chichaon méhe la ko nkexro ihnié chóna? —ichro ch'an.

²¹ Ntá kjuátjehe sín kixin:

—Tí ch'in t'etjoan mé tjenkání ch'an —ichro sín.

Ntá ntáchro ch'in Jesús kixin:

—Chróchjehérã tí ch'in gobierno t'etjoan tí nkehe kuente ch'an la kjaxín tí nkehe kuente Dios la chróchjehérã Dios —mé xikaha chro ch'in Jesús.

²² Ntá tí kuínhin sín xikaha la chrakon sín la komá sín ch'an ntá sákjuí sín.

Kjuanchankí sín kixin á tsoxechón chojni
(Mr. 12.18-27; Lc. 20.27-40)

²³ Ntá tí yaon a la iso sín saduceo sákjuítsjehe sín tí ch'in Jesús. A ntá tí sín saduceo mé titekakonhya sín kixin tsoxechón chojni tsík'en la mé xikaha chrókjuáchaxín sín ch'in Jesús. Ntáchro sín kixin:

²⁴ —Maestro, tsintáchro ch'in Moisés kixin tí its'en ijnko chojni la naxã tjen tí ichjién ch'an la tsík'ikonhya sín xjeen sín, ntá tí kichó tí nkexro tsík'en chrókjuakja ch'an tí tjan k'an, a ntá tí xjeen sín mé ts'óna éxi xjeen tí ch'in sao tsík'en. ²⁵ Ntá ntili k'uejío yato sín jnkokoá kichó sín. Ntá tí ch'in sao kótehe ch'an. La ntá ik'uén ch'an. A ntá k'uechóntahya sín xjeen sín la ntá tí ichjién ch'an kótehe tjan tí ch'in tsoyo. ²⁶ A ntá tí ch'in yóxin ik'uén kjaxín la tí ch'in níxin kuákja ch'an tjan la ntá xikaha kónhen inaá. La kayatoé tí sín k'uechóna sín tjan xikaha kónhen sín kaín sín ik'uén sín. ²⁷ A ntá kjuixixín ntá kjaxín tjan ik'uén tjan. ²⁸ Ntá tió tsoxechón kaín sín chojni tsík'en, ¿ntá nkexro ts'óna xii tí jehe tjan kixin kayatoé sín kótehe tjan? —mé xikaha kjuanchankíhi sín tí ch'in Jesús.

²⁹ Ntá ch'in Jesús kjuátjehe ch'an ntáchro ch'an kixin:

—Jahará la ntoáhya tjenkayáxinrã kixin noahyarã nkehe chro xroon itén Dios la ko chonhyará tí kjuachaxín kuente Dios. ³⁰ A ntá tí chojni tsík'en tió tsoxechón la tsotjeehya sín la ko tsotjeehya tí xjeen sín kixin tí sín tsík'en la éxi tí sín ángel kuente Dios ts'ejó sín nkaya nkajní. ³¹ A ntá tí kaín tí sín tsík'en tsoxechón, ¿á kjuínchekuáxinhyará nkehe ntáchro Dios? Jehe ch'an xíkíhi chro ch'an: ³² “Janhan mé tí Dios tinkáchónki ch'in Abraham la ko ch'in Isaac la ko ch'in Jacob.”* Méxra tí Dios i la jehya tinkáchónki tí sín tsík'en. Náhi. Tí Dios i la tinkáchónki tí sín tjejóhón —mé xikaha ichro ch'in Jesús.

³³ Ntá kuínhin sín nkexrí kjuako ch'an ntá chrakon sín.

Ch'in Jesús chrónka tí nkehe imá tjejoan
(Mr. 12.28-34)

³⁴ Ntá tí sín fariseo mé tsikójnksoté sín tió kónohe sín kixin nkehe chro ch'in Jesús la ninkehó kjuátjeehya tí sín saduceo. ³⁵ La ijnko tí sín maestro tjako tí ley mé tjinkaon ch'an chrókjuáchaxín ch'an tí ch'in Jesús. Ntá kjuanchankí ch'an kixin:

³⁶ —Maestro, ¿nkehéhe tí nkehe imá tjejoan kuente tí ley? —ichro ch'an.

³⁷ Ntá ntáchro ch'in Jesús kixin:

—“Chrótjuéhérã Inchéni Dios kaín asánrã la ko kaín kjuaxrexinkaon kuentará.”† ³⁸ Mé tíha mé tí ley imá tjejoan la ko saoxín k'uetjoan Dios tíha. ³⁹ A ntá tí nkehe yóxin la tóyóhe la mé ntáchro xíkíhi: “Chrótjuéhérã kichuárã éxi tjuèxinrã asánrã.”‡ ⁴⁰ Tí iyó nkehe i la mé antsí tjejoan kuente tí ley tsík'etjoan Moisés la ko tí nkehe kjuako tí sín k'uechrónka itén Dios.

* 22:32 Éxodo 3.6 † 22:37 Deuteronomio 6.5 ‡ 22:39 Levítico 19.18

¿Xá nkexro it'é tí Cristo?

(Mr. 12.35-37; Lc. 20.41-44)

⁴¹ A ntá tí sín fariseo la naxa jnkokoá tjejó sín ⁴² la ntá ch'ín Jesús mé kjuanchankí ch'án ntáχρο ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsik'axrjeníxin ch'án? —kjuanchankí ch'án.

Ntá ntáχρο sín kixin:

—Tí Cristo mé tsik'axrjeníxin ch'án ch'ín David —ichro sín.

⁴³ Ntá ntáχρο ch'ín Jesús kixin:

—¿Ntá nkexrí kixin Nchakuen Dios chénkaxin ch'ín David kixin David chróntáχρο ch'án kixin Inché ch'án tí Cristo? Ntáχρο ch'ín David xikihi:

⁴⁴ Inchéni Dios ntáche tí Inchéni kixin:

“Tjak'e tjaná chjina ntihó tsétoan,

tsjinxjian kaín xín tí sín nínkakonhan la tsjachahya sín ts'etóan sín kixin jahvá mé tsétoan.”⁵ Mé xikaha chro itén Dios. ⁴⁵ A ntá xá nkexrí kixin Cristo chrók'óna xjeen David a ntá jehe ch'ín David kuikítexin ch'án Inché ch'án tí Cristo? —ichro ch'ín Jesús.

⁴⁶ A ntá ninkexró xitjahya kjuátehe sín ninkehó la desde tí yaon a chrakon sín la í nínkehó kjuanchankíehya sín ch'án.

23

Ch'ín Jesús tjanchia jje tí sín fariseo la ko tí sín maestro tjako tí ley

(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'ín Jesús mé nixjehe ch'án tí chojni la ko tí sín k'uájiko ch'án, ntáχρο ch'án kixin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxin sín tí ley kjuako ch'ín Moisés. ³ Méxra chrókuin chexiteyéherá kaín tí nkehe t'etóan sín la ko chrókuich'erá kaín nkehe ntáχρο sín kjánchó chrókuankíehyará tí jehe sín kixin jehe sín la ijnko nkehe ntáχρο sín la ókjé nkehe ch'e sín. ⁴ T'etuenhen sín chojni tsamá ijnko nkehe imá ye, mé ijnko nkehe chrókuachahya chrókuamá chojni. A ntá jehe sín na nijnko dedo tja sín chrókuinkítsa sín tí nkehe imá ye yamá chojni. ⁵ Ich'e sín kaín xín nkehe kixin tsotsjehe chojni. Tóxrjnhin sín tsjak'enkáni totjen sín la ko itja sín ijnko xroon kjínjin iton ts'ínixín itén Dios la tjinkaon sín iké sín sixinkáni nkehe tjákiní. ⁶ Tjinkaon sín tsochóna sín silla jina ts'ejóksen sín sine sín tió sátsji sín tí síin kia la ko xritjeyá sín tí silla antsí náxrjón chrók'uejóya sín nkaxenhen njnko. ⁷ La ko tjinkaon sín kixin chojni chrókuikosáyehe sín tsoxeta sín tí ntja la ko tjinkaon sín kixin tsontáχρο chojni kixin maestro tí jehe sín.

⁸ A ntá jahará la tjeóehyará kixin tsontáχρο sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha. ⁹ La ntá chróntáχροhyará kixin ninkexró mé it'ará ntíhi chjasintajni kixin jahará la chontará jnkokoá It'ará mé itjen nkaya nkajni. ¹⁰ La ko jehe sín chróntáχροhya sín kixin jefe tí jahará kixin jehó Cristo mé jefe. ¹¹ Tí nkexro antsí tsjinkítsa iso chojni la jehe ch'án mé antsí t'etóan ch'án. ¹² Kixin tí nkexro ntáχρο kixin imá ijié la mé imá tsontsí. A ntá tí nkexro nchehnkehya la antsí tsojje.

¹³ Nòará tí jahará maestro tjákorá tí ley la ko tí jahará chojni fariseo. Jahará la jnkójínxónhya tjenkayáxinrá. Jahará la t'ikjéherá tí puerta ts'ixenxín chojni tí kjuachaxin kuènte Dios kixin tjeóehyará ts'ixenhen ókjé chojni. A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

¹⁴ Nòará tí jahará maestro tjákorá tí ley la ko chojni fariseo. Jnkójínxónhya tjenkayáxinrá. Jahará taktisjeherá ntepe tí chojni tsikók'án la ntá isé nixjeherá Dios kixin ch'iyexínrá chojni kixin jina tí jahará. A ntá xikaha kjuich'erá jahará la antsí tsjasótiará.

¹⁵ Nòará tí jahará maestro tjákorá tí ley la ko chojni fariseo. Jahará la jnkójínxónhya tjenkayáxinrá. Jahará sátiá nonte la chrítaón ntayaon kixin tsjákohérá ijnko chojni tsínkáchónki xikaha tí tñnkachónkirá la ntá tió kjuachar kjuachroerá sín la ntá jehe sín antsí má tsjasótexín sín tí xrohi la kánhyó jahará.

¹⁶ Nòará tí jahará kixin tétóanrá kjánchó ntakótánrá. Ntáchrórá kixin tí jnkójín chojni tsontáχρο kixin sinchexiteyá sín nkehe la t'ákjenxín sín tí njnko la ntá t'ichjánxínhya sinchexiteyá sín. A ntá tí tsontáχρο sín kixin sinchexiteyá sín nkehe la t'ákjenxín sín tí chica oro síin nkaxenhen njnko la ntá t'ichjánxín sinchexiteyá sín. ¹⁷ Imá lontjirá la ko ntakótánrá. ¿Á imá tjetóan tí chica oro o á imá tjetóan tí njnko kixin tí njnko mé kótuáxin tí chica oro? ¹⁸ Kjaxin ntáchrórá kixin: “Tí jnkójín chojni tsontáχρο sín kixin sinchexiteyá sín nkehe la t'ákjenxín sín tí altar la ntá t'ichjánxínhya sinchexiteyá sín. A ntá tí tsontáχρο

sín kixin sinchexiteyá sín nkehe la t'ákjenxin sín tí nkehe tjokehé sín Dios chrítaón tí altar la ntá t'ichjánxin sinchexiteyá sín tí nkehe tsintácho sín.”¹⁹ Imá lontjírä la ko ntakótánrä. ¿Á imá tjeotan tí nkehe tsochjehérä Dios o á imá tjeotan tí altar kixin tí altar mé tótjuáxin tí nkehe tsjánjonrá? ²⁰ Kixin tí nkexro tsontácho kixin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhi. Kjaxin t'ákjenxin ch'án kaín tí nkehe siin chrítaón ntíha. ²¹ A ntá tí nkexro tsontácho kixin sinchexiteyá ch'án nkehe la t'ákjenxin tí nínko la jehya t'ákjenxin ch'án nínko ó. Náhi. Kjaxin t'ákjenxin ch'án tí Dios itjen ntíha. ²² A ntá tí nkexro t'ákjenxin nkaya nkajní la ntá kjaxin t'ákjenxin sín tí trono kuente Dios la ko tí nkexro tjet'etjoan ntíha.

²³ Nòará jahará maestro tjàkorä ley la ko jahará chojni fariseo. Jahará jnkojínxónhya tjenkayáxinrä. Jahará la chjehérä Dios ijnko ite parte kaín tí kaxroan tsjiko tí nkehe ineni, mé tí menta la ko anís la ko comino. Kjánchó tahyarä kuentä tí nkehe imá tjeotan kuente tí ley. Mé ntoá chrókjuenkayáxinrä la ko chrókuikonóehérä kichuárä lo ko chrókuinkachónkirä Dios. Tíhi la antsí tjeotan chrókjuinchesiteyará la kjaxin chrókuítóehyarä chrókjuich'erä tí í so nkéhe. ²⁴ Jahará la tétjoanrä kjánchó ntakótánrä. Jahará la nchek'ankihirá kjónté ijnko kochjisen intsi chóna tí nkehe its'írä, a ntá ijnko kocamello kjónté ijie vá la t'ínkarä.

²⁵ Nòará tí jahará maestro tjàkorä ley la ko jahará fariseorä. Jahará la jnkojínxónhya tjenkayáxinrä. Jahará la imá nchetjóará chrítaón tí vaso la ko tí plato, a ntá tí nkaxenhen tsikaón kjuachee la ko jahórá tjínkáonrä chróchontará itsjé nkehe. ²⁶ Jahará chojni fariseorä imá ntakótán jahará. Saóxín chrókjuinchesiteyará tí nkehe nkaxenhen tí vaso la ko tí plato la ntá ó chrókótjóä tí chrítaón kjaxin.

²⁷ Nòará jahará maestro tjàkorä tí ley la ko chojni fariseorä. Jnkojínxónhya tjenkayáxinrä. Jahará la éxi yöhe ijnko tóye tsixravä chojni, imá náxrjón tsjehe ntója, a ntá nkaxenhen mé tsikaón huéseó chojni tsik'en la ko kaín nkehe tjuáhya. ²⁸ Mé xikaha tí jahará la tsjehe éxi chojni jina xikaha, a ntá jnkojínxónhya tjenkayáxinrä la ko jínahyarä.

²⁹ Nòará tí jahará maestro tjàkorä ley la ko chojni fariseorä. Jahará la jnkojínxónhya tjenkayáxinrä. Jahará la kjuich'énarä tjet'ó náxrjón chrítaón tí tóye tsixravä tí sín k'uékjako itén Dios ósé la ko nchek'itsarä tjet'ó chrítaón tóye kuente tí sín jina asén. ³⁰ La ntá ntáchrórä kixin tí chrók'uejorä tí k'uejó tí sín tsik'axrjenixínrä la ntá chrókjuinkitsahyarä chrók'uen tí sín kjuako itén Dios. ³¹ Méxra xikaha jahórá ntáchrórä kixin chaxín tsik'axrjenixínrä tí sín k'óyán tí sín k'uékjako itén Dios. ³² Méxra ijie la tjínkáonrä tsjixinhanrä tí xra kjuich'e tí sín tsik'axrjenixínrä.

³³ Jahará la tsik'axrjenixínrä konche. ¿Ntá nkexrí chrókuaará kixin itsi tí tsjasótíarä? ³⁴ Méxra janhan mé tsétuñhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrä sín ts'ejoyánirä sín ntacruz la í so sín la tsjatexínrä sín nkaxenhen nínko la ko tsochonkíhirä sín chjasin la chjasin. ³⁵ Méxra jahará la yamará tí jie kixin tí sín jina k'uitjixin ijné senó. Méxra tsamará tí jie kixin ik'uen ch'in Abel, tí nkexro jina, la ko kaín tí í so sín hasta ik'uen ch'in Zacarías, xjeen Berequías, tí nkexro k'oyáxinrä chjino tí altar. ³⁶ Chaxín tjonkarä kixin kaín tí jie a mé yámä tí chojni siin ijie.

*Tsjánka ch'in Jesús
(Lc. 13.34-35)*

³⁷ Ntá ntácho ch'in Jesús kixin:

—Jerusalén, Jerusalén, jahará t'oyánrä tí sín tjako itén Dios la chjehérä xro tí sín ichr'án ch'án ikui chrókjuinkitsarä. Nchónhya veces tjínkavan chrókójnksotserä la chrók'uáyakonhánrä éxi ijnko cochiká mé t'ayakonhen xjeen va chrínki kanenge va mé xikaha tjínkavan chrók'uáyakonhánrä tí jahará. Kjánchó jahará la tjínkákonhyará xikaha. ³⁸ Ntá jie la Dios la tsítóhe tí jahará. ³⁹ Ntáxrjan kixin í ts'ikonhyará tí janhan inaá tsjixrakája tí yáon tsontáchrórä kixin: “Imá jina tí nkexro kujxin kjuachaxieni ihnié Inchéni” —mé xikaha ichro ch'in Jesús.

24

*Chrónka ch'in Jesús kixin ts'itjayan tí nínko
(Mr. 13.1-2; Lc. 21.5-6)*

¹ Ntá ch'in Jesús k'uaxrjexin ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxin ch'án chrótsjehe ch'án kixin náxrjón tsik'óna tí nínko a. ² A ntá ch'in Jesús mé kjuátehe ch'án kixin:

—Jahará ¿á tjeotsjehérä kaín tíha? Chaxín tjonkarä kixin tsjixraká tí yáon ts'oya kuenté nínko. Nijnko xro ts'ejókenhya kichó kixin kaín tíha la tsóxika —ichro ch'án.

*Tí nkehe tsónhen tió tsjixixín
(Mr. 13.3-23; Lc. 21.7-24; 17.22-24)*

³ Ntá sákjui sín chrítaón tí jnā Olivo la ch'ín Jesús kjuak'etjaxin ch'án la ntá tí sín k'uúajiko ch'án mé kjuanchankíhi sín ch'án kixin:

—Tjinkaonni tsochroñka nkesá tsonhen tíha. ¿Nkexrí tsonoexinni tió ts'inka tí jaha la ko nkexrí tsonoexinni tí itsi tí tsjixixín chjasintajni? —ichro sín.

⁴ Kjuatēhe ch'ín Jesús kixin:

—Tóxakonhanrá tjtōéhýará kixin ninkexró chrókjuít'áyahará. ⁵ Nchónhya chojni itsi sich'yíaxín njina tsontáchro kixin: “Janhan mé tí Cristo” tsixro sín, la sich'yíehe sín nchónhya chojni. ⁶ A ntá tíó tsinhínrá tsontáchro chojni kixin ó síin kjuanínkaon la ko ts'ixín kjuachrakon kixin tsjanjonko kichó sín la kjónté xíkaha tsonhen la chrakonhyará. Ó jehí tsonhen tíha tí naxá ts'itjáyanyha chjasintajni. ⁷ Ijnko nacióñ tsjanjonko í jnko nacióñ la tsjanjonxin sín tí xra ts'etoan sín. La ko itsjé chjasin na tsokjinta la ko tsoníhi chojni la ko ntíhi la ntaha tsinkí nonte. ⁸ Kaín tíha la ntá tsoxrankíxixón tí kjuatjoté tsonhen chojni.

⁹ A ntá tsotsérá chojni la tsjikaánrá sín tí tjejó tí síxreé kixin sinchekjasotíará sín la ntá ts'óyánrá sín. La ko kaín xín chojni síin chjasintajni tsonínkaonhanrá sín kixin tinkachónkirá tí janhan. ¹⁰ Ntá tí yaon a la itsjé sín la tsítóhe sín tsinkáchónkiha sín tí janhan la ko tsonínkakonhen sín kichó sín la ko sinchekji kichó sín. ¹¹ Ntá itsi nchónhya chojni ntoáhya tsjako la ntá sich'yíehe sín nchónhya chojni. ¹² La ts'ixín nchónhya jte jínahya la ntá ts'ixín itsjé chojni tsojtuehya sín kichó sín. ¹³ A ntá tí nkexro naxá tjejótinkáchónki tí janhan hasta tí tsjixixín la mé tsaá. ¹⁴ La ko tí itán jína chrónka nkexrí tjen tí kjuachaxin kuente Dios la t'ichjánxin tsinhin sín kuente chjasintajni, la tió tsjixín tsinhin sín kuente chjasintajni la ntá ó ts'itjáyanyha chjasintajni.

¹⁵ Ch'ín Daniel k'uéchrónka itén Dios mé tsíkjin ch'án kixin tsjixraká íjnko yaon tsjak'e íjnko nkehe jínahya nkaxenhen njnko tjóá.* Ntá jahará ts'ikonrá tíha. A ntá tí nkexro nchekuáxin mé tsienxín nkehe tíha. ¹⁶ Ntá kaín tí sín tjejó estado Judea tsochriin sín jnā sátsji sín. ¹⁷ A ntá tí sín tjejó chrítaón nchia ntóé sín la í xitjahya tsakitsje sín ninkehó. ¹⁸ Ntá tí tjejóche sín xra nontēe sín la kjá í tsokjanhya sín tsjikakja sín iké sín. ¹⁹ Ntá nóa tí chojni chjín tjejóyá sín la ko nóa tí sín nchekakí xjan tí yaon a. ²⁰ Chrókjuanchehérá Dios kixin tí tsonhen tíha la chrókójehya nchakuen kin la ko chrókójehya tí yaon t'ok'éhe chojni. ²¹ Kixin tíha mé íjnko kjuachrakon imá ijíe la desde tí xrankíxixín chjasintajni la nunca xíkahya kónhen. ²² Ntá tí chrók'uetōanyha Dios kixin tjoka ts'atsínka tíha ntá chrókuaáhya ninkexró. Ntá ts'etoan ch'án kixin tjoka ts'atsínka tí kjuachrakon jíe kixin jehé ch'án mé imá tjehe ch'án tí sín tsíkjejá ch'án.

²³ Ntá tí tsontáchro chojni kixin: “Tsjehe ntíhi itjen Cristo”, o “Tsjehe ntíha itjen ch'án”, la ntá chrókúitekákueñhará sín. ²⁴ Kixin ntá itsi iso sín tsontáchro sín kixin Cristo tí jehé sín la ko kjaxín itsi í so sín ntoáhya tsjako la ko tsjasin sín kjuaxroan jíe kixin tjinkaon sín chrókjuich'yíehe sín chojni kjónté tí sín tsíkjejá Dios. ²⁵ Ó xrxánka senó nkehe tsonhen kixin tsonohará. ²⁶ Méxra tí chróntáchro sín kixin: “Tsjeherá tí nteje ntíha tjen ch'án”, la ntá tsjhyará nó ntíha. O tí chróntáchro sín kixin: “Tsjeherá ntíhi tí cuarto mé tjen ch'án”, la chrókúitekákonhyará. ²⁷ Méxra éxí tsjonkíxín la t'íkon chojni t'inkaséyanxín tí tjtítoxin yaon hasta tsjiatóxin yaon mé xíkaha ts'íkon chojni tió itsi tí Xjeen Dios K'óna Chojni. ²⁸ Mé éxí yóhe tí tjen íjnko cuerpo tsík'en la ntíha tsojnkotsé tí kontexjuen.

Tsojkan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

²⁹ A ntá séhyó tí tsjixixín tí kjuachrakon jíe la ntá tí yaon la tsotie a ntá tí nitjó la í ts'inkaséyanxínnya. La ko tí konotsé la tsoxènjinxín nkajni la kjaxín kaín nkehe síin nkaya nkajni la tsínki. ³⁰ La ntá ts'íkon chojni kixin nkajni tsixín tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'íkon sín kixin itsi tí Xjeen Dios K'óna Chojni, mé chríkjan tjuj mé tsjak'enkakjan ch'án tsíkajo tí kjuachaxin jíe. ³¹ Ntá tsochr'án Dios tí sín ángel kixin ts'ánoa sín tí trompeta itsen kixin tsochjina kaín tí nkexro kjuejá Dios tsjixín kanóé lado chjasintajni.

³² Chrók'uitjará nkexrí sjntayóaxian kuente íjnko nta to higo. Éxí yóhe tió chóna ntahnté la ko ts'ixín kayoa la nta tsoñoaxínrá kixin í séhya tsojkan ichrin. ³³ Mé xíkaha tí ts'íkonrá ts'atsínka kaín tíha la ntá xíkaha tsoñoaxínrá kixin í séhya itsi Ínchéni. ³⁴ Ntá tjonkará chaxín kixin kaín tíha senó tsonhen tí naxá ts'enhyha tí chojni síin jie. ³⁵ A ntá tí nkajni la ko tí chjasintajni mé ts'itjáyanyha. A ntá tí nkehe ntáxrxjan la nunca ts'itjáyanyha tsoxiteyá tíha.

³⁶ A ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajni noehya sín la ko ni tí Xjeen Dios noehya. Ó jehó tí It'é mé nohe.

³⁷ Éxí yóhe tí nkehe kónhen tí yaon k'uékjak'e ch'ín Noé mé xíkaha tsonhen tí tsojkan tí Xjeen Dios K'óna Chojni. ³⁸ Tí naxá titjéhyha sín ntá la kaín chojni la jína k'uéjó sín la kjóne

* 24:15 Daniel 9:27

sín la ko ik'uí sín la ko sítótehe sín kjuixrakája tí yaon k'uixenhen ch'ín Noé ntabárcō.† 39 A ntá jehe sín mé kienxínha sín hasta kuijia tí k'uániá chrin ntá ikui ntá la k'uátjoá kaín sín. Mé xikaha tsonhen tió itsi tí Xjeen Dios K'óna Chojni. 40 A ntá yaá chojni ntoa tjejóch'e sín xra nonte la ntá ijnko la sátsji la í jnko la tsítóhe. 41 La ko yaá chojni chjin mé tjejó'to sín la ijnko la sátsji la í jnko la tsítóhe.

42 'Chrók'uejotsjehérá kixin noahyará nkehora la ko nkesá ts'inka janhan. 43 Chrókónohará tíhi: tí chrókónohe ijnko inché nchia nkehora tie chrókjui ijnko nkexro tseé la ntá chrókjuak'echónhen tí inché tí nchia ntá xitjahya ts'ixenhen tí nkexro tjinkaon chrókueé. 44 Méxra jahará la jína chrók'uejorá kixin tí Xjeen Dios K'óna Chojni me titàya itsi.

Tí nkexro jina ch'e xra la tí nkexro ch'ehya xra jina
(Lc. 12.41-48)

45 'Tí nkexro chaxín ch'e xra jína la ko imá nohe la ntá tí lámoe ch'án ts'etuñhen kixin ts'ayakonhen ch'án tí sín siín ntōe ch'án la ko tsjanjon ch'án nkehe sine sín chjntji tí hora a. 46 Náxrijón tjen tí nkexro ch'e xra tió itsi tí lamo la ts'ikon kixin xikaha tjenchexiteyá ch'án tí xra k'uítuñhen ch'án. 47 Chaxín tí lamo la tsjanjon ch'án kaín tí xra chóna ch'án ts'etōan tí ch'ín a. 48 A ntá ijnko chojni ch'ehya xra jína la ntá tsjenkayáxin ch'án kixin kjá tjokahya tsokjan tí lámoe ch'án 49 la ntá tsjanáxin ch'án tsjanjonko ch'án tí í so sín ch'e xra la ko tsjanáxin sineko ch'án la ko its'ikāo ch'án kaín tí sín sítókoan. 50 Ntá xrínahya tsokjan tí lamo ijnko yaon la ko ijnko hora noehya tí nkexro ch'e xra. 51 La ntá jehe ch'án la sinchekjasóte tí ch'ín kuítóhehe xra kjuínchexiteyáha la ts'etōan ch'án kixin tsjasóte tí ch'ín a éxi tí sín jnkojínxónha tjenkayáxin. Ntá ntiha la tsotsánka ch'án la ko sinetaón neno ch'án.

25

Ch'ín Jesús kjuíncheyóexin ch'án kixin ite sín tjarisoá

1 Ntácho ch'ín Jesús kixin:

—Tí kjuachaxin kuénte Dios mé éxi yóhe ite sín tjarisoá sátsji tí tsotehe chojni chuénko linterna tjá aceite la sákjuichónhen sín tí ch'ín tsikótehe. 2 In'ó sín la tsikóyaxienha sín la in'ó sín ó tsikóyaxínhin sín. 3 Tí sín tsikóyaxienha na kjaxin la tsikjijiko sín linterna kjánchó tsikjijikohya sín aceite tsikja inaá. 4 A ntá tí sín tsikóyaxínhin la sátsikjiko sín xro tjá aceite la ko tí linterna kuénte sín. 5 A ntá tí ch'ín tsikótehe la tjokahya kui ch'án la ntá jehe sín mé tsíkíhi sín kotáchrín la tsik'ejóua sín kaín sín. 6 A ntá kuichjina k'áxrórtjen la kuínhin sín t'èya ijnko chojni kixin: “Ó kui tí ch'ín tsikótehe na t'axrjerá ntója tsoxetará ch'án”, ichro ch'án. 7 A ntá kaín tí sín tjarisoá la k'uàya sín la kjuasiyóxin sín tí linterna kuénte sín. 8 A ntá tí in'ó sín tsikóyaxienha la nixjehe sín tí sín in'ó tsikóyaxínhin ntácho sín kixin: “Chjehéni intsi aceite kuéntará kixin ó k'uànkā aceite tjá linternéni”, ichro sín. 9 A ntá tí sín tsikóyaxínhin mé ntácho sín kixin: “Náhi, tí aceite tí xikaha tsjanjonni intsi jahará la antsi jeheni la tsjachahya. Íchá jína sátsjik'énará tí sítōxin ntiha”, ichro sín. 10 Ntá tí in'ó tí sín kóyaxienha mé sákjuik'ena sín aceite la ntá ó kui tí ch'ín tsikótehe. Tí in'ó sín tjejóchónhen mé sákjuiko sín ch'án tí kia tsikótehe sín la ntá ó tuénxin k'uíkjéhe tí puerta. 11 Ntá chr'éxin ikui tí in'ó sín tjarisoá tsikóyaxienha la t'ínka sín puerta ntácho sín kixin: “Ó kuini takitjehé nchia.” 12 A nta jehe ch'an kjuátehe ch'án ntácho ch'án kixin: “Chaxín tí jahará la ní chonhyará”, ichro ch'án.

13 Ntá ntácho ch'ín Jesús inaá kixin:

—Méxra xikaha tí jahará chrók'uejotsjehérá kixin noahyará nkeyaon la nkehora itsi tí Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuénte chichaon

14 Ntá ntácho ch'ín Jesús kixin:

—Tí kjuachaxin kuénte Dios la yóhe ijnko chojni tjinkaon sáchrókjui ch'án í jnko nación la ntá k'uúyehé ch'án tí sín ch'ehe ch'án xra la ntá chjéhe ch'án sín tí chichaon a kixin ts'ayakonhen sín.

15 'Jnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'án nkexro tí tsjacha sich'e jnkojnko xra. Ntá jehe ch'án tió kjuixin kjuanjon ch'án la ntá sakjuí ch'án ikjín. 16 Ntá tí nkexro k'uáyéhe in'ó mil chichaon la kjuich'eko ch'án xra tí chichaon kuákja ch'án la kjuacha ch'án í jnko in'ó mil. 17 Kjaxin tí nkexro k'uáyéhe iyó mil chichaon mé xikjacha ch'án í jnko iyó mil. 18 A ntá tí nkexro k'uáyéhe ijnko mil chichaon mé sákjuí ch'án la kjuich'ena ch'án ijnko tōye kjuavá ch'án tí chichaon kuénte lámoe ch'án.

19 A ntá nchónha nánó k'uátsínka la ntá ikjan tí lámoe sín kixin ntá tsjentoáko sín ch'án cuenta. 20 Saóxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil

la ntáchro ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'án. ²¹ Ntá tí lamo mé ntáchro kixin: “Nchoxon tí xikaha. Jaha la ijnko chojni jína ch'e xra. La ó kjuínchexiteyá jína. Kjónté jehya xra jíé la kjuínchexiteyá jína la ntá tsotjaha ijnko xra antsí jíé la tjak'e tsochéheni.” ²² Ntá chr'éxin ikui tí nkexro k'uáyéhe iyó mil la ntáchro ch'án kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án. ²³ La ntá tí lamo ntáchro kixin: “Nchoxon jaha mé ijnko nkexro jína ch'e xra la ó kjuínchexiteyá. Kjónté jehya xra jíé la kjuínchexiteyá jína la ntá tsotjaha í jnko xra antsí jíé. Tjak'e tsochéheni”, ichro ch'án. ²⁴ A ntá ikui tí ch'in k'uáyéhe ijnko mil la ntáchro ch'án kixin: “Ó nóna kixin ijnko chojni imá jiehe tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya. ²⁵ Méxra chrakonni la sákjuikjak'emáni tí chichaon chrinki nche. Tákjá chíchakoan tjinhin”, ichro ch'án. ²⁶ A ntá kjuátehe tí lamo kixin: “Jaha ijnko chojni jínahya la ko séhe. Jaha la ó noha kixin chrótjja tí nonte k'uénkahya la chrókuákjáa tí nkehe k'uénkahya. ²⁷ A ntá tí chichaon chróchr'an banco. Ntiha chrókjuich'exin xra ntá tí ikjan janhan ntá chrók'uayáha antsí itsjé chichaon chrókjuacha kichó chica”, ichro tí lamo. ²⁸ A ntá nixjehé ch'án tí í so sín tjejó la ntáchro ch'án kixin: “Takítsjehérá tí mil chóna ch'án la chjehérá tí nkexro chóna tí ite mil chichaon ²⁹ kixin tí nkexro kjónté itsjé chóna la mé ts'áyéhe antsí la ntá tí nkexro chónahya la kjónté tí intsí chóna la ts'axrjehé. ³⁰ A ntá tí nkexro ch'ehya xra la tséuénhén sátsji ch'án tí sítíe ntója la ntá ntiha la tsotsjánka ch'án la ko sinetón ch'án neno ch'án.”

Tsitoxén ijíe chojni chjasintajni

³¹ A ntá tí tsi tí Xjeen Dios K'óna Chojni la tsikao ch'án kjuachaxién jíé éxí ijnko Réy la ko tsikao ch'án kaín xin tí sín ángel ntá ntaha tsjak'etjajin ch'án tí trono ts'etoxanxin tí kjuachaxién jíé. ³² Ntiha kaín xin tí chojni tsíkjin nkuixin nación tsochjina tí tjeen ch'án la jehe ch'án tsakitsjekjan ch'án ijnko la í jnko. Éxí ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí koténtso la ókjé ts'ixin. ³³ Méxra ts'etoxan ch'án kixin tí kolélo la ts'ixin nó tja ch'án chjina, a ntá tí koténtso la nó tí tja ch'án kjon. ³⁴ Ntá tí Rey tsonixjehé tí sín tjejó tja ch'án chjina tsontácho kixin: “Xrákirá jahará tí tjeen kjuachaxin kuénte T'aná kixin T'aná ó kjuíncheyaonrá ch'án. Tí naxa kjuich'énahya Dios chjasintajni la xráxin kjuenkayáxin ch'án xikaha tsonhen. ³⁵ Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'ua, la k'uájia éxí ijnko chojni kjuixin ikjin la jahará kjuánjonrá nketí k'ok'ána. ³⁶ La ko k'uéchontahya kaná la jahará kjuánjonrá ika k'uútsa, la ko kónina la jahará kjuasántsjeherá tí janhan, la kjuak'échjina la ntá jahará kjuasántsjeherá tí janhan.” ³⁷ A ntá tí sín jína la tsjanchankí sín kixin: “Ínchéni, ¿nkesá k'uúkonni kixin ik'uén kjinta ntá kjuanjoni nkehe kjónte? ¿La nkesá k'uúkonni kixin ik'uén ntá la kjuanjoni nkehe ik'ua? ³⁸ ¿La ko nkesá k'uúkonni kixin ikjin kjuixian ntá kjuanjoni nketí k'ok'ána? ¿La ko nkesá k'uúkonni kixin chontahya iká la kjuanjoni ika k'uútsa? ³⁹ ¿La nkesá k'uúkonni kixin kóniha o kjuak'échjina la ntá kjuúintsjeheni tí jaha?” mé xikaha tsjanchankíhí sín ch'án. ⁴⁰ A ntá tí Rey tsontácho kixin: “Tió kjuúinktsará ijnko kichó ní kjónté ijnko chojni nóe la mé yóhe kixin tí janhan chrókjuúinktsará.”

⁴¹ A ntá tí Rey t'etoxan mé tsonixjehé tí sín tjejó nó tja ch'án kjon tsontácho kixin: “Sátjirá jahará kixin jahará tsjasótíará. Sátjirá tsjasótíará tí tjeen tí xrohi ts'ankahya. Mé tí xrohi tjechónhen kixin tsoche tí ch'in Tsochren la ko kaín tí sín ángel kuénte ch'án. ⁴² Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'ua. ⁴³ K'uájia éxí ijnko nkexro kjuixin kjin la jahará kjuánjonhyará nketí k'ok'ána la ko k'uéchontahya kaná la jahará kjuánjonhyará ka chrók'uútsa la ko k'uénina la kjuak'échjina la jahará kjuasántsjehyará tí janhan.” ⁴⁴ Ntá tí jehe sín la tsjanchankí sín kixin: “Ínchéni, ¿nkesá k'uúkonni kixin ik'uén kjinta la ik'uén ntá la ko kjuixian kjin la ko chontahya iká la ko níha la ko kjuak'échjina? ¿Mé nkesá k'uúkonni xikaha la ntá kjuúinktsahyani tí jaha?” tsixro sín. ⁴⁵ La ntá tí Rey tsjatehe ch'án tsontácho ch'án kixin: “Tí xikaha kaín tíha kjuúinktsahyará ijnko chojni imá nóe la éxí xikaha kjuúinktsahyará tí janhan.” ⁴⁶ A ntá tí sín jínahya xikaha kjuich'e la mé sátsjixin sín ntihi tsjasóte sín jnkochrixin. A ntá tí sín jína la sátsji sín ts'áyéhe sín kjuachón jnkochrixin —mé xikaha chrónka ch'in Jesús.

26

Tí sín nínkakonhen ch'in Jesús tjenkayáxin sín kixin nkexrí ts'óyán sín ch'án
(Mr. 14.1-2; Lc. 22.1-2; Jn. 11.45-53)

¹ Ntá kjuixin chrónka ch'in Jesús kaín tíha, ntá nixjehé ch'án tí sín k'uájiko ch'án, ntáchro ch'án kixin:

²—Jahará ó nohará kixín t'itjáyan iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etqoan ntá tsjak'enkani sín ch'án ijnko ntacruz —ichro ch'ín Jesús.

³Ntá tí sín nchát'á t'etqoan la ko tí sín maestro tjako tí ley la ko tí sín táda kuente tí sín judío mé kójnkotsé sín tí ntqsin kuente tí nchia kjuák'e ch'ín Caifás tí ch'ín nchát'á t'etqoan. ⁴Ntaha tjejáyáxin sín kixín nkexrí tsotsé sín ch'ín Jesús la ts'oyón sín ch'án. ⁵A ntá ntáchro sín kixín: —Tí síin kia la chrótséhyani ch'án kixín imá tsónínkaon tí chojni —ichro sín.

Ijnko tjan kjuíkqo aceite xraxé kuíkqite tjan ikja ch'ín Jesús
(Mr. 14.3-9; Jn. 12.1-8)

⁶Ch'ín Jesús tjen chjasin Betania ntqe ch'ín Simón tí ch'ín k'uéchénta chinlepra. ⁷Ntá xrínghya kóchjina ijnko tjan kjuíkqo tjan ijnko xro tsík'óna xro mármol mé kuíkaón aceite xraxé náxrxón la imá tjeje k'uíte. A ntá tí tjene ch'ín Jesús ntá tí tjan a mé kuíkqite aceite ikja ch'án. ⁸A ntá tí sín k'uájiko ch'ín Jesús mé k'uíkon sín xíkaha ntá kónínkaon sín la ntáchro sín kixín:

—¿Nkekuénté kóxénhen tí xroqan a? ⁹Íchá jína chrókóxixín itsje chichaon tí xroqan ntá tí chichaon a chrókjuinkítsa tí sín nóe a —ichro sín.

¹⁰Ntá kuínhin ch'ín Jesús tí nkehe tjo sín, ntá ntáchro ch'án kixín:

—¿Nkekuénté t'antaxínhínrá tí tjan i? Ó nchoxon ijnko nkehe jína kjuích'e tjan. ¹¹Tí sín nóe la ó xráxin ts'ejókoar sín, a ntá janhan la jnkochrixínhya ts'ejóni. ¹²Tí nkehe kjuích'e tjan mé kjuíncheka tjan aceite xraxé tí cuerpo kuéntana la mé xíkaha kjuákoxin tjan kixín xíkaha tsoxravána. ¹³Ntá chaxín tjonkará kixín kuénté chjasintajni tí tsjako sín tí tán jína tsaáxin sín ntá tsochrónka sín kixín xíkaha kjuích'e tjan ntá tsoxraxinkakonxin sín kixín nkehe tí kjuích'e tjan —ichro ch'ín Jesús.

Ch'ín Judas kjuínchekji tí ch'ín Jesús
(Mr. 14.10-11; Lc. 22.3-6)

¹⁴A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehé ch'án tí sín nchát'á t'etqoan ¹⁵la ntáchro ch'án kixín:

—¿Nkejain tsochjinará tsoxrjanka nketí tjan tí ch'ín Jesús? —mé xíkaha chro tí ch'ín Judas.

Ntá tí sín nchát'á t'etqoan kjuenkehe sín ch'án treinta chichaon plata. ¹⁶Ntá tuénxin tí hora tí ch'ín Judas mé xritjeyá ch'án nkexrí tsochénta ch'án sín nketí tjan tí ch'ín Jesús.

Kjuixixín kjóneko sín tí ch'ín Jesús
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Ntá ikui tí yaon xrankixixín kia sine sín niqtja tsíkjkohya tí xroqan t'ánkixín niqtja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kixín:

—¿Ínchéni, nketí tjnkávan sincheyaxixinni tí sineni tí kia pascua? —ichro sín.

¹⁸Ntá ntáchro ch'án kixín:

—Sátsjirá Jerusalén la tsjasánrá ntqe ijnko ch'ín la nixjehérá ch'án tsochtáchrórá kixín: “Ntáchro Maestro kuénténi kixín í séhya náxa tsjak'e ch'án la ntá ijie ntqo ntihi tsoyaxixín kixín sineko ch'án tí sín xriko ch'án tí kia pascua”, tsixrorá —mé xíkaha ichro ch'ín Jesús.

¹⁹A ntá tí sín k'uájiko ch'ín Jesús mé kjuínchexiteyá sín la kjuíncheyaxixín sín ntiha tí nkehe sine sín kia pascua.

²⁰Tió ntá kóntó la ntá ch'ín Jesús k'uéjóko tí teyó sín k'uájiko ch'án kjóne sín. ²¹La ntá tíó náxa tjejóne sín la ntáchro ch'ín Jesús kixín:

—Chaxín tjonkará kixín jnkójnínrá tjejorá ntihi mé sinchekjirána —ichro ch'án.

²²Ntá kain sín la kjuankixín kóxakonhen sín k'uává sín la ntá kjuankixín sín jnkójnko sín kjuanchankíhi sín tí ch'ín Jesús kixín:

—Ínchéni, zá jeheni ní? —ichro sín.

²³Ntá kjuátéhe ch'ín Jesús kixín:

—Tí nkexro tsochr'ánkixian niqtja tí plato a mé tí nkexro a mé sinchekjina ch'án. ²⁴Tí Xjeen Dios K'óna Chojni xíkaha tsjasóte ch'án éxi nixja xroon itén Dios, a ntá nóa tí ch'ín sinchekji ch'án. Íchá jína chrókókjéhye ch'án —mé xíkaha ichro ch'ín Jesús.

²⁵Na ntá tí ch'ín Judas tí ch'ín sinchekji ch'ín Jesús, mé ntáchro ch'án kixín:

—Maestro, zá janhan? —ichro ch'án.

Ntá ntáchro ch'ín Jesús kixín:

—Méxra xíkaha tsintáchrúa —ichro ch'án.

²⁶Ntá tíó tjejóne sín na ch'ín Jesús mé kuákja ch'án tí niqtja ntá kjuanchehe ch'án kjuasáyé Dios. Ntá kóchrít'q ch'án tí niqtja ntá chjéhe ch'án kain tí sín k'uájiko ch'án sine sín. Ntá ntáchro ch'án kixín:

—Sinterá tíhi mé cuerpo kuéntana —ichro ch'án.

²⁷ Na ntá kuákja ch'án ijnko vaso tjiá inté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá ²⁸ kixin tíhi mé jnina mé chrónkaxin ijnko nkehe nixin tsonhen. Mé tí jnina ts'ítji na mé tsjacha tsjinkitsa nchónhya chojni kixin ts'íjmáxin ijíe sín. ²⁹ Tjonkará kixin ts'íhya janhan tí inté to uva inaá tsjixrakájia tí yaon ts'ayájia kjuachaxin kuènte T'aná ntá xík'ini inté to uva inaá —mé xíkaha ichro ch'ín Jesús.

Ntá chrónka ch'ín Jesús kixin ch'ín Pedro sinchemá ch'án kixin chónhya ch'án tí ch'ín Jesús
(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjuí sín tí jnã Olivo. ³¹ Ntá ntáchro ch'ín Jesús kixin:

—Jahará tsítõnaráni kaín rá ijie tie kixin ntáchro tí xroon itén Dios kixin: “Ts'en tí nkexro Pastor t'ayakonhen kolélo ntá kaín tí ko mé tsjichroe va.”* ³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

³³ Ntá kjuátgehe ch'ín Pedro ntáchro ch'án kixin:

—Kjónté kaín sín tsítõha sín ntá janhan la náhi —ichro ch'án.

³⁴ Ntá ntáchro ch'ín Jesús kixin:

—Chaxín tsoxrjanka kixin tí tie i naxã tsotsjehya kochíntõa la ó sijnchemána níya —ichro ch'án.

³⁵ Ntá ntáchro ch'ín Pedro kixin:

—Kjónté koína its'én la sîntamáhya tí jaha —ichro ch'án.

La ntá kaín tí sín k'uájiko ch'án na xíkaha ichro sín kaín sín.

Ch'ín Jesús chrónógehe ch'án It'é ch'án tí tjen ch'án tí Huerto Getsemani
(Mr. 14.32-42; Lc. 22.39-46)

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nchek'in sín Getsemani. Ntá jehe ch'án mé ntáchro ch'án kixin:

—Tjejorá ntiho ntá janhan sátsjia tsonixjahã T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankixin kóxakonhen ch'án la ko k'uávã ch'án. ³⁸ Ntá ntáche ch'án tí iy'á sín kixin:

—Imá t'avã asenná éxi its'én ntá ts'axrje asenná. Ntá jahará ntiho tsitõhará ts'ejotsjehekoarána —ichro ch'án.

³⁹ Ntá sákjuí ch'án antsí kjínxin ntá kjuák'exín toch'in ch'án k'uúsén ch'án hasta caxin kja ch'án nonte ntá chrónógehe ch'án It'é ch'án tjen nkaya nkajni, ntáchro ch'án kixin:

—It'eni, tí tjinkávan chrókjuinchekaáni kixin chrók'uihyani tí nkehe tsjá tjiá tí copa i. Kjánchó jehya éxi tjinkaonni jeheni. Náhi. Éxi tjinkávan jaha —ichro ch'án.

⁴⁰ Ntá ikjan ch'án tí kuitõhe sín la ó k'uíkon ch'án kixin tjejóua sín. Ntá nixjehé ch'án tí ch'ín Pedro ntáchro ch'án kixin:

—Xá xitjahya chrók'uejõtsjehekoarána ijnko hora. ⁴¹ Titõhará tjejotsjehérá la nixjehérá Dios kixin tsjinkitsará ch'án kixin chrókjuachroehyará ch'ín Tsochren. Asánrá tóxrjinhin kjánchó tí cuerpo chontará la imá ntá —mé xíkaha ichro ch'ín Jesús.

⁴² Ntá sákjuí ch'án yóxin inaá chrónógehe ch'án It'é ch'án, ntáchro ch'án kixin:

—Jaha It'eni tí xitjahya tsjakjían tí nkehe tsjasótexínni la ntá tjinkaonni éxi jaha tjinkávan —mé xíkaha ichro ch'án.

⁴³ Ntá ikjan ch'án la k'uíkon ch'án tjejóua tí sín k'uájiko ch'án inaá kixin tjejhya sín kotáchrin.

⁴⁴ Ntá kuitõhe ch'án sín inaá la nixin sáxíkji ch'án ntá ó xíkahó xínixja ch'án inaá. ⁴⁵ Ntá kjan ch'án tí k'uéjõ sín la ntáchro ch'án kixin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án. ⁴⁶ Ntá ijie t'inkatjenrá sátsjini kixin ó kjui tí ch'ín sinchekjina —ichro ch'án.

Sákjuiko sín tí ch'ín Jesús tsjak'echjina ch'án ntõechiso
(Mr. 14.43-50; Lc. 22.47-53; Jn. 18.2-11)

⁴⁷ Ntá naxã tjenixja ch'ín Jesús ntá xrinãhya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kujkão ch'án nchónhya chojni kjuíjiko sín ch'ica espada la ko inta. Na mé kjuachaxién tí sín nchat'á t'etõan la ko tí sín táda kuènte tí sín judío mé kui sín. ⁴⁸ Ntá ch'ín Judas, tí ch'ín kjuínchekji, mé tsintáchro ch'án kixin:

—Tí ch'ín tsakjãhã tügen ch'án na mé tsgnoaxínrá kixin jehe ch'án. Ntá itserá ch'án —mé xíkaha tsintáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehé ch'án ntáchro ch'án kixin:

—¿Á jina tjen, Maestro? —ichro ch'án.

Ntá kjóneko ch'án kochíto. ⁵⁰ Ntá kjuátgehe ch'ín Jesús, ntáchro ch'án kixin:

* 26:31 Zacarías 13.7

—Amigo, á ó k'uinka tí xra t'jinkávan sích'e?

Ntá xikaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án ch'ica espada kóchrínjin ch'án tatsjon ijnko tí sín ch'ehe tí nchat'á t'etoan xra. ⁵² Ntá ntáchro ch'ín Jesús kixin:

—Chr'axenhén t'joe ch'ica espada méhe. Kaínxín tí sín t'jayaçin ch'ica espada la xikaha ts'énxín sín. ⁵³ ¿Á noahyará kixin janhan jina chrókjuánchaha T'aná la ntá tuénxin chróchr'án ch'án t'eyó ejército sín ángel? ⁵⁴ Kjánchó tí xikaha chrókónhen la chróxit'eyáha éxi nixja xroon itén Dios kixin itén Dios mé chrónka kixin t'ichjánxin ó jehí xikaha tsonhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará ch'ica espada la ko inta kixin tsotserána éxi chrótserá ijnko síchee xikaha. A ntá kaín yaon kjuak'é nkaxenhen nínko kjuakua ¿na ntá nkexrí ntiha mé tsexinhyarána? ⁵⁶ Kjánchó jehí kaín tíha tsonhen kixin tsoxiteyá tí chrónka tí sín tsíkin xroon itén Dios óse —ichro ch'án.

Mé xikaha ntá kaín tí sín k'uájiko ch'ín Jesús na mé kuit'oghe sín ch'án, ntá sákjuí sín.

Ch'ín Jesús kóchjina ch'án tí síxreé t'etoan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákjuiko sín ch'án nt'oe ch'ín Caifás, tí nchat'á t'etoan. Ntaha mé tsíójkotsé kaín tí sín maestro tjako tí ley la ko tí sín t'etoan kuènte nínko. ⁵⁸ Ntá ch'ín Pedro ikjin tinkáchréhe ch'án ntá kjuíji ch'án tí ntásin nt'oe tí nchat'á t'etoan la kjaxin k'uixenhen ch'án tí ntásin la kjuak'eko ch'án tí sín policia kuènte nínko kixin tsotsjehe ch'án nkerí tsonhen.

⁵⁹ Ntá tí sín nchat'á t'etoan la ko tí sín táda la ko kaín tí sín t'etoan mé kjuéyá sín nkexrí ts'eka sín jje tí ch'ín Jesús kixin jina chrók'oyán sín ch'án. ⁶⁰ Ntá kjónté nchónhya chojni kuikjanchia sín jje kjánchó k'uitjaha sín nkerí jje t'íká ch'án. Ntá kjónté la kóchjina iyó testigo ntoáhya chrónka sín ⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuènte Dios la ntá iní yaon koá la ó tsjaké inaá”† —mé xikaha chro sín.

⁶² Ntá tí nchat'á t'etoan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuènté t'jateéhya ninkehó? ¿Á chaxín xikaha tsíntáchrúa éxi xikaha ichro sín? —ichro ch'án.

⁶³ Ntá ch'ín Jesús la táníkoá ch'án nixjahya ch'án. Ntá ntáchro tí nchat'á t'etoan kixin:

—Kjuachaxién ihnié tí Dios tjechón t'akjénxian chrónka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuatéhe ch'ín Jesús ntáchro ch'án kixin:

—Éxi tí ntáchrúa jaha. Ntá kjaxin xrxanka kixin chr'exin ts'ikuan kixin tí Xjeen Dios K'óna Chojni mé tsjak'etjaxin nángo tí tja chjina Dios chónka kaín xín kjuachaxin la ko ts'ikuan itjui mé tsxín ch'án nkaya nkajni —ichro ch'ín Jesús.

⁶⁵ Ntá kuínhin tí nchat'á t'etoan la ntá imá kónínkaon ch'án ntá kótséçhe ch'án tí iké ch'án la ntáchro ch'án kixin:

—Tí ch'ín a k'uántaxínhin ch'án Dios kixin xikaha nixja ch'án. Méxra t'ichjánxinhya í so chojni tsochrónka. La ntá jahará la ó kuínhínrá kixin nkexrí nixja ch'án. ⁶⁶ ¿A ntá jahará la, ¿nkechorá? —mé ichro tí nchat'á a.

Ntá kjuatéhe sín ntáchro sín kixin:

—Chónka ch'án jje la chrók'uen ch'án —ichro sín.

⁶⁷ Ntá iso sín la kuíkite sín ntáte sín nkayakon ch'án na í so sín na kjuate sín ch'án la í so la chjéhe sín ikon ch'án. ⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuínchemá ch'án kixin chónhya ch'án tí ch'ín Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'ín Pedro naxa tjetjaxin ch'án tí ntásin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xríkoa tí ch'ín Jesús tsíkjin estado Galilea —ichro tjan.

⁷⁰ A ntá ch'ín Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrúa —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jnko tjan k'uikon tí jehe ch'án la nixjehe tjan kaín sín tjejontaxín, la ntáchro tjan kixin:

—Tí ch'ín í la kjaxin k'uájiko ch'án tí ch'ín Jesús tsíkjin chjasin Nazaret —ichro tjan.

⁷² Ntá ch'ín Pedro kjuínchemá ch'án inaá, k'uákjenxin ch'án ihnié Dios, ntáchro ch'án kixin:

—Chonhya tí nkeexo a —ichro ch'án.

⁷³ Ntá antsí chr'èxin tí sín k'uèjòntaxín kóchjinehe sín ch'ín Pedro la ntáchro sín kixin:

—Chaxín jaha kjaxín jnkojín tí sín a kixin tjátsòanxínni tí nixja jaha —ichro sín.

⁷⁴ Ntá k'uákjénxín ch'án ihnjé Dios ntáchro ch'án kixin:

—Chonhya tí nkeexo a —ichro ch'án.

Na ntá xrinahya itse kóchíntoá. ⁷⁵ Ntá ch'ín Pedro mé xraxinkaon ch'án kixin nkeexri chrónka ch'ín Jesús senó kixin: “Naxá tsotsjehya kóchíntoá mé ó tsjixín sjnchemána níya kixin chonhyana.”[†] Ntá xikaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

27

Kjuikénhen sín ch'ín Jesús tí ch'ín Pilato

(Mr. 15.1; Lc. 23.1-2; Jn. 18.28-32)

¹ Ntá tí kóyagon k'uinkaséyan ntá kaín sín nchat'á t'etòan la ko tí sín t'etòan kuènte tí sín judío kjuenkayáxin sín nkeexri ts'óyán sín tí ch'ín Jesús. ² Ntá tjechroneteto ch'án sákjuiko sín ch'án tí tjen tí ch'ín Poncio Pilato, tí ch'ín gobernador romano.

Ik'uéen ch'ín Judas

³ Ntá tí ch'ín Judas, tsíkjinčekji ch'ín Jesús, mé k'uikon ch'án kixin ts'óyán sín tí ch'ín Jesús. La ntá xraxinkaon ch'án tí jje kjuasin ch'án la sákjuikénhen ch'án sín inaá tí treinta chichaon plata kuákja ch'án, mé ch'jéhe ch'án tí sín nchat'á t'etòan la ko tí sín táda. ⁴ La ntá ntáchro ch'án kixin:

—Ó kjuasinni jje kixin kjuinčekjini ijnko nkeexo tjóá —ichro ch'án.

À ntá jehe sín kjuátèhe sín kixin:

—Ntá janhanna la nonahyana tíha. Tíha la ó jje kuènte —ichro sín.

⁵ Ntá ch'ín Judas mé sákjuik'e tí chichaon nkaxenhen njnko ntá sákjuí ch'án kjuisik'á isin ch'án nta.

⁶ Ntá tí sín nchat'á t'etòan kjuenájín sín tí chichaon la ntáchro sín kixin:

—Tí chichaon la kóxi^xín ijnjé chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontee Tí Ch'ín Ch'éna Nchésen kixin tsochóna sín nketí tsoxravá tí chojni tsíkji^xín ikjín. ⁸ Mé xikaha kjuinček'in sín tí nonte mé Campo Kuènte Jni la hasta ijie la naxá xikaha nchek'in sín. ⁹ Mé xikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjón tí sín israelita kuènte tí ch'ín a),¹⁰ la k'uénaxín sín tí nonte kuènte tí ch'ín ch'éna nchésen kixin xikaha kjuinchéxiteyá sín tí nkehe k'uetuanna Ìnchéni.”*

Ch'ín Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'ín Jesús sákjuiko sín ch'án nkayakon tí ch'ín gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátèhe ch'ín Jesús, ntáchro ch'án kixin:

—Èxí ntáchrúa jaha —ichro ch'án.

¹² Na ntá tí sín nchat'á t'etòan la ko tí sín táda t'etòan t'eka sín jje tí ch'ín Jesús kjánchó la ch'ín Jesús la ninkehó kjuátèghya.

¹³ À ntá ch'ín Pilato kjuanchankí ch'án kixin:

—¿Á kiénhya kaín tí jje t'eka sín tí jaha? —ichro ch'án.

¹⁴ Kjánchó ch'ín Jesús la ninkehó kjuátèghya ch'án. Ntá tí ch'ín gobernador la chrakon ch'án.

K'uetòan sín kixin its'en ch'ín Jesús

(Mr. 15.6-20; Lc. 23.13-25; Jn. 18.38—19.16)

¹⁵ À ntá tí kié pascua mé kuènnen tí ch'ín gobernador kixin jnkojnko nánó takitsjéxín ch'án ntòqchiso ijnko chojni tjechjina. Ntá tí chojni mé tsjanchia sín nkeexo tí tsítóhe ch'án sátsji.

¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás. ¹⁷ Ntá itsjé chojni kójnksé la ntá ch'ín Pilato mé kjuanchankí ch'án kixin:

—¿Nkeexo tjinkáonrá ts'atjánta, á tí ch'ín Barrabás o á tí ch'ín Jesús nchek'in sín Cristo? —ichro ch'án.

[†] 26:75 Mateo 26.34 * 27:10 Zacarias 11.12-13

¹⁸ Kíxin tí ch'ín Pilato la ó nohe ch'án kixin kjuachjínqínhin chóna tí sín kjuíkaán tí ch'ín Jesús.

¹⁹ Ntá jehe ch'án naxa tjetjaxín ch'án tí nchekitoexixin ch'án ijíe chojni la ntá tí ichjién ch'án mé k'uetuēnhen tjan ijnko chojni tsjichénka ch'án kixin tsjiatéhya ch'án tí nkexro jina kixin kóntó nárxjónhya k'uíkoxín tjan kotáchríen tjan kixin tí jehe ch'án.

²⁰ A ntá tí sín ncha'tá t'etōan la ko tí sín táda t'etōan a mé nixjehe káin tí chojni tsíkóchjina kixin chrókjuanchia sín kixin chrókútohe ch'án tí ch'ín Barrabás sáchrókjui, a ntá ch'ín Jesús mé chrók'uen. ²¹ A ntá tí ch'ín gobernador mé nixjehe ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjínkáonrá ts'atjánta? —ichro ch'án.

Ntá kjuátehe sín ntáchro sín kixin:

—Ch'ín Barrabás mé chrók'uatjánta ch'án —ichro sín.

²² A ntá ch'ín Pilato mé kjuanchankí ch'án kixin:

—¿A ntá nkehe sij'aha tí ch'ín Jesús tí ch'ín nchek'inrá Cristo? —ichro ch'án.

Ntá káin sín kjuátehe sín kixin:

—¡Tsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchro ch'án kixin:

—¿Xá nkehe tí kjuích'e tí ch'ín í kixin? —ichro ch'án.

Ntá antsí má itsen k'úixite sín, k'óyako sín, ntáchro sín kixin:

—¡Tsjak'enkáni ch'án ntacruz! —ichro sín.

²⁴ Ntá ch'ín Pilato k'uíkon ch'án kixin í kohya tsjitóxínhin sín tsjenkayáxin sín la antsí má k'úixité sín, nínkaon sín, la ntá kjuanchia ch'án xrakōo sín inta, la nkayakon káin tí sín tsíkójkotsé ntaha k'ónti ch'án tja ch'án. La ntáchro ch'án kixin:

—Janhan tsámáhya jē tí its'en tí nkexro í chónthaha jē. Jahará xíkaha tjínkáonrá tsonhen —ichro ch'án.

²⁵ Ntá káin sín kjuátehe sín kixin:

—Jeheni la ko xjeenni mé yámáni tí jē tí its'en tí nkexro í —ichro sín.

²⁶ Ntá ch'ín Pilato kútohe ch'án kixin sáchrókjui tí ch'ín Barrabás. Ntá tuénxín k'uetōan ch'án kixin tsjate sín tí ch'ín Jesús la ntá kjuínchek'áyéhe ch'án tí sín tsjak'enkáni sín ch'án ntacruz.

²⁷ A ntá tí sín soldado a mé sákjuíko sín tí ch'ín Jesús tí palacio kuēnte tí ch'ín gobernador. Ntaha kóinkotséxin káin tí sín soldado romano la k'uántatjen sín tí jehe ch'án. ²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié. ²⁹ La kjuak'enkaya sín kja ch'án ijnko corona tsíkijh'éna sín ntach'í la ko kjuanjon sín ijnko nta vara kixin tjenkáya tja ch'án chjina. La ntá k'uéjoxin toch'ín sín nkayakon ch'án la kjuanoá sín ch'án, ntáchro sín kixin:

—Jnkochrín tsjak'é tsétuēnhén tí sín judío —ichro sín.

³⁰ La ko kjáxin ntaté sín kuíkite sín nkayakon ch'án la ko kuákja sín tí nta tjexaa ch'án la t'íchjéxin sín kja ch'án. ³¹ Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxin. Ntá sákjuíko sín ch'án kixin tsjak'enkáni sín ch'án ntacruz.

Kjuák'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

³² A ntá sákjuíxin sín ntiha la xéta sín ijnko ch'ín kjuíxin ch'án chjasin Cirene, mé it'in ch'án Simón. Ntá k'uetuēnhen sín ch'án kixin tsámá ch'án tí ntacruz tsjak'enkáni ch'ín Jesús.

³³ Ntá kjuíji sín ijnko tjo it'in Gólgota na mé nkívee sín t'axrjéxin Nta Hueso Kja Chojni Tsík'en. ³⁴ Ntá chjéhe sín ch'ín Jesús xranvino tsík'ixínkíjjanxín xroan tsjá kjánchó jehe ch'án k'uíhya ch'án.

³⁵ A ntá tí sín soldado kjuixin kjuak'enkáni sín ch'án tí ntacruz ntá tí iké ch'án kjuích'exín sín suerte kixin nkexro tsakja. Mé xíkaha xiteyá tí nkehe nixja tí sín k'uéchrónka itén Dios ósé, ntáchro kixin: “Nchónhya suerte kjuích'exín sín tí kaná.”† ³⁶ Ntá tí sín soldado ntaha k'uéjóna sín t'ayakonhen sín ch'án. ³⁷ Ntá kjuak'enkáni sín tí ikja tí ntacruz ijnko ntachiso ntáchro kixin: “Ch'ín Jesús mé tí ch'ín Rey t'etuēnhen tí sín judío.”

³⁸ Kjaxín yaá tí síchee k'uéjyáni sín ntacruz ijnko la nó tja chjina la í jnko la nó tja kjon. ³⁹ Ntá tí sín tinkák'atsínka mé kjuanoá sín ch'án tinkátjía kja sín ⁴⁰ la ntáchro sín kixin:

—Jaha ntáchrua kixin chrók'oxika tí nínko a ntá iní koá yaon la ó chrókjuixin chrókjuích'éna inaá,‡ ichrua. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxian tí ntacruz méhe —ichro sín.

⁴¹ La ntá kjaxin tí sín nchat'á t'et'otan la ko tí sín maestro tjako tí ley la ko tí sín fariseo la ko tí sín k'ue'otan kuente n̄nko kjuanoá sín ch'án, ikjo sín kichó sín kixin:

⁴² —Jehe ch'án mé kjuíncheakaá ch'án ókjé chojni ntá jehe ch'án xitjahya sincheakaá asén ch'án. Kja tí chaxín jehe ch'án tí Rey kuente Israel ntá jehó ch'án chrókuinkajinxín ch'án asén ch'án tí ntacruz kixin ntá kjaxinni chrókuitekaonni tí jehe ch'án. ⁴³ Jehe ch'án tsintáχρο ch'án kixin Dios tjinkítsa tí jehe ch'án la ntá tsotsjeheni á chaxin tjinkaon Dios sincheakaá tí jehe ch'án kixin tsintáχρο ch'án kixin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxín̄hin sín ch'án.

Ik'uéen ch'in Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkixin hasta las tres kónjin mé k'uúxin tie chjasintajni. ⁴⁶ Ntá tí hora a ch'in Jesús itsen k'uèya ch'án, ntáχρο ch'án kixin:

—Elí, Elí, ¿lama sabactani? —mé tíhi t'axrxéjin kixin: It'éni, It'éni, ¿nkekuènté kuitohéni?§ —mé xikaha ichro ch'án.

⁴⁷ Ntá iso sín tjejóntaxín kuínhin sín ntá ntáχρο sín kixin:

—Tí ch'in a mé t'yéhe tí ch'in profeta Elías —ichro sín.

⁴⁸ Ntá ijnko ch'in kuínka ch'án sákjuíkkakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjinjin ntá kjuínchechr̄in ch'án kixin chrók'ui ch'in Jesús.

⁴⁹ Ntá í so sín ntáχρο sín kixin:

—Nté t̄jtohé ch'án. Tsotsjeheni á tsi ch'in Elías sincheakaá tí jehe ch'án —ichro sín.

⁵⁰ Ntá ch'in Jesús itsen k'uúyato ch'án inaá, ntá kjuixín ik'uéen ch'án. ⁵¹ Mé ntá tuénxín k'uíchje tí ka t̄jenkákúenxín nkaxenhen n̄nko. Mé k'uíchje tí ka k'óna yaá tí kjuankixixín noi hasta nonte. La ko kuínkí nonte la ko tí t̄jo la kjaxin xitjehe. ⁵² La ko ó xitjehe tí t̄yè tsíxravá chojni la ko ó xechón itsjé tí sín k'uékinkáchónki Dios. ⁵³ Kain tí sín a mé k'uaxrxéjin sín tí t̄yè, la tió kjuixín xechón ch'in Jesús ntá k'uúxenhen sín tí chjasin t̄jóá mé chjasin Jerusalén la ntaha itsjé chojni k'uúkon kixin xíxechón tí sín a.

⁵⁴ Ntá tí ch'in capitán la ko tí sín k'uéjóko ch'án, mé tí sín t'ayakonhen ch'in Jesús, na ntá k'uúkon sín kuínkí nonte la kain tí í so nkehe la ntá imá chrakon sín, la ntáχρο sín kixin:

—Chaxín tí nkexro a mé Xjeen Dios.

⁵⁵ Ntá ntíha nchónhya chojni chjin ikjín tjejó sín, tjejótsjehe sín. Jehe sín k'uékinkáchréhe sín ch'in Jesús tí kjuixín ch'án estado Galilea kixin mé ntíha kjuankixixín sín k'uékjinkítsa sín ch'án. ⁵⁶ Ntaha kjaxin t̄jen t̄jan María Magdalena la ko t̄jan María, iné tí ch'in Jacobo, la ko ch'in José la ko tí iné tí xjeen tí ch'in Zebedeo.

Ntá xrává ch'in Jesús

(Mr. 15.42-47; Lc. 23.50-56; Jn. 19.38-42)

⁵⁷ Ntá tí ó ntá kóntó ikui ijnko ch'in it'in José, mé ijnko ch'in rico. Chjasén ch'án mé Arimatea la jehe ch'án kjaxin k'uéchréhe ch'án tí ch'in Jesús. ⁵⁸ Ntá tí ch'in José sákjuítsjehe ch'án ch'in Pilato kjuíkkjanchia ch'án tí cuérpogé tí nkexro Jesús. Ntá ch'in Pilato mé kjuanjón ch'án kjuachaxin. ⁵⁹ Ntá ch'in José mé kuákja ch'án tí cuerpo ntá kjuínchech'isímá ch'án ijnko ka t̄jóá. ⁶⁰ Na ntá kjuak'enkaya ch'án ijnko t̄yè n̄ixin kuente ch'án kixin senó tsík̄jich'éna ch'án. Ntá ijnko xro jíé k'uík̄jèxín ch'án tí ntója tí t̄jo, ntá kjuixín ntá sákjuí ch'án. ⁶¹ Ntaha kjuak'e tí t̄jan María Magdalena la ko í jnko t̄jan María t̄jéjót̄jaxín sín ntoí chok'èxin t̄jen t̄yè.

Tí sín soldado k'uúyakonhen tí t̄yè xrává ch'in Jesús

⁶² A ntá tí yaon ó kjuixín kjuasiyóxin sín nkehe kuente tí yaon t'ok'éhe sín, la ntá tí sín nchat'á t'et'otan la ko tí sín fariseo sákjuítsjehe sín tí ch'in Pilato ⁶³ la ntá ntáχρο sín kixin:

—Ó xraxinkaonni kixin tió naxa kjuak'echón tí nkexro kjuích'ia la tsintáχρο ch'án kixin ts'atsínka iní yaon ntá t̄soxechón ch'án inaá, tsíχρο ch'án. ⁶⁴ Méxra tsétuénhén tí sín soldado kixin ts'ayakonhen sín tí t̄yè t̄soxét̄jajia tí n̄ixin yaon. Tí náhi, la k̄já tie itsi tí sín k'uájiko ch'án la t̄seé sín tí cuerpo kuente ch'án la ntá chr'èxin t̄sochéna sín chojni kixin ó xíxechón tí nkexro a, mé xikaha sich'ia sín. La ntá tí xikaha sich'e sín ant̄sí má sich'ia sín que tí xrankixixín —mé xikaha ichro sín.

⁶⁵ Ntá ntáχρο ch'in Pilato kixin:

—Ntíhi t̄jéjó soldado. Sátsjirá la ts'ayakonhenrá jína tí t̄yè éxí t̄jnkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro t̄jekjèxin tí t̄yè la kuit̄ohe sín tí sín soldado ntahó kixin ts'ayakonhen sín.

28

*Ó xechón ch'in Jesús**(Mr. 16.1-8; Lc. 24.1-12; Jn. 20.1-10)*

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankíxixín semana, la ntá tjan María Magdalena la ko tí í jnko tjan María sákjuítsjehe sín tí tsíkijxravá Jesús. ² Ntá xríngahya kuínkí nonte imá tjián kixin ijnko ángel kuente Ínchéni k'uínkajinxín nkaya nkajní la kjuíji ch'án tí tsíxravá Jesús la kjuakjiin ch'án tí xro a tjejkèxin tòye la ntá chrítaón tí xro a kjuák'ekjen ch'án. ³ Tí ángel la imá tjákjini tsjehe éxi ijnko xrohi la tí iké ch'án la imá tjóá tsjehe éxi chrinta. ⁴ Tí sín soldado mé k'uikon sín xíkaha la ntá síxranká sín chrakon sín la éxi tsík'en sín xíkaha k'uéjé sín. ⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó ñona kixin xritjéyará tí nkexro Jesús mé tí nkexro tsíkjak'enkání ntacruz. ⁶ Kjánchó í kohya ch'án ntihi ó tsíxechón ch'án inaá éxi chrónka ch'án senó. Xrákirá tsjehérá tí tsíkjak'e sín ch'án, í kohya ch'án. ⁷ Ntá sájtjirá tjoka tjiçhenkará tí sín k'uájiko ch'án kixin: “Tí nkexro la ó tsíxechón. Ó kuítónxin ch'án ntja sátsji ch'án estado Galilea. Ntiha ts'ikónrá ch'án”, mé xíkaha tsqchronkará. Kaín tíha mé tjonkará —mé xíkaha chrónka tí ch'in ángel.

⁸ A ntá tí chojni chjin tjoka sákjuíxin sín tí tsíxravá tí nkexro Jesús, la chrakon sín la ko chéhe sín la sákjuíçhénka sín tí sín k'uék'ajiko ch'in Jesús. ⁹ Ntá xríngahya titáya k'uíkuèn sín kixin itjen tí ch'in Jesús la nixjehe sín ch'án. Ntá kóçhijinehe sín ch'án la kjóa sín toté ch'án, kuítekaon sín ch'án. ¹⁰ La ntáçhro ch'án kixin:

—Chrakonhyará sájtjirá tjiçhenkará tí sín kíçhó ni kixin sáçhrókjui sín estado Galilea la ntaha ts'ikon sín tí janhan —mé xíkaha ichro ch'in Jesús.

Tí nkehe chrónka tí sín soldado

¹¹ Tió sátsíkji tí chojni chjin la nta iso tí sín soldado k'uáyakonhen tí tsíxravá ch'in Jesús mé sákjuí sín chjasín Jerusalén la chénka sín tí nçat'á t'etqan kaín tí nkehe tsíkónhen tí k'uéjé sín ntiha. ¹² Ntá tí sín nçat'a t'etqan kjuínixjehe sín tí sín táda la ntá jnkokoá kjuenkayáxin sín ntá çhjehe sín nçónhaya chichaon tí sín soldado. ¹³ La ntáçhro sín kixin:

—Chronkará kixin tí tie naxa tjejoçhrinrá ikui tí sín k'uék'ajiko tí nkexro Jesús, mé kueé sín cuerpo kuente ch'án, ichrorá. ¹⁴ A ntá tí chrókónohe tí ch'in gobernador tíha la ntá jeheni tsonixjehe ni ch'án kixin tsonínkakuanyará ch'án —mé xíkaha ichro tí sín nçat'á.

¹⁵ La ntá tí sín soldado k'uáyéhe sín tí chichaon la sákjuí sín la xíkaha kjuíçh'e sín éxi k'uítuenhen sín. La mé xíkaha chrónkaxín tí sín judío, la hasta tí yaon ijje la xíkahó ichro sín, chrónkaxín sín.

*Ch'in Jesús k'uetuenhen ch'án tí sín k'uék'ajiko ch'án tí xraq sich'e sín**(Mr. 16.14-18; Lc. 24.36-49; Jn. 20.19-23)*

¹⁶ A ntá tí tejnko sín k'uék'ajiko ch'in Jesús sákjuí sín ijnko jna estado Galilea kixin xíkaha tsík'etqan ch'in Jesús. ¹⁷ Ntá k'uikon sín ch'in Jesús la ntá kuínkáchónki sín ch'án kjónté iso sín naxa kjuenkayáxin á chaxín jehe ch'án o náhi. ¹⁸ Ntá ch'in Jesús kóçhijinehe tí jehe sín la ntáçhro ch'án kixin:

—Dios mé çhjina kaín xín kjuachaxin nkaya nkajní la ko çhasintajni. ¹⁹ Méxra sájtjirá kaín xín nación la tjákoherá chojni kixin tsitekaon sín tí janhan. Tíkítexínrá sín kjuachaxién ihnjé It'eni la ko ihnjé tí Xjeen la ko Nçakuaèn Dios. ²⁰ Tjákoherá sín kixin sinçhexiteyá sín kaín xín nkehe kuétuanhanrá. Ijje la ó nohará kixin tsjak'é ts'ejokoará jnkochríxín hasta tsjeje çhasintajni. Mé xíkaha tsonhen. Amén —ichro ch'in Jesús.

Tí tan jína chrónka ch'ín Marcos

Nteje mé kjuakoxin ch'ín Juan Bautista

(Mt. 3.1-12; Lc. 3.1-9, 15-17; Jn. 1.19-28)

¹ Xíkíhi mé xrankíxín tí tan jína kuènte Jesucristo mé tí Xjeen Dios.

² Ósé mé kjuák'e ch'ín Isaiás mé ijnko nkexro tsíchr'án Dios chrónka itén ch'án k'uékjin ch'án nkexri níxjehe Dios tí Xjeen ch'án ntáchro kixin:

Janhan tsochr'an ijnko nkexro tsochrónka tan kuèntana tsitónxin ntja,

kixin tsjasíyóxin ch'án ntja kuènta.*

³ Ntá tsinhin sín itén ijnko nkexro tsjak'e nteje ts'èya tsontácho kixin:

“Tóxakonhanrá ncheyóxinrá ntja tsixin Inchéni, taktijehérá ijnko ntja ntoí.”†

⁴ Tíha mé xitéyá ikuí ch'ín Juan Bautista, mé xíkaha kjuák'e ch'án nteje kuíkite ch'án chojni. Kjuakohe ch'án chojni ntíha kixin chrókuiní sín tí nkehe tjenkayáxin sín chrókuítqhe sín tí ijíe sín ntá chrókuikite sín kixin xíkaha mé chrókuiní ijíe sín. ⁵ Itsjé chojni kuixin estado Judea la ko tí chjasin Jerusalén ikuí sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jje yámá sín ntá ch'ín Juan mé kuíkítexín sín ch'án ntarío Jordán.

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxín nteje. ⁷ Mé kjuák'ekjakohe ch'án chojni ntáchro ch'án kixin:

—Itón tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókosuána chrókuasintanka tí correa tí tqkaté ch'án. ⁸ Janhan mé intá ó kuíkítexínrá. Ntá jehe ch'án mé tsjiktéxínrá ch'án tí Nchakuen Dios —ichro ch'ín Juan.

Ch'ín Juan kuíkite ch'án tí ch'ín Jesús

(Mt. 3.13-17; Lc. 3.21-22)

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuíkítexín ch'án tí ntarío Jordán. ¹⁰ Tíó k'uaxrjenkixin ch'ín Jesús tí inta, ntá xrinahya titaya k'uúkuèn ch'án na ó xitjehe nkajní la ntá tí Nchakuen Dios éxi kontóá k'uínkajinxin ntíha ntá kjuák'e chrítaón kja ch'án. ¹¹ Ntá xrinahya kuínhin sín níxja Dios nkaya nkajní, ntáchro kixin:

—Janhan mé xjanna imá tjuqha tí jaha. Imá chána kixin nchexiteyána tí jaha —mé xíkaha kuínhin sín.

Ch'ín Tsochren chrókuachroe tí ch'ín Jesús kixin chrókuasin ch'án jie

(Mt. 4.1-11; Lc. 4.1-13)

¹² Ntá tí Nchakuen Dios mé sákjuiko tí ch'ín Jesús nteje. ¹³ Kjuák'e ch'án cuarenta yaon tí nteje la ko ntíha mé k'uúxin ko jiehe ntá ch'ín Tsochren a na mé tjinkaon chrókuachroe ch'án. La ntá tí sín ángel kui k'uáyakonhen tí jehe ch'án.

Ch'ín Jesús kjuankíxín kjuako ch'án estado Galilea

(Mt. 4.12-17; Lc. 4.14-15)

¹⁴ Kjuixin kjuák'echjina ch'ín Juan ntqechiso ntá ch'ín Jesús na mé sákjuí ch'án nó estado Galilea sákjuíkakohe ch'án tí sín ntíha tí tan jína kuènte Dios. ¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etoan ch'án. Chrókuítqhérá tí nkehe jínahya k'uékjenkayáxinrá a ntá chrókuítékáonrá tí tan tsaáxinrá —mé xíkaha kjuako ch'ín Jesús.

Ch'ín Jesús k'uúyehé noó tí sín itsé koche

(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrinahya k'uúkon ch'án tí ch'ín Simón la ko tí kichó ch'án mé it'in Andrés, mé koche xritsé sín, ntá tunkák'e sín tí nchísén chrínki ntá. ¹⁷ Ntá ntáchro tí ch'ín Jesús kixin:

—Chréhérá tí janhan, ntá tsotjahará xra tsjéyará chojni —ichro ch'án.

¹⁸ Ntá tuénxín kuitqhe sín tí nchísén k'uétséya sín koche ntá sákjuiko sín ch'án.

¹⁹ Ntá kjinhya kujiji ch'ín Jesús ntá k'uúkon ch'án tí yaá xjeen ch'ín Zebedeo. Ijnko mé it'in Jacobo. A ntá tí ijnko la mé it'in Juan. Jehe sín la ko tí it'é sín tjejóxhen sín tí ntabarco tjejójónité sín tí nchísén tséya sín tí koche. ²⁰ Na ntá ch'ín Jesús mé k'uúyehé tí jehe sín kixin kjaxin tsochréhe sín ch'án. A ntá tuénxín kuitqhe sín tí it'é sín ch'ín Zebedeo kuítqeko ch'án tí ntabarco la ko tí sín tjinkítsa ch'án ch'e xra. A ntá jehe sín sákjuiko sín ch'ín Jesús.

* 1:2 Malaquías 3.1 † 1:3 Isaiás 40.3

Ijnko chojni chóna injno nchakuen tí jínahya
(Lc. 4.31-37)

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uixenhen ch'in Jesús tí njnko Israel. Na ntá ntaha mé kjuankíxin ch'án kjuako ch'án. ²² A ntá tí chojni siin ntiha mé chrakon sín kuínhin sín tí nkehe kjuako ch'án kíxin kjuakoxin ch'án kíxin chóna ch'án kjuachaxin, la jehya éxi tí sín maestro tjako tí ley, ichro sín. ²³ Ntá tí njnko Israel chjasin ntiha itjen injno chojni chóna injno nchakuen tí jínahya k'uúyato ntáchro kíxin:

²⁴ —¿Nkekuénté tjiaté tí jeheni kaín ni? Jaha Jesús kjuíxian Nazaret. ¿Á k'uinka kíxin sinchek'itjáyanni? Janhan mé ó kjuátsogan tí jaha, la ko nõna kíxin jaha tí nkexro tjóá kuénte Dios —mé xikaha ichro tí nchakuen tí jínahya.

²⁵ Ntá ch'in Jesús mé k'uuetuenhen tí nchakuen tí jínahya ntáchro ch'án kíxin:

—Tániá, t'axrjéxian tí jehe ch'án —mé xikaha ichro ch'in Jesús.

²⁶ A ntá tí nchakuen tí jínahya mé kjuínchek'aniáte tí ch'in a la ko k'uúyatoxin tsen ntá k'uaxrjéxin tí ch'in a. ²⁷ A ntá kaín sín chrakon sín ntá kjuanchankíhi sín kíchó sín, ntáchro sín kíxin:

—¿Xá nkexro tíha kíxin tjako ch'án nkehe nixin? Jehe ch'án chóna kjuachaxin kíxin t'etuenhen ch'án tí nchakuen tí jínahya la titekakonhen —mé xikaha ichro sín.

²⁸ A ntá imá tjoka k'uúixikónohe kaín xín sín estado Galilea kíxin nkexrí tí kjuachaxin chóna tí ch'in Jesús a.

Ch'in Jesús kjuínchekitohe jína tí ich'ee tí ch'in Simón Pedro
(Mt. 8.14-15; Lc. 4.38-39)

²⁹ Ntá tí ch'in Jesús mé k'uaxrjéxin ch'án tí njnko, a ntá tuénxín sákjuiko ch'án ch'in Jacobo la ko ch'in Juan, sákjuí sin ntege ch'in Simón la ko ch'in Andrés. ³⁰ Ntá tí ich'ee ch'in Simón na tjetsínka tjan, níhi tjan kíxin chóna tjan sóa. Ntá chénka sín tí ch'in Jesús. ³¹ Ntá kóchjina ch'án tí tjetsínka tjan ntá itsé ch'án tja tjan k'uúinkatjen tjan. Ntá tuénxín kjuíinhin tjan tí sóa chóna tjan. Ntá kjuanjon tjan nkehe sine sín.

Ch'in Jesús kjuínchekitohe jína nchónhaya chojni níhi
(Mt. 8.16-17; Lc. 4.40-41)

³² A ntá tío kjuíiátoón yaon tío k'uúixin tie kuíkóhe sín tí ch'in Jesús kaín tí sín níhi la ko tí sín chóna nchakuen jínahya; ³³ na ntá kuénté chjasin kójnkotsé sín k'uúixintankí sín ntója tí nchia a. ³⁴ Ntá kjuínchekitohe ch'án jína kaín tí chojni níhi chóna nchónhaya clase chin la ko kuakitsje ch'án kaín tí nchakuen tí jínahya. Na í kjuanjonhaya ch'án kjuachaxin kíxin tsonixja tí nchakuen tí jínahya kíxin ó kjuátsogan tíha nkexro tí jehe ch'án.

Ch'in Jesús mé kjuako ch'án estado Galilea
(Lc. 4.42-44)

³⁵ Ntá naxa sítie k'uàya ch'in Jesús k'uaxrjéxin ch'án tí chjasin a sákjuí ch'án nteje kíxin ntiha nixjéxín ch'án It'é ch'án tjen nkaya nkajní. ³⁶ Ntá ch'in Simón la ko tí sín xriko ch'án mé sákjuíkjejá sín ch'án. ³⁷ Ntá k'uitja sín ch'án ntá chénka sín kíxin:

—Kaín sín xritjejá sín tí jaha —ichro sín.

³⁸ Ntá ntáchro ch'in Jesús kíxin:

—Sátsjini ókjé chjasin chjinaxón kíxin ntaha kjaxin tsjákoḡa sín tí tan jína, kíxin xikaha mé tí k'uaxrjéxian chjasin ntiha.

³⁹ Ntá nkuúxin estado Galilea sákjuí ch'án kuinkákjako ch'án jnkojnko njnko la ko kuakitsje ch'án tí nchakuen tí jínahya chóna sín.

Ch'in Jesús kjuínchekitohe jína injno ch'in chóna chinlepra
(Mt. 8.1-4; Lc. 5.12-16)

⁴⁰ Ntá kui injno ch'in chóna chinlepra kjuák'exín toch'in ch'án nkayakon ch'in Jesús ntá chrónóḡeḡe ch'án ntáchro ch'án kíxin:

—Tí tjínkavan jaha la jína chrókjuínchekitohéni jína —ichro ch'án.

⁴¹ Ntá ch'in Jesús na imá kuíkonóḡeḡe ch'án tí ch'in a na ntá kjuentoá tja ch'án kjuak'e tja ch'án chrítaón tí ch'in níhi a ntá ntáchro ch'án kíxin:

—Méxra xikaha tjínkavan. Ntá jie sintakitoha jína —ichro ch'án.

⁴² A ntá xikaha ntáchro ch'án ntá tuénxín kjuíin tí chinlepra ntá kuítóhe ch'án jína. ⁴³ Ntá k'uuetuenhen ch'in Jesús tí ch'in a kíxin tjoka sátsji ch'án, ntáchro ch'án kíxin:

⁴⁴ —Ninkexró chenkahya ntihi; jehó sátsja tjákoḡé tí ch'in nchat'á kíxin ó kjuíinhan tí chinlepra la ko tjánjuan tí nkehe tsík'etogan ch'in Moisés[†] kíxin tsonoxén kaín xín chojni kíxin ó kuítóḡa jína —ichro ch'án.

† 1:44 Levítico 14.1-32

⁴⁵ A ntá tí ch'ín tsíkitohe jína, a ntá sákjuí ch'án kjuankíxin ch'án chénka ch'án kaín xín chojni kixin nkexrí kuítóhe ch'án jína. Méxra xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuíxin sín nkuíxin chjasin.

2

Ch'ín Jesús mé kjuínchekitohe jína ijnko chojni tsík'en toté
(Mt. 9.1-8; Lc. 5.17-26)

¹ Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uúxikónohe chojni kixin ijnko nchia ntiha kjuák'e ch'án. ² Ntá tuénxín nchónhya chojni kóchjina ntá kjuachahya tí nchia k'uúixenhen sín la ko kjaxin kjuachahya tí ntója nchia chrók'uúixintanki sín. A ntá ch'ín Jesús kjuako tí tan jína kuènte Dios. ³ Ntá kui noó sín tinkátsénki sín ijnko ch'ín tsík'en toté ch'án. ⁴ Kjánchó xitjahya kóchjina sín tí tjen ch'ín Jesús kixin nchónhya chojni síin. La ntá k'uúit'ótjen sín tí chrítaón nchia a ntá ó'xrat'ó sín. Na ntá ijnko hno kjuák'ete sín tí kania tjenkáya tí sjnníhi a ntá kjuinkajin sín ntoí tí tjen ch'ín Jesús a. ⁵ Tió k'uúikon ch'ín Jesús tí nkehe kjuích'e sín ntá ó nohe ch'án kixin chaxín imá tinkáchónki sín tí jehe ch'án. Ntá nixjehe ch'án tí sjnníhi ntáche ch'án kixin:

—Xjeenni, ó kjuixin kjuíinhan tí jie chonta —mé xíkaha ichro ch'án.

⁶ Na ntá iso tí sín maestro tjako tí ley tjejótxajin sín ntiha na ntá jehó sín mé kjo sín asén sín kixin: ⁷ “¿Nkekuènté xíkaha nixja tí ch'ín i ncheyóhe ch'án asén ch'án Dios? Kixin ninkexró xitjahya tsjatsiin ijie kixin jehó Dios mé chónka kjuachaxin tsjatsen ijie chojni”, mé xíkaha ikjo sín asén sín. ⁸ Ntá ch'ín Jesús la ó nohe ch'án nkehe tjenkáyáxin sín. Ntá ntáchro ch'án kixin:

—¿Nkekuènté kixin xíkaha tjenkáyáxinrá? ⁹ ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuíinhan ch'án tí jie yámá ch'án, o á antsí xrahya chróntátjan ch'án kixin chrók'uúinkatjen ch'án chrókjuenájin ch'án kaníe ch'án ntá sáchrókjuí ch'án? ¹⁰ Méxra jie tsjákoxjan kixin tí Xjen Dios K'óna Chojni mé ntihi chjasintajni chónka kjuachaxin tsjakjiihin ijie chojni —ichro ch'án.

Ntá ntáche ch'án tí ch'ín xitjahya tji kixin:

¹¹ —Jaha tétuanhan t'inkatjen, tjenájian kaniáa na sátjia ntóa —ichro ch'án.

¹² A ntá tí sjnníhi na tuénxín k'uúinkatjen ch'án kjuák'exin toté ch'án na kjuenájin ch'án kaníe ch'án na kuámá ch'án k'uaxrjéxin ch'án nchia sákjuí ch'án. Na ntá kaín tí sín síin a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uúikonhyéni tí nkehe i —ichro sín.

Ch'ín Jesús k'uúyehé ch'ín Leví
(Mt. 9.9-13; Lc. 5.27-32)

¹³ A ntá chr'éxin ch'ín Jesús mé sáxikji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. ¹⁴ Ntá k'uátsínka ch'án k'uúikon ch'án tí ch'ín Leví xjeen ch'ín Alfeo tjetjajin ch'án tjenchekjènkí ch'án. Ntá ch'ín Jesús mé k'uúyehé ch'án, ntáchro ch'án kixin:

—Chréhé tí janhan —ichro ch'án.

Ntá ch'ín Leví mé tuénxín k'uúinkatjen ch'án chréhé ch'án tí ch'ín Jesús.

¹⁵ A ntá ch'ín Jesús kjuák'e ch'án ntóe tí ch'ín Leví, la ntá kjuanjon sín nkehe sine ch'án la ko kjaxin k'uéjé nchónhya tí sín nchekjènkí la ko kjaxin í so chojni chónka jie. Mé kaín tí sín a mé tjejótxajin sín tjejóneko tí ch'ín Jesús la ko tí sín k'uájiko ch'án, kixin nchónhya chojni chréhé sín tí jehe ch'án. ¹⁶ Na ntá tí sín maestro tjako tí ley la ko tí sín fariseo k'uúikon sín kixin ch'ín Jesús tjejóneko kaín tí sín nchekjènkí la ko tí í so sín chónka jie, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuéntará neko ch'án la ko t'ikáe ch'án tí sín nchekjènkí la ko tí í so sín chónka jie? —ichro sín.

¹⁷ Na ntá ch'ín Jesús kuínhin ch'án nkehe tí tjo sín a. Ntá nixjehe ch'án tí sín a ntáchro ch'án kixin:

—Tí sín níehya t'ichjánxjenhya sín nkexro sich'e xroan. Náhi. Jehó tí sín níhi mé t'ichjánxjinhin sín nkexro sich'ehe sín xroan. Janhan na k'uúinkahya ntihi kixin chrók'uúyaha chojni jina tjejó sín. Náhi. K'uúinka kixin ts'iyaha chojni chónka jie —ichro ch'án.

Tjanhankíhi sín tí ch'ín Jesús kixin á chrókjónehya sín tió tsonixjehe sín Dios
(Mt. 9.14-17; Lc. 5.33-39)

¹⁸ Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuénté yaon kixin mé xíkaha ts'áyehé sín kjuaxróxin, ichro sín. A ntá kui iso chojni nixjehe sín tí ch'ín Jesús ntáchro sín kixin:

—¿Nkeuènté kixin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

¹⁹ Ntá kjuátehe ch'ín Jesús ntáchro ch'án kixin:

—¿Xá chrókjónehya tí chojni tsík'íyehé sín kóchjina ijnko kia tsotéhe chojni tí naxá tjejóko sín tí nkexro tsotéhe? Tí naxá tjen tí nkexro tsotéhe la xitjahya kixin chrókjónehya sín. ²⁰ A ntá itsi ijnko yaon itsi chojni sátsjiko sín tí ch'ín tsikótehe, ntá tí yaon la chaxín sinehya sín.

²¹ 'Ninkexró chrókjuak'eniéhe ijnko ka ó ntaxin it'ó ka nixin kixin ntá chrókjuixéhe tí ka nixin ntá antsí má chrók'uichje tí ka ntaxin a. ²² La ko kjaxin ninkexró chrókjuikjá xran vino nixin ijnko tjuaxran ó ntaxin; kixin tí xran vino nixin la chrókótséche tí tjuaxran ntaxin ntá chrók'uitjáyan tí xran la ko tí tjoa. Méxra tí xran vino nixin chrókuika ijnko tjuaxran nixin —mé xikaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigó ijnko yaon t'ók'éhe sín (Mt. 12.1-8; Lc. 6.1-5)

²³ Ijnko yaon t'ók'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte sín noatrigó. Na ntá tí sín k'uájiko ch'án kjuankixin sín ik'uín sín iso noatrigó. ²⁴ Na ntá iso tí sín fariseo kjuanchankíhi sín tí ch'ín Jesús a kixin:

—¿Nkeuènté kixin tí sín xrikoa tjejóch'e sín xra ijie? Na mé kohya kjuachaxin tsonhen xra tí yaon t'ók'éheni —ichro sín.

²⁵ Ntá kjuátehe ch'án ntáchro ch'án kixin:

—¿Á kjuínchekuáxinhyará jahará tí xron chrónka nkehe kjuich'e ch'ín David la ko tí sín k'uájiko ch'án tí k'uén sín kjinta? ²⁶ A ntá jehe ch'án k'uixenhen ch'án ntóe Dios tió kjuák'e nchat'á Abiatar k'uetóan, a ntá kióné ch'án tí niotja tsikóyaon kjónté jehó tí sín nchat'á mé k'uéchóna kjuachaxin sine sín la kjaxin chjéhe ch'án tí sín k'uájiko ch'án* —ichro ch'ín Jesús.

²⁷ Kjaxin ntáchro ch'ín Jesús kixin:

—K'óna tí yaon ts'ók'éhe chojni kixin t'ichjánxin sín, la jehya kixin chrókjuikosáyehe tí yaon a. ²⁸ A ntá tí Xjeen Dios K'óna Chojni mé chóna kjuachaxin ts'etóan nkehe tsonhen tí yaon t'ók'éheni —ichro ch'án.

3

Ijnko chojni tsixámá tja (Mt. 12.9-14; Lc. 6.6-11)

¹ Ntá ch'ín Jesús k'uixenhen ch'án ijnko nínko Israel inaá. Na mé ntiha tjen ijnko ch'ín tsixámá ijnko tja ch'án. ² Na ntá kóchjina iso chojni tsáyehe sín ch'ín Jesús ts'íkon sín kixin á sinchekitohe ch'án jina tí ch'ín tsixámá tja tí yaon t'ók'éhe sín kixin mé jina tsjanchia sín jie, ichro sín. ³ Ntá ch'ín Jesús mé ntáche ch'án tí ch'ín tsixámá tja a kixin:

—T'inkatjen, tjak'e jnkosiné ntihi —ichro ch'án.

⁴ A ntá kjuanchankíhi ch'ín Jesús tí sín sín ntiha kixin:

—¿Nkehe siín kjuachaxin tsonhen tí yaon t'ók'éheni? ¿Á chrókjuich'eni tí jina ní ó á chrókjuich'eni tí jínahya? ¿Á chrókjuinchekitoheni chojni jina ní ó á chrók'óyánni chojni? —ichro ch'án.

A ntá jehe sín la tánikóá sín. ⁵ Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsikonóehé sín chojni. Na ntá k'uetuénhen ch'án tí ch'ín a kixin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóhe tja ch'án jina. ⁶ Na ntá tí sín fariseo a k'uaxrxéjin sín nínko sákjuí sín k'uito sín tí sín kuénte ch'ín Herodes ntá kjuenkayáxinko kichó sín kixin nkexrí chrók'óyán sín tí ch'ín Jesús.

Nchónhya chojni siín chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea ⁸ la ko chjasin Jerusalén la ko estado Idumea la ko ikjé sín kjuixín sín nó tóhe ntarío Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsikinhin sín kixin nkexrí tí kjuaxroan jie kjuasin ch'ín Jesús ntá kuichréhe sín ch'án kixin chrók'uikon sín tíha kjaxin. ⁹ Ntá k'uetuénhen ch'án tí sín k'uájiko ch'án a kixin ntahó chrókjuak'echonhen sín ijnko ntabárcó. A ntá tí imá chrók'uixitja sín ch'án ntá chrók'uixenhen ch'án tí ntabárcó, a ntá ntiha chrókjuak'e ch'án tsochrónka ch'án. ¹⁰ Kixin itsjé chojni tsíkjinchekitohe ch'án jina, na ntá kaín xin tí sín nihi k'uixitja sín ch'án kixin tjinkaon sín chrókuák'óxin sín ch'án. ¹¹ Kjaxin tí sín chóna nchakuen tí jínahya na mé tió k'uíkon sín tí ch'ín Jesús ntá k'uéjoxin sín toch'ín sín nkeyakon ch'án. Ntá k'óyako tí nchakuen tí jínahya a ntáchro kixin:

* 2:26 1 Samuel 21.1-6; Levítico 24.5-9

—Jaha mé tí Xjeen Dios.

¹² A ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án
(Mt. 10.1-4; Lc. 6.12-16)

¹³ A ntá chr'èxin chrin ch'ín Jesús ijnko jna, a ntá ntiha k'uíyehé ch'án tí sín tjinkaon ch'án chrók'uajiko ch'án ntá kóchjinehe sín ch'án. ¹⁴ Ntá kjueyá ch'án teyó tí sín ts'ajiko ch'án kixin ts'etuenhen ch'án sín sátsji sín tsjako sín tí tan jína. ¹⁵ Kjuanjon ch'án kjuachaxin sinchekitohe sín chojni níhi jína la ko tsakitsje sín nchakuen tí jínahya chóna chojni. ¹⁶ A ntá tí sín í mé tí teyó sín tsikjeyá ch'án mé it'in sín xikihí: Simón na mé kjuínchek'in ch'án Pedro; ¹⁷ la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjéxin kixin Xjeen Sítjonta. ¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuente tí sín cananista, ¹⁹ la ko Judas Iscariote, mé kjuínchekji tí ch'ín Jesús chr'èxin.

Ntácho sín kixin ch'ín Jesús chóna kjuachaxin kuente tí jínahya
(Mt. 12.22-32; Lc. 11.14-23; 12.10)

Na ntá chr'èxin ch'ín Jesús la ko tí sín k'uájiko ch'án k'uixenhen sín ijnko nchia. ²⁰ A ntá inaá kójinkotsé nchónhya chojni, a ntá xitjahya sine sín. ²¹ Ntá kónohe tí sín naxá kjéhya ch'ín Jesús ntá ikui sín sátsjiko sín ch'án kixin ntácho sín kixin ó tsik'ixikján ch'án.

²² Kjaxin tí sín tjako tí ley kuxin sín Jerusalén, ntácho sín kixin:

—Tí ch'ín í chóna ch'án tí ch'ín Beelzebú, mé ch'ín Tsochren, mé tí nkexro t'etuenhen kaín tí nchakuen tí jínahya ntá xikaha tjacha ch'án takitsje ch'án nchakuen tí jínahya a —ichro sín.

²³ Ntá ch'ín Jesús k'uíyehé ch'án tí sín ntá kjuíncheyóxin ch'án ntácho ch'án kixin:

—¿Nkexrí kixin jnkokón ch'ín Tsochren chrókuakitsje asén? ²⁴ A ntá tí sín t'etöan ijnko naciön tjanjonko kichó la tsjachahya ts'etöan. ²⁵ La ko kjaxin tí sín jnkokóá ntöe jnkokóáhya tjenkayáxin sín ntá xitjahya ts'ejóko kichó sín. ²⁶ A ntá tí chaxin ch'ín Tsochren jnkokónhya tjenkayáxin tjanjonko kichó la ntá ts'itjayan kjuachaxin kuente.

²⁷ 'Ninkexró tsjacha ts'ixenhen ntöe ijnko chojni jiehe kixin ts'axrjehe tí nkehe chóna ch'án. Náhi. T'ichjánxin sqoxin sinchenteto ch'án tí ch'ín jiehe kixin jína tseéhe ch'án nkehe chóna tí ch'ín a.

²⁸ 'Ijnko nkehe chaxin tsotjonkará kixin tió tsoxraxinkaon ijnko chojni tí jie chóna la ko tsochronóehé Dios la ntá tsjakjinhin ch'án kaín tí jie la ko kaín tí nkehe jínahya tsintácho sín. ²⁹ A ntá tí nkexro ts'ántaxinhin tí Nchakuen Dios na mé xitjahya tsjin tí jie na mé jnkochrixin tsochóna sín tí jie a —ichro ch'án.

³⁰ Mé xikaha ichro ch'án kixin tí sín a tsintácho sín kixin ijnko nchakuen tí jínahya mé chóna tí jehe ch'án.

Tí iné la ko kichó ch'ín Jesús
(Mt. 12.46-50; Lc. 8.19-21)

³¹ A ntá kui iné ch'ín Jesús la ko kichó ch'án tjejó sín ntója ó na ntá k'uëtuenhen sín ijnko chojni tsjik'iyehé ch'án. ³² A ntá tí sín tjejótxajin tí tjen ch'ín Jesús ntiha chénka sín ch'án kixin:

—Iná la ko kichúa tjejó sín ntója xritjeyá sín tí jaha. —ichro sín.

³³ Ntá ntácho ch'án kixin:

—Xá nkexro tí nana la ko nkexro tí kichiná? —ichro ch'án.

³⁴ Ntá komá ch'án tí chojni tjejótxajin tí tjen ch'án ntá ntácho ch'án kixin:

—Jahará mé nana la ko kichiná. ³⁵ Kaín tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

4

Kjuíncheyóxin ch'án éxi ijnko chojni t'enka nonte
(Mt. 13.1-9; Lc. 8.4-8)

¹ Ch'ín Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójinkotsé nchónhya chojni tí tjen ch'án. Ntá ijnko ntabarco tjenkátaön ntá k'uit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsikójinkotsé mé kuitöhe sín chrínta ntayaon k'uéjókínhin sín. ² Nchónhya nkehe kjuako ch'án kjuíncheyóxin ch'án. Ntá ntácho ch'án kixin:

³ —Tinhínrá tíhi: Ijnko chojni sákjuik'enka nontee. ⁴ Mé xikaha sákjuik'enka ch'án iso tí noatrigo a. Ntá iso noa la tsik'ánotjen ntja ntá kui koxroxé k'uúinká va tí noa. ⁵ A ntá iso noa na mé k'uitji chrík'á xrö tí kohya itsjé nche ntá tjoka k'uayan kixin tjínhya chóna nche. ⁶ A ntá tió kjuíton yaon la ntá tí ka la chján; la ko chónahya nuée a ntá xamá. ⁷ A ntá í so na kjuítsinkak'á tí siín kach'í la ntá tí kach'í k'uáankí la ntá tí noa í k'ónahya kixin síja tí kach'í. ⁸ A

ntá iso tí noa k'uúitji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

Ch'in Jesús chronkaxín nkexrí t'axrxjén tí nkehe ntáchro ch'án

(Mt. 13.10-17; Lc. 8.9-10)

¹⁰ A ntá chr'éxin, tió kuitóhe ch'in Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrxjén tí nkehe kjuíncheyóexin ch'án. ¹¹ Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuènte tí kjuachaxin kuènte Dios, a ntá tí sín titekakonhya la ó kjuíntayóaxuán káin nkehe kuínhin sín. ¹² Kixin kjónté ts'ikon sín la éxi k'uikonhya sín, la ko kjónté tsinhin sín la tsienxínhya sín kixin ntá chrók'uixitoxínhya tí tjenkayáxin sín a la ko chrókjuínhya tí jije sín* —ichro ch'án.

Ch'in Jesús chrónkaxín nkexrí t'axrxjén tí nkexro sákjuik'enka

(Mt. 13.18-23; Lc. 8.11-15)

¹³ Ntá ntáche ch'án sín kixin:

—¿Á kiénxinhará jahará nkexrí t'axrxjén tí nkehe kjuíntayóaxian ní? ¿A ntá nkexrí chrókiénxinrá tí í so nkehe naxa sintayóaxian? ¹⁴ A ntá tí nkexro sákjuik'enka tí tje a mé yóhe ijnko nkexro sákjuikjako itén Dios. ¹⁵ A ntá iso chojni la éxi tí tje kjuítsínka ntá; kixin kuínhin sín itén Dios, ntá chr'éxin ó kui ch'in Tsohren kjuínchek'itjayan ch'án tí tan jína kuínhin sín. ¹⁶ A ntá í so chojni la éxi yóhe tí tje kjuítsínkak'á xro: mé kuínhin sín itén Dios ntá tjoka kóxrjinhin sín kuitekaon sín. ¹⁷ Kjánchó nínkahya chóna nuèe, a ntá séhya kuitóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios. ¹⁸ A ntá í so chojni la éxi yóhe tí tje k'uínka chrik'á kach'í na mé kuínhin sín itén Dios ¹⁹ kjánchó tóxakonhen sín tí nkehe siín chjasintajni la ko tí nkehe tje té tóxrjinhin sín la ko tjinkaon sín tsochóna sín káin xín nkehe. Káin tíha mé t'ínkákonhen tí itén Dios kuínhin sín a, la tí chojni xikaha la xitjahya sich'ehe sín xra Dios. ²⁰ A ntá í so chojni kuínhin tí itén Dios na kuinkáchónki sín la ntá xikaha jína ch'ehe sín Dios xra. La iso sín la éxi yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xikaha ichro ch'in Jesús.

Ch'in Jesús mé kjuíncheyóexin éxi ijnko xrohi tjeche

(Lc. 8.16-18)

²¹ Kjaxin ntáchro ch'in Jesús kixin:

—¿Á chrókuikaonni xrohi tjeche chrókuak'emá chrínki ntacajón o chrínki cama? Kjá náhi. Tí xrohi la noi chrókuak'e ts'ínkaséyanxin. ²² Mé xikaha káin tí nkehe tjejomá jie tsonoxín chr'éxin la ko káin tí nkehe ninkexró noehya jie la tsonoxín chr'éxin. ²³ A ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kixin:

—Chrókuenkayáxinrá jína tí nkehe tjejótinhrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhéra tí jahará tjejontinhrá. ²⁵ A ntá tí nkexro chóna nkehe la antsí má ts'ayéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'in Jesús mé kjuíncheyóexin ch'án éxi ijnko tje ts'ayan ts'ánkí

²⁶ Kjaxin ntáchro ch'in Jesús kixin:

—Tí kjuachaxin t'etóan Dios tóyóhe ijnko chojni sátsjik'enka nonte. ²⁷ Ntá sákjuik'ajua ch'án tí tie la ko k'uàya ch'án tí nchítjen. A ntá xikahó k'uátsínka iso yaon la ko iso tie, a ntá tí tje la k'uayan la k'uánkí. A ntá tí nkexro k'uénka la noehya ch'án nkexrí kónhen tíha. ²⁸ A ntá tí nche mé kjuíuch'e xra jehó. Senó k'uayan tí chaon tí ka, a ntá kjuíntaa, a ntá chr'éxin icha tí noa tsjinjin; ²⁹ a ntá tió tsícha tí noa, a ntá tsakjinjin sín tí noa kixin ó kjuixraká tí yaon tsojtá sín.

Ch'in Jesús kjuíncheyóexin ch'án éxi ijnko tje it'in mostaza

(Mt. 13.31-32; Lc. 13.18-19)

³⁰ Kjaxin ntáchro ch'in Jesús kixin:

—¿Nkehe chrókóyóhe tí kjuachaxin t'etóan Dios, nkehe chrókóyóexin tíha? ³¹ Mé éxi yóhe tí tje it'in mostaza tsík'ínka nonte. Tíha mé ijnko tje imá ntsí, a ntá tí í so tje siín chjasintajni la kénhyó. ³² A ntá jnkonaá tsík'ínka tí tje la tsík'ayan tsík'ánkí imá íhyé, a ntá tí í so nta la

* 4:12 Isaías 6.9-10

kánhyó. A ntá kjaxin tí chaon tí nta tsík'ánki imá ihyé, a ntá kjónté koxroxé xritjaka la jína ts'okl'éhe va chrínki tí ts'van chaon tí nta.

Nkehe tí xra kjuíche tí nkehe kjuíncheyóexin ch'ín Jesús
(Mt. 13.34-35)

³³ Mé xíkaha ch'ín Jesús kjuákohe ch'án tí jehe sín, kjuíncheyóexin ch'án nchónhya nkehe éxi tí nkehe a kixin chrókuacha chrókiexín sín tíha. ³⁴ Káinxin nkehe kjuákohe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjéxin káin tí nkehe kjuíncheyóexin ch'án.

Ch'ín Jesús k'uetuēnhen ch'án tí xrinto la ko tí ntá síchrica kixin ts'ixita
(Mt. 8.23-27; Lc. 8.22-25)

³⁵ A ntá tí yaon a la ntá ó kontó ntá ntáche ch'ín Jesús tí sín k'uájiko ch'án a kixin:
—Sátsjini tóhe tí ntayaon —ichro ch'án.

³⁶ Ntá kútohe sín káin tí chojni a ntá sákjuiko sín tí ch'ín Jesús naxa tjenkáya ch'án tí ntabárcó la ko kjaxin í so ntabárcó sákjuí kóí. ³⁷ Ntá xríngaha tjan chjéhe xrinto la ntá síchrica ntá t'ixenhen tí ntabárcó, ó mero tsókaón ntá tí ntabárcó. ³⁸ A ntá ch'ín Jesús na mé tjeua ch'án tí tjar'i nóton tí tjejó sín nkaxenhen tí ntabárcó a tjejkón ch'án ijnko ka. Na ntá kjuíncheyóexin sín ch'án ntáchro sín kixin:

—Maestro! ¿Á ntósán kixin ts'itjáyanni, ts'aniánkini ntá ní? —ichro sín.

³⁹ A ntá ch'ín Jesús k'uàya ch'án, k'uetuēnhen ch'án tí xrinto la ko tí ntá kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xrinto la ko tí ntá k'uúxratá. ⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuènté kixin imá chrakonrá? ¿Á naxa tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kíchó sín kixin:

—¿Xá nkexro tíhi? Kjónté xrinto la ko ntayaon la mé kjuínchexiteyéhe ch'án —ichro sín.

5

Ijnko chojni chóna nchónhya nchakuen tí jínahya nonte Gadara
(Mt. 8.28-34; Lc. 8.26-39)

¹ Ntá tió k'uátóye sín tí ntayaon, a ntá kjuíji sín tí nonte Gadara. ² Ntá k'uínkajinxin ch'ín Jesús tí ntabárcó a. Ntá xríngaha xeta ch'án ijnko ch'ín kjuíxin nó tsíkijxravá chojni mé chóna ch'án ijnko nchakuen tí jínahya. ³ Tí ch'ín a mé kjuák'e ch'án tí tsíkijxravá chojni. Ninkexró tjachahya sinchenteto ch'án kjónté cadena tjachahya. ⁴ Nchónhya veces kjuínchenetoxín sín ch'án cadena toté ch'án la ko itja ch'án, la kjónté kóchríton ch'án kjuínchekuen ch'án tí cadena. Kohya ninkexro tjacha ts'etuēnhen tí jehe ch'án. ⁵ K'uék'aji ch'án nchakotjin la ko tie t'iyato ch'án nó jna la ko tí tsíkijxravá chojni la ko chjéhe asén ch'án xro. ⁶ Na ntá k'uikon ch'án kixin kui ch'ín Jesús kjónté ikjin la kuinká ch'án kjuíji ch'án kjuák'exin toch'in ch'án nkayakon ch'ín Jesús a ⁷ k'óyako ch'án ntáchro ch'án kixin:

—¿Nkekuènté tjiaté jaha tí jeheni, jaha Jesús Xjeen Dios tjen nkaya nkajni? Dios nchenoheni kixin xrjanógha nchekjasótehyani —ichro ch'án.

⁸ Mé xíkaha ichro ch'án kixin tsintáchro ch'ín Jesús kixin:

—Jaha nchakuen tí jínahya, tjtóhé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátéhe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntá imá chrónóehé ch'án tí ch'ín Jesús kixin tsochr'ánhya ch'án ókjé tí nchakuen tí jínahya. ¹¹ Na ntá síin nchónhya cochíno xrine va chjinaxón tí jna ntíha. ¹² A ntá chrónógha tí nchakuen tí jínahya ntáchro kixin:

—Tétuēnhéni sátsjini tí síin tí cochíno, tjtóhé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjón ch'án kjuachaxin. Ntá káin xín tí nchakuen tí jínahya a mé k'uaxrjéxin tí ch'ín a sákjuí kjuík'ixenhen tí cochíno a. Na ntá káin xín tí ko a mé chjina iyó míl va síin va xrine va. Na mé káin xín va k'uínkajinxin va ntíha kjuítsínkayá va tsáka ntá kjuítsínkankí va ntayaon ntá kjuínhin va ntá.

¹⁴ Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka sín chjasén sín la ko nqntee chojni. Na ntá itsjé chojni mé kuitsjehe sín nkehe tí tsíkónhen ntíha. ¹⁵ Ntá kjuíji sín tí tjen ch'ín Jesús a na k'uikon sín kixin itjen tí ch'ín k'uéchóna tí nchónhya nchakuen tí jínahya senó la ó jina tjen ch'án tjetjaxin ch'án tjenkáya ch'án iké

ch'án, na ntá chrakon sín. ¹⁶ A ntá tí sín tsík'ikon mé chrónka sín nkexrí k'uék'aji tí ch'ín k'uéchónta tí nchakuen tí jínahya la ko nkexrí kónhen tí cochíno a. ¹⁷ Ntá kjuankíxin sín chrónóehé sín tí ch'ín Jesús a kíxin sáchrókjuixín ch'án ntiha.

¹⁸ A ntá ó tsít'ótjen ch'ín Jesús tí ntabárcó na ntá tí ch'ín k'uéchónta nchakuen tí jínahya na mé chrónóka ch'án kíxin kjaxín ch'án sáchrókjuiko sín ch'án, ichro ch'án. ¹⁹ Ntá ch'ín Jesús kjuanjónhya ch'án kjuachaxín sátsjiko sín ch'án. Náhi. K'uetóan ch'án kíxin:

—Sátjia ntója tjíchenka tí sín náxa kjéhya tí jaha kíxin nkexrí kaín tí kjuaxroan jíé kjuasin Dios kjuínchekitóha jína kuíkonóaha ch'án tí jaha —ichro ch'án.

²⁰ Na ntá tí ch'ín a sákjuí ch'án kjuankíxin chrónka ch'án kaín tí chjasin kuénte Decápolis kíxin nkexrí kaín tí nkehe kjuích'e ch'ín Jesús kjuínchekitóhe ch'án jína. A ntá kaín tí sín kuínhin na chrakon sín.

Tí xjeen ch'ín Jairo la ko tí tjan kuákóxin iké ch'ín Jesús

(Mt. 9.18-26; Lc. 8.40-56)

²¹ Ntá tió xíkjanqao ch'ín Jesús tí ntabárcó tóhe tí ntayaon inaá ntá kóhchina nchónhya chojni ntá ntáhó chrinta ntá kuitóhe ch'án inaá. ²² Na ntá ikui ijnko ch'ín t'etóan kuénte njnko mé it'in ch'án Jairo. A ntá tió k'uíkon ch'án kíxin itjen ch'ín Jesús ntá kjuák'exín toch'in ch'án chrínki tóté ch'ín Jesús a ²³ imá chrónóehé ch'án kíxin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'éta itjá chrítaón kja xjan ntá chrókuitóhe xjan jína —ichro ch'án.

²⁴ Ntá ch'ín Jesús sákjuiko tí ch'ín a. Na nchónhya chojni chréhe sín tinkák'ixitja sín ch'án inaá. ²⁵ A ntá kjaxín tjenkákjan sín ijnko chojni chjin níhi tjan, ó chónka teyó nánó sítji tjan jni. ²⁶ Imá tjote tjan kíxin nchónhya chojni kjuanjón xroan kónhen tjan na ó kjuixín kjuéhe tjan kaín xín nkehe k'uéchónta tjan. Ó jehí títóehya tjan jína la íchá ntsí tinkákótáo tjan. ²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kúí tjan kjuák'enkákjan tí chojni kóhchina nóton ch'ín Jesús ntá kuákóxin tjan tí ké ch'án, ²⁸ ntáchro tjan kíxin kjónté iké ch'án ó chrókuaókóxin tjan na ó tíhó mé chrókuitóhe tjan jína, ichro tjan. ²⁹ Ntá tuénxín tí jni na mé ó kjuixié tjan la ko kónohe tjan kíxin ó kjuixín kuitóhe tjan jína tí chin k'uéchónta tjan. ³⁰ Ntá ch'ín Jesús na ó kónohe ch'án kíxin kjuachaxién ch'án mé kuitóexín ijnko chojni jína ntá kuínkátjía ch'án kjuanchankíhi ch'án tí chojni síin a kíxin:

—¿Nkexro kuákóxin tí kaná? —ichro ch'án.

³¹ Ntá kjuátéhe tí sín k'uajiko ch'án a ntáchro sín kíxin:

—Ó noha kíxin nchónhya chojni sítja, ¿ntá nkekuénté kíxin náxa tjanchankiá kíxin nkexro tí kuákóxin? —ichro sín.

³² Ntá kuínkátjía ch'án tsjehe ch'án nkúixín kíxin tsonohe ch'án nkexro tí kuákóxin tí ké ch'án. ³³ Ntá tí tjan a na mé chrakon tjan síxranka tjan ó nohe tjan kíxin ó kuitóhe tjan jína ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan. ³⁴ Ntá ntáchro ch'ín Jesús kíxin:

—Xjeenni, kaín asán kuínkachónkia tí janhan ntá kuitóha jína. Ijie la kjuaxróxin sátsjia ntója la ó kuitóha jína a —ichro ch'án.

³⁵ Na ntá náxa tjenixja ch'án ntá ó kui chojni kujín sín ntóe tí ch'ín t'etóan tí njnko. Ntá chénka sín ch'án kíxin:

—Xjaan na ó kjuixín k'uén. ¿Nkekuénté náxa chjehé xra tí Maestro a? —ichro sín.

³⁶ Ntá ch'ín Jesús na ántosén ch'án tí chrónka sín ntá nixjehe ch'án tí ch'ín t'etóan tí njnko ntáchro ch'án kíxin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjónhya ch'án kjuachaxín kíxin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín. ³⁸ Na ntá tió kjuíji sín tí ntóe tí ch'ín t'etóan tí njnko na k'uíkon sín kíxin imá sítjité sín tsjánkamá sín tí xjan a. ³⁹ Ntá k'uixenhen ch'ín Jesús nchia kjuanchankí ch'án kíxin:

—¿Nkekuénté ánta tjasitérá tsjánkamará tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'uetóan ch'án kíxin kaín sín sátsji sín ntója. Ntá kjuiko ch'án tí it'é la ko tí iné xjan la ko tí iy'á sín xriko ch'án ntá k'uixenko sín ch'án tí tjen tí xjan a. ⁴¹ Itsé ch'án tja xjan ntá nkívge xjan mé nixjeexín ch'án ntáchro ch'án kíxin:

—Talita, cumi —mé t'axrxéxín kíxin: Lonchí, tétuanhan kíxin t'áya.

⁴² A ntá tí xjan a ó chónka tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni síin ntiha la chrakon sín k'uíkon sín xíkaha. ⁴³ Ntá fuerte k'uetóan ch'ín Jesús kíxin chróchenkahya sín nínkexró. La kjaxín k'uetóan ch'án kíxin tsjanjon sín nkehe sine tjan.

6

Ch'in Jesús kjuák'e ch'án chjasin Nazaret
(Mt. 13.53-58; Lc. 4.16-30)

¹ A ntá chr'éxin k'uaxrxéxin ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkíxin ch'án. ² Na ntá tió kui tí yaon t'ók'éhe sín ntá kjuankíxin ch'án kjuakoxín ch'án tí nínko ntiha. Na ntá nchónhya chojni kuínhin sín ntá chrakon sín ntáchro sín kíxin:

—¿Nketí tsíxrakohé tí ch'in i kaín tíhi? ¿Nketí kuixín tí kjuaxrexinkaon chóna ch'án la ko tí kjuaxroan tjasin ch'án? ³ ¿Á jehya ch'án tí ch'in ch'éna nta na mé xjeen tí tjan María, la tí kíchó ch'án a na mé ch'in Jacobo, la ch'in José, la ch'in Judas, la ch'in Simón? ¿A kjaxinhya ntihi tjejókoní tí kíchó ch'án chjin? —ichro sín.

Méxra tahya sín kuentá nkerí ch'e ch'án. ⁴ Na ntá ntáchro ch'in Jesús kíxin:

—Kaín chojni tjkosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntqé ch'án na mé tjkosáyeheya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án ch'raóna ikja iso chojni níhi kjuinchekitóhe ch'án sín jina. ⁶ Ntá chrakon ch'án kíxin xíkaha kuítekakuenhya sín ch'án. Na ntá k'uáji ch'án tí chjasin tsínsí chjinaxón ntiha kjuako ch'án.

Ch'in Jesús mé ichr'án tí teyó sín kíxin sátsji sín tsjikjako sín itén Dios
(Mt. 10.5-15; Lc. 9.1-6)

⁷ Na ntá k'uíyehé ch'in Jesús tí teyó sín k'uajiko ch'án a. Ntá kjuankíxin k'uetuénhen ch'án kíxin yóyó yóyó sín sátsji sín la ko kjaxin kjuanjon ch'án kjuachaxin kíxin tsakitsje sín nchakuen tí jínahya chóna chojni. ⁸ La ko k'uetóan ch'án kíxin ninkehó tsjikohya sín kuéte ntja. Jehó tí nta tjaxín sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. ⁹ Na ko tokaté ó tsjanka sín la ko tsjiko sín jehó tí ka tjejóya sín ó. ¹⁰ Kjaxin ntáchro ch'án kíxin:

—A ntá tí ts'ixenhérá ijnko nchia a ntá ntaha tsjanjon sín kjuachaxin na ntahó chókuitohará. A ntá tsjixinjian tí xra ntá sátsjixinrá ntiha. ¹¹ Na ntá tí tsjasánra ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákohérá sín na ntá t'axrxéxinrá tí chjasin a ntá ts'oxénjinrá tí nche chóna totárá kíxin xíkaha tsjákoxinrá kíxin ntoáhya kjuich'e tí jehe sín. A ntá chaxin ntáxrxjan kíxin tí yaon tsitogéxin ijíe chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuínkákjakohe sín tí chojni a kíxin mé chrókjuítóxinhin sín ntje sín. ¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuíkite sín itsjé chojni níhi a la ntá kuítóhe sín jina.

Ik'uéen ch'in Juan Bautista
(Mt. 14.1-12; Lc. 9.7-9)

¹⁴ Na ntá tí ch'in rey Herodes mé kuínhin ch'án nkehe tí kjuaxroan kjuasin ch'in Jesús. Na ntáchro ch'in Herodes kíxin:

—Kjá tí ch'in Juan Bautista mé ó tsíxechón ch'án inaá kíxin xíkaha tí kjuachaxin chóna tí ch'in a —ichro ch'in Herodes a.

¹⁵ A ntá iso sín ntáchro sín kíxin:

—Kjá ch'in Elías k'uéchrónka itén Dios —ichro sín.

A ntá í so sín mé ntáchro sín kíxin:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'in Herodes tíha ntá ntáchro ch'án kíxin:

—Kjá ó jehe tí ch'in Juan tí kuétoan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'in Herodes mé tsík'etqan ch'án kíxin tsontetoxín tí ch'in Juan cadena tsjak'echjina ch'án kíxin xíkaha tsíkjanhia tí tjan Herodías. A ntá tí tjan Herodías k'uéchjién tí ch'in Felipe. A ntá tí savé ch'án Herodes mé kuákja tí tjan a kíxin ts'óna ichjién ch'án. ¹⁸ A ntá tí ch'in Juan tsíntáche ch'án tí ch'in Herodes kíxin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xíkaha tí tjan Herodías mé imá kóninkakonhen tjan tí ch'in Juan ntá chrók'óyán tjan ch'án, kjánchó xitjahya ²⁰ kíxin tí ch'in Herodes mé chrakonhen ch'án tí ch'in Juan kíxin ó nohe ch'án kíxin tí ch'in a mé ijnko nkexro jina la ko tjóá asén la méxra kuítógehya ch'án kíxin jehe tjan chrók'óyán tjan ch'án. A ntá kénhyó kienxín ch'án la kjónté kórxjínhin ch'án tí nkehe kuínhin ch'án kjuako ch'in Juan. ²¹ A ntá tí tjan Herodías mé kjuacha tjan tí yaon kia tsíkjitoxínhin nánó tí ch'in Herodes a kíxin tsík'íyehé ch'án tí síxreé la ko tí sín k'uetuénhen tí sín soldado la ko tí sín t'etqan estado Galilea kíxin itsí sín ntqé ch'án kíxin síin kia. ²² A ntá tí

xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'in Herodes la ko kaín tí sín tjejóneko ch'án ntiha. Na ntá tí ch'in rey ntáche ch'án tí tjan tjarisoá a kixin:

—Tjanchana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntácho ch'án kixin tsjanjon ch'án tí nkehe tsjanchia tjan kjónté jnkosiné tí chjasin t'etáon ch'án. ²⁴ Ntá jehe tjan na mé kuínhin tjan ntá sákjuí tjan chénka tjan iné tjan kixin tsintácho ch'in Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí iné tjan mé ntácho kixin:

—Ijie la itja tjanchia tí kja tí ch'in Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjan tí ch'in rey, ntá ntácho tjan kixin:

—A ntá ijie tjinkaonni ijnko plato tsjak'enkáya ikja ch'in Juan Bautista tsochjehéni —ichro tjan.

²⁶ Na ntá tí ch'in rey la mé imá k'uává ch'án kixin xikaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'iyehé ch'án, la ntá xitjahya tsontácho ch'án "Náhi" tí nkehe kjuanchia tjan. ²⁷ Na ntá tuénxín k'uetuenhen ch'án ijnko ch'in soldado kixin tsjikaó ch'án tí kja ch'in Juan a. ²⁸ Ntá tí ch'in soldado mé sákjuí ntøechiso, ntá kóchrínjin ch'án ikja tí ch'in Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuikénhen tjan iné tjan.

²⁹ Na ntá kuínhin kaín tí sín k'uék'ajiko ch'in Juan kixin xikaha tsíkónhen. Na ntá sákjuikáya sín tí cuérpøe ch'án ntá kjuikáyo sín ntá sákjuikjává sín.

Ch'in Jesús mé kjuanjon nkehe kjóne in'ó mil chojni
(Mt. 14.13-21; Lc. 9.10-17; Jn. 6.1-14)

³⁰ A ntá chr'exín tí sín k'uájiko ch'in Jesús a na mé ó kjan sín tí tjan ch'án inaá, chrónka sín nkexri tí xrá kjuich'e sín na ko nkexri kjuako sín. ³¹ A ntá ntácho ch'in Jesús kixin:

—Ts'axrjantani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntácho ch'án kixin sásitji la ko síti nchónhya chojni na ntá xrankahya ts'ejó sín sine sín. ³² Na ntá ch'in Jesús la ko tí sín k'uájiko ch'án jehó sín k'ujit'ótjen sín ijnko ntábárcø sákjuí sín ijnko nonte jehó tjan. ³³ Na ntá itsjé chojni k'uikón sín kixin sákjuí sín la ko kjuátsoan sín kixin ch'in Jesús. Ntá xrákuaxín sín chjasén sín kuinká sín na ntá senó kjuíji sín tí chrínta ntayaon tí tsjiji ch'in Jesús. ³⁴ Ntá k'uínkajinxín ch'án tí ntábárcø, a ntá k'uikón ch'án kixin nchónhya chojni síin ntiha ntá kuikonøehé ch'án tí jehe sín na mé éxi yóhé kolélo tjejó sín chóntahya va nkexro ts'ayakonhen va. Ntá kjuankixin ch'án kjuakohe ch'án sín nchónhya nkehe a. ³⁵ Na ntá ó kóntó na ntá tí sín k'uájiko ch'in Jesús a mé kóchjina sín tí tjan ch'án ntácho sín kixin:

—Ntá ó kóntó la kohya ninkexró tjejó ntihi ³⁶ na ntá jaha chrókujitøhé sín kixin sátsji sín tí chjasin chjinaxón a tsjik'ena sín nkehe kixin chóntahya sín nkehe sine sín —ichro sín.

³⁷ A ntá ch'in Jesús kjuátehe ch'án ntácho ch'án kixin:

—Chjehé sín nkehe sine sín —ichro ch'án.

Ntá kjuátehe sín ntácho sín kixin:

—¿Á tsjik'enani iyó ciento denario niotja tsochjehéni sín sine sín ní? —ichro sín.

³⁸ Ntá ch'in Jesús mé kjuanchankíhi ch'án sín kixin:

—¿Nkekjaín niotja chontará? Sátjitsjehérá —ichro ch'án.

Ntá sákjuitsjehe sín na ntá chrónka sín kixin:

—In'ó niotja la ko yaá koche mé síin —ichro sín.

³⁹ Na ntá k'uetøan ch'án kixin kaín xín sín chrók'uixitjaxín sín tí chrítaón tí ka yoa a. ⁴⁰ Na ntá xikaha kójnkojén sín ciento sín la ko cincuenta sín k'uixitjaxín sín. ⁴¹ Na ntá ch'in Jesús kuákja ch'án tí in'ó niotja na ko tí yaá koche ntá kónka ch'án nkajní ntá kjuanchia ch'án kjuasáyé Dios. Na ntá kóchrít'ø ch'án tot'ø tí niotja a ntá chjéhe ch'án tí sín k'uájiko ch'án kixin ts'óxikayehé sín sine tí sín síin a la ko kjaxin kóchrít'ø ch'án tí yaá koche ntá k'óxikayehé sín kixin sine sín kaín sín. ⁴² Ntá kaín xín sín kjóne sín kókjehe sín. ⁴³ A ntá kjuixin kjóne sín ntá tí sín k'uájiko ch'in Jesús na mé kjuínchekaón sín teyó ntaxra tot'ø tí niotja la ko tí koche tsíxehé. ⁴⁴ A ntá tí sín kjóne na mé in'ó mil chojni ntoa.

Ch'in Jesús mé tjitaón ntayaon
(Mt. 14.22-27; Jn. 6.16-21)

⁴⁵ A ntá tuénxín k'uetuenhen ch'in Jesús tí sín k'uájiko ch'án kixin ts'it'ótjen sín tí ntábárcø a ts'atøye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuítóhe ch'án nixjehé ch'án kaín tí sín síin a. ⁴⁶ Kjuixin nixjehé ch'án sín na ntá jehe ch'án chríin ch'án ijnko jnã tsonixjeexín ch'án Dios. ⁴⁷ A ntá tió k'uixín tie ntá tí ntábárcø na mé ó kjuíji jnkosiné ntayaon, a ntá jehe ch'án jehó ch'án kjuíji ch'án chrínta ntayaon. ⁴⁸ Ntá kotohe ch'án k'uikón ch'án kixin imá xrá tjiko sín tí ntábárcø a kixin tí xrintø imá

chjéhe. Nantóye a mé sákjuíchréhe ch'án sín. Tótó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjui ch'án. ⁴⁹ A ntá tí k'uíkon sín kjuítaón ch'án ntá, ntá kjuenkayáxin sín kixin kjuacha sín, ichro sín, ntá k'óyako sín ⁵⁰ kixin kain sín k'uíkon sín ch'án la chrakon sín. Na ntá jehe ch'án mé tuénxin níxja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'ui't'ótjen ch'án tí ntabárcó tí tjejó sín, a ntá tí xrjnto la ó k'uixratá. Ntá imá chrakon sín kixin xikaha kónhen ⁵² kixin kienxinhya sín tí kjuaxroan kjuich'e ch'án kuènte tí niqtja kixin náxá kénhya asén sín kuinkáchónki sín ch'án.

Ch'in Jesús mé kjuínchekitqhe jina tí chojni nihi tí nonte Genesaret
(Mt. 14.34-36)

⁵³ Ntá tió k'uátóye sín tí ntayaon ntá kjuíji sín tí nonte Genesaret ntá kjuak'echroé sín tí ntabárcó a tí chrínta ntá. ⁵⁴ Na ntá tió k'uínkajinxín sín tí ntabárcó, a ntá tí sín sín nítiha tjoka kjuátsaon sín tí ch'ín Jesús. ⁵⁵ Ntá sákjuí sín nkuixín chjinaxón nítiha kjuankixin sín kuikao sín tí sínínihi tinkátsénki sín kuikao sín tí tjen ch'ín Jesús. ⁵⁶ La ko kain nketi kjuíji ch'án, á chjasin ntsí, á chjasin hyé, á nontee sín ó kjuíjiko sín tí sínínihi a chrínta ntá. Na ntá chrónóhehe sín tí ch'ín Jesús kixin kjónté chrínta iké ch'án ó chrókuákóxin sín, ichro sín. Na kain xín tí sín kuákóxin iké ch'án mé kuitqhe sín jina.

7

Tí nkehe nchekjita asén chojni
(Mt. 15.1-20)

¹ A ntá iso sín fariseo la ko iso tí sín tjako tí ley kuixín sín chjasin Jerusalén ntá kóchjinehe sín tí ch'ín Jesús. ² Tí sín a, tió k'uíkon sín kixin iso tí sín k'uájiko ch'ín Jesús mé k'óntihya sín tja sín na kjónté ine sín mé t'axrjéxin kixin kjuínchexiteyáhya sín tí ley, ntá kjonta tí sín a. ³ (Mé xikaha kjuich'e sín kixin tí sín fariseo la ko kain tí sín judío mé kuinkáchónki sín éxi k'uékjich'e tí sín táda ósé kixin ná t'ontó itja sín ntá sine sín. ⁴ Na ko tí tsokjanxin sín ntsin ná t'ónti sín ntá sine sín. Na ko kjaxin itsjé í so nkehe tinkáchónki sín, éxi tjonemá sín tí vaso t'iyá sín nkehe la ko tí nchésen la ko tí chj chjányan nkehe ne sín la ko tí kámé sín nchetjóá sín.) ⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuènté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjío ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátehe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchrónka iten Dios tsintáchro ch'án kixin ntoáhya tsjenkayáxinrá tí jahará kixin xikíhi tsíkjin sín ntáchro ch'án kixin:

Tí chojni tí chjasin í ir'va ó xraxinkakonxín sín tí janhan,

a ntá tí asén sín ikjin kuitqhe sín tí janhan

⁷ Méxra ó chónkó tóchjina sín xraxinkaon sín tí janhan,

kixin tí nkehe tjako sín la tí nkehe tsík'etqan chojni ó.*

Mé xikaha ichro itén Dios. ⁸ Ntá jahará kujtohérá tí nkehe tsík'etqan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'íará nkehe, la ko kjaxin í so nkehe yóhe tinkáchónkirá —ichro ch'án.

⁹ Kjaxin ntáchro ch'án kixin:

—Jahará chréhérá tí nkehe k'uékjich'e chojni ntá xikaha tjtóhérá ntáha tí nkehe tsík'etqan Dios. ¹⁰ Tsintáchro ch'ín Moisés kixin: “Tsochonteherá kjuasáyé it'ará la ko inará”, la ko “A ntá tí nkexro t'ántaxínjin it'é q iné la chrók'óyán sín.”† ¹¹ A ntá jahará ntáchrorá kixin ó nchoxon kixin ijnko nkexro tsochénta it'é la ko iné kixin: “It'eni, Ineni, chrokjuaHYA tsjnkjtsani tí jaha kixin kain tí nkehe chóntani mé k'óna Corbán” (mé t'axrjéxin kixin kain tí chichaon k'uáyéhe Dios). ¹² A ntá xikaha jnkójin nkexro tsontáchro ch'án tíhi ntá jahará tsontáchrorá kixin í t'ichjánxinhya tsjnkjtsa ch'án tí it'é ch'án la ko tí iné ch'án. ¹³ A ntá tí xikaha la tjtóhérá tí nkehe tsík'etqan Dios éxi sínkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhe tíha —ichro ch'ín Jesús.

¹⁴ Na ntá k'uíyehé ch'ín Jesús tí chojni inaá ntáchro ch'án kixin:

—Tínínrá kain rá tí nkehe ntáxrjan la ko tiénxínrá. ¹⁵ Tí nkehe ine chojni la jehya jje tíha. Tí nkehe t'axrjénxin asén chojni mé jje tíha. ¹⁶ Tí tjinkáonrá chrókuinhínrá la chrókuinhínrá —ichro ch'án.

* 7:7 Isaías 29.13 † 7:10 Éxodo 20.12; 21.17

¹⁷ A ntá tió kuitōhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uixenhen sín nchia. Na ntá kjuanchankíni sín ch'án kíxin nkexrí t'axrjéxín tí nkehe kjuako ch'án a. ¹⁸ Na ntá ntáchro ch'ín Jesús kíxin:

—¿Á kjaxinrá tiénxinhyará? ¿Á noahyará kíxin tí nkehe ineni na jehya jie ¹⁹ kíxin jehya asénni sátsji? Tí nkehe ineni na sáti nkaya tseeni na ko xik'axrje inaá —ichro ch'án.

Mé t'axrjéxín kíxin tí nkehe sineni la jehya jie.

²⁰ Ntá ntáchro ch'ín Jesús kíxin:

—A ntá tí nkehe t'axrjeníxin chojni na mé jie táha. ²¹ Nkaya asánrá mé t'axrjeníxin tí jínahya tjenkayáxinrá, la ko tí tjachehe kichuárá, la ko tí tjinkáonrá tsochontará chojni chjin ókjé, la ko tí t'oyán kichuárá ²² la ko tí chrókuéerá, la ko tí tjaké asánrá tí nkehe chóna ókjé sín, la ko tí jínahya ch'ehérá kichuárá, la ko tí kjuach'ia xríkoará la ko tí jínahya tjenkayáxinrá, la ko tí chjinóxinhanrá, la ko tí ch'énará kjuach'ia, la ko tí kjuahnke chontará, na kó tí chontahyará kjuaxrexinkaon jina. ²³ Kaín tí nkehe jínahya a mé t'axrjeníxin chojni, la mé tjasixín sín jie.

Jnko tjan tsíkijixin kjín mé kuítekaon tjan tí ch'ín Jesús

(Mt. 15.21-28)

²⁴ Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uixenhen ch'án ijnko nchia kíxin tjinkakonhya ch'án kíxin chrókónohe chojni kíxin ntaha tjen ch'án. Kjánchó xitjahya kjuák'emá ch'án ntiha. ²⁵ Na ntá ijnko iné ijnko tjan tjarisoá chóna ijnko nchakuen tí jínahya mé kuínhin nkehe tí xra' ch'e ch'ín Jesús kíxin tjasin ch'án kjuaxroan, ntá tuénxin kui tjan kjuák'exín toh'ín tjan chrínki toté ch'ín Jesús. ²⁶ Na mé jehe tjan tsíkijixin kjín, na mé tsíkijixin tjan nó nación Sirofenicia. Na ntá jehe tjan a mé kui tjan chrónóhe tjan tí ch'ín Jesús kíxin chrókuakítsje ch'án tí nchakuen tí jínahya chóna xjeen tjan.

²⁷ Ntá ntáchro ch'ín Jesús kjuátehe ch'án kíxin:

—Tjtohé senó chrókjóné tí xjan. Jehya tí jína chrókuakítsjaha xjan tí niotja ntá chrótjaha konja chrókjóné va —ichro ch'án.

²⁸ Ntá jehe tjan kjuátehe tjan ntáchro tjan kíxin:

—Chaxín xikaha, Inchéni. Kjánchó kjónté tí konja tjejoyánkí mesa ine tí tot'ó niotja tóxènjín tí chánjan —ichro tjan.

²⁹ Na ntá ntáchro ch'ín Jesús kíxin:

—Táha la chaxín ntoá ntáchrua. Sátjia kíxin tí nchakuen tí jínahya ó k'uaxrjéxín tí xjaan —ichro ch'án.

³⁰ A ntá tió kjuíji tjan ntōe tjan, na ntá k'uíkon tjan kíxin tí xjeen tjan na mé ó ntoá tjetsinkatá'á xjan tí cama kíxin ó tsik'axrje tí nchakuen tí jínahya a.

Ch'ín Jesús mé kjuínchekitohe jina ijnko ch'ín tienhya la ko nixjahya

³¹ Ntá ch'ín Jesús mé ó k'uaxrjéxín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea. ³² Ntá kjuíkaon sín ijnko ch'ín tienhya na ko ntoáhya nixja ch'án. Ntá chrónóhe sín tí ch'ín Jesús a kíxin tsjak'etja tja ch'án chrítaón kja tí ch'ín a kíxin tsitohe ch'án jina. ³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhen ch'ín Jesús tatsjon tí ch'ín tienhya. La ko kjaxín tí dedo tja ch'án mé kjuíkite ch'án ntaté ch'án ntá kjuínchekákóxin ch'án nejen tí ch'ín nixjahya a. ³⁴ Ntá konta ch'án nkajní k'uáváxin ch'án na ntá nixjehe ch'án tí ch'ín tienhya a, ntáchro ch'án kíxin:

—Efata —mé t'axrjéxín nkívee sín kíxin: ¡Tsoxitjehe!

³⁵ Na ntá tuénxin xitjehe tatsjon tí ch'ín tienhya ntá kuínhin ch'án la ko kuitōhe jína tí nejen ch'án, ntá jína nixja ch'án. ³⁶ Ntá ch'ín Jesús k'uetōan ch'án kíxin ninkexró tsochenkahya sín. Ntá kjónté imá k'uetōan ch'án ntá ántōsén sín kjónté ichá xrixronka sín. ³⁷ Na mé imá chrakon sín ntá ntáchro sín kíxin:

—Kaín nkehe ch'e ch'án la jina. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'ín Jesús mé kjuanjōn nkehe kjóné noó mil chojni

(Mt. 15.32-39)

¹ A ntá ijnko yaon nchónhya chojni k'uíxikóchjina inaá. A ntá chónahya sín nkehe sine sín. Na ntá ch'ín Jesús mé k'uíyehé ch'án tí sín k'uájiko ch'án, a ntá ntáchro ch'án kíxin:

² —Imá tjikonóaha kaín tí sín i kíxin ó ní yaon tjékjan sín ntihi ntá chónahya sín nkehe sine sín. ³ Ntá chrókuétuñhya sín sáchrókui sín ntōe sín tí naxa nehya sín kíxin ntja ó chrókótiñxin sín kíxin iso sín la imá kjín tsíkijixin sín —ichro ch'ín Jesús.

⁴ Na ntá kjuátehe tí sín k'uájiko ch'án ntáchro sín kíxin:

—¿Nkexrí chrókónoxín nchónhya niotja chrókjóne kaín tí sín a kixin kohya nchia tí tjejóni? —ichro sín.

⁵ Na ntá ntáchro ch'ín Jesús kixin:

—¿Nkekjaín niotja chontará jahará? —ichro ch'án.

Ntá jehe sín kjuátēhe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesús k'uetuēnhen ch'án kaín xín sín kixin ts'ixitjaxín sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'ó ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxikayehe sín tsakja kaín xín tí sín siín a. ⁷ Na ko iso koche ntsínsí chóna sín. Ntá ch'ín Jesús kjuanchia ch'án kjuasáya ntá k'uetōan ch'án ts'óxikayehe sín kjaxin. ⁸ Na mé kaín xín sín kjóne sín na kókjehe sín. Ntá chr'éxin naxa kjuínchekaon sín yato ntaxra tí tot'ó tí nkehe tsíxehe. ⁹ Na mé chjina noó mil chojni kjóne sín. Ntá ch'ín Jesús mé niixjehe ch'án sín sákjuí sín ¹⁰ ntá tuénxín jehe ch'án la ko tí sín k'uájiko ch'án na mé k'ujit'ótjen sín tí ntabárcō a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jié

(Mt. 16.1-4; Lc. 12.54-56)

¹¹ Na ntá kui iso sín fariseo kjuankixin sín tjo sín tí ch'ín Jesús kjuanchehe sín ch'án kixin chrókuaxōxin ch'án ijnko kjuaxroan jié kuēntē nkaya nkajni kixin tjinkaon sín chrókuaxōxin sín ch'án. ¹² A ntá ch'ín Jesús na mé k'uávaxín ch'án ikjín kjanxin asén ch'án ntá ntáchro ch'án kixin:

—¿Nkeuēntē kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjākōxinhya —ichro ch'án.

¹³ Na ntá kuítōhe ch'án tí sín a, ntá xik'it'ótjen ch'án tí ntabárcō ntá sákjuí ch'án í jnko tóhe ntayaon inaá.

Tí xroān nchek'ánkí tí niotjé tí sín fariseo

(Mt. 16.5-12)

¹⁴ Ntá k'uitjāyēnhen sín tsíkjikohya sín nkehe sine sín. Jehó jnkokoá niotja chóna sín nkaxēnhen tí ntabárcō a. ¹⁵ Ntá ch'ín Jesús k'uetuēnhen ch'án tí jehe sín kixin:

—Chrókóxakonhanrá kixin tí xroān nchek'ánkí niotjé tí sín fariseo la ko niotjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kíchó sín kixin:

—Mé xikaha ichro ch'án kixin tsíkjikohyani niotja.

¹⁷ Ntá kónohe ch'ín Jesús kixin nkehe tí kjo sín kíchó sín ntá ntáchro ch'án kixin:

—¿Nkeuēntē tjórá kixin chontahyará niotja? ¿Á naxā tiénxinyará la ko naxā noahyará?

¿Á kénhya asánrá tinkachónkirá Dios? ¹⁸ ¿Á t'ikonxinyará ikonrá la ko á tiénxinyará tátsjinrá? ¿Á xráxinkákonhyará? ¹⁹ Tió kóchrít'vā tí n'ó niotja kjóne in'ó mil chojni na ¿nkekjaín ntaxra tí tot'ó niotja naxā kjuenájinná? —ichro ch'án.

Ntá jehe sín kjuátēhe sín ntáchro sín kixin:

—Teyó ntaxra tí nkehe kjuenájinni —ichro sín.

²⁰ Xintáchro ch'ín Jesús inaá kixin:

—Na ko tí kóchrít'vā tí yato niotja kjóne noó mil chojni na ¿nkekjaín ntaxra tí tot'ó niotja kjuenájinná? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjóntē xikaha la, ¿á naxā tiénxinyará? —ichro ch'án.

Ch'ín Jesús mé kjuínchekitōhe jina ijnko ch'ín t'ikonhya tí chjasin Betsaida

²² A ntá chr'éxin kjuíji sín chjasin Betsaida, a ntá ikui iso sín kjuíqao ijnko ch'ín t'ikonhya. Ntá chrónógehe sín tí ch'ín Jesús kixin chrókjuínchekitōhe ch'án jina tí ch'ín a. ²³ Ntá ch'ín Jesús mé itsé ch'án tja tí ch'ín t'ikonhya a ntá k'uaxrjēntako ch'án ikon tí chjasin a. Na ntá kjuíkētehe ch'án ntātē ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

²⁴ Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

²⁵ Ntá ch'ín Jesús mé xikjak'etja tja ch'án inaá tí kon tí ch'ín t'ikonhya a. A ntá tí ch'ín k'uikonhya kuítōhe ch'án jina la jina t'ikon ch'án kaín nkehe. ²⁶ Na ntá ch'ín Jesús mé k'uetuēnhen ch'án tí ch'ín k'uék'ikonhya kixin sátsji ch'án ntōe ch'án ntáchro ch'án kixin:

—Chrók'uixēnhyā chjasin la ko ninkexró chróchenkahya ntiha —ichro ch'án.

Ch'in Pedro chrónka ch'an kixin ch'in Jesús mé tí nkexro Cristo

(Mt. 16.13-20; Lc. 9.18-21)

²⁷ A ntá tí ch'in Jesús la ko tí sín k'uájiko ch'an sákjuí sín tí chjasin ntsi chjino Cesarea de Filipino. A ntá tí ntja mé kjuanchankíhi ch'in Jesús tí sín k'uájiko ch'an kixin:

—¿Nkehe ntáchro chojni kixin nkexro tí janhan? —ichro ch'an.

²⁸ Ntá ntáchro sín kixin:

—Iso sín mé ntáchro sín kixin jaha mé ch'in Juan Bautista, ichro sín. A ntá í so sín na mé ntáchro sín kixin jaha mé ch'in Elías, ichro sín. A ntá í so sín mé ntáchro sín kixin jaha mé ijnko tí sín tsichrónka itén Dios ósé —ichro sín.

²⁹ Ntá kjuanchankíhi ch'an sín inaá kixin:

—¿A ntá jahará nkechrórá kixin nkexro tí janhan? —ichro ch'an.

Ntá kjuátehe ch'in Pedro ntáchro ch'an kixin:

—Jaha mé tí Cristo, ichroni —mé chro ch'an.

³⁰ Ntá k'uetqan ch'in Jesús kixin tsochenkahya sín ninkexró.

Ch'in Jesús chrónka ch'an kixin ts'en ch'an

(Mt. 16.21-28; Lc. 9.22-27)

³¹ Na ntá kjuankixin kjuako ch'in Jesús kixin tí Xjeen Dios K'óna Chojni mé t'ichjánxin kixin imá tsjasóte ch'an la ko tsotjinkakonhya kaín tí sín táda kuénte nínko la ko tí sín t'etqan kuénte tí sín nch'á'á la ko tí sín maestro tjako tí ley. A ntá tí sín a mé ts'óyan sín ch'an. Kjánchó tí nixin yaon na ó tsoxechón ch'an inaá. ³² Kaín tíha mé ntoá chrónka ch'an. A ntá ch'in Pedro mé kuakitsjenta ch'an tí ch'in Jesús chrókjuentuéhe ch'an. ³³ Na ntá kuinkátjá ch'in Jesús komá ch'an kaín tí sín k'uájiko ch'an a. Ntá kjuentuéhe ch'an tí ch'in Pedro a ntáchro ch'an kixin:

—¡sátjia ntáha, Satanás! Jaha la tjenkayáxinhya éxi tjenkayáxin Dios. Náhí. Jaha tjenkayáxin éxi tjenkayáxin chojni ó —ichro ch'an.

³⁴ Ntá ch'in Jesús mé k'uiyéhe ch'an tí sín k'uájiko ch'an la ko tí sín tsikóchjina. Ntá ntáchro ch'an kixin:

—Tí jnkójnirá tjinkáonrá tsochréhérá tí janhan na t'ichjánxin tsitohérá kaín tí nkehe tjaké asanrá na ntá tsamará tí ntacruz kuéntará, a ntá tsochréhérá tí janhan. ³⁵ A ntá tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá. ³⁶ ¿A ntá nkehe tsonhen tí chrójuacha ijnko chojni chróchónka kaín nkehe sín chjasintajni, a ntá kjuachón chrókjuintek'itjáyan? ³⁷ ¿Nkehe chrókjueñka chojni kixin chróchónka tí kjuachón? ³⁸ A ntá jnkójn nkexro tsosuéhe kixin tinkáchónki tí janhan la ko tí tan kuéntana nkayakon tí chojni jínahya chónka jie la kjaxin tí Xjeen Dios K'óna Chojni tsosuéhe ch'an tsontáchro ch'an kixin chóxín ch'an tí jehe sín tió tsokjan ch'an tsikqo ch'an tí kjuachaxin jié kuénte It'é la ko tsikqo tí sín ángel.

9

¹ Na ko kjaxin chrónka ch'in Jesús kixin:

—Chaxín ntáxrijan kixin isorá tjejorá ntíhi la naxá ts'ényhará ts'ikonjjará itsi tí kjuachaxin ts'etqan Dios —ichro ch'an.

Ch'in Jesús mé k'uixitoxin nkexrí tsjehe ch'an

(Mt. 17.1-13; Lc. 9.28-36)

² Ntá k'uátsínka injon yaon ntá ch'in Jesús mé sákjuiko ch'an ch'in Pedro la ko ch'in Jacobo la ko ch'in Juan sákjuí sín jehó sín ijnko jnq noi. Ntá tíha mé xrinahya k'uixitoxin ókjé nkexrí tsjehe ch'an k'uíkon tí jehe sín. ³ A ntá iké ch'an tsík'óna imá tjákní la ko imá tjóá éxi chrinta tsjehe, a ntá ntíhi chjasintajni kohya ninkexró chrókjueñ tí ka chrókuítqhe imá tjóá xikaha. ⁴ Na ntá titáya k'uikuén sín ntíha itjen tí ch'in Elías la ko tí ch'in Moisés tjejótjo sín tí ch'in Jesús. ⁵ A ntá ch'in Pedro mé ntáche ch'an tí ch'in Jesús kixin:

—Maestro, jina kixin tjejóni ntíhi. Chrókjueñ'énani iní nchia la mé ijnko kuéntá la ko ijnko kuénte ch'in Moisés la ko ijnko kuénte ch'in Elías.

⁶ Mé xikaha ichro ch'an kixin kaín sín la imá chrakon sín la tí ch'in Pedro la mé í noehya ch'an nkehe tsixro ch'an. ⁷ Na ntá xrinahya ikui ijnko tjuí kjuak'etja ch'ítaón kaín xín tí tjejó sín. Na ntá ch'rikan tí tjuí kuínhin sín itén ijnko nkexro nixja na mé ntáchro kixin:

—Tí nkexro i mé xjanna. Imá tjuaha ch'an. Chrókuinhínrá tí nkehe tjako ch'an.

⁸ Na ntá tió tsjehe sín nkuixín tí tjejó sín la í kohya tí iyó sín a. Jehó tí ch'in Jesús tjejóko sín.

⁹ A ntá tí ó k'uínkajinxín sín tí jnq ntá k'uetqan ch'in Jesús kixin tsochenkahya sín ninkexró tí nkehe k'uíkon sín hasta tsoxechónjian tí Xjeen Dios K'óna Chojni. ¹⁰ Ntá ninkexró chenkahya sín tí nkehe k'uíkon sín. Na ntá jehó sín mé tjejótjo sín kixin nkehe t'axrxjén tí

nkehe chrónka ch'án káxin tsoxechón ch'án inaá. ¹¹ Na ntá kjuanchankíhi sín tí ch'ín Jesús ntáχρο sín káxin:

—¿Nkeuènte káxin ntáχρο tí sín tjako tí ley káxin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹² Ntá ntáχρο ch'ín Jesús káxin:

—Chaxín saoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáχρο xroon itén Dios káxin nkehe tsonhen tí Xjeen Dios K'óna Chojni? Na mé ntáχρο káxin t'ichjánxin tsjasóte la ko tsotjinkakonhya sín. ¹³ Kjánchó ó xrjanca káxin chaxín ó tsíki ch'ín Elías, ntá kjuínchekjasóte sín ch'án éxi kóxrjínhin sín éxi nixja tí xroon itén Dios káxin xíkaha tsonhen —mé xíkaha chrónka ch'ín Jesús.

Ch'ín Jesús mé kjuínchekitohe jína ijnko xjan chóna ijnko nchakuen tí jínahya
(Mt. 17.14-21; Lc. 9.37-43)

¹⁴ A ntá tió ikjan sín tí kuítóhe tí í so sín k'uájiko ch'án ntá k'uíkón sín káxin nchónhya chojni tsík'antatjen tí jehe sín. Kjaxín ntaha síin tí sín tjako tí ley ikjo tí jehe sín. ¹⁵ A ntá tuénxín tió k'uíkón sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án. ¹⁶ Ntá ch'ín Jesús kjuanchankíhi ch'án sín ntáχρο ch'án káxin:

—¿Nkehe tí tjóra tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátehe ch'án káxin:

—Maestro, ntihi kjuíkian ijnko xjana chóna nchakuen tí jínahya na mé nchenixjahya xjan. ¹⁸ Kjóté nkeri tjen xjan la tí nchakuen tí jínahya mé tjáka xjan nonte, ntá ntalóxrjo sitíxin ir'va xjan na netaón xjan neno xjan na méxra tjeheya xjan. Ntá xrjanógha tí sín xrikoa káxin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntáχρο ch'án káxin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xráqará ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchakuen tí jínahya mé k'uíkón tí ch'ín Jesús ntá kjuínchek'aniáte tí xjan a kjuítsinka xjan nonte la kjaminkítaón xjan nonte la sitji ntalóxrjo ir'va xjan. ²¹ Ntá ch'ín Jesús mé kjuanchankíhi tí it'é tí xjan a ntáχρο ch'án káxin:

—¿Á ósé xíkaha tónhen xjan? —ichro ch'án.

Ntá ntáχρο tí it'é tí xjan káxin:

—Desde naxa xjanntsí xjan. ²² A ntá jnkoyaxón tí nchakuen tí jínahya a mé tjákate xjan xrohi la ko tjákankí xjan intá káxin tjinkaon chrók'óyan tí xjan a. A ntá jaha zá tsjácha tsjinkítsani? La tikonóhéni tsjinkítsani —ichro ch'án.

²³ Ntá ntáχρο ch'ín Jesús káxin:

—¿Nkeuènté tjanchankína káxin á tsjácha? Tí sitekáván la kaín nkehe la jína tsonhen, káxin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáχρο ch'án káxin:

—Ó titekaonni. Tsjínkítsani káxin antsí má tsitekaonni tí jaha —ichro ch'án.

²⁵ Ntá k'uíkón ch'ín Jesús káxin itsje chojni kóchjina. Ntá nixjehe ch'án tí nchakuen tí jínahya chóna tí xjan a ntáχρο ch'án káxin:

—Jaha la ijnko nchakuen tí jínahya nchenixjahya chojni la ko nchekiénhya chojni. Ije la tétuanhan káxin t'axrjéxian tí xjan na ko tsitohé xjan la í tsokjanhya inaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a inaá, ntá k'uaxrjéxín ntiha. Na éxi tsik'en xjan xíkaha tsjehe xjan. Ntá itsje sín ntáχρο sín káxin ó tsíkjin tsik'en xjan, ichro sín. ²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uíxnenhen sín ijnko nchia. Ntá jehe sín kjuanchankíhi sín ch'án káxin:

—¿Nkeuènté káxin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáχρο ch'án káxin:

—Tíhi la t'ichjánxin káxin nchónhya tsochronóghérá T'aná la ko sintehyará —ichro ch'án.

Yóxin chrónka ch'ín Jesús káxin its'en ch'án
(Mt. 17.22-23; Lc. 9.43-45)

³⁰ A ntá tió sákjuixin sín ntiha ntá k'uátsinka sín estado Galilea. A ntá ch'ín Jesús tjinkakonhya ch'án káxin ninkexró ntiha tsonhe sín ³¹ káxin tinkákjakohe ch'án tí sín k'uájiko ch'án a. Na mé chrónka ch'án ntáχρο ch'án káxin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyan sín ch'án. Kjánchó tí yaon nixin na ó tsoxechón ch'án inaá —ichro ch'án.

³² Ntá jehe sín mé kíenxínhya sín nkehe tí ntáχρο ch'án la chrakon sín chrókjuanchankíhi sín ch'án nkexrí t'axrjéxín tíha.

¿Nkexro tí imá tjetaon?

(Mt. 18.1-5; Lc. 9.46-48)

³³ Ntá kjuuji sín chjasin Capernaum; a ntá tí tjejó sín tí nchia ntiha ntá ch'in Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjóra kichuára tí kuini ntija? —ichro ch'án.

³⁴ Ntá jehe sín la tánikoá sín kixin tí ntja kui sín tinkákjo kichó sín kixin nkexro tí imá ts'etqan. ³⁵ Ntá ch'in Jesús mé kjuák'etjaxin ch'án ntá k'uíyehé ch'án tí teyó sín k'uájiko ch'án, a ntá ntáche ch'án sín kixin:

—Tí jnkojínrá tjinkáonrá chrókuétoanrá má ntá t'ichjánxin kixin tsjixixín tsochréhérá kain sín, ts'ítuanhanrá la ko tsjínktsará kain xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkojín nkexro chrók'uáyéhé ijnko chánjan kixin tinkáchónki sín tí janhan la mé xikaha chrók'uáyéhé sín tí janhan la ko kjaxin éxi chrók'uáyéhé sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjínktsa tí jeheni

(Lc. 9.49-50; Mt. 10.42)

³⁸ A ntá ch'in Juan mé ntáchro ch'án kixin:

—Maestro, k'uíkomi ijnko chojni na mé kjuachaxin ihnjá mé takitsjexín ch'án nchakuen tí jínahya chóna chojni. Ntá k'uétuenhenni ch'án kixin xikahya chrókjuich'e ch'án kixin xrikoxyani ch'án —ichro ch'án.

³⁹ Ntá ntáchro ch'in Jesús kixin:

—Nté tjtóhé ch'án kixin ninkexró tjasixín kjuaxroan kjuachaxin njna la tuénxín chrókjuacha chrók'uántaxina sín. ⁴⁰ Tí nkexro nínkakuenhyani la mé tjínktsa tí jeheni. ⁴¹ A ntá jnkojín nkexro tsotjáhará kjónté ijnko vaso intá tsjanjonxín sín njna kixin jahará la tinkachónkirá Cristo, ntáxrjan kixin chaxín ts'áyéhé sín nkehe.

Tí chojni tjasin jie mé tsjasóte sín

(Mt. 18.6-9; Lc. 17.1-2)

⁴² A ntá jnkojín nkexro chrókjuachroe ijnko xjan kixin chrókjuasin xjan jie tió tinkáchónki xjan tí janhan la íchá jina chrókjuincheteyá sín ch'án ijnko xro jie tsík'óna xrochre la chrókjuikákánki sín ch'án ntayoon. ⁴³ A ntá tí itjá tjásixián jie na mé íchá chrókójina chrókochrínjian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuixián tí siín xrohi xitjahya ts'anka, ⁴⁴ tí siín kosjntó t'enhya la ko síche xrohi ts'ankahya. ⁴⁵ A ntá kjaxin tí totá tjásixián jie na íchá jina chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókjuixián tí siín xrohi xitjahya ts'anka, ⁴⁶ tí siín kosjntó t'enhya la ko síche xrohi ts'ankahya. ⁴⁷ A ntá tí ikuan tjásixián jie na íchá jina chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etqan. A ntá tí yóí kuan la tíha mé sáchrókjuixián tí síche xrohi ⁴⁸ tí siín kosjntó t'enhya la ko siín xrohi ts'ankahya.

⁴⁹ A ntá kain nkexro t'ichjánxin tsjasóte. A ntá kain nkehe ts'áyéhé Dios chóna xjnta. ⁵⁰ Tí xjnta la jina. A ntá tí chrók'uankehe tí jni la ntá xitjahya chrókójni inaá. Jahará mé chrókóyóhará éxi xjnta kixin kjuaxróxin chrók'uejokoará kichuára —ichro ch'án.

10

Tjako ch'in Jesús kixin chrókjuakéhya kichó sín

(Mt. 19.1-12; Lc. 16.18)

¹ Na ntá ch'in Jesús mé k'uaxrxjén ch'án chjasin Capernaum sákjuí ch'án nó estado Judea la ko nó tóhe ntario Jordán. Ntá nchónhya chojni kójnkotsé sín tí tjen ch'án ntiha. Ntá kjuakóhe ch'án tí jehe sín kixin xikaha kuénhen ch'án. ² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxin sín ch'án. Ntáchro sín kixin:

—¿Á siín kjuachaxin tsjákehé chojni ntoa ichjién? —ichro sín.

³ Ntá kjuátehe ch'án ntáchro ch'án kixin:

—¿Nkehe tí k'uétuanhanrá tí ch'in Moisés? —ichro ch'án.

⁴ Ntá ntáchro sín kixin:

—Ch'in Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjixín kichó sín —ichro sín.

⁵ Ntá ch'in Jesús ntáchro ch'án kixin:

—Ntá jahará icha asánrá titekákonhyará ntá k'uétqan ch'án ts'óna tí xroon a. ⁶ Kjánchó tí xrankixixín tió kjuich'éna Dios kain xín nkehe la kjuich'éna ch'án ijnko chojni ntoa la ko

ijnko chojni chjin.* ⁷ Méxra tí chojni ntoa tsítóhe ch'án tí it'é ch'án la ko iné ch'án kixin tsakja ch'án ichjién ch'án ⁸ ntá yóí sín ts'óna sín éxi jnkokoá chojni. Méxra jehya yaá chojni. Náhi, jnkokoá.† ⁹ Na mé xikaha tí kjuachaxin kuénte Dios kójnkojiéxin sín ntá jehe sín chrók'uitjiéhya kichó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjahya ts'itjihi kichó sín. ¹¹ Na ntá ntáchro ch'ín Jesús kixin:

—Tí jnkojin nkexro tsjákehe ichjién ntá tsakja ch'án i jnko chjin na mé xikaha tsjachehe ch'án tí tjan tsikótehe ch'án saxín. ¹² La ko kjaxin tí chojni chjin tsíkjákehe xii tsakja tjan i jnko chojni ntoa na mé xikaha kjaxin tjan tjasin tjan jie —ichro ch'án.

Ch'ín Jesús kjuíncheyaon ch'án xjan

(Mt. 19.13-15; Lc. 18.15-17)

¹³ Ntá kjuíkao sín xjan kixin tjínkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sín kjuíkao xjan. ¹⁴ Ntá k'uíkon ch'ín Jesús ntá kónínkaon ch'án ntáchro ch'án kixin:

—Ntá títóherá tí xjan tsoxrakoa tí tjeñ janhan la t'ínkakuènyará xjan kixin tí sín kuénte kjuachaxin kuénte Dios la mé tóyóhe éxi tí xjan a. ¹⁵ Ntá chaxin ntáxrjan kixin tí nkexro ts'ónahya éxi ijnko chánjan xitjaha ts'ejó sín tí ts'etqan Dios tí kjuachaxin kuénte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehe ch'án tí ch'ín Jesús

(Mt. 19.16-30; Lc. 18.18-30)

¹⁷ A ntá tió sákjuí ch'ín Jesús inaá ntá xrakoa ijnko ch'ín tinká ch'án kjuák'exín toh'in ch'án nkayakon tí ch'ín Jesús kjuanchankí ch'án kixin:

—Jaha, maestro jina. ‡Nkexrí chrókjuich'eni kixin chrók'uitjani kjuachón jnkochríxín? —ichro ch'án.

¹⁸ Ntá ntáche ch'ín Jesús tí jehe ch'án kixin:

—‡Nkeuènté ntáchrúa kixin jina tí janhan? Jehó jnkokoá nkexro mé jina la tíha mé Dios. ¹⁹ Ntá jaha ó noha kixin nkexrí k'uetqan Dios kixin: “Chrókjuacheéhya kichuá la chrók'oyánhya chojni la chrókuehya la chrókjótahya kichuá la chrókjuich'iahya la ko chróchontehé kjuasáya it'á la ko iná*† —ichro ch'án.

²⁰ A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

²¹ Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxa t'itjayan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sijnchekjixián tí nkehe chonta la mé nchekjítqonhén tí chojni nóa, a ntá tí nkehe tjehe tsochonta nkaya nkajni. A ntá tió tsjixin tsjánjuan kaín ntá tsjihá tamá tí ntacruz kuénte la chréhe tí janhan —ichro ch'án.

²² Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chóna ch'án.

²³ Ntá ch'ín Jesús komá ch'án tí sín siín ntíha ntáche ch'án tí sín siín k'uájiko ch'án kixin:

—Imá xra ijnko chojni chóna imá tsjé nkehe ts'ixenhen sín tí tjen Dios t'etqan —ichro ch'án.

²⁴ Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjejonhen tí nkehe chóna sín na imá xra ts'ixenhen sín tí tjen Dios t'etqan. ²⁵ Antsi xrahya chrók'uatínka ijnko kocamello ijnko tjar'in ntachica tjejrja. A ntá antsi má xra ijnko ch'ín chóna itsjé nkehe chrók'uixenhen ch'án tí tjen Dios t'etqan —ichro ch'án.

²⁶ Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, †xá nkexro chrókjuacha chrókuaá? —ichro sín.

²⁷ Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jina sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Inchéni, kaín ni mé kuitóheni kaín nkehe chónatani ntá chréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Chaxín ntáxrjan kixin jnkojin nkexro tsítóhe ntqé sín la o tí kichó ntoa o tí kichó chjin la o it'é o iné sín o ichjién sín o xjeen sín o nontqé kixin tinkáchónki sín tí janhan la ko tjínkaon sín chrókjuako sín tí tan tsjanjon kjuachón ³⁰ na mé ntíhi chjasintajni tsochóna sín ciento veces nchónhya ntqé sín la ko éxi kichó sín la ko éxi iné sín la ko éxi xjeen sín ts'ikon sín itsjé chojni

* 10:6 Génesis 1.27; 5.2 † 10:8 Génesis 2.24 ‡ 10:19 Éxodo 20.12-16; Deuteronomío 5.16-20

kjé la ko éxi nontee sín xikaha ts'ikon sín itsjé nonte. Kjonté tsjasóte sín ntihi chjasintajni ntá chr'éxin tsochóna sín tí kjuachón jnkochrixín. ³¹ A ntá itsjé tí sín t'etqan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etqan sín tí ntiha.

Níxin chronka ch'in Jesús káxin its'en ch'án
(Mt. 20.17-19; Lc. 18.31-34)

³² Ntá tjejótti sín chrín sín tí ntja sátsji chjasin Jerusalén. Ntá ch'in Jesús mé tjetaón ch'án ntja ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehé ch'án jehó tí teyó sín inaá ntá kjuankíxin ch'án chénka ch'án sín nkexrí tí nkehe tsonhen ch'án. ³³ Ntá ntáchro ch'án káxin:

—Ijje sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nch'á'á t'etqan la ko tí sín tjako tí ley. Ntá ts'etqan sín káxin its'en ch'án. Ntá sinchek'áyéhe sín ch'án tí sín jehya judío. ³⁴ Ntá jehé sín la tsjanoá sín tí jehé ch'án la ko ntáté sín tsíkíte sín ch'án la ko tsjate sín ch'án ntá ts'óyán sín ch'án. Kjánchó tí yaon níxin mé tsoexchón ch'án inaá —mé xikaha ichro ch'in Jesús.

Ch'in Jacobo la ko ch'in Juan tjanchia sín nkehe
(Mt. 20.20-28)

³⁵ A ntá tí ch'in Jacobo la ko ch'in Juan mé xjeen ch'in Zebedeo mé kóhchinehe sín tí ch'in Jesús ntá ntáchro sín káxin:

—Maestro, tjanchahani ijnko xrá —ichro sín.

³⁶ Ntá kjuanchankí ch'in Jesús ntáchro ch'án káxin:

—¿Nkehe tí xrá tjinkáonrá chrókjujt'ahará? —ichro ch'án.

³⁷ Ntá ntáchro sín káxin:

—Tió tsétqanxián tí kjuachaxián jié na tjinkaonni káxin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'in Jesús tí jehé sín káxin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxi tsikite janhan? —ichro ch'án.

³⁹ Ntá jehé sín kjuátehe sín ntáchro sín káxin:

—Kjá tsjachani —ichro sín.

Ntá ntáche ch'in Jesús tí jehé sín káxin:

—Chaxín its'irá éxi tí nkehe tsjá its'ia la ko tsikiterá éxi tsikite janhan. ⁴⁰ Kjánchó janhan xitjahya tsjánjuan kjuachaxin káxin ijnkorá chrókjuak'erá tjaná chjina la í jnkorá chrókjuak'erá tjaná kjon káxin janhan na tónahya tocar tsjánjuan tíha káxin tí sín a la xráxin ó tsikónoxín —ichro ch'án.

⁴¹ A ntá tió kuínhin tí ite sín xikaha tsintáchro tí sín a ntá kjuankíxin kónínkakonhen sín tí ch'in Jacobo la ko tí ch'in Juan. ⁴² Ntá k'uíyehé ch'in Jesús kaín tí jehé sín ntá ntáche ch'án sín káxin:

—Ó nohará káxin tí sín t'etqan chjasintajni la imá t'etuenhen sín kaín chojni la ko tí sín imá tjetaon mé imá nchehnkehe asén sín káxin ihyé sín ts'etqan sín. ⁴³ Kjánchó jahará la xikahya chrókjuich'erá. Náhí. Tí jnkójnirá tjinkáonrá chrókuétoanrá la chrókjuínktsará tí í so sín. ⁴⁴ A ntá tió jnkójnirá antsí chrókuétoanrá mé t'ichjánxin senó chrókjuákoxinrá chrókjuich'eherá kichuárá xrá. ⁴⁵ Káxin tí Xjeen Dios K'óna Chojni mé kuihya ch'án káxin chojni chrókjuich'ehe ch'án xrá. Náhí. Ikui ch'án káxin sich'ehe ch'án sín xrá la ko ts'enyákonhen nchónhya chojni káxin tsáaxin sín ch'án —ichro ch'án.

Ch'in Bartimeo k'uék'ikonhya ch'án ntá ch'in Jesús kjuínchekitqhe ch'án jina
(Mt. 20.29-34; Lc. 18.35-43)

⁴⁶ Ntá kjuíji sín chjasin Jericó. Ntá ch'in Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'in t'íkonhya mé it'in ch'án Bartimeo ntá it'é ch'án mé it'in Timeo. Tjetjaxín ch'án chrínta ntja tjanchak'á ch'án. ⁴⁷ Ntá kuínhin tí ch'in t'íkonhya káxin ó kuichjina ch'in Jesús, mé tí nkexro kjuixín chjasin Nazaret, ntá tí ch'in t'íkonhya kjuankíxin t'èya ch'án ntáchro ch'án káxin:

—Jaha Jesús, tsik'axrjeníxian ch'in David tjikonóhéni —ichro ch'án.

⁴⁸ Ntá nchónhya sín k'uétuenhen sín ch'án káxin tsqtání ch'án. Ntá íchá antsí má tsen t'èya ch'án ntáchro ch'án káxin:

—Jaha, tsik'axrjeníxian ch'in David tjikonóhéni —ichro ch'án.

⁴⁹ Ntá ntahó kjuák'e ch'in Jesús. Ntá k'uétqan ch'án káxin:

—T'jyehérá tí ch'in a —ichro ch'án.

Ntá k'uíyehé sín tí ch'in t'íkonhya ntá chénka sín ch'án káxin:

—Tócháha la t'inkatjen káxin tjet'iyaha ch'án. —ichro sín.

⁵⁰ Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús. ⁵¹ Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátēhe tí ch'ín t'íkonhya ntáchro ch'án kixin:

—Maestro, tjinkaonni kixin chrók'uikonni —ichro ch'án.

⁵² Ntá ntáche ch'ín Jesús tí ch'ín a kixin:

—Ijie la jína sátsja. Ó kuítōha jína kixin kuítekávan tí janhan —ichro ch'án.

Ntá tuénxin tí ch'ín t'íkonhya la ó k'uíkon ch'án ntá chréhe ch'án tí ch'ín Jesús.

11

Ntá ch'ín Jesús k'uixenhen ch'án chjasin Jerusalén

(Mt. 21.1-11; Lc. 19.28-40; Jn. 12.12-19)

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'exin tí jnā Olivo ntá k'uetuēnhen ch'ín Jesús iyó tí sín k'uájiko ch'án, ² ntáchro ch'án kixin:

—Sátjirá tí chjasin ntsí chok'exin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áha va. Ntá tjasintankehéra va ntá tsjikoanará va ntihi.

³ A ntá tí jnkójín chojni tsjanchankíhará sín kixin nkekuènté xikaha ch'erá ntá tsontáchrórá kixin: “Tí Maestro mé t'ichjánxinhin va ntá tió tsoxéhe va la tsjikaána va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va. ⁵ Ntá iso tí chojni tjejó ntiha kjuanchankí sín kixin:

—¿Nkekuènté xikaha ch'erá tjasintankehéra tí kolócho a? —mé chro sín.

⁶ Ntá kjuátēxín sín éxi k'uetōan ch'ín Jesús. Ntá kjuanjōn sín kjuachaxin sátsjiko sín va. ⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. ⁸ Ntá itsjé chojni kuakitsje sín iké sín la kjuentoá sín tinkák'ikjínxin sín ka tí ntā ts'atsinkaxín ch'án. Ntá iso sín la mé tóchrínjin sín chaon nta itsá kayoa ntá xráko sín tinkát'itjī sín ntā.

⁹ A ntá tí sín tsítaón ntā la ko tí sín chréhe iton kjuankixin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kujxin kjuachaxin ihnjé Inchéni. ¹⁰ Jína tí kjuachaxién Dios itsi mé ts'etuēnhen tí nkexro k'uaxrjenixín it'éni David. Ntá tsjancheheni kjuasáyé Dios tjen nkaya nkajni —ichro sín.

¹¹ Ntá k'uixenhen ch'ín Jesús chjasin Jerusalén la ko kjaxin k'uixenhen ch'án tí njnko jie tsjehe ch'án nkúixín tí nkaxenhen. Ntá ó kóntó ntá ch'ín Jesús sákjuiko ch'án tí teyó sín k'uájiko ch'án sákjuí sín chjasin Betania.

Ch'ín Jesús kónínkakohen ch'án ijnko nta t'óna to higo tsík'ónahya to

(Mt. 21.18-19)

¹² A ntá tí kóyaon ntá kjanxin sín chjasin Betania ntá ch'ín Jesús mé k'uén ch'án kjinta. ¹³ Ntá k'uíkon ch'án kjin kixin itjen ijnko nta t'óna to higo itsá kayoa. Ntá sákjuitsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to. ¹⁴ Ntá nixjēhe ch'ín Jesús tí nta t'óna to higo k'uetuēnhen ch'án tí nta kixin:

—Í ninkexró sinehya tí to ts'óna tí jaha inaá —ichro ch'án.

A ntá tí sín k'uájiko ch'án mé kuínhin sín xikaha.

Ch'ín Jesús kjuínchetjóá ch'án njnko

(Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uixenhen ch'ín Jesús nkaxenhen njnko a. Ntá kjuankixin ch'án k'uínkité ch'án tí sín nchekjixin nkehe ntiha la ko tí sín t'ena nkehe ntiha. A ntá kótéka ch'án tí mesa tjinkítóxixin sín chichaon la ko tí silla tjejójen tí sín nchekji kontóá ¹⁶ la ko kjuanjōnhya ch'án kjuachaxin kixin tsamá sín nkehe ts'ajixenhen sín njnko. ¹⁷ Ntá kjuakohe ch'án sín ntáchro ch'án kixin:

—Ntáchro xroon itén Dios kixin: “Tí ntōna i mé it'in nchia tsonixjanaxín chojni nkúixín nación”, a ntá jahará tsík'jich'énarā itjueé xíchee* —ichro ch'án.

¹⁸ Ntá tí sín nchát'á t'etoan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjínjin tí chojni tí nkehe kjuako ch'án. ¹⁹ Kjánchó ntá ó kóntó ntá k'uaxrjexín ch'án tí chjasin a sákjuí ch'án.

Ó tsixámá tí nta t'óna to higo

(Mt. 21.20-22)

* 11:17 Isaías 56.7; Jeremías 7.11

²⁰ A ntá tí nchítjen k'uaúsínka sín tí tjen tí nta t'óna to higo ntá k'uúikon sín kixin ó tsixámáxin nuèe tí nta. ²¹ A ntá ch'in Pedro xráinkakon ch'án ntáche ch'án tí ch'in Jesús kixin:

—Maestro, tsjehé tí nta t'óna to higo kónínkakohén jna na ó tsixámá nta —ichro ch'án.

²² Ntá kjuátehe ch'in Jesús ntáchro ch'án kixin:

—Tinkachónkirá Dios. ²³ Chaxín ntáxrjan kixin jnkojínrá chróntácherá tí jná i kixin: “Sátjixián ntihi tjikjiantkiá ntayaon”, a ntá tí kaín asánará chrókuinkachónkirá Dios kixin chróxiteyá tí nkehe tsontáchrórá, ntá xikaha chaxín tsonhen. ²⁴ Mé xikaha ntáxrjan kixin kaín tí nkehe tsjancheherá Dios tí tsitékoonrá kixin chaxín ts'ayéherá ntá xikaha tsonhen tsoxiteyá. ²⁵ A ntá tío tjejonixjehérá Dios ntá jnkojín nkexro naxá ninkákonhénrá, la chrók'uitjáyahanrá tíha kixin It'ará tjen nkaya nkajní kjaxin chrókjuinçek'itjáyán ch'án tí jie chontará. ²⁶ A ntá tí sinček'itjáyánhyará tí ijíe chojni ntá It'ará tjen nkaya nkajní la kjaxin sinček'itjáyánhya ch'án tí jie chontará.

Tjančankíhi sín tí ch'in Jesús nkehe tí kjuachaxin chóna ch'án

(Mt. 21.23-27; Lc. 20.1-8)

²⁷ Ntá xikjan sín chjasin Jerusalén inaá. Ntá xritjak'e ch'án nkaxenhen njnko ntá kóchjina tí sín nchát'á t'etqan la ko tí sín tjako tí ley la ko tí sín táda t'etqan njnko ²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xikaha ch'e? ¿Nkexro tjáha tí kjuachaxin kixin xikaha kjuich'e? —ichro sín.

²⁹ Ntá kjuátehe ch'in Jesús ntáchro ch'án kixin:

—Ntá kjaxin janhan tsjánchánkíhárá ijnko nkehe, síná á chrókjuáteherá, ntá tsotjonkará nkehe tí kjuachaxin chonta janhan kixin xikaha it'a. ³⁰ ¿A ntá nkexro k'uetuēnhen ch'in Juan kixin tsíkíte ch'án chojni? ¿Á Dios ní o á chojni ó? A ntá jie la tjáteherá —ichro ch'án.

³¹ Ntá kjuankixin jehó sín tjo sín kichó sín kixin:

—Tí tsontáchroni kixin Dios tsík'etuēnhen tí ch'in Juan ntá tsjančankí tí ch'in a kixin nkekuēnté kuítekakuenhyani ch'án. ³² ¿Á chróntáchroni kixin chojni ó tsík'etuēnhen ch'án? —ichro sín.

Kjánchó chrakonhen sín tí chojni chjasin kixin kaín sín kuítekaon sín kixin ch'in Juan mé k'uénixja ch'án itén Dios. ³³ Ntá ntáche sín tí ch'in Jesús kixin:

—Noehyani —ichro sín.

Ntá ntáchro ch'in Jesús kixin:

—La ko kjaxin janhan tsqxrjankahya nkexro kjuanjon kjuachaxin kixin xikaha t'a —ichro ch'án.

12

Ch'in Jesús mé kjuíncheyóexin ch'án éxi chojni ch'e'hya xra jina

(Mt. 21.33-46; Lc. 20.9-19)

¹ Ntá ch'in Jesús kjuíncheyóexin ch'án inaá ntáchro ch'án kixin:

—Itjen ijnko ch'in k'uēnkaxin ch'án itsje ntanòda t'óna to uva nontee ch'án la ko kjuich'éna ch'án corral la ko kjuich'éna ch'án ijnko tóye ts'énya sín to uva. A ntá kjuich'éna ch'án ijnko tját'o noi kixin ts'it'ótjen ch'án tsokotohe ch'án.

A ntá kjuínčekjen ch'án tí nonte iso chojni ch'e xra. Ntá sákjuí ch'án kjin. ² Ntá tí kjuixraká tí yaon ts'óna to ntá k'uetuēnhen ch'án ijnko tí nkexro ch'ehe ch'án xra kixin tsátsjikjanchehe ch'án tí sín ch'e xra jnkosiné tí to tsakja ch'án. ³ Ntá tí sín ch'e xra mé tsé sín tí ch'in a, kjuate sín ch'án ntá ninkehó chjéhya sín ch'án ntá sákjuí ch'án. ⁴ A ntá tí inché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhi sín ch'án. ⁵ Ntá tí inché tí nonte a xíchr'án ch'án í jnko chojni sákjuítsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí inché mé xíchr'án ch'án í so nkexro ch'ehe ch'án xra sákjuítsjehe sín, kjánchó iso sín k'uékon sín la í so sín la k'óyán sín.

⁶ Ntá jehe ch'án chóna ch'án jnkoqóaxón xjeen ch'án na imá tjuēhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án. ⁷ A ntá tí sín ch'e xra a tjo sín kichó sín kixin: “Tí ch'in i mé ts'ayéhe kaín nkehe síin ntihi. A ntá jie ts'óyánni ch'án, a ntá jeheni ts'ayéhe ni kaín tí nkehe a”, ichro sín. ⁸ Ntá xikaha itsé sín ch'án k'óyán sín ch'án ntá kuakitsjexín sín ntqee ch'án tí nontee ch'án.

⁹ A ntá kjuanchankí ch'in Jesús ntáchro ch'án kixin:

—¿A ntá nkehe chrókjuich'e tí inché tí nonte a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.*

* 12:9 Isaías 5.1-7

10' ¿Á kjuinchekuáxinhyará jahará tí xroon itén Dios? Ntáchro xikíhi: Tí xro náxrjónhya kuitoenta tí sín ch'éna tjat'o, mé jie k'óna tí xro tjeoan.

11 Mé xikaha kjuích'è Ìnchéni Dios,

na ntá tíha mé ijnko nkehe kjuachrakon k'uikonní† —ichro ch'ín Jesús.

12 Ntá chrótsé sín tí ch'ín Jesús chrókjuak'echjina sín ch'án kixin kíenxín sín kixin kaín tí ntáchro ch'án la jehe ch'án k'uántaxínjin tí jehe sín. Kjánchó chrakon sín kixin nchónhya chojni kóchjina ntá kuitqhe sín ch'án ntá sákjuí sín.

¿Á jina chrókjuenkehe sín gobierno?

(Mt. 22.15-22; Lc. 20.20-26)

13 A ntá ichr'án sín iso tí sín fariseo la ko iso tí sín kuente ch'ín Herodes kixin tsjanchankíhi sín ch'án iso nkehe kixin tí ntoáhya chrókjuatehe ch'án ntá jina chrók'ueka sín ch'án jie. 14 Ntá kjuíji sín tí tjeen ch'ín Jesús ntáchro sín kixin:

—Maestro, ó noheni kixin tí nkehe chonka la chaxín tíha la ko jehya nkexrí tsjehe chojni tjenkayáxixián kixin á jina sín, la ko ntoá tjàkua ntje Dios. ¿Á jina chrókjuenkeheni tí gobierno tí chichaon tjanchia? ¿Á chrókjuenkeheni sín ní o náhi? —ichro sín.

15 Ntá ch'ín Jesús kjuátsoan ch'án kixin jehya jina tjenkayáxin sín ntáchro ch'án kixin:

—Jehya jina kixin tjàchaxínráni. Xrákoraá ijnko tí chichaon tjanchia sín tsotsjáha —ichro ch'án.

16 Ntá xrákao sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrxéjin tjenkáni tí chichaon i la ko nkexro ihnié chóna? —ichro ch'án.

Ntá jehe sín kjuátqhe sín kixin:

—Tí ch'ín t'etqan mé tjenkáni ch'án —ichro sín.

17 Ntá kjuátqhe ch'ín Jesús ntáchro ch'án kixin:

—Chróchjehérá tí ch'ín gobierno t'etqan tí nkehe kuente ch'án; a ntá tí nkehe kuente Dios la chróchjehérá Dios —ichro ch'án.

Ntá chrakon sín kixin xikaha kjuátqhe ch'án.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

18 A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxín sín tí ch'ín Jesús ntáchro sín kixin:

19 —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjeen tí ichjién ch'án na ko tsík'ich'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxi xjeen tí nkexro tsík'en.‡ 20 Kjánchó k'uéjój yato sín jnkokoá kichó sín. Ntá tí ch'ín sao mé kuákja ch'án ichjién ch'án. Ntá ik'uén ch'án, kjánchó ninkehó xjan tsík'ich'énahya sín. 21 Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxín tsík'ich'énahya sín xjan. A ntá tí ch'ín níxin kuákja ch'án tí jehe tjan ntá xikaha kónhen inaá. 22 Ntá kayatoé sín k'uéchénta sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxín tjan. 23 Ntá tíó tsoxechón kaín xín chojni la, ¿Ntá nkexro ts'óna xii tjan kixin kayatoé sín tsíkóqhe tjan? —ichro sín.

24 Ntá kjuátqhe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios. 25 A ntá tíó tsoxechón tí chojni tsík'en la tsotqehya sín la ko tsjanjonhya sín xjeen sín kixin tsotqhe sín kixin tí sín tsík'en la éxi sín ángel ts'ejój sín nkaya nkajni. 26 A ntá tí tsoxechón tí sín tsík'en, ¿á kjuinchekuáxinhyará tí xroon tsíkjin ch'ín Moisés chonka nkexrí k'uénixjexín Dios ijnko nta yoa tjeche ntáchro ch'án xikíhi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob”?§ 27 Méxra tí Dios i la jehya tinkáchónki tí sín tsík'en. Náhi. Jehe ch'án mé Dios tinkáchónki tí sín tjejóchón. Ntá jahará la imá tiénxinhyará kixin xikaha ichrorá tjanchankírá —ichro ch'án.

Tí nkehe antsí imá tjeoan tsík'etqan Dios

(Mt. 22.34-40)

28 Ntá kui ijnko ch'ín tjako tí ley kjuák'ekinjin ch'án nkexrí kjuachaxín sín ch'ín Jesús. Ntá kuínjin ch'án kixin imá jina kjuátqhe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjeoan tsík'etqan Dios? —ichro ch'án.

29 Ntá kjuátqhe ch'ín Jesús ntáchro ch'án kixin:

† 12:11 Salmo 118.22-23 ‡ 12:19 Deuteronomio 25.5 § 12:26 Éxodo 3.6

—Tí nkehe antsi tjetooan tsík'etooan Dios mé tíhi: “Tinhínrá kaín rá chojni Israel kixin Ìnchéni Dios la mé jnkokoá la kohya í jnko nkexro. ³⁰ Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótjuèxínrá.”* Mé xikaha tí nkehe antsi tjetooan tsík'etooan Dios. ³¹ A ntá tí nkehe yóxin tsík'etooan Dios la mé tóyóhé na mé ntáchro xíkíhí: “Chrótjuèhérá kichuárá éxí tjuèxínrá asánrá,”† la kohya í jnko nkehe antsi má tjetooan tsík'etooan ch'án —ichro ch'ín Jesús.

³² A ntá kjuátehe tí ch'ín tjako n̄nko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokoáxón Dios la ko kohya í jnko Dios.‡
³³ Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxínni Dios la ko chrótjuèheni kichó ni éxí tjuèxínni asénni.§ Tíha mé antsi má sínkí. A ntá kaín tí ko chrók'óyánni chrókjuanjónni chróchjánxin chrítaón altar la kánhyó tjetooan tíha —ichro ch'án.

³⁴ A ntá tíó k'uikón ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuénte Dios —ichro ch'án.

Ntá kóxakónhen sín ntá n̄nkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

³⁵ Ntá ch'ín Jesús kjuák'ekjako ch'án tí n̄nko jíé. Ntá kjuanchankí ch'án ntáchro ch'án kixin: —¿Nkexrí kixin tí sín tjako tí ley mé ntáchro sín kixin tí Cristo mé ts'axrjeníxin tí ch'ín David?

³⁶ A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntíhó tsétoan,

tsjixinjian kaín xín tí sín n̄nkakónhan la tsjachahya sín ts'etooan sín kixin jahvá mé tsétoan”*

³⁷ ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsje chojni k'uéjókínhin sín kóxrjínhin sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

³⁸ Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntja mé tsjikosáyehe sín. ³⁹ Jehe sín xritjeyá sín tí nta antsi náxrjón ts'ejóyá sín tí nkaxenhen n̄nko. La ko kjaxin tíó sátsji sín tí sine sín xritjeyá sín tí nta antsi náxrjón ts'ejókjen sín sine sín. ⁴⁰ La ko takitsje sín ntge chojni k'án. La ko ch'iyexín sín chojni kixin isé nixjehé sín Dios kixin chrókuinhin chojni chróntáchro sín kixin imá jína tí jehe sín. Tí sín a mé antsi má tsjasóte sín —ichro ch'án.

Tí ofrenda kjuanjón ijnko tjan k'án

(Lc. 21.1-4)

⁴¹ A ntá jnkonaá mé ch'ín Jesús tjetjaxin ch'án nkaxenhen n̄nko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a. ⁴² Ntá kjaxin ntíha mé kjuí ijnko tjan k'án nòta tjan ntá chr'áxenhen tjan tí ntacajón yaá chichaon kánhyó tjete sínkí. ⁴³ Ntá ch'ín Jesús k'uíyehé ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòta tjan antsi tjete k'uikón Dios tí chichaon chr'áxenhen tjan tí ntacajón, a ntá tí sín í so la kánhyó ⁴⁴ kixin kaín sín la ó chichaon xéhe sín kjuanjón sín. Ntá jehe tjan la kjoné nòta tjan la kjuanjón tjan kaín tí chichaon k'uéchóna tjan chrók'uíte nkehe chrókjóné tjan —ichro ch'án.

13

Ch'ín Jesús chrónka kixin tsoxíka n̄nko

(Mt. 24.1-2; Lc. 21.5-6)

¹ A ntá tíó k'uaxrjexín ch'ín Jesús tí n̄nko jíé ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

* 12:30 Deuteronomio 6.4-5 † 12:31 Levítico 19.18 ‡ 12:32 Deuteronomio 4.35 § 12:33 Oseas 6.6 * 12:36 Salmo 110.1

—¿Á tsjehé jaha tí nchia jíé tsík'óna ní? Tsjixraká tí yaon la í ninkehó xró ts'ejójkjenhya kíchó, la kaín tíha la tsqxika —ichro ch'án.

Tí nkehe tsonhen chjina tí tsjixín
(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jna Olivo chók'èxin tjen tí nínko a. Ntiha kjuák'etjxin ch'in Jesús. Ntá ntiha ch'in Pedro, la ko ch'in Jacobo, la ko ch'in Juan, la ko ch'in Andrés chjanchankíhi sín ch'án nkehe, ntáchro sín kixin:

⁴ —Tjinkaonni tsochronka nkesá tsonhen tíha la ko nkexri tsonoxéinni nkesá tsoxiteyá kaín tíha —ichro sín.

⁵ Ntá ch'in Jesús kjuátehe ch'án ntáchro ch'án kixin:

—Tóxakonhanrá títoéhyará kixin ninkexró chrókjuít'ayahyará. ⁶ Nchónhya chojni tsi tsontáchro sín kixin jehe sín mé Cristo. Ntá xikaha sich'iyehé sín nchónhya chojni.

⁷ A ntá tíó tsinhínrá kixin tjanjonko kíchó sín la t'óyán kíchó sín la chrakonhyará tóxakuanhyará ó jehí tsonhen tíha. Kjonté xikaha naxá tsjejehya chjasintajni. ⁸ Ijnko nación tsjanjonko í jnko nación. La ntiha la ntaha la tsínki nonte la ko itsjé chjasin na tsqjinta la ko ts'ixité sín tsonínkaon sín. Tíha na ntá xrankixión tí kjuatjoté.

⁹ Tóxakonhanrá jahará kixin mé tsjikaánrá sín nkayakon tí sín t'etjoan ntá tí nkaxenhen nínko ntiha mé tsjatiaxínrá sín. Jahará t'ichjánxin tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjchará tsochronkará nkexri tinkachónkirá tí janhan nkayakon tí jehe sín. ¹⁰ Tí naxá ts'itjáyanya chjasintajni la mé t'ichjánxin tsinhin chojni kaín xín nación tí tan jina tsaáxin sín. ¹¹ Tíó sátsjikoará sín tsjikaánrá sín tí tjejó tí sín t'etjoan, la tóxakuanhyará nkehe tsjateherá la ko nkehe tsjenkayáxinrá. Náhi. Chronkará tí nkehe kjuanjon Dios tsontáchrorá tí hora a, kixin jahyará tsonixjará. Náhi. Nchakuen Dios mé tsonixja. ¹² Iso chojni kjonté naxá kjéhya sín tsjikaán tí kíchó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakohen sín tí it'é la ko iné la tsjikaán sín kixin its'en. ¹³ Kaínxin chojni chjasintajni tsonínkakohonhanrá sín kixin tinkachónkirá tí janhan. A ntá tí sín tsítóehya tinkachónki sín tí janhan hasta tsjixín ná mé tsaá sín.

¹⁴ Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxí tsintáchro profeta Daniel* —ntá tí chojni sinchekuáxin tí xroon i mé chrókuienxin sín tíha—, a ntá tí chojni tjejó estado Judea ts'ikon la sátsji sín tsochriin sín jna tsjík'ejómá sín. ¹⁵ A ntá tí sín tjejó chrítaón nchia la í chrók'uinkajinhya sín, chrók'uienxin sín nkaxenhen nchia chrókuakitsje sín ichrén nkehe chóna sín. ¹⁶ Ntá tí sín tjejó nontee sín la í chrókjanhya sín naxá chrókjuikakja sín iké sín. ¹⁷ Ntá nóa tí chojni chjin ts'ejóyá tí yaon a la ko tí sín tjejónchekakí xjeen. ¹⁸ Chrókjuancheherá Dios kixin jehya nchakuen kin chrókónhen tíha. ¹⁹ A ntá tí yaon a mé imá kjuaxróxinhya ts'ejó chojni kixin ninkehó yaon kuénhya xikaha desde tí kjuankixín Dios kjuich'éna ch'án chjasintajni la ko kjá xikahya tsonhen chr'èxin inaá. ²⁰ A ntá tí chrókjuanjon Inchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhi la kjuikonóehé ch'án tí sín tsíkjeýá ch'án ntá k'uetjoan ch'án kixin tjoka ts'atsínka tí kjuachrakon a.

²¹ A ntá jnkojín nkexo tsontáchro kixin: “Tsjehe, ntihi itjen tí Cristo”, o tsontáchro sín kixin: “Tsjehe, ntiha tjen ch'án”, la titekáuénhyará sín. ²² Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jíé tjinkaon sín chrókjuich'iyexin sín chojni, kjonté tí sín tsíkjeýá Dios. ²³ A ntá jahará chrókóxakonhanrá kaín tíha. Tjéttjonkará senó kixin tsonohará kixin xikaha tsonhen.

Itsi tí Xjeen Dios K'óna Chojni

(Mt. 24.29-35, 42-44; Lc. 21.25-36)

²⁴ Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. ²⁵ A ntá tí konotsé la ts'anótjenxin nkajni la ko tí kjuachaxin sín nkaya nkajni la kjaxin tsínki. ²⁶ Ntá ts'ikon sín tí Xjeen Dios K'óna Chojni itsi chríkjan tjuí tsíkjo tí kjuachaxin jíé. ²⁷ Ntá tsochr'án ch'án tí sín ángel sátsji sín kuenté chjasintajni tsjíkjenájín sín kaín chojni tsíkjeýá ch'án.

²⁸ Chrókiénxinrá tí nkehe sjintayóaxian. Éxí yóhé tí nta t'óna to higo tíó sít'ayan kahnte ntá nohará kixin ts'ixenhen nchakuen sóa ²⁹ mé xikaha tíó ts'ikonrá xikaha tsonhen kaín tíha ntá tsonoxínrá kixin ó kuichjina tí tsjeje chjasintajni. ³⁰ Chaxín ntáxrxjan kixin kaín tíha tsonhen tí naxá t'enhya tí chojni sijn chjasintajni. ³¹ A ntá tí nkajni la ko tí chjasintajni mé ts'itjáyán. A ntá tí nkehe ntáxrxjan la ts'itjáyanya, tsoxiteyá tíha.

³² A ntá tí yaon la tí hora tsoxiteyá tíha la ninkexro noehya. Kjaxin noehya tí sín ángel tjejó nkaya nkajni la ko kjaxin tí Xjeen Dios K'óna Chojni la noehya. Ó jehó It'éni mé nohe.

* 13:14 Daniel 9.27; 11.31; 12.11

³³ Méxra chrók'uejotsjehérá, chrók'uejochonhénrú chrónixjehérá Dios kixin noahyará nkesá la ko nkehora tsonhen tíha. ³⁴ Éxí yóhe ijnko chojni sátsji kjín, a ntá tí naxá sátxixínhya ch'án ntøe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntøe ch'án, la jnkojnko sín ts'áyéhe sín jnkojnko xra kuènte sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia. ³⁵ Méxra jahará chrók'uejotsjehérá kixin noahyará nkesá tsokjan tí inché tí nchia a, á ijnko tsontanonte o á ijnko k'áxrótjen o á ijnko tjetæe tsje cochiká o á ijnko ts'inkaséyan. ³⁶ Ntá xrináhya tsi ch'án ts'itjáxin ch'án kixin tjeochrinrá. ³⁷ Mé xikaha tjonkará la ko xikaha ntátjan kaín chojni kixin chrók'uejotsjehe sín —ichro ch'án.

14

Tjoyá sín kixin nkexrí tsotsé sín tí ch'ín Jesús
(Mt. 26.1-5; Lc. 22.1-2; Jn. 11.45-53)

¹ Naxá t'itjáyan iyó yaon ntá tsjasin sín tí kia pascua, la ko sine sín tí niotja tsikjikhoya tí xroan nchek'ánkí niotja.

Ntá tí sín nchat'á t'etøan la ko tí sín maestro tjako tí ley mé kjueyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyan sín ch'án. ² Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókóninkaon sín —ichro sín.

Ijnko tjan kuikjitéxin aceite náxrjón xraxé ikja ch'ín Jesús
(Mt. 26.6-13; Jn. 12.1-8)

³ A ntá ch'ín Jesús kjuák'e ch'án chjasin Betania ntøe ch'ín Simón, tí ch'ín k'uéchonta chinlepra. A ntá tí tjene ch'ín Jesús ntá xrináhya ikui ijnko tjan kuikao tjan ijnko xro mé tjia tí aceite xraxé itsjo nardo, imá tjetæ tsik'ite. Ntá tí tjan a mé kuakitjehé tjan tí xro a ntá kuikjite tjan kja ch'ín Jesús tí aceite a. ⁴ A ntá iso tí sín tjejó ntiha kóninkakonhen sín tjan ntáchro sín kixin:

—¿Nkekuènte kjuínchexénhen tjan tí aceite náxrjón xraxé? ⁵ Ichá jína chrókóixixín iní ciento chichaoan denario tí aceite a ntá tí chichaoan a mé chrókujitønhen tí chojni nóa —mé xikaha ichro sín k'uántaxínjin sín tjan.

⁶ Ntá ntáchro ch'ín Jesús kixin:

—Nté títøhérá tjan; ¿nkekuènte t'antaxínhínrá tjan? Ó nchoxon tí nkehe kjuích'ena tjan. ⁷ A ntá tí chojni nóa la ó xráxín ts'ejókoará sín la jína tsjínkítसारá sín jnkojin yaon. Ntá janhan la jnkochríxínhya ts'ejóni. ⁸ Ntá jehe tjan kjuích'e tjan kaín nkehe tjínkaon tjan tsjanjon tjan. Ó senó kjuíncheka tjan xroan cuerpo kuèntana kixin tsoxravána. ⁹ Chaxín ntáxrjan kixin tí tsjako sín tí tan jína tsaáxin chojni nkuíxín chjasintajni ntá tsochronka sín kixin xikaha kjuích'e tí jehe tjan, a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

Ch'ín Judas kjuínchekji ch'án tí ch'ín Jesús
(Mt. 26.14-16; Lc. 22.3-6)

¹⁰ A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuítsjehe ch'án tí sín nchat'á t'etøan kixin tsochrónka ch'án nkexrí tsotsé sín tí ch'ín Jesús. ¹¹ A ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaoan ts'áyéhe tí ch'ín Judas. Ntá kjuankixin ch'án kjueyá ch'án nkexrí tsochrónka ch'án kixin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrankixixín kia sine sín niotja tsikjikhoya tí xroan nchek'ánkí nio tíó ts'óyan sín tí kolélo kuènte kia pascua. A ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjínkávan sátsjini sincheyaxíinni kixin sineni kuènte tí kia pascua? —ichro sín.

¹³ Ntá k'uætuenhen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá ntiha tsoxetará ijnko ch'ín yámá tóa tjia ntá. Tí ch'ín a tsochréhérá. ¹⁴ A ntá tí nchia ts'ixenhen ch'án la tsjanchankíhírá tí inché nchia, tsontáchrórá kixin: “K'uætøan tí Maestro kixin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xikaha mé tsixrorá. ¹⁵ Ntá tsjakøhará ch'án ijnko cuarto jíe, yóxin piso mé chóna kaín nkehe t'ichjánxin. Mé ntaha mé síncheyaxíinrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xikaha k'uitja sín. Ntá tí cuarto a mé kjuíncheyaxíin sín tí nkehe sine sín kuènte tí kia pascua.

¹⁷ A ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha. ¹⁸ Ntá k'uéjó sín, a ntá tíó tjejóne sín ntá ntáchro ch'ín Jesús kixin:

—Chaxín ntáxrjan kixin ijnko tí jahará tjejóne jnkokoá ntihi mé sinchekjiráni —ichro ch'án.

¹⁹ Ntá jehe sín mé kjuankixin k'uává sín. Ntá kjuankixin sín jnkojnko kjuanchankíhi sín tí jehe ch'án kixin:

—¿Á janhan ní? —ichro sín.

²⁰ Ntá kjuátehe ch'ín Jesús ntáχρο ch'án kixin:

—Jehe ch'án mé ijnko tí teyóxinrá, mé tí nkexro tjeñekian jnkokoá plato ntihi. ²¹ Chaxín tí Xjeen Dios K'óna Chojni mé tsonhen éxi nixja xroon itén Dios. Kjánchó nóa tí ch'ín sinchejki ch'án. Íchá jína tí ch'ín a la chrókokjehya ch'án —mé xíkaha ichro ch'án.

²² A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'ó ch'án tí niotja ntá kjuanjon ch'án k'uáyéhe sín. Ntá ntáχρο ch'án kixin:

—Interá, tíhi mé cuerpo kuèntana —ichro ch'án.

²³ Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uú sín kaín sín tí nkehe tjá. ²⁴ Ntá ntáχρο ch'án kixin:

—Tíhi mé jñina mé chrónkaxín kixin chaxín tsoxiteyá tí nkehe ñixin tsonhen na mé ts'itji kixin tsaáxin nchónhya chojni. ²⁵ Chaxín ntáxrjan kixin ts'íhya janhan tí inté to uva inaá tí naxá tsjixrakáhya tí yaon itsi kjuachaxin kuènte Dios, a ntá tí yaon a xik'ía inté to uva ñixin —mé xíkaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án
(Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuènte Dios ntá sákjuí sín tí jñá Olivo. ²⁷ Ntá ch'ín Jesús ntáχρο ch'án kixin:

—Ijie tie kaín rá tsochrakonrá ntá tsjtonará. Ntá tsoxiteyá éxi ntáχρο xroon iten Dios kixin: “Ts'óyan sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”* ²⁸ A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáχρο ch'ín Pedro kixin:

—Kjónté kaín sín tsítóha sín ntá janhan la náhi —ichro ch'án.

³⁰ Ntá ntáχρο ch'ín Jesús kixin:

—Chaxín ntáxrjan kixin ijie tie tí naxá tsjehya kochintóa yáya, la jaha mé sinchemána nía kixin chonhyana, tsixrua —ichro ch'án.

³¹ Ntá itsen kjuátehe ch'ín Pedro ntáχρο ch'án kixin:

—Kjónté koína its'én la sjintamáhya tí jaha —ichro ch'án.

La ko xíkaha ntáχρο sín kaín sín.

Ch'ín Jesús nixjeexín ch'án Dios tí Huerto Getsemaní
(Mt. 26.36-46; Lc. 22.39-46)

³² Ntá kjuíji sín ijnko nonte mé it'ín Getsemaní. Ntá k'ueñenhen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixjahá Dios —ichro ch'án.

³³ Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankixin imá k'uává asén ch'án kóxakonhen ch'án. ³⁴ Ntá ntáche ch'án sín kixin:

—Imá t'ává asenná éxi chrók'uéñ xíkaha. Ijie la ntihyó titóhará tjejotsjehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'ín ch'án. Ntá kjuankixin chrónóhehe ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a. ³⁶ A ntá ntáχρο ch'án kixin:

—It'eni jaha. Jaha mé chonta kaín xín kjuachaxin na ntá chrónóghani tsjakjínhinni kaín tí jínahya tsonhenni tsjasóteni jie. Jehya kixin chrókónhen éxi tjínkaonni jeheni. Náhi. Éxi tjínkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora? ³⁸ Ijie la tjejotsjehérá la ko chrónóhéhé Dios kixin títoehya ch'án tí jínahya chrókjuichroerá. Tí asánrá ntáχρο kixin chrókjuinchexiteyará tí jína kjánchó tí cuépporá la tsjachahya —ichro ch'án.

³⁹ Ntá sákjuí ch'án inaá chrónóhehe ch'án Dios. Ntá ó jehe xíkaho xínixja ch'án. ⁴⁰ Ntá ikjan ch'án la ó tjejójua sín inaá kixin kuíhí sín kotáchrin. Ntá í noehya sín nkexrí chrókjuatehe sín.

⁴¹ Ntá nixin sáxíkji ch'án ntá kjan ch'án ntá ntáχρο ch'án kixin:

* 14:27 Zacarías 13.7

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín ch'óna jie sinchejkasóte sín ch'án. ⁴²Ntá t'áyará sátsjini kixin ó kjuí tí nkexro sinchejkjina.

Sákjuiko sín tí ch'ín Jesús tsjak'echjina ch'án
(Mt. 26.47-56; Lc. 22.47-53; Jn. 18.2-11)

⁴³Naxá tjenixja ch'ín Jesús ntá xrinahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuikao ch'án kjuíjiko sín ch'ica espada la ko inta. Na mé kjuachaxién tí sín nchat'á t'etqan la ko tí sín maestro tjako tí ley la ko tí sín táda t'etqan njnko mé kjuixjn sín.

⁴⁴A ntá tí ch'ín Judas mé tí ch'ín sinchejki tsintáchro ch'án kixin:

—Tí ch'ín sinekian kochíto mé jehe tíha la itserá ch'án sátsjikoará ch'án —ichro ch'án.

⁴⁵Ntá kjuí sín ntá tuénxin kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto. ⁴⁶A ntá tí sín kjuíji mé tsé sín tí ch'ín Jesús, sákjuiko sín ch'án.

⁴⁷A ntá ijnko ch'ín tjentaxín ntíha mé kuakitsje ch'án ch'ica espada kóchrínjin ch'án tatsjon tí ch'ín ch'ehe tí nchat'á t'etqan xra. ⁴⁸Ntá ch'ín Jesús mé ntáche ch'án tí sín a kixin:

—¿Nkeuènté kixin éxí chrótserá xíchee mé xíkaha k'uinkakoará ch'ica espada la ko inta kixin tsotseráni? ⁴⁹Kaín yaon kjuak'é nkaxenhen njnko kjuákohará, ¿ntá nkeuènté tsehyaráni? Kjánchó t'ichjánxin xíkaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰Ntá kaín tí sín k'uájiko ch'án na mé kuítqhe sín ch'án jehó ch'án ntá sákjuí sín.

Jnko ch'ín ntasoá sákjuixín ch'án ntíha

⁵¹A ntá ijnko ch'ín ntasoá mé kjaxín tinkáchréhe ch'án ntíha, a ntá jehó ijnko kamantá tjesáte ch'án, ntá kjaxín itsé sín ch'án. ⁵²Kjánchó tí ké ch'án ó tsítsé sín ntá kjónté tjóchin ch'án sákjuí ch'án.

Ch'ín Jesús kóchjina ch'án tí tjejó tí sín t'etqan

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³Ntá sákjuiko sín tí ch'ín Jesús tí ntqe tí nchat'á imá t'etqan. Ntaha mé tsíkjónkotsé kaín tí sín nchat'á t'etqan la ko tí sín táda t'etqan njnko la ko tí sín maestro tjako tí ley. ⁵⁴Ntá ch'ín Pedro la ikjín tjechréhe ch'án ntá kjuíji ch'án tí ntásin ntqe tí nchat'á imá t'etqan a. Ntaha síche xrohi. A ntá ntíha tjejótxaxín tí sín policia tjejóchjixrohe sín, ntá kjaxín ch'án ntahó kuítqhe ch'án tjechjixrohe ch'án.

⁵⁵Ntá tí sín t'etqenhen tí sín nchat'á la ko kaín tí sín t'etqan kjuéyá sín chojni kixin tsochrónka sín nkehe tí jie ch'óna ch'ín Jesús kixin jína chrók'óyán sín ch'án. Kjánchó ninkexró k'uitjahya sín tsjinktsa tsochrónka. ⁵⁶Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín. ⁵⁷Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸—Jeheni ó kuínhini kixin ntáchro ch'án kixin ts'óxlka ch'án tí njnko tsíkjich'énaxín chojni tja ntá iní yaon koá la ó tsjak'e ch'án í jnko njnko jehya chojni sich'éna[†] —ichro sín.

⁵⁹Kjónté xíkaha la jnkokónhya tí nkehe chrónka sín.

⁶⁰Ntá tí ch'ín t'etqenhen tí sín nchat'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

—¿Á ninkehó tjeqehya jaha? ¿Á chaxín tí jie t'eka sín tí jaha? —ichro ch'án.

⁶¹Ntá ch'ín Jesús tání ch'án la ninkehó tjeqehya ch'án. Ntá xíkjanhankí tí nchat'á t'etqan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶²Ntá ntáchro ch'ín Jesús kixin:

—Chaxín janhan tíha. Ntá chr'éxin ts'ikonrá kixin tí Xjeen Dios K'óna Chojni mé tsjak'etjaxín ch'án tí tja chjina kjuachaxín kuènte Dios la ko itjuí mé ts'inkajinxín ch'án nkaya nkajní —ichro ch'án.

⁶³A ntá tí nchat'á t'etqan kótséchje ch'án tí iké ch'án kjuákoqxín ch'án kixin imá nínkaon ch'án ntáchro ch'án kixin:

—T'ichjánxinhya í so chojni tsochrónka nkehe. ⁶⁴Jahará ó kuínhínrá kixin k'uántaxínjin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kixin chrók'uen ch'án.

⁶⁵Ntá ikjé sín la kjuankixin sín kujkíte sín ch'án ntate sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuènte njnko chjéhe sín nkayakon ch'án.

[†] 14:58 Juan 2.19

Ch'in Pedro kjuínchemá ch'án kixin chónhya ch'án tí ch'in Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ntá tí ntásin nonte itjen ch'in Pedro. Ntá ikui ijnko tjan ch'ehe tjan xra tí ncha't'á t'et'otan.
⁶⁷ Ntá k'uikon tjan kixin tjechjixrohe ch'in Pedro. Ntá komá tjan ch'án ntá ntáchro tjan kixin:
—Jaha la kjaxin xrikoa tí ch'in Jesús kjuixin chjasin Nazaret —ichro tjan.

⁶⁸ Ntá ch'in Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrjexin ch'án ntíha sákjui ch'án ntója. Ntá xringhya itsje ijnko kochint'oa. ⁶⁹ Ntá tí tjan a mé k'uikon tjan tí jehe ch'án ntá chénka tí sín sintaxin ntaha kixin:

—A ntá tí ch'in i mé jnkojin tí sín a —ichro tjan.

⁷⁰ Kjánchó kjuínchemá ch'án inaá. Ntá antsi chr'éxin tí sín k'uéjontaxin ntáche sín tí ch'in Pedro kixin:

—Chaxin kjaxian jaha tsikjixian estado Galilea kixin tjatsqanxinni kixin nixja jaha éxi nixja tí jehe sín —ichro sín.

⁷¹ Ntá ch'in Pedro kjuankixin ch'án kjuínchenohe ch'án Dios ntáchro ch'án kixin:

—Chonhya tí ch'in ntáchrórá jahará —ichro ch'án.

⁷² Ntá yóxin itsje kochint'oa. Ntá ch'in Pedro mé xraxinkaon ch'án kixin nkexrí ó chrónka ch'in Jesús kixin: “Naxá tsotsjehya kochint'oa yáya mé ó tsjixin sinchemána nuya kixin chonhyana.”[‡] Ntá xraxinkaon ch'án tíha la ntá kjuankixin ch'án tsjánka ch'án kixin ntoáhya kjuíche ch'án kjuínchemá ch'án tí ch'in Jesús.

15

Ch'in Jesús nkayakon tí ch'in Pilato

(Mt. 27.1-2, 11-14; Lc. 23.1-5; Jn. 18.28-38)

¹ A ntá ó k'uinkaséyan ntá tí sín ncha't'á t'et'otan kójnkotséko sín tí sín táda la ko tí sín tjako tí ley la ko kaín tí sín t'et'otan kuènte núnko mé kójnkotsé sín ikjo kichó sín. Ntá kjuixin ntá kjuíncheneteto sín tí ch'in Jesús ntá kjuíkaán sín ch'án tí tjen tí ch'in Pilato. ² Ntá tí ch'in Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'in Jesús ntáchro ch'án kixin:

—Kjaxian jaha ntáchrúa —ichro ch'án.

³ A ntá tí sín ncha't'á t'et'otan mé k'ueka sín ch'án nchónhya jie. ⁴ Ntá ch'in Pilato xíjanchankí ch'án inaá ntáchro ch'án kixin:

—¿Jaha, nkekuènté tjetehya ninkehó? Tsjehé kixin nchónhya jie t'eka sín tí jaha —ichro ch'án.

⁵ A ntá ch'in Jesús la ninkehó kjuáteehya ch'án. Ntá ch'in Pilato la í noehya ch'án nkehe tsjenkayáxin ch'án.

K'uáyéhe ch'in Jesús kixin sinchekjasóte sín ch'án ntá its'en ch'án

(Mt. 27.15-31; Lc. 23.13-25; Jn. 18.38—19.16)

⁶ A ntá ch'in Pilato mé kuènnen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxi tjinkaon tsjanchia tí sín tsikójnkotsé tí kia a. ⁷ A ntá ntíha tjechjina ijnko ch'in mé it'in Barrabás, la ko í so sín kuítেকakuenhya sín tí síxregé ntá k'óyán sín chojni.

⁸ Ntá kui nchónhya chojni kjuankixin sín kjuanchehe sín tí ch'in Pilato kixin chrókjuíche ch'án éxi kaín nánó xíkaha. ⁹ Ntá kjuátehe ch'in Pilato kixin:

—¿Á tjinkáonrá tsjtoha sátsji tí ch'in Rey t'etuenhen tí sín judío? —ichro ch'án.

¹⁰ Mé xíkaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín ncha't'á t'et'otan, a ntá tsé sín tí ch'in Jesús kjuíkénhen sín ch'án. ¹¹ A ntá tí sín ncha't'á t'et'otan a mé kjuínchekóninkaon sín kaín tí chojni sín, ntáche sín kixin íchá jina chrókjuanchia sín kixin chrók'uatjánta ch'án tí ch'in Barrabás. ¹² Ntá ch'in Pilato kjuanchankí ch'án ntáchro ch'án kixin:

—A ntá tí ch'in tikítexinrá kixin ch'in Rey t'etuenhen tí sín judío la ¿nkehe tjinkáonrá sjt'aha ch'án? —ichro ch'án.

¹³ Ntá jehe sín kjuátehe sín k'óyako sín kjuanchia sín kixin:

—¡Tjakénkánia ch'án ntacruz!

¹⁴ Ntá ch'in Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuíche ch'án? —ichro ch'án.

Kjánchó antsi má itsen k'óyako sín kjuanchia sín kixin:

—¡Tjakénkánia ch'án ntacruz! —ichro sín.

¹⁵ Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uúxité ntá kuitohe ch'án káxin sátsji tí ch'ín Barrabás. Ntá k'uetqan ch'án káxin tsjate sín tí ch'ín Jesús. Ntá kjuixín ntá kjuanjón ch'án kjuachaxín káxin tí sín soldado sátsjiko sín ch'án tsjak'enkani sín ch'án ntacruz.

¹⁶ Ntá tí sín soldado a mé sákjuiko sín ch'án tí ntásin tí palacio. Ntaha kójnkotséxin kaín tí sín soldado. ¹⁷ Ntá ntíha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'í. ¹⁸ Ntá kjuankáxin k'uúxité sín ntáchro sín káxin:

—Jnkochrín tsjak'e tsétuēnhén tí sín judío —ichro sín.

¹⁹ Na ntá ntavara chjéhe sín ikja ch'án na ko ntáté sín kuikite sín ch'án. K'uejóxín toch'in sín nkayakon ch'án kjuich'eyáxín sín éxí imá chrókjuikosáyehe sín ch'án. ²⁰ Ntá tió kjuixín xikaha kjuich'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsikjinchek'inkáya sín ch'án ntá kjuínchek'inkáya sín ch'án iké ch'án xráxín inaá. Ntá kuakitsjexín sín ch'án ntíha sákjuiko sín ch'án káxin ntá tsjak'enkani sín ch'án ntacruz.

Ntá kjuak'enkani sín ch'ín Jesús ntacruz

(Mt. 27.32-44; Lc. 23.26-43; Jn. 19.17-27)

²¹ A ntá ijnko ch'ín tsikjixín chjasín Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsikjixín ch'án nqntee ch'án, ntá k'uátsinka ch'án ntíha. Ntá tí sín soldado a mé k'uetuēnhén sín ch'án káxin tsochréhe ch'án tsamá ch'án tí ntacruz tsjak'enkani ch'ín Jesús.

²² A ntá sákjuiko sín tí ch'ín Jesús ijnko tjo it'in Gólgota, na mé nkívee sín t'axrxjén káxin Tjo Calavera. ²³ Ntá ntíha chjéhe sín ch'án xranvino tsík'ixinkikjanxín xroqan mirra chrók'ui ch'án, kjánchó k'uíhja ch'án. ²⁴ Ntá tí sín soldado kjuak'enkani sín ch'án tí ntacruz a. Kjuixín ntá kjuich'exín sín suerte tí ké ch'án káxin tsgnohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkani sín ch'án tí ntacruz a. ²⁶ Ntá ikja tí ntacruz kjuak'enkani sín ijnko ntachiso ntsi tsikjin sín nixja nkekuente kjuínchekjasóte sín ch'án na mé ntáchro káxin: “Jehe ch'án mé Rey kuente tí sín judío”. ²⁷ Na ko jxáxin k'uejóyáni sín ntacruz yaá tí síchee la ijnko la nángo chjina la í jnko la nó kjon tí tjen ch'ín Jesús. ²⁸ Na mé xikaha xiteyá éxí nixja xroon itén Dios ntáchro káxin: “Éxí yóhe ijnko chojni kjuasin jie mé k'uíkon sín ch'án”*.

²⁹ Ntá tí sín k'uátsinka ntíha mé kjuanoá sín ch'án la ko k'uántaxínhín sín ch'án tinkátjá kja sín ntáchro sín káxin:

—Kjá na ntáchrúa káxin chrók'oxíka tí njnko, a ntá iní yqon koá la ó chrókjuixín chrókjuich'ena inaá,† ichrua. ³⁰ Ncheakaá qasán jahvá tjasinkajinxíán tí ntacruz méhe —ichro sín.

³¹ Ntá tí sín nchát'á t'etqan la ko tí sín tjako tí ley mé kjuanoá sín ch'án ikjo sín kichó sín káxin:

—Ó kjuíncheakaá ch'án chojni ókjé ntá jehe ch'án mé xitjahya sincheakaá ch'án asén ch'án. ³² A ntá chaxín jehe ch'án tí Cristo tí Rey kuente tí nación Israel ntá chrók'ui konni káxin jehó ch'án chrókjuinkajinxín ch'án asén ch'án tí ntacruz ntá kjaxín chrókuiteakonni ch'án —ichro sín.

Kjonté tí yaá sín kjaxín tjejóyáni ntacruz mé k'uántaxínhín sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkxín mé k'uúxín tie kuenté chjasintajni, kóxrjehen tí sítié hasta las tres kónjín ³⁴ ntá tí hora a mé itsen k'uéya ch'ín Jesús ntáchro ch'án káxin:

—Eloi, Eloi, ¿lama sabactani? —tí nkívee sín mé t'axrxjén káxin: It'eni, It'eni, ¿nkekuente kuitohéni?,‡ mé xikaha ichro ch'án.

³⁵ Ntá iso sín síin ntíha kuínhín sín, ntá ntáchro sín káxin:

—Tinhínrá káxin t'iyéhe ch'án tí ch'ín Elías tí ch'ín k'uechrónka itén Dios ósé —ichro sín.

³⁶ Ntá ijnko tí jehe sín síin ntíha kuínká ch'án kuákja ch'án ijnko ka ntá kjuínchekjataxín ch'án vino náxrxónhya ntá kjuak'ekjen ch'án ijnko nta kjínjin ntá kjuínchekjina ch'án tí tjen ir'va ch'ín Jesús chrók'ui ch'án tí vino náxrxónhya. Ntáchro tí ch'ín a káxin:

—Tsitoheni tsotsjeheni á chaxín tsi tí ch'ín Elías tsjinkajín tí jehe ch'án —ichro ch'án.

³⁷ Ntá ch'ín Jesús itsen k'uúyato ch'án ntá kjuixín k'uén ch'án. ³⁸ A ntá tí ka tjenkakuénxín nkaxenhen njnko mé yaá k'óna k'uichje kjuankáxixín noi la hasta nonte k'uichje. ³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án káxin xikaha ó kjuixín k'uén ch'án ntá ntáchro ch'án káxin:

* 15:28 Isaías 58.12 † 15:29 Marcos 14.58; Juan 2.19 ‡ 15:34 Salmo 22.1

—Chaxín tí nkexro í la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjin k'uejó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'in tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé. ⁴¹ A ntá tí chojni chjin í mé kuinkáchréhe sín tí ch'in Jesús ntá kjuíkəo sín ch'án kixin k'uejkjinkitsa sín ch'án tí k'uejkak'e ch'án estado Galilea la ko kjaxin í so chojni chjin inaá chréhe sín ch'án sákjuiko sín ch'án chjasin Jerusalén.

Ntá xrává ch'in Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'oyaxínhin sín kixin tí xrankixixín tí yaon t'ok'éhe sín, ⁴³ mé kui ijnko ch'in it'in José chjasen ch'án mé Arimatea. Jehe ch'án mé koí ch'án t'etəon ch'án tí xra kuente tí síxreé. Kjaxin jehe ch'án tjechónhen ch'án itsi tí kjuachaxin kuente Dios. Chrakonhya ch'án sákjuí ch'án ntəe ch'in Pilato kjuíkjanchia ch'án tí cuerpo kuente ch'in Jesús. ⁴⁴ Ntá ch'in Pilato chrakon ch'án kixin ó tsíkjin tsík'en ch'in Jesús, ntá k'uiyehé ch'án tí ch'in capitán a kjuanchankihi ch'án kixin á chaxin xikaha kónhen. ⁴⁵ Ntá chrónka tí ch'in capitán kixin chaxin ó kjuixin k'uén ch'án. Ntá kuínhin ch'in Pilato xikaha ntá kjuanjon ch'án kjuachaxin kixin tsjikakja ch'in José tí cuerpo kuente ch'in Jesús. ⁴⁶ Ntá ch'in José mé k'uəna ch'án ijnko ka sávana náxrjón. Ntá kjuinkajin ch'án tí cuerpo kuente ch'in Jesús, a ntá jehe tí ka a mé kjuínchek'ísimá ch'án tí cuerpo kuente ch'án. Ntá kjuak'enkaya ch'án ijnko tőye tsixrayá itjo. Ntá ijnko xro jié mé k'uijkəxin ch'án tí ntója tí tőye. ⁴⁷ A ntá tí tjan María Magdalena la ko tí tjan María iné ch'in José mé k'uíkon sín nketí xrává ch'án.

16

Ó xechón ch'in Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uaátsínka tí yaon t'ok'éhe sín ntá tí tjan María Magdalena la ko tí tjan María iné ch'in Jacobo la ko tí tjan Salomé mé k'uəna sín xroəon xraxé sátsjiko sín sincheka sín tí cuerpo kuente ch'in Jesús. ² Ntá imá nchítjen tí yaon xrankixixín tí semana mé kjuíji sín tí tőye tsixravá ch'án, na mé ó kjuítəon yaon. ³ A ntá jehe sín mé tinkáko kichó sín kixin:

—Xá nkexro tí chrókuakjinhinni tí xro tjejkəxin tí tőye? —ichro sín.

⁴ A ntá xrinahya k'uíkon sín kixin ó tsíkjin tsíkjin tí xro jié tjejkəxin tí tőye kixin í tjenhya éxi k'uejkak'e senó. ⁵ Ntá kjuíji sín ikon tí tőye ntá k'uíkon sín kixin tjetjəxin ijnko ch'in ntasoá tí tja sín chjina tjenkáya ch'án ka kjinjin tjóá ntá imá chrakon sín k'uíkon sín. ⁶ Ntá ntáchro ch'án kixin:

—Chrakonhyará. Ó nóna kixin xritjéyará jahará tí ch'in Jesús tsíkjin chjasin Nazaret kjuák'enkáni ch'án ntacruz. Ntá ó tsixechón ch'án í kohya ch'án ntihi. Tsjeherá tí tsíkjak'e sín ch'án. ⁷ Ntá sátsjirá tjičenkará tí sín k'uek'ajiko ch'án la ko tí ch'in Pedro kixin tí ch'in Jesús senó sátsji ch'án estado Galilea ntá ntaha tsoxetará ch'án éxi tsichrónka ch'án —mé xikaha chrónka tí ntasoá a.

⁸ Ntá tí chojni chjin a mé sákjuixin sín tí tsixravá tí ch'in Jesús imá síxrankə sín chrakon sín. Ntá naxə chenkahya sín ninkexró kixin chrakon sín.

Ch'in Jesús titəya xeta tí tjan María Magdalena

(Jn. 20.11-18)

⁹ Tió tsíkjin tsixechón ch'in Jesús nchítjen tí yaon xrankixixín semana ntá titəya xeta ch'án saoxín tí tjan María Magdalena na mé jehe tjan tsíkakitsəxin ch'án yato nchakuen tí jinahya. ¹⁰ Ntá sákjuíchenka tjan tí sín k'uek'ajiko tí jehe ch'án t'avá sín tsjánka sín. ¹¹ A ntá tió kuínhin sín kixin tjechón tí ch'in Jesús kixin xikaha tsík'ikon tjan la kjónté kuítekakonhya sín.

Iyo sín k'uek'ajiko ch'in Jesús titəya k'uíkuən sín tí jehe ch'án

(Lc. 24.13-35)

¹² A ntá chr'éxin ntá iyó tí sín a titəya k'uíkuən sín tí ch'in Jesús, ókjé nkexrí tsjehe ch'án. Tí sín a mé tjejóti sín ntəa sátsji sín ijnko nonte. ¹³ A ntá jehe sín sákjuíchenka sín tí sín í so a; la kjónté xikaha la kuítekakonhya sín.*

Ch'in Jesús k'uetuenhen ch'án tí sín k'uek'ajiko ch'án tí xra sich'e sín

(Mt. 28.16-20; Lc. 24.36-49; Jn. 20.19-23)

¹⁴ A ntá tió kjuixixín la titəya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuenté icha asén sín tsíkitekakuenhya sín tí sín tsík'ikon kixin tsixechón ch'án. ¹⁵ Ntá ntáche ch'án sín kixin:

* 16:13 Lucas 24.13-35

—Sátjirá kuenté chjasintajni tjákoherá kaín xín chojni tí tan jína tsaáxin sín. ¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte. ¹⁷ Ntá tí sín tsinkáchónki tí janhan mé tsjasin sín kjuaxroan kíxin kjuachaxin n̄ina tsakitsjexín sín tí nchakuen tí jínahya chóna chojni la ko tsonixja sín ókjé nkíva. ¹⁸ Kjónté konche chrótsé sín la kohya nkehe tsónhen sín la ko kjónté chrók'ui sín ijnko ntá chóna veneno la kohya nkehe tsónhen sín. Kjaxín ts'ejotja tja sín chojni níhi la tsitohe sín jína.

Ch'in Jesús ch'ín ch'án nkaya nkajni
(Lc. 24.50-53)

¹⁹ Ntá ó kjuixín nixjehe Ìnchéni Jesús tí jehe sín ntá sákjuí ch'án nkaya nkajni. A ntá ntiha kjuák'etjaxín ch'án tí tja chjina Dios. ²⁰ A ntá jehe sín sákjuí sín nkuíxín sákjuíkjakó sín tí tan jína tsaáxin chojni. A ntá jehe Ìnchéni mé kjuínkítsa ch'án tí sín a la ko kjuachaxién ch'án mé kjuasixín sín kjuaxroan kíxin tíha mé tsonoexín tí sín tjejótinhin kíxin chaxín nkehe kuénte Dios kjuako sín. Amén.

Tí tan jína chrónka ch'ín Lucas

Tíhi mé xránkixín tí xroon í

¹ Nchónhya chojni tjínkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uejóni. ² Éxi kjuáqoheni tí sín tsík'ikonxín kon sín tí xránkixín nkehe k'uátsínka ch'án la ntá k'uáyéhe sín tí xrá sákjuíchronka sín tí tan jína ³ a ntá janhan kjaxian kjuánchánkiá jína kaín nkehe k'uátsínka tí xránkixín. Ntá nóna jína ikjian kaín tíha éxi tsíkónhen ntá tsochr'anhan jaha Teófilo kixin imá tjuáha ⁴ kixin ntá jaha tsonoha jína tí nkehe chaxín tsíkjakoha sín.

Ijko ángel mé chrónka kixin tsokjîhi Juan Bautista

⁵ A ntá tí ch'ín rey Herodes k'uetóan ch'án tí estado Judea la ko ntiha kjuák'e ijnko nchát'á mé it'in Zacarías. Jehe ch'án mé kuènte tí sín tsík'axrjenixin tí ch'ín Abías. * A ntá ichjién ch'án mé it'in Elisabet. Jehe tjan mé tsík'axrjenixin tjan tí nchát'á Aarón. ⁶ Yói sín na mé jína sín kixin éxi tjínkaon Dios la mé kjuínchexiteyéhe sín kaín nkehe k'uetóan ch'án. Méxra ninkexró chrók'uekahya jé tí jehe sín. ⁷ A ntá jehe sín chónthya sín xjeen sín kixin ó jéhi tsík'ítoenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

⁸ A ntá ijnko yaon tónhen tocar ch'ín Zacarías la ko tí í so sín tjejóko ch'án sich'e sín xrá nchát'á kuènte Dios. ⁹ A ntá xikaha kuènenhén tí sín nchát'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuènte nínko tsjak'e ch'án chjincó chritaón tí altar kuènte Dios. ¹⁰ Ntá kjuák'e ch'án ntiha kjuák'e ch'án tí chjincó la nachrohe kaín tí chojni k'uejó sín ntója nixjehe sín Dios. ¹¹ Ntá xringhya k'uikon ch'ín Zacarías ijnko ángel kuènte Dios tjexín toté ch'án nángo chjina tí altar tjak'exín sín chjincó. ¹² A ntá tió k'uikon ch'ín Zacarías tí ángel la imá kóxakonhen ch'án la ko imá chrakon ch'án. ¹³ A ntá ntáchro tí ch'ín ángel kixin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sinchek'ian xjan Juan. ¹⁴ Jaha la tsocháhá má la ko itsjé chojni tsochéhe sín kixin tsokjîhi xjan ¹⁵ kixin imá tjetoan tsjak'e tí xjaan éxi tóxrjínhin Dios. Nínkehó xran vino la ko nínkehó í jnko xran ts'ihya ch'án. Tsochónthya ch'án kjuachaxin kuènte Nchakuen Dios kjónté náxa tokjéhya ch'án. ¹⁶ Jehe ch'án mé tsjakóhe ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios. ¹⁷ Jehe ch'ín Juan tsítaón ch'án ntja tsixin Ìnchéni. Éxi k'uekjako ch'ín Elías ósé mé tsjako ch'án la ko tsochónthya ch'án kjuachaxin éxi k'uechónthya ch'ín Elías kixin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kixin ó itsi Ìnchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kixin:

—¿Nkexrí chrókónthya kixin chaxín chrókónhen tíhi? Janhan la ó tádana la ko tí chjín chonta la kjaxin ó nána tjan —ichro ch'án.

¹⁹ Ntá kjuátéhe tí ch'ín ángel ntáchro ch'án kixin:

—Janhan mé Gabriel la mé t'áha xrá Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe jína tsonhen. ²⁰ A ntá jie kuitekákónhya tí nkehe xrjanka a ntá tsonósian jaha xitjahya tsonixja jaha tsoxitjajia tí yaon tsokjîhi tí xjaan. Mé xikaha tsonixjehe kaín tíha —ichro ch'án.

²¹ A ntá tí í so sín ntiha k'uejóchónhen sín ntója nínko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen nínko. ²² Ntá tió k'uaaxrjexín ch'ín Zacarías tí nkaxenhen nínko la í xitjahya nixja ch'án. Ntá kónohe sín kixin ichrén kjuaxroan kuènte Dios tsík'ikon ch'án tí nkaxenhen nínko. Ntá itja ch'án ó tjakóxin ch'án tí nkehe chróntáchro ch'án kixin í xitjahya nixja ch'án.

²³ A ntá tió kjuixin tí yaon kjuích'e ch'ín Zacarías xrá nínko ntá sákjuí ch'án ntóe ch'án. ²⁴ A ntá chr'éxin ntá kjuák'eyá tí ichjién ch'án Elisabet. Ntá ntóe tjan ó kuítóhe tjan in'ó nitjó kjuenkayáxin tjan kixin: ²⁵ “Mé xikaha ijnko kjuaxroan kjuanjón Ìnchéni kixin chrók'uantaxiényani chojni kixin ó tsochóntani xjeenni jie chrókjuikosáyeheni sín”, ichro tjan.

Ijko ángel chrónka kixin tsokjîhi Jesús

²⁶ A ntá k'uátsínka injón nitjó ntá Dios k'uetuenhen tí ch'ín ángel Gabriel kixin sátsji ch'án ijnko chjasin estado Galilea mé it'in Nazaret, ²⁷ sátsji nixjehe ch'án ijnko tjan tjarisoá náxa kuákjahya tjan chojni ntoa mé it'in tjan María. Jehe tjan mé tsíkjatéhe tjan kixin tsotéhe tjan

* 1:5 1 Crónicas 24.10

ijnko ch'ín mé it'ín José, mé tsík'axrjeníxin ch'án tí ch'ín rey David. ²⁸ A ntá tí ch'ín ángel k'uixenhen tí tjen tjan ntá ntáchro ch'án kíxin:

—K'uinka nixjaha jaha kíxin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uikon tjan tí ch'ín ángel na mé kóxakonhen tjan kjuenkayáxin tjan kíxin nkeuènte xíkaha nixjeheni ch'án, ichro tjan. ³⁰ A ntá ntáchro tí ch'ín ángel kíxin:

—Chrakonhya, María. Dios la imá tjetjinkítsa tí jaha. ³¹ A ntá jie la tsjak'èyá jaha, tsochonta ijnko xjan ntoa la ko sinchek'ian xjan Jesús. ³² Imá ts'etqan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'etqan ch'án éxi ijnko rey éxi k'uetoan ch'ín David, tí nkexro ts'axrjeníxin ch'án. ³³ Jnkochrínín tsjak'e ch'án ts'etuenhen ch'án tí sín nacióon Israel, la mé tsjejehya tí kjuachaxin ts'etqan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kíxin:

—¿Nkeuènte kíxin xíkaha chrókónhen kíxin janhan la naxá chontahya chojni ntoa? —ichro tjan.

³⁵ Ntá kjuatèhe tí ch'ín ángel, ntáchro ch'án kíxin:

—Tí Nchakuen Dios mé ts'inkajin éxi ijnko tjuj la ko tí kjuachaxin kuènte Dios mé tsjak'etja tí jaha, a ntá ts'óna tí xjan. Mé xíkaha tí xjan tsokjíhi la mé tjóá xjan la mé its'in xjan Xjeen Dios. ³⁶ La ko kjaxin tjan Elisabet kjéhya jaha kjónté ó nána tjan la mé tjeýá tjan. Senó la k'uéchóntahya tjan xjan, a ntá jie la ó injon nitjó tjeýá tjan. ³⁷ Kíxin tí kjuachaxién Dios la tsjacha tsonhen kaín xín nkehe —ichro tí ch'ín ángel.

³⁸ Ntá ntáchro tjan María kíxin:

—Janhan mé t'aha Ìnchéni Dios xra. Ó nchoxon tí nkehe k'uetoan ch'án sintaxiteyáha ch'án éxi chronka jaha —ichro tjan.

A ntá kjuixin chónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ A ntá ijnko yaon tí tjan María tjan sákjuí tjan ijnko chjasin tjen tí jna estado Judea. ⁴⁰ Ntá kjuíji tjan tí chjasin ntiha ntá k'uixenhen tjan ntqo ch'ín Zacarías la ntá nixjehe tjan tí tjan Elisabet. ⁴¹ A ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxién Nchakuen Dios ⁴² ntá itsen nixja tjan ntáchro tjan kíxin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaan ch'án tí xjaan. ⁴³ ¿Xá nkexro tí janhan kíxin kjuínixjana iné Ìnchéni? ⁴⁴ Tió kuínhan nixjana ntá tí xjan la chrika xjan nkaya tseña kíxin chéhe xjan kjuíha. ⁴⁵ Ntá jaha la cháha kíxin kuítekávan kíxin Ìnchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kíxin:

Asenná imá tjikosáyehe Ìnchéni Dios

⁴⁷ la ko chéhe asenná kíxin Dios sinchekaáni ch'án.

⁴⁸ Kíxin Dios ikuá kuentá ijnko tí chojni chjin nóe ch'exón xra kuènte ch'án.

A ntá ijie la ko jnkochrínín tsontáchro chojni kíxin náxrjón tjèn janhan, tsixro sín.

⁴⁹ Kíxin Dios chónka kaín kjuachaxin ntá janhan mé kjuasixínna ch'án ijnko kjuaxroan jie; imá tjóá tí ihnié ch'án.

⁵⁰ Jnkochrínín tsikonóhehe ch'án kaín tí sín tjikosáyehe sín ch'án.

⁵¹ Tsíkjasin ch'án itsje kjuaxroan jie;

kuakítsjehe ch'án tí kjuachaxin chónka tí sín nchehnke.

⁵² Kuakítsjehe ch'án tí kjuachaxin chónka tí sín t'etqan,

A ntá tí sín nóa k'uék'etuanhya senó la mé jie chjéhe ch'án kjuachaxin ts'etqan sín.

⁵³ A ntá tí sín t'enxin kjinta la kjuanjon ch'án kaín nkehe tsicháxinhin sín, a ntá tí sín rico xrxán jehó tja sín sákjuí sín.

⁵⁴ Kjuínkítsa ch'án tí sín nacióon Israel kíxin tjejóch'ehe sín ch'án xra;

k'uitjáyenhya ch'án tí jehe sín kuíkonóhehe ch'án sín,

⁵⁵ éxi k'uéchenka ch'án tí sín k'uaxrjeníxinni k'uéjó sín ósé,

na mé tí ch'ín Abraham la ko kaín tí sín naxá ts'axrjeníxin ch'án —mé xíkaha ichro tjan María.

⁵⁶ A ntá tjan María kuíteoko tjan tí tjan Elisabet iní nitjó la ntá chr'éxin xíkjan tjan ntqo tjan.

Kokjíhi ch'ín Juan Bautista

⁵⁷ Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa. ⁵⁸ A ntá tí sín chjinaxón ntqo la ko tí sín kjéhya tjan mé kjuíjitsjehe sín kíxin tsóchéheko sín tjan kíxin kuínhin sín kíxin Dios imá tsíkikonóhehe tí jehe tjan. ⁵⁹ Ntá tí yaon

jnixin ikui sín sincheka sín xjan tí xroye kuènte tí sín judío. Ntá chrókjuinchek'in sín xjan Zacarías éxi it'in it'é. ⁶⁰ Kjánchó ntáchro iné xjan kixin:

—Náhi. T'ichjánxin its'in xjan Juan —ichro tjan.

⁶¹ Ntá ntáchro sín kixin:

—¿Nkeuènte kixin xikaha chrók'uin xjan? Kohya nkexro naxa kjéhya xikaha it'in —ichro sín.

⁶² A ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uin tí xjan. ⁶³ A ntá tí it'é xjan mé kjuanchia ch'án ijnko ntachiso ntsi tsokjin ch'án ntá kjin ch'án kixin: “Ihnjé xjan mé Juan.” A ntá kaín tí sín tjejó sín ntiha la chrakon sín kuínhin sín xikaha kónhen. ⁶⁴ A ntá xrinahya ch'in Zacarías kjuankixin ch'án nixja ch'án inaá kjuanchehe ch'án Dios kjuasáya. ⁶⁵ A ntá kaín tí sín chjinxón ntøe sín mé chrakon sín. La ntá nkuixín tí jna kuènte estado Judea mé kjo sín kichó sín chrónka sín kixin xikaha tsikónhen. ⁶⁶ A ntá kaín tí sín kuínhin mé kjuenkayáxin sín kjuanchankíhi sín kichó sín kixin:

—¿Xá nkehe tí xra tsikitonhen tí xjan i? —ichro sín.

Kixin chaxín Ìnchéni Dios tsikjincheyaoon ch'án tí xjan.

Tí ch'in Zacarías itsje ch'án

⁶⁷ A ntá it'é tí xjan mé ch'in Zacarías, mé antsí k'uáyéhe ch'án kjuachaxin kuènte Nchakuen Dios ntá xikaha nixja ch'án itén Dios ntáchro ch'án kixin:

⁶⁸ Imá jina Ìnchéni, na mé tí Dios kuènte tí nación Israel, kixin ikui ch'án tí tjejóni kjuinchekaá ch'án nación kuènténi.

⁶⁹ La ko kjuanjon ch'án ijnko nkexro t'etøan sinchekaáni ch'án na mé ijnko nkexro k'uaxrjenixin tí ch'in David, tí nkexro k'uékjich'ehe Dios xra.

⁷⁰ Éxi k'uéchronkaxín tí sín kjuéyá Dios k'uéchronka itén Dios ósé,

⁷¹ k'uéchronka Dios kixin sinchekaáni ch'án kixin ntá tsjachahya kaín tí sín nínkakohenni,

⁷² tsikonóhehe ch'án tí sín k'uaxrjenixinni ósé,

ts'itjáyenhya ch'án tí nkehe tsichronka ch'án tsoxiteyá.

⁷³ Tíhi mé tsíkjo Dios tí ch'in Abraham ósé kixin nkehe chaxín tsoxiteyá chr'éxin

⁷⁴ kixin sinchekaáni ch'án kixin kohya nkehe sich'ehe ni tí sín nínkakohenni kixin jina sich'ehe ni ch'án xra tsochrakonhyani,

⁷⁵ la ntá jina ts'ejóni sinchetjóáni ch'án kaín yaon tí naxa tjejóchónni.

⁷⁶ A ntá jaha xjenni mé tsontáchro Dios kixin jaha ijnko nkexro tsochrónka itén Dios tjen nkaya nkajni.

Jaha tsitonxian ntja tsixin Ìnchéni la ko jaha tsjásiyóxian ntja tsixin ch'án.

⁷⁷ Jaha tsjákohé tí chojni chjasintajni nkexrí tsjin tí jie chóna sín, ntá tsaá sín.

⁷⁸ A ntá Dios mé tjehe ni ch'án la ko kuikonóhehe ch'án, kixin nkajni kuixin ijnko xrohi nixin ts'inkaséyanxín tí yaon nixin.

⁷⁹ Tíha mé tsikao tí xrohi ts'inkaséyanxín tí sín tjejó sítié la ko tí sín chrók'uitjáyan, la ko ts'ikonxinni tí ntja tsjanjon kjuaxróxin.

Na mé kaín tíhi chrónka tí ch'in Zacarías.

⁸⁰ A ntá tinkák'ánkí tí xjan a la ko Dios kjuinchek'ánkí tí kjuaxrexinkaon kuènte xjan kixin antsí tsonhe xjan nkexrí tjen Dios. A ntá kjuák'e xjan nteje k'uánkí xjan kjuixrakája tí yaon kjuankixin kjuakohé ch'án tí chojni nación Israel.

2

Kokjíhi ch'in Jesús

(Mt.1.18-25)

¹ A ntá tí yaon a na mé tí ch'in imá t'etøan mé it'in Augusto César na mé k'uetøan ch'án kixin ts'inixin ihnjé kaín xin chojni sín tí chjasin t'etøan ch'án kixin tsonhe ch'án nkekjaín chojni sín. ² Tí xrankixín k'uínixin ihnjé sín tíó Cirenio mé k'uégovernador k'uetøan estado Siria. ³ Kaínxin chojni t'ichjánxin sátsji sín chjasén sín kixin ntaha ts'inixin ihnjé sín. ⁴ Mé xikaha ch'in José kjaxin k'uaxrxéjin ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsikokjéxin tí ch'in rey David kixin jehe ch'in José mé tsik'axrjenixin ch'án tí ch'in David. ⁵ Sákjuí ch'án chjasin Belén sákjuíko ch'án tí tjan María kixin ntiha ts'inixínko ihnjé ch'án tjan kixin jehe tjan tsikjatehe kixin tsotehe ch'án. A ntá jehe tjan na mé ó tjejá tjan. ⁶ A ntá xikaha kónhen nachrohe k'uéjó sín chjasin Belén, ntá kjuixraká tí yaon tsokjíhi xjeen tjan María. ⁷ A ntá ntiha kokjéxin tí xjeen tjan sao. Ntá kjuinchek'ísímá tjan xjan ka, a ntá kjuak'enkaya tjan ijnko nta neyá iko kixin jehe sín la k'uitjahya sín nchia xranka ts'ok'éxin sín mé kjónté ntiha k'uéjó sín.

Tí sín ángel la ko tí sín k'uáyakonhen kolélo

⁸ Kjaxin chjinaxón tí chjasin Belén tjejó iso chojni nteje ó la ntá ntahó titöhe sín tí tie a kixin t'ayakonhen sín kolélo. ⁹ A ntá titàya k'uikuèn sín ijnko ángel kuènte Dios la ko nkuíxín tí tjejó sín la k'uínkaséyan kixin tí kjuachaxin jíé kuènte Dios kuíkəo ch'án. Ntá jehe sín la imá chrakon sín. ¹⁰ A ntá tí ch'ín ángel ntáchro kixin:

—Chrakonhyará jahará. Ijie k'uinka tsotjonkará nkehe jína nixin kixin tsöchéhe kaín xín chojni ¹¹ kixin ijie tí chjasén ch'ín David kokjéxín tí nkexro tsaáxinrá jahará na mé Ìnchéni Cristo tíha. ¹² Ntá tsonoxínrá jahará kixin tí xjan a kixin ika tjechr'ísímá xjan la ko ijnko nta neyá iko mé tjetsínkayá xjan —mé xíkaha chrónka tí ch'ín ángel.

¹³ A ntá titàya k'uikuèn sín kixin nchónhya sín ángel kujxin nkaya nkajní tjejóko tí ch'ín ángel tjejótsje sín tjanchehe sín Dios kjuasáya, ntáchro sín kixin:

¹⁴ Kjuasáyé Dios tjen nkaya nkajní kixin imá chónka

ch'án kjuachaxin. Ntá chjasintajni ts'ixín kjuaxróxin tí tjejó tí sín sinchexiteyéhe ch'án. Mé xíkaha ichro sín.

¹⁵ A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kichó sín ntáchro sín kixin:

—Íntá sátsjini tí chjasin Belén tsjitsjeheni tí nkehe tsikónhen kixin Ìnchéni k'uetqan kui tí nkexro kjuínchenoheni —ichro sín.

¹⁶ Ntá tjan sákjuí sín ntiha la k'uitja sín tí tjan María la ko tí ch'ín José la ko tí xjan a tjetsínkayá nta neyá iko. ¹⁷ A ntá tió k'uikon sín xíkaha ntá chrónka sín tí nkehe tsichrónka tí ángel kixin nkexrí tjen tí xjan a. ¹⁸ Ntá chrakon kaín tí sín kuínhin kixin xíkaha chrónka tí sín k'uáyakonhen kolélo. ¹⁹ Kjánchó tí tjan María la asén tjan ó xraxinkakonxín tjan kaín tíha. ²⁰ A ntá tí sín k'uáyakonhen kolélo la sákjuí sín ntja kuinkákjanchehe sín Dios kjuasáya kixin kaín tí nkehe tsikinhin sín la ko k'uikon sín kixin ó xiteyá kaín nkehe éxi tsichrónka tí ángel.

Sákjuiko sín tí xjan Jesús tí njnko Jerusalén

²¹ A ntá tió xétja tí ijni yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxi tsintáchro tí ch'ín ángel chénka tí tjan María tí naxə kjuák'eyáhya tjan.

²² A ntá tió kuitöhe tjan María jína éxi chrónka ley kuènte Moisés* ntá sákjuiko sín tí xjan tí chjasin Jerusalén kixin tsochjéhe sín Dios kjuasáya. ²³ Éxi ntáchro tí xroon ley kuènté Ìnchéni Dios kixin: “A ntá kaín xjan ntoa tsokjihí saoxín la mé tsochjéhe sín Dios tí xjan a sich'ehe xjan xra Dios.”† ²⁴ Ntá xíkaha sákjuí sín kixin ntaha tsjanjon sín iko ts'énxín ntiha tsochjéxín sín Dios kjuasáyé éxi t'etqan tí ley kuènte ch'án na mé yaá kontóá najni o yaá kontóá nteje chrókjuanjon sín.

²⁵ A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochríxín xraxinkaon ch'án Dios la ko kjuák'echónhen ch'án kixin itsi tí nkexro tsaáxin tí nació Israel. Tí Nchəkuen Dios tjejo tí ch'ín Simeón ²⁶ tsíkjinchenohe ch'án kixin naxə ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios. ²⁷ A ntá tí Nchəkuen Dios kjuínchexraxinkaon tí ch'ín a kixin sátsj ch'án njnko. A ntá tió kui tí iné la ko it'é xjan Jesús k'uixenko sín xjan nkaxenhen njnko kixin sinchexiteyéhe sín tí nkehe t'etqan tí ley ²⁸ ntá ch'ín Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

²⁹ Ijie jaha Ìnchéni Dios, tsjánjuan kjuachaxin kixin kjuaxróxin its'én janhan kixin jaha ó kjuínchexiteyá tí nkehe tsintáchrua

³⁰ kixin ó k'uíkoxin kuən tí nkexro tsaáxinni,

³¹ mé xíkaha kjuích'e kixin ts'ikon kaín xín chojni.

³² Jehe ch'án mé tí xrohi ts'inkaséyanxín ntje tí sín jehya kuènte Israel, la ko jehe ch'án tsjikosáyehe ch'án tí chjasin kuéntá Israel, mé ichro ch'ín Simeón.

³³ Ntá ch'ín José la ko tí iné ch'ín Jesús la chrakon sín kixin xíkaha kuínhin sín ntáchro ch'ín Simeón kixin nkexrí tjen tí xjan. ³⁴ Ntá ch'ín Simeón kjuíncheyaon ch'án sín ntá chénka ch'án tí tjan María mé tí iné xjan Jesús kixin:

—Tí xjan í tsíkikəo itsjé xra la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín antsí tsonohe sín la ko nchónhya chojni tsotjinkakonhya tsinhin sín tí nkehe tsjako ch'án. ³⁵ Mé xíkaha tsonoxín nkexrí tjenkayáxin jnkojnko asén chojni. Kjánchó kaín tíha tsyóhé éxi ijnko chica espada chróchr'áte asán na mé tsəxakonhan la ko ts'avá má —ichro ch'án nixjehé ch'án tí tjan María.

³⁶ Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axrjeníxín ch'án tí ch'ín Aser. Jehe tjan la ó nána tjan. Tí naxə k'uetjarisoá tjan la

* 2:22 Levítico 12.1–8 † 2:23 Éxodo 13.2,12

kótehe tjan. Ntá yatokoá nánó kjuák'eko tí xii tjan ³⁷ ntá jie ochenta y cuatro nánó tsikók'án tjan. Kuítogehya tjan tí xra kuènte njnko la mé ntahó tjan tjan ch'ehe tjan Inchéni Dios xra nchakotjin la ko tie la jnkoyaxón nehya tjan kixin jina tsonixjehe tjan Dios. ³⁸ Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexrí tjan tí xjan Jesús nixjehe tjan kaín tí sín tjejóchónhen kixin itsi nkexro sincheakaá tí chjasin Jerusalén.

Ntá kjan sín chjasin Nazaret

³⁹ Na ntá tió kjuixin kjuínchexiteyá sín kaín nkehe t'etjoan tí ley kuènte Dios ntá kjan sín estado Galilea na mé chjasén sín chaxín Nazaret. ⁴⁰ A ntá tí xjan a mé k'uánkí xjan la ko tsanká xjan la ko imá kónohe xjan kixin Dios imá tjinkítsa tjencheyaoan xjan.

Tí xjan Jesús kjuák'e xjan tí ninko Jerusalén

⁴¹ Tí it'é la ko iné tí xjan Jesús xráxín k'uékjii sín kaín nánó tí chjasin Jerusalén kixin tí kia pasca. ⁴² A ntá tió xetjehe ch'in Jesús tí teyó nánó, ntá sákjui sín kaín sín tí chjasin Jerusalén kixin xikaha kuènnen sín kixin tí kia a. ⁴³ A ntá kjanxin sín ntiha sáchrókjui sín chjasén sín tió k'uátsínka kia la tí xjan Jesús ó tsikotje xjan Jerusalén ntahó, kjánchó iné xjan la ko ch'in José xraxinkakonhya sín kixin kohya tí xjan. ⁴⁴ Jehe sín mé kjuenkayáxin sín kixin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntja tsíkji sín. A ntá kjuéyá sín xjan tí tjejó tí sín kjéhya la ko tí sín chóxin sín ⁴⁵ kjánchó k'uitjahya sín xjan. Ntá kjan sín tí chjasin Jerusalén kixin tsjeýá sín xjan ntiha.

⁴⁶ Ntá k'uátsínka ini yaon na ntá k'uitja sín xjan la mé nkaxenhen njnko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín. ⁴⁷ Ntá kaín tí sín tjejótaxín tjejótinhin sín mé chrakon sín kixin xikaha imá nohe xjan la ko xikaha tjetgehe xjan kaín nkehe tjanchankíhi sín xjan. ⁴⁸ Ntá tió k'uíkon iné la ko it'é la chrakon sín. Ntá ntáchro iné kixin:

—Xjeenni, ¿nkekuènte xikaha kjuích'e? It'á la ko janhan imá kóxakonhenni kjuéyáni tí jaha —ichro tjan.

⁴⁹ Ntá ntáchro ch'in Jesús kixin:

—¿Nkekuènte tjeýá tí jeheni? ¿Á noahya jaha kixin tóxakonhenni kixin tí xra kuènte It'éni? —ichro ch'án.

⁵⁰ Kjánchó kienxínhya sín nkexrí t'axrjexín tí nkehe ntáchro ch'án.

⁵¹ Ntá kjan sín chjasin Nazaret. A ntá ntiha naxa kuítekakohen xjan tí jehe sín. A ntá tí iné la ntá asén tjan xráxín ó nohe kixin xikaha kónhen. ⁵² La ko naxa k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhin nkexrí kjuínchexiteyá xjan la ko kjaxin kaín chojni kóxrjínhin sín kixin jina tjan xjan.

3

Ch'in Juan Bautista kjuák'e nteje kjuako itén Dios

(Mt. 3.1-12; Mr. 1.1-8; Jn. 1.19-28)

¹ A ntá quince nánó k'uék'etjoan ch'in Tiberio tí xra gobierno, la ko tí ch'in Poncio Pilato k'uégovernador tí estado Judea, la ko tí ch'in Herodes k'uégovernador tí estado Galilea, la ko tí kíchó ch'án Felipe mé k'uégovernador estado Iturea la ko estado Traconite, la ko ch'in Lisania k'uégovernador tí estado Abilinia. ² A ntá ch'in Anás la ko ch'in Caifás k'uéchóna sín xra nchat'á t'etjoan. A ntá Dios mé kjuanjon kjuachaxin k'uáyéhe ch'in Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías. ³ Ch'in Juan k'uátsínka ch'án kaín tí chjasin chjino tí ntarío Jordán kjuakohé ch'án chojni ntiha kixin chrókuinkí sín tí nkehe tjenkayáxin sín chrókuiteho sín tí ijje sín ntá chrókuikite sín kixin xikaha mé chrókuin ijje sín. ⁴ Mé xikaha kónhen éxi k'uéchronka la ko tsikjin ch'in Isaías, mé tí nkexro k'uéchronka itén Dios ósé kixin:

Tsinhin sín itén ijnko nkexro tsjak'e nteje ts'eya tsontáchro kixin:

“Tóxakonhanrá ncheyóxinrá ntja tsixin Inchéni Takítjehérá ijnko ntja ntoí.

⁵ Kaínxín tsaka mé tsoyóxin,
la ko kaín xín jnā la ko kaín xín itjo tsitoghe yóxin,
la ko tí ntja tsíxréya mé tsoxrentoá,
la ko kaín tí ntja yóxinhya la mé tsoyóxin;

⁶ Xikaha mé kaín xín chojni chjasintajni mé ts'ikon sín kixin Dios mé chrókuaáxin sín.”*

⁷ A ntá tió kjuíji chojni ntiha kixin ch'in Juan chrókuíkite ch'án sín ntá ntáche ch'án tí jehe sín kixin:

* 3:6 3.4-6 Isaías 40.3-5

—Jahará tsík'axrjeníxinrá konche. ¿Xá nkexro kjuíntanohará kixin chrókuinkeherá tí kjuanínkaon kuénte Dios ó tsí? ⁸ T'ichjánxin kixin chrók'uejorá jnkojina chrókuákoxinrá kixin chaxín kjuítoxinhínrá tí nkehe tjenkayáxinrá. Jahará nchehnkerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ⁹ Kixin tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kixin tsoche —ichro ch'án.

¹⁰ A ntá tí chojni mé kjuanchankíhi sín ch'án kixin:

—A ntá tí xikaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátehe ch'ín Juan kixin:

—Tí nkexro chóna yaá camisa la chrókjuinchekitonhen tí nkexro chóntahya. La ko tí nkexro chóna nkehe sine chróchjéhe sín tí nkexro chóntahya nkehe sine —ichro ch'án.

¹² Kjaxin ikui iso tí sín nchekjènkí kixin chrókuikite sín. Ntá kjuanchankíhi sín tí ch'ín Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'ín Juan kixin:

—Jehó éxi tí tsík'ítuanhanrá chrókjuinchekjènkirá —ichro ch'án.

¹⁴ Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kixin:

—Teéhyará ninkexró tí chjchakogen sín la ko ninkexró sjch'énehýará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uejóchónhen sín tóxakonhen asén sín tjinkaon sín tsoñohe sín kixin á tí ch'ín Juan mé tí Cristo. ¹⁶ Kjánchó chénka ch'ín Juan kaín tí sín tjejó a kixin:

—Janhan mé intá tikjetxián chojni. A ntá tí nkexro itsi chr'éxin mé tsikjéxinrá tí Nchakuen Dios la ko xrohi. Antsí t'etoan ch'án a ntá janhan la kánhyó. Méxra chrókósuána chrókjuasintánkaha ch'ín tí Correa tí tokaté ch'án. ¹⁷ Jehe ch'án la ó tjejraá ch'án pala sinchetjuáxin ch'án noatrigó kixin tí ntachjiji trigo la ókjé tsjejo ch'án a ntá tí noatrigó la tsjenájín ch'án la ts'enkachjina ch'án. A ntá tí ntachjiji trigo la tsjakaxin ch'án ijnko xrohi ts'ankahya jnkochrín —mé xikaha ichro ch'ín Juan.

¹⁸ Mé xikaha chronkaxin ch'án la ko itsjé í so nkehe kjuínchexraxinkaon ch'án chojni mé xikaha kjuakqoxín ch'án sín tí tan jína. ¹⁹ Kjaxin kjuentuéhe ch'án tí ch'ín Herodes kixin chóna ch'án tí tjan Herodias, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsikjich'e ch'án. ²⁰ Kjánchó ch'ín Herodes ántosén ch'án kjónté kuínhin ch'án la kjuínchek'ánkí ch'án tí ijé ch'án inaá kixin kjuak'echjina ch'án tí ch'ín Juan tí ntqechiso.

Kuikite ch'ín Jesús

(Mt. 3.13-17; Mr. 1.9-11)

²¹ A ntá naxa kuénhya tíha naxa kjuák'e ch'ín Juan kuikite ch'án chojni ntá kjaxin ch'ín Jesús mé kuikite ch'án. A ntá tjenixjehe ch'án Dios ntá xitjehe nkajni ²² ntá k'uínkajin Nchakuen Dios éxi ijnko kontóá tsjehe la kjuák'e chrítaón kja ch'án. Ntá xrínahya kuínhin sín itén nkexro nkaya nkajni ntáchro kixin:

—Jaha mé xjanna la tjuaha tí jaha. Imá chàna kixin nchexiteyána tí jaha.

Tí sín tsík'axrjeníxin ch'ín Jesucristo

(Mt. 1.1-17)

²³ Ch'ín Jesús k'uechóna ch'án chjino treinta nánó tíó kjuankíxin kjuako ch'án. Ntá kjuenkayáxin sín kixin it'é la mé ch'ín José. Ntá it'é tí ch'ín José la mé ch'ín Elí. ²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. ²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai, ²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá, ²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri, ²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er, ²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat, ³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé

ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim, ³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán, ³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón, ³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá, ³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham na mé ch'ín Taré, a ntá it'é tí ch'ín Taré na mé ch'ín Nacor, ³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala, ³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec, ³⁷ a ntá it'é tí ch'ín Lamec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán, ³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

4

Ch'ín Tsochren chrókjuachroe tí ch'ín Jesús

(Mt. 4.1-11; Mr. 1.12-13)

¹ A ntá ch'ín Jesús imá chóna ch'án kjuachaxiën Nchakuen Dios ntá kjanxin ch'án tí ntárió Jordán. Ntá tí Nchakuen Dios sákjuiko ch'án nteje. ² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá ch'íxín ntá xringhya ik'uéen ch'án kjinta. ³ Ntá ntáchro tí ch'ín Tsochren kixin: —Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni”^{*} —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín tí naciön sijn chjasintajni. ⁶ Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí naciön a. Janhan na k'uayáha kaín tíha la ntá jie tsotjaha tí nkexro tjínkavan tsotjaha. ⁷ Tí tsjak'éxian tóch'ian tsjikosáyana tí janhan ntá kaín tí nkehe la ts'óna kuèntá —ichro ch'án.

⁸ Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuikosáyehé Ìnchéni Dios la jehó ch'án chrókjuich'ehé xra”[†] —ichro ch'án.

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chritaón tí kja njnko, a ntá ntáchro ch'án kixin:

—Tí chaxín Xjeen Dios jaha la tjtóhé t'anótjenxian tí noi ntihi ¹⁰ kixin ntáchro xroon itén Dios kixin:

Dios mé ts'etuenhen tí sín ángel kuènte ch'án kixin ts'ayakonhan sín.[‡]

¹¹ Tsotsé sín itjá

kixin tsotéhya totá ts'itja xro tí ts'anótjen[§]

—mé xikaha ichro ch'ín Tsochren.

¹² Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjíníhya chrókjuásixián kjuaxroan kjuachaxin kuènte Ìnchéni Dios”^{*} —ichro ch'ín Jesús.

¹³ Mé xikaha tió kjuachahya tí ch'ín Tsochren kaín nkehe chrók'uetuenhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankixin ch'án tí xra kuènte ch'án estado Galilea

(Mt. 4.12-17; Mr. 1.14-15)

¹⁴ Ntá ch'ín Jesús xikjan ch'án estado Galilea inaá na imá chóna ch'án kjuachaxin kuènte Nchakuen Dios. Ntá tjejóto sijn nkúixín ntiha kixin nkexro tí jehe ch'án. ¹⁵ Kjuaxoxin ch'án

* 4:4 Deuteronomio 8.8 † 4:8 Deuteronomio 6.13 ‡ 4:10 Salmo 91.11 § 4:11 Salmo 91.12 * 4:12 Deuteronomio 6.16

tí n̄n̄k̄ōe sín kaín chjasin la ko kaín xín chojni kjuanchia sín kjuasáya kíxin kóxrjín̄h̄n̄ sín tí kjuako ch'án.

*Ch'ín Jesús kjuák'e ch'án chjasin Nazaret
(Mt. 13.53-58; Mr. 6.1-6)*

¹⁶ Ntá ch'ín Jesús sákjuí ch'án chjasin Nazaret na mé tí chjasin tsík'ánkixín ch'án. Ntá tí yaon t'ok'éhe sín mé k'uixenhen ch'án ijnko n̄n̄ko Israel kíxin x̄ikaha kuènhen ch'án. Ntá kjuák'exín toté ch'án kíxin sinchekuáxin ch'án tí xroon itén Dios. ¹⁷ Chjéhe sín ch'án tí xroon kuènte tí profeta Isaías. Ntá kuakítjehé ch'án tí xroon ntá k'uitja ch'án nketi nixja x̄ikíhi:

¹⁸ Tí Nchakuen It'eni Dios tjetjinkitsana má,

kíxin kjueyána ch'án kíxin tsoxrxjanka tí tan jína kuènte Dios tsjakohá tí sín nòna.

K'uetuanna ch'án kíxin sintakítóhà jína tí sín t'ává asén ksjín chóntahya sín nkerí tsaáxin sín, la ko tsjakohá tí sín tjejóh̄jina kíxin nkexrí tsaá sín,

la ko sintak'ikuan tí sín t'ikonhya,

la ko sintakaá kaín tí sín tjejó'tjasóte kohya nkehe tsaáxin sín,

¹⁹ la ko tsoxrxjanka kíxin ó kjuixraká tí yaon kíxin tí nkexro tsitekaon la tsaá sín.†

²⁰ A ntá ch'ín Jesús kjuixín kjuínchekuáxin ch'án tí xroon, a ntá chjéhe ch'án tí ch'ín tjinkitsa tí xra n̄n̄ko ntá kjuák'etjaxín ch'án. Ntá kaín tí sín tsikójn̄kotsé n̄tiha n̄n̄ko naxa tjejókomá sín tí jehé ch'án. ²¹ Ntá kjuankíxin chronkaxín ch'án ntáchro ch'án kíxin:

—Ntá ijie la ó xiteyá tí nkehe kjuíntakuáxin tí xroon itén Dios kuínhíná —ichro ch'án.

²² Ntá kaín sín kóxrjín̄h̄n̄ sín tí kjuako ch'ín Jesús la ko chrakon sín kíxin naxrxjón tí nkehe nixja ch'án. Ntá kjuanchankíhi sín kichó sín ntáchro sín kíxin:

—¿A jehya xjeen ch'ín José tíhi? —ichro sín.

²³ Ntá kjuátjehé ch'ín Jesús ntáchro ch'án kíxin:

—Kjá tsontáchorá kíxin janhan ijnko chojni ch'e xroan chrókjuíntakítóhà jína asenná senó, la ko tsontáchorá kíxin tí nkehe kuínhíná kjuít'a tí chjasin Capernaum x̄ikaha chrókjuít'a níhi chjasenná, tsixrorá —ichro ch'án.

²⁴ Naxa tjenixja ch'án ntáchro ch'án kíxin:

—Ijnko nkehe chaxín tsojjonkará kíxin tí sín chjasén ijnko nkexro chrónka itén Dios la mé xráxin chóntehya sín kjuasáyé tí nkexro a. ²⁵ Chaxín ntáxrjan kíxin k'uéjó itsjé chojni chjin tsikók'án tí nacióin Israel tió kjuák'e ch'ín Elías tí nkexro k'uéchrónka itén Dios la ntá í k'uániáhya chrin iní nánó ko t'lo la ko imá kókjinta nkuixín chjasin ntiha. ²⁶ Kjánchó Dios la k'uetuenhya ch'ín Elías sáchrókjuitsjehé ch'án nijnko chojni chjin tsikók'án tí nacióin Israel. Náhi. Dios k'uetuenhén ch'án kíxin sátsjitsjehé ch'án ijnko chojni chjin tsikók'án itjen chjasin Sarepta chjino chjasin Sidón.‡ ²⁷ Kjaxín nacióin Israel k'uéjó nchónhya chojni chóna chinlepra tió kjuák'e ch'ín Eliseo chrónka ch'án itén Dios, kjánchó nijnko sín kuitjehya sín jína la mé jehó ch'ín Naamán kjuixín ch'án nacióin Siria mé kuitjehé ch'án jína§ —mé x̄ikaha ichro ch'án.

²⁸ A ntá tió kuínhin sín x̄ikaha ntáchro ch'ín Jesús la ntá kaín tí chojni k'uéjóxenhen n̄n̄ko la mé imá kónínkaon sín. ²⁹ K'uínkatjen sín itsé sín ch'án sákjuíko sín ch'án tí ikon chjasin la sákjuíko sín ch'án chrítaón tí tjo tí tjen tí chjasin a chrókjuínchek'anó'tj̄n̄x̄ín sín ch'án tí tjo a. ³⁰ A ntá ch'ín Jesús k'uatásínka jnkosiné tí siín tí jehé sín la sákjuí ch'án.

*Ijnko chojni chóna ijnko nchakuen tí jínahya
(Mr. 1.21-28)*

³¹ A ntá ch'ín Jesús sákjuí ch'án tí chjasin Capernaum na mé ijnko chjasin estado Galilea, na ntá ntaha kjuankíxin ch'án kjuakohé ch'án chojni tí yaon t'ok'éhe sín. ³² Chrakon sín kíxin nkexrí kjuako ch'án kíxin kjuakoxín ch'án kíxin chóna ch'án kjuachaxin.

³³ A ntá nkaxenhen n̄n̄ko kjuák'e ijnko ch'ín chóna ijnko nchakuen tí jínahya k'óyaxoxín itén tí ch'ín a, ntáchro kíxin:

³⁴ —Tj̄tohéni; ¿nkekuènte t̄j̄até tí jeheni kaín ni, jaha Jesús kjuixian chjasin Nazaret? ¿Á k'uinka kíxin s̄n̄chek'it̄j̄ayanni? Ó tj̄ats̄oan tí jaha la ko nòna kíxin jaha mé tí nkexro tj̄oá kuènte Dios —ichro tí nchakuen tí jínahya.

³⁵ Ntá ch'ín Jesús j̄jehé k'uetuenhén tí nchakuen tí jínahya ntáchro ch'án kíxin:

—Táníá. T'axrxjéxian tí ch'ín a —ichro ch'án.

A ntá tí nchakuen tí jínahya kjuáka tí ch'ín a kjuítsínka ch'án nonte jnkosiné tí siín sín la k'uaxrje tí nchakuen tí jínahya la kohya ninkehó kónhen tí ch'ín kjuítsínka. ³⁶ A ntá kaín sín chrakon sín itjo sín kichó sín kíxin:

—¿Xá nkexrí kíxin x̄ikaha nixja tí ch'ín i? Jehé ch'án chóna kjuachaxin kíxin k'uetuenhén ch'án tí nchakuen tí jínahya k'uaxrxjéxín tí nkexro i —ichro sín.

† 4:19 4.18-19 Isaías 61.1-2 ‡ 4:26 4.25,26 1 Reyes 17.9;18.1 § 4:27 2 Reyes 5.1-14

³⁷ A ntá nkuixín ntiha ikjo sín kichó sín kixin nkerí kjuaxroan kjuích'e ch'ín Jesús.

Ch'ín Jesús kjuínchekitōhe jína tí tjan ich'ee ch'ín Simón Pedro
(Mt. 8.14-15; Mr. 1.29-31)

³⁸ Ntá ch'ín Jesús k'uaxrjexin ch'án tí nínko la ntá k'uixenhen ch'án ntōe ch'ín Simón. A ntá tí tjan ich'ee ch'ín Simón mé nihi tjan chóna tjan ijnko sóa jié ntá chronóehē sín ch'án kixin chrókuinchekitōhe ch'án tjan jína. ³⁹ Ntá k'uísén ch'ín Jesús tí tjan tjan ntá k'uetuēnhen ch'án tí sóa a ntá kjuín. Ntá tuénxín k'uàya tjan la ntá kjuanjon tjan nkehe sine sín.

Ch'ín Jesús kjuínchekitōhe ch'án jína itsjé chojni níhi
(Mt. 8.16-17; Mr. 1.32-34)

⁴⁰ A ntá kuétaón yaon ntá kaín tí sín chóna sín sijníhi chóna sín nchónhya clase chin mé kuikao sín tí tjan ch'ín Jesús. Ntá kjuak'etja tja ch'án jnkojnko tí jehe sín a ntá xikaha kuítóhe sín jína. ⁴¹ La ko nchónhya chojni níhi chóna nchakuen tí jínahya la mé k'uaxrje tí nchakuen tí jínahya la k'óyako la ko ntáchro kixin:

—Jaha mé Xjeen Dios —mé ichro tí nchakuen tí jínahya.

Kjánchó ch'ín Jesús k'uetuēnhen ch'án tí nchakuen tí jínahya la kjuanjonhya ch'án kjuachaxin kixin tsonixja kixin ó nohe tí nchakuen tí jínahya kixin jehe ch'án na mé tí nkexro Cristo.

Ch'ín Jesús kjuako ch'án tí estado Galilea
(Mr. 1.35-39)

⁴² A ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjuj ch'án nteje. A ntá kaín tí chojni kjuikjeyá sín ch'án la k'uitja sín tí tjan ch'án. Tjinkaon sín chrókuinchejrenhen sín ch'án kixin sáchrókjuihya ch'án ókjé. ⁴³ Kjánchó kjuátehe ch'ín Jesús ntáchro ch'án kixin:

—T'ichjánxín kixin sátsjia kaín chjasin ókjé tsóxrjanka tí tan jína kuēnte Dios kixin nkexri tí kjuachaxin t'etoan Dios, kixin xrá ó mé k'uínka —ichro ch'án.

⁴⁴ A ntá xikaha k'uájkjako ch'ín Jesús kaín tí nínko Israel tí estado Galilea.

5

Kjuaxroan itsé sín koche
(Mt. 4.18-22; Mr. 1.16-20)

¹ Ntá ijnko yaon kjuák'e ch'ín Jesús chrínta ntayaon Genesaret ntá kóchjina nchónhya chojni na mé k'uixitja kichó sín kixin tjinkaon sín chrókuinhin sín itén Dios. ² Ntá k'uíkon ch'ín Jesús kixin tjejó iyó ntabárcō jehó chjino chrínta ntayaon. A ntá tí sín itsé koche mé tsík'axrjexin sín ntiha la k'uéjō sín tjentoá sín la ko tjejótjōnemá sín tí nchísén tséya sín koche. ³ Ntá ch'ín Jesús k'uit'ótjen ch'án ijnko tí ntabárcō ntiha na mé ntabárcō kuēnte ch'ín Simón na ntá chronóehē ch'án tí ch'ín Simón kixin sátsjiko ch'án ntabárcō ijnko chrínta ntá kjínhya. Ntá ntahó kjuák'enkáya ch'ín Jesús tí nta kjuák'etjāxín ch'án kjuakōhe ch'án nchónhya chojni síin chrínta ntā. ⁴ A ntá tió kjuixin nixja ch'án ntá ntáche ch'án tí ch'ín Simón kixin:

—Tjíkōa ntabárcō tí tjíá ntā nínka ntá itérá tí nchísén tseyará koche —ichro ch'án.

⁵ Ntá kjuátehe ch'ín Simón ntáchro ch'án kixin:

—Maestro, kjuích'eni xrá kuenté tie la tséhyaní ninkehó koche. Kjánchó tí jaha xikaha kuétuēnhéni la mé tsochr'ánni tí nchísén inaá —ichro ch'án.

⁶ Na ntá xikaha kjuích'e sín la ntá nchónhya koche tsítsé tí nchísén la ntá tí nchísén kjuankixin tinkák'ichje. ⁷ Ntá k'uēyāxín sín tja sín kixin chróxrakoa tí sín ch'eko sín xrá tjejōxēnhen tí í jnko ntabárcō kixin tsjinkitsa sín. Ntá xráko sín ntabárcō kuēnte sín ntá kjuínchekāón sín yóí tí ntabárcō ntá chrókuachahya tí ntabárcō na tjinkaon chrók'uániánkí ntā. ⁸ Ntá xikaha k'uíkon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—Tjītohéni Ínchéni kixin jeheni ijnko chojni chóna jie —ichro ch'án.

⁹ Mé xikaha ichro ch'ín Simón kixin chrakon ch'án la ko kjāxín chrakon tí í so sín tjejóko ch'án kixin xikaha kónhen xrenājín nchónhya koche. ¹⁰ La ko ch'ín Jacobo la ko ch'ín Juan, xjeen ch'ín Zebedeo, na mé jnkokqá ch'eko sín xrá ch'ín Simón, la kjāxín chrakon sín. Kjánchó ntáche ch'ín Jesús tí ch'ín Simón kixin:

—Chrakonhya. Senó la koche k'uétse la nta jie la náhi la mé chojni tsjéyá —ichro ch'án.

¹¹ Ntá tió kjujiko sín tí ntabárcō tí chrínta ntā la kuítóhe sín kaín nkehe kuēnte sín ntá chréhe sín sákjuíko sín tí ch'ín Jesús.

Ch'ín Jesús kjuínchekitōhe ch'án jína ijnko chojni chóna chinlepra
(Mt. 8.1-4; Mr. 1.40-45)

¹² Kjuák'e ch'in Jesús ijnko tí chjasin, ntá kui ijnko chojni níhi chóna chinlepra. A ntá tío k'uikon ch'án tí ch'in Jesús ntá kjuák'exín toch'in ch'án chronóhe ch'án jnkójina ntáchro ch'án kixin:

—Ínchéni, tí tjínkáván jaha la jína chrókjuínchekitohéni jína —ichro ch'án.

¹³ Ntá ch'in Jesús kjuéntoá tja ch'án ntá kjuak'etja tja ch'án chrítaón tí s'inníhi ntáchro ch'án kixin:

—Méxra xíkaha tjínkáván. Ntá jie sintakitoha jína —ichro ch'án.

Ntá xíkaha ichro ch'án ntá tí chinlepra tuénxín kjuínhin tí s'inníhi. ¹⁴ A ntá k'uetuénhen ch'in Jesús tí ch'in a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí nchat'á la tsjánjuan tí nkehe tsík'etqan ch'in Moisés ts'áyéhe Dios* kixin ntá tsonoxín kaín xín chojni kixin ó kuítóha jína —ichro ch'án.

¹⁵ Kjánchó antsí k'uixikónohe sín nkexrí tí kjuaxroan kjuasin ch'in Jesús, ntá nchónhya chojni k'uixikóchjinehe sín ch'án kixin tsinhin sín nkehe tsjako ch'án, la ko tsitoexín sín jína tí chin chóna sín. ¹⁶ Kjánchó ch'in Jesús la k'uaxrjenta ch'án tí kohya chojni la ntaha nixjéxín ch'án Dios.

Ch'in Jesús kjuínchekitohé ch'án jína ijnko ch'in tsík'en toté
(Mt. 9.1-8; Mr. 2.1-12)

¹⁷ A ntá ijnko yaon kjuák'ekjako ch'in Jesús na ntá ntiha k'uéjótjaxín iso sín fariseo la ko iso tí sín tjako tí ley, tsíkjin sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuénte Dios kjuakoxín ch'án kixin sinchekitohé ch'án chojni jína. ¹⁸ Ntá kui iso chojni tinkátsénki sín ijnko ch'in tsík'en tote tjenkaya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'in Jesús tjetjako ch'án. ¹⁹ Kjánchó xitjahya ts'ixenhen sín kixin nchónhya chojni sixenhen nchia. Ntá k'uj'ótjen sín tí chrítaón nchia, ntá kjuakjlin sín iso teja la ko tí nta sít'ó ntá ntiha kjuinkajinxín sín tí ch'in níhi tjenkaya kania ntoí tí tjen ch'in Jesús. ²⁰ Na ntá tío k'uikon ch'in Jesús kixin imá tinkáchónki sín ch'án ntá nixjéhe ch'án tí ch'in níhi, ntáchro ch'án kixin:

—Jaha, ó kjuixin kjuínhan tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankixin sín kjo sín asén sín kixin: “¿Xá nkexro tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjlin ijie kixin jehó Dios mé chóna kjuachaxin tsjatsen ijie chojni”, mé xíkaha kjuenkayáxín sín.

²² Ntá ch'in Jesús la ó nohe ch'án tí nkehe tjenkayáxín sín ntá ntáchro ch'án kixin:

—¿Nkekuénte kixin xíkaha tjenkayáxín? ²³ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuínhin ch'án tí ijie yámá ch'án, ó á antsí xrahya chróntátjan ch'án kixin chrók'uínkatjen ch'án sáchrókjui ch'án? ²⁴ Méxra ijie tsjákoxian kixin tí Xjeen Dios K'óna Chojni mé chóna kjuachaxin ntihi chjasintajni tsjakjlinhin ijie chojni —ichro ch'án.

Ntá k'uetuénhen ch'án tí ch'in tsík'en tote ntáchro ch'án kixin:

—Jaha tétuanhan t'inkatjen tjatsíyan kaniáa la sátjia ntqá —ichro ch'án.

²⁵ Ntá tuénxín k'uínkatjen tí ch'in tsík'en tote nkayakon kaín tí sín siín a la kuákja ch'án kaníe ch'án k'uékjak'eták'á ch'án ntá sákjuí ch'án ntqé ch'án la kjuanchehe ch'án Dios kjuasáya. ²⁶ Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uikonni antsí má kjuaxroan jie —ichro sín.

Ch'in Jesús k'uyéhe ch'án tí ch'in Leví
(Mt. 9.9-13; Mr. 2.13-17)

²⁷ Ntá chr'éxin ntá ch'in Jesús k'uaxrjéxín ch'án nchia ntá k'uikon ch'án ijnko ch'in nchekjènkí mé it'in ch'án Leví tjetjaxín ch'án tjehe ch'án xra nkaxenhen tí nchia ntsí tí xenkaxín chichaon a. Ntá ntáchro ch'án kixin:

—Chr'éhé tí janhan —ichro ch'án.

²⁸ Ntá ch'in Leví mé tuénxín k'uínkatjen ch'án la ntá kuítóhe ch'án kaín xín nkehe ntá chr'éhe ch'án tí ch'in Jesús.

²⁹ Ntá chr'éxin ch'in Leví chóna ch'án ijnko kia jie ntqé ch'án kjuikosáyehe ch'án tí ch'in Jesús. Kjaxin k'uéjótjé sítjé tí sín nchekjènkí la ko itsjé í so chojni chóna jie k'uéjótjaxínko sín tí ch'in Jesús chjino tí mesa a. ³⁰ A ntá tí sín fariseo la ko tí sín maestro tjako tí ley la mé kjuankixin sín tjonta sín tí sín k'uájiko ch'in Jesús ntáchro sín kixin:

—¿Nkekuénte ntekoará la ko t'ikoará tí sín nchekjènkí la ko tí sín chóna jie? —ichro sín.

³¹ A ntá kjuátéhe ch'in Jesús ntáchro ch'án kixin:

* 5:14 Levítico 14.4-8

—Tí chojni níehya t'ichjánxienhya sín nkexro sich'e xroan. Náhi. Jehó tí sín níhi mé t'ichjánxinhin sín nkexro sich'ehe sín xroan. ³² Janhan la k'uinkahya ntihi kixin chrók'uíyahá tí sín jína tjejó. Náhi. Janhan k'uinka kixin ts'iyahá tí sín chóna jie kixin chrókuítóhe sín tí ijje sín ntá chrókuinkí sín tí tjenkayáxin sín —ichro ch'án.

Tjanhankíhi sín tí ch'ín Jesús kixin á chrókjónehya sín tió tsonixjehé sín Dios
(Mt. 9.14-17; Mr. 2.18-22)

³³ A ntá kjuanchankíhi sín tí ch'ín Jesús kixin:

—¿Nkekuènte kixin tí sín k'uék'ajiko ch'ín Juan jnkoyaxón nehya sín na nixjehé sín Dios, la ko kjaxin xikaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

³⁴ Ntá kjuátèhe ch'ín Jesús kixin:

—¿Xá chrókjuachará chrókuétuènenhrá kain tí sín tsík'íyehé sín tsikóchjina tí tjejó tí sín tsikótehe kixin chrókjónehya sín tí naxá tjejóko sín tí ch'ín tsikótehe? ³⁵ Kjánchó tsjixraká tí yaon itsi chojni tsotsé sín tí ch'ín tsikótehe sátsjiko sín ch'án. Ntá tí sín tsikóchjina la ts'ává sín la í sinehya sín —ichro ch'án.

³⁶ Kjaxin kjuíncheyóexin ch'án ntáchro ch'án kixin:

—Ninkexró chrókuaté ijnko camisa nixin ntá chrókjuak'eniehe ijnko camisa ntaxin kixin xikaha chrókjuich'e sín ntá chrók'uitjáyán tí camisa nixin la ko kjaxin tí t'ò ka k'uaxrxjén tí camisa nixin tsoyóehya tí camisa ntaxin. ³⁷ Kjaxin chrókuikiahará xranvino nixin ijnko tjuaxran ntaxin kixin tí xikaha chrókjuich'erá la chrók'uichje tí tjuaxran ntaxin ntá chrók'uitjáyán tí xran la ko chrók'uitjáyán tí tjuaxran. ³⁸ A ntá tí xranvino nixin chrókuikia ijnko tjuaxran nixin kixin yóí la chrók'uitjáyanyha. ³⁹ La ko kjaxin ninkexró tió tsík'i tí xran ntaxin naxá chrók'oxrjinhin chrók'ui xran nixin. Náhi. Tsontáchro ch'án kixin íchá jína tí xran ntaxin, tsixro ch'án —mé xikaha ichro ch'ín Jesús.

6

Tí sín k'uájiko ch'ín Jesús mé k'uín sín iso noatrigo ijnko yaon t'ok'éhe tí sín israelita
(Mt. 12.1-8; Mr. 2.23-28)

¹ Ijnko yaon t'ok'éhe sín la ch'ín Jesús k'uátsinka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankixin sín nkaya tja sín ó k'lóntajinyá sín tí noa ntá kjóne sín. ² Ntá iso tí sín fariseo kjuanchankí sín kixin:

—¿Nkekuènte kixin tjejoch'erá xra jie? La mé kohya kjuachaxin tsonhen xra tí yaon t'ok'éheni —ichro sín.

³ Ntá kjuátèhe ch'ín Jesús kixin:

—¿Jahará á kjuínchekuáxinhyará tí xroon chrónka nkehe kjuich'e ch'ín David la ko tí sín k'uájiko ch'án tió k'uén sín kjinta? ⁴ Na mé jehe ch'án mé k'uixenhen ch'án ntòe Dios la kjóne ch'án tí niotja tsikóyaon, la ko kjaxin chjéhe ch'án tí niotja tí sín k'uájiko ch'án kjónté jehó siín kjuachaxin sine tí sín nchat'á* —ichro ch'ín Jesús.

⁵ Kjaxin ntáchro ch'án kixin:

—A ntá tí Xjeen Dios K'óna Chojni mé chóna kjuachaxin ts'etòan nkexrí tsonhen tí yaon t'ok'éheni —ichro ch'án.

Ch'ín Jesús kjuínchekitòhe jína ijnko ch'ín tsixámá tja
(Mt. 12.9-14; Mr. 3.1-6)

⁶ A ntá í jnko yaon t'ok'éhe chojni ntá k'uixenhen ch'ín Jesús ijnko njnko Israel la ntá kjuankixin kjuako ch'án. A ntá ntaha kjuák'e ijnko ch'ín tsixámá tja ch'án chjina. ⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrók'uikon sín á sinchekitòhe ch'án chojni jína tí yaon t'ok'éhe sín kixin ntá chrók'ueka sín ch'án jie. ⁸ Kjánchó jehe ch'án ó nohe ch'án nkehe tjenkayáxin asén sín ntá nixjehé ch'án tí ch'ín tsixámá tja ntáchro ch'án kixin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exin tòte ch'án. ⁹ Ntá nixjehé ch'ín Jesús tí í so sín ntáchro ch'án kixin:

—Tsjánhánkíhárá ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitòheni chojni jína ní o á chrók'óyánni chojni? —ichro ch'án.

¹⁰ Ntá ch'ín Jesús komá ch'án kain tí chojni siín ntiha ntá nixjehé ch'án tí ch'ín níhi ntáchro ch'án kixin:

—Tjéntóá tja —ichro ch'án.

* 6:4 6.3-4 1 Samuel 21.6; Levítico 24.5-9

A ntá tí ch'ín a xikaha kjuich'e ch'án ntá kuitohe tja ch'án jína. ¹¹ Kjánchó tí sín fariseo tjejó mé kónínkaon sín mé ntá kjo sín kichó sín kixin tjínkaon sín chrók'óyán sín tí ch'ín Jesús.

Ch'ín Jesús kjueyá ch'án tí teyó sín ts'ajiko ch'án
(Mt. 10.1-4; Mr. 3.13-19)

¹² A ntá ijnko yaon ch'ín Jesús sákjui ch'án ijnko jna kixin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios. ¹³ A ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án. ¹⁴ A ntá tí sín í mé xikhi it'ín sín. Na mé ch'ín Simón la ntá ch'ín Jesús kjuínchek'ín ihnjé ch'án Pedro kjaxin; la ko kichó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, ¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'ín Alfeo; la ko í jnko ch'ín Simón na mé tí ch'ín a mé k'uék'aji tí partido cananista; ¹⁶ la ko ch'ín Judas la kichó ch'án mé it'ín Jacobo; la ko ch'ín Judas Iscariote tí ch'ín kjuínchekji tí ch'ín Jesús.

Ch'ín Jesús kjuakohe ch'an nchónhya chojni
(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxín sín tí jna ntá k'uejó sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixín nkuixín estado Judea la ko chjasin Jerusalén la ko tí chrínta ntayaon tí síin tí chjasin Tiro la ko tí chjasin Sidón. Ó kjuí sín kixin tsinhín sín tí nkehe tsjako ch'ín Jesús la ko tsitohe sín jína. ¹⁸ A ntá tí sín kjuaxróxinhya k'uejó k'uéchónta sín nchakuen jínahya na mé kuitohe sín jína kjaxin. ¹⁹ Kaín chojni tjínkaon chrókuákóxín sín tí ch'ín Jesús kixin kjuínchekitohe ch'án jína kaín xín chojni kixin jehe ch'án chóntha ch'án kjuachaxin jié.

Tí kjuachéhe la ko tí kjuaxróxinhya
(Mt. 5.1-12)

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:
—Náxrjón tjejará jahará nõará kixin chontará kjuachaxién Dios.
²¹ 'Náxrjón tjejará jahará t'énxinrá kjinta ijie kixin chr'éxin sinterá jína.
'Náxrjón tjejará jahará tsjankará ijie kixin chr'éxin tsjanorá.
²² 'Náxrjón tjejará jahará nínkakonhanrá chojni la ko ts'ínkítíará sín sátsjirá ókjé, la ko t'ántaxínhanrá sín la ko t'ákjénxín sín ihnjárá éxí ijnko nkehe jínahya kixin tinkachónkirá tí Xjeen Dios K'óna Chojni. ²³ Tsócháhará má la ko imá tsochontará kjuachéhe tí yaon a kixin ts'ayéhérá nkehe kuente nkaya nkajní. A ntá xikaha tí t'áchrji tí sín jínahya ch'e la mé ósé kjuate sín tí sín k'uéchrónka itén Dios.

²⁴ A ntá jahará rícorá kjuaxróxinhya ts'ejorá chr'éxin kixin ó kjuixín k'uayéhérá kaín nkehe.

²⁵ A ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.
'A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjankará.
²⁶ 'Kjuaxróxinhya ts'ejorá tió kaín chojni tsjikosáyahará sín kixin xikaha tí t'áchrji sín kjuikosáyehe tí sín ntoáhya k'uéchrónka itén Dios ósé.

Tsojtjuèheni tí sín nínkakonhenni
(Mt. 5.38-48; 7.12)

²⁷ A ntá jahará tjeotinínhrá mé tjéxrjanka kixin chrójtjuèhérá tí sín nínkakonhanrá la ko jína chrókjuínkítsará tí sín tjínkakonhya tí jahará. ²⁸ Jína nixjehérá tí sín t'ántaxínhanrá la ko tjanchehérá Dios kixin tsjínkítsa ch'án tí sín chónkíhará sín. ²⁹ Tí chjéhe ijnko nkexro ijnko tuáanrá chrókjóka tí í jnko nángo kixin chróchjéhe sín tíha kjaxin. La ko tí síin ijnko nkexro tjínkaon sín tsakitsjaha sín tí chamara tjín t'ínkayate na mé títohé kixin kjaxin sátsjiko sín camisá kjaxin. ³⁰ Tí jnkojín nkexro tjanchaha nkehe chonta la chjéhe sín. A ntá tí tsakja sín nkehe kuéntá la tjanchehya sín kixin naxá ts'ójkjanhan sín. ³¹ Méxra chrókjuikosáyehérá kichuárá éxí yóhe nkexri tjínkáonrá chrókjuikosáyahará tí jehe sín kjaxin.

³² Tí jehó tjuèhérá tí nkexro tjuáhará la tí xikaha la kohya nínkehó tsjachahyará. Kjónté tí sín jínahya tjasin jie la xikaha ch'e sín. ³³ A ntá tí tjikosáyehérá jehó tí sín tjikosáyahará la kohya nínkehó tsjachahyará xikaha. Kjónté tí sín jínahya tjasin jie mé kjaxin xikaha ch'e sín. ³⁴ La ko tí nchekjenrá chichaon jehó tí sín tjenkayáxinrá kixin ts'ójkjanhanrá sín tí chichaon, la tí xikaha kohya nínkehó tsjachahyará. Kjónté tí sín jínahya tjasin jie xikaha ch'e sín nchekjen kichó sín chichaon la ko chónhen sín kixin tsokjan tí chichakóen sín inaá. ³⁵ Kjánchó jahará chrójtjuèhérá tí sín nínkakonhanrá la ko jína chrókjuich'eherá sín xra la ko chrókjuínchekjenrá sín chichaon la chróchoénhyará kixin chrókjan tí chichakóenrá inaá. Mé xikaha chrókjuich'erá la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya. ³⁶ Chrókjuikonóehérá kichuárá éxí yóhe t'árá nkaya nkajní tjikonóehé ch'án chojni.

Chrók'uántaxíenhyani kichó ni
(Mt. 7.1-5)

³⁷ 'Chrókuékahyará jie ókjé chojni kixin ntá Dios chrókuanchahya ch'án jie tí jahará. Chrókuétuanhyará kixin chrókuasóte í jnko chojni kixin Dios kjaxin chrókuinchejasótiahyará ch'án tí jahará. Chrók'uitjányanhará ichrén jie kjuasinhanrá í jnko chojni kixin ntá Dios chrókuinchekitjányanhará ch'án tí jie kjuásinrá. ³⁸ Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókujuanjon ch'án, icha tsík'enka ch'án kixin tsík'ótsjéyehe ch'án tí nkehe tsíkjachroayá ch'án tjetóxin tsjanjon ch'án. Dios tsotjáhará xikaha yóhe éxi tsíchjehérá í so chojni.

³⁹ Ntá kjuíncheyóexin ch'ín Jesús ntáchro ch'án kixin:

—¿Xá á chrók'ójina ijnko chojni t'ikonhya chrókuiko í jnko chojni t'ikonhya? Tí xikaha la yóí sín chrók'uanótjenyá sín ichrén tóye. ⁴⁰ Ijnko nkexro xrakohe la noehya éxi tí nkexro tjako. Kjánchó tió tsjixin tsoxrakohe ch'án ntá tsonhe ch'án éxi nohe tí nkexro kjuakohe ch'án.

⁴¹ ¿A ntá nkekuénté tsjehé tí chjíninó ntsí tjenkánki ikon tí kichuá, tí naxá ántosán tí nta jie tjenkánki ikuan? ⁴² Mé xikaha nkexri kixin chróntáche kichuá kixin chrókuítóhe ch'án kixin chrókuakitsjenkíhí ch'án tí chjíninó ntsí tjenkánki ikon ch'án tí naxá ántosán tí nta jie tjenkánki ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jie tjenkánki ikuan kixin ntá chrók'uikuan chrókuakitsjenkiá chjíninó ntsí tjenkánki ikon tí kichuá.

Tí nta mé tjatsoanxinni tí to tsík'óna
(Mt. 7.17-20; 12.34-35)

⁴³ Kohya nta jína chrók'óna to jínahya, la ko kjaxin kohya nta jínahya chrók'óna to jína. ⁴⁴ Jnkojnko tí nta mé tjatsoanxinni tí to t'óna. Tí ntach'í xitjahya tsjakjinjinni to higo la ko xitjahya ts'inni to uva. ⁴⁵ Ijnko chojni jína la jína nixja ch'án kixin jína asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxi tjenkayáxian asén mé xikaha nixja ir'va.

Ch'ín Jesús kjuíncheyóexin éxi yaá nkexro kjuích'éna nchia
(Mt. 7.24-27)

⁴⁶ ¿Nkekuénté ntáchrorá kixin janhan Inchará, la ntá tahyará kuenté tí nkehe tétuanhanrá? ⁴⁷ Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín. ⁴⁸ Na mé jehe sín tóyóhe ijnko nkexro kjuích'éna nchia la senó k'óxraya ch'án tóye nínka kixin ntá sich'éna ch'án nchia chrítaón tí tjo a. A ntá tió k'uánki tí ntarío la ikui tí ntá k'uúntate tí nchia, kjónté xikaha la k'uátjoákoehya la ní kuínkíhya tí nchia a kixin jína tsík'óna chrítaón tjo tjejen. ⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuích'éna nchia chrítaón nche la kohya tjo chrínki. A ntá tió k'uánki tí ntarío la ikui tí ntá k'uúntate tí nchia la ntá k'uátjoáko ntá tí nchia la ntá kuenté tí nchia la k'uitjányan —mé ichro ch'ín Jesús.

7

Ch'ín Jesús kjuínchekitóhe jína ijnko ch'ín ch'ehe ijnko soldado romano xra
(Mt. 8.5-13)

¹ Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum. ² Ntaha kjuák'e ijnko capitán romano la mé chóna ch'án ijnko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án. ³ A ntá tió kuínhin tí ch'ín capitán itjo sín nkexri tjen ch'ín Jesús ntá ichr'án ch'án iso sín táda judío tsjijitsjehe sín tí ch'ín Jesús tsochronóehé sín ch'án kixin chrókjuuji ch'án chrókuinchekitóhe ch'án jína tí ch'ín ch'ehe ch'án xra. ⁴ Ntá kjuíji sín kóchjinehe sín tí ch'ín Jesús kjuankixin chrónóehé sín ch'án ntáchro sín kixin:

—Imá jína tí ch'ín capitán la mé tjinkaon ch'án chrókuinkítsa ch'án ⁵ kixin tjuèhe ch'án tí nacióin kuénteni la ko jehe ch'án kjuínkítsa ch'án la ko k'ueqan kixin ts'óna ijnko nínko kuénteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'ueqnen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuehé kixin chrók'uixénhén ntge ch'án. ⁷ Mé xikaha chrókósuehé ch'án chrókjuuji ch'án chrókjuueyá ch'án tí jaha. Méxra tí kjuachaxin chrónixja ó chrókuitóexin jína tí ch'ín ch'ehe ch'án xra. ⁸ Kixin jehe ch'án kjaxin t'ítuenhen ch'án la ko kjaxin chóna ch'án soldado t'etuenhen ch'án inaá. Tió t'etuenhen ch'án ijnko sín kixin sátsji la mé sátsji la ko tió t'etuenhen ch'án í jnko sín kixin xrákoa la mé xrákoa la ko tió t'etuenhen ch'án í jnko sín kixin sich'e ijnko xra la mé nchexiteyá ch'án —mé xikaha ichro tí sín kui.

⁹ Ntá ó kuínhin ch'ín Jesús xíkaha ntá chrakon ch'án káxin xíkaha tjenkayáxin tí ch'ín a, a ntá nkátjá ch'án komá ch'án tí chojni chréhe ntáchro ch'án káxin:

—Ntáxrxjan káxin naxá k'uíjtahya nijnko nkexro israelita xíkaha tinkáchónki éxi tí ch'ín i —ichro ch'án.

¹⁰ A ntá ó kjan nchia tí sín tsík'ítuenuhen la ó k'uikon sín káxin ó tsíkitohe jína tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Naín

¹¹ Ntá chr'éxin ntá sákjui ch'ín Jesús ijnko chjasin it'ín Naín la ko sákjuiko ch'án tí sín k'uájiko ch'án la ko nchónhya í so chojni. ¹² Tió kjuíjichjina sín tí chjasin a la k'uikon sín nchónhya chojni sákjuikjáva sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuikotoxin sín tjan. ¹³ Ntá tió k'uikon Ínchéni tí tjan a ntá kuíkonóhe ch'án tjan ntáchro ch'án káxin:

—Tsjankahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénki tí nkexro tsík'en la kjuak'etja tja ch'án tí nkehe tinkátsénka sín tí ch'ín tsík'en. A ntá tí sín kuámá nta k'uejóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án káxin:

—Ntásoá. Tétuanhan t'áya —ichro ch'án.

¹⁵ Ntá tí ch'ín tsík'en tuénxín kjuák'etjaxin ch'án la ko kjuankáxin nixja ch'án. Ntá ch'ín Jesús kjuínchek'áyéhe ch'án iné tí ch'ín ntasoá la sákjuiko. ¹⁶ A ntá tió k'uikon sín xíkaha kónhen la kaín sín imá chrakon sín la ko kjuankáxin kjuanchehe sín Dios kjuasáya ntáchro sín káxin:

—Dios mé ichr'án ijnko chojni imá t'etöan chrónka itén Dios ts'ejókoni —ichro sín.

Kjaxin ntáchro sín káxin:

—Ó kui Dios tsjinkátsa ch'án chjasén ch'án —ichro sín.

¹⁷ A ntá nkuíxin estado Judea la ko kaín tí chjasin chjinaxón mé kuínhin sín káxin nkehe tí kjuaxroan kjuích'e ch'ín Jesús.

Tí sín ichr'án ch'ín Juan Bautista

(Mt. 11.2-19)

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyehé ch'án iyó tí sín k'uájiko ch'án ¹⁹ k'uetuenuhen ch'án sín sátsjitsjehe sín tí ch'ín Jesús tsjijkjanchankíhi sín ch'án káxin á jehe ch'án tí nkexro tsi o á tsochónhen sín í jnko nkexro, tsixro sín. ²⁰ A ntá tí sín ichr'án ch'ín Juan mé kóchjina sín tí tjan ch'ín Jesús ntáchro sín káxin:

—Ch'ín Juan Bautista k'uetöan ch'án kuini tsijkjanchankíhani káxin á jaha tí nkexro tsi ní o á tsochónhenni í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitohe ch'án itsjé chojni jína la mé kjuatsen ch'án kaín tí chin chóna sín la ko kuakitsje ch'án tí nchakuen jínahya chóna sín la ko kjuínchek'ikon ch'án itsjé chojni t'íkonhya. ²² A ntá kjuátéhe ch'ín Jesús ntáchro ch'án káxin:

—Sátjírá tjíchenkará tí ch'ín Juan kaín nkehe k'uikonrá la ko kaín nkehe kuínhínrá káxin tí sín k'uikonhya la ó t'íkon sín jie, la ko tí sín k'uekjihya la ó tji sín jie, la ko tí sín k'uechóna chinlepra la ó kuitohe sín jína, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxrakóhe sín tí tan jína tsaáxin sín. ²³ Ntá náxrxjón tjan tí nkexro kohya nkehe t'ínkákónhen tí tinkáchónki sín tí janhan —mé ichro ch'án.

²⁴ Tió sátsíkji tí sín ichr'án ch'ín Juan ntá kjuankáxin nixjehe ch'ín Jesús tí sín k'uejó ntiha káxin nkexrí tjan ch'ín Juan ntáchro ch'án káxin:

—Tió sákjuítsjehérá ch'ín Juan nteje, ¿nkexrí k'uikonrá tí jehe ch'án? ¿Á k'uikonrá ch'án éxi ijnko tji nchexrayehé xrxnto? ²⁵ Tí náhi, ¿la ntá nkehe k'uikonrá? ¿Á k'uikonrá ch'án éxi ijnko nkexro tsík'ítsa jína? Jahará ó nohará káxin chojni tsík'ítsa jína la ko chóna kaín nkehe náxrxjón la mé ntöe rey tjejó sín. ²⁶ ¿A ntá nkexrí k'uikonrá ch'án? ¿Á k'uikonrá ch'án éxi ijnko nkexro chrónka itén Dios? Na mé xrxjanka káxin chaxín xíkaha jehe ch'án na mé antsí t'etöan ch'án la ntá tí sín k'uechrónka itén Dios óse la kánhyó. ²⁷ Ch'ín Juan mé tí nkexro kui éxi chrónka tí xroon itén Dios óse ntáchro káxin:

Janhan mé tsochr'an ijnko nkexro tsochrónka itan kuèntana tsítónxin ntja,

káxin tsjasiyóxin ch'án ntja kuèntá.*

Mé xíkaha chrónka tí xroon itén Dios. ²⁸ Ntá ijnko nkehe chaxín tsojtönkará káxin kaín tí nkexro k'uejó senó k'uechrónka itén Dios la kánhyó tjetöan sín la antsí tjetöan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios nkaya nkájni la antsí tjetöan sín a ntá jehe ch'ín Juan la kánhyó —ichro ch'ín Jesús.

²⁹ A ntá tió kuínhin sín tíhi la ntá kaín tí chojni la ko tí sín nchekjènkí tsíkíkite ch'ín Juan la ó kjuátsöan sín káxin Dios la jína ch'án. ³⁰ Kjánchó tí sín fariseo la ko tí maestro tjako tí ley

* 7:27 Malaquías 3.1

tsíkikitehya ch'ín Juan la mé tjinkakonhya sín tí nkehe tjinkaon Dios chrókjuinkitsa tí jehe sín. ³¹ Ntá ntáχρο Ìnchéni kíxín:

—¿Nkexrí chrókjuíntayóaxian tí chojni tjejó jie? ¿Nkehe chrókóyóhe sín? ³² Tóyóhe sín tí chánjan tjejótxajín sín tí ntsin tsítán sín la t'íyehé kíchó sín ntáχρο sín kíxín: “Kjuínchéntáchroni flauta la tehyará la ko tsjeni isón kuènte chojni tsík'en la tsjankahyará.” ³³ Kíxín ó kui ch'ín Juan Bautista la kjónehya ch'án nioṭja la ko k'uíhya ch'án vino la ntá jahará ntáχρο kíxín ijnko nchákuen tí jínahya chónṭa ch'án. ³⁴ A ntá kjaxín ikui tí Xjeen Dios K'óna Chojni la kjóne ch'án la ko ik'ui ch'án la ntáχροrá kíxín imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjénki. ³⁵ A ntá tí xjeen Dios mé tjakoxín sín kaín tí nkehe tjinkaon Dios.

Ch'ín Jesús mé kjuák'e ch'án ntq̄e ijnko ch'ín fariseo it'ín Simón

³⁶ Ijnko ch'ín fariseo mé chronóhe ch'án tí ch'ín Jesús kíxín tsjiji ch'án ntq̄e ch'án sineko sín ch'án. Ntá sákjui ch'án ntq̄e tí ch'ín a, a ntá ntiha kjuák'etjaxín ch'án tí tjeen mesa. ³⁷ A ntá itjen ijnko tjan nchónhya jie chónṭa tjan. Itjen tjan tí chjasin ntiha la ntá kónohe tjan kíxín tsíkiji ch'ín Jesús ntq̄e tí ch'ín fariseo la ko ntiha sineko sín ch'án. Ntá kui tjan ntiha kujkao tjan ijnko xṛṭ tjeet tsikaón aceite xṛaxé náxṛjón. ³⁸ Ntá tsjánka tjan kóchjina tjan toté ch'ín Jesús ntá ntákon tjan kjuátanxín toté ch'án la ko kaxihi tjan kjuínchexámáxin tjan toté ch'án la ko kjóneko kochíto toté ch'án la ko kjuíncheka tjan toté ch'án tí aceite xṛaxé náxṛjón. ³⁹ A ntá tió k'uikón tí ch'ín fariseo tsík'íyehé tí ch'ín Jesús ntá kjo ch'án asén ch'án kíxín: “Tí chrókóchaxín tí nkexro í ijnko ch'ín chrónka itén Dios ntá chrókónohe ch'án kíxín nkexrí xéhe tí tjan tjetákoxín ch'án kíxín ijnko tjan jínahya tíha”, ichro ch'án. ⁴⁰ Ntá ch'ín Jesús ntáche ch'án tí ch'ín fariseo kíxín:

—Simón, janhan chonta ijnko nkehe tsonixjaha —ichro ch'án.

Ntá kjuátēhe tí ch'ín fariseo ntáχρο ch'án kíxín:

—Chronka, Maestro —ichro ch'án.

⁴¹ Ntá ntáχρο ch'ín Jesús kíxín:

—K'uejó yaá chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario. ⁴² A ntá kjuachahya sín k'ókjenhen sín tí chichaon tí ch'ín síkéhe sín ntá kuikónóhe ch'án sín ntá k'óxiá ch'án tí cuenta síká yóí sín. A ntá jie chronka jaha kíxín nkexro tí yóí sín antsi chróṭjuehe tí nkexro kuikónóhe ch'án —ichro ch'ín Jesús.

⁴³ Ntá kjuátēhe tí ch'ín Simón ntáχρο ch'án kíxín:

—Janhan ntáxṛjan tí nkexro kuikónóhe má —ichro ch'án.

Ntá ntáχρο ch'ín Jesús kíxín:

—Ntoá tjenkayáxian —ichro ch'án.

⁴⁴ Ntá ch'ín Jesús komá ch'án tí tjan a ntá ntáche ch'án tí ch'ín Simón kíxín:

—¿A t'ikuan tí tjan a ní? Janhan na mé uíxanhan ntq̄a la ntá jaha la kjuánjonhya ntá chrók'ontia totená. Kjánchó jehe tjan tí ntákon tjan kjuínchek'óntixín tjan totená la ko kaxihi tjan kjuínchexámáxin tjan. ⁴⁵ A ntá jaha la kjóntekoahyana kochíto. Kjánchó jehe tjan naxa kuítēhya tjan neko kochíto totená. ⁴⁶ Jaha la kuikétxinhya aceite kja. A ntá jehe tjan kujkíte tjan aceite xṛaxé náxṛjón totená. ⁴⁷ Mé xíkaha ntáxṛjan kíxín imá tjuana tjan kíxín kaín tí nchónhya jie kjuasin tjan la mé kjuínhin tjan. A ntá ijnko nkexro kjuínhin intsíkoá jie la mé xíkaha intsíkoá tjakoxín kíxín tjuana sín —ichro ch'án.

⁴⁸ Ntá nixjehe ch'án tí tjan a ntáχρο ch'án kíxín:

—Ó kjuínhan tí jie chonta —ichro ch'án.

⁴⁹ A ntá kaín tí sín tsíkóchjina sín k'uejótxajín sín tí tjeen ch'án mé kjuankíxín kjo sín kíchó sín ntáχρο sín kíxín:

—¿Xá nkexro tíhi kíxín tjakjínhin ch'án ijje chojni?

⁵⁰ A ntá ch'ín Jesús ntáche ch'án tí tjan a kíxín:

—Ó kuaá jaha kíxín kuítekáván tí janhan. A ntá jie kjuaxróxin sátsjia ntq̄a —ichro ch'án.

8

Iso chojni chjín kjuínkítsa tí xṛṭ kjuích'e ch'ín Jesús

¹ A ntá chr'éxin ntá ch'ín Jesús k'uáji ch'án itsje chjasin hyé la ko chjasin ntsínsi kjuako ch'án la ko chrónka ch'án tí tan jína kíxín nkexrí tí kjuachaxin t'etq̄an Dios. A ntá tí teyó sín mé k'uájiko ch'án. ² Kjaxín chréhe iso chojni chjín tsíkjinchekitq̄he ch'án jína tsíkakitsje ch'án tí nchákuen tí jínahya k'uéchénta sín la ko tsíkatsen ch'án tí chin k'uéchénta sín. Ijnko tjan mé it'ín María la ko kjaxín tikitexín tjan Magdalena na mé tsík'axṛje yato nchákuen tí jínahya k'uéchénta tjan, ³ la ko í jnko tjan it'ín tjan Juana ne mé xii mé it'ín ch'án Chuza. Jehe ch'án mé ch'ehe ch'án xṛṭ tí ch'ín Herodes t'etq̄an ch'án, la ko í jnko tjan mé it'ín tjan Susana, la

ko itsjé í so sín k'uéjò sín. **A** ntá kaín sín kjuanjón sín tí nkehe k'uéchónta sín kjuínkítsa sín tí ch'ín Jesús la ko tí sín k'uájiko ch'án.

Ch'ín Jesús kjuíncheyóexin ch'án éxí ijnko ch'ín k'uénkə nonte
(Mt. 13.1-9; Mr. 4.1-9)

⁴ Ntá nchónhya chojni kójinkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntíha. **A** ntá ch'ín Jesús kjuíncheyóexin ch'án ntáchro ch'án kixin:

⁵ —Éxí ijnko ch'ín sákjuík'enkə noatrigo nontee ch'án. Mé xíkaha sákjuí ch'án ik'ue ch'án tí noatrigo a. Ntá iso noa la k'uánótjen chrínta ntja ntá nkaxénjin chojni tí noa a la ko kjaxin tí koxroxé k'uínka va. ⁶ **A** ntá í so la k'uítji chrík'á xro ntá k'uayan la xámá kixin kánhyó siín tjo. ⁷ **A** ntá í so la kjuítsínkák'á kach'í ntá k'uánkí kach'í la ntá í xitjahya k'uánkí tí no a kixin tsíkjate tí kach'í. ⁸ **A** ntá í so la mé tsík'ítjí nche jína. **A** ntá tíó k'uánkí la k'óna jína la mé jnkoinko noatje k'óna ciento neno noa —mé xíkaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kixin:

—Tí tjínkáonrá chrókuinhínrá la tinhínrá —ichro ch'án.

Ch'ín Jesús chronkaxín nkekuènte kjuíncheyóexin ch'án
(Mt. 13.10-17; Mr. 4.10-12)

⁹ Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. ¹⁰ Ntá ntáchro ch'án kixin:

—Dios mé tsjínkítsa kixin tsónohará tí nkehe noehya í so chojni nkexrí t'etóan Dios. Kjánchó tí í so sín tjáqohə sín kjuíntayóaxoán kixin ntá k'uíkon sín la k'jonté tsjatsəanhya sín la ko kuínhin sín na k'jonté naxə tiénxínhya sín.

Ch'ín Jesús chronkaxín nkexrí t'axrjexín tí ch'ín k'uénkə nonte
(Mt. 13.18-23; Mr. 4.13-20)

¹¹ Ntá tsəxrjanka nkexrí t'axrjexín tí nkehe kjuíntayóaxoán. Tí noatje mé tí itén Dios. ¹² **A** ntá tí noa k'uánótjen chrínta ntja la mé tóyohé tí sín kuínhin tí tan a. **A** ntá ó kuí ch'ín Tsochen ntá kjuínchek'ítjáyán ch'án kaín tí itén Dios kuínhin sín chrókuaáxin sín kixin ntá chrókuitekakónhya sín tí nkehe chrókuaáxin sín. ¹³ **A** ntá tí noa kjuítsínkák'á xro la éxí yóhé tí chojni kuínhin itén Dios la tjoka kóxrjínhin sín kuínkáchónkí sín. Na ntá itsi tí kjuaxróxinhya, a ntá tsítqhe sín tí itén Dios kuínhin sín kixin naxə nínkahya chóna nuèe. ¹⁴ **A** ntá tí noa kjuítsínkák'á kach'í na mé éxí yóhé ijnko chojni kuínhin tí tan jína kjánchó tjitoxiənhya ntje sín kixin tóxakonhen sín tí xra chóna sín la ko tjínkaon sín tsochóna sín itsjé nkehe la ko kaín tí nkehe tóxrjínhin sín mé t'ínkákónhən kixin xíkaha la xitjahya sich'ehe sín xra Dios. ¹⁵ **A** ntá tí noa k'uínka nonte jína na mé éxí yóhé tí chojni kuínhin tí itén Dios a ntá kaín asén sín kuítekaon sín la ntá kuítqehya sín tí tan, a ntá xíkaha la jína ch'ehe sín Dios xra.

Ch'ín Jesús mé kjuíncheyóexin éxí ijnko xrohi tjeche
(Mr. 4.21-25)

¹⁶ Nijnko nkexro chrókjuínchek'ákjen xrohi chrókjuak'emə nkaxenhen chj o chrókjuak'emə chrínkí cama. Náhí. Noi chrókjuak'e xrohi kixin ntá tí sín ts'ixenhen nchia ts'ikónxín sín tí t'inkaséyan. ¹⁷ Kohya nkehe chrók'uejó má a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsónoxíxin tí xrohi a. ¹⁸ **A** ntá chrókuinhínrá jína kixin tí tjen ijnko nkexro chóna nkehe la mé ts'áyéhé ch'án má. **A** ntá tí nkexro chónahya nkehe la mé ts'axrjehe ch'án k'jonté tí nkehe ntsí tónhen ch'án kixin chóna ch'án.

Tí iné la ko tí kichó ch'ín Jesús
(Mt. 12.46-50; Mr. 3.31-35)

¹⁹ **A** ntá kjuíji iné la ko kichó ch'ín Jesús tí tjen ch'án. Ntá xitjahya tsəchjinehe sín ch'án kixin nchónhya chojni siín. ²⁰ **A** ntá ijnko sín ntíha tsíkjenchenka ch'ín Jesús kixin:

—Iná la ko kichuá tjejó sín ntója la tjínkaon sín chrók'uikon sín tí jaha —ichro sín.

²¹ Kjánchó kjuátqhe ch'án ntáchro ch'án kixin:

—Tí sín tinhin itén Dios la ko titekaon sín na mé t'íkuən tí jehe sín éxí nəná la ko kichíná —ichro ch'án.

Ch'ín Jesús k'uetuənhen tí xrinto la ko tí ntə kixin ts'ixita
(Mt. 8.23-27; Mr. 4.35-41)

²² Ntá ijnko yaon k'uixenhen ch'ín Jesús ijnko ntabárcə la koí tí sín k'uájiko ch'án. Ntá ntáchro ch'án kixin:

—Sátsjini tóhé ntayaon —ichro ch'án.

Ntá sákjuí sín. ²³ Ntá nachrohe tjejót'atoyé sín a ntá ch'ín Jesús mé kjuák'eja ch'án. **A** ntá xrinəhya tjan chjéhe xrinto chrítaón ntə ntá xrankixin sítikía ntə tí ntabárcə ntá chrakon sín kixin ts'aniankí ntə tí ntabárcə. ²⁴ Ntá kjuínchekjayehe sín tí ch'ín Jesús, ntáchro sín kixin:

—Maestro, Maestro. Tjejót'aniankíni ntá —ichro sín.

Ntá ch'ín Jesús k'uàya ch'án ntá k'uetuēnhen ch'án t' xrínto la ko tí ntá k'ixin ts'ixita, a ntá náxrjón k'uíxita tí ntá la ko tí xrínto. ²⁵ Ntá ntáche ch'án tí sín k'uájiko ch'án k'ixin:

—¿Á naxa tinkachónkihyará Dios? —ichro ch'án.

Kjáńchó jehe sín mé chrakon sín itjo sín k'íchó sín k'ixin:

—¿Xá nkexro tíhi k'ixin t'etuēnhen ch'án xrínto la ko tí ntá la titekakonhen ch'án?

Ijńko ch'ín nonte Gadara chóna nchakuen tí jínahya

(Mt. 8.28-34; Mr. 5.1-20)

²⁶ Ntá kjuíji sín tí nonte Gadara, na mé tóhe ntayaon ntoí chók'èxin estado Galilea. ²⁷ Ntá k'uínkajínxín ch'ín Jesús tí ntabárcó ntá kóchjina ijńko ch'ín chjasin ntiha. Ntá ó má sé chóna ch'án nchakuen tí jínahya. Na ntá ní ké ch'án t'inkáyahya ch'án, la ko jehya ntge ch'án k'uékjak'e ch'án na mé tjen ch'án tí panteón. ²⁸ Tíó k'uíkon ch'án tí ch'ín Jesús ntá kjuák'exín toh'ín ch'án nkayakon tí ch'ín Jesús, ntá k'óyako ch'án ntáchro ch'án k'ixin:

—Nkeuēnte tjiaté tí jeheni, jaha Jesús Xjeen Dios itjen nkaya nkajní? Chronóghani nchekjasótehyani —ichro ch'án.

²⁹ Xíkaha ntáchro ch'án k'ixin ch'ín Jesús tsík'etuēnhen tí nchakuen tí jínahya k'ixin ts'axrjexín tí jehe ch'án. Nchónhya veces tí nchakuen tí jínahya k'uék'etuēnhen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko tóté ch'án la mé cadena tsíkóntetoxín ch'án k'ixin tjínkaon sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxín ch'án k'ixin nchakuen tí jínahya tjínkaon sáchrókjuiko ch'án nteje. ³⁰ Ntá ch'ín Jesús kjuanchankíhi ch'án tí ch'ín a k'ixin:

—¿Nkexrí it'ian? —ichro ch'án.

Ntá kjuátēhe ch'án ntáchro ch'án k'ixin:

—Legión mé it'inni —ichro ch'án.

Ntáchro ch'án xíkaha k'ixin nchónhya nchakuen tí jínahya chóna ch'án. ³¹ A ntá káin tí nchakuen tí jínahya chronóēhe tí ch'ín Jesús k'ixin chrók'uetóghanya ch'án k'ixin chrókjuítsínkayá tí tóye nńka. ³² A ntá ntiha tí jna síin nchónhya cochino xrine va. A ntá tí nchakuen tí jínahya chronóēhe tí ch'ín Jesús k'ixin chrókjuanjon ch'án kjuachaxin chrók'uixenhen tí cochino a. A ntá kjuanjon ch'án kjuachaxin. ³³ A ntá tí nchakuen tí jínahya k'uaxrjexín tí ch'ín a, a ntá k'uixenhen tí cochino a. A ntá káin tí cochino kuínka va sákjuí va nó nkaya tsaka k'uánótjenki va ntá kjuínhin va ntá.

³⁴ A ntá tí sín sí'ayakonhen tí cochino k'uíkon sín k'ixin xíkaha kónhen ntá chrakon sín kuínka sín sákjuíchronka sín tí chjasén sín la ko tí rancho. ³⁵ A ntá tí chojni k'uaxrjexín sín chjasin sákjuítsjehe sín nkehe tí tsíkónhen. A ntá kjuíji sín ntiha tí tjen ch'ín Jesús ntá k'uíkon sín k'ixin ntiha tjen tí ch'ín tsík'axrjexín tí nchakuen tí jínahya. Ntiha tjetjaxín ch'án chrínkí tóté tí ch'ín Jesús, ó tsík'inkáya ch'án iké ch'án k'ixin ó jina tjen ch'án, a ntá chrakon sín tí k'uíkon sín xíkaha. ³⁶ A ntá tí jehe sín tsík'ikon sín k'ixin xíkaha kónhen la chrónka sín k'ixin nkexrí kuítōhe jina tí ch'ín k'uéchóna tí nchakuen tí jínahya. ³⁷ A ntá káin tí chojni chjasin Gadara kjuank'ixin chronóēhe sín tí ch'ín Jesús k'ixin sáchrókjuixin ch'án ntiha k'ixin imá chrakon sín. A ntá tí ch'ín Jesús k'ujt'ótjen ch'án tí ntabárcó sákjuíxin ch'án ntiha. ³⁸ A ntá tí ch'ín tsík'axrjexín tí nchakuen tí jínahya chronóēhe ch'án tí ch'ín Jesús k'ixin á chrókjuanjonhya ch'án kjuachaxin sáchrókjuí ch'án koí ch'án. Kjánchó ch'ín Jesús k'uetuēnhen ch'án k'ixin tsitōhe ch'án ntáchro ch'án k'ixin:

³⁹ —Titōha satjia ntōa la ko chrónka nkexrí tí kjuachaxin jié kuēnte Dios kuítōaxián jina jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án k'ixin ijńko kjuaxroan jié kjuích'e ch'ín Jesús kjuínchekitōhe ch'án jina.

Tí xjeen ch'ín Jairo la ko tí tjan kuákóxin iké ch'ín Jesús

(Mt. 9.18-26; Mr. 5.21-43)

⁴⁰ Tíó ch'ín Jesús kjan ch'án tí í jńko chrínta ntá ntá nchónhya chojni síin ntiha la chéhe sín kjuíji ch'án ntiha, k'ixin káin sín tjejóchónhen sín ch'án. ⁴¹ Ntá kui ijńko ch'ín it'ín Jairo na mé ijńko ch'ín t'etōan kuēnte nńko. A ntá kjuák'exín toh'ín ch'án tōte tí ch'ín Jesús chronóēhe ch'án k'ixin sáchrókjuí ch'ín Jesús ntge ch'án ⁴² k'ixin chóna ch'án jńkokoáxon xjeen ch'án chjin chóna teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uíxita k'íchó sín.

⁴³ Ntá síin sín ntiha. Na mé ntiha tjenkákjan ijńko chojni chjin níhi tjan sítji tjan jni na mé chóna tjan teyó nánó titōehya tjan jina. A ntá káin nkehe k'uéchóna tjan kjuenkehe tjan tí sín ch'e xroan la ko nijńko sín kjuachahya sín kjuínchekitōhe sín tjan jina. ⁴⁴ A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jni la í kjuíhya tjan.

⁴⁵ Ntá kjuanchankí ch'ín Jesús k'ixin:

—¿Nkexro tí kuákóxinna? —ichro ch'án.

A ntá kaín sín ntáχρο sín kixin ninkexró, ichro sín. A ntá ch'in Pedro la ko tí sín k'uejóko ch'án ntáχρο sín kixin:

—Maestro, nchónhya chojni siín la ko tótéka sín la ntáhi ntáha, ¿ntá nkekuènte kixin naxa tjanchankiá kixin nkexro tí kuákóxina? —ichro sín.

⁴⁶ Kjánchó ntáχρο ch'in Jesús kixin:

—Jnkojín nkexro kuákóxinna kixin kónðna kixin kjuachaxin kuèntaná kuitóexín ijnko chojni jína —ichro ch'án.

⁴⁷ A ntá tió k'uíkon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínki toté tí ch'in Jesús. Ntá chrónka tjan nkayakon kaín xín chojni kixin nkekuènte kuákóxín tjan iké ch'án la ko nkexrí kuitóexín tjan jína xíkaha.

⁴⁸ Ntá ntáχρο ch'án kixin:

—Jaha, xjeenni, ó kuitóha jína kixin kuitekáván tí janhan. Kjuaxróxin sátjia —ichro ch'án.

⁴⁹ Naxa tjejóto sín ntiha ntá ntá xrinahya ikui ijnko nkexro kjuixín ntóe tí ch'in t'etóan kuènte njnko, a ntá chénka ch'án tí ch'in t'etóan kixin:

—Xjaan na mé ó kjuixin k'uén. Áxri í chjeéhya xra tí maestro —ichro ch'án.

⁵⁰ A ntá tió kuínhin ch'in Jesús la kjuátéhe ch'án ntáχρο ch'án kixin:

—Chrakonhya. Títekáván tí janhan la tsitóhe xjaan jína —ichro ch'án. A ntá sákjuí sín.

⁵¹ A ntá tí kjuíjixenhen sín nchia ntá kuitóehya ch'in Jesús kixin ókjé nkexro chrók'uixenko ch'án nchia. Jehó ch'in Pedro la ko ch'in Jacobo la ko ch'in Juan la ko tí it'é la ko tí iné tí xjachjín chrók'uixenhen sín tí tjan tí xjan a. ⁵² Kaín tí sín tjejó ntaha tsjánkamá sín tí xjan a. Kjánchó jehe ch'án ntáχρο ch'án kixin:

—Tsjanakahyará. Tí xjan la tsík'enhya la tjejua xjan —ichro ch'án.

⁵³ Ntá tjanoá sín ch'án kixin jehe sín la ó nohe sín kixin tsík'en xjan. ⁵⁴ A ntá jehe ch'án itsé ch'án tja xjan ntá itsen k'uiyéhe ch'án tí xjan ntáχρο ch'án kixin:

—Tjarisoá, t'áya —ichro ch'án.

⁵⁵ Ntá kjan asén tjan ntá tuéxín k'uínkatjen tjan. Ntá k'uetóan ch'in Jesús kixin tsjanjon sín nkehe sine tjan. ⁵⁶ Ntá it'é la ko iné xjan la chrakon sín. A ntá ch'in Jesús k'uetuénhen ch'án sín kixin ninkexró chróchenkahya sín kixin xíkaha kónhen.

9

Ch'in Jesús ichr'án ch'án tí teyó sín

(Mt. 10.5-15; Mr. 6.7-13)

¹ Ntá ch'in Jesús k'uetóan kixin tsóchjina tí teyó sín k'uájiko ch'án. Ntá chjehe ch'án sín kjuachaxin tsakitsje sín kaín tí nchakuen tí jínahya chóna chojni la ko sinchekitóhe sín chojni jína. ² Ntá k'uetóan ch'án kixin sátsjikjako sín nkexrí tí kjuachaxin t'etóan Dios la ko sinchekitóhe sín chojni jína. ³ La ko k'uetóan ch'án kixin:

—Ninkehó nkehe sátsjikohyará ntja sátsjirá, ni tí nta tjíxinrá la náhi, ni bolsa la náhi, ni niotja, ni chichaon, la ko tsjikoará jehó tí ka tjejóyará ó. ⁴ A ntá tí tsjasánra ijnko nchia tsjanjon sín kjuachaxin la ntáho tsjitóhará la tsjixixín tí xra ntá sátsjixínra ntiha. ⁵ A ntá tí tsjasánra ijnko chjasin la ntá tsjanjonhya sín kjuachaxin tsjakorá ntá t'axrxjínra tí chjasén sín ntiha tsotsénkará tí nche chóna totárá tsjákoxinrá xíkaha kixin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsínsi sákjuíchronka sín tí tan jína tsaáxin chojni la ko kjuínchekitóhe sín chojni jína kaín chjasin.

Ik'uén ch'in Juan Bautista

(Mt. 14.1-12; Mr. 6.14-29)

⁷ A ntá tí ch'in Herodes t'etóan kuínhin ch'án kaín tí xra tjech'e ch'in Jesús la tóxakonhen ch'án kixin iso sín ntáχρο sín kixin ch'in Juan Bautista la ó tsixechón ch'án, ichro sín. ⁸ A ntá iso sín ntáχρο sín kixin ch'in Elías tsixechón ch'án mé tí nkexro k'uechronka itén Dios ósé. A ntá í so sín la ntáχρο sín kixin jnkojín tí sín k'uechronka itén Dios ósé la mé ó tsixechón, ichro sín. ⁹ Kjánchó ntáχρο ch'in Herodes kixin:

—Janhan mé kuétoan kóchrínjin sín kja ch'in Juan. ¿Á chrókóchaxín jehe ch'án kixin nchónhya kjuaxron kuínhan tí tjech'e ch'án? —ichro ch'án. A ntá kjaxin jehe ch'án tóxakonhen ch'án sáchrókjuitsjehe ch'án tí ch'in Jesús.

Ch'in Jesús kjuanjon nkehe kjóne in'ó mil chojni

(Mt. 14.13-21; Mr. 6.30-44; Jn. 6.1-14)

¹⁰ A ntá tió kjan tí sín k'uájiko ch'in Jesús ntá chénka sín tí jehe ch'án kaín tí xra kjuíche sín. Ntá k'uaxrjentako sín ch'án tí kohya ninkexró chjinaxón chjasin Betsaida. ¹¹ Ntá tió k'uixikónohe chojni kixin ntaha tjan ch'in Jesús ntá sákjuíchréhe sín ch'án. A ntá kjuanjon

ch'an kjuachaxin ts'ejó sín. Ntá kjuankíxin chrónka ch'an nkexrí tjen tí kjuachaxin t'etqan Dios la ko kjuínchekei tohe ch'an chojni jina.

¹² A ntá ó ntá kóntó ntá tí teyó sín k'uájiko ch'in Jesús kóchjinehe sín ch'an ntáchro sín kixin: —Nixjehé tí chojni kixin sátsji sín tí chjasin ntsi la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'in Jesús ntáche ch'an sín kixin: —Chjehérá sín nkehe sine sín —ichro ch'an.

Ntá kjuátehe sín ntáchro sín kixin:

—Chóntahyani itsje nkehe; jehó in'ó niqtja la ko yaá koche chóntani. ¿Á tjinkávan sátsjik'enani nkehe sine káin tí chojni siín? —ichro sín.

¹⁴ Kixin siín chjina in'ó mil chojni ntoa. A ntá ch'in Jesús ntáche ch'an tí sín xriko ch'an kixin:

—Ntácherá sín tsojnkoié sín ts'ixitjaxin sín jnkoičko cincuenta sín —ichro ch'an.

¹⁵ A ntá xikaha kjuich'e sín k'uetqan sín, a ntá k'uixitjaxin sín káin sín. ¹⁶ A ntá ch'in Jesús kuákja ch'an tí n'ó niqtja la ko tí yaá koche. Ntá konta ch'an nkajni kjuanchehe ch'an kjuasáyé Dios kixin kjuanjon tí nkehe sine sín. Ntá kóchrít'q ch'an tí niqtja la ko tí koche la chjéhe ch'an tí sín xriko ch'an. A ntá jehe sín k'óxikayéhe sín chjéhe sín káin tí chojni siín. ¹⁷ A ntá káin sín kjóne sín la kóqjehe sín. A ntá chr'éxin kjuenájín sín káin tí nkehe sixehé mé teyó ntaxra kjuínchekaón sín.

*Ch'in Pedro mé chrónka kixin ch'in Jesús mé tí Cristo
(Mt. 16.13-19; Mr. 8.27-29)*

¹⁸ Ntá ijnko yaon ch'in Jesús k'uaxrjenta ch'an tjenixjehé ch'an Dios. Ntá tjejóko ch'an tí sín xriko ch'an ntá kjuanchankíhi ch'an tí jehe sín kixin:

—¿Nkehe ichro tí chojni kixin nkexro tí janhan? —ichro ch'an.

¹⁹ A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'in Elías. A ntá í so sín ntáchro sín kixin jaha ijnko nkexro k'uéchrónka itén Dios ósé mé ó tsíxechón —ichro sín.

²⁰ A ntá kjuanchankíhi ch'in Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'an.

Ntá ntáchro ch'in Pedro kixin:

—Jaha tí Cristo ichr'an Dios —ichro ch'an.

*Ch'in Jesús chrónka kixin its'en ch'an
(Mt. 16.20-28; Mr. 8.30—9.1)*

²¹ Ntá ch'in Jesús k'uetuenhen ch'an sín kixin ninkexró tsochenkahya sín kixin nkexro tí jehe ch'an. ²² Ntá chénka ch'an sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsonhen la ko tsitekakuenhya tí sín t'etqan kuente njnko la ko tí sín t'etqan kuente tí sín nchat'á la ko tí sín maestro tjako tí ley. Ts'óyán sín tí jehe ch'an, kjánchó tí níxin yaon na ó tsoxechón ch'an inaá —ichro ch'an.

²³ Ntá chr'éxin chénka ch'an káin sín kixin:

—Tí chaxin tsochréhérá tí janhan na t'ichjánxin tsjtohérá káin tí nkehe tjaké asánrá, ntá tsamará tí ntacruz kuéntará jnkoičko yaon, a ntá tsochréhérá tí janhan. ²⁴ Tí nkexro tjinkaon jehó sincheaka asén mé ts'itjayan. A ntá tí nkexro sincheke'itjayanxín asén kixin tinkáchónki tí janhan la tsaá. ²⁵ ¿A ntá nkehe tsonhen tí chrókjuacha ijnko chojni chróhónta káin nkehe siín chjasintajni a ntá kjuachón chrókjuincheke'itjayan ch'an? ²⁶ A ntá jnkoičin chojni chrókósuéhé kixin tinkáchónki tí janhan la ko tí nkehe tjákua, a ntá kjaxin tí Xjeen Dios K'óna Chojni mé tsoqsuéhé chróntáchro ch'an kixin chóxin ch'an tí jehe sín tíó tsi ch'an éxi ijnko rey tsíkao ch'an tí kjuachaxin kuente It'é ch'an la ko tí sín ángel jina. ²⁷ Tíhi mé ntoá xrjanika kixin iso chojni tjejó nihi tjejótinhin sín naxá ts'enhya sín ts'ienha sín kixin Dios ts'etqan tí kjuachaxin kuente ch'an.

*K'uixitóxin nkexrí tsjehe ch'in Jesús
(Mt. 17.1-8; Mr. 9.2-8)*

²⁸ A ntá k'uátsínka ijni yaon tí tsichronka ch'an tíhi ntá sákjuiko ch'an ch'in Pedro la ko ch'in Juan la ko ch'in Jacobo la chrín sín ijnko kixin tsonixjehé ch'an Dios. ²⁹ Ntá ch'in Jesús tjenixjehé ch'an Dios ntá k'uixitóxin nkexrí tsjehe ch'an la ko tí iké ch'an la tjóá la ko tjákiní tsjehe. ³⁰ Ntá xrínghya k'uikon sín yaá chojni tjejóto sín tí jehe ch'an na mé jehe sín la tí ch'in Moisés la ko tí ch'in Elías. ³¹ Imá t'inkáséyan jnkontatjen tí tjejó sín tjejóto sín tí ch'in Jesús kixin nkexrí its'en ch'an la ko nkexrí tsjasótexín ch'an tí chjasin Jerusalén. ³² A ntá ch'in

Pedro la ko tí sín tjejóko ch'án la imá kuihi sín kotáchrin; kjónté la k'u'éjótseje sín k'uikon sín tí kjuachaxin kuènte ch'in Jesús la ko k'uikon sín tí yóí chojni ntoa tjejóko sín ch'án. ³³ A ntá tió sátsji tí yóí sín tjejóko ch'in Jesús ntá ch'in Pedro ntáche ch'án tí ch'in Jesús kixin:

—Maestro, jina kixin tjejóni ntihi. Chrókuich'énani iní nchia la mé ijnko kuèntá la ijnko kuènte ch'in Moisés la ko ijnko kuènte ch'in Elías —ichro ch'án.

Kjánchó ch'in Pedro í noehya ch'án nkehe chróntácho ch'án kixin chrakon ch'án. ³⁴ A ntá naxa tjenixja ch'án ikui ijnko tjuí kjuák'etja tí jnā tjejó sín. Ntá chrakon sín tjejó sín chrínki tí tjuí. ³⁵ Ntá xrināhya kuínhin sín chríkjan tí tjuí itén nkexro ntácho kixin:

—Tíhi mé Xjanna, imá tjuāhā ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ A ntá tió kjuixin kuínhin sín tí tan nixja ntá k'uikon sín kixin jehó ch'in Jesús tjen. A ntá tí jehé sín la táni sín kixin xikaha k'uikon sín tí yaon a la ninkexró chenkahya sín tí nkehe k'uikon sín.

Ch'in Jesús kjuínchekitohe jina ijnko chánjan chóna nchakuen tí jínahya

(Mt. 17.14-21; Mr. 9.14-29)

³⁷ A ntá tí yaon chr'éxin k'uínkajinxin sín jnā la ntá nchónhya chojni sákjuixinhin sín ntia ch'in Jesús. ³⁸ A ntá ijnko chojni tjenkákjan ch'án tí chojni kjuíji ntá itsen nixja ch'án ntácho ch'án kixin:

—Maestro, chronóahani kixin chrótsjehé tí xjeenni kixin jnkoqoaxón ó chóntani a ntá níhi xjan. ³⁹ Chóna xjan nchakuen tí jínahya la ntá nchek'iyato xjan la ko nchek'aniáte xjan nchexránka xjan kixin tjetéhe xjan la ko ntáloxrjo síjixin ir'va xjan la ko ncheníhi xjan, na mé chroyha tsjiinhin xjan. ⁴⁰ A ntá chronóeheni tí sín xrikoa chrókuakitsje sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátéhe ch'in Jesús ntácho ch'án kixin:

—Jahará chaxínhya chojni tinkáchónki tí janhan. Jehya jina tjenkayáxinrá. ¿Xá hasta nkesá tjinkáonrá ts'ejóni tsjáohará kixin nunca t'itjáhyará? Xrákoa tí xjan ntihi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánchó ch'in Jesús jiehe k'uētuenhen tí nchakuen tí jínahya kixin ts'axrxjén xjan. Ntá k'uaxrje tí nchakuen tí jínahya ntá kuítóhe xjan jina. A ntá ch'in Jesús kjuínchek'áyéhe tí it'é xjan. ⁴³ A ntá kain sín chrakon sín kixin k'uikon sín tí kjuachaxin jie kuènte Dios.

Ch'in Jesús chrónka ch'án inaá kixin its'en ch'án

(Mt. 17.22-23; Mr. 9.30-32)

Naxa chrakon sín kain sín kixin tí kjuaxroan kjuích'e ch'in Jesús la ntá ntáche ch'án tí sín xriko ch'án kixin:

⁴⁴ —Tinhínrá jina tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etoan —ichro ch'án.

⁴⁵ Kjánchó jehé sín kienxínhya sín tí nkehe ntácho ch'án kixin naxa kjuanjonhya Dios kjuachaxin kixin chrókuixín sín, ntá chrakon sín na kjuanchankéhye sín ch'án kixin nkexrí t'axrxjén tí nkehe ntácho ch'án.

Nkexro tí imá tjeoan ts'etoan

(Mt. 18.1-5; Mr. 9.33-37)

⁴⁶ A ntá tí sín k'uájiko ch'in Jesús kjuankixin sín itjo sín kichó sín kixin nkexro tí jehé sín antsí má tjeoan ts'etoan. ⁴⁷ Kjánchó ch'in Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án ⁴⁸ ntá ntáche ch'án sín kixin:

—Tí jnkojín nkexro chrók'uáyéhe tí xjan i kixin tinkáchónki sín tí janhan mé xikaha chrók'uáyéhe sín tí janhan. A ntá jnkojín nkexro chrók'uáyéhe tí janhan mé xikaha chrók'uáyéhe tí nkexro chr'ánna k'uinka. A ntá tí jnkojín nkexro antsí chrókjuinchehnkehya la mé antsí chrók'uáyéhe kjuachaxin chrók'uetoan.

Tí nkexro nínkakuenhya tí jeheni la mé tóxrjínhin ch'án tí xra ch'eni

(Mr. 9.38-40)

⁴⁹ Ntá ntácho ch'in Juan kixin:

—Maestro, k'uikonni ijnko nkexro kjuachaxin ihnjá kuakitsjexín ch'án nchakuen tí jínahya chóna chojni. A ntá chénkani ch'án kixin xikahya chrókuich'e ch'án kixin xrikohyani ch'án.

⁵⁰ Kjánchó ch'in Jesús ntácho ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhin tí xra ch'eni —ichro ch'án.

Ch'in Jesús kjuentuéhe ch'án tí ch'in Jacobo la ko tí ch'in Juan

⁵¹ A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén. ⁵² Ich'r'án ch'án chojni kuitónxin ntja a ntá jehe sín sákjuí sín ijnko chjasin ntsí estado Samaria sákjuikjeyá sín nchia ts'ok'èxin sín. ⁵³ Kjánchó tí sín samaritano kjuanjonhya sín kjuachaxin chrók'uejó sín kixin k'u'ikon sín kixin ó xra ó sátsji ch'án chjasin Jerusalén. ⁵⁴ A ntá tió k'u'ikon tí sín k'u'ájiko ch'án la mé ch'ín Jacobo la ko ch'ín Juan la ntáchro sín kixin:

— Ìnchéni, zá tjinkávan kixin chrókjuanchiani xrohi chrók'uinkajjnxin nkaya nkajní chrókjuinçek'itjáyán tí jehe sín éxi kjuanchia tí ch'ín Elías?* —ichro sín.

⁵⁵ Ntá ch'ín Jesús kuinkátjía ch'án komá ch'án tí jehe sín ntá kjuentuéhe ch'án sín ntáchro ch'án kixin:

— Jahará la kjá noahyará nkexro nchakuen chontará. ⁵⁶ Kixin tí Xjeen Dios K'óna Chojni kuihya ch'án kixin chrókjuinçek'itjáyán ch'án chojni. Náhi. Xra ó ikui ch'án sinchekaá ch'án chojni —ichro ch'án.

Ntá sákjuí sín í jnko chjasin ntsí.

Tí sín tjinkaon chróchréhe sín tí ch'ín Jesús

(Mt. 8.19-22)

⁵⁷ A ntá jehe sín sákjuí sín ntja inaá. Ntá xeta sín ijnko nkexro ntáche ch'án tí ch'ín Jesús kixin:

— Ìnchéni, tjinkaonni chróchréhe ní tí jaha nketí tjinkávan sátsjia —ichro ch'án.

⁵⁸ Ntá ch'ín Jesús kjuátehe ch'án ntáchro ch'án kixin:

— Tí koxróntá chóna va itjué va la ko tí koxroxé chóna va káké va. A ntá tí Xjeen Dios K'óna Chojni chónahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

— Chréhé tí janhan —ichro ch'án.

Kjánchó kjuátehe ch'án kixin:

— Ìnchéni, tjtóhéni senó sátsjikjaváni it'éni —ichro ch'án.

⁶⁰ Ntá kjuátehe ch'ín Jesús ntáchro ch'án kixin:

— Tjtóhé kixin tí chojni tsík'en la jnkokón sín tsík'en tsjavá kichó sín. A ntá jaha la sátsjikjækua nkexrí tjen tí kjuachaxin t'etqan Dios —ichro ch'án.

⁶¹ Ntá ntáchro í jnko nkexro kixin:

— Ìnchéni, tjinkaonni tsochréhe ní tí jaha. Jehí tjtóhé tsjinixjeheni tí sín siin ntqeni —ichro ch'án.

⁶² Kjánchó ntáchro ch'ín Jesús kixin:

— Tí nkexro kjuankixin tsotsé ch'án arado ntá chrókjan chrókotónhen nóton mé xikaha xitjahya sich'ehe ch'án Dios xra.

10

Ch'ín Jesús k'uetuenhen setenta chojni sátsjikjako sín

¹ Ntá chr'èxin Ìnchéni kjuéyá ch'án í jnko setenta chojni ntá k'uetuenhen ch'án sín sátsji sín yóyó sín sátsji sín tsitónxin sín ntja tí kain chjasin na ko nkúixin tjinkaon ch'án sáchrókjuí ch'án. ² Ntá ntáchro ch'án kixin:

— Chaxín ntáxrjan kixin imá tsik'óna, a ntá tí chojni ch'e xra mé tsjehya. Chrókjuancheherá tí Ìnché nonte kixin chróchr'án ch'án itsjé chojni chrókjuich'e xra. ³ Sátjirá jahará. Xráxinkáonrá kixin tétuanhanrá sátsjirá éxi kolélo ts'ejóyákanrá chríkjan tí kolobo. ⁴ Tsjikoahyará kabólsa la ko tjoa t'inka chichaon la ko tokate tjikoahyará la ko tí nixjehérá chojni tí ntja tjtóéhyará kixin chrókjuintaxrjanhanrá sín. ⁵ A ntá tió ts'ixenhenrá jnkojín nchia la senó nixjehérá sín ntáchrórá kixin ts'áyéhe sín kjuaxróxin, tsixrorá. ⁶ A ntá tí tjejó sín kjuaxróxin ntíha la nixjehérá sín la ts'áyéhe sín kjuaxróxin. A ntá tí la náhi, a ntá tí kjuaxróxin chrók'uáyéhe sín na sátsjikoará inaá. ⁷ A ntá tí nchia ntíha chrókjuanjon sín kjuachaxin chrókuithará, ntaha mé tsjanjon sín nkehe chóna sín sinterá la ko its'irá, kixin tí nkexro ch'e xra la siín kjuachaxin tsoxenkehe. Tsjijhyá í jnko nchia la ko í jnko nchia. ⁸ A ntá tsjasánrá ijnko chjasin tsjanjon sín kjuachaxin ts'ejorá ntíha ntá interá tí nkehe tsjanjon sín. ⁹ Nchekitohérá chojni níhi jína. Ntá chenkará sín kixin tí kjuachaxin t'etqan Dios la kjínhya tjen tí tjejó sín, ichrorá. ¹⁰ A ntá tió tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntqé sín sátsjirá tí ntja chjasin ntíha ntá ntáchrórá kixin ¹¹ kjónté tí nche tsík'ixitja totará tsotsénkará kixin tsjákoxinrá kixin tí kjuaxróxinhya ts'áyéhe sín chr'èxin. Kjánchó chrókónohe sín kixin tí kjuachaxin t'etqan Dios la kjínhya tjen tí tjejó sín, ichrorá. ¹² Ntáxrjan

* 9:54 1 Reyes 18.30-40

kixin tí yaon tsjexjén chjasintajni la kjuaxróxinhya ts'atsínka tí chjasin a. Antsí náxrxjónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó —ichro ch'án.

Iso chjasin titekakonhya

(Mt. 11.20-24)

¹³ Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uifkonrá jahará, ntá chrók'ójehe sín la tjoka chrók'juítóxinhin ntje sín, tjoka chrók'uinkáya sín ka tié la ko chrók'juikjanjin sín ikja sín nteso, kixin chrók'juakoxín sín kixin t'ává sín. ¹⁴ A ntá tí yaon tsitoexín ijje chojni a ntá jahará antsí tsjasótiará, a ntá tí sín kuènte chjasin Tiro la ko chjasin Sidón la kénhyó tsjasóte sín. ¹⁵ A ntá jahará chjasin Capernaum, tjenkayáxinrá kixin imá nohará a ntá sátsjirá nkaya nkajní, ichrorá. Chaxínhya. Jahará la tsjasinkajinrá sátsjirá tí tsjasótexín tí sín tsík'en.

¹⁶ Tí nkexro tinhin tí nkehe ntáchrórá la mé xikaha tinhin tí nkehe ntáxrjan la ko tí sín titekakonhya sín tí jahará na mé xikaha titekakonnhya sín tí janhan. A ntá tí nkexro titekakonnhya sín tí janhan xikaha titekakonhya sín tí nkexro chr'ánna k'uinka.

Ó kjan tí sín setenta sátsíkji

¹⁷ A ntá ó kjan tí sín setenta sátsíkji la imá chéhe sín ntáchró sín kixin:

—Ínchéni, kjónté tí nchakuen tí jínahya titekakonhenni tió t'ákjenxinni ihnjá —ichro sín.

¹⁸ Ntá ntáchró ch'in Jesús kixin:

—Kja chaxín k'uikuán kixin ch'in Tsochren k'uánótjenxin nkajní éxi ijnko kjónkixin xikaha kónhen.† ¹⁹ Ó tjahará kjuachaxin kixin kjónté konche la ko konchjā tsinkátjará la ko tsjachahya ninkehó tí kjuachaxin kuènte tí ch'in Tsochren kixin ninkehó tsoanhyará. ²⁰ Kjánchó jehya tíha chrókóchàxinrá kixin tí nchakuen tí jínahya kuitekannonhrá. Náhí. Chrókóchàxinrá kixin ihnjárá ó ts'ínixín nkaya nkajní —ichro ch'án.

Tí Xjeen Dios nixjehe It'é ch'án

(Mt. 11.25-27; 13.16-17)

²¹ A ntá tuénxín tí Nchakuen Dios kjuínchechéhe tí ch'in Jesús ntá ntáchró ch'án kixin:

—Tjáncháha kjuasáya It'éni Ínché nkaya nkajní la ko chjasintajni kixin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kixin ts'itja tí sín noehya. Mé xikaha It'éni, jaha kóxrjínhan kixin xikaha tsohnen.

²² T'aná mé chjina káin xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjejá ch'án kixin tjinkaon ch'án tsohohe sín nkexro It'é ch'án —ichro ch'án.

²³ Ntá komá ch'án tí sín k'uájiko ch'án ntá ntáche ch'án tí jehó sín kixin:

—Chéhe tí sín k'uikoxín kon sín éxi k'uifkonrá. ²⁴ Ntáxrjan kixin nchónhya tí sín k'uéchronka itén Dios ósé la ko nchónhya tí sín rey k'uétjinkaon sín chrók'uikon sín éxi t'ikonrá, kjánchó k'uikohya sín, la ko k'uétjinkaon sín chrókuinhin sín tí nkehe tjetotinhinrá jie, kjánchó í kienhya sín —ichro ch'án.

Ch'in Jesús kjuíncheyóexín éxi ijnko samaritano jina

²⁵ Ntá ijnko maestro tjako tí ley k'uínkatjen ch'án nixjehe ch'án tí ch'in Jesús tjinkaon ch'án tsohoexín ch'án á chaxín nohe ch'án tsjatehe ch'án ntá kjuanchanki ch'án kixin:

—Maestro, ¿nkexrí chrók'juich'ení chrók'uitjani tí kjuachón jnkochríxín? —ichro ch'án.

²⁶ Ntá kjuátéhe ch'in Jesús ntáchró ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

²⁷ A ntá tí maestro tjako tí ley mé kjuátéhe ch'án ntáchró ch'án kixin:

—Chrótjuèhni Ínchéni Dios káin asénni la ko káin fuerza chónani la ko káin kjuaxrexinkaon kuènténi la ko chrótjuèhni kichó ni éxi tjuèxinni asénni‡ —ichro ch'án.

²⁸ Ntá ntáchró ch'in Jesús kixin:

—Jina kjuátéhe. A ntá tí jaha xikaha s'ich'e la tsochonta kjuachón —ichro ch'án.

²⁹ Ntá tí maestro tjako tí ley mé tjinkaon chrók'juachaxín ch'án tí ch'in Jesús ntá kjuanchanki ch'án inaá kixin:

—¿Xá nkexro tí kichó ni chrótjuèhni, ichrua? —ichro ch'án.

³⁰ Ntá ch'in Jesús kjuátéhe ch'án ntáchró ch'án kixin:

—Íjnko chojni k'uinkajinxín nó ntja kjuixín chjasin Jerusalén sátsji ch'án chjasin Jericó, ntá kuátóhe ntja iso síchee kueéhe sín ch'án káin nkehe sáchrókjuiko ch'án, la ko iké ch'án tsíkakitsjehe sín ch'án, la tsíkate sín ch'án, la ntá sátsíkji sín tsíkitohe sín ch'án la ó mero tjet'en ch'án. ³¹ Ntá xrinahya k'uátsínka ijnko nchat'á tí ntja tíha ntá k'uikon ch'án xikaha

* 10:12 Génesis 19.24–28 † 10:18 Isaías 14.12 ‡ 10:27 Deuteronomio 6.5; Levítico 19.18

ntá ántosén ch'án k'uátsínké ch'án. ³² A ntá kjaxin ijnko ch'in levita k'uátsínka chjinoxón ntiha. Ntá k'uikón ch'án xikaha ntá ántosén ch'án k'uátsínké ch'án kjaxin. ³³ A ntá ijnko ch'in kjuixin estado Samaria k'uátsínka tí ntja ntiha ntá k'uikón ch'án xikaha tjetsínka tí nkexro ntá kuikónóhe ch'án. ³⁴ Ntá kóchjinehe ch'án tí nkexro tsikónihi ntá kjuich'ehe ch'án xroqan tí síchrit'og chjéhe ch'án aceite la ko vino la ko kjuínchetetoxín ch'án ka. Ntá kjuixin ntá kjuínchekiták'a ch'án tí kolóchge ch'án. Ntá sákjuiko ch'án ijnko nchia t'ok'exín chojni ntiha la k'uáyakonhen ch'án. ³⁵ Ntá tí kóyagon ntá sátsji tí ch'in samaritano kuakitsje ch'án iyó tí chichaon la chjéhe ch'án tí inché tí nchia ntáchro ch'án kixin: "T'ayakonhén tí nkexro i, a ntá ántsi má ts'ichjánxinhin ch'án la tió tsokjan ntá tsjénkaha ts'ókjanhan kaín tíha," ichro ch'án. ³⁶ A ntá tí ini nkexro k'uátsínka ntja la, ¿nkexro tjuéhe tí nkexro kjuínchenihi tí síchee? —mé kjuanchankí ch'in Jesús.

³⁷ A ntá kjuátehe tí maestro tjako tí ley kixin:

—Tí nkexro kuikónóhe tí jehe ch'án —ichro ch'án.

Ntá ntáchro ch'in Jesús kixin:

—Sátjia jaha la xikaha chrókuich'e —ichro ch'án.

Ch'in Jesús sákjuí ch'án ntqe tjan Marta la ko tjan María

³⁸ Naxá tjetji ch'in Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjón tjan kjuachaxin kuítqhe ch'án ntqe tjan ntiha. ³⁹ A ntá tjan Marta chóna tjan ijnko kichó tjan it'in María. A ntá jehe tjan kjuák'etjaxin tjan chrínkí toté tí ch'in Jesús tjetinhin tjan nkehe tí tjechro ch'án. ⁴⁰ A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'in Jesús ntáchro tjan kixin:

—Inchéni, ¿á tóxakuanhya kixin tí tjan kichó ni kuítqheni tjan, a ntá jehóni tjech'eni kaín xra? Ntáche tjan kixin tsjinkítsani tjan —ichro tjan.

⁴¹ Kjánchó ch'in Jesús kjuátehe ch'án ntáchro ch'án kixin:

—Marta, Marta, jaha ima tóxakonhan kixin t'inkákonhen nchónhya xra chonta. ⁴² Kjánchó jnkokoá nkehe t'ichjánxin. A ntá tjan María kjueyá tjan tí nkehe ántsi jina la ko ninkexró tsakitsjehya tjan tíha —ichro ch'án.

11

Ch'in Jesús tjako ch'án nkexrí tsonixjeheni Dios

(Mt. 6.9-15; 7.7-11)

¹ A ntá jnkonaá ch'in Jesús tjenixjehé ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Inchéni, tjácohéni nkexrí tsonixjeheni Dios kixin xikaha ch'in Juan kjuakqhe ch'án tí sín k'uájiko ch'án.

² Ntá ch'in Jesús ntáchro ch'án kixin:

—Tió nixjehérá Dios ntáchorá kixin:

It'éni tjen nkaya nkajní, jaha ima tjóá.

Chrókui tí kjuachaxin kuéntá.

Chrókuich'e tí nkehe tóxrjínhan jaha ntihi chjasintajni éxi tjech'e nkaya nkajní.

³ Ijie tsjánjuan tí niotja t'ichjánxinhinni jnkoinko yaon.

⁴ T'óxika tí nkehe jínahya kjuich'eni kixin kjaxin jeheni ts'itjayenhenni tí nkehe kjuich'ehe ni chojni.

Tjtoéhyani jeheni xrahya chrókuasinni jie. Nchekaáni kaín tí nkehe jínahya chrókhonhenni

—mé xikaha ichro ch'in Jesús.

⁵ Kjaxin ntáchro ch'án kixin:

—A ntá jnkójnra chróchontará ijnko chojni choxian, a ntá sáchrókjuia ntqe ch'án k'áxrótjen chróntáche ch'án kixin: "Amigo, nchejenni iy'á niotja ⁶ kixin nantá ó kui ijnko chojni chóxinni kuixin ch'án kjin kjuíji ch'án ntqeni ntá chónahyani ninkehó tsochjéhe ni ch'án."

⁷ A ntá tí chrókuátehe tí nkexro choxian tjen nkaxenhen chróntáchro kixin: "Chjeéhyani xra. Tí ntója ntqeni méhe t'ikjéhe. A ntá xjeenni tjejót'ok'ékoni xjan. Ntá xitjahya ts'ayani tsótjáhani nkehe", ichro ch'án. ⁸ Ntáxrjan kixin kjónté chrók'uáyahya ch'án chrótjáhya ch'án nkehe kjónté chóxian ch'án, kjá ts'áya ch'án tsótjáha ch'án kaín nkehe t'ichjánxinhan kixin tjinkakonhya ch'án kixin naxá chrókjuak'é chrók'uèya jaha. ⁹ Mé xikaha ntáxrjan kixin: Tjanchará nkehe la Dios tsótjáhará; tjeýará nkehe la ts'itjará; t'inkará puerta la tsóxitjehe.

¹⁰ A ntá tí nkexro tjanchia nkehe la ts'áyéhe tí nkehe; la ko tí nkexro tjeýá nkehe la ts'itja; la ko tí nkexro t'inka puerta la tsóxitjehe.

¹¹ ¿Xá jnkójnra chontará xjaanrá chrókuanchahará xjan niotja la ¿á chrókuánjonrá ijnko xro? O chrókuanchahará xjan koche la ¿á chróchjehérá ijnko konche? ¹² O chrókuanchahará xjan koja la ¿á chrókuánjonrá ijnko konchija? ¹³ A ntá jahará kjónté jínahyará la ó nohará

nkehe jina tsochjehérá xjaanrá, la mé antsí chrókónohará kixin It'eni tjen nkaya nkajní tsojtáhará Nchakuen ch'án tí jnkójínrá chrókjuanchehérá ch'án —ichro ch'ín Jesús.

Tjanchia sín jie kixin ch'ín Jesús ch'óna kjuachaxin tí Jínahya
(Mt. 12.22-30; Mr. 3.19-27)

¹⁴ Ntá ch'ín Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsík'axrje tí nchakuen tí jínahya a ntá tí ch'ín xitjahya nixja la jina nixja ch'án. Ntá kaín chojni chrakon sín kixin xikaha tsík'ich'e ch'án. ¹⁵ A ntá jnkójín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin ch'óna ch'án kjuachaxiéntí ch'ín Beelzebú mé tí ch'ín Tsochren, na mé jehe ch'án mé t'etueñhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxín sín tí ch'ín Jesús ntá kjuanchehe sín ch'án ijnko kjuaxroan náxrjón kuénte nkaya nkajní. ¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkójín gobierno jnkókónhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etóanxin sín, la ko tí sín jnkokóá nchia jnkókónhya tjenkayáxin sín xitjahya ts'ejóko kichó sín jnkokóá. ¹⁸ A ntá kjaxin tí ch'ín Tsochren chrókjuánjonko kichó ch'án, ¿la nkexrí chrókóna ch'án kjuachaxin náxa chrók'uetóan ch'án tí chrók'uaxrje tí jínahya? A ntá jahará ntáchrorá kixin janhan takítsje nchakuen tí jínahya kixin tí kjuachaxiéntí ch'ín Tsochren chonta janhan, ichrorá. ¹⁹ A ntá tí xikaha la, ¿ntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxin sín kixin jahará ntoáhya tjenkayáxinrá. ²⁰ A ntá tí kjuachaxiéntí Dios mé takítsjéxian tí nchakuen tí jínahya na mé chrókónoaxinrá kixin tí kjuachaxiéntí Dios t'etóan ch'án mé ó kui tí tjejorá.

²¹ A ntá ijnko chojni jiehe yamá chica t'ayakonhen ch'án ntóe ch'án kixin tí nkehe ch'óna ch'án ts'itjáyannya. ²² A ntá itsi ijnko nkexro antsí má tsehe, a ntá tsjanjonko ch'án tí inché nchia, a ntá tsjacha tsakitsjehe tí inché nchia kaín tí chica yamá ch'án kixin imá jieéxín ch'án. A ntá tí ch'ín antsí tsehe mé tsakja ch'án kaín nkehe sín ntiha. ²³ Tí nkexro titekakónhya tí janhan mé nínkakonna ch'án. A ntá tí nkexro tjinkítsahya tí janhan mé t'inkákonhen tí xra t'a —ichro ch'án.

Jnko tí nchakuen tí jínahya mé tsokjan inaá
(Mt. 12.43-45)

²⁴ A ntá ijnko nchakuen tí jínahya tsík'axrjéxín ijnko chojni na mé ixri tí nonte xámá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kixin: “Áxri tsokjan ntóna k'uaxrjéxian.” ²⁵ A ntá tió kjan la éxi ijnko chojni tsík'ánjón ntóe la náxrjón tsjehe tí nkaxenhen nchia. A ntá k'uikon tí jínahya xikaha tjen nchia ²⁶ a ntá sákujuakajín yato nchakuen tí jínahya antsí má jínahya. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen ijnko chojni kénhya asén tinkáchónki Dios —ichro ch'án.

Tí kjuachéhe chaxín

²⁷ Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjenixín tí jaha kjuíntak'ánkiá —ichro tjan.

²⁸ Ntá jehe ch'án kjuátehe ch'án ntáchro ch'án kixin:

—Antsí chéhe tí nkexro tinhín tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrjón
(Mt. 12.38-42; Mr. 8.12)

²⁹ Ntá nchónhya chojni sitójnoktsé sín tí tjen ch'ín Jesús ntá jehe ch'án kjuankixin nixja ch'án ntáchro ch'án kixin:

—A ntá tí chojni sín jie la jínahya sín, a ntá tjanchia sín kixin chrókjuásian ijnko kjuaxroan náxrjón. Kjánchó tsjákoxinhya í jnko kjuaxroan la jehó tí nkehe tsíkónhen ch'ín Jonás. ³⁰ Ntá éxi yóhe kónhen ch'ín Jonás kónoexín tí sín chjasin Nínive mé xikaha tsonhen tí Xjeen Dios K'óna Chojni la ts'ikon tí chojni sín jie. ³¹ A ntá tí yaon titoexín ijie chojni tjejó jie la mé tí tjan reina k'uetóan kjuixín nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjin kjuixín tjan tsinhín tjan nkexrí imá k'ueñohe ch'ín Salomón. * A ntá jie itjén janhan antsí chonta kjuachaxin, a ntá ch'ín Salomón la kénhyó. ³² La ko tí sín chjasin Nínive kjaxin ts'inkatjen sín tió titoexín ijie chojni la tsjanchia sín jie kixin tí sín tjejó jie la ko tsootáchro sín kixin chrókjuasóte tí chojni tjejó jie kixin tío kuínhin tí sín Nínive chrónka ch'ín Jonás itén Dios la kjuítóxinhin sín ntje sín. A ntá jie itjén janhan antsí má chonta kjuachaxin, a ntá ch'ín Jonás la kénhyó.

* 11:31 1 Reyes 10.1-10

Xrohi t'inkaséyanxín cuerpo kuènte chojni
(Mt. 5.15; 6.22-23)

³³ 'Nijnko chojni chrokjuinçek'ákjen ijnko xrohi chrókjuak'ema ch'án la ko chrókjuak'ehya ch'án chrínki ijnko ntacajón. Náhí. Noi chrókjuak'e xrohi chrókjuak'enkáya candelero kixin ts'ikonxin chojni tí t'inkaséyan.[†] ³⁴ Ti ikonrá mé éxí yóhe ijnko xrohi t'inkaséyanxín tí cuerpo kuèntará. A ntá tí chontará ikonrá jína la ntá kuènté cuerpo kuèntará chóna xrohi. A ntá tí chontará ikonrá jínahya la ntá kuènté cuerpo kuèntará la sitié tjen. ³⁵ Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tjeorá. ³⁶ A ntá tí kuènté tí cuerpo kuèntará chróchóna xrohi la ko nit'ò chrók'uixitiéhya la ntá kuènté la chrók'uikonrá jína la éxí ijnko lámpara kuènté ch'e xrá jína.

Ch'in Jesús chrónka kixin ntoáhya tjako tí sín fariseo la ko tí sín tjako ley
(Mt. 23.1-36; Mr. 12.38-40; Lc. 20.45-47)

³⁷ A ntá tíó kjuixin nixja ch'in Jesús ntá ijnko ch'in fariseo chrónóhe ch'án tí ch'in Jesús kixin sátsjiko ch'án ntøe ch'án sineko ch'án. Ntá tíó kjuíji sín ntiha la k'uixenhen sín nchia ntá kjuák'etjaxín ch'in Jesús chjino tjen tí mesa a. ³⁸ A ntá tí ch'in fariseo chrakon ch'án k'uikon ch'án kixin ch'in Jesús k'óntihya ch'án tja ch'án senó tí sine ch'án éxí tinkáchónki tí jehe sín. ³⁹ Kjánchó Inchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachøe la ko kjuachjinoxínhin. ⁴⁰ Jahará lontírá. ¿A noahyará kixin tí nkexro kjuích'éna tí ntója la koi tí nkaxenhen kjuích'éna ch'án? ⁴¹ Tí chrókjuinçekjtonhénrá chojni nóa kain asánrá tí nkehe chontará la ntá chrókóxakuanhyará tí chrók'ónti chojni o náhi.

⁴² 'Nòará jahará fariseorá. Jahará chjehérá Dios ijnko ite parte kain kaxroan tsjiko tí nkehe sineni. A ntá tahyará kuèntá tí nkehe ntoá la ko nkexrí chrótjuèhérrá Dios la ko nkexrí chrótjuèhérrá kichuárá. Jína chróchjehérá Dios nkehe la ko chrók'uitjáyanyhará tí chrókjuínkjsará kichuárá.

⁴³ 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen njnko la ko tjinkáonrá kixin jnkojína tsonixjahará sín tíó tsoxétará sín ntasin.

⁴⁴ 'Nòará jahará maestro tjàkorá tí ley la ko jahará fariseorá. Ntoáhya tjenkáyaxinrá ch'iará. Jahará éxí yóhe tòye tsíxravá chojni tsik'en t'ikonhya chojni la t'atsínka sín nátaón la noehya sín kixin tsíxravá chojni ntiha.

⁴⁵ A ntá kjuátøhe ijnko tí maestro tjako tí ley ntáchro ch'án kixin:

—Maestro, xíkaha ntáchrua la, ¿á kjaxinhya jeheni kain ni t'ántaxinhinni ní? —ichro sín.

⁴⁶ A ntá ntáchro ch'in Jesús kixin:

—Kjixin nóará tí jahará tjàkorá tí ley. Tétuènhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará njnko dedo tjárá chrókjuínkjsará tí nkehe imá ye yamá sín.

⁴⁷ 'Nòará tí jahará. Ch'énará tjàt'øe tí sín k'uéchrónka itén Dios ósé tsik'óyán tí sín k'uaxrjenixinrá. ⁴⁸ Xíkaha jahará tjàkoxinrá kixin ó nchoxon tí nkehe kjuích'e tí sín k'uaxrjenixinrá ósé kixin jehe sín k'óyán sín tí nkexro k'uéchrónka itén Dios ósé. A ntá jahará ch'énará tjàt'øe tí tsíxravá sín.

⁴⁹ 'Mé xíkaha Dios chóna kjuaxrexinkaon imá jína ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkojín tí jehe sín la ko tsochónkíhi tí í so sín, ichro ch'án. ⁵⁰ A ntá Dios mé tsjanchia jie tí chojni siín jie kixin k'uitji ijníé kain tí sín k'uéchrónka itén ch'án ósé desde tí xrankixin k'óna chjasintajni ⁵¹ la mé xrankixin k'uitji ijníé ch'in Abel la mé kjuixixin k'óyán sín ch'in Zacarías k'óyánxin sín ch'án jnkosiné tí tjen tí altar la ko tí njnko. Ntá Dios sinchekjasóte ch'án tí sín siín jie kixin xíkaha ik'uén kain tí sín a.

⁵² 'Nòará jahará maestro tjàkorá tí ley. Jahará tjinkáonhyará kixin í so chojni tsoñohe sín tí nkehe chaxín la ní jahará tjinkáonhyará sinchexiteyará la ko tjtøéhyará kixin í so chojni chrókjuinçexiteyá sín —ichro ch'án.

⁵³ A ntá kjuixin nixja ch'in Jesús kain tíha ntá tí sín maestro tjako tí ley la ko tí sín fariseo imá kónínkakonhen sín ch'án ntá kjuankixin sín kjuanchankíhi sín ch'án nchónhya nkehe ⁵⁴ chrókjuachaxín sín ch'án kixin ach'e ntoáhya chrókjuatøhe ch'án ntá chrókjuanchia sín jie tí jehe ch'án.

12

Ch'in Jesús chrónka kixin ntoáhya ch'e tí sín fariseo

† 11:33 Lucas 8.16

¹ A ntá nchónhya mil chojni kójnkotsé sín ntá tinkák'íntate kíchó sín. Ntá ch'ín Jesús saoxín kjuankíxin chénka ch'án tí sín k'uájiko ch'án ntáchro ch'án kíxin:

—Chrókuítekákonhyará tí nkehe ntoáhya tjenkayáxin tí sín fariseo ch'ia sín, na mé éxi yóhe tí xroan nchek'ánki niojtja tí nkehe tjako sín. ² Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin. ³ A ntá kaín nkehe ntáchrorá tí sitíe la chr'éxin tsinhin chojni tí nchakotjin; la ko kaín nkehe mó ntáchrorá k'uikjéhérá nchia la chr'éxin ts'èya sín chrítaón nchia tsinhin kaín xín chojni.

Nkexro tí chróchrakonhenni

(Mt. 10.26-31)

⁴ Jahará chojni chóxin kíchó ni mé tjonkará kíxin chróchrakuenhyará tí chojni t'óyan tí cuerpo, a ntá chr'éxin la kohya nkehe tsjacha sín chrókjuich'e sín. ⁵ Kjánchó tjonkará kíxin nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chóna kjuachaxin tsochr'án chojni tí siín xrohi tsjasótexin sín. Tí nkexro a mé chróchrakonhénrá ch'án má.

⁶ ¿Á chrókóxiñinhyá in'ó koxroxé yaá chichaon ntsíntsi? Kjánchó Dios la ts'itjáyenhyá ch'án nijnko tí jehe va. ⁷ Kjóté tí kaxihí chóna ikjárá la nohe ch'án nkekjaín ka chontará. Méxra chrakonhyará tí jahará kíxin antsí má tjete sínkí tí jahará. A ntá kjóté nchónhya koxroxé la kánhyó sínkí tíha.

Chróchrónkani kíxin tinkáchónkini Ínchéni Jesucristo nkayakon chojni

(Mt. 10.32-33; 12.32; 10.19-20)

⁸ Ntáxrijan kaín tíhi kíxin tí nkexro tsochrónka kíxin tinkáchónkina sín nkayakon chojni la kjaxin tí Xjeen Dios K'óna Chojni tsochrónka kíxin chóxin ch'án tí jehe sín nkayakon tí sín ángel kuénte Dios. ⁹ A ntá tí sín sinchemá sín kíxin chónhyana sín nkayakon chojni la ntá kjaxian janhan sjintamá kíxin chonhya tí jehe sín nkayakon tí sín ángel kuénte Dios.

¹⁰ A ntá jnkojin nkexro ts'ántaxínjin sín tí Xjeen Dios K'óna Chojni naxa jina ts'itjáyen tí jie k'uántaxínjin sín. A ntá tí nkexro ts'ántaxínjin tí Nchakuen Dios la xitjahya tsjin tí jie tí xikaha tsixro sín.

¹¹ Tíó tsjikoará sín nkaxenhen nijnko Israel la ko tí tjejó tí sín t'etoan la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá ¹² kíxin tíó tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochóna chojni itsjé nkehe

¹³ Ijnko nkexro tjenkákjan tí sín tsikójnkotsé ntáche ch'án tí ch'ín Jesús kíxin:

—Maestro, ntáche tí kíchó ni a kíxin tsjanjon ch'án tí nkehe tónhenni tocar tsikitóhe it'eni tsakjani —ichro ch'án.

¹⁴ Ntá kjuátéhe ch'ín Jesús ntáchro ch'án kíxin:

—Lontia jaha. ¿Nkekuénte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

¹⁵ Kjaxin ntáchro ch'án kíxin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrijon chrók'uejorá —ichro ch'án.

¹⁶ Ntá kjuíncheyóexin ch'án ntáchro ch'án kíxin:

—Kjuák'e ijnko chojni rico, a ntá tí nqntee ch'án na mé imá k'óna. ¹⁷ A ntá tí ch'ín rico kjuenkayáxin ch'án ntáchro ch'án kíxin: “¿Nkexrí chrókjuít'a jie kíxin chontahya nketí ts'ínkachjina tí noa k'ónana?” ichro ch'án. ¹⁸ Ntá kjuenkayáxin ch'án ntáchro ch'án kíxin: “Ó nóna nkehe sjit'a jie. Ts'oxíka tí t'ínkachjinayá noa chonta ntá sjit'ána ijnko antsí jie ts'ínkachjinayá kaín nkehe k'ónana jie chonta. ¹⁹ Ntá tsonatájan asenná kíxin: Asénni, nchónhya nkehe chonta jaha tsíchjina tsjacha nchónhya nánó. Ntá jie t'ok'áha la inte la its'ia la tócháha,” ichro ch'án. ²⁰ Kjánchó ntáche Dios tí jehe ch'án kíxin: “Lontia xikaha ichrua la, kíxin ijie tie itsi nkexro tsjanhia asán. A ntá tí nkehe kjuásichjina la, ¿xá nkexro kuénte tíha?” ichro ch'án. ²¹ Mé xikaha tsonhen tí nkexro chóna nchónhya nkehe chjasintajni ntihi, a ntá naxa kjuéyáhya ch'án nkehe kuénte nkaya nkajni —mé ichro ch'ín Jesús.

Dios mé t'ayakonhen tí xjeen ch'án

(Mt. 6.25-34)

²² Ntá chr'éxin ntáche ch'ín Jesús tí sín k'uájiko ch'án kíxin:

—Tjonkará kíxin chrókóxakuanhyará tí nkehe chrókjónterá la ko tí ka chrók'uitsará. ²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuéntará, a ntá kánhyó sínkí tí ka chrók'uitsará. ²⁴ Xráxinkáonrá nkexri siín tí kontálo. T'enkahya va la ko tjáhya va la ko chónahya va nketí ts'ínkachjinayá va tí noa. Kjánchó Dios la tjanjon nkehe sine va. A ntá jahará la antsí tjeotan, a ntá tí ko xritjaka la kénhyó. ²⁵ ¿Á tjejó jnkojinrá tjenkayáxinrá kíxin tí chrókóxakonhanrá má ntá naxa chrók'uankirá it'ó

metro ntetoxinrá inaá? ²⁶ A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe siín?

²⁷ Xráxinkáonrá nkexrí sí't'ánkí tí catsjo lirio ch'ehya xra la ko tjonhya. Ntá kjónté ntáxrxjan kixin tí ch'ín rey Salomón kaín ka náxrxjón k'uék'inkáya ch'án naxa kjuíncheyóehya ch'án kixin antsí náxrxjón tí tsjo a. ²⁸ A ntá xikaha Dios mé nchek'itsa ch'án kaín kayoa kjónté ijie síchón la ntá tsoche, la mé xikaha tsjanjon ch'án tí nkehe chrok'uitsará jahará. ¿Ntá nkekuente kixin naxa titekákonhyará ch'án? ²⁹ ¿Ntá nkekuente ixrirá tóxakonhanrá xritjeyará nkehe sinterá la ko nkehe its'irá? ³⁰ A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a. ³¹ Senó chrókjuéyará tí kjuachaxin kuente Dios, a ntá jehe ch'án mé tsjanjon ch'án kaín nkehe t'ichjánxinhanrá.

Tí nkehe tjele siín nkaya nkajni
(Mt. 6.19-21)

³² 'Chrakonhyará jahará kolélo kuentana. Kjónté tsjéhyará la It'ará tóxrxjínjin ch'án tsotjáhará ch'án tí kjuachaxin kuente ch'án. ³³ Nchekjirá kaín nkehe chontará la ntá chjehará tí chichaon tí sín chóntahya. A ntá xikaha sich'erá la tí tjoa t'inka chjichakóanrá tsontaxinhya kixin tí nkehe tjele siín nkaya nkajni tsjéjehya la ko ntaha kohya xichee la ko ts'inhya kué la ko ts'itjáyannya. ³⁴ A ntá tí nkaya nkajni tsochontará nkehe tjele la ntá tí nkehe tjenkayáxinrá la kjáxin ntaha tjen.

T'ichjánxin listo chrók'uejóchónhenni

³⁵ T'ichjánxin listo ts'ejochónhénrá la ko tsjak'ekoará xrohi tjeche. ³⁶ Listo chrók'uejorá éxí chojni ch'e xra tjejóchónhen sín tsokjanxin tí lámge sín tí tsikótehe chojni kixin tió tsi ch'án la ts'éya ch'án, la ntá tsakitjehe sín tí puerta tjoka. ³⁷ Náxrxjón tí nkexro ch'e xra tió chrókjan tí lámge sín chrók'uikon ch'án kixin naxa tjejótsjehe sín. Ntá chaxín ntáxrxjan kixin tí ch'ín lamo ts'etqan ch'án kixin ts'ejótxáxin sín tí tjen mesa ntáha ntá tsjanjon ch'án nkehe sine sín. ³⁸ Kjónté chrókui ch'án k'áxrótjen ó chrókui ch'án nantóye mé xikaha chrók'uikon ch'án kixin tjejótsjehe sín la náxrxjón tí sín ch'ehe ch'án xra. ³⁹ Chrókónohará tíhi kixin tí chrókónohe tí inché nchia nke hora chrókui tí xichee ntá chrókjuak'etsjehe ch'án chrókuiótehya ch'án chrók'uixenhen xichee tí ntqe ch'án chrókueé. ⁴⁰ Ntá jahará kjáxinrá xikaha chrók'uejotsjehérá kixin titáyá tsi tí Xjeen Dios K'óna Chojni.

Tí nkexro jína ch'e xra la ko tí ch'ín ch'ehya xra jína
(Mt. 24.45-51)

⁴¹ A ntá ch'ín Pedro kjuanchankí ch'án kixin:

—Ínchéni, ¿á jehóni kaín ni kjuíncheyóéxian nkehe ntáchrua o kaín chojni? —ichro ch'án.

⁴² Ntá ntáchro Ínchéni kixin:

—¿Nkexro tí t'etqan tí xra jína, a ntá tí lámge ts'etqenhen kixin ts'ayakonhen ch'án tí chojni siín tí nchia ntáha kixin tsjanjon ch'án nkehe sine sín xintii tí hora a? ⁴³ Náxrxjón tjen tí nkexro a tió tsi tí lámge ts'ikon ch'án kixin naxa tjech'e tí xra. ⁴⁴ Tíhi mé chaxín tsontáxrxjan kixin tí ch'ín lamo tsochjéhe ch'án kaín xra chóna ch'án ts'etqan tí ch'ín a. ⁴⁵ A ntá tí ch'ín t'etqan sitónhen xra tsjenkayáxin kixin tjokahya tsokjan tí lámge ch'án, a ntá tsjankixin ch'án tsónínkakonhen ch'án tsjanjonko ch'án tí í so chojni ch'é xra, tí chojni ntoa la ko tí chojni chjin, a ntá jehe ch'án sine ch'án la its'í ch'án la tsokkoan ch'án. ⁴⁶ A ntá tí lamo tsokjan tí yaon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuitqehhe xra la ntá tsjasóteko ch'án tí sín titekakonhya.

⁴⁷ A ntá tí nkexro nohe ch'án nkehe tí xra tjinkaon tí lámge ch'án la tóxakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án. ⁴⁸ A ntá tí nkexro noehya nkehe tí xra tjinkaon tí lámge ch'án ntá ch'e ch'án nkehe chrókjuasótéxin ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xra ts'áyéhe ch'án sich'e ch'án; la ko antsí tsjé xra tsoxranchehe tí nkexro k'uáyéhe itsjé nkehe.

Jnkokoáhya tsjenkayáxin chojni kixin ó kui Ínchéni Jesús
(Mt. 10.34-36)

⁴⁹ Janhan k'uinka kixin sintak'ákjen xrohi chjasintajni. Ách'e ntáxrxjan kixin ó tjechr'ákjen tí xrohi a ntá naxa náhi. ⁵⁰ T'ichjánxin nchónhya tsqna tsjasótena. Tóxakonna tsoxiteyáxia kaín tíha. ⁵¹ ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrxjan náhi. Jnkokoáhya tsjenkayáxin chojni xikaha. ⁵² Kixin ijie xrankixixín in'ó chojni naxa kjéhya jnkokoáhya tsjenkayáxin sín. Tí ini tsónínkakonhen tí yaá. Tí yaá tsónínkakonhen tí ini. ⁵³ A ntá tí it'é tsónínkakonhen tí xjeen ntoa, la ko tí xjeen ntoa tsónínkakonhen tí it'é. A ntá tí iné tsónínkakonhen tí xjeen chjin, la ko tí xjeen chjin tsónínkakonhen tí iné. Tí ich'ee tsónínkakonhen tí tikintqe la ko tí tikintqee tsónínkakonhen tí ich'ee tjan.

*Tí nkehe chronkaxín nkehe tsonhen**(Mt. 16.1-4; Mr. 8.11-13)*⁵⁴ Ch'in Jesús kjaxin ntáche ch'án tí chojni síin kixin:

—A ntá ts'ikonrá ts'áya tjuí tí tjiatóxin yaon, a ntá ntáchrórá kixin ts'aniá chrin, a ntá xikaha chaxín tsonhen ts'aniá chrin. ⁵⁵ A ntá tí chjéhe xrínto nó sur ntá ntáchrórá kixin tsosó, a ntá xikaha chaxín tsosó. ⁵⁶ Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajni la ko chjasintajni. ¿Ntá nkexrí naxá tiénxinhyará nkehe sitónhen tí tjejorá jie?

Chróókoxakonheni kjuaxróxin chrók'uejókoni tí sín nínkakonheni
(Mt. 5.25-26)

⁵⁷ ¿Nkekuènte tjejáhyará jahará nkehe tí jína? ⁵⁸ Tí nkójín nkexro tsjanchia jie sátjikoará ch'án nkayakon tí sín t'etqan na tí ntia ó chrónkajórá ch'án kixin tsoyóxin ts'ixinhya kjuanínkaon kixin sátsjikoahyará nkayakon tí ch'in juez, kixin tí ch'in juez chrók'uetqan ch'án kixin sátsjikoará tí sín comandante. A ntá tí ch'in comandante chróchr'áxanhanrá ch'án ntqechiso. ⁵⁹ Ntáxrjan kjá ni chrók'uaxrjéxinhyará ntiha tsjenkajiará kaín xín chichaon chonta.

13*T'ichjáxin chrókuinkí chojni tí nkehe tjenkayáxin sín*

¹ A ntá tí yaon k'uejó iso sín chénka sín tí ch'in Jesús kixin nkexrí kjuich'e ch'in Pilato k'uetqan its'en iso chojni tsíkjin estado Galilea k'uitji ijnjé sín kójnkoiéko tí ijnjé tí ko k'óyan sín kjuanchexín sín kjuasáyé Dios. ² A ntá kjuátehe ch'in Jesús ntáchro ch'án kixin:

—¿Á tjenkayáxinrá kixin xikaha kónhen tí sín tsíkjin estado Galilea kixin antsí jie jie chóna sín, a ntá tí i so sín chjasén sín la á náhi ní? ³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha its'enrá kjaxin. ⁴ ¿Á tjenkayáxinrá kixin antsí má k'uechóna jie tí dieciocho chojni ik'uéen xrátja sín tí torre Siloé, a ntá tí i so sín chjasin Jerusalén la á náhi ní? ⁵ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha ts'itjayanrá kjaxin.

Ch'in Jesús kjuíncheyóexin ch'án éxi ijnko nta to higo t'ónahya to

⁶ A ntá ch'in Jesús kjuíncheyóexin ch'án ntáchro ch'án kixin:

—Ijnko chojni chóna ijnko nta to higo nóntee ch'án. Ntá sákjuitsjehe ch'án á k'óna to. A ntá náhi k'uitjahya ch'án ninkehó to. ⁷ Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjahá tí nta la k'uitjahya ninkehó to higo. T'ochrinjian tí nta kixin tsoxéhe tí nonte a.” ⁸ A ntá tí ch'in t'ayakonhen nonte kjuátehe ch'án ntáchro ch'án kixin: “Áxri, títqhé ijie nánó kixin sjintantá nche la ko tsjiko ncheqateje. ⁹ A ntá tí xikaha ách'e ts'óna to. A ntá tí náhi na ntá ts'ochrinjian chr'éxin.”

Ch'in Jesús kjuínchekitohe jina ijnko tjan níhi tí yaon t'ok'éhe chojni

¹⁰ Ch'in Jesús kjuák'e ch'án ijnko nínko kjuakoxin ch'án ijnko yaon t'ok'éhe chojni.

¹¹ Ntiha tjen ijnko chojni chjin chóna dieciocho nánó chonta tjan ijnko nchakuen tí jinahya kjuíncheníhi tjan tjesékoá tjan xitjahya xrentoá tjan. ¹² A ntá ch'in Jesús k'uikon ch'án kixin xikaha tjan tjan ntá k'uíyehé ch'án ntáchro ch'án kixin:

—Naná, ó kjuínhan tí chin chonta —ichro ch'án.

¹³ A ntá jehe ch'án kjuak'etja tja ch'án chrítaón tí jehe tjan a ntá tuénxin xrentoá tjan ntá chjéhe tjan kjuasáyé Dios. ¹⁴ A ntá tí ch'in t'etqan kuènte nínko kónínkaon ch'án kixin ch'in Jesús kjuínchekitohe jina ijnko chojni ijnko yaon t'ok'éhe sín, ntá ntáche ch'án tí chojni a kixin:

—Síin injon yaon mé chrókónhen xrá chrók'uinkará chrókuitqohará jina na jehya tí yaon t'ok'éheni chrókónhen tíha —ichro ch'án.

¹⁵ A ntá Ínchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasintankeehyará tí koxintaará la o tí kolóchoará chrókjuíkoará va ntá tí yaon t'ok'éheni ní? ¹⁶ A ntá tí tjan mé tsík'axrjeníxin tí ch'in Abraham na mé ó chóna dieciocho nánó tsíkjinchenteto ch'in Tsochren tí jehe tjan, ¿á jehya jina kjaxin chrókjuasintanka tí nkehe tsikóntetoxín tjan tí yaon t'ok'éheni? —ichro ch'án.

¹⁷ Ntá xikaha ichro ch'in Jesús la ntá kaín tí sín kónínkakonhen ch'án la kósuéhe sín. A ntá kaín tí chojni síin ntaha chéhe sín k'uikon sín kaín tí kjuaxroan jie kjuakoxin tí jehe ch'án.

Kjuíncheyóexin ch'in Jesús éxi ijnko tje ntsi kuènte nta mostaza

(Mt. 13.31-32; Mr. 4.30-32)

¹⁸ Ntá ntáchro ch'in Jesús kixin:

—¿Nkehe tóyóexin tí t'etqan Dios tí kjuachaxin kuènte ch'án la ko nkehe jina chrókjuintayóaxian? ¹⁹ Éxi yóhe ijnko tje kuènte nta mostaza k'ueñka ijnko chojni nóntee

ch'án. A ntá tió k'u'ánki kóyóhe éxi ijnko nta jié. A ntá tí koxroxé xritjaká mé kui va kjuích'éna va kaké va chrík'á tí chaon tí nta.

Ch'in Jesús kjuíncheyóexin éxi tí xroan t'ánkxin niotja
(Mt. 13.33)

²⁰ Ntá ntáchro ch'in Jesús inaá kixin:

—¿Nkehe chrokhjuintayóaxian tí t'etóan Dios tí kjuachaxin kuènte ch'án? ²¹ Éxi yóhe tí xroan nchek'ánki niotja kjuínkíkjanxin ijnko chojni chjin iní medida harina. A ntá tí ch'o la k'u'ánki.

Tí puerta tekahya
(Mt. 7.13-14, 21-23)

²² K'uátsinka ch'in Jesús kaín chjasin hyé la ko kaín chjasin ntsínsi nákjako ch'án tí tan jina kixin jehe ch'án ó sátsji ch'án chjasin Jerusalén. ²³ A ntá ijnko nkexro kjuanchanki ch'án kixin:

—Ínchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kixin:

²⁴ —Tóxakonhanrá t'ixeenxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín. ²⁵ A ntá tí inché nchia ts'ík'jéhe ch'án tí puerta. A ntá chr'éxin jahará ts'ejorá ntója ts'eyará ts'ínkará tí puerta tsontáchrórá kixin: “Tadá, takítjéhe nchia”, tsixrorá. Kjánchó jehe ch'án tsjatehe ch'án tsontáchro ch'án kixin: “Nonahya nketi k'uinkaxínrá jahará”, tsixro ch'án. ²⁶ A ntá tsjankixinrá tsontáchrórá kixin: “Kjóneni la ko k'uini jnkokqá la ko jaha kjuákoxian tí ntasjinni”, tsixrorá. ²⁷ A ntá jehe ch'án tsjatehe ch'án tsontáchro ch'án kixin: “Ó ntáxrjan janhan kixin chonhya tí jahará. Tjítóhérá tí janhan sájtjirá ókjé kaín tí jahará jínahya kjuích'erá.” ²⁸ Ntaha tsotsjankará la ko sintetaónrá nénorá tió ts'íkonrá kixin ch'in Abraham la ko ch'in Isaac la ko ch'in Jacob la ko kaín tí sín k'uéchronkaxín itén Dios mé tjejó sín tí tjen Dios t'etóan ch'án, a ntá jahará la ts'axrxjéxinrá ntója ntiha. ²⁹ Tsjixjin chojni nó tjítóxin yaon la ko nó tjjátóxin yaon la ko nó norte la ko nó sur ntá ts'ejótjixin sín tí tjen Dios t'etóan ch'án la sine sín. ³⁰ A ntá iso tí sín k'uítuenhen senó la mé ts'etóan sín, la ko iso tí sín k'uék'etóan senó la mé ts'ítuenhen sín.

T'ává ch'in Jesús
(Mt. 23.37-39)

³¹ A ntá tí yaon a ikui iso sín fariseo ntáche sín tí ch'in Jesús kixin:

—Sátjixian ntihi kixin ch'in Herodes tjinkaon chrók'óyan ch'án tí jaha —ichro sín.

³² A ntá jehe ch'án kjuátehe ch'án ntáchro ch'án kixin:

—Sátjirá chenkará tí ch'in jínahya ch'ia kixin: “Tjie la ko ntóye tsakítsje nchakuen tí jínahya la ko sintakítóha chojni nihi jina la ntá tí núnin yaon a ntá tsjixinna tí xra kuéntana,” tsixrorá. ³³ Kjánchó t'ichjánxin kixin naxa sájtija tí jie yaon la ko ntóye la ko tí yaon chr'éxin kixin t'ichjánxin kixin ijnko nkexro chrónka itén Dios chrók'uénxin ch'án chjasin Jerusalén.

³⁴ Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítjará. Imá itsjé veces tjínkavan chrókójkotsérá la chrók'uáyakonhanrá éxi ijnko cochiká mé t'ayakonhen xjeen va chrínki kanengee va mé xikaha tjínkavan chrók'uáyakonhanrá tí jahará. Kjánchó jahará la tjínkakonhyará xikaha. ³⁵ Chrókónohará kixin Dios la tsítóhe ch'án tí jahará la ts'íkonhyará tí janhan tsjixrakája tí yaon tsontáchrórá kixin: “Jina tí nkexro kjuixjin kjuachaxin ihnié Ínchéni Dios.”

14

Ch'in Jesús kjuínchekitóhe jina ijnko nkexro tsík'atjoyé kuenté

¹ A ntá tí yaon t'ok'éhe sín sákjuí ch'in Jesús ntóe ijnko ch'in fariseo t'etóan kixin ntaha sineko sín ch'án. A ntá tí í so sín fariseo t'ínk'chéhe sín tsotsjehe sín nkehe sich'e ch'án. ² A ntá ntiha ntóí chók'éxin tí tjen ch'án itjen ijnko chojni tsík'atjoyé kuenté. ³ A ntá ch'in Jesús kjuanchankihi ch'án tí sín maestro tjako tí ley la ko tí sín fariseo kixin:

—¿A siín kjuachaxin sinchekitóhene jina ijnko chojni nihi tí yaon t'ok'éhene o náhi? —ichro ch'án.

⁴ A ntá jehe sín la tání sín. A ntá ch'in Jesús sákjuíko ch'án tí ch'in nihi la kjuínchekitóhe ch'án jina la k'uétuenhen ch'án kixin sátsji ch'án. ⁵ A ntá ntáche ch'án tí sín fariseo kixin:

—Jnkojín tí jahará chontará kolóchoará o koxíntaará chrókjuítsínkáyá va tóye ¿á senóhya chrókjuítsjetoónrá va tóye kjónté yaon t'ok'éhene ní? —ichro ch'án.

⁶ A ntá jehe sín ninkehó kjuáteghya sín kixin xikaha ichro ch'án.

Tí sín tsík'iyéhe sín sátsji sín kia tsíkótéhe chojni

⁷ Ntá k'uikon ch'ín Jesús kixin tí sín tsikóchjina tí kia a kjueyá sín silla náxrxón ts'ejóya sín tí tjen mesa ntá kjuíncheyóexin ch'án ntáchro ch'án kixin:

⁸ —Tió njkojín nkexro ts'iyaha sín kixin tsjasán ijnko kia tsotehe chojni la tjéyáhya tí nta silla kuénte tí sín t'etqan kixin ách'e tsi njkojín nkexro antsi t'etqan ⁹ a ntá tí nkexro k'uíyáhará yóirá itsi ch'án tsjancharará ch'án kixin t'ínkátjenxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsošuaha sátsja tsjak'etjaxian tí silla kjuixixín.

¹⁰ Íchá jina tió t'iyaha sín chrókjuak'etjaxian tí silla tjetuanhya, kixin ntá chrókui tí ch'ín tsík'iyaha tsontáchro ch'án kixin: “Jina tjoni la t'atsinka tsjak'etjaxian tí silla antsi náxrxón”, kixin ntaha tsjikosáyaha sín nkayakon kain tí sín ts'ejótjajinkoa sín ntiha. ¹¹ Kixin tí nkexro sinchehnkehe asén kixin imá chrók'uetqan ch'án la mé chr'éxin Dios tsjanjonhya kjuachaxin kixin ts'etqan ch'án. A ntá tí nkexro k'uek'etqanhya la mé chr'éxin Dios tsjanjon kjuachaxin kixin antsi ts'etqan ch'án.

¹² Kjaxin ntáche ch'án tí nkexro tsik'iyehé ch'án kixin:

—Tió tsjasian kia it'o yaon la o tsonjin la t'iyéehya tí sín choxian la ko tí sín kichuá la ko tí sín naxa kjéhya la ko tí sín rico chjino ntqa, kixin jehe sín la chr'éxin ts'iyaha sín inaá la xikahó la ó kjuixin kjan tí k'uíyehé sín. ¹³ Íchá jina chrók'uíyehé tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya. ¹⁴ Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jina la mé Dios mé tsjenkaha kixin kjuínkítsa tí jehe sín.

Ch'ín Jesús kjuíncheyóexin ch'án éxi ijnko kia jié

¹⁵ A ntá kuínhin ijnko tí sín tjejótjajin sín chjino tí mesa, a ntá ntáche ch'án tí ch'ín Jesús kixin:

—Náxrxón tí sín sine niojtja tí tjen Dios t'etqan ch'án —ichro ch'án.

¹⁶ Ntá ntáchro ch'ín Jesús kixin:

—Ijnko chojni kjuasin ijnko kia jié ijnko kónjin la k'uíyehé ch'án nchónhya chojni tsi sín tí kia a. ¹⁷ A ntá ó kuichjina tí hora sine sín ntá k'uetuénhen ch'án ijnko chojni ch'ehe ch'án xra tsjichenka ch'án kain tí sín ó tsík'iyehé ch'án kixin chrókóchjina sín kixin ó tjejóchónhen kain nkehe sine sín. ¹⁸ Ntá kain sín kjuankixin sín chrónòla sín kixin xitjahya tsjiji sín sine sín. A ntá tí ch'ín saxóin kjuitsjehe ch'án ntáchro ch'án kixin: “Na ntá k'uenani ijnko nonteeni la t'ichjánxin tsjitsjeheni la xitjahya tsjijini tí t'iyeheni ch'án, ntá chénka ch'án kixin chrókóninkakuenhyani ch'án”, ichro ch'án. ¹⁹ A ntá í jnko ch'ín ntáchro ch'án kixin: “Na ntá k'uenani in'ó yunta koxinta, a ntá t'ichjánxin tsotsjeheni á jina ch'e va xra, ntá chénka ch'án kixin chrókóninkakuenhyani ch'án”, ichro ch'án. ²⁰ A ntá í jnko ch'ín ntáchro kixin: “Na ntá kóteheni, méxra xitjahya tsjijini”, ichro ch'án. ²¹ Ntá ó kjan tí ch'ín ch'e xra chénka ch'án tí ch'ín lámo kain tí nkehe tsintáchro sín. A ntá tí ch'ín lámo kuínhin ch'án xikaha la ntá kóninkaon ch'án ntá ntáche ch'án tí ch'ín ch'ehe ch'án xra kixin: “Tjoka sátsja kain ntja chjasin la tsjikoa ntíhi tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya”, ichro ch'án. ²² A ntá chr'éxin ntá kjan tí ch'ín ch'e xra chénka ch'án tí lámo kixin: “Ó kjuínchexiteyáni xikaha kuétuénhéni la kjónté naxa xranka chrókui chojni”, ichro ch'án. ²³ A ntá tí ch'ín lámo ntáche ch'án tí ch'ín ch'ehe ch'án xra kixin: “Sátja kain ntja jié la ko kain ntja ntí la tétuénhen chojni sín chrókui sín chrók'uíxixenhen nchia ntqna naxa xranka. ²⁴ Kixin ntáxrxan kixin nijnko tí sín k'uíyaha senó chrókui sín chrókjone sín tí nkehe chrótjaha sín”, ichro ch'án.

Ixra tsochréheni Cristo

²⁵ Nchónhya chojni nkáchréhe sín tí ch'ín Jesús, ntá jehe ch'án kuínkátjía ch'án kotónhen ch'án ton ch'án ntáchro ch'án kixin:

²⁶ —A ntá njkojín chojni tsotjinkaon tsochréhe tí janhan la antsi má tjetqan chrótjuana sín la kjónté kénhyó chrótjuéhe it'é sín la ko iné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótjuéhe asén sín. A ntá náhi la xitjahya ts'óna discípulo kuéntana jehe sín. ²⁷ Tí nkexro tsamáhya tí ntacruz kuénte sín tsochréhya sín tí janhan la xitjahya ts'óna discípulo kuéntana. ²⁸ A ntá njkojín tí jahará chrókjuich'énará ijnko tjat'o nteto, zá senóhya chrókjuak'axinrá kixin nkekjaén chichaon ts'ichjánxin ts'ixenhen chrótsjehérá á nchoxon chrókjuixixín chrók'ónaxín tí tjat'o a? ²⁹ A ntá tió tsjankixinrá s'ich'énará tí tjat'o ntá chr'éxin xitjahya tsjixin s'ich'énará, ntá kain chojni ts'ikon sín tsjanoará sín ³⁰ tsontáchro sín kixin jaha kjuankixian kjuich'éna, a ntá jie xitjahya sinchekjixian ts'óna, tsixro sín. ³¹ A ntá njkojín tí ch'ín rey t'etqan tsjanjonko í jnko rey t'etqan kjaxin násenó chrókjuenkayáxin ch'án kixin ite mil soldado chóna ch'án, á chrókjuacha ch'án chrókjuachaxin ch'án tí kán mil soldado chóna tí í jnko ch'ín t'etqan. ³² A ntá tí chrókjuachahya ch'án chrókjuanjonko ch'án tí í jnko ch'ín rey, ntá naxa ikjín tjen ch'án la íchá jina chróchr'án ch'án ijnko nkexro tsochronóehé ch'án kixin chrók'uíxinhya kjuanjinkaon.

³³ Mé xikaha jnkojín tí jahará tí tsítóéhyará kaín nkehe ntoáhya tjenkayáxinrá xitjahya ts'óna discípulo kuéntana.

Tí xíjnta tsík'ánkéhé tí jní
(Mt. 5.13; Mr. 9.50)

³⁴ A ntá jína tí xíjnta, kjánchó tí chrók'uánkéhé tí jní la ntá xitjahya chrókójní inaá. ³⁵ Ntá tí xikaha la ní tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'in Jesús.

15

Kjuíncheyóexin ch'in Jesús éxi ijnko kolélo tsik'itjáyán
(Mt. 18.10-14)

¹ Kaín tí sín nchekjènkí la ko tí sín chóna nchónhya jje kóhchinehe sín tí ch'in Jesús kixin tjinkaon sín chrókuinhin sín tí nkehe tjechronka ch'án. ² A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'in i la kjónté tí sín chóna nchónhya jje la t'ito ch'án la ko neko ch'án —ichro sín.

³ Ntá ch'in Jesús kjuíncheyóexin ch'án ntáchro ch'án kixin:

⁴ —A ntá jnkojín tí jahará, tí chontará ijnko ciento kolélo ntá chrók'uitjáyán ijnko va, zá chrók'uitóéhyará tí noventa y nueve va tí nteje ó, a ntá á chrók'juikjéyáhyará tí ko tsik'itjáyán hasta chrók'uitjájíará va ní? ⁵ A ntá tí ts'itjára va ntá tsamará va tsogháhará. ⁶ Ntá tíó tsokjanrá ntóará ntá ts'iyehérá kaín tí sín choxinrá tjórá jína la ko tí sín chjinaxón ntóará ntá tsontácherá sín kixin: “Tsochéhèni ts'ejóni jje kixin ó k'uitjá tí kolélo tsik'itjáyán.” ⁷ Na mé kjaxin xikaha tsotjonkará kixin antsí tsoghéhe kaín tí sín síin nkaya nkajní tíó ijnko chojni tsítóhe kaín tí jje tsikjenkayáxin ch'án. Ntá kánhyó tsoghèxin tí sín nkaya nkajní kixin tí noventa y nueve chojni jína t'ichjánxienhya chrókuinkí sín tí nkehe tjenkayáxin sín.

Kjuíncheyóexin ch'án éxi chichaon k'uitjáyán

⁸ A ntá ijnko chojni chjin chóna ite chichaon, a ntá tí chrók'juinçek'itjáyán tjan ijnko tí chichaon a la, zá chrók'juinçek'ákjenhya tjan xrohi kixin chrók'jueyáxin tjan la ko chrok'uánjón tjan tí nchia kixin chrótsjehe tjan jína hasta chrók'uitjajia tjan? ⁹ A ntá tíó chrók'uitja tjan la ts'iyehé tjan kaín tí chojni chjin jína tjo tjan la ko tí sín chjinaxón ntóe tjan la ntá tsontáche tjan sín kixin: “Tsochéhèni ts'ejóni kixin ó k'uitjani tí chichaon kjuínçek'itjáyanni.” ¹⁰ Ntá kjaxin xikaha tsotjonkará kixin imá tsoghéhe kaín tí sín ángel kuènte Dios tíó ijnko chojni tsítóhe kaín tí jje tsikjenkayáxin ch'án.

Ch'in Jesús kjuíncheyóexin ch'án éxi ijnko ch'in kuicháxinhin chichaon

¹¹ Kjaxin ntáchro ch'in Jesús kixin:

—Ijnko nkexro chóna yaá xjeen ch'án. ¹² A ntá tí ch'in tsoyo ntáche ch'án tí it'é ch'án kixin: “It'èni, chjehéni kaín nkehe chróhchjehéni.” A ntá tí it'é sín k'óchrít'óhe ch'án tí nkehe chóna ch'án. A ntá tí ch'in tsoyo k'uáyéhe tí nkehe kuènte ch'án. ¹³ A ntá kánhyó tsjé yaon chr'éxin tí xjeen ch'án tsoyo kjuínçekjé ch'án kaín nkehe tsík'áyéhe ch'án, ntá sákjuiko ch'án tí chichaon sákjuí ch'án ókjé chjasin kjín. A ntá ntiha kjuínchexénhen ch'án kaín chichaon chóna ch'án kixin jehya tí jína kjuich'e ch'án. ¹⁴ A ntá tíó kjuixin kjuèhe ch'án tí chichaon kuicháxinhin ch'án ntá xringhya kókjinta tí chjasin ntiha ntá kohya nkehe sine kaín sín. A ntá jehé ch'án kjuankíxin ch'án t'énxín ch'án kjinta. ¹⁵ Ntá jehé ch'án sákjuikjéyá ch'án xra sích'e ch'án. Ntá chjasin ntaha tjen ijnko ch'in kjuanchehe ch'án xra. Ntá tí ch'in a kjuanjon ch'án xra ntá k'uetóan ch'án kixin sátsji ch'án nontee ch'án kixin ntiha ts'ayakonhen ch'án cochino. ¹⁶ A ntá jehé ch'án t'énxín ch'án kjinta ntá tjinkaon ch'án chrók'jóné ch'án tí nkehe ine tí cochino kixin ninxeró tí ntiha chrohya tsjanjon nkehe sine ch'án. ¹⁷ Ntá jehé ch'án kjuák'e ch'án kjuenkayáxin ch'án kixin: “Nchónhya chojni síin ntóe t'aná ch'e sín xra la chóna sín nkehe sine sín. Ntá janhan tjét'énxian kjinta ntíhi. ¹⁸ Ntá jje tsokjan tí tjen t'aná la ntá tsontáxrjan kixin: It'èni, kjuasinni jje kuítekakuenhya It'èni nkaya nkajní la ko kjuasinhanni jje kuítekakuanhyani tí jaha. ¹⁹ Tósuèhèni tsontáchrúa kixin xjaan tí jeheni. Ch'ènani éxi ijnko chojni t'aha xra”, mé xikaha kjuenkayáxin ch'án tsontáchró ch'án. ²⁰ Ntá kuákja ch'án ntja xrakoa ch'án tí ntóe it'é ch'án.

A ntá kjónté naxá kjín kui ch'án a ntá tí it'é ch'án la ó tsik'ikon ntá kuikonóehé ch'án tí xjeen ch'án. Ntá kuínká ch'án la kjuixinhin ch'án ntja la kjóá ch'án la ko kjónéko ch'án kochító. ²¹ Na ntá ntáchro tí xjeen kixin: “It'èni kjuasinni jje kuítekakuenhyani Dios la ko kjuasinhanni jje kuítekakuanhyani tí jaha. Tósuèhèni tsontáchrúa kixin xjaan tí jeheni”, ichro ch'án. ²² A ntá tí it'é ch'án k'uíyehé ch'án tí sín ch'ehe ch'án xra ntáchro ch'án kixin: “Xrákoará tí ka antsí jína nchek'inkáyará ch'án la ko chr'axenhenrá dedo tja ch'án ijnko koch'gninko la ko nchekjanará ch'án totjóa. ²³ La ko tjicakjínrá koxintáxjan tsanká la t'oyánrá va kixin sinekoni ch'án tsjasinhinni ch'án kia. ²⁴ Kixin tí xjanaa i la éxi ó tsik'en ch'án xikaha ntá jje

la éxí ó xechón ch'án la tsík'itjáyán ch'án la ntá jie la ó kónoxín ch'án inaá”, ichro ch'án. Ntá kjuankixín sín kjuasin sín kia.

²⁵ A ntá tí xjeen ch'án saó la nonte tjech'e ch'án xra. A ntá tió kjan ch'án kui ch'án chjinaxón nchia ntá kuínhin ch'án siín són la ko ité sín. ²⁶ Ntá k'uíyehé ch'án ijnko ch'ín ch'e xra ntá kjuanchankíhi ch'án kixin nkekuente xíkaha sitónhen. ²⁷ A ntá tí ch'ín a ntáχρο ch'án kixin: “Kíchuá la ó tsíkjan. A ntá it'á la k'uetóan k'uén koxintáxjan tsanka kixin jína xíkjan ch'án”, ichro ch'án. ²⁸ A ntá tí ch'ín saó la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chronóehé ch'án kixin chrók'uixenhen nchia. ²⁹ Kjánchó jehe ch'án kjuátéhe ch'án ntáche ch'án it'é ch'án kixin: “Nchónhya nánó t'ahani xra, la xráxín kuítékakonhanni kaín nkehe kuétoan la kjuánjonhya nijnko koténtsó chrókjónekoni tí sín chóxinni. ³⁰ A ntá jie ikui tí xjaan i kjuínchek'itjáyán ch'án kaín nkehe chjehé ch'án kjuínchek'itjáyánxín ch'án chojni chjin. A ntá jie ikjan ch'án la naxá t'oyán koxintáxjan tsanka”, ichro ch'án. ³¹ A ntá ntáχρο tí it'é ch'án kixin: “Xjeeni jaha, xráxín tjejóko kichó ní ntíhi. Kaínxín nkehe kuéntana la kuénta jaha kjaxin. ¿Nkekuente ninkávan? ³² A ntá jie la t'ichjánxin tsjasinhinni kíchuá kia tsóchéheni kixin éxí tsík'en ch'án la ntá jie la ó tsíxechón, la tsík'itjáyán ch'án xíkaha la ntá jie la kónoxín ch'án inaá.”

16

Ch'ín Jesús kjuíncheyóexin ch'án éxí tí ch'ín k'uáyéhe xra la ntá kjuích'ehya xra jína

¹ Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etóan tsonhen xra. Ntá kui ijnko nkexro chénka tí lamó kixin: “Tí nkexro t'etóan nchexénhen ch'án tí nkehe chonta”, ichro ch'án. ² A ntá tí ch'ín lamó k'uáyéhe ch'án tí ch'ín ch'ehe ch'án xra ntáche ch'án kixin: “¿Á chaxín xíkaha ch'e kixin xíkaha ichro sín? A ntá jie tsájjuan jaha kuénta tí xra kjuích'e kixin ijie í s'ich'ehya xra tsétoan ntíhi”, ichro ch'án. ³ A ntá tí ch'ín t'etóan tónhen xra kjuenkayáxin ch'án kixin: “¿Nkehe chrókjuit'a jie kixin tí lamó la í tsjanjonhya ch'án xra sít'a? La ko janhan la chontahya fuérza sít'a xra nqntee chojni la ko tósuána kixin chrók'uájia chrókjúanchák'á nkehe. ⁴ Ó nóna nkehe sít'a kixin ntá tsochonta nkexro tsjanjon kjuachaxin tsjak'é ntóe sín tí í tsochontahya xra sít'a”, ichro tí ch'ín t'etóan. ⁵ Ntá k'uáyéhe ch'án jnkojnko jnkojnko tí sín síkéhe tí lámoe ch'án. A ntá tí ch'ín saó kui ntá tí ch'ín t'etóan mé kjuanchankíhi ch'án kixin: “¿Nkekjaín tjasikéhé lámóeni?” ichro ch'án. ⁶ A ntá jehe ch'án kjuátéhe ch'án ntáχρο ch'án kixin: “Síkáni ijnko ciento ntabarril aceite”, ichro ch'án. A ntá tí ch'ín t'etóan ntáχρο ch'án kixin: “Ntíhi tjeen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián”, ichro ch'án. ⁷ Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkekjaín tjásiká?” ichro ch'án. Ntá ntáχρο ch'án kixin: “Tjnko ciento medida noatrigó síkani”, ichro ch'án. A ntá ntáχρο tí ch'ín t'etóan kixin: “Tí xíkaha la ntíhi tjeen tí xroon tsjénkaxian. A ntá jie la ch'éna ochenta ó”, ichro ch'án. ⁸ A ntá tí ch'ín lamó kjuátsoan ch'án kixin kjónté jehya xra jína kjuích'e tí ch'ín t'etóan kjuích'ehé ch'án xra la kjánchó tí kjuích'ia ch'án la antsí nohe ch'án kjuích'ia ch'án. Méxra tí sín chjasintajni antsí nohe sín ch'iyehé kichó sín, a ntá tí sín ixri tí t'inkaséyan la xíkaha chrókjuekayáxin sín chrókjuech'ia sín, chrókjuekayáxin sín tí jína.

⁹ Janhan la tetuanhanrá kixin chrókuicháxinhanrá tí chichaon siín chjasintajni kjónté tjuáhya kixin tsjinkitsará chojni kixin ntá itsjórá sín jína. A ntá tió tsjeje kaín chichaon ntá jehe sín ts'ejóchónhen sín nkaya nkajni ts'áyáhará sín jnkochríxín.

¹⁰ Tí nkexro k'uáyakonhen tí nkehe chóna kjónté tsjéha la kjaxin chrókjua cha chrók'uáyakonhen tsjé nkehe chróchóna. A ntá tí nkexro kjuachahya k'uáyakonhen tí nkehe tsjéha chóna la kjaxin chrókjua cha chrók'uáyakonhen tí tsjé nkehe chróchóna ch'án. ¹¹ Mé xíkaha tí xitjahya t'ayakonhénrá tí chichaon kuénte chjasintajni ntíhó la, ¿ntá nkexrí chrók'uayéhérá nkehe tjete chaxín kuénte nkaya nkajni? ¹² Mé xíkaha tí kjuachahyará k'uáyakonhénrá tí chichaon kuénte ókjé nkexro, ¿ntá nkexro chrótjáhará jahará tí nkehe chaxín tjete chrók'uáyakonhénrá?

¹³ Nijnko nkexro xitjahya sich'ehe yaá lamó xra kixin ijnko la tsonínkakonhen ch'án la ko tí í jnko tsotjuéhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuech'ehé chojni xra Dios tí tjínkaon sín tsochóna sín itsjé chichaon —ichro ch'án.

¹⁴ A ntá tí sín fariseo imá kóxrjínhin sín chichaon, ntá kuínhin sín kaín tíha nkeri ichro ch'ín Jesús, ntá kjuanoá sín ch'án. ¹⁵ Na ntá ch'ín Jesús ntáche ch'án sín kixin:

—A ntá jahará chrók'uejóxinrá jína nkayakon chojni. A ntá Dios la chóxin ch'án asánrá. A ntá tí nkehe imá tóxrjínhin ch'e chojni la Dios la tóxrjénhya ch'án.

Tí ley la ko tí t'etóan Dios tí kjuachaxin kuénte ch'án

¹⁶ Naxa kjuakohya ch'in Juan la k'uekjako sín tí ley kuènte ch'in Moisés la ko tí nkehe k'uekjin tí sín k'uechronka itén Dios ósé. A ntá kui ch'in Juan la chrónka ch'an tí tan jina nkexri ts'etqan Dios tí kjuachaxin kuènte ch'an ntá kaín chojni imá tjinkaon sín chrókjuacha sín chrók'uejós sín tí tjen Dios t'etqan ch'an.

¹⁷ Antsí xrahya chrók'uitjáyán tí nkehe siín nkajni la ko chjasintajni. A ntá xitjahya kixin chróxiteyáha kjónté ijnko nkehe ntsí t'etqan tí ley.

*Ch'in Jesús tjako ch'an kixin chrókjuák'ehya kichó chojni
(Mt. 19.1-12; Mr. 10.1-12)*

¹⁸ A ntá ijnko chojni tsjakehe ichjién la ntá tsakja ch'an í jnko chojni chjin la ijie tíha. A ntá tí ch'in tsakja ijnko tjan tsíkítsinkehe la kjaxin ijie tíha.

Tí ch'in rico la ko tí ch'in Lázaro

¹⁹ Ntá kjuák'e ijnko ch'an imá rico ch'an la ko k'uitsá ch'an ka imá tjete náxrxón kjátse tié la ko kain yaon kjuasin ch'an kica. ²⁰ A ntá ntója ntqe ch'an kjuák'etjaxin ijnko ch'in nóa mé it'in ch'an Lázaro tjançhak'á ch'an la ko níhi ch'an tsich'enka kuènte ntqe ch'an. ²¹ A ntá tí ch'in nóa la imá kjuák'e asén ch'an chrókjone ch'an la ko chrókókjexin ch'an tí nkehe tqt'q tsjixénjinkixin mesa kuènte tí ch'in rico. A ntá tí konja la kjuamá va tí tqsoa chóna ch'an. ²² A ntá ijnko yaon mé ik'uén tí ch'in nóa. A ntá tí sín ángel mé sákjuiko ch'an tí náxrxón tjen ch'in Abraham. La ko kjaxin ik'uén tí ch'in k'ueírko la sákjuikjavá sín ch'an. ²³ Ntá tjen ch'an tí sátsji tí sín tsík'en tjetjasóte ch'an. Ntá konta ch'an k'uikon ch'an kixin ikjín náxrxón tjen ch'in Abraham tjeko ch'an tí ch'in Lázaro. ²⁴ Ntá k'ueya tí ch'in k'uechóna tsjé nkehe ntáçro ch'an kixin: "It'eni Abraham, tikonóana tétuenhén tí ch'in Lázaro kixin sinçhekjataxin ch'an kóhe dedo tja ch'an intá ntá tsi ch'an tsjak'etak'á ch'an nejen kixin tsoxruehe kixin tjinhaya sóa tí xrohi siín ntihi", ichro ch'an. ²⁵ Kjánchó ntáçro ch'in Abraham kixin: "Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrxón. A ntá ch'in Lázaro mé k'uáyéhe ch'an nkehe náxrxónhaya. A ntá jie ntihi kjuaxróxin tjen ch'an, a ntá jaha tjetjasótia méhe. ²⁶ A ntá kjaxin jnkosiné tjen tsaka imá jie xitjahya ts'átóye tí sín siín ntihi tsjihya sín tí tjen jaha la ko kjaxin tí sín siín méhe xitjahya ts'átóye sín itsji sín ntihi", mé ichro ch'in Abraham. ²⁷ A ntá tí ch'in k'ueírko mé ntáçro ch'an kixin: "Ntá xrjanóaha jaha It'eni Abraham kixin tétuenhén tí ch'in Lázaro sátsji ch'an ntqe t'aná ²⁸ kixin ntaha kuitóhe in'ó tí sín kichiná, ntá chróçhenka ch'an sín kixin chrókuihya sín ntihi chrókjuasótehya sín kixin imá náxrxónhaya ntihi", mé ichro ch'an. ²⁹ Kjánchó kjuátehe ch'in Abraham ntáçro ch'an kixin: "Ó chóna sín tí nkehe tsikjin ch'in Moisés la ko tí sín k'uechronka itén Dios ósé a. Chrókuinhin sín tí nkehe tsintáçro tí sín a", ichro ch'an. ³⁰ Ntá ntáçro tí ch'in a inaá kixin: "Náhi, It'eni Abraham. Chrókójina sáçhrókjuitsjehe ijnko chojni tsík'en ntá chrókuitekaon sín chrókuítóhe sín ijie sín", ichro ch'an. ³¹ Ntá ntáçro ch'in Abraham kixin: "Tí tsitekakonhya sín tí nkehe tsintáçro ch'in Moisés la ko tí nkehe tsintáçro tí í so sín tsíchronka itén Dios ósé, ntá kjaxin tsitekakonhya sín kjónté chróçechón ijnko chojni tsik'en chrókjuichronka inaá", ichro ch'an.

17

*Tí kjuaxikaon naxa tjasin chojni jie
(Mt. 18.6-7, 21-22; Mr. 9.42)*

¹ Ch'in Jesús ntáche ch'an tí sín k'uájiko ch'an kixin:

—Xráxín siín nkehe tsjasixín chojni jie. Kjánchó nóa tí nkexro tjasin tí nkehe tsjasixín chojni jie. ² Ichá jina chrókjuincheteýá sín ch'an ijnko xro tsík'óna xroçre chrókjuikákánki sín ntayaon kixin tjasin ch'an tí nkehe tsjasixín jie ijnko çhánjan naxa noehya. ³ Tóxakonhanrá kixin xikahya chrókjuásinrá nkehe.

A ntá tí kichuará chrókjuasinhanrá ch'an ichrén jie chrónixjehérá ch'an chróçhenkará ch'an kixin jehya jina tí xikaha kjuít'ahará ch'an. A ntá tí chrókuitekaon ch'an chrókjuitoxinhin ch'an tí tjenkayáxin ch'an, ntá chrók'uitjáyánhanrá tí nkehe kjuít'ahará ch'an. ⁴ Kjónté chrókjuasinhanrá ch'an jie yato veces jnkokoá yaon la ko yato veces chróntáçro ch'an kixin í xikahya tsjasin ch'an jie inaá, la t'ichjánxin ts'itjáyánhanrá tí nkehe kjuít'ahará ch'an tí xikaha ntáçro ch'an.

Tí kjuachaxin chónani kixin tinkáchónkini Cristo

⁵ Ijnko yaon tí sín k'uájiko Ìnchéni ntáche sín ch'an kixin:

—Tjínkítsani kixin antsí chrókuinkáchónkini tí jaha —ichro sín.

⁶ A ntá Ìnchéni ntáçro ch'an kixin:

—Kjónté intsí chrókuinkáchónkirá tí janhan éxi jíéxin ijnko tje ntsí kuènte nta mostaza la jina chrókuétuenhénrá tí nta sicómoro kixin chrók'uaxrxenkixin tí tjen ntihi sáçhrókjui chróçenkaxin jnkosiné ntayaon ntiha, a ntá tí nta la chrókjuinchexiteýá tí xikaha chróntáçrorá.

Nkexrí chrókuinchesteyá tí nkexro ch'e xra

⁷ Jnkojin tí jahará tí chróchontará ijnko nkexro t'ahará xra, a ntá tí chrókjanxin ch'án nontaará kjuínchentá ch'án nche o k'uáyakonhen ch'án tí ko kuéntará, ¿á chróntácherá ch'án kixin senó chrókjuak'e ch'án chrókjone ch'án? ⁸ Kjá náhi. Kjá chrókuétuenhénra ch'án kixin senó chrókjuinchestján ch'án tí nkehe sinte la ko chrókóyaxínhin ch'án kixin tsjanjon ch'án nkehe nachrohe chrókjonte la ko chrók'uia. A ntá tsjixin sinte la ntá tsjak'e ch'án sine ch'án la ko its'i ch'án. ⁹ ¿Á chrókjuancheherá ch'án kjuasáya kixin kjuínchesteyá ch'án tí nkehe kuétuenhénra ch'án? Kjá náhi. ¹⁰ Mé kjaxin xikaha tí jahará tió chrókjuixin kaín tí xra k'uétuanhanrá Dios chróntáchrohyará kixin jina kjuích'erá xra kixin ó jehó tí nkehe k'uituanhanrá kjuínchesteyará, tsixrorá.

Ch'ín Jesús kjuínchekitohe ch'án jina ite chojni chóna chinlepra

¹¹ Ntá sátsji ch'ín Jesús chjasin Jerusalén ntá k'uátsinka ch'án nó estado Samaria la ko estado Galilea. ¹² Ntá kjuíji ch'án ijnko chjasin ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín ¹³ ntá itsen k'uíyehé sín ch'án ntáchro sín kixin:

—Jesús, Maestro, tikonóehéni kaín ni —ichro sín.

¹⁴ Ntá k'uikon ch'ín Jesús tí jehe sín ikjín tjejó sín ntáche ch'án sín kixin:

—Sátsjirá tjákehérá tí sín nchat'á kixin ó kuitohará jina, ichrorá.

Nachrohe sákjuí sín tinkákitohe sín jina. ¹⁵ Ntá ijnko tí jehe sín tió kónohe ch'án kixin kuitohe ch'án jina ntá kjan ch'án chjéhe ch'án kjuasáya Dios la itsen nixja ch'án. ¹⁶ Kjuák'exín toh'ín ch'án chrínki tqté ch'ín Jesús k'uísén ch'án xrákjanyani ch'án nonte kixin kjuanchia ch'án kjuasáya. A ntá tí ch'ín a mé tsikjixín ch'án estado Samaria. ¹⁷ A ntá ch'ín Jesús ntáchro ch'án kixin:

—¿Xá jehya ite chojni kuitohe jina? ¿Xá kjá tí sín ina? ¹⁸ ¿Á jehó tí ch'ín i kjónté ikjín tsikjixín ch'án ikjan ch'án kjuanchehe ch'án kjuasáyé Dios ní? —ichro ch'án.

¹⁹ A ntá ntáche ch'án tí ch'ín a kixin:

—T'ínkatjen sátsjia. Kixin tí kuitekáván Dios la kuitohe jina —ichro ch'án.

Itsi tí kjuachaxién Dios

(Mt. 24.23-28, 36-41)

²⁰ A ntá tí sín fariseo kjuanchankíhi sín tí ch'ín Jesús kixin nkesá tsi tí kjuachaxin kuénte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuénte Dios la me tíha ijnko nkehe xitjahya ts'ikon chojni.

²¹ Xitjahya tsontáchrórá kixin: “Ntíhi tjen,” o “Ntíha tjen”; kixin tí kjuachaxin kuénte Dios itjen jnkosiné tí tjejórá —ichro ch'án.

²² Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkojin yaon chrók'uikonrá tí Xjeen Dios K'óna Chojni, ntá í ts'ikonhyará ch'án. ²³ Tsontáchro sín kixin ntíhi tjen ch'án, o ntíha tjen ch'án. Kjánchó sáchrókjuíhyará la ko chróchréhyará sín. ²⁴ Kixin éxi ts'ikonrá tsjonkixin ts'inkaséyanxín kuénté nkajní mé xikaha tsónhen tió itsi tí Xjeen Dios K'óna Chojni. ²⁵ T'ichjánxin senó tsjasóte ch'án nchónhya la ko tí sín siín jie tsitekakuenhya sín ch'án. ²⁶ Éxi kónhen tí yaon kjuák'e ch'ín Noé mé xikaha tsónhen tió tsokjan tí Xjeen Dios K'óna Chojni. ²⁷ K'uékjine sín la ko k'uék'i sín la ko kótehe tí xjeen sín. A ntá xrínghya kui tí yaon k'uixenhen ch'ín Noé tí ntabárcó ntá k'uániá chrin, a ntá tí sín kuitohe ntója la kaín sín k'uitjáyán sín.* ²⁸ Mé kjaxin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjincheki sín nkehe la ko k'uék'enka sín nontee sín la ko k'uékjich'ena sín nchia. ²⁹ A ntá tí yaon k'uaxrjéxín ch'ín Lot tí chjasin Sodoma, na mé nkajní kuíxín xrohi la ko azufre, na mé tíha k'uénxín kaín xín tí sín ntíha.† ³⁰ Mé xikaha tsónhen tí yaon itsi tí Xjeen Dios K'óna Chojni.

³¹ A ntá tí yaon i tí tjejó jnkojin nkexro chrítaón nchia tjejó't'ok'éhe sín, a ntá ichrén nkehe chóna sín kuitohe sín nkaxenhen nchia la í chrók'uinkajínhya sín chrókuakitsje sín tí nkehe chóna sín, tjoka sáchrókjui sín ókjé. Kjaxin xikaha jnkojin chojni tjejó sín nontee sín la í chrókjanhya sín ntqé sín. ³² Xráxinkáonrá nkehe kónhen ichjien ch'ín Lot.‡ ³³ Tí nkexro tjinkaon kixin kohya nkehe chrókónhen na mé ts'itjáyán. A ntá tí nkexro chrókjuinchest'itjáyánxín asén kixin chróchronka itén Dios la mé tsaá. ³⁴ A ntá tsontáxrjan kixin tí tie a jnkokoá ts'ejóua yaá chojni la ijnko la sátsji la ko tí í jnko la tsitqhe. ³⁵ Yaá chojni chjin its'o sín jnkokoá, la ijnko la sátsji la ko ijnko la tsitqhe. ³⁶ Yaá chojni ts'ejóch'e sín xra nonte, la ijnko la sátsji a ntá ijnko la tsitqhe —ichro ch'án.

³⁷ Ntá kuínhin sín tíha ntá kjuanchankíhi sín ch'án kixin:

—¿Xá nketí tsónhen tíha, Inchéni? —ichro sín.

* 17:27 17.26–27 Génesis 6.5—7.24 † 17:29 17.28–29 Génesis 18.20—19.25 ‡ 17:32 Génesis 19.26

Ἀ ntá jehe ch'án kjuátehe ch'án ntáchro ch'án káxin:

—Tí tjen tí cuerpo kuènte chojni tsík'en la mé ntiha tsojnkotsé tí kontexjuen —ichro ch'án.

18

Ch'in Jesús kjuíncheyóexin ch'án éxi ijnko tjan k'án la ko ijnko ch'in juez

¹ Ἀ ntá ch'ín Jesús kjuíncheyóexin ch'án kjuakoxin ch'án káxin jnkochrín chronixjehe chojni Dios la ko chrókóxrjéhya sín. ² Ntá ntáche ch'án sín káxin:

—Ijnko chjasin kjuák'e ijnko ch'in juez kjuikosáyehya ch'án Dios la ko k'uéchóntehya ch'án kjuasáyé ninkexró. ³ Kjaxin chjasin ntiha kjuák'e ijnko tjan k'án, jnkoyaxón sákjuitsjehe tjan tí ch'in juez kjuanchia tjan jie ntáchro tjan káxin chrókuitóexin káxin ijnko chojni nínkakonhen tjan ntiha. ⁴ Nchónhya veces tjitsjehe tjan tí ch'in juez la chrohya ch'án chrókjuichkitóexin ch'án. Ntá chr'éxin kjuenkayáxin ch'án ntáchro ch'án káxin: “Kjóté í tsjikosáyáhya Dios la ko ninkexró tsjikosáyáhya ⁵ a ntá tí tjan k'án jnkoyaxón tjanchia tjan jie, la tsjínkítsa tjan tsitóexin tí jie tjanchia tjan káxin í jnkoyaxónhya itsi tjan tsochronòa tjan káxin ó kjuixin kónínkavan jie”, ichro ch'án.

⁶ Ntá ntáchro Inchéni káxin:

—Mé xikaha ichro tí ch'in juez jínahya. ⁷ ¿Xá chrókjuinkítsahya Dios tí sín kjueyá ch'án tí chróchronóehé sín ch'án nchakotjin la ko tie? ¿Á tjokahya chrókjuatehe chrókjuinkítsa sín ch'án? ⁸ Ntáxrjan káxin kjá tjoka chrókjuinkítsa sín ch'án. Ἀ ntá tíó itsi tí Xjeen Dios K'óna Chojni, ¿á naxá chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'in Jesús kjuíncheyóexin ch'án éxi ijnko ch'in fariseo la ko ijnko ch'in nchekjènkj

⁹ Ntá ch'in Jesús kjuíncheyóexin ch'án nixjehe ch'án iso chojni tjenkayáxin sín káxin imá jina sín a ntá tí í so sín la náhi, ichro sín. Ntá ntáchro ch'án káxin:

¹⁰ —Iyó sín ntoa sákjuj nkaxenhen njnko káxin tsonixjehe sín Dios. Ijnko la fariseo la ko ijnko la ch'in nchekjènkj. ¹¹ Ἀ ntá tí ch'in fariseo tjexin ch'án toté ch'án nixjehe ch'án Dios ntáchro ch'án káxin: “It'èni Dios, kjuasáya tjahá káxin jeheni la chóntahyani jie éxi tí sín í so káxin teé sín la ko ch'iyehé kichó sín la ko ch'iyehé sín chojni chjin. Kjaxin jeheni la jehya éxi tí ch'in nchekjènkj tjinhin. ¹² Jeheni la nehanyi iyó yaon jnkojnko semana la ko kjaxin tjanjonni tí chichaon tjachani tí diezmo kuèntá”, ichro ch'án. ¹³ Ἀ ntá tí ch'in nchekjènkj la imá kjín kuitóhe ch'án kóxakonhen ch'án chrókonta ch'án nkajni la mé chjéhe ch'án ntakuin ch'án ntáchro ch'án káxin: “It'èni Dios tjikonóhéni tí jeheni káxin nchónhya jie chóntani”, ichro ch'án. ¹⁴ Tjonkará káxin tí ch'in nchekjènkj tió kjan ch'án ntóe ch'án la Dios kujkonóehé tí jehe ch'án la kjuínhin ch'án tí jie chóna ch'án, a ntá tí ch'in fariseo la náhi. Káxin káin chojni nchehnkehe asén káxin imá jina tí jehe sín la mé imá tsóntsi. Ἀ ntá tí chojni nchehnkehya asén la imá ts'ánki tí kjuaxrexinkaon kuènte sín.

Ch'in Jesús kjuíncheyoan ch'án chánjan

(Mt. 19.13-15; Mr. 10.13-16)

¹⁵ Kjaxin kjuíkao sín chánjan ntsínsi tí tjen ch'in Jesús káxin chrókjuincheyoan ch'án xjan. Kjánchó tíó k'uíkón tí sín k'uájiko ch'án la í kjuanjonhya sín kjuachaxin káxin tsochjinako sín xjan. ¹⁶ Ἀ ntá ch'in Jesús k'uíyehé ch'án sín ntáchro ch'án káxin:

—Tjtohéra chánjan méhe xrakoa tí tjèn janhan la t'ínkakuènyará xjan káxin tí sín kuènte kjuachaxin kuènte Dios la mé tóyóhe tí jehe xjan. ¹⁷ Ntá chaxin ntáxrjan káxin tí nkexro ts'ónahya éxi ijnko chánjan xitjahya ts'ejó sín tí ts'etóan Dios tí kjuachaxin kuènte ch'án.

Ijnko ch'in ntasoá ríco kjuínixjehe ch'án tí ch'in Jesús

(Mt. 19.16-30; Mr. 10.17-31)

¹⁸ Ijnko ch'in t'etóan kuènte njnko kjuanchankíhi ch'án tí ch'in Jesús káxin:

—Jaha la ijnko maestro jina la, ¿nkehe naxá t'itjáyan chrókjuich'eni káxin chróchóntani kjuachón jnkochrín? —ichro ch'án.

¹⁹ Ntá kjuátehe ch'in Jesús ntáchro ch'án káxin:

—¿Nkeuènte ntáchrua káxin jina tí janhan? Jnkokóá nkexro la mé jina la tíha mé Dios.

²⁰ Jaha la ó noha nkehe tí k'uetóan Dios káxin chrókjuacheéhya kichuárá, la ko chrók'oyánhya chojni, la ko chrókueghya, la ko chróntáchrohya ninkehó nkehe chaxínhya kuènte ókjé chojni, la ko chrókjuikosáyehé it'á la ko iná —ichro ch'án.

²¹ Ἀ ntá jehe ch'án kjuátehe ch'án ntáchro ch'án káxin:

—Káin tíha kjuínchexityáni desde xjanntsíni —ichro ch'án.

²² Ἀ ntá kuínhin ch'in Jesús káin tíha ntá jehe ch'án ntáchro ch'án káxin:

—Ἀ ntá jnkokóá nkehe naxá t'itjáyan chrókjuich'e, chrókjuinchekjia káin nkehe chonta la chróchjéhe tí chichaon tí sín nóa. Ἀ ntá tí nkehe tjete la tsochonta nkaya nkajni. Ἀ ntá tíó tsjixin sjnchekjéonhén sín nkehe, a ntá tsjihá ntá chréhe tí janhan —ichro ch'án.

²³ A ntá tí ch'ín a kuínhin ch'án xíkaha la kóxakonhen ch'án kixin imá itsjé nkehe chóna ch'án. ²⁴ Tió k'uikon ch'ín Jesús kixin kóxakonhen tí ch'ín a la ntá ntáchro ch'án kixin:

—Imá xrá kixin tí chojni chóna itsjé nkehe chrók'uixenhen sín tí tjen Dios t'etóan. ²⁵ Antsí xrähya chrók'uatásinka ijnko kocamello ijnko tjar'i ntachica tjexrja, a ntá antsí má xrá kixin ijnko chojni chóna itsjé nkehe chrók'juak'e tí t'etóan Dios —ichro ch'án.

²⁶ A ntá kuínhin sín kixin xíkaha ntáchro ch'án ntá ntáchro sín kixin:

—¿Xá nkexro chrók'juacha chrókuaá? —ichro sín.

²⁷ Ntá ntáchro ch'ín Jesús kixin:

—Tí nkehe tsjachahya chojni chrók'juinhexiteyá, la Dios la tsjacha ch'án sich'e ch'án kain tíha —ichro ch'án.

²⁸ A ntá ch'ín Pedro ntáchro ch'án kixin:

—Ínchéni, jeheni la ó kuítóheni kain nkehe chónani kixin tsochréheni tí jaha —ichro ch'án.

²⁹ Ntá kjuátéhe ch'ín Jesús ntáchro ch'án kixin:

—Ntá chaxín tsojtjonkará kixin jnkojinrá chrók'juítógherá ntóa, la o chrók'juítógherá it'á la ko iná, la o chrók'juítógherá kichuárá, la o chrók'juítógherá ichjiánrá, la o chrók'juítógherá xjaanrá kixin chrók'juich'erá xrá kuénte Dios ³⁰ la antsí nkehe ts'ayégherá ntíhi chjasintajni la ko tí chr'éxin la ts'ayégherá kjuachón jnkochrixin —ichro ch'án.

Ch'ín Jesús chrónka ch'án inaá kixin its'en ch'án

(Mt. 20.17-19; Mr. 10.32-34)

³¹ Ntá ch'ín Jesús k'uíyehé ch'án jehó tí teyó sín k'uájiko ch'án ntá chrónka ch'án kixin:

—Íjie sátsjini Jerusalén. A ntá ntaha tsoxiteyá kain tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni. ³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxínhin sín ch'án la ko ntate sín tsíkjte sín ch'án. ³³ Tsjate sín ch'án, a ntá chr'éxin la ts'oyán sín ch'án. A ntá níxin yaon tsoxechón ch'án —ichro ch'án.

³⁴ A ntá jehe sín la ninkehó kienxínhya sín tí nkehe níxja ch'án kixin tíha ijnko nkehe naxá tsjachahya sín chrókienxín sín.

Ch'ín Jesús kjuínchekitohe ch'án jina ijnko chojni t'ikonhya chjasin Jericó

(Mt. 20.29-34; Mr. 10.46-52)

³⁵ A ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntja tjetjaxin ijnko ch'ín t'ikonhya tjanchak'á ch'án. ³⁶ Ntá xrinähya kuínhin tí ch'ín t'ikonhya kixin sí'tsínsinka nchónhya chojni, ntá kjuanchankí ch'án kixin:

—¿Xa nkerí sí'tónhen? —ichro ch'án.

³⁷ Ntá chénka sín ch'án kixin ch'ín Jesús tsíkjin chjasin Nazaret ts'atsínka ch'án ntíha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjenixian ch'ín David, tikonóghéni —ichro ch'án.

³⁹ A ntá tí sín tsítaón ntja la k'uétuénhen sín ch'án kixin tsojtání ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjenixian ch'ín David, tikonóghéni —ichro ch'án.

⁴⁰ A ntá ch'ín Jesús ntá ntahó kjuák'echónhen ch'án ntá k'uétóan ch'án kixin tsjikakjin sín tí ch'ín a. Ntá tió kuíkáo sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátéhe tí ch'ín t'ikonhya ntáchro ch'án kixin:

—Jaha Inchéni, tjinkaonni chrók'juinçek'ikuanni —ichro ch'án.

⁴² Ntá ntáchro ch'ín Jesús kixin:

—Ó ts'ikuan. Ó kuítóha jina kixin kuítekávan tí janhan —ichro ch'án.

⁴³ Ntá tuénxín k'uikon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kain tí sín k'uikon kixin xíkaha kónhen kjuanchehe sín kjuasáyé Dios.

19

Ch'ín Jesús la ko ch'ín Zaqueo

¹ A ntá ch'ín Jesús k'uixenhen ch'án chjasin Jericó la ntá k'uátsínka ch'án tí chjasin a. ² A ntá ntíha tjen ijnko chojni rico it'ín ch'án Zaqueo, t'etuénhen ch'án tí sín nchekjènkí. ³ Tjinkaon ch'án chrók'juatsoan ch'án nkexro tí ch'ín Jesús, kjánchó nchónhya chojni síin la xitjahya t'ikon ch'án kixin intsí ch'án. ⁴ Ntá kuinká ch'án kuítaón ch'án ntja kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús.

⁵ A ntá tió k'uátsínka ch'ín Jesús ntíha kontá ch'án tí nta ntáchro ch'án kixin:

—Zaqueo, tjoka tjasinkajían kixin ntóa ntahó tsitóna jie —ichro ch'án.

⁶ Ntá ch'ín Zaqueo la tjoka k'uínkajin ch'án kóchéhe ch'án. ⁷ Ntá kaín sín k'uíkon sín xíkaha ntá kjuankáxin sín tjonta sín tí ch'ín Jesús, ntáchro sín káxin ntqje ijnko chojni chóna nchónhya jie tsitohe ch'án. ⁸ Ntá ch'ín Zaqueo kjuák'exín toté ch'án ntáche ch'án Ìnchéni káxin:

—Jaha Ìnchéni, chrókónoha káxin tsjánjuan jnkqsiné tí nkehe chonta sántakítqñhan tí sín nòa. A ntá tí jnkójin nkexro kjuít'áyahá kuaáha la noó veces ts'okjanhan sín tí chichaon jie —ichro ch'án.

⁹ A ntá ntáchro ch'ín Jesús káxin:

—A ntá jie la tsaá chojni tí nchia i káxin tí ch'ín a mé k'uaxrjeníxin ch'ín Abraham. ¹⁰ A ntá tí Xjeen Dios K'óna Chojni mé kuikjeyá la ko sinchekaá tí chojni chóna jie.

Ch'ín Jesús kjuíncheyóexin ch'án éxi ite chichaon imá tjete sínkí

¹¹ A ntá tí chojni síin ntiha nachrohe tjejótinhin sín nkeri tjechro ch'ín Jesús, a ntá jehe ch'án kjuíncheyóexin ch'án nkehe káxin ó tjen ch'án chjinaxón chjasin Jerusalén, a ntá jehe sín kjuenkayáxin sín káxin tí kjuachaxin kuénte Dios la ách'e ó tuénxin tsí, ichro sín. ¹² A ntá ntáchro ch'án káxin:

—Itjen ijnko nkexro tsik'axrjeníxin ijnko nkexro imá k'uék'etqan. Ntá sákjuí ch'án ókjé naciòn káxin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá. ¹³ A ntá tíó chjina sátsji ch'án ntá k'uíyehé ch'án ite tí sín ch'ehe ch'án xra ntá chjéhe ch'án jnkqjnkó tí jehe sín jnkqjnkó chichaon imá tjete sínkí. Ntá k'uetqan ch'án káxin: “Tsjankáxinrá ch'ekoará xra tí chichaon hasta tí tsokjanjian”, ichro ch'án. ¹⁴ A ntá tí sín chjasén ch'án ntiha imá kónínkakonhen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín síin ntiha káxin tjínkakonhya sín tí nkexro a ts'óna rey ts'etqñhen sín. ¹⁵ Kjónté xíkaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetqan ch'án xrakoa tí sín ch'ehe ch'án xra, na mé tí sín tsik'áyéhe tí chichaon, káxin tsoñohe ch'án nkehe tí xra kjuích'eko sín tí chichaon k'uáyéhe sín. ¹⁶ A ntá tí ch'ín xrankíxixín kóchjina la ntáchro ch'án káxin: “Tí chjíchqan la kjuachani ite chichaon inaá”, ichro ch'án. ¹⁷ A ntá kjuátqhe tí ch'ín rey káxin: “Ó nchqxon tí xíkaha jaha la ijnko chojni jina ch'e xra. Jina kjuích'e xra kjónté jehya xra jie ntá tsjánjuan kjuachaxin tsétoan ite chjasin”, ichro ch'án. ¹⁸ A ntá kóchjina tí ch'ín í jnko a inaá ntáchro ch'án káxin: “Tí chjíchqan la kjuachani in'ó chichaon inaá”, ichro ch'án. ¹⁹ A ntá xíkaha inaá kjuátqhe tí ch'ín rey káxin: “Tsjánjuan kjuachaxin tsétoan in'ó chjasin”, ichro ch'án. ²⁰ A ntá kóchjina tí ch'ín nixin ntáchro ch'án káxin: “Tí chjíchqan la tjínhin. K'uánkintani panítóeni ²¹ káxin chrakonhanni káxin jaha la jiáha la tjínkáván tsájká tí nkehe jehya jaha kjuaké la ko tsotja tí nkehe jehya jaha kuénkaxian”, ichro ch'án. ²² A ntá tí rey ntáchro ch'án káxin: “Jehya chojni jina ch'e xra jaha. Tí nkehe ntáchrúa tsjáncháxian jie. Jaha la ó noha káxin jiena janhan tsájkáa tí nkehe kjuakéhya, ichrúa, la ko tsotja tí nkehe kuénkahya. ²³ Ntá nkekuénte káxin chr'anhya tí chichaon ijnko banco chrókjuích'exín xra? A ntá tíó kjan ntqna la antsí tsjé chichaon chrók'uayáha tí chrókjuacha káchó ch'á”, ichro ch'án. ²⁴ A ntá ntáche ch'án tí sín síin ntiha káxin: “Takítsjehérá ch'án tí chichaon tsik'áyéhe ch'án la ntá chjehérá tí ch'ín chóna ite chichaon”, ichro ch'án. ²⁵ A ntá jehe sín ntáchro sín káxin: “¿Nkekuénte chrók'uáyéhe ch'án káxin ó chóna ch'án ite chichaon?” ichro sín. ²⁶ A ntá tí ch'ín rey kjuátqhe ch'án ntáchro ch'án káxin: “Kjónté jnkójin nkexro itejé chóna la ts'áyéhe má. A ntá tí nkexro chónthaha la kjónté tí ntsí chóna ch'án la ts'axrjehe ch'án. ²⁷ A ntá tí sín nínkakonna sín tjínkakonhya sín káxin ts'ónana rey la xrákoará sín ntihi ts'íkqñxin kuñ ts'ochrínjinrá kja sín.”

Ch'ín Jesús k'uíxnenhen ch'án chjasin Jerusalén

(Mt. 21.1-11; Mr. 11.1-11; Jn. 12.12-19)

²⁸ Tíó kjuíxin ntáchro ch'ín Jesús tíhi ntá chríin ch'án sátsji ch'án chjasin Jerusalén. ²⁹ A ntá ó kjuíji chjinaxón tí chjasin Bettagé la ko chjasin Betania chjinaxón tí jna nchek'in sín Olivo, ntá k'uetqñhen ch'án iyó tí sín k'uájiko ch'án ³⁰ ntáche ch'án sín káxin:

—Sátjirá tí chjasin ntsí chok'exín ntihi, a ntá tíó tsjasánrá ntiha ts'itjará ijnko kolocho tjechroé va naxá ninkexró tjíták'áhya va. Tjasintankehérá va la tsjúkuanárá va ntihi. ³¹ A ntá tí jnkójin nkexro tsjanchankíhará nkekuénte tjasintankehérá va la ntácherá sín káxin: “Ìnchéni ts'ichjánxinhin va”, tsixrorá.

³² A ntá tí sín k'uítuennen sákjuí sín k'uitja sín éxi ntáchro ch'án. ³³ A ntá tíó tjejótsjantqñhe sín va la ntá tí sín Ìnché va kjuanchankíhi sín káxin:

—¿Nkekuénte tjasintankehérá tí kolócho? —ichro sín.

³⁴ A ntá jehe sín kjuátqhe sín káxin:

—Ìnchéni ts'ichjánxinhin va —ichro sín.

³⁵ Ntá sákjuíkohe sín va tí ch'ín Jesús, la ntá tí iké sín kjuínchekamá sín va, ntá kjuíták'á ch'ín Jesús tí kolócho a. ³⁶ A ntá tinkákji tí kolócho tjejen ch'án la tinkák'ikjínxin sín tí iké sín ntja káxin nátaón tí ka ts'atsínka tí kolócho tjejen ch'án. ³⁷ Ntá tíó kjuíjichjina sín tí chjinaxón tí

t'inkajinxin chojni tí jna Olivo, a ntá kaín tí sín kuítekaon tí jehe ch'án chréhe sín kjuankíxin sín itsen nixja sín chéhe sín kjuanchehe sín kjuasáyé Dios kíxin kaín tí kjuaxroan k'uifkonxín kon sín. ³⁸ Ntá ntáchro sín kíxin:

—Jína tí nkexro Rey kjuixín kjuachaxin ihnjé Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

³⁹ A ntá iso tí sín fariseo tjejóyáqjan sín í so chojni tjejonchexroan sín ntiha ntáchro sín kíxin: —Maestro, tétuénhen tí sín chréhe tí jaha kíxin tsotáni sín —ichro sín.

⁴⁰ A ntá ch'ín Jesús kjuátehe ch'án ntáche ch'án sín kíxin:

—A ntá tí sín í tsotáni sín la ixró tsotsje —ichro ch'án.

⁴¹ A ntá tió kjujichjina ch'án chjasin Jerusalén ntá k'uifkon ch'án tí chjasin la ntá tsjánka ch'án kíxin kuítekakonhya sín ⁴² ntáchro ch'án kíxin:

—Chrókuiénxinrá la ko chrókónohará nkexrí chrók'uayéxinrá tí kjuaxróxin, kjánchó jahará kuítekákonyará. A ntá ó kjuixín k'uátsínka tí kjuaxróxin chrók'uikonrá la xitjahya ts'ikonrá jie. ⁴³ A ntá tsi iso yaon jínahya itsi tí sín nínkakonhanrá la sich'éna sín ijnko tját'q ts'ántatjen tí chjasin tjejórá ntihi ts'ínkákonyen kíxin xitjahya ts'axrjéxinrá chjasin ntihi kíxin nkuíxín ts'ejó sín ts'ínkákonyenrá sín ⁴⁴ ntá ts'óxika sín kaín tí tját'q síin ntihi la ko ts'óyán sín kaín tí chojni síin la ko tsítqehya sín kíxin nínkehó xró naxá ts'ejóqjen kíchó, kíxin jahará kjuátsqanhyará kíxin kuitsjehe Dios tí chjasin tjejórá ntihi.

Ch'ín Jesús kjuínchetjóá ch'án nkaxenhen nínko

(Mt. 21.12-17; Mr. 11.15-19; Jn. 2.13-22)

⁴⁵ A ntá ch'ín Jesús k'uixenhen ch'án tí nínko jie, a ntá kjuankíxin ch'án kuakitsje ch'án tí sín nchekji nkehe la ko tí sín t'ena nkehe ntiha. ⁴⁶ Ntá ntáchro ch'án kíxin:

—A ntá ntáchro xroon itén Dios chrónka kíxin: “Tí ntqna i mé it'ín nchia tsonixjanaxián chojni”,* ichro. A ntá jahará tí nchia i tsikjich'énará itjuéé xíchqe —ichro ch'án.

⁴⁷ A ntá tí nínko ntiha kjuák'e ch'ín Jesús kjuako ch'án kaín yaon. A ntá tí sín nchát'á t'etqan la ko tí maestro tjako tí ley la ko kjáxin tí sín t'etqan tí chjasin ntiha kjuéyá sín nkexrí chrók'óyán sín ch'án. ⁴⁸ Kjánchó k'uitjahya sín nkexrí chrók'óyán sín ch'án kíxin kaín chojni tjejótinhin tí nkehe tjechronka ch'án.

20

Tí kjuachaxin chóna ch'ín Jesús

(Mt. 21.23-27; Mr. 11.27-33)

¹ A ntá ijnko yaon kjuák'e ch'ín Jesús tí nínko ntiha kjuaqohé ch'án chojni tí tan jína tsaáxin sín. A ntá kjui tí sín nchát'á t'etqan la ko tí sín maestro tjako tí ley la ko kjáxin tí sín t'etqan kuénte nínko. ² Ntá kjuanchankíhi sín ch'án kíxin:

—Chronka nkehe tí kjuachaxin chonta kíxin xíkaha ch'e. ¿Nkexro kjuanjon tí kjuachaxin a? —ichro sín.

³ Ntá kjuátehe ch'ín Jesús ntáchro ch'án kíxin:

—Kjáxin janhan tsjánchánkihará ijnko nkehe siná nkexrí tsjateherá. ⁴ ¿A ntá nkexro k'uetqenhen tí ch'ín Juan kíxin tsíkite ch'án chojni? ¿Á Dios ní q chojni ó? —ichro ch'án.

⁵ Ntá kjuankíxin sín tjo sín kíchó sín ntáchro sín kíxin:

—¿Nkehe chrókjuateheni? A ntá tí tsontáchroni kíxin Dios tsích'án tí ch'ín Juan la ntá tsjanchankí ch'án kíxin nkeuente kuítekakuenhyani ch'án. ⁶ A ntá tí tsontáchroni kíxin chojni ó k'uetqenhen sín ch'án la ntá kaín chojni tsónínkaon sín la ixró ts'óyánxin sín kíxin tjenkayáxin sín kíxin ch'ín Juan chaxín k'uékjako ch'án itén Dios —mé xíkaha ikjo sín.

⁷ Ntá kjuátehe sín kíxin noehya sín nkexro tsích'án tí ch'ín Juan. ⁸ Ntá ntáchro ch'ín Jesús kíxin:

—Kjáxin janhan tsqxrxankahya nkexro kjuanjon kjuachaxin tjét'á tíhi —ichro ch'án.

Ch'ín Jesús kjuíncheyóexin ch'án éxí tí sín ch'ehya xra jína

(Mt. 21.33-44; Mr. 12.1-11)

⁹ Ntá tuénxín kjuankíxin ch'ín Jesús nixjehe ch'án chojni kjuíncheyóexin ch'án ntáchro ch'án kíxin:

—Kjuák'e ijnko chojni k'uénkaxin ch'án nta to uva tí nontqee ch'án, a ntá chr'éxin kjuínchekjen ch'án tí iso tí sín ch'e xra. A ntá kjuixín ntá sákjuí ch'án imá sé. ¹⁰ A ntá kui tí yaon tsakjinjin sín to uva. Ntá k'uetqenhen ch'án ijnko nkexro ch'ehe ch'án xra kíxin tsilkjanchehe ch'án tí sín ch'e xra nontqee ch'án kíxin tsjanjon sín tí to tónhen ch'án tocar. A ntá jehe sín kjuate sín tí ch'ín la ntá k'uinkité sín ch'án la nínkehó tsíchjéhya sín ch'án. ¹¹ A ntá tí ch'ín nontqee ichr'án ch'án ijnko nkexro ch'ehe ch'án xra. A ntá kjáxin k'uántaxínjin sín ch'án la ko kjuate sín ch'án la ko kjáxin nínkehó tsíchjéhya sín ch'án inaá. ¹² A ntá tí ch'ín

* 19:46 Isaías 56.7

nontee ichr'án ch'án í jnko nkexro. A ntá tí sín ch'e xra kjaxin xikahó tsíkijch'ehe sín inaá, tsík'inkité sín ch'án.

¹³ Ntá tí ch'ín nontee ntáchro ch'án kixin: “¿Nkexrí chrókjuít'a jie? Tsochr'an tí xjanna imá tjuahá. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án. ¹⁴ A ntá kjónté kui ch'án la k'uikon tí sín ch'e xra ntá chénka sín kichó sín kixin: “Tí ch'ín i mé ts'áyéhe ch'án kaín nkehe kuènte it'é ch'án. Ts'óyánni ch'án kixin jeheni tsitqekoni kaín tí nkehe a,” ichro sín. ¹⁵ A ntá kuakitsjexin sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kixin:

—A ntá tí inché nonte la, ¿nkehe chrókjuich'e ch'án kixin xikaha kónhen tí xjeen ch'án? ¹⁶ Chrókui ch'án chrókjuinchek'itjáyán ch'án tí sín ch'e xra kixin xikaha kjuich'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

¹⁷ A ntá ch'ín Jesús komá ch'án tí jehe sín ntáchro ch'án kixin:

—¿A ntá nkehe t'axrjexin tí nkehe ntáchro xroon itén Dios ntáchro xjikihi?:

Tí xro náxrxónhya kuitqenta tí sín ch'éna tjat'o, a ntá mé jie k'óna tí xro tjetooan.*

¹⁸ A ntá jnkojin chojni tsjitsinka chrítaón tí xro i tsokuen ch'án. A ntá ts'ánótjen tí xro i tsoxratja ijnko chojni la tsokuen, ts'óna nche.

Tí xra tsjenkehe sín gobierno

(Mt.21.45-46; 22.15-22; Mr.12.13-17)

¹⁹ A ntá tí nchat'a t'etqan la ko tí maestro tjako tí ley tjinkaon sín chrótsé sín tí ch'ín Jesús tuénxin tí hora a kixin ó kónohe sín kixin jehe sín kuakitsjexin tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni sín. ²⁰ Ntá k'uetuenghen sín chojni tsotsáyehe sín ch'án, éxi kixin chóna kjuasáyé ch'án chrókjo sín ch'án jnkóinna kixin ách'e ichrén nkehe ntoáhya tsonixja ch'án. A ntá jína tsjanchaxín sín jie tsjikaán sín ch'án tí tjen tí ch'ín gobernador. ²¹ Mé xikaha kjuanchankíhi sín ch'án nkehe, a ntá ntáchro sín kixin:

—Maestro, ó noheni kixin kaín nkehe ntáchrúa la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios. ²² A ntá jie la chrónka, ¿á jína chrókjueñeheni tí gobierno romano o náhi? —ichro sín.

²³ A ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin: —¿Nkeuènte chrokuachaxínrání? ²⁴ Tjákonará ijnko tí chichaon méhe. ¿Nkexro tí tsík'axrjexin tjenkání tí chichaon i la ko nkexro ihníé chóna méhe? —ichro ch'án.

Ntá kjuátéhe sín kixin:

—Tí ch'ín t'etqan mé tjenkání ch'án —ichro sín.

²⁵ Ntá ntáchro ch'án kixin:

—Chróchjehérá tí ch'ín gobierno t'etqan tí nkehe kuènte ch'án; a ntá tí nkehe kuènte Dios chróchjehérá Dios —ichro ch'án.

²⁶ A ntá ninkehó kjuachahya sín kjuachaxín sín ch'án tí nkehe ntáchro ch'án nkayakon chojni chjasin ntiha. A ntá chrakon sín kuínhin sín kaín nkehe kjuátéhe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kixin á tsoxechón chojni

(Mt.22.23-33; Mr.12.18-27)

²⁷ A ntá chr'éxin iso tí sín saduceo sákjuitsjehe sín tí ch'ín Jesús. Kjánchó tí sín saduceo titekakonahya sín kixin tsoxechón chojni tsík'en. Xikaha ntáche sín tí ch'ín Jesús kixin:

²⁸ —Maestro, ch'ín Moisés tsíkjin ch'án tí xroon ley ntáchro kixin tí ts'en ijnko chojni la ntá tsitqhe ichjién, tí chóntahya sín xjeen, la t'ichjánxin kixin kichó tí ch'ín tsík'en tsotéhe tí tjan k'án kixin tsochóna sín xjeen sín éxi xjeen tí ch'ín sao tsík'en ts'íkon sín.† ²⁹ A ntá k'uéjó sín yato sín jnkokoá kichó sín. A ntá tí ch'ín sao la kótehe ch'án. Ntá k'uén ch'án la chóntahya ch'án ninkehó xjeen ch'án. ³⁰ A ntá tí ch'ín yóxin kichó ch'án la kótehe tí tjan k'án. Kjaxin k'uén ch'án chóntahya sín xjeen sín. ³¹ A ntá tí ch'ín nixin xíkótehe jehe tjan inaá. Kjaxin xikaha kayatoé sín. Kaín sín k'uén sín ninkehó xjeen sín chóntahya sín. ³² A ntá kjuixixín kjaxin jehe tjan ik'uén tjan. ³³ A ntá tió tsoxechón chojni tsík'en, ¿ntá nkexro tí jehe sín ts'óna ichjién tí jehe tjan kixin yato tí jehe sín kótehe tjan? —ichro sín.

³⁴ Ntá ch'ín Jesús kjuátéhe ch'án ntáchro ch'án kixin:

—Ntíhi chjasintajni tí chojni ntoa la ko tí chojni chjin tótehe sín takja kichó sín. ³⁵ A ntá tí sín kuitekaon sín tí janhan ntá tsjacha sín tsoxechón sín inaá la í tsotéheya sín la koi tsoteehya tí xjeen sín. ³⁶ Kixin tí sín a la xitjahya ts'en kixin éxi tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín. ³⁷ Kjaxin ch'ín Moisés tío chrónka ch'án kuènte tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Inchéni

* 20:17 Salmo 118.22 † 20:28 Deuteronomio 25.5

Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.† 38 Tí Dios i la jehya tinkáchónki tí sín tsík'en. Náhi. Tí Dios i la tinkáchónki tí sín tjejóhón, la Dios la t'íkon ch'án káin kaín chojni la síhón —ichro ch'án.

39 A ntá iso tí sín tjako tí ley la ntáchro sín káin:

—Jína kjuàkua la ko jína ntáchrua, Maestro— ichro sín.

40 A ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

41 Ntá ntáchro ch'ín Jesús káin:

—¿Nkexrí káin ntáchro sín káin tí Cristo mé ts'axrjenínin tí ch'ín David? 42 A ntá ch'ín David ikjin ch'án tí libro Salmos la ntáchro ch'án káin:

Ínchéni Dios ntáche tí Ínchéni káin:

“Tjak'e tjaná chjina ntiho tsétōan

43 tsjixinjian kaín xín tí sín nínkakonhan la tsjachahya sín ts'etōan sín káin jahvá mé tsétōan.”§

44 ¿Xá nkexrí káin Cristo chrók'óna it'é David, káin jehe David kuikítexín ch'án Ínché ch'án tí Cristo? —ichro ch'ín Jesús.

Ch'ín Jesús kjuanchia ch'án jie tí sín tjako tí ley

(Mt. 23.1-36; Mr. 12.38-40; Lc.11.37-54)

45 Kaín chojni tjejótinhin sín nixjehe ch'ín Jesús tí sín k'uájiko ch'án ntáchro ch'án káin:

46 —Chrókóxakonhanrá chrókuankíehyará tí sín maestro tjako tí ley. Tóxrjínhin sín chrók'uinkáya sín ka káinjin la ko tjínkaon sín káin kaín chojni chrókjuikosáyehe sín tsoxeta sín ntasin la ko tjejá sín silla antsí náxrjón chrók'uejóyá sín nkaxenhen nínko la ko tjejá sín káin jína chrók'uejó sín tí sátsji sín kía, 47 la ko kjaxin takitsjehe sín ntōe tí chojni chjin k'án. A ntá kjuixin kjuich'iyehé sín chojni ntá náxrjón nixjehe sín Dios. A ntá jehe sín antsí má sinchekjasóte sín Dios káin xíkaha kjuich'ia sín.

21

Tí chichaon kjuanjon ijnko tjan k'án nòa

(Mr. 12.41-44)

1 A ntá tí nkaxenhen nínko ch'ín Jesús k'uíkon ch'án káin tí sín ricó kjuikao sín chichaon chr'áxehen sín tí ntacajón tjetóxroyéya chichaon. 2 A ntá kjaxin k'uíkon ch'án ikjui ijnko tjan k'án nòa la ntá jehe tjan chr'áxehen tjan yaá chichaon ntsíntí. 3 Ntá ntáchro ch'ín Jesús káin:

—La chaxín ntáxrjan káin tí tjan k'án i nòa tjan kjánchó antsí tjehe sínkí tí chichaon kjuanjon tjan káin kaín asén tjan kjuanjon tjan, a ntá tí sín kjuanjon nchónhya la náhi. 4 Káin kaín tí chichaon kjuanjon sín la chichaon síxèhe sín. A ntá jehe tjan kjónté nòa tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáchro ch'án káin tí nínko ts'itjāyan

(Mt. 24.1-2; Mr. 13.1-2)

5 Iso sín tjejóto sín káin nkexrí tsjehe nínko tsík'óna xro náxrjón la ko í so nkehe tsíkjanjon chojni éxi ijnko nkehe chjéhe sín Dios. A ntá ch'ín Jesús ntáchro ch'án káin:

6 —A ntá tsi ijnko yaon tí nínko tjejokomará ntihi la tsoxíka. A ntá tsokohya ninkehó xro ts'ejókjen kichó ínaá —ichro ch'án.

Tí nkehe tsōnhen tí naxa ts'itjāyanhya chjasintajni

(Mt. 24.3-28; Mr. 13.3-23)

7 Ntá kjuanchankíhi sín ch'án káin:

—Maestro, ¿nkesá tsōnhen tíha? ¿Nkexrí tsōnhen tí tsōnoexínni tí nkehe tsōnhen? —ichro sín.

8 Ntá ntáchro ch'ín Jesús káin:

—Chrókóxakonhanrá tjtóéhyará sit'áyahará chojni. Nchónhya chojni tsi tsontáchro sín káin jehe sín tí Cristo, tsixro sín, la ko tsontáchro sín káin: “Ije mé tsoxiteyá tsōnhen.” Kjónté xíkaha tsontáchro sín la chrókuitekákuenhyará tí jehe sín. 9 A ntá tío tsinhínrá tsontáchro chojni káin ó sín kjuanáincaon tjanjonko kichó sín, kjónté xíkaha naxa chróchrakonhyará káin kaín tíha t'ichjánxin ts'atsínka senó tí naxa tsjixixínhya ts'itjāyan chjasintajni —ichro ch'án.

10 Naxa tjechrónka ch'án ntáchro ch'án káin:

—Ijnko nación la tsjanjonko í jnko nación la ko ijnko chjasin tsjanjonko í jnko chjasin. ¹¹ Kjaxin imá tñjan tsínki nonte la ko tsokjinta la ko tsoníhi chojni nchónhya chjasin, a ntá nkajní nchónhya kjuachrakon jié ts'ixin ts'ikon chojni.

¹² Naxá ts'atsinkahya tíha la tsonínkakonhanrá sín tsotsérá sín sátsjikoará sín tí nínko tsjanchia sín jié la ko sátsjikoará sín ts'íkjarahá la ko sátsjikoará nkayakon tí sín rey la ko tí sín gubernador kixin tinkachónkirá nina. ¹³ A ntá tí yaon xikaha tsonhen la ts'ixin kjuachaxin kixin tsqchronkará nkexro tinkachónkirá. ¹⁴ Tóxakuanhyará senó nkexrí tsjateherá tí nkehe tsjanchankíhará sín ¹⁵ kixin janhan la tsjánjuan kjuaxrexinkaon jina tsonixjará kixin nijnko tí sín nínkakonhanrá xitjahya tsontáchro sín kixin ntoáhya tí nkehe tsjateherá. ¹⁶ Kixin kjónté it'ará la ko kichuárá la ko tí sín kjéhyará la ko tí sín tjórá jina mé sintakjirá sín. Jehé sín ts'óyán sín jnkojínrá. ¹⁷ Kaín chojni chjasintajni tsonínkakonhanrá sín kixin tinkachónkirá nina. ¹⁸ Kjánchó xikaha la nijnko kaxíhi chóna kjárá ts'itjáyannya. ¹⁹ Tí tsjotéhyará tinkachónkirá tí janhan la tsochontará kjuachón jnkochríxín.

²⁰ A ntá tío ts'ikonrá kixin kuente chjasin Jerusalén tsík'ántatjen sín soldado ntá tsonoaxínrá kixin í séhya ts'itjáyán tí chjasin a. ²¹ A ntá tí sín tjejó sín Judea la t'ichjánxin sátsjixín sín ntiha sátsji sín jnā. A ntá tí sín siín chjasin Jerusalén kjaxin t'ichjánxin sátsjixín sín ntiha la ko tí sín tjejó sín nqnteej sín la í xitjahya tsokjan sín chjasin. ²² Kixin tí yaon ts'ixin tsjasóte chojni tsoxiteyá tsonhen kaín nkehe nijxa xroon itén Dios. ²³ Nòa tí chojni chjin tjejóyá tí yaon a la ko tí sín chóna xjanhnté naxá nchekakí sín. Kixin tí yaon a la ts'ixin kjuatjoté tí chjasin la Dios tsjanjon kjuachaxin kixin imá tsjasóte chojni ntiha. ²⁴ Jnkojínrá ts'énxinrá tí siín kjuanínkaon ntiha la ko jnkojínrá tsotsérá sín sátsjikoará sín sinchekjasótíará kaín tí í so nación. A ntá tí sín jehya judío tsjixín ókjé nación tsinkátja sín chjasin Jerusalén kixin Dios mé tsjanjon kjuachaxin iso yaon xikaha tsonhen. A ntá chr'éxin tsontáchro ch'án kixin: “La í kohya nkehe tsonhen.”

A ntá tío itsi tí Xjeen Dios K'óna Chojni

(Mt. 24.29-35, 42-44; Mr. 13.24-37)

²⁵ A ntá tsonoaxínrá nkexrí tsonhen tí yaon la ko nkexrí tsonhen nitjó la ko nkexrí tsonhen konotse. A ntá chjasintajni tsokohya kjuaxróxin kaín nación la ko tsochrakon chojni kixin imá tsojna nta yaon. ²⁶ A ntá chojni la tsotínhin sín kixin tsochrakon sín tsjenkayáxin sín nkehe tsonhen chjasintajni kixin kaín tí nkehe sínkáni nkajní la tsínki. ²⁷ Ntá xikaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko tjuj tsjkaó ch'án tí kjuachaxin jié kuente nkaya nkajní. ²⁸ A ntá tío tsoxrankixin tsonhen kaín tíha chrókócháhará chrókjuaya kjárá ntá chróntáchrórá kixin kjínhya tjen tí nkexro tsaaxínrá —ichro ch'án.

²⁹ Kjaxin kjuíncheyóexin ch'án í jnko nkehe ntáchro ch'án kixin:

—Tjenkayáxinrá nkexrí siín tí nta t'óna to hígo la ko kaín tí í so nta. ³⁰ Tíó ts'ikonrá kixin tinkák'ayan kahnté tí nta, ntá tsonoaxínrá kixin í séhya ts'ixenhen nchakuen chrin. ³¹ Mé kjaxin xikaha tíó ts'ikonrá kixin kaín tí nkehe sítónhen, ntá tsonoaxínrá kixin tí kjuachaxin kuente Dios la ó chjino tjen.

³² Mé chaxín ntáxrxjan kixin kaín tíhi tsonhen senó naxá t'enhya chojni tjejó jie. ³³ A ntá tí nkajní la ko tí chjasintajni mé ts'itjáyán. A ntá tí nkehe ntáxrxjan la ts'itjáyannya, tsoxiteyá tíha.

³⁴ Chrókóxakonhanrá chrókjuotéhyará kixin chrókjuichróerá kixin tí imá chrókjónterá la ko tí chrókókoanrá. Kixin tí xikaha la ntá titáya tsi tí yaon la chrók'uejochoénhyará. ³⁵ Na mé éxi ijnko trampa xrináhya ts'ikjehe mé xikaha itsi tí yaon a, la ko xikaha tsonhen kaín chojni siín chjasintajni tí ts'ejóchoénhya sín. ³⁶ Méxra listo chrók'uejora la ko chrónixjehérá Dios kaín yaon chrónóehérá ch'án kixin tíó tsi kaín tí kjuaxikaon xikaha la ntá tsjinkjísará ch'án tsaará kixin ntá tsjachará tsqchjineherá tí tjen tí Xjeen Dios K'óna Chojni —ichro ch'án.

³⁷ Ch'ín Jesús kjuák'ekjakoqxín ch'án tí nínko ntiha jnkojínko yaon, a ntá tie la sákjuí ch'án tí jnā nchek'in sín Olivo, la ntaha kuitóhe ch'án. ³⁸ A ntá kaín chojni kóchjina sín tí nínko jnkojínko nchítjen kixin tsinhín sín tí nkehe tsochronka ch'án.

22

Imó kjuenkayáxin sín nkexrí tsotsé sín tí ch'ín Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ntá kuichjina tí yaon kia sine sín tí niotja tjikohya tí xroan t'ánkixin niotja na mé tí kia nchek'in sín pascua. ² Ntá tí nchat'a t'etqan la ko tí sín maestro tjako tí ley kjuenkayáxin sín nkexrí chrók'óyán sín tí ch'ín Jesús kixin chrakonhen sín tí chojni chjasin ntiha.

³ A ntá ch'ín Tsochren k'uixenhen asén ch'ín Judas, mé kjaxin it'in ch'án Iscariote, mé jehé ch'án ijnko tí teyó tí sín k'uájiko ch'ín Jesús. ⁴ Tí ch'ín a mé sákjuitsjehe tí sín nchat'a t'etqan la ko tí sín t'etqan kuente nínko, ikjo kichó sín kixin nkexrí tsjikaán sín tí ch'ín Jesús. ⁵ Ntá

jehe sín kóchéhe sín la ko ntáχρο sín kíxín tsjenkehe sín tí ch'ín Judas. ⁶ Ntá kjuátehe ch'án sinchexiteyá ch'án ntá kjuéyá ch'án nkexrí tsotsé sín tí ch'ín Jesús tí kohya chojni.

Kjuixixin kjoneko sín tí ch'ín Jesús

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ntá ó kui yaon kia sine sín niotja tjikohya tí xroan t'ánkíxín niotja, a ntá t'ichjánxin ts'óyán sín tí kolélo sine sín kuénte tí kia pascua. ⁸ A ntá ch'ín Jesús k'ueguenhen ch'án tí ch'ín Pedro la ko tí ch'ín Juan kíxín sátsji sín sincheyaxín sín tí nkehe sine sín kuénte tí kia pascua. ⁹ Ntá jehe sín kjuanchankíhi sín ch'án kíxín:

—¿Nketí tjinkávan sincheyaxínini? —ichro sín.

¹⁰ Ntá kjuátehe ch'án kíxín:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko tóa tjiá ntá. Chréherá ch'án sátsjirá tí nchia ts'ixenhen ch'án. ¹¹ Tsontácherá tí inché tí nchia kíxín: “Ntáχρο Maestro kíxín: ¿Nketí tjen tí cuarto tsjánjuan kjuachaxin tsoyaxín sineko ch'án tí sín teyó xriko ch'án tí yaon pascua?” tsixrorá. ¹² A ntá jehe ch'án tsjakohará ch'án ijnko cuarto jié tí yóxin piso la ntiha siín nkehe t'ichjánxin, la ntaha sincheyaxínrá tí sineni tsónjin —ichro ch'án.

¹³ A ntá jehe sín sákjuí sín k'uitja sín kaín nkehe éxi tsíchronka ch'ín Jesús. Ntá ntiha kjuincheyaxín sín sine sín kuénte pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uejótjaxín sín tí tjen tí mesa. ¹⁵ Ntá ntáχρο ch'ín Jesús kíxín:

—Imá tjinkávan kíxín tsjasinni kia sinekianrá tí yaon pascua naxa ts'énhya janhan.

¹⁶ Ntáxrjan kíxín sinehya janhan xíkaha inaá tí naxa tsoxiteyáhya tíha tió tsi kjuachaxin kuénte Dios —ichro ch'án.

¹⁷ Ntá kuákja ch'án tí nkehe tjiá inté to uva ntá chjéhe ch'án kjuasáya Dios ntá ntáχρο ch'án kíxín:

—Tákjará tíhi la its'irá kaín rá ¹⁸ kíxín ntáxrjan kíxín xík'ikianhyará tí inté to uva tí naxa tíhya tí kjuachaxin kuénte Dios —ichro ch'án.

¹⁹ A ntá kjuixín ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ó ch'án chjéhe ch'án tí jehe sín ntáχρο ch'án kíxín:

—Tíhi mé cuerpo kuéntana kíxín ts'ényákonhanrá. Mé xíkaha tsoxráxinkákonxínrá tí janhan —ichro ch'án.

²⁰ Kjaxin xíkaha kjuanjon ch'án tí nkehe tjiá inté to uva tió kjuixín kjóne sín la ntáχρο ch'án kíxín:

—Tí nkehe tjiá tí vaso chronkaxín tí nkehe nixin tsónhen tsoxiteyá kíxín tí jnina ts'itji tsotjuáxin tí ijjará.

²¹ Tí nkexro sinchekjina mé tjekjan tí tjen mesa ntihi. ²² Méxra tí Xjeen Dios K'óna Chojni its'en éxi k'uituenhen; kjánchó nóa tí ch'ín sinchekji ch'án kíxín tsjasóte ch'án —ichro ch'án.

²³ A ntá jehe sín kjuankíxín sín tjanchankíhi kichó sín:

—¿Xá nkexro sinchekji ch'án? —ichro sín.

Ikjo sín kíxín nkexro tí imá ts'etqan

²⁴ A ntá jehe sín mé tjo sín kíxín nkexro antsí ts'etqan. ²⁵ A ntá ntáχρο ch'ín Jesús kíxín:

—Tí sín reyes kuénte tí naciones imá t'etqan sín. A ntá tí chojni mé ntáχρο sín kíxín tí sín t'etqan la mé chojni ch'e xra jina. ²⁶ A ntá jahará xíkaha chrókjuich'erá. Íchá jina tí nkexro imá t'etqan chrók'óna éxi tí nkexro antsí ntasoá chróchóxin chrók'uituenhen, na mé tí nkexro t'etqan chrók'óna éxi ijnko nkexro ch'exón xra. ²⁷ A ntá nkexro tí antsí t'etqan, á tí nkexro lámó tjetjaxín tí tjen mesa ntá sine ch'án, ó á antsí t'etqan tí nkexro kuikao tí nkehe sine ch'án? Náhi. Tí nkexro tjetjaxín tí tjen mesa mé antsí t'etqan ch'án. Mé xíkaha janhan tjéncakjánrá éxi ijnko nkexro ch'exón xra tí janhan.

²⁸ Jahará xráxín k'uejótaxínrá k'uikonrá kaín nkehe náxrjónhya kónna. ²⁹ Méxra janhan tsjánjuan kjuachaxin tséqanrá éxi chjina T'aná tí tétqan janhan ³⁰ kíxín sinterá la ko its'irá tí tsjak'e mesa kuéntana tí tséqan janhan nkaya nkajni la ko tséqanrá sinchekitogéxínrá tí ijjé kaín tí sín k'uaxrjenixin tí teyó xjeen ch'ín Israel.

Ch'ín Jesús chrónka ch'án kíxín ch'ín Pedro sinchemá kíxín chónhya tí jehe ch'án, tsixro ch'án
(Mt. 26.31-35; Mr. 14.27-31; Jn. 13.36-38)

³¹ Ntá ntáχρο Ínchéni kíxín:

—Simón, Simón, chrók'ónoha jaha kíxín ch'ín Tsochren kjuanchia ch'án tí jahará chrók'ótsjéyehe ch'án tí jahará éxi noatrigó. ³² Kjánchó janhan xrjanóhah T'aná kíxín jaha chrók'uitogéhya tí tinkachónkia tí janhan. A ntá jaha kjónté tsjásian jie, a ntá tsokjan inaá ts'itjáyanyha tinkachónkia tí janhan ntá sinchekéhé kichuára —ichro ch'án.

³³ A ntá ntáχρο ch'ín Simón kíxín:

—Inchéni, listo tjenni sátsjini ts'ikjéhekoani la jehya ts'ikjéheni ó la kjáxin ts'enkoani —ichro ch'án.

³⁴ A ntá kjuátéhe ch'ín Jesús ntáchro ch'án kíxin:

—Pedro, ntáxrjan kíxin ijie jaí naxá tsjehya kochíntqa sijnchemána iníya kíxin chonhya tí janhan, tsixrua —ichro ch'án.

Ntá ó kuichjina tí hora xikaha tsonhen ch'án

³⁵ Ntá ch'ín Jesús kjuanchankíhi ch'án tí jehe sín kíxin:

—Tió kuétuanhanrá sákjuirá kjuikoahyará kabolsa la ko kjuikoahyará tí nkehe t'inka chichaon la ko kjuikoahyará tokatē na, zá naxá t'itjáyán ichrén nkehe ní? —ichro ch'án.

Ntá kjuátéhe tí jehe sín ntáchro sín kíxin:

—Náhi. Ninkehó nkehe t'itjáyánhya —ichro sín.

³⁶ Ntá ntáchro ch'án kíxin:

—A ntá jie tí nkexro chóna kabolsa la tsakja sátsjiko la ko kjáxin tí nkehe t'inka chichaon. A ntá tí nkexro chónahya chica espada chrókjuinčekji ch'án tí ka t'inkáya ch'án kíxin chrók'ueanaxín ch'án ijnko chica. ³⁷ Ntáxrjan kíxin t'ichjánxin tsositeyá tsóna éxi níxja xroon itén Dios ntáchro kíxin: “Éxi yóhe ijnko chojni kjuasin jie mé xikaha ts'ikon sín ch'án.”* Mé xikaha kaín nkehe chrónka xroon itén Dios kíxin tsóna mé t'ichjánxin tsositeyá —ichro ch'án.

³⁸ A ntá jehe sín ntáchro sín kíxin:

—Inchéni, ntíhi tjejó yaá chica espada —ichro sín.

Ntá kjuátéhe ch'án kíxin:

—Kjóté ó táhó la ó nchoxon —ichro ch'án.

Ch'ín Jesús níxjéxin ch'án Dios tí Huerto Getsemani

(Mt. 26.36-46; Mr. 14.32-42)

³⁹ Ntá ch'ín Jesús sákjuixin ch'án chjasin Jerusalén sákjuí ch'án ijna Olivo kíxin xikaha kuénhen ch'án k'uéqjich'e ch'án la koí tí sín k'uájiko ch'án tinkáchréhe sín. ⁴⁰ Ntá kjuíji sín ntíha ntá ntáchro ch'án kíxin:

—Nixjehérá Dios kíxin tsjinkítsa ch'án tí jahará kíxin tsjásinhyará jie —ichro ch'án.

⁴¹ Ntá ch'ín Jesús k'uaxrjenta ch'án tí jehe sín sákjuí ch'án ijnko kjínxin éxi chrók'ue chojni xro. Ntá kjuak'exín toch'in ch'án kíxin tsonixjehé ch'án Dios. ⁴² Ntá ntáchro ch'án kíxin:

—It'eni, tí tjinkávan chrókjuinčekakaáni kaín nkehe náxrjónhya chrók'uatínkani. Kjánchó jehya éxi tjinkaonni jeheni chrókónhenni. Náhi. Éxi tjinkávan jaha —ichro ch'án.

⁴³ Ntá xrinahya k'uikon ch'án itjen ijnko ángel tsikjixin nkaya nkajní kíxin tsjinkítsa ch'án.

⁴⁴ A ntá imá tóxakonhen ch'án, a ntá ántsi fuerte níxjehé ch'án Dios, ntá k'uixin ch'án ntachjin éxi yóhe jni xikaha k'uitji k'uánótjen nonte.

⁴⁵ Ntá tíó kjuixin níxjehé ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kíxin tjejóua tí jehe sín kíxin kjuachahya sín imá t'avá sín.

⁴⁶ A ntá ntáchro ch'án kíxin:

—¿Nkeuente tjejochrínra? T'áyará. Nixjehérá Dios kíxin tsjinkítsará ch'án kíxin tsjachroe-hyará ch'ín Tsochren —ichro ch'án.

Itsé sín tí ch'ín Jesús

(Mt. 26.47-56; Mr. 14.43-50; Jn. 18.2-11)

⁴⁷ A ntá ch'ín Jesús naxá tjenixja ch'án ntá xrinahya kui nchónhya chojni yamá chica. Tí ch'ín it'in Judas, ijnko tí teyo sín k'uájiko ch'ín Jesús, kuítaón ch'án ntja, ntá kóchjinehe ch'án tí ch'ín Jesús kíxin sineko ch'án kochíto. ⁴⁸ A ntá ntáchro ch'ín Jesús kíxin:

—Judas, zá ijnko kochíto ó sijnčekjixian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'ín Jesús tíó k'uikon sín kíxin xikaha kónhen ntá kjuanchankíhi sín ch'án kíxin:

—Inchéni, zá chrók'uatéxinni sín chica espada? —ichro sín.

⁵⁰ A ntá ijnko tí jehe sín kjuíncheníhi ch'án ijnko ch'ín ch'ehe xra nchat'á t'etqan, kóchrínjin ch'án ntatsjon ch'án chjina.

⁵¹ A ntá ntáchro ch'ín Jesús kíxin:

—Táhó, tjtóhé, ó tjen —ichro ch'án.

Ntá ch'ín Jesús itsé ch'án tí ntatsjon tí ch'ín ch'e xra a, ntá kjuínčekitohe ch'án jína. ⁵² Ntá tuénxin ch'ín Jesús ntáche ch'án tí sín nchat'á t'etqan la ko tí sín t'etqan kuente njnko la ko tí sín táda t'etqan mé tí sín tsiki sátsjiko sín ch'án ntáchro ch'án kíxin:

—¿Nkeuente k'uinkakoará chica espada la ko inta éxi chrótsgrá ijnko xichee? ⁵³ A ntá kaín yaon kjuak'é janhan k'uejóni kjuákoáxinrá tí njnko ntíha la ninkehó tsehyará tí janhan. A ntá jie mé tí hora kuéntará ntá kjuacha tí kjuachaxin kuente sítí —ichro ch'án.

* 22:37 Isaías 53.12

Ch'in Pedro kjuínchemá ch'án kixin chónhya ch'án tí ch'in Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Ntá itsé sín tí ch'in Jesús kjuínchenteto sín ch'án sákjuiko sín ch'án ntöe nchät'á t'etöan. A ntá ch'in Pedro ikjín tinkáchréhe ch'án. ⁵⁵ A ntá tí ntásin ntiha kjuaka sín xrohi síxrohe sín. A ntá ch'in Pedro kjaxin kjuák'entaxín ch'án tí tjejó sín ntiha. ⁵⁶ A ntá ijnko tjachjin ch'e xra tió k'uikon tjan kixin koí ch'in Pedro tjechjixrohe ch'án ntiha ntá komá tjan tí jehe ch'án ntá ntáchro tjan kixin:

—Kjaxin tí ch'in i xriko tí ch'in Jesús —ichro tjan.

⁵⁷ Ntá ch'in Pedro kjuínchemá ch'án ntáchro ch'án kixin:

—¿Nkekuénte xikaha ichrua jaha? Ni chonhya tí nkexro a —ichro ch'án.

⁵⁸ A ntá antsíkoá chr'éxin ikui í jnko chojni k'uikon tí jehe ch'án ntá ntáchro kixin:

—Kjaxin jaha xríkoa tí nkexro a —ichro.

Ntá ch'in Pedro ntáchro ch'án kixin:

—Náhi, janhya —ichro ch'án.

⁵⁹ Ntá éxi ijnko hora chr'éxin ntá nixja í jnko ch'in chénka tí í so sín kixin:

—Tí ch'in í chaxín xriko tí ch'in Jesús kixin kjaxin tsikjixín ch'án estado Galilea —ichro ch'án.

⁶⁰ Ntá ntáchro ch'in Pedro kixin:

—Nonahya janhan nkehe tí ntáchrúa —ichro ch'án.

Ntá tuénxín naxá tjenixja ch'án ntá xrínahya ó tsje kochíntöa. ⁶¹ Ntá Ìnchéni kuinkátjía ch'án komá ch'án tí ch'in Pedro. Ntá ch'in Pedro xraxinkaon ch'án kixin xikaha tsíchronka Ìnchéni kixin: “Naxá tsotsjehya kochíntöa sìnchemána iníya.”[†] ⁶² Ntá ch'in Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'in Jesús

(Mt. 26.67-68; Mr. 14.65)

⁶³ Tí sín sákjuiko ch'in Jesús kjuanoá sín ch'án la ko kjuate sín ch'án. ⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

⁶⁵ La ko í so nkehe ntáchro sín k'uántaxínjin sín ch'án.

Ntá sákjuiko sín tí ch'in Jesús nkayakon tí sín t'etöan

(Mt. 26.59-66; Mr. 14.55-64; Jn. 18.19-24)

⁶⁶ A ntá kóyaon nchakotjin la kójnksé kaín tí sín táda t'etüenhen tí sín judío, la ko tí nchät'á t'etöan, la ko tí sín maestro tjako tí ley la sákjuiko sín tí ch'in Jesús nkayakon tí sín imá t'etöan. Ntá ntiha kjuanchankíexín sín ch'án kixin:

⁶⁷ —Ijie la chronka, ¿á jaha tí Cristo? —ichro sín.

Ntá jehe ch'án kjuátehe ch'án kixin:

—Tí tsontáxrjan kixin chaxín janhan na tsitekákonhyará. ⁶⁸ A ntá tí chrókjuánchánkíhará ichrén nkehe la chrókjuáteehyará la ko chrók'uatjántahyarána. ⁶⁹ A ntá jie tí Xjeen Dios K'óna Chojni mé tsjak'etjaxín tí tja chjina kuénte Dios chóna kaín xín kjuachaxin —ichro ch'án.

⁷⁰ A ntá tuénxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'in Jesús ntáchro ch'án kixin:

—Chaxín janhan xikaha ntáchrórá tí jahará —ichro ch'án.

⁷¹ Ntá kjo sín kichó sín kixin:

—¿Nkehe tsonhen naxá chróchrónka í so chojni? Jeheni kaín ni kuínhinni nkehe k'uaxrxéxin ir'va ch'án —ichro sín.

23

Sákjuiko sín tí ch'in Jesús nkayakon tí ch'in Pilato

(Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uinkatjen sín ntá sákjuiko sín tí ch'in Jesús nkayakon tí ch'in Pilato. ² A ntá ntiha kjuankixin sín t'eka sín jie tí jehe ch'án ntáchro sín kixin:

—K'uitjani tí nkexro í tjachroe ch'án chojni nación kuénténi ntáchro ch'án kixin chrókjuenkeehyani tí gobierno romano, la ko kjaxin ntáchro ch'án kixin jehe ch'án mé Cristo ch'án, na mé ijnko rey tíha —ichro sín.

³ A ntá ch'in Pilato kjuanchankíhi ch'án tí ch'in Jesús ntáchro ch'án kixin:

—¿Á jaha tí Rey t'etüenhen tí sín judío a ní? —ichro ch'án.

Ntá ch'in Jesús kjuátehe ch'án ntáchro ch'án kixin:

—Chaxín xikaha ntáchrúa jaha —ichro ch'án.

† 22:61 Lucas 22.34

4 **A** ntá ch'ín Pilato ntáche ch'an tí sín nchat'á t'et'otan la ko tí chojni tsíkikao sín kixin:

—T'itjáhya nijnko jie ch'óna tí nkexro i —ichro ch'án.

5 **A** ntá jehe sín antsí itsen nixja sín ntáchro sín kixin:

—Tjachroe ch'án kaín xín chojni estado Judea kixin tí nkehe tjako ch'án. Kjuankixin ch'án kjuako ch'án estado Galilea, a ntá jie ó kui ch'án ntihi la xikaha tjako ch'án —ichro sín.

Sákjuiko sín tí ch'ín Jesús nkayakon tí ch'ín Herodes

6 **A** ntá kuínhin ch'ín Pilato xikaha ntáchro sín ntá kjuanchankí ch'án á tí ch'ín i la á Galilea tsíkixín ch'án. 7 **A** ntá kjuátehe sín kixin ntaha tsíkixín ch'án, ntá k'uet'otan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxin ch'án tjen ch'án chjasin Jerusalén tí yaon a. 8 **A** ntá ch'ín Herodes k'uúikon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrók'juaqxín ch'ín Jesús. 9 Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteheya ch'án. 10 Kjaxin ntiha k'uejé tí sín nchat'á t'et'otan la ko tí sín maestro tjako tí ley la ntá nchónhya jie k'ueka sín ch'án kixin nínkakonhen sín ch'án.

11 **A** ntá ch'ín Herodes la ko tí sín soldado kuènte ch'án kjuankixin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrxón éxí t'inkáya tí sín rey. **A** ntá tuénxin ch'ín Herodes k'uet'otan ch'án kixin sátsji ch'án inaá tí tjen ch'ín Pilato. 12 **A** ntá tí yaon a ch'ín Pilato la ko ch'ín Herodes kjuankixin sín tjuèhe kíchó sín kixin tí senó la k'uénkakonhen kíchó sín.

K'uet'otan sín kixin its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

13 **A** ntá ch'ín Pilato k'uúyehé ch'án tí nchat'á t'et'otan la ko tí sín gobernador la ko kaín chojni chjasin ntiha kixin tsojnkotsé sín 14 ntá ntáche ch'án sín kixin:

—Jahará kjuikuánará tí nkexro i ntáchrórá kixin ntoáhya tjakohe ch'án chojni kixin chrókónínkakonhen sín tí gobierno. Kjánchó janhan kjuánchánkíha ch'án itsjé nkehe kuínhínrá ntá k'uúkonrá kixin k'uitjahya ninkehó tí jie tékará ch'án. 15 La ko kjaxin ch'ín Herodes k'uitjahya ch'án tí jie tékará tí ch'ín Jesús ntá chr'án ch'án inaá ntihi. Ó k'uúkonrá kixin ninkehó jie ch'óntahya ch'án chrók'uenxín ch'án. 16 Sín'takjasóte ch'án ntá chr'éxín tsjánjuan kjuachaxin sátsji ch'án —ichro ch'án.

17 **A** ntá tí yaon kia a la t'ichjánxin kixin ch'ín Pilato tsjanjon kjuachaxin sátsji ijnko chojni tjechjina kixin xikaha kuènnen sín ósé. 18 Ntá kaín sín kjuankixin sín k'óyako sín ntáchro sín kixin:

—¡Tí nkexro la náhi! ¡Ch'ín Barrabás mé t'atjánta! —ichro sín.

19 **A** ntá ch'ín Barrabás tsík'ikjéhe sín ch'án kixin jehe ch'án la ko i so chojni kónínkakonhen sín tí chjasin ntiha la ko tsík'óyán ch'án chojni. 20 **A** ntá ch'ín Pilato tjinkaon ch'án chrók'juanjon ch'án kjuachaxin sáchrók'jui ch'ín Jesús. **A** ntá xíkjanchánkíhi ch'án tí chojni sín ntiha inaá. 21 Kjánchó jehe sín antsí má tsen k'óyako sín ntáchro sín kixin:

—¡Tjakékanirá ch'án ntacruz! ¡Tjakékanirá ch'án ntacruz! —ichro sín.

22 Níxin xíkjanchankí ch'ín Pilato ntáchro ch'án kixin:

—¿Xá nkehe ntoáhya kjuích'e ch'án? Janhan la k'uitjahya ninkehó jie ch'óna ch'án chrók'uenxín ch'án. Sín'takjasóte ch'án la ntá chr'éxín tsjánjuan kjuachaxin sátsji ch'án —ichro ch'án.

23 Kjánchó jehe sín antsí tsen kjuanchia sín ntáchro sín kixin chrók'juaq'enkání ch'án ntacruz. **A** ntá k'óyako sín la ko k'óyako tí sín nchat'á t'et'otan ntá kjuacha sín kjuanchia sín tí nkehe tsonhen. 24 **A** ntá ch'ín Pilato kjuanjon ch'án kjuachaxin xikaha tsonhen tí nkehe kjuanchia sín. 25 **A** ntá kjuanjon ch'ín Pilato kjuachaxin sátsji tí ch'ín Barrabás éxí kjuanchia sín, na mé tí ch'ín k'uúkjéhe sín kixin k'uekje ch'án kjuanínkaon la ko k'uek'óyán ch'án chojni. **A** ntá ch'ín Pilato kjuanjon ch'án kjuachaxin kixin sátsjiko sín tí ch'ín Jesús sinchekjasóte sín ch'án éxí tjinkaon sín.

Kjuak'enkanı sín ch'án ijnko ntacruz its'en ch'án

(Mt. 27.32-44; Mr. 15.21-32; Jn. 19.17-27)

26 **A** ntá tió sákjuiko sín ch'ín Jesús tsjak'enkanı sín ch'án ntacruz, ntá itsé sín ijnko ch'ín tsíkixín chjasin Cirene it'in ch'án Simón, mé kjuixín ch'án nqntee ch'án, ntá kjuínchekamá sín ch'án tí ntacruz tsjak'enkání ch'ín Jesús la tinkáchréhe ch'án.

27 Kjaxin chréhe nchónhya chojni ntoa la ko nchónhya chojni chjin chréhe sín tsjánkamá sín ch'án. 28 Kjánchó ch'ín Jesús nkátjía ch'án komá ch'án tí jehe sín kixin tsjánka sín ntáchro ch'án kixin:

—Jahará chojni chjin chjasin Jerusalén, chrótsjankamahýará tí janhan. Chrótsjankará kixin tí nkehe tsonhanrá jahará la ko xjaanrá. ²⁹ Kixin itsi yaon tsonáchorá kixin náxrjón tí sín chóntahya xjan la ko tí sín kjuínchekokjéhya xjan la ko tí sín kjuínchekakíhya ninkehó xjan. ³⁰ Ntá tsjankixin chojni tsonáche sín tí jnã kixin tsoxrátja sín la ko tsonáche sín tjo kixin tsjavá sín. ³¹ Kjóté tí nta yoa la ó sítónhen kaín tíhi la íchá tíó chróxamá tí nta la ñnkehe tí kaá chrókónhen tí nta tsixámá? —ichro ch'án.

³² Kjaxin sákjuiko sín iyó sín tsíkjasin jie kixin ts'oyángo sín ch'ín Jesús. ³³ Ntá tíó kjuíji sín tí jnã tikítexin sín tí jnã Nta Hueso Kja Chojni, na mé ntiha kjuak'enkani sín ch'ín Jesús tí ntacruz la ko kjaxin tí iyó sín chóna jie, la ijnko la tja ch'án chjina la í jnko la tja ch'án kjon tjejóyáni sín ntacruz kjaxin. ³⁴ Ntá tíó kjuixin kjuak'enkani sín tí ch'ín Jesús tí ntacruz ntá nixjehe ch'án tí It'é ch'án Dios ntáchro ch'án kixin:

—It'éni, tónínkáuenhya sín kixin tí nkehe kjuích'ehe ni sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikeyehe sín iké ch'án ch'exín sín suerte kixin tsonoxén sín nkexro tsakja tí ka a. ³⁵ Kaín chojni chjasin ntiha tjejótsjehe sín kixin xikaha sítónhen la ko kjaxin tí sín t'etóan tjanoá sín tí jehe ch'án ntáchro sín kixin:

—Kjuínchekaá ch'án ókjé chojni, a ntá jie jehe ch'án chrókjuínchekaá ch'án asén ch'án tí chaxín jehe ch'án tí Cristo tí nkexro tsíkjeýá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kuikao sín xranvino náxrjónhya chjéhe sín ch'án chrók'ui ch'án, ³⁷ ntáche sín ch'án kixin:

—Tí jaha chaxín rey kuénte tí sín judío ntá jahvá chrókjuínchekaá asán —ichro sín.

³⁸ Kjaxin ntiha ikja tí ntacruz kjuak'enkani sín ijnko ntachiso ntsí tsíkjin sín nkíva griego la ko nkíva latín la ko nkíva hebreo ntáchro kixin: “Tíha mé Rey kuénte tí sín judío”, ichro.

³⁹ Ijnko tí sín chóna jie tjenkáni ntacruz k'uántaxínhin ch'án tí ch'ín Jesús ntáchro ch'án kixin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

⁴⁰ A ntá tí ch'ín jnko a k'uetuenhen tí í jnko ch'ín a kixin tsotáni ch'án, ntáchro ch'án kixin:

—Ntáchrohya xikaha. ¿Á chrakuenhya Dios kixin xikaha ichrua kixin kjaxin jeheni na ó tjejótjasóteni? ⁴¹ Yóini na nchoxon tjejótjasóteni tjejótjenkani tí jie kjuasinni. A ntá tí nkexro í ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

⁴² Ntá ntáchro ch'án kixin:

—Jesús, xráxinkávan tí janhan tíó ts'ayéhé kjuachaxin tsétóan jaha —ichro ch'án.

⁴³ Ntá kjuátéhe ch'ín Jesús ntáchro ch'án kixin:

—Chaxín ntáxrjan kixin ijie jaí ts'ejóko kichó ní nkaya nkajní —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonkixin. A ntá k'uixin tie kuenté chjasintajni hasta las tres kónjin. ⁴⁵ Ik'uén yaon, la ko tí ka t'ínkáuénxin nkaxenhen njnko k'uichje jnkosiné. ⁴⁶ Ntá ch'ín Jesús k'uéya ch'án itsen ntáchro ch'án kixin:

—It'éni tjen nkaya nkajní, jaha ts'ayéhé asénni —ichro ch'án.

Xikaha ichro ch'án ntá k'uén ch'án.

⁴⁷ A ntá k'uikon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáchro ch'án kixin:

—Chaxín tí nkexro la jína la ninkehó jie chóntahya —ichro ch'án.

⁴⁸ A ntá kaín tí chojni tsikójnkotsé ntiha k'uikon sín xikaha kónhen ntá sákjuixin sín ntiha chakon sín tjate sín ntakuin sín kixin xikaha kónhen. ⁴⁹ A ntá kaín tí sín chóxin ch'ín Jesús la ko kjaxin tí chojni chjin k'uékinkáchónki sín ch'án tsíkjin sín estado Galilea ikjin tjejó sín tjejótsjehe sín nkerí sítónhen.

Sákjuíjavá sín tí ch'ín Jesús

(Mt. 27.57-61; Mr. 15.42-47; Jn. 19.38-42)

⁵⁰ A ntá ntiha tjen ijnko ch'ín it'ín José, chjasén ch'án mé Arimatea estado Judea. Kjaxin jehe ch'án ijnko tí sín imá t'etóan kuénte tí sín judío, jehe ch'án mé ijnko nkexro jína. ⁵¹ Jehe ch'án kjuak'échónhen ch'án itsi tí kjuachaxin kuénte Dios. Méxra kóxrjénhya ch'án nkexrí kjuích'e tí sín í so t'etóan. ⁵² Méxra sákjuítsjehe ch'án tí ch'ín Pilato kjuíkjanchia ch'án tí cuerpo kuénte ch'ín Jesús. A ntá ch'ín Pilato kjuanjon ch'án kjuachaxin. ⁵³ Ntá sákjuí sín tsjinkajjnxin sín ch'án ntacruz. Ntá kjuixin kjuinkajin sín ch'án ntá kjuínchek'ísímá sín ch'án ijnko ka jie, ntá sákjuiko sín tsoxravá ch'án ijnko tóye xráxin tsíkjih'éna ch'ín José jehó tjo la ko naxa ninkexró tsíxraváhya ntiha. ⁵⁴ Kaín tíha kónhen tí yaon viernes kónjin. Tí yaon mé tjejóyáxinhin sín kixin í séhya tsoxrankixin tí yaon t'ok'éhe sín sábado kixin kohya kjuachaxin sich'e sín ninkehó xra.

⁵⁵ A ntá tí chojni chjin nkáchréhe kjuikoxín ch'ín Jesús estado Galilea kjaxin sákjuiko sín sákjuitsjehe sín tí tóye tsoxravá ch'án la ko k'uikon sín jina nkexrí kjuak'e sín tí cuerpo kuénte ch'án. ⁵⁶ A ntá tío kjan sín tí nchia tjejó sín k'óyaxínhin sín kjueyá sín xroqan xraxé náxrxón itsa ntóe ch'án kixin xikaha k'uékinkáchónki tí sín judío. A ntá k'ok'éhe sín tí yaon sábadó éxi t'etqan tí ley.

24

Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

¹ Tí yaon domingo, mé tí yaon xrankíxixín semana tí chojni chjin na xikjan sín inaá tí tsíxravá ch'ín Jesús sákjuiko sín xroqan xraxé tsík'ena sín. La ko í so chojni chjin sákjuikotoxin sín. ² Ntá ó kjuíji sín ntiha k'uikon sín tí xro tsíkjèxín tí tóye la í xikahya tjen tí sákjuí sín. ³ Ntá k'uixenhen sín tóye ntá k'uitjahya sín cuerpo kuénte Ínchéni Jesús. ⁴ Ntá chrakon sín ntá noehya sín nkehe sich'e sín. Ntá xringhya k'uikon sín iyó chojni ntoa tjejóxin tóte chjinaxón tí tjejó sín, la iké sín la tjákiní tsjehe. ⁵ A ntá tí chojni chjin kjuínchek'isén kja sín tjejótsjehe sín nonte kixin imá chrakon sín, a ntá tí chojni ntoa ntáchro sín kixin:

—¿Nkekuénte xritjéyará tí nkexro tjechón tí síin tí sín tsík'en? ⁶ Tjenhya ch'án ntihi la ó xechón ch'án. Xráxinkáonrá nkehe ntáchro ch'án tí kjuak'e ch'án estado Galilea ⁷ ntáchro ch'án kixin jehe ch'án tí Xjeen Dios K'óna Chojni t'ichjánxin tsotsé tí sín chóna jie tsjak'enkanı sín ch'án ntacruz la ko tí nixin yaon tsoxechón ch'án inaá —ichro sín.

⁸ A ntá tí síchjin xráxinkaon sín kixin nkexrí tsíchronka ch'ín Jesús, ⁹ a ntá tío kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín. ¹⁰ A ntá tí sín sákjuichenka tí sín apóstol la mé tjan María Magdalena la ko tjan Juana la ko tjan María iné ch'ín Jacobo la ko tí í so chojni chjin. ¹¹ A ntá tí sín apóstol kuínhin sín éxi ijnko nkehe chaxínhya tí nkehe chrónka tí jehe sín ntá kuítেকakonhya sín.

¹² Kjánchó ch'ín Pedro k'uaxrxjén ch'án nchia tinká ch'án sákjuitsjehe ch'án tí tsíkjixravá ch'ín Jesús. Ntá kjuíji ch'án k'uikon ch'án tí nkaxenhen tóye k'uikon ch'án kixin jehó tí ka tsík'ismá ch'án ntaha tjen. Ntá kjan ch'án tí nchia tjen ch'án chrakon ch'án kixin xikaha tsíkónhen.

Tí ntja Emaús sákjuí sín la kjuíjichréhe Ínchéni

(Mr. 16.12-13)

¹³ A ntá tí yaon a iyó sín sákjuí sín ijnko chjasin ntsí it'in Emaús, mé kjinxin tejnko kilómetro tí chjasin Jerusalén. ¹⁴ Tinkákjo sín kichó sín kixin kaín tí nkehe tsíkónhen tí chjasin Jerusalén. ¹⁵ A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuiko sín ch'án. ¹⁶ Kjonté k'uikon sín ch'án la kjuanjonhya Dios kjuachaxin kixin chrókjuatsqan sín tí jehe ch'án. ¹⁷ A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntja? ¿Nkekuénte kixin t'avará? —ichro ch'án.

¹⁸ A ntá ijnko tí jehe sín mé it'in Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuak'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

¹⁹ A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkjixín ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxín ch'án kjuachaxin kuénte nkaya nkajni kaín tí nkehe k'uékjich'e ch'án la ko kaín nkehe k'uéntáchro ch'án mé xikaha k'uikon Dios la ko k'uikon tí chojni. ²⁰ A ntá tí ncha'tá t'etqan la ko tí sín gobierno kjuínchek'áyéhe sín ch'án kixin its'en ch'án la tsjak'enkanı sín ch'án ntacruz. ²¹ A ntá jeheni k'uejóchónhenni kixin jehe ch'án chrókjuínchekáá ch'án tí sín Israel. A ntá jie ó chóna iní yaon xikaha kónhen. ²² A ntá iso chojni chjin kjaxin k'uékinkáchónki sín ch'án kjuínchekrakon sín tí jeheni kixin jehe sín tsíkjitsjehe sín tí tsíxravá ch'án imá nchítjén ²³ la mé tsík'itjahya sín tí cuerpo kuénte ch'án, ntá kjan sín chrónka sín kixin tsík'ikon sín iyó sín ángel chrónka sín kixin ch'ín Jesús la tjechón ch'án, ichro sín. ²⁴ Ntá tuénxín iyó tí sín k'uájikoni kjaxin sákjuitsjehe sín tí tsíxravá ch'án la kuik'itja sín éxi chrónka tí chojni chjin, kjánchó ch'ín Jesús la k'uikonhya sín —ichro tí yaá sín a.

²⁵ Ntá kjuátehe ch'ín Jesús ntáchro ch'án kixin:

—Lontjrá jahará la tjokahya kuítেকáonrá tí nkehe k'uéchronka tí sín profeta k'uejó ósé. ²⁶ ¿Xá t'ichjánxinhya chrókjuasóte Cristo senó ntá chrók'uíyéhe ch'án tí kjuachaxin chrók'uetqan ch'án? —ichro ch'án.

²⁷ Ntá kjuankáxin ch'án chronkaxín ch'án nkexrí t'axrjexín kaín tí nkehe nixja xroon itén Dios káxin nkehe tsonhen tí jehe ch'án la mé kjuankáxin ch'án chronkaxín ch'án tí nkehe tsíkjin ch'ín Moisés la ko kjuíntaxín chronkaxín ch'án tí nkehe tsíkjin tí í so sín profeta.

²⁸ Ntá kjuíji sín tí chjasín ntsí a, a ntá ch'ín Jesús tsjehe ch'án éxí naḡa sáchrókjui ch'án kjin.

²⁹ A ntá jehe sín mé chronóḡe sín ch'án káxin ntahó chrókuitḡe ch'án, ntáχρο sín káxin:

—Titoḡa ts'ejóni ntihi káxin ntá ó kóntó la ó ts'ixitie —ichro sín.

Ntá ch'ín Jesús la k'uixenhen ch'án nchia káxin tsitḡeko sín ch'án. ³⁰ A ntá tjejótjaxínko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niotja la kjuanchehe ch'án kjuasáyé Dios la kóchrít'ḡ ch'án kuákja tí jehe sín. ³¹ Ntá tuénxín xraxinkaon sín ntá kjuátsoan sín tí jehe ch'án. Ntá tuénxín k'uitjáyankoá ch'án. ³² Ntá jehe sín itjo sín kíchó sín ntáχρο sín káxin:

—¿Á chaxínhya chéḡe asénni tí kuíkaoñi ch'án ntja káxin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

³³ Ntá tuénxín k'uíntatjen sín kjan sín chjasín Jerusalén. A ntá ntaha k'uitja sín tí tejnko sín jnkoḡá tjejó sín la ko tí í so sín. ³⁴ A ntá tí sín ntiha chrónka sín káxin:

—Chaxín tjechón Inchéni la mé ch'ín Simón tsík'ikon ch'án tí jehe ch'án —ichro sín.

³⁵ Ntá jehe sín kjaxín chrónka sín nkehe tsíkónhen tí ntja sákjuí sín káxin nkexrí kjuátsoanxín sín tí ch'ín Jesús tí kóchrít'ḡ ch'án niotja kjuanjon ch'án.

Titáḡa k'uíkuén sín ikui ch'ín Jesús

(Mt. 28.16-20; Mr. 16.14-18; Jn. 20.19-23)

³⁶ A ntá jehe sín naḡa tjejótjo sín kaín tí nkehe tsíkónhen, a ntá xrínahya ch'ín Jesús kjuák'e jnkošiné tí tjejó sín, nixjeḡe ch'án tí jehe sín ntáχρο ch'án káxin:

—¿Á kjuaxróxin tjejorá? —ichro ch'án.

³⁷ A ntá jehe sín la imá chrakon sín kjuenkayáxin sín káxin k'uíkon sín ijnko xrintḡe chojni.

—Ách'e kjuachani —ichro sín.

³⁸ A ntá ntáche ch'ín Jesús tí jehe sín káxin:

—¿Nkekuénte chrakonrá? ¿Nkekuénte xíkaha tjenkayáxin asánrá? ³⁹ Tsjeherá tjaná la ko totená káxin chaxín janhan. Itserána la ko komárana, káxin ijnko xrintḡe chojni chóntahya nto la ko chóntahya hueso éxí t'ikonrá káxin chonta janhan —ichro ch'án.

⁴⁰ A ntá xíkaha ichro ch'án ntá kjuako ch'án itja ch'án la ko toté ch'án. ⁴¹ Ntá kjónté xíkaha k'uíkon sín la naḡa kuítekakohnya sín káxin chéḡe sín la ko chrakon sín. A ntá ch'ín Jesús ntáχρο ch'án káxin:

—¿Á chontará ichrén nkehe sineni ntihi ní? —ichro ch'án.

⁴² Ntá chjehe sín ch'án it'ḡ koche tsíchjántaón xrohi la ko ijnko t'ḡ katjé kotsjenta tjá tsjen.

⁴³ A ntá jehe ch'án kuákja ch'án kjóne ch'án k'uíkonxín kon sín. ⁴⁴ Na ntá ntáχρο ch'án káxin:

—Kaín tí nkehe k'uátsínka tí janhan mé k'uéntáxrjan tí naḡa k'uék'ejóni senó; káxin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáχρο tí salmo káxin nkexrí tsona janhan —ichro ch'án.

⁴⁵ Ntá kjuanjon ch'án kjuachaxín káxin tsienxín sín tí xroon itén Dios tsíkjin sín ósé. ⁴⁶ Ntá chénka ch'án sín káxin:

—Mé xíkaha nixja tí xroon itén Dios káxin tí Cristo la t'ichjánxin ts'en, la níxin yaon t'ichjánxin tsoxechón ch'án. ⁴⁷ A ntá t'ichjánxin tsjakoxín sín ihñié ch'án tsjankáxin sín chjasín Jerusalén la ko chrókuinhin chojni kuenté chjasintajni káxin chrókuitḡe sín ijje sín chrókuitekaon sín tí jehe ch'án káxin jehe ch'án mé chrókjuíncheyaon tí ijje sín. ⁴⁸ A ntá jahará mé tsochronkaxín káxin xíkaha k'uíkonrá kaín tíha. ⁴⁹ Ntá tsochr'an Moisés la ko tí nkehe tsíkjin T'aná éxí tsíntáχρο ch'án. Kjánchó chjasín Jerusalén ntahó titḡhará tsoxiteyája ts'ayéherá kjuachaxín tsixín nkaya nkajni.

Ch'ín Jesús sákjuí ch'án nkaya nkajni

(Mr. 16.19-20)

⁵⁰ A ntá ch'ín Jesús sákjuíko sín ch'án k'uaxrjexín sín chjasín Jerusalén sákjuí sín chjasín Betania. Ntá kjuayá ch'án tja ch'án kjuíncheyaon ch'án tí jehe sín. ⁵¹ A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajni. ⁵² A ntá jehe sín k'uíkon sín xíkaha, a ntá xraxinkaon sín ch'án, ntá kjan sín chjasín Jerusalén chéḡe sín. ⁵³ A ntá kaín yaon tjejó sín nkaxenhen njnko tjanchehe sín Dios kjuasáya. Amén.

Tí tan jína chrónka ch'in Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naxá k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha. ² Tí xrankíxixín na mé tí nkexro xráxín kjuák'eko Dios ³ la ko kjuachaxin kuènte ch'án na mé k'ónaxín kaín xín nkehe síin jie. A ntá kohya ninkehó nkehe k'ónakoá, na mé kaín xín nkehe síin na mé k'ónaxín tí kjuachaxin kuènte ch'án. ⁴ Jehé ch'án na mé kjuanjón kjuachaxin kaín nkehe síhón síin chjasintajni la ko jehé ch'án mé xrohi t'inkaséyanxínhin jnkójnko ntje chojni chjasintajni. ⁵ Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'ánka tí xrohi a, kjánchó kjuachahya k'ók'ánka.

⁶ Ntá kjuák'e ijnko chojni k'uetuēnhen Dios kui mé it'in ch'án Juan. ⁷ Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kixin kaín xín chojni chrókuitekaon sín tí tjechrónka ch'án a. ⁸ A ntá tí ch'in Juan la jehya tí xrohi a. Ó k'uituēnhón ch'án kui ch'án kixin tsochrónka ch'án nkerí kuènte tí xrohi a. ⁹ A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

¹⁰ Kjuák'e ch'án chjasintajni na mé Dios tsíkijich'énaxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naxá kjuátsoanhya sín ch'án. ¹¹ Ikui ch'án tí tjejó tí sín judío k'uaxrjeníxín ch'án, kjánchó kuítekakuenhya sín ch'án. ¹² A ntá tí sín kuítekaon sín ch'án mé k'uáyéhe sín kjuachaxin kixin ts'óna sín xjeēn Dios. ¹³ Ntá yóehya ts'axrjeníxín sín it'é sín chjasintajni ntíhyó la ko yóehya ijnko it'é chrókuēnkayáxín ch'án chrókuich'éna ch'án ijnko xjan. Náhi. Dios mé kjuéyá ch'án nkexro ts'óna xjeēn ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uetjuéhé ch'án chojni chjasintajni la ko imá ntoá chrónka ch'án. Kuayeni k'uikónni kixin imá t'etoan ch'án kixin jehé ch'án mé tí jnkokoáxón Xjeēn It'éni tjen nkaya nkajni na mé xíkaha imá t'etoan ch'án.

¹⁵ Ch'in Juan mé chrónka ch'án nkexrí tjen tí nkexro a. Ntáchro ch'án kixin:

—Senó k'uékjáhohará kixin chr'éxín tsi tí nkexro a, na mé antsí má t'etoan ch'án, a ntá janhan la náhi kixin tí janhan naxá kohyana la tí jehé ch'án la ó xráxín tjen ch'án —mé xíkaha chrónka ch'in Juan.

¹⁶ Kaínni ó k'uáyéheni tí kjuachaxin jie tjetjanjón ch'án la ko antsí má tjencheyaonni ch'án la ko tjencheyaonni ch'án. ¹⁷ Dios mé tsík'etuenhen ch'in Moisés kixin tsokjin ch'án tí ley. A ntá Ínchéni Jesucristo mé kjuákoxín ch'án kixin nkexrí imá tjuéhé Dios tí chojni chjasintajni. A ntá kaín nkehe chrónka ch'án mé antsí ntoá. ¹⁸ Kohya ninkexró chjasintajni k'uíkón sín Dios a. A ntá tí jnkokoáxón Xjeēn ch'án na mé xráxín jnkokoá tjenkayáxinko It'é ch'án la mé jehé ch'án mé ó kjuínchekónoheni ch'án nkexrí tjen It'é ch'án nkaya nkajni.

*Ch'in Juan mé chrónka ch'án nkexrínchi tjen ch'in Jesús
(Mt. 3.11-12; Mr. 1.7-8; Lc. 3.15-17)*

¹⁹ Iso tí sín judío k'uéjó sín chjasin Jerusalén na ntá ichr'án sín iso chojni nchat'á la ko iso tí sín levita, ikui sín kuínixjehé sín tí ch'in Juan kjuanchankíhi sín ch'án kixin:

—¿Nkexro tí jaha? —ichro sín.

²⁰ Ntá kjuínchemáhya ch'án, ntáchro ch'án kixin:

—Náhi. Jehya janhan tí Cristo —ichro ch'án.

²¹ Ntá xíkjanckankíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'in Juan la xíkjatēhe ch'án ntáchro ch'án kixin:

—Náhi. Jehya janhan Elías —ichro ch'án.

Ntá xíkjanckankíhi sín ch'án inaá kixin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'in Juan inaá kixin:

—Náhi. Janhya —ichro ch'án.

²² Ntá kjuanchankíhi sín ch'án inaá kixin:

—¿Ntá nkexro jaha? T'ichjánxín tsoñoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

²³ Ntá kjuátēhe ch'in Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kíxin: “Takitjehérá ijnko ntja ntóí tsixín Inchéni” —mé xikaha ichro ch'án kjuátexín ch'án itén ch'ín Isaías k'u'échronka xroon itén Dios ósé.*

²⁴ A ntá tí sín fariseo mé tsíchr'án tí jehe sín kuikjanchankíhi sín tí ch'ín Juan. ²⁵ A ntá kjuanchankíhi sín ch'án kíxin:

—Ó ntáchrúa kíxin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'u'échronka itén Dios ósé. ¿A ntá nkekuénté tikíte chojni tí xikaha? —mé ichro sín.

²⁶ Ntá ntáchró ch'ín Juan kíxin:

—Janhan na mé intá ó tikítexián chojni. Ó ntihi tjenkákjan ijnko nkexro naxa jtásoanhyará. ²⁷ Jehe ch'án mé tsi ch'án nóton tí janhan. A ntá antsí má t'etóan ch'án, a ntá janhan na kénhyó. A ntá tósuána chrókuasintanka tí correa tokaté ch'án —ichro ch'án.

²⁸ Kaín tíha mé tsíkónhen tí chjasin it'ín Betábara tí nó tjtóqxín yaon tóhe tí ntario Jordán tí kjuák'e ch'ín Juan kuikíte chojni.

Ch'ín Jesús na mé éxi yóhe ijnko kolélo kuènte Dios

²⁹ A ntá tí yaon chr'éxin mé k'uíkon ch'ín Juan kíxin ó tjekui ch'ín Jesús. Ntá nixjehe ch'án tí sín tsíkóhjna ntáchró ch'án kíxin:

—Tsjehérá tí nkexro tjekui mé tí Kolélo kuènte Dios jehe ch'án. Tíha mé tsjinxín ijje chojni chjasintajni. ³⁰ Janhan mé k'uéxrjanka kíxin tí iton tí janhan mé tsichréhe ijnko nkexro antsí t'etóan, a ntá janhan la kénhyó tétóan kíxin naxa kohyana na jehe ch'án la ó xráxin tjen ch'án.

³¹ Kjaxín janhan naxa chonhya nkexro tíha. A ntá xra ó k'uinka kjuák'é kuikítexián chojni intá kíxin tí chojni nacióan Israel mé chrókuátsoanxín sín ch'án —ichro ch'ín Juan

³² Kjuintaxín ntáchró ch'ín Juan kíxin:

—Ó k'uíkuan kíxin tí Nchakuen Dios mé k'uinkajinxín nkaya nkajni na éxi yóhe ijnko kntóá k'uinkajin la ko kjuák'e va ntoí tí tjen ch'án. ³³ A ntá janhan kjaxín naxa chonhya nkexro tíha. A ntá tí nkexro k'uetuanna kíxin tsjak'é tsikítexián chojni intá mé tsichronka ch'án kíxin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsóanxián janhan kíxin tí nkexro a mé tsikítexín ch'án Nchakuen Dios chojni. ³⁴ A ntá janhan jie mé ó k'uíkonxín kuan kíxin xikaha kónhen tí jehe ch'án, a ntá xrjankaxián kíxin táha mé Xjeen Dios tíha —mé xikaha chrónka ch'án.

Tí sín sqoxín kjueyá ch'ín Jesús

³⁵ Tí yaon chr'éxin kjuák'e ch'ín Juan la ko iyó tí sín k'uájiko ch'án, ³⁶ a ntá xrinahya k'uíkon ch'án k'uátsínka ch'ín Jesús. Ntá ntáchró ch'ín Juan kíxin:

—Tsjehérá tí nkexro i mé tí Kolélo kuènte Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuichréhe sín tí ch'ín Jesús. ³⁸ Ntá kuinkátjía ch'ín Jesús k'uíkon ch'án kíxin tinkáchréhe sín ntá kjuanchankíhi ch'án sín kíxin:

—¿Xá nkehe xritjéyará? —ichro ch'án.

Ntá ntáchró sín kíxin:

—Maestro, ¿xá nketí nchia itjen? —ichro sín.

³⁹ Ntá kjuátéhe ch'án ntáchró ch'án kíxin:

—Intá sátsjini ts'ikonrá nketí —ichro ch'án.

Ntá kuinkáchréhe sín ch'án k'uíkon sín nketí nchia kjuák'e ch'án ntá k'uéjóko sín ch'án kuénté tí kónjín kíxin kjuíji sín ntiha como las cuatro kónjín.

⁴⁰ A ntá yóí sín tsíkinhin sín tí chrónka ch'ín Juan ntá sákjuichréhe sín tí ch'ín Jesús na mé ijnko mé it'ín Andrés. Jehe ch'án chóntha ch'án ijnko savé mé it'ín Simón Pedro. ⁴¹ Na ntá tuénxín tí ch'ín Andrés sákjuikjeyá ch'án tí savé ch'án Simón. Ntá chénka ch'án tí savé ch'án kíxin:

—Ó k'uitjani tí nkexro Mesías —ichro ch'án. Tíha mé t'axrxjén kíxin Cristo.

⁴² A ntá ch'ín Andrés mé kuikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchró ch'án kíxin:

—Jaha mé Simón, it'á mé it'ín Jonás. Ntá jie sjintak'ian Cefas —ichro ch'án. A ntá tí palabra Cefas la ko tí palabra Pedro na mé yóí mé t'axrxjén kíxin ixro tíha.

Ch'ín Jesús mé kjueyá ch'án tí ch'ín Felipe la ko tí ch'ín Natanael

⁴³ A ntá tí yaon chr'éxin mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kíxin:

—Chréhé tí janhan —ichro ch'án.

⁴⁴ A ntá tí ch'ín Felipe mé chjasén ch'án mé it'ín Betsaida tí chjasén ch'ín Andrés la ko ch'ín Pedro. ⁴⁵ Ntá tí ch'ín Felipe mé sákjuikjeyá ch'án tí ch'ín Natanael na ntá chénka ch'án kíxin:

* 1:23 Isaías 40.3

—Ó k'uitjani tí nkeexo tsi éxi k'u'échrónka tí ch'ín Moisés tí tsíkjin ch'án tí xroon chrónka tí nkehe k'uetqan Dios. Kjaxin tí sín k'u'échrónka tí itén Dios chr'éxin mé k'u'échrónka sín kixin itsi tí nkeexo a. Na ntá ó k'uitjani ch'án na mé jehe ch'án mé it'ín Jesús, la it'é mé it'ín José, la mé chjasén ch'án mé Nazaret —ichro ch'ín Felipe.

⁴⁶ A ntá ntáchro ch'ín Natanael kixin:

—¿Xá kjuánchí má chrókójina tí nkehe chrók'uaxrjexin tí chjasin Nazaret a? —ichro ch'án. Ntá kjuátèhe ch'ín Felipe ntáchro ch'án kixin:

—Xrákiá ts'ikuan —ichro ch'án.

⁴⁷ Na ntá k'uikon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankihi ch'án tí ch'ín Jesús kixin:

—¿Nkexrí kixin tjátsoanna? —ichro ch'án.

Ntá kjuátèhe ch'ín Jesús ntáchro ch'án kixin:

—Naxá nixjaahya tí ch'ín Felipe mé k'uikuán tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajni tsétuñhén tí nación Israel —ichro ch'án.

⁵⁰ Ntá kjuátèhe ch'ín Jesús ntáchro ch'án kixin:

—Jehya tí nkehe ntáxrjan k'uikuán tjenkankiá nta t'óna to higo, jehya táhó tsítékákonxian. Náhí. Chr'éxin xiki í jnko kjuaxroan antsi má jié ts'ikuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kixin:

—Ijnko nkehe ntoá tsöxrjanka kixin tsoxitjehé tí nkajni ts'ikonrá itsi itsjé tí sín ángel kuente Dios mé ts'it'ójen la ko ts'inkajin tí tjen janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí iné ch'ín Jesús tsik'iyehé sín tjan la ntiha tjen tjan koí. ² Kjaxin tsik'iyehé sín tí ch'ín Jesús la ko tí sín k'uájiko ch'án kixin sátsji sín tí tsikótehe sín ntiha. ³ Ntá ó tsik'ankehé sín tí xranvino ik'uí sín na ntá tí iné ch'ín Jesús mé ntáche tjan tí jehe ch'án kixin:

—Ó tsik'ánká xranvino its'i sín —ichro tjan.

⁴ Ntá ntáchro ch'ín Jesús kixin:

—Naná, ¿nkehe tsöñhen chrónka? Naxá kjuixrakáhya tí yaon tsjásian kjuaxroan —ichro ch'án.

⁵ A ntá tí iné ch'án na mé ntáche tjan tí sín ch'e xra kixin:

—Tí chrén nkehe chrók'uetqanhanrá ch'án chrókjuinhexiteyará —ichro tjan.

⁶ A ntá siin ntiha injon ch'i tsik'óna xro na mé tíha tjia ntá t'onti sín kixin xikaha mé ts'axrjehé tí jié chóna sín koí, mé xikaha kuinkáchónki tí sín judío. Na mé jnkojnko ch'i mé tjacha tikia ochenta litro la o ciento litro ntá. ⁷ Ntá k'uetuñhen ch'ín Jesús tí sín ch'e xra kixin:

—Tikjará ntá kaín tí ch'i a tsókaón —ichro ch'án.

Ntá kjuinhexiteyá sín kjuínchekaón sín ntá jnkojnko tí ch'i a. ⁸ A ntá ntáche ch'ín Jesús tí jehe sín inaá kixin:

—Tákiá intsi nta tjia ch'i tjikuehé tí ch'ín t'etqan tí kia a —ichro ch'án.

Ntá xikaha kjuich'e sín kjuinhexiteyá sín. ⁹ A ntá tí ch'ín t'etqan tí kia a mé tsjexín ch'án tí ntá tsik'óna xranvino kjónté noehya ch'án nketi kuixin tí xran a. Jehó tí sín ch'e xra kuikao sín mé nohe sín kixin jehe sín mé tsikakitsje sín ntá. Ntá tí ch'ín t'etqan mé k'uiyehé ch'án tí ch'ín tsikótehe. ¹⁰ Ntáche ch'án kixin:

—Xráxín tí sín tjasin kia la senó tí xranvino náxrjón tjanjon sín na tió chrók'uihya tí sín tsikóchjina na ntá tjanjon sín tí xranvino náxrjónhya. A ntá jaha la náhi. Senó kjuakéchjina tí xranvino antsi má náxrjón, a ntá tí jie tjetjánjuan jaha —ichro ch'án.

¹¹ Tí kjuaxroan a kjuich'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxin ch'án nkexrí imá jié tí kjuachaxin kuente ch'án, a ntá tí sín k'uájiko ch'án mé kuitekaon sín tí jehe ch'án.

¹² Ntá ó k'uátsínka kia, a ntá sákjuí ch'án chjasin Capernaum, sákjuíko ch'án iné ch'án la ko kichó ch'án la ko tí sín k'uájiko ch'án, kóxrjenhen sín ntiha iso yaon.

*Ch'ín Jesús mé kjuínchetjóá ch'án tí njnko jié
(Mt. 21.12-13; Mr. 11.15-18; Lc. 19.45-46)*

¹³ A ntá ó kuichjina tí yaon kia kuènte pascua kuènte tí sín judío. Ntá ch'ín Jesús sákjui ch'án chjasin Jerusalén. ¹⁴ Ntá nkaxenhen tí nínko jié ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjejótxajin tí sín tjinkíxixín chichaon. ¹⁵ Ntá ch'ín Jesús mé kuákja ch'án ihno tsíxehe sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen nínko kaín xín sín la ko tí kolélo la ko tí koxinta. Na ntá tí ntalesa tjinkítóxín sín tí chichaon mé kótéka ch'án tsikjaminkí xènjín tí chichaon a. ¹⁶ Ntá k'uetuènen ch'án tí sín nchekji tí kontóá a kixin:

—Takítsjerá kaín tí nkehe a. Ch'énahyará ijnko ntasin tí ntøe T'aná ntíhi —ichro ch'án.

¹⁷ Ntá xráxinkaon tí sín k'uájiko ch'án tí nkehe tsíkjin sín ósé kixin: “Éxi xrohi k'uákjen asenná nínkavan kixin tí ntøa tjikosáyehya sín.” *

¹⁸ Ntá tí sín judío mé kjuanchankíhi sín ch'án kixin:

—¿Xá nkerí kjuaxroan tsjásixián tsjákoxian nketí kjuachaxin chonta kixin xikaha kjuích'e tíhi? —ichro sín.

¹⁹ Ntá kjuátehe ch'ín Jesús kixin:

—Tí ts'oxikará tí nínko í ntá inikóya yaon la ó sít'ána nixin tsjak'e inaá —ichro ch'án.

²⁰ Na ntá ntáchro tí sín judío a kixin:

—Cuarenta y seis nánó k'uéjó sín kjuích'éna sín tí nínko í, a ntá jaha ntáchrúa kixin iní yaon koá sích'éna inaá, ichrúa —ichro sín.

²¹ Kjánchó kienxínhya sín kixin tí nínko ntáchro ch'ín Jesús la tí cuerpo kuènte ch'án. ²² Ntá tíó kjuixín xechón ch'án ntá xráxinkaon tí sín k'uájiko ch'án kixin xikaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen asén kaín xín chojni

²³ Tíó kjuák'e ch'ín Jesús chjasin Jerusalén tí kia pascua, a ntá itsjé chojni kuinákáchónki sín tí jehe ch'án kixin ó k'uíkon sín tí kjuaxroan kjuasin ch'án. ²⁴ Kjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jína nkexrí tónhen asén jnkojnko chojni ²⁵ a ntá t'ichjánxienhya ch'án kixin ninkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen asén kaín xín chojni.

3

Ch'ín Nicodemo kuinixjéhe ch'án tí ch'ín Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tjetoan kuènte tí sín Israel. ² A ntá ijnko tie kjuíchréhe ch'án tí ch'ín Jesús a nixjéhe ch'án ntáchro ch'án kixin:

—Maestro, kónoheni kixin It'eni tjen nkaya nkajní mé tsíchr'án k'uinka tsjákohéni kixin tí jehya Dios chrókjuak'ekoa la xitjahya chrókjuásian kjuaxroan jié —ichro ch'án.

³ Ntá kjuátehe ch'ín Jesús ntáchro ch'án kixin:

—A ntá tsøtjonka ijnko nkehe imá tjetoan. Tí nkexro tsokjehya nixien mé xitjahya ts'ikon tí kjuachaxin ts'etøan Dios —ichro ch'án.

⁴ A ntá ch'ín Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókokjína nixien? ¿Á chrók'uixanhan tsee naná inaá ntá chrókokjína nixien ní? —ichro ch'án.

⁵ Ntá kjuátehe ch'ín Jesús ntáchro kixin:

—Ntá tsøtjonka ijnko nkehe imá tjetoan. Jehó tí sín tsíkokjéxín ntá la ko kjaxin tsíkokjéxín Nchakuen Dios mé ts'áyéhe sín tí kjuachaxin kuènte Dios. ⁶ Tíó ijnko xjan ts'axrjeníxin chojni na mé tí xjan mé chojni ó. A ntá tí Nchakuen Dios tsókjéxín nixien ijnko chojni na ntá ts'áyéhe sín tí Nchakuen Dios a. ⁷ Chrakonhya tí nkehe xrjanka kixin “Kain chojni t'ichjánxin tsokjíhi nixien.” ⁸ Éxi yóhe tí tinhín tí chjéhe xríntø ntá noahya nketí kuixín tí xríntø la ko noahya nketí sátsji na mé kjaxin xikaha kónhen kaín tí nkexro tsíkokjéxín Nchakuen Dios —ichro ch'án.

⁹ Ntá xíkjanckí ch'ín Nicodemo inaá kixin:

—¿Nkekuènté kixin xikaha chrókónhen? —ichro ch'án.

¹⁰ Ntá kjuátehe ch'ín Jesús ntáchro ch'án kixin:

—¿Jaha ijnko maestro imá t'etøan tí nación Israel ntá naxá tiénxinhya tí nkehe ní? ¹¹ Chaxín tjetjonka tí nkehe nóna la ko tí nkehe k'uíkuan ntá titekákonnahya jaha. ¹² Tí nkehe tjetjonka la kuènte chjasintajni ó ntá kjónté la titekákonnahya jaha. ¿Ntá nkexrí chrókuítekáván tí chrótjonka nkehe kuènte nkaya nkajní? ¹³ Kohya í jnko nkexro k'ujt'øtjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixín ch'án. ¹⁴ Éxi yóhe ch'ín Moisés tíó k'uixín sín tí ntjeje, a ntá Dios mé k'uetøan kixin sinchekjanøya ch'án ijnko konche tsjak'enkanı ch'án ijnko ntá, ntá xikaha kjuích'e ch'án

* 2:17 Salmo 69.9

kjuak'enkani ch'án tí konche tí nta a komá sín tí konche ntá kuaá sín k'uénhya sín, * mé xikaha tsonhen tí Xjeen Dios K'óna Chojni mé t'ichjánxin kixin tsjak'enkáni ch'án ijnko ntacruz ¹⁵ kixin mé xikaha kaín nkexro tsinkáchónki tí jehe ch'án mé tsaá sín tsochónta sín kjuachón jnkochrín.

Dios imá tjuèhe ch'án tí chojni chjasintajni

¹⁶ Kixin Dios mé imá tjuèhe ch'án chojni chjasintajni ntá kjuanjon ch'án jnkokoqáxon Xjeen ch'án, kixin ntá jnkojnko chojni tsinkáchónki tí Xjeen ch'án mé ts'itájanyha sín tsochónta sín kjuachón jnkochrín. ¹⁷ Chr'ánhya Dios tí Xjeen ch'án chjasintajni kixin sinchekjasóte chojni kixin tí jje kjuasin sín. Náhi. Ó jehí ichr'án ch'án tí Xjeen ch'án chjasintajni kixin sincheakaá chojni.

¹⁸ Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuinchekitqexín Dios tí ijje sín tsjasóte sín kixin titekakuenhya sín tí jnkokoqáxon Xjeen Dios. ¹⁹ Na mé xikaha Dios sinchekjasóte sín jnkochrín kixin ó kui tí nkexro t'inkaséyanxin chjasintajni na kjónté ntá antsí má tóxrjnhin sín tí sítié a. A ntá tí t'inkaséyan la náhi kixin naxa tóxrjnhin sín tí nkehe jínahya tjejóch'e sín. ²⁰ Kaín tí sín tjejóch'e nkehe jínahya na mé tóxrjnhya sín t'inkaséyan chrókóhjhinehya sín kixin tsonoxínhya tí nkehe jínahya tjejóch'e sín. ²¹ A ntá tí sín tjejóch'e sín tí jina a na mé chéhe sín tóhjhine sín tí t'inkaséyan kuénte Dios kixin tsonoxín tí nkehe ch'e sín kixin ntá kaín xin chojni mé tsjatsqan sín kixin tjejóch'e sín tí nkehe tóxrjnhin Dios.

Ch'in Juan Bautista chrónka inaá kuénte ch'in Jesús

²² Na ntá chr'éxin ch'in Jesús la ko tí sín k'uájiko ch'án na sákjuí sín estado Judea. Ntaha k'uéjoko sín ch'án kuikite ch'án chojni. ²³ Kjaxin ch'in Juan kjuák'e ch'án chjasin Enón chjino tí chjasin Salim na mé ntiha kjuák'e kuikite ch'án chojni kixin ntiha mé yeé ntá síin. Na ntá nkáki sín kuikite sín. ²⁴ Mé xikaha kónhen naxa kjuák'echjinhya ch'in Juan.

²⁵ Ntá tí sín k'uájiko ch'in Juan la ko tí sín judío mé kjuachaxin kichó sín kixin nkexrí íchá jina chrókótjuáxin chojni, ichro sín. ²⁶ A ntá tí sín k'uájiko ch'in Juan sákjuitsjehe sín ch'án chénka sín ch'án kixin:

—Maestro, tí ch'in kjuák'ekoa tóhe ntarío Jordán, na mé tí nkexro tsíchronka kuénte ch'án, la mé itjen ch'án tukite ch'án chojni la ko kaín xin chojni mé tjichréhe sín ch'án —ichro sín.

²⁷ Na ntá ntáchro ch'in Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni. ²⁸ Ó kuínhínrá ntóá k'uéxrjanka senó kixin janhya tí Cristo. Náhi. Janhan ó kuítuanuá kuítónxián ntia tsoxrjanka kixin ó tsi ch'án. ²⁹ Éxi yóhe ijnko ch'in tsoqte na mé jehe ch'án mé ts'áyéhe ch'án tí ichjién ch'án. A ntá tí ch'in chóxin ch'án mé chéhe asén ch'án tjetinhin ch'án tjenixja tí ch'in ts'áyéhe ichjién a. Mé xikaha janhan imá chána kixin xikaha sitónhen kixin itsjé chojni sitóhjhine sín tí ch'in Jesús tsinhin sín nkehe tí tjenixja ch'án. ³⁰ A ntá jehe ch'án t'ichjánxin antsí ts'etqan ch'án. A ntá janhan la kénhyó —mé chro ch'in Juan.

Tí nkexro kuixin nkaya nkajni

³¹ Tí nkexro kuixin nkaya nkajni mé kaín nkehe t'etuenhen ch'án. A ntá ijnko chojni kuénte chjasintajni ó mé chrónka kuénte chjasintajni ó. A ntá tí nkexro kuixin nkaya nkajni mé kaín nkehe t'etuenhen ch'án. ³² Jehe ch'án mé chrónka ch'án tí nkehe tsik'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án. ³³ A ntá jnkojin nkexro titekaon sín tí nkehe chrónka ch'án na mé xikaha tjakoxin ch'án jie kixin chaxin ntóá chrónka Dios ³⁴ kixin tí nkexro ichr'án Dios mé nixja itén Dios kixin jehya intsóá tí Nchakuen Dios k'uáyéhe ch'án. Náhi. ³⁵ It'eni Dios mé tjuèhe ch'án tí Xjeen ch'án na mé xikaha ó tsíchjéhe ch'án kjuachaxin kixin kaín xin nkehe ts'etuenhen ch'án. ³⁶ A ntá tí nkexro tsitekaon tí Xjeen Dios mé xikaha tsochónta sín tí kjuachón jnkochrín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochrín xikaha. Tí sín a mé Dios sinchekjasóte sín jnkochrín.

4

Ch'in Jesús ikjo ch'án ijnko tjan samaritana

¹ A ntá tí sín fariseo mé kónohe sín kixin antsí tsjé chojni chréhe sín tí ch'in Jesús kuikite ch'án sín na ntá tí chojni chréhe sín tí ch'in Juan la kánhyó tsjé sín. ² Kjánchó jehya ch'in Jesús kuikite ch'án chojni. Méxra tí sín k'uájiko ch'án mé kuikite sín chojni. ³ A ntá tió kónohe ch'in Jesús kixin xikaha tsíkinhin tí sín fariseo ntá k'uaxrjexin ch'án tí estado Judea xikjan ch'án estado Galilea inaá.

* 3:14 Números 21.9

⁴ Ntá t'ichjánxin ts'átsinka ch'án estado Samaria. ⁵ A ntá kjuíji ch'án ijnko chjasin mé it'in Sicar kuènte estado Samaria, mé chjino tí nonte tsíkjinchekitonhen ch'in Jacob tí xjeen ch'án José. ⁶ La ó chjino tjen tí tòye takitsje chojni intá mé it'in Inté Jacob. Na ntá ó chonkixin kjuí sín ntiha. Méxra tí ch'in Jesús la imá kóxrjé ch'án kixin imá kjin tí ntja kjuixin ch'án ntá kjuák'etjaxin ch'án chrínta tí tòye takitsje sín intá. ⁷⁻⁸ Ntahó kuitóhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'ena sín nkehe sineko sín ch'án. Ntá séhyó ikui ijnko tjan kuènte estado Samaria ikui tjan tsakitsje tjan intá. Ntá ntáchro tí ch'in Jesús kixin: —Chjina intsi ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'in Jesús kixin: —¿Nkekuènté kixin jaha ijnko chojni judío mé chrókjuanchana ntá kixin janhan ijnko chojni samaritana? —mé chro tí tjan a.

(Mé xikaha kjuanchankí tjan kixin tí sín judío mé ninkehó t'ikonhya tí sín samaritano.)

¹⁰ Na ntá ntáchro ch'in Jesús kixin:

—Chrókónoha tí nkehe tjanjon Dios la ko chrókjuatsóan jaha nkexro tí tjetjanchaha ntá ntá chrókjuanchana ntá, ntá chrótjaha tí ntá tjechón chaxín —ichro ch'in Jesús.

¹¹ Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakítsjeyá ntá kixin tí tòye i la imá njnka? ¿Ntá nkexrí tsochjina tí ntá tjechón tjimé? ¹² Tí nkexro k'uaxrjenixinni mé Jacob mé kuitóeheni tí tòye tjíá ntá ntihi la ko kjaxin ik'uí ch'án tí ntá la ko kjaxin ik'uí tí xjeen ch'án la ko tí iko kuènte ch'án. ¿A ntá xá jaha la xá antsi má tjetóan jaha, a ntá jehe ch'án la kénhyó ní? —mé kjuanchankíhi tjan tí ch'in Jesús.

¹³ Na ntá kjuátéhe ch'in Jesús ntáchro ch'án kixin:

—Tí sín it'i sín tí ntá ntihi tí tòye i nántaxón its'en sín ntá inaá. ¹⁴ A ntá tí sín its'i sín tí ntá sintakítjonhan sín mé í ts'enhya sín ntá inaá. Tí ntá sintakítjonhan sín mé ts'óna éxí yóhe ijnko ntá ts'axrje nkaya asén sín mé tsinkákjanjon tí kjuachón tsochóna sín jnkochríxin —ichro ch'án.

¹⁵ Ntá ntáchro tí tjan a inaá kixin:

—Chjina tí ntá, a ntá ts'énhyana ntá inaá la ko ts'inkahya ntihi tsakítsje ntá —ichro tjan.

¹⁶ Ntá k'ueqóan ch'in Jesús kixin:

—Sátjia tjík'iyehé xiá ntá ts'inkará ntihi inaá —ichro ch'án.

¹⁷ Ntá ntáchro tjan kixin:

—Chontahya xiná —ichro tjan.

Ntá ntáchro ch'in Jesús kixin:

—Chaxín ntáchrúa kixin chontahya jaha xiá. ¹⁸ K'uéchonta jaha in'ó xiá, a ntá tí ch'in chonta jie jehya xiá. Na mé chaxín tí nkehe ntáchrúa kixin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:

—T'íkuan kixin jaha ijnko nkexro chrónka itén Dios. ²⁰ A ntá tí sín k'uaxrjenixinni k'uixin ósé mé k'uéraxinkakonxín sín Dios tí jná ntihi. Kjánchó jahará chojni judío mé ntáchrórá kixin tí njnko jie chjasin Jerusalén kaín ní chrórxaxinkakonxinni Dios —ichro tjan.

²¹ Ntá ch'in Jesús ntáche ch'án tjan kixin:

—Titekávan kixin tjetsi tí hora a tsoxráxinkakonxínhyará It'éni Dios tí jná ntihi la ko tsoxráxinkakonxínhyará ch'án chjasin Jerusalén kjaxin. ²² Jahará chojni samaritano chonhyará tí nkexro xráxinkakonrá. Ntá kaín ní chojnini judío mé chóxinni tí nkexro xráxinkaonni. Méxra tí nkexro tsjakjiihin chojni tí jie yámá sín mé ts'axrjenixín tí sín judío. ²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chrórxaxinkaon sín It'éni la mé asén sín ó tsoxraxinkakonxín sín It'éni Dios. Dios mé tóxrjínhin ch'án kixin chojni xikaha chrórkjuich'e sín chrórxaxinkakonxín sín ch'án. ²⁴ Jehe Dios na mé nchakuen ó, a ntá tí sín chrórxaxinkaon sín ch'án na mé t'ichjánxin kixin asén sín ó tsoxraxinkakonxín sín ch'án —mé xikaha chrónka ch'in Jesús.

²⁵ A ntá ntáchro tí tjan a kixin:

—Ó nóna kixin itsi tí nkexro Mesías, tí nkexro a mé Cristo. Tió tsi ch'án ntá tsjakóhëni ch'án kaín xín nkehe —ichro tjan.

²⁶ Ntá ntáchro ch'in Jesús kixin:

—Tí nkexro a la mé janhan tjetjuá jie —ichro ch'án.

²⁷ Na ntá tí sín k'uájiko ch'án mé kjanxin sín tí chjasin a, ntá chrakon sín k'uikon sín kixin tjenixjehe ch'án ijnko chojni chjin. Kjánchó njnko sín kjuanchankíehya sín ch'án kixin nkehe tjinkaon ch'án na nkekuènté nixjehe ch'án tí tjan a. ²⁸ A ntá tí tjan mé kjuak'e tjan tí toa nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Intará sátsjitsjeheni ijnko ch'in chrónka ch'án kaín xín nkehe kjuít'a tí senó a. ¿Xá chrókójhëya tí nkexro i Cristo? —ichro tjan.

³⁰ Na ntá tí chojni a mé xrákuaxín sín tí chjasin a ntá kuitsjehe sín tí ch'ín Jesús. ³¹ Naxa tihya sín nachrohe tí sín k'uájiko ch'án mé chrónóhehe sín ch'án ntáchro sín kixin:

—Maestro, kjaxian chrókjonte nkehe —ichro sín.

³² Kjánchó ntáchro ch'án kixin:

—Ó chonta janhan nkehe siné. Jahará la kjá naxa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kíchó sín kixin:

—¿Xá jnkójin sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kixin:

—Éxi yóhe chrókjoné nkehe mé tí sít'a tí xra la ko tsjixinna tí xra kuènte tí nkexro chr'ánna k'uinka. ³⁵ Ntáchorá kixin: “Noó nitjó naxa t'itjayan tsochónhenni ntá tsojtáni noatrigó”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tinkáxamá kixin ó jina chrótjani. ³⁶ Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochrín. Ntá tí sín k'uenká sín nonte la ko tí sín tjá sín jnkokón tsochéhe sín. ³⁷ Mé xíkaha tsoxitéyá tí nkehe ntáchro sín kixin: “Ijngo nkexro mé t'enká noa, a ntá ókjé sín tsojtá sín tí noa a”, ichro sín. ³⁸ A ntá janhan ichr'an tí jahará tsojtará ijngo nonte tsík'énkahyará. Na mé ókjé sín kjuich'e sín xra ntá jahará tsjachará tí xra kjuich'e tí sín a —ichro ch'án.

³⁹ A ntá itjsé tí sín samaritano kuènte tí chjasin ntiha mé kjuankixin kuinkáchónki sín tí jehe ch'án kixin xíkaha chrónka tjan kixin jehe ch'án ó chrónka ch'án kaín xín nkehe kjuich'e tjan tí senó a. ⁴⁰ A ntá tió kuínhin sín tí nkehe chrónka tjan ntá kui sín tí tjen ch'ín Jesús ntá chrónóhehe sín ch'án kixin tsitóhe ch'án ntiha. Ntá kuítóhe ch'án ntiha iyó yaon. ⁴¹ Ntá itjsé sín kjaxin kuinkáchónki sín ch'án kixin tí nkehe kuínhin sín nixja ch'án. ⁴² Ntá ntáche sín tí tjan a kixin:

—Ntá jie jehya jehó tí nkehe chrónka kuítekaonni. Náhí. Tí jie ó kuínhini nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitóhe jina ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea. ⁴⁴ A ntá jehe ch'án tsintáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án. ⁴⁵ Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehya sín ch'án jina kixin kjaxin sín sátsíkji sín tí kia pascua chjasin Jerusalén tsík'íkon sín kaín tí kjuaxroan kjuasixín ch'án tí kia ntiha.

⁴⁶ Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjamina ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum. ⁴⁷ Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónóhehe ch'án tí ch'ín Jesús kixin sáchrókjui ch'ín Jesús ntóe ch'án sinchekitóhe jina tí xjeen ch'án ó tjet'en xjan. ⁴⁸ Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókuásian la chrókuinkachónkihyará tí janhan —ichro ch'án.

⁴⁹ Ntá chrónóa tí ch'ín ch'ehe xra gobierno ntáchro ch'án kixin:

—¿Á chrókójinahya sáchrókjuini ntóna jai kixin xjanna ó tjet'en? —ichro tí ch'ín a.

⁵⁰ Ntá kjuátéhe ch'ín Jesús ntáchro ch'án kixin:

—Ikjan sáttia ntóe kixin tí xjaan na ó jina tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án. ⁵¹ A ntá kjuíji ch'án chjino ntóe ch'án ntá xringhya tí sín ch'ehe sín ch'án xra kjuixínhin sín ntja chrónka sín kixin:

—Xjaan la ó jina tjen —ichro sín.

⁵² Ntá kjuanchankíhi ch'án sín kixin nkehora kjuankixin kuítóhe xjan jina, na ntá chrónka sín kixin:

—Ijna la una kónjin mé kjuin tí sóa —ichro sín.

⁵³ Ntá kónóhe tí it'é xjan kixin xíkaha tí hora tsintáchro ch'ín Jesús kixin tí xjeen ch'án na ó jina tjen. A ntá jehe ch'án la ko kaín tí sín siín ntóe ch'án mé kuinkáchónki sín tí ch'ín Jesús.

⁵⁴ Tiha mé tí yóxin kjuaxroan kjuasin ch'ín Jesús tió kuixín ch'án estado Judea ikjan ch'án estado Galilea.

5

Ch'ín Jesús kjuínchekitóhe jina ijnko ch'ín tsík'en tóte chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xíkjan ch'án chjasin Jerusalén inaá. ² A ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntá mé nkiva hebreo tí ntá mé it'in Betesda. A ntá chrínta tí pila siín in'ó cuarto ntsínti. ³ Ntaha tjejótsínka nchónhya chojni níhi, iso sín t'íkonhya la ko iso sín xitjahya tji la ko iso sín tsík'en tóté. Tjejóchónhen sín kixin nkehora tsínki ntá ⁴ kixin nántaxón k'uínkajin

ijnko ángel kjuiánki ntá kjuínchekinki ntá. A ntá tí nkexro senó tsjiánki ntá mé tsitohe jína kjónté cualquiera chin chóna. ⁵ A ntá ntaha kjuák'e ijnko ch'in na mé chóna ch'an treinta y ocho nánó níhi ch'an. ⁶ A ntá tío k'uúkon ch'in Jesús kixin tjetsínka tí ch'in a la ko kónohe ch'an kixin ósé níhi ch'an, ntá kjuanchanki ch'an kixin:

—¿Á tjinkávan tsitohe jína? —ichro ch'an.

⁷ Ntá ntáchro tí sinníhi kixin:

—Chóntahyani ninkexró tsjinkítsani tsjiánkini ntá. A ntá tí tjinkaonni chrókjuiánkini ntá la ntá ókjé nkexro tjitaón ntia tjíánki ntá senó —mé chro tí sinníhi.

⁸ A ntá k'uetqan ch'in Jesús kixin:

—Ijie la t'inkatjen, tjatsíyan kaniqa, itjia —ichro ch'an.

⁹ Ntá tuénxín kuitohe ch'an jína, ntá kjuatsen ch'an kaniqe ch'an kjuankíxín itji ch'an. Kjánchó yaon sábado tíha mé tí yaon t'ok'éhe sín. ¹⁰ Mé xikaha tí sín judío ntáche sín tí ch'in kuitohe jína kixin:

—Ijie tí yaon t'ok'éheni ntá kohya kjuachaxin tsamá kaniqa —ichro sín.

¹¹ A ntá ntáchro tí ch'in a kixin:

—Tí nkexro kjuínchekitoña jína mé k'uetqanna kixin tsjatsíyan kaniqana la ko sátsjia —ichro ch'an.

¹² Ntá kjuanchankíhi sín ch'in kixin:

—¿Nkexéhe tí nkexro k'uetqanhan kixin tsjatsíyan kaniqa la ko sátsjia? —ichro sín.

¹³ A ntá tí ch'in tsíkitohe jína na í kjuátsoanhya ch'an tí nkexro kjuínchekitohe ch'an jína kixin ntaha la sín nchónhya chojni, a ntá ntahó k'uitjáyanxín ch'in Jesús. ¹⁴ A ntá chr'éxín ch'in Jesús xeta ch'an tí ch'in a nkaxenhen tí njnko jie ntá ntáchro ch'an kixin:

—Tsjehe kixin ijie la ó jína tjen jaha la í tjásinhya jie inaá. A ntá tí tsjásian jie inaá a ntá antsí má jínahya tsonhan —ichro ch'an.

¹⁵ A ntá sákjuí tí ch'in a ntá chénka ch'an tí sín judío kixin jehe ch'in Jesús mé kjuínchekitohe ch'an jína. ¹⁶ Mé xikaha tí sín judío antsí tjinkaon sín chrók'óyan sín ch'an kixin kuitekakuenhya ch'an tí ley kuénte tí yaon t'ok'éhe sín la ko kjaxin ntáchro ch'an kixin tí It'é ch'an la mé Dios, mé xikaha ncheyóhe ch'an asén ch'an Dios.

—Méxra T'aná naxa tjech'e ch'an xra. A ntá janhan kjaxin tjet'a xra —ichro ch'an.

¹⁸ Méxra xikaha tí sín judío antsí tjinkaon sín chrók'óyan sín ch'an kixin kuitekakuenhya ch'an tí ley kuénte tí yaon t'ok'éhe sín la ko kjaxin ntáchro ch'an kixin tí It'é ch'an la mé Dios, mé xikaha ncheyóhe ch'an asén ch'an Dios.

Tí kjuachaxin chóna tí Xjeen Dios

¹⁹ Ntá ntáche ch'in Jesús tí jehe sín kixin:

—Ijnko nkehe tjeotan tsojtjonkará kixin tí Xjeen Dios nkaya nkajní tí jehó kjuachaxin kuénte ó la mé xitjahya sich'e xra. Jehó tí xra t'ikon ch'an tjech'e It'é ch'an mé kjaxin ch'an xikaha ch'e ch'an. ²⁰ A ntá tí It'é mé tjuéhe tí Xjeen ch'an, la ko tjakohe ch'an kaín xín xra ch'e ch'an, la ko antsí tjeotan tí xra naxa tsjakohe ch'an kixin ntá tsochraonrá kixin ts'ikonrá tí xra sich'e ch'an. ²¹ Tí It'é mé chóna kjuachaxin nchexechón tí sín tsík'en la ko chjéhe ch'an sín kjuachón. A ntá tí Xjeen kjaxin chóna kjuachaxin tsochjéhe kjuachón tí nkexro tjinkaon tsochjéhe ch'an. ²² A ntá It'é la í sinchekitogexínhya ch'an ijje ninkexró. Kaín tí kjuachaxin kuénte ch'an chjéhe ch'an tí Xjeen kixin sinchekitogexín ch'an ijje chojni chjasintajni ²³ kixin ntá kaín chojni tsjikosáyehe sín tí Xjeen éxi yóhe tjikosáyehe sín tí It'é ch'an. Tí sín tjikosáyeheya tí Xjeen xikaha kjaxin tjikosáyeheya sín tí It'é kixin jehe ch'an mé tsíchr'an tí Xjeen.

²⁴ Ijnko nkehe tjeotan tsojtjonkará kixin tí jnkojinrá tjetotinhínra tí nkehe tjákua la ko tinkachónkirá tí T'aná, mé tí nkexro ichr'ánna, na mé xikaha ó chontará tí kjuachón la ko tsjasótíahyará, na mé kuitohérá tí ntia chrók'uénxínra, la ntá jie kjuankíxínra tsochontará tí kjuachón jnkochríxín. ²⁵ Ijnko nkehe tjeotan tsojtjonkará kixin ó tsí tí yaon, na mé jie tíha, mé xikaha tsonhen kixin tí sín tsík'en tsinhín sín tsonixja tí Xjeen Dios. A ntá tí sín tsitekaon sín na mé ts'ejóchón sín. ²⁶ Tí It'é mé chóna ch'an kjuachaxin tsjanjon ch'an tí kjuachón la ko jehe ch'an mé chjéhe ch'an kjuachaxin tí Xjeen kixin kjaxin tí Xjeen tsjanjon tí kjuachón ²⁷ la ko kjaxin chjéhe ch'an kjuachaxin tí Xjeen ch'an sinchekitogexín tí ijje chojni chjasintajni kixin jehe mé tí Xjeen Dios K'óna Chojni. ²⁸ Chraonhyará tjetjonkará xikaha. Na mé ó tsí tí yaon kixin kaín tí sín tsík'en mé tsinhín sín tsonixja ch'an. ²⁹ A ntá ts'axrxjén sín tí tòye la tí sín kjuích'e sín xra jína mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'in Jesús

³⁰ Tí jehó kjuachaxin kuéntana xitjahya sit'a ninkehó xra. A ntá jie ntákitogaxián tí ijie éxi k'uetqanna T'aná. A ntá tí nkehe ntákitogaxián la jína ntoá kixin tjinkakonhya sit'a éxi tjínkavan. Náhi. Éxi tjinkaon T'aná, tí nkexro ichr'ánna, mé xikaha tjet'a. ³¹ A ntá tí chróxrjanka kixin nkexrí imá jína janhan la tíha la ninkehó kjuachaxin chróchóntahya.

³² Tjen í jnko nkeexo tjechrónka nkexrí tjén janhan a ntá ó ñona kixin tí nkehe chrónka ch'án la sínkí. ³³ Jahará tsikéuñhénrá chojni kjuíkjanhankíhi sín tí ch'ín Juan kixin nkexrínchi tjén janhan. A ntá tí nkehe tsíkjatéhe ch'án la chaxín ntoá tiha. ³⁴ Kjánchó chontiaxinhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kixin jahará jina chrókuaará. ³⁵ Tí ch'ín Juan kjuák'e éxí yóhé ijnko xrohi kjuák'eche k'uínkaséyanxín la ko jahará kócháhará xíkaha, kjánchó séhya kóxrjínhanrá tí xrohi a. ³⁶ Kjánchó síin nkehe antsí tjeotan tjakoxxin nkexrí tjén janhan, a ntá kánhyó tjeotan tí nkehe tsíchrónka tí ch'ín Juan. Tí xra tjét'a, mé tí xra kjuanjon T'aná sit'a tsjixinna tí xra, na mé tíha mé tjakoxxin kixin chaxín T'aná tsíchr'án k'uinka. ³⁷ Kjaxin jehe T'aná, tí nkeexo ichr'anna, mé chrónkaxín ch'án nkexrí tjén janhan. A ntá jahará naxa kíenhyará tí nkehe nixja ch'án la ko k'uikonhyará ch'án ³⁸ la ko kjaxin itén ch'án kuítóehya nkaya kjára kixin tjinkákonhyará tsítekaonrá tí Xjeen Dios tsíchr'án tsiki. ³⁹ Jahará nchekuáxinrá jina tí xroon tsíkjin tí sín tsíchrónka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochr'ín. A ntá tí nkehe tsíkjin sín ósé mé chrónka kuénte janhan. ⁴⁰ Kjánchó jahará tjinkákonhyará tsochjinará tí tjén janhan kixin chrók'uayéhérá tí kjuachón a.

⁴¹ Janhan na tjéyáhya kixin chojni chrókjuikosáyana sín. ⁴² A ntá janhan ó ñona kixin jahará la tjeuhyará Dios. ⁴³ Mé k'uinkaxian janhan tí kjuachaxin kuénte T'aná. Kjánchó jahará la títékákonnyará. A ntá tí chrókú í jnko nkeexo kjuachaxin chrókuaikitsjénxin asén ó, a ntá tíha mé tjinkáonrá chrókúitekákónhénrá. ⁴⁴ ¿Nkexrí chrókúitekáonrá jahará kixin tjéyará kixin tí chojni chjasintajni chrókjuikosáyahará sín, a ntá tjéyáhyará tí kjuachaxin chrókjuanjon jnkokoqá Dios? ⁴⁵ Tsontáchróhyará kixin janhan tsjánchá jje tí jahará nkayakon T'aná. Náhi. Ch'ín Moisés mé tsjanchia ch'án jje tí jahará kixin tsontáchrórá kixin jehe ch'án kuinkachónkirá. ⁴⁶ Kja tí jahará chrókúitekáonrá nkehe tsintáchró ch'ín Moisés ntá chrókúitekáonrá tí janhan kixin tí xroon tsíkjin ch'án mé chrónka kuénte tí janhan. ⁴⁷ A ntá tí títékákonnyará tí nkehe tsíkjin ch'án, ¿ntá nkexrí chrókúitekákónnará nkehe ntáxrjan janhan? —ichro ch'án.

6

*Ch'ín Jesús kjuanjon ch'án nkehe kjóne in'ó mil chojni
(Mt. 14.13-21; Mr. 6.30-44; Lc. 9.10-17)*

¹ A ntá chr'éxin ntá sákjuí ch'ín Jesús k'uatóye ch'án tí ntayaon Galilea na mé tí ntayaon Tiberias tíha. ² A ntá nchónhya chojni tinkáchréhe sín kixin k'uikon sín tí kjuaxroan jje kjuasin ch'án kjuínchekitóhe ch'án jina tí sínníhi. ³ A ntá jehe tí ch'ín Jesús chr'ín ch'án ijnko jna na ntá ntaha kjuák'etjaxin ch'án la koí tí sín k'uájiko ch'án a. ⁴ A ntá í séhya ts'ixín tí kia pascua a mé kié tí sín judío a. ⁵ A ntá tí ch'ín Jesús k'uikon ch'án kixin nchónhya chojni chr'ín sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketí chrók'uenani nkehe sine kaín tí chojni a? —ichro ch'án.

⁶ Mé xíkaha ntáchró ch'án kixin síná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjan ch'án. ⁷ Ntá kjuátehe ch'ín Felipe ntáchró ch'án kixin:

—Kjonté doscientos chichaon denario chróchóntani chrók'uínáxin tí niotja la naxa chrókjuachahya chrók'uáyéhe jnkoinko sín tot'ó tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchró ch'án kixin:

⁹ —Níhi tjen ijnko xjan ntoa chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni síin? —ichro ch'án.

¹⁰ A ntá ntáchró ch'ín Jesús kixin:

—Tétuñhén tí sín síin a kixin ts'ixitjaxin sín —ichro ch'án.

A ntá nchónhya ika yoa síin na ntá ntaha k'uixitjaxin sín na mé éxí in'ó mil chojni k'uixin sín. ¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikeyehe sín chjéhe sín kaín tí sín sitjaxin a. Xíkaha kjaxin k'óxikeyehe sín tí koche. A ntá kaín sín kjóne sín éxí tjinkaon sín. ¹² Kjuixin kjóne sín ntá k'uetuñhen ch'ín Jesús tí sín k'uájiko ch'án ntáchró ch'án kixin:

—Tjénájínrá tí nkehe tot'ó síxéhe sín kixin ts'itjáyanyha ninkehó —ichro ch'án.

¹³ Ntá xíkaha jehe sín kjuenájín sín kjuínchekaón sín teyó ntaxra tí tot'ó tí in'ó niotja tsík'óna noa cebada síxéhe sín tí kjuixin tsíkjine sín. ¹⁴ A ntá tí sín kjóne tí niotja k'uikon sín tí kjuaxroan jje kjuasin ch'ín Jesús ntáchró sín kixin:

—Jehe ch'án mé chaxín tí nkeexo tsíchr'án Dios kixin itsi tí chjasintajni tsjakoheni ch'án —ichro sín.

¹⁵ Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxehen sín ch'án tí xra rey kixin chrók'uetóan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntíha.

Éxi ijnko ntja xikaha kjuítaón ch'in Jesús tí ntayaon
(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'in Jesús k'uínkajinxin sín jnà sákjuí sín chrínta ntayaon ¹⁷ k'uit'ótjen sín ijnko ntabárcó kjuankixin sín ts'atòye sín ntayaon sátsji sín chjasin Capernaum. Na ó k'uixin tie na naxá kjanhya ch'in Jesús. ¹⁸ Ntá kjuankixin chjéhe xrínto tsanqa ntá kjuankixin tinkákjaminkí ntá. ¹⁹ A ntá tió kjuacha sín á in'ó o injon kilómetro ntá xrinahya k'uikon sín tí ch'in Jesús tinkákóchjinehe ch'án tí ntabárcó, éxi ijnko ntja tjetjitaón ch'án tí ntá, ntá k'uikon sín ntá imá chrakon sín. ²⁰ Kjánchó ntáchro ch'án kixin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcó. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'in Jesús

²² A ntá tí yaon chr'éxin na mé tí sín kúitohe tóhe ntayaon na mé ó nohe sín kixin jnkokoáxón ntabárcó k'uékjak'e ntíha la ko ó nohe sín kixin ch'in Jesús kjá ní sátsjikohya sín ch'án na mé k'uikon sín kixin jehó tí sín k'uájiko ch'án sátsikí sín. ²³ Kjánchó sín ntabárcó úxín chjasin Tiberias tinkákóchjinehe tí nó kjónexín sín tí niotja kjuanchaxín ch'in Jesús kjuasáyé Dios. ²⁴ A ntá tió k'uikon sín kixin kohya ch'in Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabárcó ntá sákjuí sín chjasin Capernaum sákjuíkjayá sín tí ch'in Jesús.

Ínchéni Jesús mé éxi niotja tjanjon kjuachón

²⁵ A ntá tóhe ntayaon xéta sín tí ch'in Jesús ntá kjuanchankíhi sín ch'án kixin:

—Maestro, ¿nesá k'uinka ntíhi? —ichro sín.

²⁶ Ntá kjuátéhe ch'in Jesús ntáchro ch'án kixin:

—Ó nòna kixin jahará tjéyará tí janhan kixin kjónterá niotja kókjahará, la jehya kixin kiéxinxrá tí kjuaxroan kjuásian. ²⁷ Chrókjuich'ehyará tí xra chrók'uite tí nkehe chrókjónterá tjoka tsjeje ó. Náhí. Chrókjuéyará tí nkehe chrókjuéjehya chrókjónterá chrók'uayéxinxrá tí kjuachón jnkochrixín. Tí nkehe tjanjon tí Xjeen Dios K'óna Chojní mé chrókjónterá kixin It'é ch'án mé tjákoxin ch'án kixin tí Xjeen ch'án mé chóna kjuachaxién tí jehe ch'án —ichro ch'in Jesús.

²⁸ A ntá kjuanchankíhi sín ch'án kixin:

—¿Nkexrí chrókjuich'eni chrokjúinkexiteyáni nkexrí tjinkaon Dios? —ichro sín.

²⁹ A ntá kjuátéhe ch'in Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kixin:

—¿Nkehe tí kjuaxroan chrókjuákóxianni chrók'uikonni kixin ntá chrókuitekaonni tí jaha? ¿Nkehe tí xra ch'e jaha? ³¹ Tí sín tsík'axrjénixinni k'uéjío sín ósé mé kjóne sín maná k'óna niotja tió k'uixin sín nteje mé xikaha tí xroon kuénte Dios tsíkjin ijnko nkexro ósé ntáchro kixin: “Kjuanjon ch'án tí nkehe kjóne sín mé niotja tsíkixin nkaya nkajní”* —ichro sín.

³² A ntá kjuátéhe ch'in Jesús ntáchro ch'án kixin:

—Ijnko nkehe tjeoan tjonkará kixin jehya ch'in Moisés kjuanjon tí maná k'óna niotja k'uínkajinxín nkaya nkajní. Náhí. T'aná mé tjetjanjon tí niotja chaxín jína k'uínkajinxín nkaya nkajní. ³³ Tí niotja tjanjon Dios mé tí nkexro k'uínkajinxín nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kixin:

—Jaha ínchéni, jnkochrixín chjehéni tí niotja a —ichro sín.

³⁵ A ntá ntáchro ch'in Jesús kixin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá. ³⁶ Kjánchó éxi k'uétjonkará senó na ó k'uikonrá tí janhan na kjónté naxá titekákonhyará. ³⁷ A ntá kaín tí sín chjina T'aná la tsoghjina sín tí janhan. A ntá kaín tí sín tjejótóchjinehe sín tí janhan la tsétuanhya sín kixin sátsji sín. ³⁸ Janhan k'uínkaxian nkaya nkajní jehya tí xra tóxrjina chrókjuí't'a. Náhí. K'uinka kixin chrókjuí't'a tí xra tóxrjinhín tí nkexro tsíchr'ánna. ³⁹ A ntá T'aná mé tí nkexro tsíchr'ánna mé tjinkaon ch'án kixin sintak'itjáyanyha nínkexró tí sín chjina ch'án na mé tjinkaon ch'án kixin janhan mé sintaxechón kaín sín tí yaon tsjixixín. ⁴⁰ Mé xikaha tjinkaon tí nkexro tsíchr'ánna kixin kaín tí sín ts'íkon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrixín. A ntá janhan sintaxechón sín tí yaon tsjixixín —ichro ch'án.

⁴¹ A ntá tí sín judío kjuankixin sín kjonta sín tí ch'in Jesús kixin tsíntáchro ch'án kixin jehe ch'án mé tí niotja k'uínkajinxín nkaya nkajní. ⁴² Mé ntáchro sín kixin:

* 6:31 Salmo 78.24

—¿Á Jehya tí Jesús, it'é mé it'in José, na mé chóxinni tí it'é la ko tí iné ch'án? ¿Ntá nkekuènté ntáchro ch'án kixin nkajni k'uínkajinxin ch'án? —ichro sín.

⁴³ Ntá kjuátehe ch'ín Jesús ntáchro ch'án kixin:

—Tjtoherá tjóntahyará tí janhan. ⁴⁴ Kohya nkexro chrókóchjina tí tjén janhan tí chrókjuínkítsahya T'aná. A ntá tí sín tóchjina na mé sintaxechón sín tí yaon tsjixixín. ⁴⁵ Na mé tí sín k'uéchrónka itén Dios ósé mé tsíkjin sín xroon ntáchro kixin: “Dios mé tsjakohe ch'án kain chojni.”† A ntá kaín tí sín tsíkinhin tí nixja T'aná la ko kjuakohe ch'án sín mé sítóchjina sín tí tjén janhan.

⁴⁶ Jehya kixin itjen ijnko chojni tsík'ikon T'aná. Náhí. Jehó tí nkexro kujxin tí tjen Dios mé tsík'ikon ch'án Dios. ⁴⁷ Chaxin tí nkehe tjéxrxjanka kixin tí sín titekaon sín tí janhan mé ó tsochóna sín kjuachón jnkochrixin. ⁴⁸ Janhan na mé tí niotja tjanjon kjuachón. ⁴⁹ Tí sín k'uaxrjenixínrá k'uéjío ósé kjóne sín tí maná k'óna niotja tió k'uéjío sín neje, a ntá kjónté ik'uén sín k'uítjayan sín. ⁵⁰ Tí nkehe xrxjanka mé tí niotja k'uínkajinxin nkaya nkajni, a ntá tí sín sine tí niotja a mé ts'enhya sín. ⁵¹ Janhan mé tí niotja tjechón k'uínkajinxin nkaya nkajni. A ntá tí sín sine tí niotja a mé ts'ejóchón sín jnkochrixin. Tí niotja tsjánjuan ts'ejóchónxin chojni chjasintajni mé ntóna tíha —ichro ch'ín Jesús.

⁵² A ntá tí sín judío mé sítjité sín itjo sín kichó sín ntáchro sín kixin:

—¿Nkexri chrókjuanjon ch'án ntøe ch'án chrókjóne? —ichro sín.

⁵³ A ntá kjuátehe ch'ín Jesús ntáchro ch'án kixin:

—Ntá tsojtjonkará kixin tí sintehyará ntøe tí Xjeen Dios K'óna Chojni, la ko tí ts'ihyará ijnje ch'án, ntá tsochontahyará kjuachón jahará. ⁵⁴ Tí sinterá ntóna la ko it'irá jnina ntá tsochontará kjuachón jnkochrixin la ko janhan mé sintaxechónrá tí yaon tsjixixín. ⁵⁵ Kixin ntóna na mé chaxín nkehe ine chojni la ko jnina na mé chaxín nkehe it'i chojni. ⁵⁶ Tí sín ine ntóna la ko it'i sín jnina mé jnkokoá tjenkayáxinkian sín la ko janhan mé xríkian sín. ⁵⁷ T'aná tsíchr'án ch'án tí janhan mé chónta kjuachaxin, a ntá janhan mé tjechónxin tí jehe ch'án. Ntá tí sín sine tí ntóna mé ts'ejóchónxin sín tí janhan. ⁵⁸ A ntá tjénixja kuènté tí niotja k'uínkajinxin nkaya nkajni na mé yóehya tí maná tsík'óna niotja kjóne tí sín tsík'axrjenixínrá ósé kixin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajni ntá ts'ejóchónrá jnkochrixin —mé chro ch'ín Jesús.

⁵⁹ Kain tíha mé kjuakohe ch'án tí sín tsíkójnkotséxin tí njnko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochrixin

⁶⁰ A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntáchro sín kixin:

—Imá xra tí nkehe chrónka ch'án. ¿Xá nkexro chrókuinhin tíha? —ichro sín.

⁶¹ A ntá kónohe ch'ín Jesús kixin xíkaha tóxakonhen sín kíenxínhya sín tí nkehe tsíntáchro ch'án ntá kjuanchankíhi ch'án sín kixin:

—¿Á kjaxínrá tjínkákonhyará tsinhúnrá tíhi? ⁶² ¿Ntá nkexri tsonhen chrók'uikonrá kixin tí Xjeen Dios K'óna Chojni mé sátsji ch'án inaá tí nó tsíkixin ch'án tí tsíkjak'e ch'án ósé? ⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjetjjonkará na mé kuènté tí Nchakuen Dios na mé tjejóchónxin chojni. ⁶⁴ Kjánchó isorá naxa titekákonnahyará —ichro ch'án.

Mé xíkaha ichro ch'án kixin tí xrankixín ó kónohe ch'án kixin nkexro tí sín tsitekakuenhya sín ch'án la ko kónohe ch'án kixin nkexro sinchekji ch'án. ⁶⁵ A ntá ntáchro ch'án kixin:

—Méxra xíkaha k'uétjjonkará kixin ninkexró tsochjina tí tjén janhan tí tsjínkítsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'ín Jesús ntá xrinahya kuítóhe sín, í chrèhya sín ch'án. ⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxínrá tjínkáonrá xíkaha sáchrókjuirá? —ichro ch'án.

⁶⁸ Ntá kjuátehe ch'ín Simón Pedro kixin:

—Jaha Inchéni, ¿nkekuènté tjanchankíhíni á sáchrókjui ni ókjé? Jaha tí tan chronka a mé tsochóntaxínni kjuachón jnkochrixin ⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'ín Jesús ntáchro ch'án kixin:

—Janhan kjuéyá tí kain rá teyórá la ko jnkojínrá ntíhi mé ts'ónará ijnko jínahya —ichro ch'án.

⁷¹ Tíha mé t'axrxjénin tí ntáchro ch'ín Jesús chrónka ch'án kixin ch'ín Judas Iscariote, tíha it'é mé it'in Simón, mé ijnko tí teyó sín tsíkjeýá ch'án ntá kjónté sinchekji ch'án tí ch'ín Jesús.

7

Tí sín jnkokoá kichó ch'ín Jesús mé kuítékakuenhya sín ch'án

¹ Ntá kjuixin tíha ntá k'uáji ch'ín Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án. ² Kjánchó ó kuichjina tí yaon kia ntá tí sín judío sich'éna sín itsjé its'van tsjasixín sín kia. ³ ³ A ntá tí sín kichó ch'ín Jesús ntáche sín ch'án kixin:

—Chrókuitoahya ntihi. Sáchrókjuia estado Judea kixin ntá kjaxín tí sín chréhe tí jaha tjejó ntiha chrók'uikon sín tí kjuaxroan tsjásian. ⁴ Kixin tíó tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhi. Chrók'uikon kaín xín chojni síin chjasintajni —mé chro sín.

⁵ Xikaha ntáchro tí sín kichó ch'án kixin kjaxín jehe sín titekakuenhya sín tí jehe ch'án. ⁶ A ntá kjuátēhe ch'ín Jesús ntáchro ch'án kixin:

—Naxá kjuixrakáhya tí hora kuéntana tsjásian kjuaxroan. Ntá jahará la cualquier hora tjinkáonrá jina chrók'uikonrá kjuaxroan. ⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jina tí nkehe tjejóche sín. ⁸ Jahará la sátjírá tí kia a. A ntá janhan la tjíhja kixin naxá kjuixrakáhya tí hora kuéntana —ichro ch'án.

⁹ Mé xikaha ntáchro ch'án ntá kuítóhe ch'án estado Galilea.

Itjen ch'ín Jesús tí kia a

¹⁰ A ntá ó kjuixín sátsíkji tí sín jnkokoá kichó ch'ín Jesús ntá jehe ch'án la kjaxín sákjui ch'án tí kia a kjánchó noxínhya xritjak'e ch'án. ¹¹ A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jina ch'án”; kjánchó í so sín ntáchro sín kixin: “Jehya chojni jina ch'án, méxra imá ch'iyehé ch'án chojni”, ichro sín.

¹³ Kjánchó noxínhya kjo sín xikaha kixin chrakonhen sín tí sín judío a.

¹⁴ A ntá ó kjuíji jnkosíki tí kia a ntá k'uixenhen ch'ín Jesús tí njnko jíé ntá kjuankixin ch'án kjuako ch'án. ¹⁵ A ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakóehya ch'án? —ichro sín.

¹⁶ Ntá kjuátēhe ch'ín Jesús ntáchro ch'án kixin:

—Tí nkehe tjákua la jehya kuéntana na mé tí xra kuènte tí nkexro tsíchr'ánna k'uinka. ¹⁷ Tí jnkoinrá tjinkáonrá chrókjuinchexiteyéhérá éxí tóxrjínhin Dios la tsonohará á chaxín kuènte Dios tí nkehe tjákua ó á kuéntana tíha. ¹⁸ A ntá tí nkexro tjako tí nkehe t'axrjenixin kja sín ó mé xikaha ch'e kixin tjinkaon sín kixin tí chojni ó mé chrókóntehe sín ch'án kjuasáya. A ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

¹⁹ ¿Á jehya ch'ín Moisés tjahará tí itén Dios chrókuitekáonrá? Kjánchó nijnkorá kuítékakuenhyará tí nkehe tsíkjin ch'án. ¿Méxra nkekuènté tjinkáonrá chrók'oyánrá tí janhan? —ichro ch'án.

²⁰ Ntá kjuátēhe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'óyán tí jaha? —ichro sín.

²¹ Ntá kjuátēhe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chrakonrá.† ²² A ntá ch'ín Moisés tsík'etoan kixin xjaanrá ntoa itsa xjan xroye, (kjánchó jehya ch'ín Moisés kjuankixin ch'án kjuako ch'án tíha, na mé tí sín tsík'axrjenixinrá kjuankixin sín kjuako sín tíha). Mé xikaha nchekará xjan tí xroye a kjónté yaon t'ok'éheni. ²³ A ntá xikaha nchekará xjan xroye tí yaon t'ok'éheni kixin xikaha chrókjuinchek'itjáyankíhyará ninkehó tí nkehe k'uetóan ch'ín Moisés, ¿ntá nkekuènté kixin nínkákonnará tí janhan kixin kjujntakjtohá jina ijnko chojni tí yaon t'ok'éheni? ²⁴ Chrókjuanchahyará jíé kixin tí nkehe t'íkonxínrá ikonrá ó. Chrókjuenkayáxinrá tí nkehe jina tóxrjínhin Dios —mé chro ch'ín Jesús.

Ch'ín Jesús chrónka kixin nketí k'uaxrjenixin ch'án

²⁵ A ntá iso sín chjasín Jerusalén kjuankixin sín kjo sín kichó sín kjuanchankí sín kixin:

—¿Á jehya tí ch'ín a xritjeyá sín chrók'óyán sín? ²⁶ Ntá jie noxín tjen ch'án nixja ch'án kohya ninkexró nínkakonhen ch'án. Kjá tí síxreé titekaon sín kixin tí nkexro a chaxín Cristo tíha. ²⁷ Kjánchó ó noheni nketí tsíkjxin ch'án. A ntá tíó tsi tí nkexro Cristo ntá ninkexró tsonohya nketí tsjxin ch'án —ichro sín.

* 7:2 Levítico 23.34 † 7:21 Juan 5.2-9

²⁸ A ntá ch'ín Jesús kjuák'ekjako ch'án tí n̄ínko jié ntá kuínhin ch'án ḱixin x̄ikaha kjo sín, ntá itsen nixja ch'án ntáχρο ch'án ḱixin:

—Chaxín choxinrá tí janhan la ko nohará nketí chjasin tsíkj́ixian. Kjánchó jehya ḱixin k'uinka sintaxiteyá tí nkehe ntáχρο asenná ó. Ó k'uinka ḱixin ichr'ánna tí nkexro chaxín tjechón tjen nkaya nkajní. Jahará naḡa chonhyará tí nkexro a. ²⁹ Janhan la choxian ch'án ḱixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

³⁰ Ntá chrótsé sín ch'án chrókjuak'echj́ina sín ch'án ntá ḱjonté ninkexró tséhya sín ch'án ḱixin naḡa kjuanjonhya Dios kjuachaxin chrótsé sín ch'án. ³¹ Kjánchó itsjé chojni kuítekaon sín tí jehe ch'án. A ntá ntáχρο sín ḱixin:

—A ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echj́ina sín ch'án

³² A ntá tí sín fariseo kuínhin sín nkehe tí ntáχρο chojni ḱixin nkexrí tjen ch'ín Jesús, ntá jehe sín la ko tí sín nchat'á t'et'otan k'u'et'ughen sín iso sín policia kuénte n̄ínko tsotsé sín ch'án tsjak'echj́ina sín ch'án. ³³ A ntá ntáχρο ch'ín Jesús ḱixin:

—Kj́ixin í séhya tsjak'é n̄ihi ts'ejóni ntá sáxikj́iya tí tjen tí nkexro ichr'ánna. ³⁴ A ntá jahará tsjeyará tí janhan na ts'itjahyará ḱixin xitjahya tsjasánrá tí tsjak'é janhan —ichro ch'án.

³⁵ A ntá tí sín judío kjuanḱixin sín kjuanchankíhi sín kíchó sín ḱixin:

—¿Ntá nketí nó sátsji ch'án ḱixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákjan tí sín nixja nkíva griego ḱixin ntá tsjakohé ch'án tí sín griego?

³⁶ ¿Nkexrí t'axrxéjin tí nkehe ntáχρο ch'án ḱixin tsjeyáni ch'án na ḱjonté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntarío tjechón

³⁷ A ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáχρο ch'án ḱixin:

—Kj́a tí jnkójínrá ik'uénrá ntá xrákirá its'irá ntá. ³⁸ A ntá éxi ntáχρο xroon Itén Dios ḱixin tí sín titekaon sín tí janhan na mé nkaya asén sín ts'óna ijnko río ts'axrje intá tjechón —ichro ch'án.

³⁹ Mé x̄ikaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naḡa tíhya tí Nchakuen Dios ḱixin ch'ín Jesús naḡa sáttj́ihya ch'án nkaya nkajní.

Jnkokoáhya kjuenkayáxin tí chojni

⁴⁰ A ntá iso sín tió kuínhin sín tí nkehe ntáχρο ch'ín Jesús ntá ntáχρο sín ḱixin:

—Kj́a chaxín tí ch'ín i mé tí profeta ó tsíkji —ichro sín.

⁴¹ Ikjé sín ntáχρο sín ḱixin:

—Jehe ch'án mé tí nkexro Cristo —ichro sín.

A ntá í so sín ntáχρο sín ḱixin:

—¿Xá nkekuénté chrókjuixín Galilea tí nkexro Cristo? ⁴² Tí xroon tsíkjin sín ósé mé chrónka ḱixin tí nkexro Cristo mé ts'axrjenixin tí sín k'uaxrjenixin tí ch'ín rey David la ko tsjixín ch'án chjasin Belén mé tí chjasin k'uékjak'e ch'ín David —ichro sín.

⁴³ Mé x̄ikaha jnkokoáhya kjuenkayáxin sín kaín sín ḱixin nkexro tí ch'ín Jesús. ⁴⁴ Iso sín tjínkaon sín sáchrókjuiko sín ch'án chrókjuikjéhe sín ch'án kjánchó ninkexró kjuich'ehya x̄ikaha.

Tí síxreé kuítekakonhya sín tí ch'ín Jesús

⁴⁵ A ntá tí sín policia kuénte n̄ínko mé kjan sín tí tjejó tí sín fariseo la ko tí sín nchat'á t'et'otan. Ntá tí sín a mé kjuanchankíhi sín tí sín policia ḱixin:

—¿Nkekuénté kjuíkoahyará ch'án? —ichro sín.

⁴⁶ Ntá kjuátéhe tí sín policia ḱixin:

—Kohya ninkexró nixja éxi x̄ikaha nixja tí ch'ín a —ichro sín.

⁴⁷ Ntá ntáche tí sín fariseo tí sín policia ḱixin:

—¿Á kjaxinrá kuítóherá kjuít'ayahará ch'án? ⁴⁸ ¿Á kuítekaon tí jehe ch'án jnkójín tí sín t'et'otan kuénténi o tí sín fariseo? ⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín ḱixin:

⁵¹ —Tí ley kuénténi la kohya kjuachaxin sinchekjasóteni ijnko chojni tí naḡa kienhyani nkehe nixja ch'án la ko kienhyani tí jié kjuasin ch'án —ichro ch'án.

⁵² Ntá kjuátéhe sín ntáχρο sín ḱixin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsónoha ḱixin nijnko tí sín k'uéchrónka itén Dios tsíkj́ixínhya sín tí estado Galilea —ichro sín.

Ijnko tjan kjuasin jie chóna ókjé chojni ntoa

⁵³ Ntá jnkoinko tí sín xika sín sákjuí sín ntøe sín.

8

¹ Ntá ch'ín Jesús mé sákjuí ch'án tí jna Olivo. ² Ntá tí kóyaon nchítjen ikjan ch'án k'uúixenhen ch'án tí njnko jié a la ko kain xín tí chojni mé kóchjinehe sín ch'án. Ntá kjuák'etjaxín ch'án kjuankíxín ch'án kjuako ch'án. ³ Ntá tí sín tjako tí ley la ko tí sín fariseo mé kjuíkao sín ijnko tjachjin kónoxín kixin chóna tjan ókjé chojni ntoa. Ntá kjuák'e sín tjan jnkosiné tí sín tjejó ntiha. ⁴ Ntá ntáche sín tí ch'ín Jesús kixin:

—Maestro, tí tjan i kónoxín kixin kjuasin tjan jie chóna tjan ókjé chojni ntoa. ⁵ A ntá tí ley tsíkjin ch'ín Moisés mé t'etøan kixin ixro chrók'óyánxinni tí chojni chjin xíkaha ch'e. ¿A ntá jaha, nkechrua? —ichro sín.

⁶ Mé xíkaha ichro sín kixin tjinkaon sín kixin ách'e ntoáhya chrókjuatehe ch'ín Jesús ntá chrókjuanchia sín jie. Ntá ch'ín Jesús mé k'uísén ch'án kjinxín ch'án dedo tja ch'án monte a.

⁷ Ntá naxa tinkákjanchankíhi sín ch'án. Ntá k'uínkatjen ch'án k'uetøan ch'án kixin:

—Xá nkeexo tí tjejorá ntihi chónahya ninkehó jie mé saoxín chróchjéhe sín tjan xro —ichro ch'án.

⁸ Ntá xík'isén ch'án inaá ikjin ch'án tí nche inaá. ⁹ Ntá tí sín a mé kuínhin sín tí nkehe k'uetøan ch'ín Jesús ntá kósuèhe sín kixin koí sín chóna sín jie, ntá jnkoinko jnkoinko sín, sásítji sín na mé saoxín tí ch'ín antsí má táda ch'án sákjuí ch'án, ntá kain tí sín í so a sákjuí sín kjaxin sín.

Ntá jehó tí ch'ín Jesús la ko tí tjan a kuítóhe sín ntiha. ¹⁰ Ntá xrentoá ch'án la kjuanchankíhi ch'án tjan kixin:

—¿Nkekjá tí sín kjuanchia jie? ¿A kohya ninkeexo kjuínchejasótiahya ní? —ichro ch'án.

¹¹ Ntá ntácho tjan kixin:

—Náhi, Ìnchéni, ninkeexo —ichro tjan.

Ntá ntácho ch'ín Jesús kixin:

—Kjaxin janhan sjntakjasótiahya. Sátjia la í tjásinhya jie inaá —ichro ch'án.

Ch'ín Jesús mé xrohi t'inkaséyanxín chjasintajni

¹² Ntá ch'ín Jesús xínixjehé ch'án tí sín tsíkóchjina inaá ntácho ch'án kixin:

—Janhan mé xrohi t'inkaséyanxín chjasintajni. Tí tsochrehérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítíe a —ichro ch'án.

¹³ Ntá tí sín fariseo ntácho sín kixin:

—Jahvá tjechronka nkeexrí tjen jaha na mé chaxínhya tíha kixin jahvá tjechronka —ichro sín.

¹⁴ Ntá kjuátehe ch'ín Jesús ntácho ch'án kixin:

—Janhván tjetjonkará nkeexrí tjén na kjónté chaxín xrxanka kixin ó nòna nketí nó k'uinkaxian la ko nòna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá. ¹⁵ Jahará la éxi chojni chjasintajni ó tékará jie. A ntá janhan la tékahya jie ninkeexo. ¹⁶ Kjánchó ntoá chrókjuantakitøaxián ijíé chojni kixin jehya janhván t'a tíha, T'aná tjékjan, na mé tí nkeexo k'uetuanna k'uinka ntihi na mé jehe ch'án mé tjékjan ch'án ntihi ntakitøaxínkian ijíé chojni. ¹⁷ A ntá tí ley tsíkjin ch'ín Moisés mé ntácho kixin tí tsonoxín iyó sín tsochronka á chaxín xíkaha tsíkónhen ntá chrókuitekaon chojni. ¹⁸ Ntá janhan na mé tjéxrxanka nkeexrí tjén janhan la ko kjaxin T'aná mé tí nkeexo k'uetuanna k'uinka mé jehe ch'án kjaxin chónka ch'án nkeexrí tjén janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjen It'á? —ichro sín.

Ntá kjuátehe ch'ín Jesús ntácho ch'án kixin:

—Jahará la chonhyará tí janhan la ko kjaxin chonhyará T'aná. Tí chrókóchoxinrá tí janhan ntá kjaxin chrókóchoxinrá tí T'aná —ichro ch'án.

²⁰ Mé xíkaha chro ch'ín Jesús tí kjuák'ekjakoxxín ch'án tí njnko jié chjino ntacajón tjetóxroyéya chichaon tjanjon sín. Kjánchó ninkeexo tséhya sín ch'án kixin naxa kjuixrakáhya tí hora tsotsé sín ch'án.

“Xitjahya tsjasánrá tí nó sátsjiyá janhan”

²¹ Ntá ch'ín Jesús ntáche ch'án sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxa yamará ijíará. Xitjahya tsjasánrá tí nó sátsjiyá janhan —ichro ch'án.

²² Ntá ntácho tí sín judío ikjo sín kíchó sín kixin:

—¿Á ts'óyan ch'án asén ch'án kixin xíkaha ntácho ch'án kixin xitjahya tsjjini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntíhi k'uaxrjénixínrá. A ntá janhan la nkaya nkajní k'uaxrjénixian. Jahará la kuènte chjasintajni ntíhi. A ntá janhan la janhya kuènte chjasintajni. ²⁴ Mé xikaha tjonkará kixin tíó ts'énrá naxá tsochontará ijíará kixin tí tsítékákonhyará tí janhan, mé tí nkexro xráxin tjen,* ntá kjónté ts'énrá naxá tsochontará tí ijíará —ichro ch'án.

²⁵ Ntá kjuanchankí sín ntáχρο sín kixin:

—¿Nkexro tí jaha? —ichro sín.

Ntá kjuátéhe ch'ín Jesús ntáχρο ch'án kixin:

—Tí xrankixixín kjuankixian tjonkará kixin nkexro tí janhan. ²⁶ Itsjé nkehe chonta chróntáxrjan kixin chrókujintakitoaxián tí jje chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuínhan chrónka ch'án mé tjáqoha tí sín chjasintajni —ichro ch'án.

²⁷ Kjánchó jehe sín mé kíenxínhya sín kixin nixja ch'án kuènte It'é ch'án tjen nkaya nkajní.

²⁸ A ntá ntáχρο ch'án kixin:

—Tíó sijnchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxin tjen.† Ntá tsonohará kixin jehya janhan tétóan tí xra tjet'á. Náhi. Jehó tí nkehe kjuakona T'aná mé tjet'ákua. ²⁹ Tjéqian tí nkexro k'uetuanna k'uinka kixin jehí xráxin T'aná la kuitónahya janhván kixin xráxin ntaxiteyáha tí nkehe tóxrjnhjn ch'án —ichro ch'án.

³⁰ Mé xikaha ntáχρο ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsítóhe sín ijíé sín

³¹ Ntá nixjehe ch'ín Jesús tí sín judío kuínkáchónki sín ch'án ntáχρο ch'án kixin:

—Tí tsjótéhyará tí tan kjuákoahará ntá jahará chaxín discípulo kuèntana ³² la ko tsjátsoanrá tí nkehe chaxín, la ko tí nkehe chaxín mé tsotjáhará kjuachaxin tsaáxinrá, a ntá tsokohya nkehe ts'inkákonhen —ichro ch'án.

³³ Ntá kjuátéhe sín ntáχρο sín kixin:

—Jeheni mé tsik'axrjenixinni ch'ín Abraham na í xráxin kohya nkexro k'uena tí jeheni. ¿Nkekuènté ntáchrúa jaha kixin ts'áyéheñi kjuachaxin tsaáxinni? —ichro sín.

³⁴ Ntá ntáχρο ch'ín Jesús kixin:

—Tjetoan tí nkehe tjetjonkará kixin tí sín tjasin jje mé éxí chojni k'uíná chrokjuahya tsítóhe sín ijíé sín. ³⁵ A ntá ijnko chojni k'uíná la jnkochrínxínhya tsjak'e ch'án tí ntóe tí nkexro a. A ntá tí xjeen tí nkexro na mé jnkochrínxín tsítóhe ntíha. ³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonhen. ³⁷ Ó nóna kixin jahará tsik'axrjenixínrá ch'ín Abraham. Kjánchó tjínkáonrá chrók'oyánrá tí janhan kixin títékákonhyará tí nkehe tjéxrjanca. ³⁸ Janhan xrjanca tí nkehe k'uikuqa kixin nkexri tjen T'aná. A ntá jahará tjejonchexiteyéhérá tí nkehe kuínhínrá chrónka it'ará —ichro ch'án.

³⁹ A ntá jehe sín kjuátéhe sín ntáχρο sín kixin:

—It'éni mé ch'ín Abraham —ichro sín.

Kjánchó ntáχρο ch'ín Jesús kixin:

—A ntá tí jahará chróóochaxín xjeen ch'ín Abraham ntá chrókujich'erá éxí kjuích'e ch'án.

⁴⁰ A ntá tjetjonkará tí tan chaxín kuínhan chrónka Dios na kjónté chrók'oyánrá tí janhan. A ntá ch'ín Abraham xikahya kjuích'e ch'án. ⁴¹ Jahará tjejoch'erá éxí kjuích'e it'ará —ichro ch'án.

Ntá ntáχρο sín kixin:

—Jehya k'ónamá tí jeheni. Náhi. Chóntani jnkokqá It'éni mé Dios —ichro sín.

⁴² Ntá ntáche ch'ín Jesús tí jehe sín kixin:

—Tí chróóochaxín kixin Dios mé It'ará la ntá chrótuánará kixin janhan kjaxin k'uaxrjenixinna Dios k'uinkaxian tí tjen ch'án. Jehya kixin janhván k'uinka. Náhi. Dios mé ichr'ánna k'uinka. ⁴³ ¿Nkekuènté kixin tiénxínhyará tí nkehe tjonkará? Jehí tjínkákonhyará chrókuinhínrá tí nkehe xrjanca. ⁴⁴ Jahará mé xjeen Tsochen la ko jahará tsik'axrjenixínrá ch'án la ko tjínkáonrá sijnchexiteyárá tí nkehe tjínkaon ch'án. Tsochen mé xrankixixín kjuaya ch'án. Nunca k'uénixja ch'án ntoá. Xráxin ch'ía ch'án kixin xikahó tjenkayáxin ch'án. Jehe ch'án mé it'é kaín tí kjuach'ia. ⁴⁵ A ntá janhan tjetjonkará nkehe ntoá ntá títékákonnyará. ⁴⁶ ¿Á tjejorá jnkojinrá nohará nkerí jje kjuásian janhan? A ntá tí ntáxrjan tí nkehe ntoá, ¿ntá nkekuènté títékákonnyará? ⁴⁷ Tí sín tinkáchónki Dios mé tjínkaon sín chrókuinhin sín itén Dios. A ntá jahará la tinkáchónkihyará Dios ntá tjínkákonnyará chrókuinhínrá itén ch'án —ichro ch'ín Jesús.

Cristo la ó xráxin tjen ntá chr'éxin kjuák'e ch'ín Abraham

⁴⁸ A ntá tí sín judío ntáche sín tí ch'ín Jesús kixin:

* 8:24 Éxodo 3.14 † 8:28 Éxodo 3.14

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátēhe ch'ín Jesús ntáchro ch'án kixin:

—Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahyará kjuasáyé tí janhan. ⁵⁰ Janhan na tjéyáha nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jie tí sín kuitekakonhya. ⁵¹ Imá tjetooan tí nkehe tjétjonkará kixin tí tsitekaonrá tí nkehe tjákua la í ts'énhyará —ichro ch'án.

⁵² Ntá kjuátēhe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrua kixin tí tsitekaonni tí nkehe tjákua jaha ntá í ts'énhyani, ichrua. ⁵³ ¿Xá imá tétooan jaha la ntá kánhyó t'etooan it'éni Abraham? Jehe ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátēhe ch'ín Jesús ntáchro ch'án kixin:

—Tí chrókjuikosáyaha asenná na mé sínkíhya tíha. A ntá T'aná mé tjikosáyana ch'án na ntá jahará ntáchrór kixin jehe ch'án mé Dios kuéntará. ⁵⁵ Kjánchó chonhyará ch'án. A ntá janhan choxian ch'án. Tí chróntaxrjan kixin janhan chonhya ch'án ntá chrókóyóna tí jahará chrókjuit'ayahará. Kjánchó janhan na choxian ch'án la ko ntaxiteyáha tí nkehe t'etooan ch'án. ⁵⁶ Ch'ín Abraham tí nkexro tsik'axrjenixinrá la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uikon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha naxa chontahya cincuenta nánó, ¿na ntá nkekuénté ntáchrua kixin ó k'uikuan tí ch'ín Abraham? —ichro sín.

⁵⁸ Ntá kjuátēhe ch'ín Jesús ntáchro ch'án kixin:

—Imá tjetooan tí nkehe tjétjonkará kixin naxa kohya ch'ín Abraham mé xráxin itjen janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án nínko ntá chr'éxin k'uaxrjéxin ch'án ntiha. K'uátsínka ch'án jnkosiné tí tjejó sín sákjuí ch'án.

9

Ch'ín Jesús kjuínchekitqhe jína ijnko ch'ín tsíkokjéxin t'ikonhya ch'án

¹ K'uátsínka sín ijnko ntáa ntá k'uikon ch'ín Jesús ntiha tjen ijnko ch'ín tsíkokjéxin t'ikonhya ch'án. ² Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿nkekuénté tsíkokjéxin ch'án t'ikonhya ch'án? ¿Á ijé it'é o iné ch'án o á ijé ch'án? —ichro sín.

³ Ntá kjuátēhe ch'ín Jesús ntáchro ch'án kixin:

—Jehya ijé ch'án la ko jehya ijé it'é la ko iné ch'án. Náhi. Jehí xikaha tsíkonhen ch'án kixin tí kjuachaxién Dios tsjakoxin kixin tsitooxin ch'án jína. ⁴ Naxa nchakotjin t'ichjánxin sít'a tí xra tjinkaon tí nkexro tsich'ránna. Ntá ts'ixin tie ntá kohya ninkexró tsjacha sich'e xra. ⁵ Naxa itjen janhan mé ntihi chjasintajni na mé janhan xrohi t'inkaséyanxin tí chjasintajni —ichro ch'án.

⁶ Ntá ó kjuixin ntáchro ch'án tíha ntá kuíkete ch'án ntaaten ch'án intsi nche k'óna nchet'o ntá kuátematóxin ch'án ikon tí ch'ín t'ikonhya. ⁷ Ntá k'uétuénhen ch'án tí ch'ín t'ikonhya kixin:

—Sátjia tí pila tjáa nta it'in Siloé t'ontia kuan —ichro ch'án. (A ntá tí ihnié Siloé mé t'axrjéxin nkívee sín kixin K'uítuénhen.)

Ntá sákjuí tí ch'ín t'ikonhya k'ónti ch'án ikon ch'án ntá kjan ch'án k'uikon ch'án. ⁸ Ntá tí sín ntqé chjinaxón ntqé ch'án la ko tí sín k'uék'ikon sín kixin t'ikonhya ch'án mé ntáchro sín kixin:

—¿Á jehya tí ch'ín í k'uékjak'etjajin ch'án k'uékjanchak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhi, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátēhe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'ikuan jaha? —ichro sín.

¹¹ Ntá kjuátēhe ch'án ntáchro ch'án kixin:

—Ijnko ch'in mé it'in Jesús mé kjuich'éna ch'an nchet'o kuátematóxin ch'an kuān la ntá k'ueṭuanna ch'an kixin satsjia ti pila tjia ntá nchek'in sín Siloé ts'ontia kuān, ichro ch'an. Ntá sákjuia k'ontia, ntá xríñahya ó k'uíkuan —ichro ch'an.

¹² Ntá kjuanchankíhi sín ch'an ntáchro sín kixin:

—¿Nketi tjen tí ch'in a? —ichro sín.

Ntá kjuáteḡhe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'in k'uek'ikonhya kuitḡhe jina

¹³ Ntá tí sín a sákjuiko sín tí ch'in k'uek'ikonhya sákjuichréhe sín tí sín fariseo a. ¹⁴ A ntá tí yaon t'ok'éhe sín mé tsíkijich'éna ch'in Jesús tí nchet'o kjuínchekitoéxín jina tí ch'in k'uek'ikonhya. ¹⁵ A ntá tí sín fariseo xíkjančankíhi sín ch'an inaá kixin nkexrí kuitḡhe ch'an jina t'ikon ch'an jie. Ntá kjuáteḡhe ch'an ntáchro ch'an kixin:

—Kuátematóxin ch'an nchet'o kuān, ntá k'ontia kuān ntá jie t'íkuan —ichro ch'an.

¹⁶ Ntá iso tí sín fariseo ntáchro sín kixin:

—Tí chojni a jehya kuénte Dios kixin chántahya ch'an kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókuasin ch'an kjuaxroan jie tí chánta ch'an jie? —ichro sín.

Mé xíkaha jnkokónhya kjuenkayáxin tí jehé sín. ¹⁷ Ntá xíkjančankíhi sín tí ch'in k'uek'ikonhya inaá kixin:

—¿Ntá jaha nkechrua nkexro tíha tí nkexro kjuíntak'ikuan? —ichro sín.

Ntá kjuáteḡhe ch'an ntáchro ch'an kixin:

—Janhan ntáxrjan kixin jehé ch'an mé ijnko nkexro chrónka Dios —ichro ch'an.

¹⁸ Kjánchó tí sín judío kuitékaonhya sín kixin chaxín k'uek'ikonhya ch'an ntá jie t'ikon ch'an. Ntá k'uiyehé sín tí it'é la ko tí iné tí ch'in tsíkitoḡhe jina. ¹⁹ Kjuanchankíhi sín ntáchro sín kixin:

—¿Á xjaan tíhi tí ntáchrórá kixin tí tsíkokjéxin ch'an t'ikonhya ch'an? ¿Ntá nkexrí jie t'ikon ch'an? —ichro sín.

²⁰ Ntá kjuáteḡhe tí it'é la ko tí iné ch'an ntáchro sín kixin:

—Ó noheni kixin xjeenni ch'an la ko noheni kixin tí kokjéxin ch'an t'ikonhya ch'an.

²¹ Kjánchó noehyani nkexrí kixin t'ikon ch'an jie la ko noehyani nkexro kjuínchekitoḡhe ch'an jina. Tjančankíhírá ch'an, ó nteto ch'an, ntá jehé ch'an tsochrónka ch'an kixin nkexrí kuitḡhe ch'an jina —ichro sín.

²² Mé xíkaha kjuáteḡhe tí it'é la ko tí iné ch'an kixin chrakonḡen sín tí sín judío kixin ó kjuixín chrónka tí sín judío kixin tsjanjonhya sín kjuachaxín ts'ixenhen njnko tí sín titekaon kixin ch'in Jesús mé tí nkexro Cristo. ²³ Mé xíkaha ntáchro tí it'é la ko tí iné ch'an kixin chrókuanchankíhi sín ch'an, ó nteto ch'an, ichro sín.

²⁴ Ntá yóxin xik'iyehé tí sín judío tí ch'in k'uek'ikonhya ntá k'ueṭuēnhen sín ch'an kixin:

—Tjetsjehe Dios ntá ntoá chrónka kixin ó noheni kixin tí ch'in a na chánta ch'an jie —ichro sín.

²⁵ Ntá tí ch'in k'uek'ikonhya kjuáteḡhe ch'an kixin:

—Nonahya á chánta ch'an jie ó á chántahya ch'an jie. Jnkokóá nkehe nóna kixin senó k'uek'ikonhya ntá jie t'íkuan —ichro ch'an.

²⁶ Ntá xíkjančankíhi sín ch'an inaá kixin:

—¿Nkexrí kjuich'e ch'an kixin kjuíntak'ikuan ch'an? —ichro sín.

²⁷ Ntá kjuáteḡhe ch'an ntáchro ch'an kixin:

—Ó kjuixín tjončará kjánchó titekákonhyará. ¿Nkeuēnté tjínkáonrá kixin tsotjónčará inaá? ¿Á kjaxinrá tjínkáonrá tsochréhérá ch'an? —ichro ch'an.

²⁸ Ntá kóninkakonhen sín ch'an la k'uántaxínḡin sín ch'an la ko kjuáteḡhe sín kixin:

—Jaha la chréhé tí chojni a. A ntá jeheni na chréhēni tí nkehe k'ueṭoan ch'in Moisés. ²⁹ Ó noheni kixin Dios k'ueñixehé ch'in Moisés. A ntá tí ch'in a la noehyani nketi tsíkijxin ch'an —ichro sín.

³⁰ Ntá kjuáteḡhe tí ch'in ntáchro kixin:

—Imá ókjé tíha. Tí ch'in a mé kjuínček'ikonna. A ntá jahará ntáchrórá kixin noahyará nketi tsíkijxin ch'an. ³¹ Ó noheni kixin tienhya Dios tí nkehe tjanchia tí chojni chánta jie. Jehó tinḡin ch'an tí nkehe tjanchia tí sín titekaon Dios la ko nchexiteyéhé sín tí nkehe tjínkaon ch'an. ³² Nunca kienhyéni kixin ijnko nkexro chrókjuínček'ikon ijnko chojni tsíkokjéxin t'ikonhya. ³³ A ntá tí nkexro a tí chrókujxinhya ch'an tí tjen Dios la kjá ninkehó nkehe xitjahya chrókjuich'e ch'an —ichro ch'an.

³⁴ Ntá kjuáteḡhe tí sín fariseo ntáchro sín kixin:

—Jaha la nchónhya jje chonta tió kokjîha. A ntá jie zá tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjexín ch'án tí nínko a sátsji ch'án.

Ntakótán nchakuen sín

³⁵ Ntá kuínhin ch'ín Jesús kixin xikaha k'uetuénhen tí sín judío kixin ts'axrjexín nínko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—Zá tinkachónkia tí Xjeen Dios K'óna Chojni? —ichro ch'án.

³⁶ Ntá kjuátêhe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

³⁷ Ntá kjuátêhe ch'ín Jesús ntáchro ch'án kixin:

—Ó k'uikuan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'in ch'án tqté ch'ín Jesús ntáchro ch'án kixin:

—Ijie kuítékavan tí jaha Închéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sintakitoxián ijje chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

⁴⁰ A ntá iso tí sín fariseo k'uejontaxín kuínhin sín kixin xikaha ntáchro ch'ín Jesús, ntá kjuanchankíhi sín ch'án kixin:

—Zá kjaxin jeheni ntakótáni? —ichro sín.

⁴¹ Ntá kjuátêhe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahará jje. Kjánchó ntáchrorá kixin t'ikonrá. Méxra chontará jje —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kixin:

—Imá tjetoan tí nkehe tjetjonkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé. ² A ntá tí nkexro t'ixenxín tí puerta na mé nkexro t'ayakonhen tí kolélo a. ³ La ko tí ch'ín tjet'ayakonhen tí puerta a mé tsakitjêhe ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsqan va itén ch'án. Ntá t'iyexín ch'án jnkojnko ihnié jnkojnko tí kolélo kuènte ch'án ntá ts'axrjexín va ntqé va. ⁴ Ntá t'íkon ch'án kixin k'uaxrje kaín va ntá kuítonhen ch'án va ntja ntá tinkáchrêhe va kixin tjatsqan va itén ch'án. ⁵ Chrohya va tjichréhe va ijnko chojni ókjé na mé tsinkéhe va tí chojni a kixin tjatsqanhya va itén ókjé chojni —ichro ch'án.

⁶ Mé xikaha ntáchro ch'ín Jesús kjuíncheyóexín ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jína

⁷ Ntá chrónka ch'ín Jesús inaá ntáchro ch'án kixin:

—Ijnko nkehe tjetoan tsotjonkará kixin janhan la éxi tí puerta t'ixenxín tí kolélo tí t'inkachjina va. ⁸ Kaín tí sín kuítónxin ntja kui senó mé xíchee la ko chrókueé. La ntá tí kolélo la ántosén va tí nkehe ntáchro tí jehe sín. ⁹ Janhan mé tí puerta a mé t'ixenxínrá tí janhan mé tsaará la mé tsoyohará tí kolélo siín kjuachaxín ts'axrjexín va tí kórré va sátsjikjine va la ko siín kjuachaxín ts'ixenhen va tí ts'inkachjina va inaá.

¹⁰ A ntá xíchee mé jehó chrókueé la ko tjinkaon chrók'óyan la ko chrókjuinçek'itjáyan kaín nkehe. A ntá janhan k'uinka kixin tsochontaxínrá kjuachón na mé kjuachón jnkochrín. ¹¹ Janhan mé ijnko pastor jína a ntá tí pastor jína mé ts'ényákonhen tí kolélo a. ¹² A ntá tí nkexro ch'e xra tjinkaon chrókjuacha ó na mé ts'íkon ch'án itsi ijnko kolobo tsítqhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsínká va la sátsjichroe va. ¹³ Mé xikaha tí chojni tjinkaon chrókjuacha tí xra chrókjuich'e ó la mé sátsji. A ntá tí kolélo la ántosén ch'án kuáhya ch'án kuénté tí jehe va.

¹⁴⁻¹⁵ A ntá janhan mé ijnko pastor jína. Mé xikaha T'aná chóxin ch'án tí janhan la ko kjaxin janhan choxian tí jehe ch'án mé xikaha choxian janhan tí sín éxi kolélo kuéntana la ko jehe sín mé chóxin sín tí janhan. Ntá ts'ényákonhan tí sín éxi kolélo kuéntana. ¹⁶ Kjaxin chonta kolélo naxa jehya kórré va ntihi mé kjaxin t'ichjánxin sátsjicakjián va. A ntá tí tsitekakonna va ntá ts'óna jnkoqá kórré va la ko jnkoqá nkexro ts'ayakonhen va.

¹⁷ Tjuana T'aná kixin kjónté its'én la tsoxechónna inaá. ¹⁸ Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én

la ko chonta janhan kjuachaxin tsoxechónna inaá. Tíhi mé k'uetuanna T'aná —ichro ch'in Jesús.

¹⁹ Tió kuínhin tí sín judío tí nkehe ntáchro ch'in Jesús ntá kjuankíxin jnkokoáhya kjuenkayáxin sín. ²⁰ Nchónhya tí jehe sín ntáchro sín kíxin:

—¿Nkeuènté tinhínrá tí nkehe ntáchro ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

²¹ Ntá ikjé sín ntáchro sín kíxin:

—Xikahya chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinçek'ikon ijnko chojni t'ikonhya? —ichro sín.

Tí sín judío kuítékakuenhya sín tí ch'in Jesús

²² A ntá tí nchakuen kin tí chjasin Jerusalén k'uúxin kia xraxinkakonxín sín tí yaon tsíkjin tsík'óna nínko. ²³ Ntá ch'in Jesús itjen ch'án tí nínko tí ntaşin kuènte Salomón. ²⁴ Ntá tí sín judío k'uantatjen sín tí ch'in Jesús kjuanchankíhi sín ch'án kíxin:

—¿Hasta nkesá ts'ejóchónhenni tsinhinni jína? A ntá jie chronka ntoá kíxin á chaxín jaha tí Cristo —ichro sín.

²⁵ Ntá kjuátêhe ch'in Jesús kíxin:

—Ó tjonkará ntá naxa titekákonhyará. Kain tí xra tjet'a janhan tí kjuachaxin kuènte T'aná mé tjakoşin nkexro tí janhan. ²⁶ Kjánchó jahará titekákonhyará kíxin jahará la jehya kolélo kuéntana éxi tjonkará senó. ²⁷ Tí kolélo kuéntana mé tjatşoan va tí tanná la ko kjaxin janhan tjátşoan tí jehe va la ko jehe va mé chréhe va tí janhan. ²⁸ Janhan mé tjaha va tí kjuachón jnkochrín la í ts'itjáyannya va la ko ninkexró tsjachahya tsakitsjexín va tjaná. ²⁹ Ó kjuanjon T'aná, mé tí nkexro tjetóşin t'etşoan, na ninkexró tsjacha tsakitsjexín va tí tja ch'án. ³⁰ Janhan la ko T'aná na mé jnkokoá nkexro tíha —ichro ch'án.

³¹ Ntá tí sín judío kuákja sín xro chróchjéhe sín ch'án inaá. ³² Ntá kjuátêhe ch'in Jesús ntáchro ch'án kíxin:

—Nchónhya nkehe jína k'uikonrá kjuákoşian kjuachaxin kuènte T'aná. ¿Ntá nkeuènté chróchjinará xro? —mé chro ch'án.

³³ Ntá kjuátêhe tí sín judío kíxin:

—Jehya tí kjuaxroan jína tjáşian chrótjíaşianíni xro. Náhi. Jaha ijnko chojni ó ntá kjuincheyoé asán Dios na mé tsotjíaşianíni xro —ichro sín.

³⁴ Ntá ntáchro ch'in Jesús kíxin:

—Ntá ntáchro xroon itén Dios tsíkjin sín ósé kíxin ntáchro Dios kíxin: “Kjaxinrá éxi Dios tí jahará.”* ³⁵ Ntá ó noheni nkehe ntáchro xroon itén Dios na ntá xitjahya sitekakonhyani tíha. Mé xikaha ntáchro Dios kíxin éxi Dios jnkojnko nkexro k'uáyêhe itén ch'án. ³⁶ A ntá kjuéyána Dios ichr'ánna ch'án chjasintajni, ¿ntá nkeuènté ntáchrorá kíxin k'uantaxinhan Dios kíxin janhan ntáxrjan kíxin Xjeen Dios tí janhan? ³⁷ Kja tí chrókjuit'ahya tí xra ich'e T'aná la chrókuítékákonhyará. ³⁸ A ntá kjónté tjet'a tí xra a kjónté titekákonhyará tí janhan na mé chrókuítékáonrá tí xra tjet'a chrókoanoaxínrá chrókiénxinrá kíxin T'aná la ko janhan mé jnkokoá tjékian ch'án —ichro ch'án.

³⁹ Mé xikaha chrótsé sín tí ch'in Jesús inaá chrók'uijkjêhe ch'án ntá kjuachahya sín ntá sákjuí ch'án.

⁴⁰ Ntá ch'in Jesús xikjan ch'án tí í jnko lado ntarío Jordán inaá tí k'uékjak'e ch'in Juan k'uékjítexín ch'án chojni senó. ⁴¹ Ntá nchónhya chojni sákjuichréhe sín ch'án ts'ikon sín ch'án ntáchro sín kíxin:

—Chaxín ch'in Juan kjuasinhya ch'án kjuaxroan jié la kjónté ntoá tí nkehe chónka ch'án kuènte tí ch'in i —ichro sín.

⁴² Ntá nchónhya sín kuítékaon sín tí ch'in Jesús tí kjuíji sín ntiha.

11

Ik'uéen ch'in Lázaro

¹ Itjen ijnko ch'in níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta. ² Tí tjan María mé jnkokoá kichó tí ch'in Lázaro mé tí ch'in níhi na mé jehe tjan mé tí tjan kuíkítexín aceite xraxé toté Inchéni la ko kjuincheşámáşin tjan kaxíhi tjan toté ch'án.* ³ A ntá yóí tí kichó ch'án chjin ichr'án sín ijnko nkexro tsochéna tí ch'in Jesús kíxin:

—Inchéni jaha, tí nkexro choşian tjuèhé la níhi ch'án —ichro ch'án.

⁴ Ntá kuínhin ch'in Jesús ntá ntáchro ch'án kíxin:

* 10:34 Salmo 82.6 * 11:2 Juan 12.3

—Tí chìn chóna ch'án jehya kixin ónaá chrók'uitjáyanxón ch'án tí ts'en ch'án. Náhí. Tíha mé tsjakoxin tí kjuachaxin jié kuénte tí Xjeen Dios —ichro ch'án.

⁵ A ntá tí ch'ín Jesús la imá tjuèhè ch'án tí tjan Marta la ko tí tjan kichó tjan la ko tí ch'ín Lázaro. ⁶ Na ntá tió kuínhin ch'án kixin níhi ch'ín Lázaro na kjónté kuitqhe ch'án iyó yaon inaá tí nó kjuák'e ch'án. ⁷ A ntá chr'exin ntáche ch'án tí sín k'uájiko ch'án kixin:

—Sátsjini estado Judea inaá —ichro ch'án.

⁸ Ntá kjuátehe tí sín k'uájiko ch'án kixin:

—Maestro, naxa séhya tí sín judío ntiha chrótjáha sín xro tjinkaon sín chrók'oyánxian sín xro. ¿Á tjinkávan sátsjia ntiha inaá? —ichro sín.

⁹ Ntá ntáchro ch'ín Jesús kixin:

—Jnkojko yaon mé chóna teyó hora. Tió ixri chojni nchakotjin tsóténkixinhya sín ninkehó kixin t'inkaséyanxín xrohi chjasintajni a. ¹⁰ Tí sín ixri tie mé tsóténkixín sín nkehe kixin chónahya sín xrohi —ichro ch'án.

¹¹ Ntá chr'exin ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sjintakjayaqha ch'án —ichro ch'án.

¹² Ntá ntáchro tí sín k'uájiko ch'án kixin:

—Ínchéni, tí k'uájua ch'án la mé chrókuitqhe ch'án jína —ichro sín.

¹³ Kjánchó tí nkehe ntáchro ch'ín Jesús mé t'axrxjén kixin ó tsíkixin tsík'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjeua ch'ín Lázaro. ¹⁴ Ntá ntoá chrónka ch'ín Jesús kixin:

—Ó tsík'en ch'ín Lázaro. ¹⁵ Ntá chàna kixin kohyana ntiha kixin mé xikaha tsitékákónxínra. A ntá jie íntará sátsjitsjeheni ch'án —ichro ch'án.

¹⁶ Ntá ch'ín Tomás, kjaxin tjkjéxin sín ch'án ch'ín Nóhé, mé ntáche ch'án tí í so sín kixin:

—Sátsjini koíni kaín ní ts'enkaoni Ínchéni —ichro ch'án.

Ch'ín Jesús ntáchro ch'án kixin sinchexechón ch'án chojni inaá

¹⁷ Ntá kjuuji ch'ín Jesús kuínhin ch'án kixin ch'ín Lázaro la ó chóna noó yaon tsíkixxaráv ch'án. ¹⁸ A ntá tí chjasin Betania mé chjinaxón tí chjasin Jerusalén, chóna iyó kilómetro ko t'o kjínxin. ¹⁹ A ntá ítsjé tí sín judío sátsíkjitsjehe sín tí tjan Marta la ko tí tjan María tjeónixjehe sín kixin kánhyó ts'ává sín kixin tsík'én tí kichó sín a. ²⁰ Ntá kuínhin tjan Marta kixin ó kui ch'ín Jesús ntá k'uaxrxjén tjan nchia sjíxinhin ntja. A ntá tí tjan María kuitqhe tjan nchia. ²¹ Ntá tí tjan Marta ntáche tí ch'ín Jesús kixin:

—Ínchéni jaha. Chrókjuak'e ntihi ntá chrók'uenhya kichó ní. ²² Kjánchó ó nòna kixin Dios tsotjáha kaín nkehe tsjanchehé ch'án —ichro tjan.

²³ Ntá ntáchro ch'ín Jesús kixin:

—Tsoxechón kichuá inaá —ichro ch'án.

²⁴ Ntá ntáchro tjan Marta kixin:

—Ó nòna kixin tsoxechón ch'án tió tsoxechón kaín tí sín tsík'en, tí yaon tsjixixín —ichro tjan.

²⁵ Ntá ntáchro ch'ín Jesús kixin:

—Janhan mé ntáxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxa sjintaxechón sín inaá. ²⁶ La ko kaín xín tí sín naxa tjejóchón sín la tsitekaon sín tí janhan na ts'enhya sín. ¿Á títekávan xikaha ní? —ichro ch'án.

²⁷ Ntá ntáchro tjan kixin:

—Chaxín Ínchéni títekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsíkixxaráv nkexro Lázaro

²⁸ Ó kjuixin ntáchro tjan Marta xikaha ntá sákjuak'íyehé tjan kichó tjan María ntá imó chénka tjan kixin:

—Ntiha tjan Maestro t'iyghá ch'án —ichro tjan.

²⁹ Ntá kuínhin tjan María ntá tuénxín k'uínkatjen tjan sákjuitsjehe tjan tí ch'ín Jesús. ³⁰ Naxa tsík'ixenhya ch'án chjasin naxa tjan ch'án tí xéta ch'án tjan Marta. ³¹ Ntá tí sín judío tjeónixjehe tjan María kixin kánhyó ts'ává tjan, mé k'uikon sín kixin tjoka k'uaxrxjén tjan nchia, ntá kjuíchréhe sín tjan kjuenkayáxin sín kixin sátsji tjan tí tsíkixxaráv kichó tjan, ntaha tsjitsjánkama tjan ch'án, ichro sín.

³² Ntá tí tjan María mé kjuuji tjan tí tjan ch'ín Jesús ntá kjuák'exín toch'in tjan toté ch'án ntáchro tjan kixin:

—Ínchéni jaha, chrókjuak'e jaha ntihi ntá chrók'uenhya kichíná —ichro tjan.

³³ Ntá k'uúkon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án. ³⁴ Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Ínchéni, zá sátsjitsjehé? —ichro sín.

³⁵ Ntá tsjánka ch'ín Jesús. ³⁶ Ntá ntáchro tí sín judío kixin:

—Tsjuhérá kixin imá tjuéhe ch'án tí ch'ín tsik'en —ichro sín.

³⁷ Kjánchó í so sín ntáchro sín kixin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsi kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'avá asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro. ³⁹ Ntá k'uetóan ch'ín Jesús kixin:

—Tjakjían tí xro a —ichro ch'án.

A ntá tí tjan Marta mé kichó tí nkexro k'uén mé ntáchro tjan kixin:

—Ínchéni, kjá noha kixin kjá imá xra kixin ó chóna noó yaon tsík'en ch'án —ichro tjan.

⁴⁰ Ntá kjuátehe ch'ín Jesús ntáchro ch'án kixin:

—Ó tjonka kixin tsitékavan ntá ts'ikuan tí kjuachaxin jie kuente Dios —ichro ch'án.

⁴¹ Ntá kjuakjün sín tí xro a. Ntá ch'ín Jesús konta ch'án nkajni ntáchro ch'án kixin:

—It'eni, tjáncháha kjuasáya kixin ó kuínhín tí nkehe ntáxrjan. ⁴² Janhan na ó nòna kixin xráxin tjetinhín tí nkehe ntáxrjan ntá xikaha ntáxrjan jie kixin tsinhín tí sín tjejóntaxin ntihi ntá tsitekaon sín kixin jaha mé kuétoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kixin:

—Lázaro, t'axrjéxian méhe! —ichro ch'án.

⁴⁴ Ntá tí ch'ín tsík'en k'uaxrjéxin ch'án tòye, na tí tja ch'án la ko tí toté ch'án naxa tjejóchróntetoxin ka la ko tí nkayakon ch'án tjejkèxin ijnko ka. Ntá k'uetóan ch'ín Jesús kixin:

—Tjasintankará tí ka chróntetoxin ch'án kixin jína tsji ch'án —ichro ch'án.

Imó kjuenkayáxin sín kixin nkexrí ts'óyan sín tí ch'ín Jesús

(Mt. 26.1-5; Mr. 14.1-2; Lc. 22.1-2)

⁴⁵ Ntá itsjé tí sín judío sákjuikotoxin sín tí tjan María mé k'uúkon sín tí kjuaxroan kjuasin ch'ín Jesús ntá kuítekaon sín tí jehe ch'án. ⁴⁶ Kjánchó iso tí jehe sín sákjuitsjehe sín tí sín fariseo kjuichénka sín tí kjuaxroan tsikjasin ch'ín Jesús. ⁴⁷ Ntá tí sín fariseo la ko tí sín nchat'a t'etóan jnkokoá kójnkotséko sín tí sín antsí t'etóan, la ntáchro sín kixin:

—Xá nkexrí chrókjuich'ehe ní tí ch'ín a kixin jehe ch'án mé tjasin ch'án kjuaxroan jie? ⁴⁸ A ntá tí chrókuítóheni ch'án xikahó ntá kain xín chojni chrókuítekaon sín tí jehe ch'án, ntá tsi tí sín romano t'etóan sinchek'itjáyán sín tí nínkoéni la ko tí xra chóntani la ko tí nacióan kuénténi —ichro sín.

⁴⁹ Ntá ch'ín Caifás mé tí nkexro t'etuehenen tí sín nchat'a tí nánó a ntáche ch'án tí jehe sín kixin:

—Jahará la noahyará ninkehó tíha ⁵⁰ la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjasenni kixin ntá chrók'uitjáyanhya kuenté tí nacióan kuénténi —ichro ch'án.

⁵¹ Kjánchó ch'ín Caifás la jehya jehó ch'án chrókuenkayáxin ch'án tíha. Náhí. Jehe ch'án mé k'etuehenen tí sín nchat'a tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nacióan judía. ⁵² A ntá jehya tí nacióan kuente sín ó chrók'uenyákonhen ch'án. Náhí. Kjaxin kixin sincheaka ch'án kain tí sín ts'óna xjeen Dios tjejó sín kuenté chjasintajni. ⁵³ A ntá tí yaon a tí sín t'etuehenen tí sín judío mé kjuankixin sín kjuenkayáxin sín kixin chrók'óyan sín tí ch'ín Jesús.

⁵⁴ A ntá ch'ín Jesús la í noxínhya k'uájí tí k'uéjó tí sín judío, na mé k'uaxrjéxin ch'án tí estado Judea, sákjuí ch'án chjinaxón nteje, tí tjen ijnko chjasin it'én Efraín. Ntaha kuítóeko ch'án tí sín k'uájíko ch'án.

⁵⁵ Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjéxin sín chjasén sín sákjuí sín chjasin Jerusalén kixin ntaha tsoyáxinhin sín kixin tsotjóá sín kjónté naxa xrankixinhya ts'ixin tí kia pascua. ⁵⁶ Ntaha k'uájíkjeyá sín tí ch'ín Jesús k'uéjóxenhén sín tí nínko jie ntá kjuanchankíhi sín kichó sín kixin:

—¿Jahará nkechorá? ¿Á chrókjuí ch'án tí kia ní o náhi? —ichro sín.

⁵⁷ A ntá tí sín fariseo la ko tí sín t'etuehenen tí sín nchat'a na ó k'uetóan sín kixin tí siín ijnko nkexro nohe nketí tjen ch'ín Jesús chróchrónka sín kixin ntá jína chrókjuitsé sín ch'án chrókjuinchenteto sín ch'án la ko chrókjuak'echjina sín ch'án.

12

Jnko tjan kjuíncheká tjan aceite xraxé náxrjón toté tí ch'in Jesús
(Mt. 26.6-13; Mr. 14.3-9)

¹ Naxa t'itjáyan injon yaon ntá ts'ixín tí kia pascua. A ntá ch'in Jesús sákjuí ch'án chjasin Betania tí tjen ch'in Lázaro. Tí ch'in Jesús mé tsíkjinchexechón ch'án. ² Ntá ntíha kjóne sín ijnko kónjin kjuikosáyehe sín tí ch'in Jesús. A ntá tí tjan Marta mé kjuíncheyaxín tjan. A ntá tí ch'in Lázaro la ko í so sín k'uéjío sín kjóneko sín tí ch'in Jesús. ³ Ntá tjan María kujukao tjan it'ó litro aceite tsík'óna xroaon nardo imá tjete tsík'enaxín tjan ntá kjuíncheka tjan toté ch'in Jesús ntá kaxihí tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroaon. ⁴ Ntá ch'in Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'in Jesús, na mé tí ch'in sinchekji tí ch'in Jesús chr'éxin, mé ntáchro ch'án kixin:

⁵ —¿Nkekuenté kóxiha tí xroaon xraxé, chrókóxiin iní ciento chichaon denario kixin chrókjuinkitsa tí sín nòa? —ichro ch'án.

⁶ Kjánchó ch'in Judas la jehya ntáchro ch'án xikaha kixin chrókjuikonóhe ch'án tí sín nòa. Náhi. Ntáchro ch'án tihí kixin xráxin chee ch'án kixin jehe ch'án t'ayakonhen ch'án tí nkehe tjínká chichaon ntá xráxin teé ch'án tí chichaon tsíxrenájín ntiha. ⁷ Ntá ntáchro ch'in Jesús kixin:

—Nté títoghérá tjan. Tsíkjak'echjina tjan tí xroaon a kixin tí yaon tsoxrávána. ⁸ Tí sín nòa jnkochrín ts'ejokoará sín. A ntá janhan jnkochrínhya ts'ejóni —ichro ch'án.

Tí sín judío itjo sín nkexrí chrók'óyan sín tí ch'in Lázaro

⁹ A ntá itsjé tí sín judío k'uixikónohe sín kixin ch'in Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'in Jesús ó. Náhi. Kjaxin tjínkaon sín chrókjuitsjehe sín tí ch'in Lázaro mé tí ch'in tsíkjinchexechón ch'in Jesús. ¹⁰ Ntá tí sín nchat'á t'etoan mé kójnkotsé sín kjuenkayáxin sín chrók'óyan sín tí ch'in Lázaro kjaxin ¹¹ kixin itsjé tí sín judío kuítekaon sín tí ch'in Jesús kixin xikaha kjuínchexechón ch'án tí ch'in Lázaro ntá k'uaxrjekjanxín sín tí sín nchat'á.

K'uixenhen ch'in Jesús chjasin Jerusalén

(Mt. 21.1-11; Mr. 11.1-11; Lc. 19.28-40)

¹² Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin k'uixikónohe sín kixin tsjiji ch'in Jesús tí chjasin ntiha. ¹³ Ntá kóchrínjin sín chaan ntakajni kjuixinhin sín ntja itsjé ch'in Jesús, itsje sín, ntáchro sín kixin:

—Tjanchehení Dios kjuasáya. Imá jina tí nkexro kjuixín tí kjuachaxién It'eni tjen nkaya nkajni. Imá jina tí ch'in Rey ts'etuñhen tí nació Israel —ichro sín itsje sín.

¹⁴ Ntá tsík'itja ch'in Jesús ijnko kolócho la ntá kjuák'ekjen ch'án, éxi nixja itén Dios kixin:

¹⁵ Chrakonhyará jahará tjejorá chjasin Jerusalén,

tsjehérá ó tje kui tí ch'in Rey kuéntará,

tjekjen ch'án ijnko kolócho.*

¹⁶ A ntá tió kónhen tíha kíenxinhya tí sín k'uájiko ch'in Jesús kixin nkekuenté xikaha kónhen. A ntá chr'éxin tió kjuixín sákjuíjia ch'án nkaya nkajni ntá xraxinkaon sín kixin xikaha tsíkjin tí sín k'uéchrónka itén Dios ósé nkexrí tsñnhen ch'án, na ntá xikaha chaxín xiteyá tí chrónka sín senó kixin xikaha tsñnhen ch'án.

¹⁷ Mé xikaha kaín tí sín tsíkójnkotsé tí kjuák'e ch'in Jesús tió k'uíyehé ch'án tí ch'in Lázaro kixin ts'axrjéxin ch'án tí tóye tsíkjixravá ch'án ntá xechón ch'án mé tí sín a mé chrónka sín tí nkehe k'uíkon sín. ¹⁸ Mé xikaha sákjuixinhin sín tí ntja tsjixín ch'in Jesús, k'uixikónohe sín kixin xikaha tsíkjasin ch'in Jesús tí kjuaxroan jíé. ¹⁹ Mé xikaha ntáchro tí sín fariseo itjo sín kichó sín kixin:

—Tsjeherá kaín rá, ninkehó tsjachahyani sich'eni kixin kaín xín chojni sákjuíchréhe tí jehe ch'án —ichro sín.

Iso sín nkivee griego tjejá sín tí ch'in Jesús

²⁰ Iso sín nixja griego k'uéjójákjan tí sín sákjuí sín tí kia chjasin Jerusalén tsoxraxinkakonxín sín Dios. ²¹ Ntá kóchjinehe sín tí ch'in Felipe, chjasén ch'án mé Betsaida, estado Galilea, chrónóhehe sín ch'án kixin:

—Tjínkaonni chrók'uikonni tí ch'in Jesús —ichro sín.

²² Ntá ch'in Felipe sákjuíchenka ch'án tí ch'in Andrés. Na ntá yóí sín sákjuíchenka sín tí ch'in Jesús. ²³ Ntá ntáchro ch'in Jesús kixin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyéhe ch'án tí kjuachaxín kuente It'é. ²⁴ A ntá tsotjonkará ijnko nkehe chaxín kixin tí chrókjuítsinkahya ijnko noatrigó tí nche chrók'uenhya tí noa a, ntá jnkokoá noa chrókjuak'e. A ntá tí chrók'uén

* 12:15 Zacarías 9.9

tí noa a ntá chrók'óna nchónhya noa kixin chrótjá sín. ²⁵ A ntá tí nkexro imá tjuèhë asén kixin kohya nkehe chrók'uatínska na mé tsochóntahya ch'án kjuachón jnkochrixin. A ntá tí nkexro tjekuènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochóna ch'án kjuachón jnkochrixin. ²⁶ A ntá tí jnkójín nkexro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkójín sín sich'ena sín xra xikaha na mé T'aná mé tsjikosáyehe tí jehe sín.

Ch'in Jesús chrónka ch'án kixin its'en ch'án

²⁷ Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kixin sincheakaána ch'án tí nkehe tsona jie o náhí? Kjánchó xra ó k'uinka xikaha tsona. ²⁸ Jaha It'eni, tjákoxian tí kjuachaxin kuènte ihnjá —ichro ch'án.

Ntá kuínhin sín nixja ijnko nkexro nkajní ntáchro kixin:

—Ó kjuixin kjuákoxian tí kjuachaxin la ko xikaha xikjákoxian inaá.

²⁹ A ntá tí sín tjejóntáxin tsikinhin sín mé ntáchro sín kixin kjóna, la ko í so sín ntáchro sín kixin:

—Ijnko ch'in ángel nixjehe ch'án —ichro sín.

³⁰ Kjánchó ntáchro ch'in Jesús kixin:

—Náhi. Jehya kixin janhan tí jie chrókujinhan tí nixja ch'án. Náhi. Nixja ch'án kixin tsinhínra jahará. ³¹ Ntá jie tsitöexín tí ijie chojni chjasintajni na mé tí nkexro t'etöan chjasintajni mé ts'axrjehe ch'án tí xra t'etöan ch'án. ³² A ntá tíó tsjak'énkánia ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

³³ Mé xikaha chrónkaxin ch'án kixin nkexri ts'enxín ch'án. ³⁴ A ntá kjuátehe tí sín ntiha ntáchro sín kixin:

—Kuínhini nchekuáxin sín tí xroon tsíkjin sín ósé chrónka kixin Cristo la jnkochrixin tsjak'e ch'án. ¿Ntá nkekuènté ntáchrúa kixin tí Xjeen Dios K'óna Chojni t'ichjánxin tsjak'enkáni ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sín.

³⁵ Ntá ntáchro ch'in Jesús kixin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen tí xrohi t'inkaséyanxín ntja. A ntá náhi la ó ts'ixin tie. A ntá tí sín ixri tí sítié a mé noehya sín nketí sátsji sín. ³⁶ Titekáonrá tí xrohi tí naxa tjen t'inkaséyan kixin mé ts'onará chojni kuènte t'inkaséyan —ichro ch'án.

Ntá kjuixin chrónka ch'in Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonhya sín tí ch'in Jesús

³⁷ K'uékjasin ch'in Jesús nchónhya kjuaxroan jie k'uikonxín kon sín ntá kjónté kuítekakuenhya sín ch'án ³⁸ kixin mé xikaha tsoxiteyá tí nkehe tsintáchro ch'in Isaías tsíkjin ch'án ósé kixin:

Inchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jie kuènte ch'án.†

³⁹ Méxra kuítekakuenhya sín tí ch'in Jesús éxi tsíkjin ch'in Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín,

kixin ntá chrók'uikonhya sín,

la ko chrókiénxínhya sín,

kixin ntá chrókóchjinehya sín tí janhan kixin chrókjuintakitöha sín jina.‡ ⁴¹ Xikaha k'uéchrónka ch'in Isaías imá ósé kixin k'uék'ikon ch'án tí kjuachaxin jie kuènte Jesús ntá k'uéchrónka ch'án nkexri tsjak'e tí ch'in Jesús.

⁴² Kjánchó itsje tí sín judío t'etöan kuítekaon sín tí ch'in Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonhya sín kjuachaxin chrók'uixenhen sín tí njnko sín judío. ⁴³ Mé xikaha imá kóxrjínhin sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

Tí nkehe ntáchro ch'in Jesús mé tsitöexín ijie chojni

⁴⁴ Ntá itsen nixja ch'in Jesús ntáchro ch'án kixin:

—Tí titekáonrá tí janhan na mé jehya janhván titekáonrá na mé kjaxin titekáonrá T'aná, mé tí nkexro k'uétuanna k'uinka. ⁴⁵ Éxi tí t'ikonrá tí janhan mé xikaha t'ikonrá tí nkexro k'uétuanna k'uinka. ⁴⁶ A ntá janhan mé xrohi k'uinka chjasintajni kixin tí sín titekaon sín tí janhan ts'ejóhya sín tí sítié a. ⁴⁷ A ntá tí jnkójínra tindhínra tí nkehe xrajnka ntá titekáonnyarará la jehya janhan sintakjasótiará kixin jehya kixin k'uinka sintakjasóte chojni chjasintajni. Náhi. K'uinka kixin sintakaá chojni. ⁴⁸ A ntá tí titekákonnyarará tí janhan la ko titekákonnyarará tí tan kuéntana la ó siin nkexri tsitöexín ijjará, na mé éxi tí tan

† 12:38 Isaías 53.1 ‡ 12:40 Isaías 6.10

xrjanca mé Dios sinchekitōexin ijjará tí yaon tsjixixín chjasintajni. ⁴⁹ Jehya tí nkehe kuéntana tjéxrjanca. Náhi. T'aná na mé tí nkehe k'uetuanna k'uinka mé k'uetuanna nkehe tsōxrjanca la ko nkehe tsjáku. ⁵⁰ A ntá nõna kixin tí nkehe k'uetōan T'aná mé xranjonxin tí kjuachón jnkochríxin. Mé xikaha tí nkehe ntáxrjan mé tjéxrjanca kixin T'aná mé k'uetuanna.

13

Ch'in Jesús kjuínchek'ònti ch'an toté tí sín k'uájiko ch'an

¹ A ntá tí yaon xika tí ntóye tsjasin sín tí kia pascua. A ntá ch'in Jesús ó nohe ch'an kixin ó kjuixraká tí hora tsítóhe ch'an chjasintajni sátsjichréhe ch'an It'é ch'an. Xráxin tjuèhé ch'an tí sín kuente ch'an chjasintajni, a ntá jie tsjakoxxin ch'an kixin imá tjuèhe ch'an tí jehe sín.

² A ntá tí ch'in Tsochren tsík'etuenhen asén ch'in Judas Iscariote, it'é mé it'in Simón, kixin sinchejki ch'an tí ch'in Jesús. ³ Ntá ch'in Jesús la ó nohe ch'an kixin tsíkixin ch'an tí tjen Dios la ko xikjan ch'an sátsjichréhe ch'an Dios inaá. La ko ó nohe ch'an kixin It'é ch'an tsíkjanjon kjuachaxin ts'etugnen ch'an kaín xin nkehe. ⁴ Ntá naça tjejóhe sín ntá k'uínkatjen ch'in Jesús kuakitsje ch'an tí ka titsáte ch'an la kuákja ch'an ijnko ka xámáxin chojni t'ónti k'uínkat'óxin ch'an. ⁵ Ntá kuikja ch'an ijnko nkehe ntá, ntá kjuankixin ch'an kjuínchek'ònti ch'an toté jnkojnko tí sín k'uájiko ch'an la ko kjuínchexámáxin ch'an tí ka k'uínkat'óxin ch'an.

⁶ Na ntá tió kjujixraká tí tjen ch'in Pedro, a ntá ntáchro ch'in Pedro kixin:

—Jaha Inchéni la, ¿nkekuènté chrókjuínchek'óntia toténi? —ichro ch'an.

⁷ Ntá kjuátehe ch'in Jesús ntáchro ch'an kixin:

—Jaha la naça tiénxinha ya nkehe tjet'a janhan. Chr'éxin ntá tsiénxian nkekuènté tjet'a tíha —ichro ch'an.

⁸ Ntá ntáchro ch'in Pedro kixin:

—Jaha la sinchek'óntihya toténi —ichro ch'an.

Ntá ntáchro ch'in Jesús kixin:

—Tí sintak'óntihya tí jaha la kjá ninkehó tsochontahya tí janhan —ichro ch'an.

⁹ Ntá kjuátehe ch'in Simón Pedro ntáchro ch'an kixin:

—Náhi, Inchéni. Jehya tí toténi ó chrókjuínchek'óntia. Kjaxin itjani la ko ikjani chrókjuínchek'óntia —ichro ch'an.

¹⁰ Ntá ntáchro ch'in Jesús inaá kixin:

—Tí sín tsíkixin tsík'ónti la t'ichjánxinha kuenté sín ts'ónti sín inaá. Náhi. Jehó toté sín ó mé t'ichjánxin naça ts'ónti kixin kuenté la ó tjoá. A ntá jahará la ó tjoárá, kjónté kénhyará —ichro ch'an.

¹¹ Mé xikaha ntáchro ch'in Jesús kixin kénhya sín tjoá sín kixin ó nohe ch'an nkebro sinchejki ch'an.

¹² Ntá tió kjuixin kjuínchek'ónti ch'an toté sín kaín sín ntá xik'inkáya ch'an inaá tí ka kuítsáte ch'an ntá kjuák'etjxin ch'an tí k'uínkatjenxin ch'an. Ntá ntáchro ch'an kixin:

—¿A kiénxinrá tí nkehe kjuít'a? ¹³ Jahará la ntáchorá kixin janhan Maestro kuéntará la ko Inchará. Chaxin ntoá ntáchorá kixin janhan tíha. ¹⁴ Janhan tí Maestro kuéntará la ko inchará kjuíntak'óntia totará. A ntá jahará kjaxin xikaha chrókjuínchek'óntirá toté kichuárá. ¹⁵ Janhan mé kjuákoxxin kixin xikaha chrókjuich'erá éxi kjuít'a janhan. ¹⁶ Ijnko nkehe chaxin tsotjonkará kixin tí sín ch'exón xra mé t'etōanhya sín éxi t'etōan tí lámoe sín, la ko tí sín k'uáyéhe sín ijnko xra t'etōanhya sín éxi t'etōan tí sín kjuanjon tí xra a. ¹⁷ Tí chrókiénxinrá nkehe tíha la ko chrókjuínchexitayará la chrókócháhará má.

¹⁸ Jehya kaín rá xikaha ntáxrjan. Ó nõna kixin nkebro kjuéyá janhan. Kjánchó t'ichjánxin tsóxitayá tí nkehe tsíkjin sín ósè ntáchro kixin: “Ijnko nkebro tjeñkian mé tsjanjonkian.”*

¹⁹ Mé xikaha tjetjonkará senó kixin tió ts'atsinka tíha ntá tsitékáonrá kixin janhan mé tí nkebro xráxin tjen. ²⁰ Ijnko nkehe tjetōan tjetjonkará kixin tí tsjánjonrá kjuachaxin tsitōhe tí chojni ichr'an janhan, mé éxi yóhe chrókjuánjonrá kjuachaxin chrókuitōhe tí janhan, a ntá tí tsjánjonrá kjuachaxin tsitōna janhan mé éxi yóhe chrókjuánjonrá kjuachaxin chrókuitōhe tí nkebro k'uetuanna k'uinka —ichro ch'in Jesús.

Ch'in Jesús chrónka kixin ch'in Judas sinchejki ch'an

(Mt. 26.20-25; Mr. 14.17-21; Lc. 22.21-23)

²¹ Ntá kjuixin chrónka ch'in Jesús tíha, ntá kóxakonhen asén ch'an má ntá ntoá chrónka ch'an kixin:

—Ijnko nkehe tjetōan tsotjonkará kixin jnkojínrá tjejorá ntihi mé sinchejkiráni —ichro ch'an.

* 13:18 Salmo 41.9

²² Ntá tí sín k'uájiko ch'án kjuanjxin komáxin la ko í komáxin kichó sín kixin noehya sín nkexro tí ntáchro ch'án. ²³ A ntá ijnko ch'ín k'uájiko ch'ín Jesús imá tjuèhe ch'án itjen ch'án chjinoxón tí tjen ch'ín Jesús tjejóne sín. ²⁴ Ntá ch'ín Simón Pedro kjuakoxén seña k'uètuèhnen ch'án tí í jnko ch'ín a kixin:

—Tjanchankí ch'án nkexro tíha —ichro ch'án.

²⁵ A ntá tí ch'ín a na mé ántsí kóchjinehe ch'án tí ch'ín Jesús, ntá kjuanchankí ch'án ntáchro ch'án kixin:

—Ínchéni, ¿nkexro tíha? —ichro ch'án.

²⁶ A ntá kjuátehe ch'ín Jesús ntáche ch'án tí ch'ín a kixin:

—Sintakjata it'ò niotja, a ntá tí nkexro tsotjaha tí t'ò niotja a mé tí nkexro a —ichro ch'án. A ntá mé xikaha kjuínchekjata ch'ín Jesús it'ò niotja ntá chjéhe ch'án tí ch'ín Judas Iscariote, it'é ch'án mé it'ín Simón. ²⁷ Ntá k'uáyéhe ch'án tí niotja ntá tuénxín k'uixenhen asén ch'án tí ch'ín Tsochren. Ntá ntáche ch'ín Jesús tí jehe ch'án kixin:

—Tí xra tjinkávan sích'e la jaí tóxakonhan —ichro ch'án.

²⁸ Kjánchó nijnko tí sín tjejóne ntiha kienxínhya sín nkekuènté xikaha ntáchro ch'án.

²⁹ Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín kixin ách'e ch'ín Jesús mé k'uètuèhnen ch'án tí ch'ín Judas kixin ichrén nkehe sátsjik'ena ch'án kuènte tí kia a, o ách'e ichrén nkehe sinchekitjnhen ch'án tí sín nóa a. ³⁰ Ntá k'uáyéhe ch'ín Judas tí niotja, a ntá k'uaxrxjén ch'án ntiha. A ntá ó k'uixín tie.

Ijnko nkehe nixin k'uètoan ch'ín Jesús

³¹ A ntá ó kjuixín sátsikji ch'ín Judas, ntá ntáchro ch'ín Jesús kixin:

—A ntá jie tsonoxín tí kjuachaxin jie kuènte tí Xjeen Dios K'óna Chojni la ko tsjakoxin ch'án tí kjuachaxin jie kuènte Dios. ³² Na mé xikaha tí Xjeen Dios K'óna Chojni mé tsjakoxin tí kjuachaxin jie kuènte Dios. A ntá Dios mé tsjakoxin ch'án tí kjuachaxin kuènte Xjeen ch'án la tjoka tsoxiteyá. ³³ Xjeenni, í sehya naxá tsjak'é janhan ts'ejókoará ntihi. Ntá jahará mé ts'ajikéyará tí janhan. Ntá éxi yóhe k'uétjanka tí sín judío mé tjonqará kjaxinrá kixin: Ninkexró xitjaha tsjiji sín tí sátsjiyá janhan.† ³⁴ Ijnko nkehe nixin tétuanhanrá ijie kixin chrótjuèhérá kichuárá éxi yóhe tjahará mé xikaha chrótjuèhérá kichuárá. ³⁵ Tí tsotjuèhérá kichuárá ntá tsonoxén kaín xín chojni siín chjasintajni kixin tinkachónkirá tí janhan —ichro ch'án.

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án
(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankí ch'ín Simón Pedro tí ch'ín Jesús kixin:

—Ínchéni, ¿nketí sátsjia? —ichro ch'án.

Ntá kjuátehe ch'ín Jesús ntáchro ch'án kixin:

—Tí nó sátsjiyá xitjaha tsochréhérá jaí. Ntá chr'éxin tsjasánchréhérá ntiha —ichro ch'án.

³⁷ A ntá ntáchro ch'ín Pedro kixin:

—¿Nkekuènté xitjaha tsochráha tí jaha jaí? Kjonté chrók'uényákonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

—¿Á chaxín ts'enyákónna jaha? Ijnko nkehe chaxín tsotjónka kixin naxá tsotsjehya tí kochíntja la ó tsjixin sinchemána níya kixin chonhyana, tsixrua.

14

Jesús mé ntia sátsjixinni tí tjen It'éni tjen nkaya nkajni

¹ Tóxakuanhyará jahará. Titekáonrá Dios la ko kjaxin titekáonrá tí janhan. ² Ntoe T'aná nchónhya nchia siín ts'ejóni. A ntá tí xikaha chrók'uixín la xikaha chrótjónkará. Méxra sátsjiyá sintayóxian tí chrók'uejóni. ³ A ntá tí sátsjiyá sintayóxian, ntá tíó tsjixin ntá ts'ínka ínaá, ntá sátsjini kixin jahará kjaxin chrók'uejorá ntiha tí tsjak'é janhan. ⁴ Jahará la ó nohará nketí sátsjiyá la ko ó nohará tí ntja a —ichro ch'án.

⁵ Ntá kjuátehe ch'ín Tomás ntáchro ch'án kixin:

—Ínchéni, noehyani nketí sátsjia jaha. ¿A ntá nkexrí chrókónoheni tí ntja a? —ichro ch'án.

⁶ Ntá kjuátehe ch'ín Jesús ntáchro ch'án kixin:

—Janhan mé tí ntja la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jína tsjiji tí tjen T'aná. ⁷ Tí chrókjuátsoanrá tí janhan ntá xikaha chrókjuátsoanrá T'aná kjaxin. Na ntá ó choxinrá ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kixin:

—Ínchéni, tjtóhéní kixin tsochóxinni It'á. Táho mé tjinkaonni —ichro ch'án.

⁹ Ntá kjuátehe ch'ín Jesús ntáchro ch'án kixin:

† 13:33 Juan 7.33

—Felipe, óse tjeióni, ¿a ntá naxa tjátsoanhya tí janhan ní? A ntá xikaha tí t'ikonrá tí janhan na mé xikaha chrók'uíkonrá T'aná. ¿Nkekuénté tjanchána kixin chrókuítqohá chrók'uíkonrá tí T'aná? ¹⁰ ¿Á titekákonhya jaha kixin janhan jnkokoá tjékian T'aná, la ko T'aná tjen tí tjeñ janhan? Tí nkehe níxja janhan la jehya kuéntana. Náhi. T'aná tjékian janhan mé tjech'e ch'án tí xra kuénte ch'án. ¹¹ Titekáonrá kixin jnkokqa tjékian T'aná, a ntá T'aná itjen tí tjeñ janhan. Kjonté kuitekákonhyará xikaha la chrókuitekáonrá kixin tí kjuaxroan jié kjuáoxian k'uíkonrá. ¹² Ijnko nkehe chaxin tjeñkará kixin tí chaxin tsitekáonrá tí janhan ntá kjaxinrá tsjachará sich'erá xra yóhe tjet'a la ko kjaxin ixra antsí jié tsjachará sich'erá kixin janhan la ó sátsjiyá tí tjeñ T'aná. ¹³ Kaín nkehe tsjanchatóxixinrá tí nina na mé tsjánjuan kixin xikaha tsjáoxian tí kjuachaxin kuénte T'aná. ¹⁴ Tí chrén nkehe tsjanchatóxixinrá nina la janhan la tsjánjuan.

Ch'in Jesús chrónka ch'án kixin chaxin tsochr'an ch'án tí Nchakuen Dios

¹⁵ Tí chaxin tjuéhérá tí janhan ntá chrókuínchexiteyéhérá tí nkehe kuétuanhanrá. ¹⁶ Ntá tsoxrjannóahá T'aná kixin tsochr'an ch'án Nchakuen ch'án kixin tsjinkitsa tí jahará la ko sinchechéhe asánrá la mé ts'ejokoará jnkochrixín. ¹⁷ Jehé ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxinrá ch'án kixin tjejokoará ch'án la ko ts'ejokoará ch'án jnkochrixín. ¹⁸ Janhan na tsjtoáhyará nòerá jahórá, na mé tsokjan inaá kixin ts'ejóni. ¹⁹ A ntá séhya ntá tí sín chjasintajni ts'ikonhya sín tí janhan inaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na tjeçuán. ²⁰ A ntá tí yaon a chrókónohará kixin T'aná la ko janhan jnkokoá tjékian la ko kjaxin jahará la ko janhan jnkokoá tjejóni. ²¹ Tí nkexro nohe tí nkehe tétqan la ko sinchexiteyéhé sín mé xikaha tsjáoxin sín kixin chaxin tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehé sín la ko kjaxin janhan tsotjuahá sín la ko tsjáoxian nkexrí tjeñ janhan —ichro ch'in Jesús.

²² A ntá tí ch'in Judas, jehya tí ch'in Iscariote tíha, na mé kjuanchankí ch'án kixin:

—Inchéni, ¿nkekuénté jehóni tjáoxian, a ntá tjáqóexinnya tí chojni chjasintajni? —ichro ch'án.

²³ Ntá kjuátehe ch'in Jesús ntáchro ch'án kixin:

—Tí nkexro tjuèhe tí janhan mé sinchexiteyéhé tí nkehe tétqan. La ko T'aná mé tsotjuèhe tí jehé sín la ntá T'aná la ko janhan ts'ejókoni sín. ²⁴ A ntá tí sín tjuèhya tí janhan la mé nchexiteyéhya sín tí nkehe tjákua. A ntá tí nkehe tjákua tjejotínhínrá la jehya kuéntana. Náhi. Kuénte T'aná tí nkexro k'uetuanna k'uinka.

²⁵ Naxa tjejóni la tjetjekará kaín tíhi. ²⁶ A ntá Nchakuen T'aná tsochr'an ch'án kjuachaxin nina mé tsjinkitsa tí jahará la ko sinchechéhe asánrá la ko tsjáqohará kaín nkehe la ko sinchexaxinkaonrá kaín nkehe xrxanka.

²⁷ Kjuaxróxin tsjtohá la ko kjuaxróxin kuéntana tsotjahará. Jehya éxi tí kjuaxróxin chrókjuanjon tí sín chjasintajni. Náhi. Chrókóxakuenhya asánrá la ko chróchrakonhyará. ²⁸ Ó kuínhínrá ntáxrjan kixin sátsjiyá la ko tsokjan janhan ts'ejóni inaá. Tí chaxin tjuéhérá tí janhan ntá chrókócháhará tí kuínhínrá kixin sátsjiyá tí tjeñ T'aná kixin antsí t'etqan ch'án la kánhyó tétqan janhan. ²⁹ Senó tjetjekará tíhi kixin tíó tsqnhen tíha la ts'ikonrá ntá tsitekáonrá jahará.

³⁰ Ntá jie la í séhya tsonixjahará kixin tí jie itsi tí ch'in Tsochren, mé tí nkexro t'etqanhen tí sín chjasintajni. A ntá jehé ch'án la ninkehó t'etuannaha sín janhan. ³¹ Kjánchó t'ichjánxin kixin xikaha tsqnhen tí sín chjasintajni mé tsqnohe sín kixin tjuahá T'aná la ko nchexiteyéhá tí nkehe k'uetuanna ch'án. Ntá jie t'inkatjenrá sátsjixinni níhi.

15

Tí nta t'óna to uva la ko tí chaan nta

¹ Janhan mé éxi yóhe ijnko ntanòa tjechón itsa to uva la ko T'aná mé éxi yóhe tí nkexro t'ayakonhen tí nta a. ² Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'a ch'án kixin ntá ts'óna antsí má tsjé to. ³ A ntá jahará la kótjuáxinrá tí tanná k'uetjekará senó. ⁴ Tí tsjtoéhyará tí janhan ntá kjaxin janhan tsjtoahya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahórá tsjachahará sich'erá tí xra kuéntana tí tsjtohérá tí janhan.

⁵ Janhan na mé yóhe tí ntanòa, a ntá jahará la tí chaan tí ntanòa tsík'ayanta. Tí nkexro jnkokoá tjeñkayáxinkian mé tsjacha ts'óna nchónhya to. A ntá tí tsínkáchónkihya sín tí janhan la ninkehó xra tsjachahya sín sich'e sín. ⁶ A ntá tí nkexro jnkokoáhya tjeñkayáxinkian na mé éxi yóhe tí nta ch'ehya xra tsíkóchrínjin sín tsík'itji sín chrínta tí nonte a tsóxamá ntá tsoxrejo ntá tsoche.

7 'Ntá tí chaxín tsjtoéhyará tsinkachónkirá tí janhan la ko ts'itjáyanyará tí nkehe kjuákoahará ntá tsjanchiará ichrén nkehe tjinkáonrá la ts'ayéhé. 8 A ntá T'aná la tsochéhe ch'án tí ts'onará itsjé to. Mé xikaha tsjákoxinrá kixin tinkachónkirá tí janhan. 9 Janhan tjuahará tí jahará éxi tjuana T'aná. Chrókónohará kixin tjuahará. 10 Tí tsitékóonrá tí nkehe kuétuanhánrá ntá tsonohará kixin tjuahará éxi yóhé kjaxin janhan ntaxiteyá tí nkehe k'uetuanna T'aná ntá kónóna janhan kixin tjuana ch'án.

11 'Mé xikaha tjonkará kaín tíha kixin ntá éxi chàna mé xikaha tsjintaxín tsochéhe asánrá. 12 Tí nkehe kuétuanhánrá la mé tíhi kixin chrótjuéhérá kichuárá éxi tjuahará xikaha. 13 Ninkexró chrókóyóhé éxi tí nkexro imá tjuèhe tí sín chóxin ch'án ntá ts'enyákonhen ch'án tí jehe sín. 14 Jahará la chojni choxian tí tsitékóonrá tí nkehe tétuanhánrá. 15 Ntáxrjanhya janhan kixin jahará chojni ch'exón xrá kixin tí chojni xikaha ch'exón xrá mé noehya sín nkehe tí xrá ch'e tí lámge sín a. Náhi. A ntá jahará la chojni choxian kixin kaín xín nkehe kjuáqona T'aná mé kjuákoahará. 16 Jehya kixin jahará kjuéyará tí janhan. Náhi. Janhan mé kjuéyá tí jahará kixin tsotjahará xrá, a ntá éxi yóhé to xé mé chrók'uxarje jina tí xrá sich'enará kixin chrók'uitjáyanyhá. A ntá T'aná mé tsotjahará ch'án kaín xín nkehe tsjanchexinrá nina. 17 Mé xikaha tétuanhánrá kixin tsotjuéhérá kichuárá.

Tí sín chjasintajni nínkakonhen sín tí ch'in Jesús la ko tí sín tinkáchónki ch'án

18 'Tí tsonínkakonhanrá tí chojni chjasintajni ntá chrókónohará kixin senó janhan nínkakonna sín. 19 Tí chrókóuéntará chjasintajni ntá sín chjasintajni chrótjuahará sín kixin naxá kjéhyará sín. Kjánchó janhan kjuéyá tí jahará kixin chrók'uxarjéjxanxinrá tí sín siín chjasintajni. A ntá tí sín chjasintajni nínkakonhanrá sín kixin jahará jahará kuéntará chjasintajni. 20 Xráxinkáonrá tí nkehe tsjtjonkará kixin tí sín ch'ehe lámge sín xrá tjetóxinhya ts'etoan sín.* Éxi yóhé chónkina sín mé xikaha tsochónkíhi sín tí jahará. A ntá tí kuítekaon sín tí nkehe kjuákoqá sín ntá kjaxin tsítekaon sín tí nkehe naxá tsjákoherá sín. 21 Mé xikaha sit'ahará sín kixin jahará tinkachónkirá tí janhan la ko jehe sín chónhya sín tí nkexro ichr'ánna k'uinka ntihi.

22 'Tí chrók'uinkahya janhan ntihi chrónixjahya sín ntá chrók'uumáhya sín jie. Ntá jie kolya nkerí tsaáxin sín kixin tí jie tinkákjasin sín. 23 Tí sín nínkakonna mé xikaha nínkakonhen sín T'aná. 24 Chróchóntahya sín jie tí chrók'uejókianhya sín ntihi chrókjuásinhya janhan kjuaxroan jie éxi tsíkjasinhya ninkexró senó. Ntá jie ó k'uikon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin. 25 Mé xikaha tsonhen kaín tíha kixin ntá tsoxiteyá tí nkehe ntáchro tí ley kuénte sín kixin: "Kohya jie kjuásian janhan ntá kjónté kónínkakonna sín."† 26 A ntá tsi tí nkexro tsjinkítsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuénte T'aná. A ntá jehe ch'án mé tsochrónka nkexrí tjén janhan 27 la ko jahará kjaxinrá tsochroñkará nkexrí tjén janhan kixin tí xrankixín la k'uejóni jnkokoá.

16

1 'Kaín tíhi tjetjonkará kixin chrók'uitjéhyará tí nkehe kjuákoahará. 2 Tí sín judío tsjanjonhya sín kjuachaxin ts'ixenhenrá njnqé sín la ko tsjixraká tí yaon kixin tí sín ts'oyán sín tí jahará tsontáchro sín kixin xikaha mé tjejóch'e sín xrá kuénte Dios, tsixro sín. 3 Mé xikaha sich'e sín kixin chónhya sín T'aná la ko chónhyana sín. 4 A ntá tjonkará kaín tíhi kixin tió tsjixraká tí yaon xikaha tsonhen ntá tsoxráxinkáonrá kixin ó k'uetjonkará senó a.

Tí xrá ch'e Nchakuen Dios

'Tí xrankixín k'uetjonkará tíhi kixin jnkokoá k'uek'ejóni. 5 Ntá jie sátsjiyá tí tjen tí nkexro ichr'ánna k'uinka. Kjánchó nijnkorá tjanchankíhyará nketí sátsjiyá. 6 Ntá kjuixin tjonkará tíha ntá imá t'avará kixin kuínhínra xikaha xrjanka. 7 A ntá chaxín tí nkehe tjetjonkará kixin ichá jina sátsjiyá kixin jahará jina chrók'uejorá. A ntá tí sáchrókjuíhya ntá chrókuihya tí nkexro tsjinkítsar. A ntá tí sátsjiyá janhan ntá tsetoan kixin itén ch'án ntihi. 8 A ntá tió tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jie, la ko itjen ijnko ntja ntoá chrókuakja sín la ko Dios mé sinchekitoxén tí jie kjuasin sín. 9 Xikaha chóna sín jie kixin tinkáchónkíhya sín tí janhan. 10 A ntá tsonhe sín kixin itjen tí ntja ntoá kixin sátsjiyá tí tjen T'aná ntá ts'ikonhyará tí janhan inaá, 11 la ko tsonhe sín kixin Dios sinchekitoxén ijje kixin ó kjuixin kuíttoxén ijje tí nkexro t'etoan chjasintajni kixin tsjasóte.

12 'Naxá chonta janhan itsjé nkehe chrótjonkará, kjánchó chrókjuachahyará chrókiénxinrá jie. 13 A ntá tió tsi tí Nchakuen Dios chaxin ntoá ntá jehe tí Nchakuen Dios mé tsjákoahará ch'án kaín xín nkehe ntoá. Méxra jehya tí nkehe kuénte ch'án tsochrónka ch'án na mé tí nkehe tsinhin ch'án mé tsochrónka ch'án tsjákoahará ch'án tí nkehe tsonhen chr'éxin. 14 Jehe ch'án mé tsjikosáyana ch'án kixin ts'áyéhe ch'án tí nkehe kuéntana ntá tsjákoahará ch'án

* 15:20 Juan 13.16 † 15:25 Salmo 35.19; 69.4

nkehe tíha. ¹⁵ Kaínxín nkehe chóna T'aná na mé kuèntana. Mé xíkaha ntáxrjan kixin tí Nchakuen Dios chaxín ntoá mé ts'áyéhe ch'án tí nkehe kuèntana ntá tsjakohará ch'án nkehe tíha.

Senó ts'áva sín ntá chr'éxin tsochéhe sín

¹⁶ Ntá í séhya la í ts'ikonhyará tí janhan. La ko kjaxin séhya xik'ikonrá tí janhan inaá kixin sátsjiyá tí tjen T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kichó sín kixin:

—¿Nkexrí t'axrjexín tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án inaá kixin sátsji ch'án tí tjen It'é ch'án? ¹⁸ ¿Nkexrí t'axrjexín tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

¹⁹ Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—Xíkaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan inaá. ¿Á tíha mé tjetotjanhankíhírá kichuára ní? ²⁰ Tjéjtonkará ijnko nkehe chaxín kixin imá tsotsjankará la ko ts'avará. A ntá tí chojni chjasintajni la tsochéhe sín. A ntá jahará ts'avará la ko sntanihará kjónté chr'éxin tsocháhará má. ²¹ Éxi yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni. ²² Mé xíkaha jahará ijie t'avará. Ntá xik'íkuan tí jahará inaá ntá imá tsochéhe asánra la ko tsokohya ninkexró tsakitsajahará tí kjuachéhe tsochontará.

²³ Tíó tsi tí yaon a ntá tsjanhankínahará ninkehó. Chaxín tí nkehe tjéjtonkará kixin T'aná tsotjáhará ch'án kaín nkehe tsjanchatóxixínra nina. ²⁴ Naxa kjuánchatóxixínhyará ninkehó tí nina. Ntá jie tjanhiará la ts'ayéhé, a ntá tsjintaxín tsocháhará.

Ínchéni Jesucristo mé kjuacha ch'án k'uetqan ch'án, ntá chjasintajni la náhi

²⁵ Tí nkehe tjéjtonkará mé kjuintayóaxián ó. Ntá tsjixraká tí yaon la í ninkehó sintayóaxián na mé ntoá tsotjonkará nkexrí tjen T'aná. ²⁶ A ntá tí yaon a mé tsjanchaxínra nkehe nina. Ntá ntáxrjanhya tíhi kixin tsonixjayákonhanra tí tjen T'aná ²⁷ kixin jehe T'aná mé tjuahará jahará. Na mé tjuahará ch'án kixin jahará tjuanará tí janhan la ko kixin kuítekáonra kixin janhan k'uinkaxian tí tjen Dios. ²⁸ K'uaxrjéxian tí tjen T'aná k'uinka chjasintajni. Ntá jie la ó tsjtoha chjasintajni ntá sátsjiyá inaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kixin:

—Ntá jie ntoá tjéchronka ninkehó ncheyoéxinhya. ³⁰ Ntá jie tienxínni kixin jaha mé noha kaín xín nkehe la ko t'ichjánxinhya kixin jnkojin nkexro chrókjuanchankíha sín ichrén nkehe. Méxra xíkaha titekaonni kixin jaha mé k'uinkaxian tí tjen Dios —ichro sín.

³¹ Ntá kjuátéhe ch'ín Jesús ntáchro ch'án kixin:

—¿Á jie kuítekáonra ní? ³² Ntá tsi tí yaon na mé jie tíha na ntá tsochakonra jnkojnkorá tsoxikará sátsjirá ntá tsjtonará janhván tsjak'é. Kjánchó jehya janhván tjén. T'aná mé tjékian. ³³ Tjéjtonkará kaín tíhi kixin ntá kjuaxróxin ts'ejó asánra tinkachónkirá tí janhan. A ntá ntihi chjasintajni kjónté kjuaxróxinhya tjejorá tjetotjasóterá kjánchó chrakonhyará kixin janhan mé ó kjuixin kjuacha tséqan. A ntá tí chjasintajni la kjuachahya ts'etqan —ichro ch'án.

17

Ch'ín Jesús chrónóhe ch'án It'é ch'án kixin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajni ntáchro ch'án kixin:

—Jaha It'éni, ó kjuixraká tí yaon a. A ntá jie chróchjehé tí Xjaan antsi má kjuachaxin kixin kjaxin tí Xjaan chrókjuikosáyehe tí jaha. ² Jaha tsichjehé kjuachaxin tí Xjaan kixin ts'etuenhen ch'án kaín xín chojni na ntá jehe ch'án tsochjéhe kjuachón jnkochríxin kaín tí sín tsichjehé ch'án. ³ Tí kjuachón jnkochríxin mé t'axrjexín kixin tsochóxian sín tí jaha tí jnkoqá Dios chaxín tjechón la ko kjaxin tsochóxin sín Jesucristo la mé jaha kuétuénhén ch'án kui ch'án ntihi chjasintajni.

⁴ Ó kjuixin kjuikosáyaha tí jaha ntihi chjasintajni kjuixinna tí xra chjina sít'a. ⁵ A ntá jie It'éni, chjina jaha tí kjuachaxin jie k'uéchonta janhan tí k'uéjóni jnkoqá naxa k'onahya chjasintajni.

⁶ Ó kjuixin kjuáqoha tí sín chjina chjasintajni kixin nkexro tí jaha. Jaha mé k'uékuéntá sín tí ósé ntá jie chjina tí janhan la ó kjuáqoha sín itán la ntá ijie la ó kuítekaon sín. ⁷ Ntá jie ó kjuátsoan sín kixin kaín tí kjuachaxin chonta janhan la jaha tsikjánjuan. ⁸ Kixin ó kjuixin kjuáqoha sín tí tán chjina jaha, ntá kuítekaon sín, ntá kuienxín sín kixin mé chaxin tsík'inkaxian tí tjen jaha, na mé kuítekaon sín kixin jaha kuétuanna k'uinka.

⁹ Janhan mé xrjanóaha kixin chrók'uayakonhén tí jehe sín. Jehya kixin xrjanóaha kixin chrók'uayakonhén kaín tí chojni síin chjasintajni. Náhi. Jehó xrjanóaha kixin chrók'uayakonhén tí sín chjina kixin kuéntá sín. ¹⁰ A ntá kaín tí nkehe chonta janhan na

mé kuèntá jaha la ko kaín tí nkehe kuèntá la mé kuèntàna kjàxin. A ntá tí kjuachaxin jié kuèntàna mé ts'inkaséyanxín tí jehe sín.

¹¹ A ntá jie tsitónahya janhan ntihi chjasintajni. Kjànchó jehe sín naxá tsitòhe sín chjasintajni. A ntá jie tsjasán tí tjen jaha. Jaha It'èni imá jina jaha, t'ayakuenxián sín tí kjuachaxin tí ihnjá kixin ntá jnkokoá chrókjuenkayáxin sín éxi tí jaha la ko janhan jnkokoá tjenkayáxinni. ¹² A ntá tí naxá k'uejókian tí jehe sín ntihi chjasintajni la k'uáyakuànxián sín tí kjuachaxin tí ihnjá chjina. Nijnko tí jehe sín k'uitjáyannya sín. A ntá jnkokoá nkexro mé k'uitjáyán mé tí ch'ín xráxin ts'itjáyán kixin xikaha tsoxiteyá éxi nijxa tí xroon tsikjin sín.

¹³ Ntá jie ó tsjasán tí tjen jaha. A ntá naxá itjén janhan chjasintajni mé ntáxrjan tíhi kixin ntá tsochéhe sín éxi yóhe imá chàna. ¹⁴ Janhan mé kjuáqoha sín itán jaha, a ntá jie tí sín chjasintajni mé nínkakonhen tí jehe sín kixin jehe sín la jehya kuènte chjasintajni éxi kjàxin janhan na janhya kuèntàna chjasintajni. ¹⁵ Tjàncháha kixin chrókuakítsjehé sín chjasintajni. Náhi. Tjàncháhá kixin chrók'uayakonhén sín kixin chrókjuich'iyehya sín tí jínahya. ¹⁶ Jehe sín la jehya kuènte chjasintajni éxi yóhe janhan kjàxin janhya kuènte chjasintajni. ¹⁷ Nchetjuáxian sín tí kjuachaxin kuèntá kixin itán jaha mé tí tan chaxín ntoá. ¹⁸ Éxi yóhe jaha kuétuanna k'uinka chjasintajni mé xikaha janhan tétuànhan sín kixin chrók'uejókian sín tí sín chjasintajni. ¹⁹ Jehó tí xrá kuèntá chrókjuj't'a kixin chrókjuinkitsa tí jehe sín, a ntá jehe sín kjàxin chrókjuich'e sín tí xrá kuèntá kixin kuínhin sín itán chaxín ntoá.

²⁰ Kjànchó jehya kixin xrjanóaha kixin chrókjuinkitsa tí jehó sín. Náhi. Kjàxin xrjanóaha kixin chrókjuinkitsa kaín tí sín tsitekaon sín chr'éxin tsinhin sín tí nkehe tsochrónka tí sín a. ²¹ Mé xikaha xrjanóaha kixin kaín tí jehe sín jnkokoá chrókjuenkayáxin sín éxi jaha It'èni la ko janhan jnkokoá tjenkayáxinni mé xikaha xrjanóaha kixin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuitekaon sín kixin jaha tsikétuanna k'uinka ntihi. ²² A ntá tí kjuachaxin jié chjina na mé tjàha tí jehe sín kixin ntá kaín sín jnkokoá chrókjuenkayáxin sín éxi yóhe jaha la ko janhan jnkokoá tjenkayáxinni. ²³ Janhan la ko jehe sín jnkokoá chrókjuenkayáxinni éxi jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjàxin chrókónohe sín kixin jaha tjuéhé tí jehe sín éxi yóhe tjuana tí jaha.

²⁴ Jaha It'èni, tí sín kjuánjuan la tjínkavan kixin tí jehe sín chrók'uejókian sín tí tsjak'é janhan kixin chrók'uíkon sín tí kjuachaxin jié chjina; kixin xráxin naxá k'ónahya chjasintajni k'uetjuana jaha. ²⁵ It'èni jaha, imá jina jaha. Kjonté tí sín chjasintajni naxá chónhya sín tí jaha, ntá janhan na ó xráxin choxian tí jaha la ko kaín tí sín i kjàxin ó nohe sín kixin jaha kuétuanna k'uinka. ²⁶ Ó kjuáqoha sín kixin nkexro tí jaha la ko xikaha naxá tsjáqoha sín, kixin éxi tjuana jaha mé xikaha chrótjuéhe sín kichó sín la ko janhan chrók'uejókian tí jehe sín —mé xikaha chrónóehé ch'ín Jesús tí It'é ch'án.

18

Ch'ín Jesús sákjuiko sín ch'án tsjak'echjina ch'án

(Mt. 26.47-56; Mr. 14.43-50; Lc. 22.47-53)

¹ Ó kjuixin ntáchro ch'ín Jesús kaín tíha ntá jehe ch'án la ko tí sín k'uájiko ch'án k'uaxrxéjin sín ntiha k'uatóye sín tí tsáka Cedrón. Ntaha tjen ijnko nonte síin nchónhya nta k'uíxenhén ch'ín Jesús la ko tí sín k'uájiko ch'án. ² Kjàxin ch'ín Judas tí ch'ín sinchekji tí ch'ín Jesús mé nohe ch'án kixin ntaha tjen tí huerto a kixin ntaha jnkoyáxón kójnkotséko ch'ín Jesús tí sín k'uájiko ch'án a. ³ A ntá ch'ín Judas ó kjuikao ch'án nchónhya sín soldado la ko iso sín policia kuènte njnko tsík'etueñhen tí sín nchat'a t'etóan la ko tí sín fariseo. Ntá kjui sín kaín sín xraá sín chica la ko kjuikao sín xrohi t'inkaséyanxín tí kjuixin sín. ⁴ A ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kixin:

—¿Nkexro xritjéyará? —ichro ch'án.

⁵ Ntá kjuátehe sín ntáchro sín kixin:

—Tjeyáni tí ch'ín Jesús tsikjixín chjasin Nazaret —ichro sín.

Ntá kjuátehe ch'ín Jesús ntáchro ch'án kixin:

—Janhan tíha —ichro ch'án.

A ntá ch'ín Judas tí ch'ín tsikjinchekji tí ch'ín Jesús mé koí tjenkákjan ch'án tí jehe sín ntiha.

⁶ A ntá tíó kjuátehe ch'ín Jesús kixin jehe ch'án tíha, ntá jehe sín xráchonka sín kjuítsínka sín nonte. ⁷ Ntá xikjanchankí ch'ín Jesús inaá ntáchro ch'án kixin:

—¿Nkexro xritjéyará? —ichro ch'án.

Ntá xintáchro sín kixin:

—Tjeyáni tí ch'ín Jesús tsikjixín chjasin Nazaret —ichro sín.

⁸ Ntá ntáchro ch'ín Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá tjuohérá sátsji tí i so sín xrikjan —ichro ch'án.

⁹ Mé xikaha ntáchro ch'ín Jesús kixin ntá tsoxiteyá tí nkehe tsíntáchro ch'án kixin: “Tí sín kjuanjon T'aná la ninkexró kjuíntak'tíjáyannya.”* ¹⁰ Ntá ch'ín Simón Pedro kuakitsje ch'án tí ch'ica espada chrinkatoxín ch'án kóchrínjin ch'án tatsjon ch'ina ijnko ch'ín it'in Malco, mé ijnko ch'ín ch'ehe nchat'á t'etóan xra. ¹¹ Kjánchó ch'ín Jesús ntáche ch'án tí ch'ín Pedro kixin: —Chr'axenhén tjege ch'ica espada méhe. Kjá ntáchrúa kixin tsjasótehyana, kjá ichrua. Kjánchó T'aná kjuanjon kjuachaxin kixin nchónhya tsjasótena —ichro ch'án.

Ch'ín Jesús kjuák'e nkayakon tí ch'ín t'etuenhen tí sín nchat'á
(Mt. 26.57-58; Mr. 14.53-54; Lc. 22.54)

¹² A ntá tí sín soldado la ko tí ch'ín comandante t'etuenhen sín la ko tí sín policía judío kuénte nínko mé itsé sín tí ch'ín Jesús kjuínchenteto sín ch'án. ¹³ A ntá sákjuíko sín ch'án ntóe ch'ín Anás ich'ee tí ch'ín Caifás mé tí nkexro tsík'áyéhe xra nchat'á t'etóan tí nánó a. ¹⁴ A ntá tí ch'ín Caifás, jehe ch'án na mé tí nkexro tsíntáche tí sín judío kixin íchá jina kixin jnkokoá chojni chrók'uenyákonhen kaín tí sín chjasén ch'án.†

Ch'ín Pedro kjuínchemá ch'án kixin chóxin ch'án tí ch'ín Jesús
(Mt. 26.69-70; Mr. 14.66-68; Lc. 22.55-57)

¹⁵ Ch'ín Simón Pedro la ko í jnko ch'ín k'uék'ajiko ch'ín Jesús mé kuinkáchréhe sín ch'án. Tí ch'ín ijnko a mé chóxin ch'án tí nchat'á t'etóan. Ntá k'uixenko ch'án tí ch'ín Jesús tí ntásin ntóe tí nchat'á t'etóan. ¹⁶ Kjánchó ch'ín Pedro kuitóhe ch'án ntója ntásin ó. Ntá tí ch'ín ijnko a chóxin tí nchat'á t'etóan mé k'uaxrje ch'án ntásin nixjehe ch'án tí tjan t'ayakonhen tí ntója ntásin chrónóhehe ch'án tjan ntá xranjon kjuachaxin ntá k'uixenhen ch'ín Pedro kjaxin. ¹⁷ Na ntá tí tjan t'ayakonhen tí ntója ntásin kjuanchankíhi tjan tí ch'ín Pedro kixin:

—¿Á jahya kjaxin xríkoa tí ch'ín a? —ichro tjan.

Ntá kjuátehe ch'ín Pedro kixin:

—Náhi, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policía kjuaka sín xrohi ntaha tjejóxin toté sín tjejóchjixrohe sín. La ko koí ch'ín Pedro tjechjixrohe ch'án ntiha.

Tí nchat'á t'etóan mé kjuanchankíhi ch'án tí ch'ín Jesús
(Mt. 26.59-66; Mr. 14.55-64; Lc. 22.66-71)

¹⁹ Ntá tí nchat'á t'etóan kjuankixin kjuanchankíhi ch'án tí ch'ín Jesús kixin nkexro tí sín k'uájiko ch'án la ko nkehe tí kjuakóhe ch'án sín. ²⁰ Ntá kjuátehe ch'ín Jesús ntáchro ch'án kixin:

—Noxín kjuak'é kjuákua, la ntá kaín xín chojni kuínhin sín. Xráxín k'uék'ákoxián kaín xín tí nínko ntsí la ko tí nínko jíé tójkotséxin kaín xín sín judío. Ninkehó nkehe kjuákohya imó. ²¹ ¿Nkekuénté tjanchankina tí janhan xikaha? Chrókjuanchankíhi tí sín kuínhin kixin nkexrí kjuákoha sín. Jehe sín mé nohe sín nkehe kjuákoha sín —ichro ch'án.

²² Kjuixin ntáchro ch'ín Jesús tihí ntá ijnko ch'ín policía kuénte nínko mé tjentaxín ch'án ntiha chjéhe ch'án nkayakon tí ch'ín Jesús ntáchro ch'án kixin:

—¿Á xikaha jiehe tsjátehé tí nchat'á t'etóan ní? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tí ntoáhya tí nkehe xrjanka ntá chrónka nkehe tí ntoáhya. A ntá tí ntoá tí nkehe xrjanka, ¿ntá nkekuénté kixin tjatena? —ichro ch'án.

²⁴ Ntá k'uetóan ch'ín Anás kixin tjechróntetoxinhín ch'ín Jesús sátsji ch'án tí tjan ch'ín Caifás tí nchat'á t'etóan.

Ch'ín Pedro xikjinchemá ch'án inaá kixin chóxin ch'án tí ch'ín Jesús
(Mt. 26.71-75; Mr. 14.69-72; Lc. 22.58-62)

²⁵ Ntá ch'ín Simón Pedro mé naxa tjexin toté ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xríkoa tí nkexro í ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhi, janhya —ichro ch'án.

²⁶ A ntá ijnko ch'ín ch'ehe tí nchat'á t'etóan xra, na mé tí ch'ín a mé naxa kjéhya ch'án tí ch'ín tsíkóchrínjin ch'ín Pedro ntatsjon, na mé kjuanchankí ch'án kixin:

—¿Á jehya jaha tí k'uíkuan tjekoa ch'án tí huerto ní? —ichro ch'án.

²⁷ Ntá ch'ín Pedro xikjinchemá ch'án inaá kixin jehya ch'án, ichro ch'án. Ntá xrinahya tuénxín itsje ijnko kochíntoa.

Ch'ín Jesús kjuák'e nkayakon tí ch'ín Pilato
(Mt. 27.1-2, 11-14; Mr. 15.1-5; Lc. 23.1-5)

* 18:9 Juan 17.12 † 18:14 Juan 11.49-50

²⁸ Ntá k'uaxrjexín sín ntøe ch'ín Caifás, sákjuiko sín ch'ín Jesús tí palacio t'etøanxín tí ch'ín gobernador. Ntá ó kjuankíxín k'uínkaséyan kjuíji sín ntiha. A ntá tí sín judío la mé i k'uixenhya sín tí palacio kíxín tí xíkaha chrók'uixenhen sín tí nchia a la chrókuamá sín tí jie síin ntiha la í xitjahya sine sín tí kia pascua, ichro sín. ²⁹ A ntá ch'ín Pilato k'uaxrjexín ch'án tí nchia t'etøanxín ch'án kjuanchankíhi ch'án sín kíxín:

—¿Nkehe tí jie chóna tí nkexro í? —ichro ch'án.

³⁰ Ntá kjuátøhe sín ntáchro sín kíxín:

—Tí chróchóntahya ch'án jie jie la chrókjuíkøahyani ch'án —ichro sín.

³¹ Ntá k'uetøan ch'ín Pilato kíxín:

—Sátjikoará ch'án nchekitøexinrá nkerí jie chóna ch'án kíxín éxí ntáchro tí ley kuèntará —ichro ch'án.

Ntá kjuátøhe tí sín judío ntáchro sín kíxín:

—Jeheni chojni judíoni la chónahyani kjuachaxin ts'óyanni ninkexró —ichro sín.

³² Mé xíkaha tsoxiteyá tí nkehe tsintachro ch'ín Jesús kíxín nkexrí ts'enxín ch'án. ³³ Ntá ch'ín Pilato xik'ixenhen ch'án tí nchia t'etøanxín ch'án ntá k'uíyøhe ch'án tí ch'ín Jesús kjuanchankíhi ch'án kíxín:

—¿Á jaha tí nkexro Rey t'etøenhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kíxín:

—Tí nkehe tjanchankiná, ¿á jahyá kjuenkayáxian xíkaha, ø á í jnko nkexro kjuanchia jie kíxín tí janhan? —ichro ch'án.

³⁵ Ntá kjuátøhe ch'ín Pilato ntáchro ch'án kíxín:

—¿Á kjanhya janhan tí judío kíxín? Tí sín chjasán la ko tí sín nchat'á t'etøan mé kjuikaán sín tí jaha. ¿Xá nkehe kjuích'e kíxín? —ichro ch'án.

³⁶ Ntá kjuátøhe ch'ín Jesús ntáchro ch'án kíxín:

—Tí kjuachaxin chonta janhan jehya kíxín chjasintajni chrókuétøan. Náhi. Tí chrókuétøan chjasintajni ntá tí sín xríkjan chrókjuanjenko sín tí sín judío kíxín chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kíxín chjasintajni chrókuétøan —ichro ch'án.

³⁷ Ntá ntáchro ch'ín Pilato kíxín:

—¿Á jaha chaxín ijnko rey? —ichro ch'án.

Ntá kjuátøhe ch'ín Jesús ntáchro ch'án kíxín:

—Janhan tí rey éxí ntáchrua jaha. Tí xra ó kokjina la ko tí xra ó k'uinka chjasintajni kíxín tsoxrjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótnhin sín tí nkehe tjakua —ichro ch'án.

³⁸ Ntá ntáchro ch'ín Pilato kíxín:

—¿Xá nkehe tí nkehe chaxín ntoá, ichrua? —ichro ch'án.

Ch'ín Pilato kjuanjøn kjuachaxin kíxín its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixín kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sín judío nixjøhe ch'án sín ntáchro ch'án kíxín:

—K'uitjáhya ninkehó jie chóna tí nkexro í. ³⁹ Kjánchó jahará la ó kuánhanrá kíxín tí kia pascua tsjánjuan kjuachaxin kíxín ts'atjánta ijnko nkexro tjechjina. ¿Á tjinkáonrá kíxín ts'atjánta tí ch'ín Rey t'etøenhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kíxín:

—Tí ch'ín a la náhi. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetøan ch'án kíxín tsjate sín tí ch'ín Jesús. ² Ntá tí sín soldado kjuích'éna sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'inkáya sín ch'án ijnko ka kjátse tié kíxín jehe sín tsjikosáyehe sín ch'án éxí ijnko rey, kjánchó chaxínhya tíha. ³ Ntá kóchjinehe sín tí tjen ch'án ntáchro sín kíxín:

—Isé tsjak'e tsétøenhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etøanxín ch'án inaá nixjøhe ch'án tí sín tsíkójnkotsé ntáchro ch'án kíxín:

—Tsjeherá tsakítsjexián ch'án ntihi kíxín tsohohará kíxín k'uitjáhya janhan ninkehó jie chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'í la ko tjenkáya ch'án tí ka kjátse tié. Ntá ntáchro ch'ín Pilato kíxín:

—Tsjeherá, ntihi tjen ch'án —ichro ch'án.

⁶ A ntá tió k'uikon tí sín ncha'tá t'etqan la ko tí sín policia kuènte ñinko ntá kjuankíxin sín t'óyako sín ntáchro sín kíxin:

—¡Tjak'enkánirá ch'án ntacruz! ¡Tjak'enkánirá ch'an ntacruz! —ichro sín.

Ntá ntáchro ch'ín Pilato kíxin:

—Jahará tjíkoará ch'án tjaké nkanirá ch'án ntacruz kíxin janhan k'uitjáhya ninkehó jie chóna tí jehe ch'án —ichro ch'án.

⁷ Ntá kjuátehe tí sín judío kíxin:

—Jeheni chojni judío mé chónani ijnko ley t'etqan kíxin chrók'uen ch'án kíxin ncheyóhe ch'án asén ch'án kíxin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án ⁹ ntá xík'ixenhen ch'án tí nchia t'etqanxín ch'án inaá kjuanchankíhi ch'án tí ch'ín Jesús kíxin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuátehehya ch'án.

¹⁰ Ntá ntáchro ch'ín Pilato kíxin:

—¿Jaha nkekuènté tjátéehya nkehe tjánchánkíha? ¿Á noahya jaha kíxin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kíxin sátsjia kohya nkehe tsqnhan? —ichro ch'án.

¹¹ Ntá kjuátehe ch'ín Jesús ntáchro ch'án kíxin:

—Ninkehó kjuachaxin chrókhontahya jaha chrókuétoan chrók'uen o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jie jie chóna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankíxin ch'án kjuéyá ch'án nkexrí chrók'uetqan ch'án kíxin sáchrókjui ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kíxin:

—Kja tí tsitohé sátsji ch'án kohya nkehe tsqnhen ch'án ntá jaha jnkokoáhya tjenkayáxinkoa tí ch'ín t'etqenhen tí nación kuènténi. Tí nkexro ch'ána asén ch'án éxi ijnko rey mé nínkakonhen ch'án tí ch'ín t'etqenhenni —ichro sín.

¹³ Ntá kuínhin ch'ín Pilato tíhi ntá k'uetqan ch'án kíxin tsakitsje sín tí ch'ín Jesús ntója ntá ch'ín Pilato kjuak'etjaxin ch'án tí silla nchekitqexín ch'án jie, mé nkíva hebreo mé it'ín Gabata, mé t'axrjexín kíxin tjtá'q noi jehó xró tsík'óna. ¹⁴ Na mé ó chjina chonkíxin ntá tí tsqnjín la mé ó tsjasin sín tí kía pascua. Ntá ch'ín Pilato ntáche ch'án tí sín judío kíxin:

—Ntíhi itjen tí ch'ín rey kuèntará —ichro ch'án.

¹⁵ Kjánchó jehe sín k'óyako sín ntáchro sín kíxin:

—¡Its'en ch'án! ¡Its'en ch'án! ¡Tsjak'enkáni ch'án ntacruz! —ichro sín.

Ntá ntáchro ch'ín Pilato kíxin:

—¿Á tjínkáonrá kíxin janhan chrókuakénkania ijnko ntacruz tí ch'ín rey kuèntará ní? —ichro ch'án.

Kjánchó tí sín ncha'tá t'etqan mé kjuátehe sín kíxin:

—Náhi. Chóntahyani í jnko rey, jehó tí ch'ín César —ichro sín.

¹⁶ Ntá ch'ín Pilato kjuanjon ch'án kjuachaxin sátsjiko sín tí ch'ín Jesús tsjak'enkáni sín ch'án ntacruz. Ntá sákjuíko sín ch'án.

Kjuak'enkáni ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákjuíko sín tí ch'ín Jesús kuámá ch'án tí ntacruz tsjak'enkáni ch'án. Ntá kjujiko sín ch'án ijnko tjo tükítexín sín Hueso Kja Chojni. A ntá nkíva hebreo mé tükítexín sín Gólgota. ¹⁸ Ntaha mé kjuak'enkáni sín ch'án tí ntacruz. Ntá kjaxin yaá sín nánánko k'uéjio jnkoinjko sín ntá jnkosiné kjuak'e ch'ín Jesús. ¹⁹ Ntá k'uetqan ch'ín Pilato kíxin tsokjin sín ijnko ntachiso tsjak'enkáni sín ikja tí ntacruz ntáchro kíxin: “Ch'ín Jesús kjuixín ch'án chjasin Nazaret, mé tí ch'ín Rey kuènte tí sín judío”, tsixro. ²⁰ A ntá itsjé tí sín judío mé kjuínchekúaxin sín tí letra tsík'óna kíxin chjino tí chjasin Jerusalén tsikjak'enkáni sín ch'ín Jesús ntacruz la ko iní nkíva tsíkjin sín, na mé ijnko nkíva la hebreo, la ijnko nkíva la griego, la ijnko nkíva la latín. ²¹ Ntá tí sín ncha'tá t'etqan kuènte tí sín judío mé ntáche sín tí ch'ín Pilato kíxin:

—Chrókjinhya jaha xíkaha kíxin jehe ch'án mé tí “Ch'ín Rey kuènte tí sín judío.” Náhi. Íchá jina chrókjian jaha kíxin “Jehe ch'án ntáchro ch'án kíxin jehe ch'án mé tí ch'ín Rey kuènte tí sín judío” —ichro sín.

²² Kjánchó kjuátehe ch'ín Pilato kíxin:

—Tí letra kuétoan k'óna la ó k'óna, kjónté xíkahó tsitqhe —ichro ch'án.

²³ Ntá tí sín soldado tió tsikjixin tsíkjak'enkáni sín tí ch'ín Jesús tí ntacruz ntá kuákja sín tí ké ch'án la k'ókíyehé sín jnkoinjko ka kuákja sín kanoé sín. La ko kjaxin kuákja sín tí ka kjínjin

k'uék'inkáya ch'án. Tí ka mé tsíxronhaya ka la me jnkokoqá ka tíha. ²⁴Ntá tí sín soldado kjo sín kíchó sín ntáchro sín kixin:

—Tsótséchjehyani tí ké ch'án. Íchá jína sich'exínni suerte ntá tsotsjeheni síná nkexro ts'áyéhe tí ka.

Mé xikaha xiteyá éxí ntáchro xroon itén Dios tsíkjin sín ósé ntáchro kixin: “Kjuích'exín sín suerte ntá k'óxikayéhe sín kaná.”* Mé xikaha kjuích'e tí sín soldado.

²⁵A ntá chjino tí ntacruz kjuák'enkáni ch'in Jesús mé kjuák'e tí iné ch'án la ko tí tjan kíchó tjan mé tjan María ichjién ch'in Cleofas, la ko tí tjan María Magdalena. ²⁶A ntá tíó k'uikon ch'in Jesús kixin itjen tí iné ch'án la ko chjino tjen tí ch'in antsí tjuéhé ch'án k'uék'ajiko ch'án, ntá nixjehé ch'án tí iné ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

²⁷Ntá nixjehé ch'in Jesús tí ch'in a ntáchro ch'án kixin:

—Tsjehé kixin ntaha itjen iná —ichro ch'án.

A ntá tí ch'in a mé k'uáyéhe ch'án tí tjan a sákjuiko ch'án tjan ntqe ch'án k'óna éxí iné ch'án xikaha.

Ik'uéen ch'in Jesús

(Mt. 27.45-56; Mr. 15.33-41; Lc. 23.44-49)

²⁸Ntá ó nohe ch'in Jesús kixin kaín xra ó kjuixin xiteyá ntá tjinkaon ch'án kixin tsoxiteyá káin nkehe ntáchro tí xroon tsíkjin sín ósé ntá xikaha ntáchro ch'án kixin:

—Ik'uéen ntá.

²⁹Ntá ntíha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuak'ekjen sín ijnko nta kjinjin, ntá kjuínchekhriin sín tí tjen ir'va ch'án. ³⁰Ntá ik'uí ch'in Jesús tí xranvino sán ntá ntáchro ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uéen ch'án.

Ijnko soldado chr'áte ch'án ch'ica yo tí ch'ia ch'in Jesús

³¹A ntá xikaha yaon ntóye mé tí yaon kia pascua ntá tí sín judío tjinkakonhaya sín kixin tí cuerpo kuènte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jíe, ichro sín. Mé xikaha kjuanchehe sín tí ch'in Pilato kixin ts'etqan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuènte tí sín tsík'en.

³²Ntá tí sín soldado sákjuí sín k'óchjenjin sín tí toté tí ch'in saoxin tjen la ko k'óchjenjin sín tí toté tí ch'in tjen nángo a tjejóyáni sín tí ntacruz tí tjen ch'in Jesús. ³³Ntá kjuíji sín tí tjen ch'in Jesús ntá k'uikon sín kixin ó tsíkixin tsík'en ch'án, ntá í k'óchjenjinhya sín toté ch'án.

³⁴A ntá ijnko ch'in soldado mé chr'áte ch'án ch'ica yo tí ch'ia tí ch'in Jesús ntá tuénxín k'uaxrje jnǎ la ko inǎ. ³⁵A ntá janhan mé tjékjan tí xroon í mé kjuak'é ntíha k'uikuan kixin xikaha kónhen ntá ntoá tjéxrjanka kixin jahará kjaxinrá chrókuítekáonrá. ³⁶Mé xikaha kónhen tíha kixin tsoxiteyá tí nkehe ntáchro xroon itén Dios tsíkjin sín ntáchro kixin: “K'óchjenjinhya sín ninkehó huésqe ch'án.”† ³⁷Kjaxin itjen í jnko nketí nixja tí xroon itén Dios tsíkjin sín ósé ntáchro kixin: “Tsokomá sín tí nkexro tsíchr'áte sín ch'ica.”‡

Xravá ch'in Jesús

(Mt. 27.57-61; Mr. 15.42-47; Lc. 23.50-56)

³⁸Ntá ó kjuixin kónhen káin tíha ntá ch'in José, mé ijnko ch'in kjuixin chjasin Arimatea, mé kjuanchehe ch'án tí ch'in Pilato kjuachaxin kixin tsjinkajinxin ch'án tí ntacruz tí cuerpo kuènte ch'in Jesús sátsjiko ch'án tsjavá ch'án. Jehé ch'án imó kuinkáchónki ch'án tí ch'in Jesús kixin chrakonhen ch'án tí sín judío. Ntá ch'in Pilato mé kjuanjon ch'án kjuachaxin ntá sákjuiko ch'in José tí cuerpo kuènte ch'in Jesús. ³⁹Kjaxin ch'in Nicodemo, tí ch'in kjuínixjehé tí ch'in Jesús ijnko tie a mé kjuí ch'án kjuíkqo ch'án treinta kilo xroan xraxé tjiko xroan mirra la ko xroan áloes. ⁴⁰Mé xikaha ch'in José la ko ch'in Nicodemo k'uáyéhe sín tí cuerpo kuènte ch'in Jesús kjuínchek'ísmá sín ijnko ka kjinjin tsíka tí xroan xraxé a kixin xikaha k'uékinkáchónki tí sín judío k'uékjavá sín chojni tsík'en. ⁴¹Tí kjuak'enkáni ch'in Jesús ntacruz ntá chjinaxón ntíha tjen ijnko huerto itjen ijnko tóye nixin naxa ninkexró tsíxráváhya ntíha. ⁴²Ntaha kjuavá sín tí ch'in Jesús kixin chjinaxón tjen tí tóye a la ko í séhya tsoxrankixin tí yaon t'ok'éhe tí sín judío.

20

La ntá ó tsíxechón ch'in Jesús

(Mt. 28.1-10; Mr. 16.1-8; Lc. 24.1-12)

* 19:24 Salmo 22.18 † 19:36 Salmo 34.20 ‡ 19:37 Zacarías 12.10

¹ A ntá tí yaon xrankíxixín semana ntá tí tjan María Magdalena naxa sítie sákjuí tjan tí tjen tí tóye, ntá k'uikon tjan kixin ó tsíkjin tí xro tsík'ikjèxin tí tóye a. ² Ntá kuinká tjan sákjuí tjan tí tjen tí ch'in Simón Pedro la ko tí ch'in í jnko, mé tí nkexro imá k'uétjuèhe ch'in Jesús, ntá ntáχρο tjan kixin:

—Ó tsikakitsjexín sín tóye tí cuerpo kuènte Ìnchéni ntá noehyani nketí tsíkjak'e sín —ichro tjan.

³ Ntá ch'in Pedro la ko tí ch'in í jnko mé kuínhin sín xíkaha ntá sákjuí sín tí tjen tí tóye a. ⁴ Ntá yóí sín kuinká sín sákjuíko kichó sín. Kjánchó tí ch'in í jnko antsí tjan kuinká ch'in ntá kánhyó tjan kuinká ch'in Pedro, ntá tí ch'in í jnko senó ch'in kjuíji ch'in tí tjen tí tóye a. ⁵ K'uísén ch'in tsjehe ch'in nkaxenhen tí tóye a. A tí ka tsík'isímá ch'in Jesús mé naxa tjejó k'uikon ch'in, kjánchó jehe ch'in k'uixenhya ch'in tí tóye a. ⁶ Ntá kjónté chr'èxin kjuíji ch'in Simón Pedro ntá k'uixenhen ch'in tí tóye a. Ntá kjaxin k'uikon ch'in kixin tjejó tí ka tsík'isímá ch'in Jesús ⁷ la ko k'uikon ch'in tí ka tsík'isímá ikja ch'in na mé tí ka tsixrèya ka la ókjé tjen ka, a ntá tí í so ka na mé ókjé tjejó ka kjaxin. ⁸ Na ntá tí ch'in í jnko k'uék'ajiko ch'in Jesús, mé tí ch'in tsíkjií senó na kjaxin k'uixenhen ch'in tí tóye ntá k'uikon ch'in tí nkehe tsíkónhen ntá kuítekaon ch'in. ⁹ Kixin naxa k'uékiénxínhya sín tí nkehe k'uéchronka xroon itén Dios kixin t'ichjánxin tsoxechón tí ch'in Jesús. ¹⁰ A ntá tí sín sátsíkjitsjehe tóye la xíkjan sín ntqè sín.

Titàya k'uikùèn tjan María Magdalena tí ch'in Jesús

(Mr. 16.9-11)

¹¹ Ntá tjan María mé ntaó kuítóhe tjan ntója tí tóye tsjánka tjan. Naxa tsjánka tjan k'uísén tjan tsjehe tjan nkaxenhen tí tóye ¹² ntá xringhya k'uikon tjan yaá sín ángel tjejóyá sín ka tjóá tjejótxaxin sín tí tsíkjak'e tí cuerpo kuènte ch'in Jesús na mé ijnko ch'in ángel na mé tjen ch'in tí tsíkjak'e ikja ch'in Jesús la ko tí í jnko a itjen ch'in tí tsík'ejó toté ch'in. ¹³ A ntá tí sín ángel mé kjuanchankí sín kixin:

—Naná, ¿kuènte tsjánka? —ichro sín.

Ntá kjuátehe tjan ntáχρο tjan kixin:

—Sátsíkjiko sín Ìnchéni, ntá nonahya nketí tsíkjak'e sín ch'in —ichro tjan.

¹⁴ Kjuixin ntáχρο tjan tíha ntá kuinkátjía tjan ntá k'uikon tjan kixin itjen ch'in Jesús, kjánchó kjuátsqanhya tjan kixin jehe ch'in. ¹⁵ Ntá ch'in Jesús kjuanchankíhi ch'in tjan ntáχρο ch'in kixin:

—Naná, ¿nkekuènté tsjánka? ¿Nkexro tjéyá? —ichro ch'in.

A ntá jehe tjan kjuenkayáxin tjan kixin jehe ch'in mé t'ayakonhen ch'in tí huerto, a ntá ntáχρο tjan kixin:

—Kja tí jaha sákjuíko ch'in ntá jie chronka nketí sákjuíko ch'in kixin janhan sátsjikjan ch'in jie —ichro tjan.

¹⁶ Ntá ch'in Jesús mé nixjehé ch'in tjan ntáχρο ch'in kixin:

—¡María! —ichro ch'in.

Ntá kuinkátjía tjan ntá nixjaxin tjan nkiva hebreo ntáχρο tjan kixin:

—¡Raboni! —ichro tjan. Tíha mé t'axrxjén kixin Maestro.

¹⁷ Ntá ntáχρο ch'in Jesús kixin:

—Tatjántana kixin naxa sátsjilhya janhan tí tjen T'aná. Sátsja tjítsjehé tí sín kichiná chénka sín kixin sátsjiyá tí tjen T'aná na mé kjaxin It'ará tí jahará na mé Dios kuèntana la ko kjaxin Dios kuèntará —ichro ch'in.

¹⁸ Ntá tí tjan María Magdalena sákjuíchénka tjan tí sín k'uék'ajiko ch'in Jesús chrónka tjan kixin xíkaha tsík'ikon tjan Ìnchéni. La ko kjaxin chrónka tjan kixin xíkaha tsíntáχρο ch'in.

Tí sín k'uék'ajiko ch'in Jesús titàya k'uikùèn sín ch'in

(Mt. 28.16-20; Mr. 16.14-18; Lc. 24.36-49)

¹⁹ A ntá ó kónjin tí yaon a mé tí yaon xrankíxixín semana, a ntá tí sín k'uék'ajiko ch'in Jesús jnkokoá kónkotsé sín nkaxenhen nchia tsík'ikjehé sín ntója nchia jina kixin chrakonhen sín tí sín judío. Ntá xringhya titàya kónohe sín k'uikon sín kixin jnkosiné tí tjejó sín itjen ch'in Jesús, ntá nixjehé ch'in kjuajné tí sín k'uék'ajiko ch'in ntáχρο ch'in kixin:

—Jina tjejorá —ichro ch'in.

²⁰ Ntá kjuixin ntáχρο ch'in tíhi ntá kjuako ch'in itja ch'in la ko chjia ch'in. Ntá kóchéhe tí sín k'uék'ajiko ch'in kixin k'uikon sín Ìnchéni. ²¹ Ntá ntáχρο ch'in Jesús inaá kixin:

—Kjuaxróxin ts'ejorá. Yóhe T'aná k'uètuanna k'uinka, a ntá jie la janhan tétuñhan tí jahará —ichro ch'in.

²² Ntá k'uánote ch'in tí jehe sín ntáχρο ch'in kixin:

—T'ayéherá Nchakuen Dios. ²³ Tí ts'itjáyahanhá tí jie kjuasin jnkójín chojni ntá xíkaha tsjin tí ijé sín. Ntá tí ts'itjáyahanhá tí jie kjuasin jnkójín chojni ntá naxa kjuinhyá tí ijé sín —ichro ch'in.

Ch'in Tomás k'uikón ch'án kixin tsíxechón Ìnchéni

²⁴ A ntá tí ch'in Tomás, ijnko tí teyóxin sín k'uék'ajiko ch'in Jesús mé kjaxin tikítexin sín ch'in Nóhé mé kohya ch'án tí kui ch'in Jesús. ²⁵ Ntá chr'éxin tí í so sín k'uék'ajiko ch'in Jesús ntáche sín ch'án kixin:

—Ó k'uikonni Ìnchéni —ichro sín.

Kjánchó ntáchro ch'in Tomás kixin:

—Tí ts'íkõnhya janhan tí tsíkjiatexin chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuitekavan? —ichro ch'án.

²⁶ A ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'in Tomás. Tsík'íkjehe sín ntója nchia jina ntá xrínahya titàya kónohe sín k'uikón sín kixin jnkosiné tí tjejó sín itjen ch'in Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'in Tomás kixin:

—Chr'axénhén dedo tjá tí tsíkjiatexin chica clavo tjaná la ko xrákoa tjá chr'axénhén chjiana. Chróntáchrohya kixin chaxínhya. Tsítekavan kixin chaxín —ichro ch'án.

²⁸ Ntá kjuátgehe ch'in Tomás ntáchro ch'án kixin:

—¿Ìnchéni jaha la ko Dios kuéntana! —ichro ch'án.

²⁹ Ntá ntáche ch'in Jesús tí ch'in Tomás kixin:

—Jaha Tomás k'uikonjian ntá kuitekavan. Ntá antsí náxrjón tjejó tí sín kjónté k'uikonhya la titekaon sín —ichro ch'án.

Tíhi mé chrónka nkekuènte tsíkjin ch'in Juan tí xroon í

³⁰ Ch'in Jesús kjuasin ch'án itsjé í so kjuaxroan náxrjón k'uikón tí sín k'uájiko ch'án kjónté chrónkahya tí xroon í kixin xíkaha kónhen. ³¹ Tí nkehe chrónka tí xroon í ikjian janhan kixin chrókuitekáonrá jahará kixin Jesús mé tí Cristo, mé tí Xjeen Dios kixin ntá kaín ní chróchóntani kjuachón jnkochrín kixin chrókuitekaonni ch'án.

21

Yato tí sín k'uék'ajiko ch'in Jesús xrínahya titàya k'uikón sín ch'án

¹ A ntá chr'éxin tí sín k'uék'ajiko ch'in Jesús titàya xík'ikon sín tí jehe ch'án inaá chrínta ntayaon Tiberias. Mé xíkaha kónhen ² kixin jnkokoá k'uéjé sín ch'in Simón Pedro la ko ch'in Tomás, me tí ch'in tikítexin sín ch'in Nóhé, la ko ch'in Natanael kujxin ch'án chjasin Caná estado Galilea, la ko tí yaá xjeen ch'in Zebedeo la ko tí yaá sín inaá k'uék'ajiko ch'in Jesús. ³ Ntá ntáchro ch'in Simón Pedro kixin:

—Sátsjitse koche —ichro ch'án.

Ntá kjuátgehe sín kixin:

—Koíni sátsjikoani —ichro sín.

Ntá sákuí sín k'uit'ótjen sín ijnko ntabárcõ. Kjánchó ninkehó koche tséhya sín kuenté tie.

⁴ A ntá ó chjina ts'ínkaséyan ntá xrínahya titàya k'uikón sín itjen ch'in Jesús chrínta ntayaon, kjánchó kjuátsoanhya tí sín k'uék'ajiko ch'án kixin jehe ch'án. ⁵ Ntá kjuanchankíhi ch'án sín kixin:

—Jahará ntasoá, ¿á naxa ninkehó koche tsehyará? —ichro ch'án.

Ntá kjuátgehe sín ntáchro sín kixin:

—Naxa ninkehó ko tséhyani —ichro sín.

⁶ Ntá ch'in Jesús ntáche ch'án sín kixin:

—Itérá tí nchísén tí nánko chjia chjina tí ntabárcõ la tsotserá va —ichro ch'án.

Ntá xíkaha kjuích'e sín k'ue sín nchísén ntá í tjachahya sín tsakitsjenkixin sín nta tí nchísén kixin nchónhya koche tjínká. ⁷ A ntá tí ch'in antsí tjuéhe ch'in Jesús mé ntáche ch'án tí ch'in Pedro kixin:

—¿Ìnchéni tí méhe! —ichro ch'án.

Ntá kuínhin ch'in Simón Pedro kixin Ìnchéni tíha ntá k'uinkáya ch'án iké ch'án inaá (kixin tsíkaksje ch'án iké ch'án) ntá kjuíánkí ch'án nta. ⁸ Tí í so sín k'uék'ajiko ch'in Jesús mé kjuíji sín tí chrínta ntayaon kjuíkao sín tí ntabárcõ tinkánkákjéntóxin tí nchísén tjínká koche chrítaón nta kixin ijnko ciento metro kjínxin tí chrínta nta k'uéjé sín. ⁹ Ntá kjuíji sín chrínta nta ntá k'uínkajínxin sín tí ntabárcõ ntá k'uikón sín tjeche xrohi síxènkí xrinta ntá chrítaón tí xrinta tjeqjen ijnko koche la ko nánko siín niotja. ¹⁰ Ntá kjuanchia ch'in Jesús ntáchro ch'án kixin:

—Xrákoará iso koche tsítserá nantá —ichro ch'án.

¹¹ Ntá ch'ín Simón Pedro k'uit'ótjen ch'án tí ntabárcō kuákja ch'án tí nchísén kuinkánkákjen ch'án xráqao ch'án tí nchísén tjínká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a. ¹² Ntá ntáchro ch'ín Jesús kixin:

—Xrákirá, interá —ichro ch'án.

ᄃ ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátsoan sín kixin Inchéni tíha. ¹³ Ntá kóhjjina ch'ín Jesús kuákja ch'án tí niotja chjéhe ch'án tí jehe sín la ko xíkaha xíkjanjon ch'án tí koche.

¹⁴ Tíhi mé níxin k'uikon tí sín k'uék'ajiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

¹⁵ Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin:

—Jaha Simón, xjeen Jonás, çá antsí tjuana jaha, ᄃ ntá tí í so la kánhyó? —ichro ch'án.

Ntá kjuátēhe ch'ín Pedro ntáchro ch'án kixin:

—Jeén, Inchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntana —ichro ch'án.

¹⁶ Ntá yóxin kjuanchankí ch'ín Jesús inaá kixin:

—Jaha Simón, xjeen Jonás, çá tjuana jaha? —ichro ch'án.

Ntá kjuátēhe ch'ín Pedro ntáchro ch'án kixin:

—Jeén, Inchéni, ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntana —ichro ch'án.

¹⁷ Ntá níxin kjuanchankí ch'ín Jesús kixin:

—Jaha Simón, xjeen Jonás, çá tjínkavan tí janhan? —ichro ch'án.

ᄃ ntá k'uává ch'ín Pedro kixin níxin kjuanchankí ch'ín Jesús kixin á tjínkaon ch'án tí jehe ch'án ntá ntáchro ch'án kixin:

—Jaha Inchéni, ó noha káin xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xíkaha t'ayakonhén tí kolélo kuèntana. ¹⁸ Ntá ijnko nkehe chaxín tjétjonka kixin tí naᄃa k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. ᄃ ntá tíó tsotáda jaha ntá tsjéntó tá ntá íjnko nkexro sintak'inkáya ka la ko sátsjikoa sín tí tóxrjínhanhya sáchrókjuia —ichro ch'án.

¹⁹ ᄃ ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsohnen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uikon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjínaxón tí kjuák'e ch'ín Jesús tí kjóne sín tsíkjanhankíhi ch'án tí ch'ín Jesús kixin nkexro sinchekji ch'án.† ²¹ Ntá ch'ín Pedro k'uikon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Inchéni, çá ntá tí ch'ín i la nkehe tsohnen ch'án a? —ichro ch'án.

²² Ntá kjuátēhe ch'ín Jesús kixin:

—Tí tjínkavan naᄃa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhé tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhi. Ó jehí ntáchro ch'án kixin tí tjínkaon ch'án naᄃa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsohnen íjnko chojni.

²⁴ ᄃ ntá tí nkexro a mé tí nkexro chrónka kixin chaxín kónhen káin tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

²⁵ Naᄃa síin nchónhya nkehe kjuakoxín ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasintajni chrók'uinka káin tí xroon chrók'óna xíkaha. Amén. Ó tjen.

* 21:14 Juan 20.19,26 † 21:20 Juan 13.25

Tí xra kjuích'e tí sín kjueyá ch'ín Jesús

Itsi Nchakuen Dios

¹ Tjuaha jaha Teófilo na tí libro saoxín mé kjan kaín nkehe kjuako ch'ín Jesús la ko tí xra kjuích'e ch'án tí xrankixín ² hasta tí yaon sákjuj ch'án nkaya nkajní. A ntá tí naxa sákjujha ch'án nkajní la kjueyá ch'an tí sín sich'ehe ch'án xra la ntá tí Nchakuen Dios mé kjuínkítsa ch'án ntá nixjehe ch'án sín la k'uetuénhen ch'án sín kixin tsonohe sín nkehe tí xra chrókjuich'e sín. ³ Tíó kjuixin k'uén ch'án ntá kónoxín kixin tjechón ch'án, k'uikon tí jehe sín la ko cuarenta yaon mé k'uikon sín ch'án jnkoyaxón. Itsjé nkehe kjuakoxín ch'án kixin tsonoexín sín kixin chaxín tjechón ch'án la ko kjuako ch'án nkexrí tí kjuachaxin kuènte Dios.

⁴ Tí naxa kójnkotséko ch'án tí sín k'uájiko ch'án la jehe ch'án mé k'uetuénhen ch'án sín kixin naxa sátsjixínha sín tí chjasin Jerusalén. Chrónka ch'án kixin:

—Chróchonhénrá ntiho chrók'uayéherá tí nkehe tsjanjon T'aná, mé tí nkehe kuinhínrá xrxanka janhan. ⁵ A ntá chaxín ch'ín Juan intá ó kuikítexín ch'án chojni. A ntá ijie kánhyó itsjé yaon ntá jahará la Nchakuen Dios la tsikitiaxínrá.

Sákjuj ch'ín Jesús nkaya nkajní

⁶ Ntá tí naxa kójnkotséko sín ch'ín Jesús, kjuanchankíhi sín ch'án kixin:

—Jaha Inchéni, zá tsjánjonhya kjuachaxin jaí ts'etqanni chjaséni Israel inaá? —ichro sín.

⁷ Ntá kjuátehe ch'ín Jesús kixin:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etqan tíha. ⁸ Ntá itsi tí Nchakuen Dios ntá ts'ayéherá kjuachaxin sátsjichronkará nkehe tí xra kjuj'ta, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuénté chjasintajni.

⁹ Ntá kjuixin nixja ch'ín Jesús ntá xrinahya tinkák'it'ótjen ch'án sákjuj ch'án la tjejótsehe sín. Sákjuj ch'án hasta kjuák'enkákjan ch'án ijnko tjuj. Ntá í t'ikonhya sín nkerí kjujji ch'án. ¹⁰ Ntá naxa tjejókota sín tí sákjuj ch'ín Jesús nkajní, a ntá xrinahya titáya k'uikuén sín yaá chojni ntoa tjejóya sín ka tjóá tjejó sín chjinaxon tí tjejó tí jehe sín. ¹¹ Ntá tí sín a mé ntáchro sín kixin:

—Jahará chojni kjuixinrá estado Galilea, ¿nkehe tsonhen naxa kontará nkajní? Xikaha tjejokontará sákjuj Jesús la ko mé xikaha xiki ch'án inaá —ichro sín.

Xreyá ch'ín Matías tsjiatehe lúké ch'ín Judas

¹² Na ntá kjanxín sín tí jna it'in Olivo na ikjan sín chjasin Jerusalén. Tíha a mé kjinhyó tjen kixin ó xikahó k'uetqan tí ley sátsji sín tí yaon t'ok'éhe sín. ¹³ Na ntá kjujji sín tí chjasin ntiha ntá k'ujt'ótjen sín tí yóxin piso tí nchia tsikjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuènte tí partido cananista, la ko kjaxin ch'ín Judas, savé ch'án mé it'in Jacobo. ¹⁴ Kaín sín kójnkotsé sín ntiha tsonixjehe sín Dios la ko k'uéjoko sín tí kichó tí ch'ín Jesús la ko tí tjan María, iné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín tqté ch'án jnkqsiné tí tjejó tí sín tinkáchónki Inchéni mé ijnko ciento ikán chojni mé tsikójnkotsé ntiha. Ntá ntáchro ch'án kixin:

¹⁶ —Kichóni, t'ichjánxin tsoxiteyá éxi nixja xroon itén Dios éxi tsínixja ch'ín David tsíchrónka Nchakuen Dios nkehe sich'e ch'ín Judas. Tí ch'ín Judas mé kjuj'kao ch'án tí sín tsotsé ch'ín Jesús. ¹⁷ Jehe ch'án mé kjaxin k'uék'ajikoni la jnkokón xra k'uáyekoni ch'án. ¹⁸ A ntá jehe ch'án mé sákjuik'énaxín ch'án ijnko nonte tí chichaon kjuacha ch'án kixin tí jie kjuasin ch'án. Ntá k'uánótjen ch'án la ikja ch'án k'uitja nonte la xitjehe tsee ch'án k'uaxrje kaín sjintánó ch'án. ¹⁹ Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrxjén kixin ijnko nonte síin ijni. ²⁰ Tí xroon Salmo mé nixja xikihí:

Tsitqhe ntqé ch'án a,

la kohya nkexro ts'ejó ntiha.

La ko kjaxin ntáchro kixin:

Í jnko nkexro ts'áyéhe tí xra kuènte ch'án.*

Mé xikaha tsíkjin ch'ín David.

²¹ Tí tjejóni ntihi la síin chojni ó k'uájikoni xráxín tí k'uék'ajikoni Inchéni Jesús ²² desde k'uikoni nkexrí kuikíte ch'ín Juan tí jehe ch'án la ko hasta k'uikoni sákjuj ch'án nkaya

* 1:20 Salmos 69.25; 109.8

nkajní. Ntá ijie t'ichjánxin tsoxreyá jnkojín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xíkaha chrónka ch'ín Pedro.

²³ Ntá kjuenkayáxin sín tsonoxín yaá chojni mé tí ch'ín José, t'íkón ch'án Barsabás la ko Justo, la ko kjaxin í jnko ch'án it'in Matías. ²⁴ Ntá nixjehe sín Dios la ntáchro sín kixin:

—Ìnchéni jaha mé choxian asén kaín chojni. Tjáhohéni nkexro tsonhen tudar xra tí yaá tí nkexro í kónoxín ²⁵ tsjiatehe xra apóstol kuente ch'ín Judas. A ntá tí ch'ín Judas mé kuithe ch'án tí xra kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuíuch'e sín suerte ntá xrinahya kónhen tocar tí ch'ín Matías, ntá tuénxín tí hora a kuákja ch'án xra k'uéjoko ch'án tí tejnko tí sín kjueya Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín. ² Xrinahya kuínhin sín ijnko tóvéntó kuixín nkajní. Tí tóvéntó mé éxi ijnko xrinto fuerte chjehe. Kuenté tí nchia tjejóxehen sín mé kóvéntó kjaxin. ³ Ntá xrinahya k'uíkon sín nkehe éxi xrohi nene tsjehe. Ntá tíha xíkayehé la k'uéjókjen jnkojnko kja tí jehe sín. ⁴ Na ntá kaín sín k'uáyehé sín tí Nchakuen Dios ntá kjuankixin sín nixja sín í jnko nkiva kixin Nchakuen Dios kjuínkítsa sín nixja sín.

⁵ A ntá tí yaon a la tí chjasin Jerusalén k'uéjó chojni judío tjinkaon sín sinchexiteyehé sín tí nkehe tinkáchónki sín, mé tsíkjixin sín nkuíxín chjasintajni. ⁶ A ntá jehe sín mé tsikinhin sín tí tóvéntó ntá tsíkóchjina nchónhya chojni. Ntá í noehya sín nkehe chrókjuenkayáxin sín kixin jnkojnko tí jehe sín mé kuínhin sín kixin nixja tí sín a jnkojnko nkívee sín. ⁷ Ntá síxranka sín, chakon sín ntá jehe sín mé tjo sín kichó sín kixin:

—¿Á jehya kaín tí sín tjejónixja mé tsíkjixin sín estado Galilea? ⁸ La ¿nkekuenté tjejótinhinni kixin nixja sín jnkojnko nkíveeni? ⁹ Kixin ntíhi mé síin chojni tsíkjixin chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia, ¹⁰ la ko Frigia, la ko Panfilia, la ko Egipto la ko nkuíxín Africa antsi nó ntaha Cirene. La ko kjaxin chojni romano tjejó ntíhi. Iso tí sín a mé chaxín tsíkókjéxín judío, la í so la tinkáchónki sín Dios éxi tí sín judío xíkaha. ¹¹ La kjaxin síin chojni tsíkjixin Creta, la ko Arabia. Mé xíkaha kaín ní tsíkjixinni tí chjasin a mé tsikinhinni tjejónixja tí sín a tí kjuaxroan kuente Dios jnkojnko nkíveeni —mé xíkaha ichro sín.

¹² Ntá tóxakonhen kaín sín la chakon sín ntá kjuanchankíhi kichó sín kixin:

—¿Nkehe t'axrxexín kaín tíha? —ichro sín.

¹³ A ntá iso sín kjuanoá sín ntáchro sín kixin:

—Tsékoan tí sín a —ichro sín.

A ntá ch'ín Pedro chénka tí sín síin

¹⁴ Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kixin:

—Jahará chojni judío la ko jahará tjejorá chjasin Jerusalén. Kaínrá tjejorá tinhínra tí nkehe tsoxrjanka. ¹⁵ Tí sín tjejó ntíhi la jehya tsékoan sín éxi ntáchrorá, kixin na ntá las nueve nchítjen la kohya nkexro tsékoan. ¹⁶ Tíhi mé tsíchronka ch'ín profeta Joel:

¹⁷ Ntáchro Dios kixin: Itsi ijnko yaon tsjixixín ntá tsochr'an Nchakuenná ntá ts'áyehé chojni.

Ntá tí xjaanrá ntoa la ko tí xjaanrá chjin mé tsonixja tan kuéntana.

La ko tí sín ntasoá mé titàya ts'íkuèn sín tí nkehe tsjákohá sín.

La ko tí sín ó táda la kotáchríen sín ts'íkonxín sín kixin nkexrí tjinkaon Dios.

¹⁸ Tí yaon tsonhen kaín tíha la tsochr'an tí Nchakuenná ts'áyehé kaín tí síntoa ch'ena xra la ko tí síchjin kjaxin

la tsochrónka sín tanná.

¹⁹ Ntá janhan mé tsjákoxián ijnko kjuachakon nkajní.

A ntá chjasintajni tsjákoxián kjuaxroan:

mé ts'ixín ijní la ko xrohi la ko itjuj tsík'óna ihnchi.

²⁰ Mé tí yaon la ts'inkaséyanxínnya, ts'óna ts'ixín tie.

A ntá tí nitjó mé ts'óna ijní.

Xíkaha senó tsonhen ntá itsi Ìnchéni.

Tíhi mé ijnko yaon imá jíe la imá náxrxón.

²¹ A ntá kaín tí nkexro tsjanchehe ihnjé Ìnchéni kixin tsjinkítsa sín mé tsaá sín.*

Mé xíkaha tsíchronka ch'ín Joel.

* 2:21 2.17–21 Joel 2.28–32

²² Jahará chojni israelita tinhínra tí nkehe tsoxrjanka. Tí ch'in Jesús tsíkjin chjasin Nazaret mé Dios kjuakoxin ch'an kixin tsíchr'an ch'an kixin kjuasin ch'an itsjé kjuaxroan jie k'uikonra la ko kjuako ch'an kixin Dios tsíchjé ch'an kjuachaxin kixin tjinkaon ch'an chrók'uikonra. Jahará ó jina nohará kaín tíha. ²³ Kjonté xikaha k'uikonra la jahará itserá ch'an éxi tsíkjenkayáxin Dios ósé. A ntá jahará kjuínchek'ayéhérá ch'an tí sín jínahya, a ntá tí sín jínahya mé k'óyan sín ch'an, kjuak'enkani sín ch'an ijnko ntacruz. ²⁴ Kjánchó Dios la kjuínchexechón ch'an inaá la kjuatsen ch'an tí kjuatjoté kuente kjuach'en kixin ntá ti kjuach'en xitjahya ts'etuenhen tí jehe ch'an. ²⁵ A ntá ósé tí ch'in rey David tsíchrónka ch'an kuente Jesús ntáchro ch'an kixin:

Jaha Inchéni t'íkuan kixin jnkochrín tjétaón ntia tí xritjak'é janhan.

Jaha mé itjen tjaná chjina kixin chrókohya jie chrókjuásian.

²⁶ Méxra imá chéhe asenná. Ir'və tsjexian tí nkehe náxrjón.

Ó nòna kixin kohya nkehe ts'atsínka kjonté its'en.

²⁷ Ó nòna kixin tí jaha tsitjéhya asenná chríkjan tí siín chojni tsík'en.

Tsjánjonhya kjuachaxin kixin tsoxíka ntóna kixin janhan mé ijnko nkexro t'aha xra jina tjuéhe.

²⁸ Jaha mé kjuákona tí ntia tsjanjon kjuachón. Jaha mé nchechána kixin t'ayakonna.†

Mé xikaha tsíkjin ch'in David.

²⁹ Kíchóni tjtóhérá tsontáxrjan kixin ch'in David, tí nkexro k'uaxrjenixinni mé tsík'en ch'an la ko tsíkixravá ch'an. Ntá naxa noheni nketí tsíxravá ch'an. ³⁰ A ntá ch'in David mé ijnko nkexro tsíchrónka itén Dios la ó nohe ch'an kixin chaxín Dios chrónka kixin ijnko nkexro ts'axrjenixín ch'an mé ts'óna rey mé ts'etoan éxi jehe ch'an k'uetjoan ch'an. ³¹ Mé xikaha ch'in David la ósé ó nohe ch'an nkehe tsohnen la mé chrónka ch'an kixin tsoxechón Cristo la ko ntáchro ch'an kixin tí asén ch'an tsitjéhya tí siín tí sín tsík'en la ts'itjányanhi tí cuerpo kuente ch'an. ³² Méxra Dios kjuínchexechón tí ch'in Jesús, mé k'uikonni kaín ní la mé chrónkani kixin chaxín tíha. ³³ Ntá ijie Jesús mé sákjuiko ch'an Dios la nàno itja chjina Dios mé tjen ch'an. Ntá tsintáchro It'é ch'an Dios kixin tsochr'an ch'an tí Nchakuen ch'an. Ntá jie ó kui la ó k'uikón la ko kuínhínra nkehe kónhen. ³⁴ Tí ch'in David la jehya jehe ch'an sákjuí nkaya nkajní, kixin jehe David ntáchro ch'an kixin:

Inchéni Dios mé ntáche tí Inchéni kixin:

“Tjak'e tjaná chjina ntihó tsétoan,

³⁵ tsjixinjian kaín xín tí sín núnkakonhan la tsjachahya sín ts'etoan sín kixin jahvá mé tsétoan.”‡

Mé xikaha tsíkjin ch'in David.

³⁶ Ntá kaín rá chojni israelita chrókónohará chaxín kixin jehe tí ch'in Jesús ó kjuakénkanirá tí ntacruz la Dios mé kjuík'éna Inchará ijie, mé tí Cristo —mé xikaha chrónka ch'in Pedro.

³⁷ Ntá tí kuínhin sín tíha ntá imá kóxakonhen asén sín. La ntá kjuanchankíhi sín ch'in Pedro la ko tí í so sín kjuéyá ch'in Jesús. Ntáchro sín kixin:

—Kíchóni, a ntá jie la ¿nkexrí chrókjuich'eni?

³⁸ Ntá kjuátjehe ch'in Pedro ntáchro ch'an kixin:

—Chrókuitóhérá tí ijjará la chróráxinkáonrá Dios. Ntá chrókuikitiaxínra ihnjé Jesucristo ntá Dios mé tsjakjínhanrá tí ijjará ntá jehe ch'an tsjanjon ch'an Nchakuen ch'an ts'ayéhérá.

³⁹ Dios mé sinchekjítjonhanrá ch'an tí Nchakuen ch'an ts'ayéhérá jahará la ko xjaanra la ko kjaxin tsohjéhe ch'an Nchakuen ch'an kaín xín tí sín tjejó ikjín. Mé jehe ch'an tsohjéhe ch'an Nchakuen ch'an jnkójnko tí nkexro tsjeyá ch'an.

⁴⁰ Mé xikaha ntáchro ch'in Pedro la ko í so nkehe ntáchro ch'an. Nta nixjehe ch'an sín inaá, ntáchro ch'an kixin:

—Chrókuitóhérá tí jínahya tjenkayáxin tí chojni siín chjasintajni kixin jahará me jina chrókuaará.

⁴¹ Ntá kaín tí sín kuítekaon tí nkehe chrónka ch'an la ntá kuíte sín la tí yaon a kóchjina iní míl chojni kjuankixin tinkáchónki Inchéni Jesús la k'uíto tí sín ó xráxin siín. ⁴² Ntá kaín sín mé jina k'uék'ejó sín mé kuítekaon sín tí nkehe kjuako tí sín kjuéyá Jesús la kjuínkítsa sín kjuanjon sín tí nkehe chrókjóné tí í so sín la ko chjéhe sín Dios kjuasáya la ko kójnksé sín kixin sine sín niotja xraxinkakonxín sín kixin ik'uén Inchéni.

Mé xikaha k'uejó tí sín xránkixín tinkáchónki Inchéni

⁴³ La ntá kaín tí í so sín mé chrakon sín kixin tí sín tsíkjeýá Jesús kjuasin sín itsjé kjuaxroan.

⁴⁴ La kaín tí sín tinkáchónki Jesús mé jnkokqá k'uejó sín la jnkokqá chóna sín tí nkehe sine sín. ⁴⁵ Kjuínchekji sín tí nkehe chóna sín ntá k'óxikeyehe sín tí chichaon la chjéhe sín tí sín

chóntahya. ⁴⁶ Jnkojnko yaon kójnkotsé sín tí ñnko la ntá jnkojnko ntq̄e sín kjóneko kíchó sín. La ko kjóne sín niotja káxin xraxinkakonxín sín káxin ik'uén Ìnchéni la ko kjuaxróxin k'uéjío sín la kohya nkexro kjuinchehnke. ⁴⁷ Kjuanchehe sín kjuasáyé Dios. Ntá kaín chojni k'uéchéntehe sín kjuasáya. A ntá jnkojnko yaon Ìnchéni mé kjueyá iso chojni káxin tsotsjé tí sín tsaá.

3

Kuítohe jína ijnko nkexro xitjahya tji

¹ Jnko yaon tí ch'in Pedro la ko ch'in Juan mé chr'in sín sákjui sín tí tjen tí ñnko. Mé kjuíji sín las tres kónjín, tí hora mé nixjehe sín Dios. ² Kaín yaon kjuák'e ntiha ijnko ch'in tsikokjéxin xitjahya tji. Sátsikjiko sín ch'án tí ñnko la tsikjak'etjaxín sín ch'án tí ntója puerta mé it'in Ntója Náxrjón. Ntaha tjetjanachak'éhe ch'án chichaon tí sín sín'ixenhen ntiha. ³ Ntá xríngahya k'uíkon tí ch'in xitjahya tji kjuíji tí ch'in Pedro la ko ch'in Juan ts'ixenhen sín ñnko, a ntá kjuanchak'éhe ch'án sín chichaon. ⁴ Na ntá ch'in Pedro la ko ch'in Juan mé komá sín tí ch'in a la ntá ntáchro ch'in Pedro káxin:

—Tsjehe níhi.

⁵ A ntá tí ch'in a tjetsjehe ch'án jína káxin ách'e ichrén nkehe tsjanjon tí sín a, ichro ch'án. ⁶ A ntá ch'in Pedro ntáchro káxin:
—Na chontahya plata ni oro kjánchó tí nkehe chonta la tsotjahá. Mé kjuachaxin ihnjé Jesucristo, tí nkexro tsikjixín chjasin Nazaret, la t'inkatjen itjia —mé xíkaha ichro ch'in Pedro.

⁷ Ntá ch'in Pedro mé itsé ch'án tí tja chjina tí ch'in xitjahya tji ntá k'uúkatjen ch'án. Ntá xríngahya ó kósóji tí nta ntoá toté ch'án. ⁸ Ntá tí ch'in xitjahya tji la chrika ch'án la kjuák'exín toté ch'án ntá kjuankáxin ch'án itji ch'án. Ntá k'uúkenko sín ch'án nkaxenhen ñnko. Tjetji ch'án la ko chrika ch'án la chjéhe ch'án kjuasáya Dios. ⁹ Na ntá kaín tí chojni sín tí chjasin ntiha la k'uíkon sín káxin ó tji ch'án la ko chjéhe ch'án kjuasáya Dios. ¹⁰ Ntá chrakon sín káxin xíkaha tsikónhen káxin tsíkatsqan sín káxin jehe tí nkexro kjuák'etjaxín kjuanchak'á ch'án chichaon ntója ñnko it'in Ntója Náxrjón.

Nixjehe ch'in Pedro tí chojni sín tí ntasin Salomón

¹¹ Na tí ch'in xitjahya tji la mé títoehya ch'án tí ch'in Pedro la ko ch'in Juan. Ntá kaín xín tí sín sín ntiha chrakon sín kuinká sín sákjuítsjehe sín tí ntasin kuente ñnko it'in ntasin Salomón káxin ntaha tjejó tí sín a. ¹² Ntá tí k'uíkon ch'in Pedro xíkaha la ntáche ch'án sín káxin:

—Jahará chojni israelita, ¿nkekuente chrakonrá jahará la ko nkekuente komaráni? ¿Á tjenkayáxinrá káxin jehóni kjuínchekitq̄heni jína tí ch'in i káxin jehóni chóntani kjuachaxín la ko káxin imá tinkáchonkini Dios? ¹³ Náhi. Tí Dios k'uékinkáchónki ch'in Abraham, la ko Isaac, la ko Jacob mé imá chjéhe ch'án kjuachaxín tí Xjeen ch'án Jesús. Kjánchó jahará tsíkjenhenrá ch'án tí sín t'etqan. Ntá tí ch'in Pilato mé tjinkaon ch'án chrók'uatjánta ch'án tí ch'in Jesús kjánchó jahará la tjínkákonhyará xíkaha. ¹⁴ A ntá jahará chrókjuanchiará chrókútohe sáchrókjui tí nkexro tjóá jina asén. A ntá náhi. A ntá jahará mé tjínkáonrá sátsji ijnko chojni chónta nchónhya jie. ¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé xíkaha k'uíkonni la chrónkani. ¹⁶ Tí kjuachaxién ihnjé Jesús mé tinkáchónkini la ntá tíha mé kuítq̄exín jína tí nkexro k'uíkonrá la ko choxinrá. Tí ch'in a mé kuítekaon ch'án ntá kuítóhe ch'án jína. Mé xíkaha ó k'uíkonrá kaín rá.

¹⁷ Kíchóni ó ñona káxin tió jahará la ko tí sín t'etqan k'oyánrá Jesús la ni kónoahyará nkehe kjuich'erá. ¹⁸ Ntá ó xiteyá tí nkehe tsintáchro Dios tsínixjajín tí sín tsíchronka itén ch'án káxin tí Cristo t'ichjánxín tsjasóte ch'án. ¹⁹ Méxra tsítq̄hérá ijjárá ntá xráxinkáonrá Dios ntá jehe ch'án mé ts'óxika ijjárá ntá Ìnchéni mé sinchekitq̄hará ch'án jína. ²⁰ Ntá jehe ch'án mé tsochr'án Jesucristo inaá la xra ó tsí káxin tsaáxinrá. ²¹ Na ntá ijie la Jesucristo la nkaya nkajni ntahó tsitq̄he ch'án hasta tsjasiyóxinjian Dios kaín nkehe éxi tsintáchro ch'án tsínixjajín ch'án tí sín tsíchronka itén ch'án ósé. ²² A ntá senó tí ch'in Moisés tsíchénka tí sín tsik'axrjeniximi káxin: “Ìnchéni Dios mé tsochr'án ijnko nkexro ts'axrjenixínrá tsochrónka itén ch'án éxi tsích'r'án ch'án tí janhan. T'ichjánxín tinhínrá kaín tí nkehe tsontáchro ch'án. ²³ A ntá tí chojni títekakonhya tí nixja tí nkexro a la ts'itjayan sín la tsítq̄he sín tí nació Israel.”* mé xíkaha tsíchronka ch'in Moisés.

²⁴ Kaínxín tí sín tsíchronka itén Dios kjuankáxin ch'in Samuel la ko kaín tí sín kui chr'éxin mé chrónka sín káxin kaín tíha tsonhen xíkaha tí yaon i. ²⁵ Mé tí nkehe tsintáchro Dios tsínixjajín ch'án tí sín tsíchronka itén ch'án káxin xíkaha chrók'uayéhérá jahará tí nkehe chrókjuanjón ch'án káxin chrók'uejorá jína. Dios tsíkjich'éna ch'án ijnko pacto mé

* 3:23 3.22-23 Deuteronomio 18.15,19

nixjehe ch'an tí sín tsík'axjeníxinrá mé tsintáche ch'an tí ch'in Abraham kixin: "Kaínxín chojni chjasintajni mé tsoyaonxín sín kixin ijnko nkexro ts'axrjeníxin tí jaha."† 26 Dios kjuínchexechón ch'an tí Xjeen ch'an la saoxín ichr'an ch'an tí tjejorá jahará israelitará kixin chrókjuintayaonrá ch'an kixin jnkojnko tí jahará chrókjuítqohérá tí nkehe jínahya ich'erá —ichro tí ch'in Pedro.

4

Tí ch'in Pedro la ko ch'in Juan nkayakon tí sín t'etqan

1 Ch'in Pedro la ko ch'in Juan la naḡa tjejonixjehe sín tí sín tsikójnkotsé ntá xrinahya ikui tí sín ncha't'á la ko tí ch'in t'etqenhen tí sín soldado kuente tí nínko la ko tí sín saduceo. 2 Imá kónínkaon sín kixin ch'in Pedro la ko ch'in Juan kjuakqohé sín tí sín tsikójnkotsé nkexri tsoxechón chojni tsík'en kixin xikaha xechón ch'in Jesús. 3 Ntá kuínhin sín xikaha ntá itsé sín tí sín a ntá sákjuiko sín, chr'áxehnen sín ntqechiso. Ntaho k'uejós sín hasta kóyaon kixin ó ntá kóntó. 4 A ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoá mé in'ó mil chojni ntoá ó.

5 A ntá tí yaon chr'éxin kójnkotsé tí chjasin Jerusalén tí sín t'etqan kuente tí sín judío la ko tí sín tjako tí ley. 6 Mé kjaxin ntaha tjeen ch'in Anás, mé jehe ch'an mé tí ncha't'á imá t'etqan, la ko ch'in Caifás, la ko kjaxin ch'in Juan, la ko ch'in Alejandro, la ko kaín tí chojni kjéhya tí ncha't'á t'etqan. 7 Ntá k'uetqan sín kixin síxrakoa ch'in Pedro la ko ch'in Juan. Ntá k'uejós sín jnkosiné la ntá kjuanchankíhi sín ntáchro sín kixin:

—¿Nkexro kjuanjon kjuachaxin ó nkexro kjuachaxin ihníé kixin xikaha ich'erá tí nkehe?

8 Ntá ch'in Pedro imá chóna ch'an kjuachaxin kuente Ncha'kuen Dios ntá kjuátqhe ch'an ntáchro ch'an kixin:

—Jahará chojni t'etqan kuente chjasin la ko jahará sín táda kuente chjasin Israel, 9 jahará mé tjanchankirá kixin nkexri kuítqhe ijnko chojni níhi jína kixin tjínkaonrá tsohohará. 10 Ntá tinhnrá jína tí nkehe tsochrónkaxinni kixin kaín rá chojni chjasin Israel tsohohará kixin tí ch'in í itjeen ntihi mé kuítqhe ch'an jína kjuachaxién ihníé Jesucristo, tí nkexro tsík'jixin chjasin Nazaret. A ntá jahará mé tsíkjakénkanirá ch'an tí ntacruz la ntá Dios kjuínchexechón ch'an inaá. 11 Tí ch'in Jesús í mé tí xro náxrxónhya kuítqentará tió kjuich'énará tja't'ó ntá mé jie k'óna tí xro tjeotan.* 12 Kohya í jnko nkexro chóna kjuachaxin chrókuaáxinni kixin kohya í jnko ihníé chojni ntihi chjasintajni chrókuaáxónkini chrókuaáni —mé xikaha ichro ch'in Pedro.

13 Tí síxreé mé k'uikon sín kixin ch'in Pedro la ko ch'in Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'etqan ntá kjuátqan sín kixin tí sín a mé tsík'ajiko ch'in Jesús. 14 A ntá tí ch'in tsíkítqhe jína mé ntiha tjejóko sín ch'an. Méxra xitjahya tsjanchia sín jie tsjasóte tí sín a. 15 Ntá tí síxreé a mé k'uetqan sín kixin tí sín a ts'axrje sín ntója ntá jehó sín k'uejóxehnen sín nchia ikjo sín kichó sín. 16 Ntá ntáchro sín kixin:

—Nkehe chrókjuich'eheni tí sín a? Kaínxín tí chojni ntihi chjasin Jerusalén mé ó k'uikon sín kixin kjuínkítsa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxínhya tíha. 17 Í tjínkakonhyani kixin naḡa tsochrónka sín tíha kixin naḡa tsinhin chojni. Méxra ts'etqanni kixin í tsochénkahya sín nínkexró tí ihníé Jesús.

18 Na ntá k'uíyqhe sín tí sín a inaá ntá k'uetqenhen sín kixin ninkehó chrónixja sín la ko chrókjuako sín ihníé Jesús, ichro sín. 19 A ntá ch'in Pedro la ko ch'in Juan kjuátqhe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará ó chrókjuinchexiteyéheni tí jehe ch'an? 20 A ntá jeheni la xitjahya tsítqheni tsochrónkani tí nkehe ó k'uíkoni la ko tí nkehe kuínhini —ichro sín.

21 A ntá kjónté xikaha kuínhin tí síxreé la jiehe k'uetqan sín ntá kjuanjon sín kjuachaxin kixin sátsji tí sín a kixin k'uitjahya sín nkexri sínchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuich'e sín. 22 Na mé tí ch'in kuítqhe jína kixin tí kjuaxroan mé chjina k'uaxitjehe ch'an cuarenta nánó a.

Tí sín tinkáchónki Jesús tjanchia sín kixin tsochrakonhya sín

23 Ntá tí ch'in Pedro la ko ch'in Juan tsíxranjon kjuachaxin sátsji sín na ntá sákjuí sín tí tsikójnkotsé iso tí sín chónin sín. Ntá chrónka sín kaín nkehe k'uetqan tí sín ncha't'á t'etqan la ko tí sín táda. 24 Ntá kjuixin kuínhin tí sín tsikójnkotsé na ntá kaín sín nixjehe sín Dios la ntáchro sín kixin:

† 3:25 Génesis 22.18 * 4:11 Salmo 118.22

— Ìnchéni, jaha mé kjuich'éna nkajní la ko chjasintajni la ko tí ntayaon la ko kaín xín tí nkehe síin. ²⁵ Jaha mé kjuachaxiën Nchakuan nixjaxian ch'ín David tí nkexro kjuít'aha xra. Ntáchro ch'án kixin:

¿Nkekuènte kixin kónínkaon kaín tí chojni naciòn ókjé?

À ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey síin chjasintajni la ko kaín tí sín tí chjasin kójnkotsé sín

nínkakonhen sín Ìnchéni la ko Cristo.†

Mé xikaha tsikjin ch'ín David ósé.

²⁷ Mé xikaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkijxin ókjé, la ko tí sín israelita mé tsíkójnkotsé sín tí chjasin ntihi kixin kónínkakonhen sín tí Xjaan Jesús chóntahya jje, mé tí nkexro tsíkijéyá jaha sit'aha xra. ²⁸ Mé xikaha kjuínchexiteyá sín tí nkehe ósé tsíkjenkayáxin kixin t'ichjánxin xikaha tsonhen. ²⁹ À ntá Ìnchéni, tsjehé kixin imá jjehe k'uetqan tí sín a. La ntá jaha tsjinkitsa tí sín sit'aha xra tsochrakonhya sín tsochrónka sín itán. ³⁰ La ko tí kjuachaxiën sínchekitqexín jína tí chojni níhi la ko tsjáqoxian kjuaxroan kjuachaxiën ihnjé tí nkexro Jesús t'aha xra —mé xikaha nixjehe sín Dios nkaya nkajní.

³¹ À ntá tí kjuixin nixjehe sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankixin sín chrónka sín itén Dios.

Tí kaín nkehe síin la kaín sín mé kuènte sín

³² La kaín tí sín kuínkáchónki sín Jesús mé jnkokoá kjuenkayáxin sín. Kohya nkexro ntáchro kixin jehó kuènte sín nkehe síin. Náhí. Kaín sín mé kuènte sín. ³³ Tí sín tsíkijéyá Jesús mé kaín asén sín chrónkaxín sín kixin nkexri xechón Ìnchéni Jesús. Ntá Dios antsí kjuíncheyaoon kaín sín. ³⁴ Kohya ninkexró nóaxinhya tjejó ntiha kixin kaín tí sín chónta nontee sín o ntqex sín kjuínchekji sín. Na ntá tsíkijikao sín tí chichaon ³⁵ chjéhe sín tí sín kjueyá Jesús. À ntá tí sín k'óxikeyehe sín tí chichaon, kuákja tí sín nóa. ³⁶ Mé xikaha kjuich'e ijnko ch'ín levita it'ín José. Jehé ch'án la tsíkijxin ch'án nonte Chipre jnkosiné ntayaon. Tí sín kjueyá Jesús mé kjuínchek'in sín ch'án Bernabé, mé t'axrxén kixin tí ch'ín nchechéhe asén chojni. ³⁷ Jehé ch'án a mé kjuínchekji ch'án ijnko nontee ch'án ntá kjuikao ch'án tí chichaon kjuínchek'áyéhe ch'án tí sín kjueyá Jesús.

5

Jje kjuasin ch'ín Ananías la ko tjan Safira

¹ À ntá í jnko ch'án mé it'ín Ananías, a ntá ichjién ch'án mé it'ín Safira, mé jehe sín mé kjuínchekji sín ijnko nontee sín. ² À ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuiko ch'án la chjéhe ch'án tí sín kjueyá Jesús la kjuanjón ch'án éxi kaín. ³ Ntá ntáchro ch'ín Pedro kixin:

—Ananías, ¿kuènté chjehé kjuachaxin tí Tsochren kixin k'uetuenhen asán? Ntá kjuich'iyehé tí Nchakuen Dios kixin kjuínchemá iso chichaon kjuínchekjixián nontaa.

⁴ ¿Á jehya nontaa tíha? Ntá tíó kjuínchekjia la, tí chichaon la, ¿á jehya kuèntá? ¿Kuènté kjuenkayáxin sjeh'e tíha? Kjuich'iyehé Dios, jehya chojni kjuich'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín. ⁶ Na ntá ikjui iso sín ntasoá la ntá kjuínchek'ísimá sín ika tí cuerpo kuènte ch'án la ntá sákjuiko sín, sákjuikjavá sín.

⁷ Ntá k'uátsínka iní hora ntá kjuíji ichjién ch'ín Ananías k'uixenhen tjan tí nchia ntaha a. La noehya tjan nkehe tsikónhen tí ntiha. ⁸ Ntá ch'ín Pedro mé kjuanchankíhi tí tjan a, ntáchro ch'án kixin:

—Chrónka, ¿á chaxín xikahó kóxiixin tí nonte ó kjuínchekjirá? —ichro ch'án.

Ntá kjuátéhe tjan kixin:

—Chaxín xikahó kóxiixin.

⁹ Ntá ntáchro ch'ín Pedro kixin:

—¿Nkekuènte jnkokoá kjuenkayáxinrá kjuich'iyehérá Nchakuen Ìnchéni? Kjá ntáchrorá kohya nkehe chrókónhanrá. Ntihi ó kui tí sín ntasoá sákjuikjavá sín xia na ntá jaí sátsjiko sín tí jaha —mé xikaha ichro ch'ín Pedro.

¹⁰ Ntá tuénxin kjuítsínka tjan Safira toté tí itjen ch'ín Pedro ntá ik'uén tjan. Ntá k'uixenhen tí sín ntasoá tí nchia a ntá k'uikon sín kixin tsíkijxin tsík'en tjan. La ntá sákjuiko sín tí cuerpo kuènte tjan la kjuavá sín tjan tí chjinaxón tsixrává tí xii tjan. ¹¹ Na kaín tí sín kuènte njnko la ko tí í so sín kuínhin tí xikaha tsikónhen, mé imá chrakon sín.

Itsjé kjuaxroan kjuaqoxin sín

¹² À ntá tí sín kjueyá Jesús mé kjuaqoxin sín nchónhya kjuaxroan tí síin chojni ntiha la ko kaín sín mé kójnkotsé sín tí ntásin it'ín Salomón. ¹³ Chrakon iso sín k'uítahya tí jehe sín la

kjonté la kaín chojni tjikosáyehe tí jehe sín. ¹⁴ La ntá xrínghya nchónhya chojni ntoa la ko chojni chjin kjuankíxin tinkáchónki sín Ìnchéni. ¹⁵ Ntá itsjé chojni mé kuakítsje sín tí chojni níhi k'uejo sín ntá. Tjéjóták'á sín chrítaón cama la ko kania kíxin ts'atsínka ch'ín Pedro ntá kjonté its'ueen ch'án ó ts'atsínka tí tjejó sín mé chrókuítogéxin sín jína. ¹⁶ Kjaxin tí chjasin chjino mé kjuixín nchónhya chojni ikjui sín chjasin Jerusalén la kjuíkəo sín tí chojni níhi la ko tí chojni chóna nchakuen tí jínahya. La kaín sín a mé kuítəhe sín jína.

Ch'ín Pedro la ko ch'ín Juan mé chónkíhi sín

¹⁷ Na ntá tí sín nchat'á t'etəoan la ko tí sín kuente tí sín saduceo mé imá kóchjínogínhin sín. ¹⁸ Na ntá itsé sín tí sín kjueyá Jesús la chr'áxenhén sín ntəochiso. ¹⁹ A ntá ijnko ángel kuente Ìnchéni ikui tí tie a kuakítjehə ch'án ntója ntəochiso ntá kuakítsje ch'án tí sín a. La ntá k'uetuənhén ch'án sín kíxin:

²⁰ —Sátjirá nínko la tsjákohérá kaín tí sín ntiha tí tan nixin tsjanjon kjuachón.

²¹ Kjuixín kuínhin sín ntá sákjuí sín ntá tí k'uínkaséyan k'uixenhén sín tí nínko kjuako sín.

A ntá tí nchat'á t'etəoan la ko tí sín k'uejóko ch'án mé k'uíyehə sín tsəjnkotsé kaín tí síxreé, mé tí sín t'etəoan kuente Israel. Na ntá k'uetəoan sín kíxin tsoxrakoa tí sín tjejóchjina tsíkjeýá Ìnchéni. ²² A ntá kjuíji tí sín policía tí ntəochiso a ntá k'uitjahya sín tí sín a. La ntá ikjan sín la ²³ ntáchro sín kíxin:

—Kjuíjini ntiha la k'uíkonní tsíkjehe jína ntəochiso a la k'uejó tí sín soldado a ntója. Ntá kuakítjehéni ntəochiso la k'uitjahyani ninkexró tí nkaxenhén —ichro sín.

²⁴ Ntá kaín tí nchat'á t'etəoan la ko tí ch'ín k'uetuənhén tí policía kuente nínko la ko i so tí sín nchat'á t'etəoan mé kuínhin sín ntá ntáchro sín kíxin xá nkexrí chrókónhén chrók'uitjáyán tí xra kuente tí sín a. ²⁵ Na ntá tuénxín kjuíji ijnko nkexro ntáchro kíxin:

—Tí sín k'uejochjinará jahará mé ó nkaxenhén nínko ntaha tjejó sín tjejótjəkohe sín chojni —ichro ch'án.

²⁶ La ntá tí ch'ín k'uetuənhén tí sín policía mé sákjuiko ch'án tí sín policía la kjuíkəjín tí sín tjako. Nínkehó kjuích'ehya tí sín policía tí sín tjako kíxin chrakon sín kíxin ách'e tí sín siín ntiha mé tsjak'e sín xro, ichro sín. ²⁷ Na ntá tió kjuíkəo sín tí sín a la k'uejó sín nkayakon tí sín t'etəoan ntá tí nchat'á t'etəoan ntáchro ch'án kíxin:

²⁸ —Jeheni kjuanjonhyani kjuachaxin kíxin tsjákorá ihnié tí nkexro a. ¿A ntá nkehe kjuích'erá jahará? Kuenté chjasin Jerusalén tsíkjákorá. La tjínkáonrá tsékaráni jie kíxin jeheni tsík'óyánni tí ch'ín a —ichro ch'án.

²⁹ A ntá ch'ín Pedro la ko tí iso sín kjueyá Jesús ntáchro sín kíxin:

—A ntá jeheni t'ichjánxín sinchexiteyéhe ni Dios senó. A ntá chr'əxín sinchexiteyéhe ni chojni. ³⁰ Tí Dios tsíkinkáchónki tí sín tsík'axjeníxinni ósé mé kjuínchexechón Jesús, tí nkexro a mé kjuakénkanirá tí ntacruz tsík'oyánrá. ³¹ Ntá ijie tjejo ch'án Dios nkaya nkajní la náno itja chjina Dios mé tjen ch'án la Dios kjuích'éna ch'án ijnko nkexro t'etəoan kíxin sinchekaá ch'án chojni kíxin tí nacióon Israel chrókjan chrókuínkáchónki sín Dios ntá chrók'uitjáyán tí jie chóna sín. ³² La ko kjaxin jeheni chrónkani kaín tí nkehe k'uíkonní kjuachaxién Nchakuen Dios. Tí Nchakuen ch'án mé chjéhe Dios kaín tí nkexro chaxin sinchexiteyéhe tí jehe ch'án.

³³ La ntá tí sín t'etəoan a mé kuínhin sín tíha ntá kónínkaon sín la ko tjínkaon sín chrók'óyán sín tí sín a. ³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthehe ch'án kjuasáya. Mé k'uínkatjen ch'án kjuák'exín təté ch'án la níxja ch'án k'uetəoan ch'án kíxin tí sín tsíkjeýá Ìnchéni mé ts'axrje sín ntója intsí, ichro ch'án. ³⁵ Na ntá níxjehə ch'án kaín tí síxreé ntáchro ch'án kíxin:

—Jahará chojni israelíta, tóxakonhanrá kíxin kohya nkehe chrókjuích'ehérá tí sín a.

³⁶ Xráxínkáonrá kíxin senó kjuák'e ijnko ch'ín it'in Teudas la tónhén asén ch'án kíxin imá t'etəoan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'ín a la ntá kaín tí sín kuínkáchréhe tí jehe ch'án mé xíka sín sákjuí sín ntá ntahó kjuéxín tí xra k'uejkich'e sín. ³⁷ Ntá chr'əxín tió xrenájín kaín ihnié chojni k'uejó na ntá ikjui í jnko ch'ín mé it'in ch'án Judas la kjuixín ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín xín tí sín kjuíchréhe ch'án xíka sín sákjuí sín ínaá. ³⁸ Méxra títəhérá tjiatəhýará tí jehe sín a. A ntá tí tjejóch'én sín xra kuente chojni ó la kjaxin ts'itjáyán. ³⁹ A ntá tí chaxín tjako sín kjuachaxién Dios ntá tsjachahýará sinchek'itjáyánrá tíha. Méxra títəhérá sín kíxin tsjánjonkohýará Dios.

⁴⁰ Na ntá kaín tí síxreé mé kuítekaon sín la ntá k'uíyehə sín tí sín kjueyá Jesús. La ntá kjuate sín la xík'etuehén sín kíxin í tsonixjahya sín ihnié Jesús la ntá kjuanjon sín kjuachaxin kíxin sátsji sín. ⁴¹ Ntá tí sín kjueyá Jesús mé k'uaxrxéxín sín tí tjejó tí sín t'etəoan kjonté xíkaha kónhén sín la chéhe sín kíxin Dios kjuanjon kjuachaxin kjuasóte sín kíxin tí kjuako sín ihnié Jesús. ⁴² Kuítəehya sín tsjako sín kuente Jesucristo kaín yaon tí nkaxenhén nínko la ko tí jnkójnko ntəe chojni.

6

Kjueyá sín yato chojni tsjinkítsa

¹ Na ntá tí yaon a tjoka sitinkákótsjé tí sín tinkáchónki Ìnchéni. A ntá tí sín nixja nkíva griego mé kóninkakonhen sín tí sín nixja nkíva hebreo. Ntáchro sín kíxin tí sín chjín k'án kuénte sín la kánhyó jína k'uáyéhe tí nkehe síxikáyehé sine sín jnkojnko yaon, ichro sín. ² Na ntá tí teyó tí sín tsíkjeýá Jesús mé k'uíyehé sín kaín tí sín tinkáchónki Ìnchéni. Ntá nixjehé sín, ntáchro sín kíxin:

—Jeheni la jehya jína tsitòheni tí xrá tjakoni itén Dios, kíxin ntá sit'aharáni xra ts'óxikáyeheni tí nkehe sine tí sín k'án. ³ Méxra jahará kíchó ni tsjéýará yato chojni ntoa tí tjejorá, tí chojni jína choxinrá la ko nohe sín la ko antsí chóna sín Nchakuen Dios mé tí sín a sinček'áyeheni tí xrá a. ⁴ A ntá jeheni la tsonixjeheni Dios la ko tsinkákjakoni itén ch'án —mé xíkaha ichro sín.

⁵ La ntá kaín sín mé kuínhin sín xíkaha ntá jnkokoá kjuenkayáxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko antsí chóna ch'án tí Nchakuen Dios. La kjaxin kjueyá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehé ch'án mé tsíkjin ch'án chjasin Antioquia la óse mé tsíkinkáchónki ch'án tí nkehe tinkáchónki tí sín judío. ⁶ Ntá kjuixin kjueyá sín tí sín a ntá kjuikao sín tí tjejó tí sín tsíkjeýá Ìnchéni. La ntá tí sín a mé nixjehé sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sitinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nchat'á judío kjuankíxin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kíxin Dios tsíkjincheyon ch'án la nchónhya kjuaxroan kjuakoxín ch'án tí sín chojni. ⁹ A ntá iso sín tsíkjin sín tí nínko judío kuénte tí sín senó k'uejó esclavo sín tsíkjin sín chjasin Cirene, la ko Alejandria, la ko Cilicia, la ko estado Asia, mé kjuankíxin sín ikjo sín ch'ín Esteban. ¹⁰ Kjónté xíkaha la kjuachahya sín kíxin Nchakuen Dios mé kjuinkítsa tí ch'ín Esteban nixja ch'án. ¹¹ Na ntá jehé sín mé kjuenkehe sín ókjé chojni kíxin tsochrónka sín kíxin kuínhin sín k'uántaxínhin ch'án ch'ín Moisés la ko Dios, ichro sín. ¹² Mé xíkaha k'uixité kaín chojni la ko tí sín t'etqan kuénte nínko la ko tí sín tjako tí ley. La ntá itsé sín tí ch'ín Esteban la tinkánkájen sín ch'án sákjuiko sín ch'án tí sín tí síxreé a. ¹³ Kjaxin kjueyá sín chojni tsochrónka kíxin ntoáhya kjuako ch'ín Esteban la ntáchro tí sín a kíxin:

—Tí ch'ín a mé títoehya ch'án t'ántaxínhin ch'án tí nínko kuénténi la ko tí ley. ¹⁴ Ó kuínhini kíxin chrónka ch'án kíxin tí ch'ín Jesús, tí ch'ín tsíkjin sín chjasin Nazaret, mé sinček'itjáyan ch'án tí nínqeni ntíhi la ko tsjitoxínhin ch'án tí nkehe tinkáchónkini mé tí nkehe tsík'etqan ch'ín Moisés —mé xíkaha ichro sín.

¹⁵ Ntá tí síxreé la ko kaín tí sín sítxaxin ntíha la komá sín tí ch'ín Esteban la mé k'uíkon sín kíxin tí kàré ch'án mé éxi ijnko ángel mé xíkaha tsjehe tí jehé ch'án.

7

Tí nkehe kjuátehe ch'ín Esteban

¹ A ntá tí sín nchat'á t'etqan kjuanchankíhi sín tí ch'ín Esteban kíxin:

—¿Á chaxín kaín tíhi tsíntáchrúa?

² Na ntá jehé ch'án kjuátehe ch'án ntáchro ch'án kíxin:

—Kaínrá kíchó ni Israel la ko sín táda tinhínra tí nkehe tsontáxrjan. Dios kuénteni chóna kjuachaxin mé kjuakohé ch'ín Abraham tí nkexro k'uaxrjeníxini tió kjuák'e ch'án nación Mesopotamia tí naxá sátjinya ch'án tsjak'e ch'án nonte Harán. ³ Dios tsíntáchró kíxin: “Títghé chjasán la ko kaín tí nkexro kjéhya. Na ntá sátja tí nonte tsjákohá jaha.”* ⁴ Na ntá ch'ín Abraham k'uaxrjén ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehé ch'án tí nonte tjejorá ijie. ⁵ Kjánchó ch'ín Abraham la kuákjahya ch'án nít'q nonte hasta ni tí tsjak'e toté ch'án la chónahya ch'án. A ntá chrónka Dios kíxin chaxín chr'éxin tió tsjixin ts'en ch'ín Abraham la tí sín ts'axrjeníxin ch'án mé ts'áyéhe sín tíha. Kjónté naxá kohya nínko xjeen ch'án la mé xíkaha ntáchro Ìnchéni. ⁶ Kjaxin tsíntáchró Dios kíxin tí sín ts'axrjeníxin ch'ín Abraham la ts'ejó sín ókjé nonte, la ko sich'exón sín xrá la ko náxrjónhya ts'ejó sín noó ciento nánó. ⁷ La kjaxin xíntáchró Dios inaá kíxin: “Ntá chr'éxin janhan síntakjasóte tí sín kjuínčekjasóte xjaan. La ntá tí xjaan mé tsokjan sín ntíhi ntá tsoxraxinkoxín sín tí janhan,” mé xíkaha ichro Dios. ⁸ Na ntá Dios mé tsíkjo ch'ín Abraham kíxin kaín tí chojni ntoa ts'axrjeníxin ch'án mé itsa sín xroye.

* 7:3 Génesis 12.1

Na ntá xikaha tió kokjilhi xjeen ch'an Isaac ntá ch'in Abraham mé chjéhe ch'an xjan xroye tió xétjehe xjan ijní yaon. Ntá kjaxin xikaha kjuich'e ch'in Isaac tió chóna ch'an xjeen ch'an Jacob, la ntá ch'in Jacob la xikaha kjuich'e ch'an inaá. Ntá tí sín a mé k'óna it'é tí teyo tribu tsik'axrjenixin tí sín Israel.

⁹ Tí xjeen ch'in Jacob mé tí sín k'uaxrjenixinni ósé la jehe sín k'uéchjinqxínhin sín tí kichó sín José ntá kjuínchejki sín ch'an la tí sín k'ueña la sákjuiko sín ch'an nó nación Egipto, kjánchó Dios mé kjuínkítsa tí jehe ch'an. ¹⁰ Dios mé kjuínchekaá ch'an tí náxrjónhya k'uékjak'e ch'an. La ko Dios kjuanjón kjuachaxin kixin imá tsonohe ch'an. Na ntá k'uikon ch'in Faraón tí rey kuènte nación Egipto a xikaha tí xrá jina kjuich'e ch'in José ntá kjuanjón ch'an kjuachaxin kixin ts'etoan ch'in José tí nación Egipto la ko tí ntqe ch'an.

¹¹ Na ntá kókjinta xrínahya la náxrjónhya k'uejó tí sín nación Egipto la ko nonte Canaán la tí sín tsik'axrjenixinni la k'uitjahya sín nkehe sine sín. ¹² A ntá tsikinhin ch'in Jacob kixin tí nación Egipto mé sitóxi noa trigo ntá k'uetuènen ch'an tí sín xjeen ch'an kixin sátsji sín ntiha tsjik'ena sín noa, la jehe tí sín a mé tí sín tsik'axrjenixinni. Tíha mé tí saoxin sákjuí sín. ¹³ Ntá tí yóxin sákjuí sín ntiha ntá ch'in José kjuínchenohe ch'an sín kixin tí sín a la savé ch'an. La ntá kjuakohe ch'an tí ch'in Faraón tí sín naxa kjéhya ch'an. ¹⁴ La ntá k'uetqan tí ch'in José kixin sátsjikakjín sín it'é ch'an Jacob la ko kaín tí sín kjéhya ch'an, mé ijnko setenta y cinco chojni kjéhya ch'an. ¹⁵ Mé xikaha kónhen la tí ch'in Jacob mé sákjuí sín la kjuák'e ch'an nación Egipto ntá chr'éxin ntiha mé k'uénxin ch'an. La ntá chr'éxin kjaxin tí sín tsik'axrjenixinni k'uénxin sín ntiha. ¹⁶ Ntá chr'éxin kuakitsjexin sín tòye tí huésóé tí ch'in Jacob la sákjuiko sín tí nonte Siquem, la ntá ntiha mé kjuavá sín tí nonte tsik'ena ch'in Abraham mé tsik'enehe ch'an tí xjeen ch'in Hamor chjasin Siquem.

¹⁷ La ntá ó kuichjina tsoxitéyá tí nkehe tsintáchro Dios tsikjo ch'in Abraham ntá tí sín Israel imá kótsjé sín nación Egipto. ¹⁸ A ntá xrínahya í jnko ch'in rey kjuankixin k'uetqan nación Egipto la k'uéchónhya ch'an tí ch'in José. ¹⁹ La ntá tí ch'in rey kjuich'iyehe ch'an tí sín naxa kjéhyani la ko kjuínchejasóte ch'an sín. La tsik'etqan ch'an kixin tí xjan ntoa na ntá kokjilhi mé tsjik'itji sín xjan kixin its'en xjan. ²⁰ Na ntá tí yaon a tsikokjilhi ch'in Moisés ntá imá kóxrjínhin Dios tí xjan a. It'é la ko iné xjan mé k'uéchóna sín xjan iní nitjío koá ntqe sín. ²¹ Ntá chrokjuahya tsjak'ema sín xjan la ntá kjuikjaka sín xjan. La ntá xjeen tí ch'in rey kuènte Egipto mé kjuikakja tjan xjan la sákjuiko tjan ntqe tjan la kjuínchek'ánkí tjan xjan éxi xjeen tjan xikaha. ²² La ntá tí ch'in Moisés mé k'uitja ch'an kaín nkehe nohe tí sín Egipto a la imá tjeotan tí nkehe k'uéntáchro ch'an la ko tí nkehe k'uékjich'e ch'an.

²³ La ntá tió chóna tí ch'in Moisés cuarenta nánó ntá tjínkaon ch'an tsjitsjehe ch'an tí sín israelita naxa kjéhya ch'an. ²⁴ Ntaha mé k'uikon ch'an kixin ijnko chojni Egipto kjuate ijnko chojni naxa kjéhya tí jehe ch'an. Ntá chrókjuinkítsa ch'an tí sín naxa kjéhya ch'an ntá k'óyán ch'an tí ch'in Egipto a. ²⁵ Kjuenkayáxin ch'an kixin tí sín naxa kjéhya ch'an, mé tí sín israelita, mé tsonoxin sín kixin Dios mé tsichr'an tí jehe ch'an sinchekaá sín ch'an. Kjánchó tí sín a kjuátsoanhya sín. ²⁶ La ntá í jnko yaon tí ch'in Moisés k'uikon ch'an kixin yaá sín israelita tjanjónko kichó sín. La ntá tjínkaon ch'an chrókjuít'oxin ch'an kixin chrokjuanjónhya sín. La ntáchro ch'an kixin: "Jahará jnkokoá kichuára la, ¿nkekuènté tjánjónrá?" ²⁷ A ntá tí nkexro chóna tí jie mé kónínkaon ch'an la kótéka ch'an tí ch'in Moisés. Ntá ntáchro ch'an kixin: "¿Nkexro kjuanjón kjuachaxin kixin jaha k'óna juez kuènténi? ²⁸ ¿Á tjínkávan ts'oyánni kjaxinni éxi k'oyán tí ch'in Egipto ijna ní?" ²⁹ A ntá kuínhin tí ch'in Moisés tíha ntá tjoka sákjuí ch'an. Sákjuí ch'an tí nación Madián ntá ntiha kjuák'e ch'an éxi ijnko chojni tsikjixín ókjé. Ntá ntaha tsikótehe ch'an la ko kjuich'ena ch'an yaá xjan ntoa.

³⁰ Na ntá k'uátsínka cuarenta nánó ntá tí nteje chjino jna it'in Sinaí mé xrínahya k'uikon ch'an ijnko ángel tjenkákjan tí xrohi chrikjan tí ntayoa tjeche. ³¹ Ntá tí ch'in Moisés la chrakon ch'an kixin xikaha k'uikon ch'an la ntá kóchjinehe ch'an kixin chrótsjehe ch'an la ntá kuínhin ch'an itén Ìnchéni ntáchro kixin: ³² "Janhan mé Dios tinkáchónki tí sín tsik'axrjenixian mé Abraham, la ko Isaac, la ko Jacob," mé xikaha ichro Dios. Ntá tí ch'in Moisés la kjuankixin chrakon ch'an la síxránká ch'an ntá í tjínkakónhya ch'an tsotsjehe ch'an. ³³ Na ntá ntáchro Ìnchéni kixin: "Takítsje tokatá kixin tí nonte tinkatja la nonte tjóá chónahya jie. ³⁴ Ó k'uikuán kixin tí sín kuèntana mé imá tjetotjasóte sín nación Egipto. La ó kuínhan kixin t'eya sín. La ntá ijie ó k'uinka kixin tsjínkítsa sín. Méxra xrákiá jaha tsétuanhan jaha sátsjia nación Egipto,"† ichro Dios.

³⁵ Tí sín israelita mé kjuanoá sín tí ch'in Moisés. Tsintáchro sín kixin: "¿Nkexro kjuanjón kjuachaxin kixin jaha k'óna juez?" ichro sín. Kjánchó Dios ichr'an ch'an tí ch'in Moisés kixin ts'etoan ch'an la ko sinchekaá ch'an tí sín israelita kjuachaxin tí ángel k'uikon ch'an chrikjan tí nta. ³⁶ Ntá tí ch'in Moisés kuakitsjexin ch'an Egipto tí sín tsik'axrjenixinni ósé. La imá itsjé kjuaxroan kjuasin ch'an la itsjé kjuakoxin ch'an tí nación Egipto, la ko tí Ntayaon Kjátse, la

ko tí nteje k'úaji sín cuarenta nánó. ³⁷ Jehé tí ch'ín Moisés a mé chénka tí sín israelita kíxin: “Dios mé tsochr'án ijnko chojni tsoníxja itén Dios ts'axrjeníxin tí sín kichuárá éxi ichr'án ch'án tí janhan. Titekákonhérrá tí jehe ch'án.”[†] ³⁸ Tí ch'ín Moisés mé kjuák'eko ch'án tí chojni tí k'uéjó sín tí nteje. Nta ijnko ángel mé nixjehé ch'án tí jna Sinaí la ko tí sín k'uaxrjeníxinni mé k'uáyéhé sín tí tan tjanjon kjuachón, ntá tí tan mé k'uátsinka tí jeheni ijie.

³⁹ A ntá tí sín k'uaxrjeníxinni ósé mé tjinkakonhya sín kíxin chrókuitekaon sín la kjuanoá sín tí ch'ín Moisés la ko tjinkaon inaá chrókjan sín nación Egipto. ⁴⁰ A ntá ntáche sín ch'ín Aarón kíxin: “Tjinkaonni sích'éna ijnko dios kíxin tsinkáchónkini kíxin í noehyani nkehe kónhen tí ch'ín Moisés, tí nkexro kjuínkítsa k'uaxrjexínni nación Egipto.”[§] ⁴¹ Ntá kjuínchekjanoya sín ijnko koxintáxjan la ntá k'óyan sín iko kjokehé tí nkehe tsíkjanoya a la imá kóchéhé sín k'uíkon sín tí nkehe tsík'ónaxín tja chojni. ⁴² A ntá Dios mé kuitóhe tí jehe sín kíxin tsinkáchónki sín tí konotsé síin nkajni. Tíhi mé tsíkjin ijnko nkexro k'uéchrónka itén Dios ntáchro xíkíhi: Jahará chojni Israel, ¿á k'oyánrá tí iko kjókanará tí janhan

tí cuarenta nánó k'uejorá nteje ní?
⁴³ Kjá náhi, jehó tí nkehe kjuích'énará mé kjókehérá tí ko a. Kjuíkoará tí njnkoje tí dios Moloc la ko kxajn kjuíkoará tí konotsé kuénte dios Renfán.

A ntá tí nkehe tsíkjich'énará jahará mé xráxinkákonxínrá éxi Dios kuéntará.

Méxra janhan tsakítsjexínrá tí tjejorá la tsétuñhánrá sátsjirá chjasin Babilonia.*

Mé xíkaha ntáchro Dios ósé.

⁴⁴ Naxa k'uéjó tí sín k'uaxrjeníxinni tí nteje la chónka sín ijnko njnko kamantá chónka tí ley tsík'etoan Dios. Tíhi kjuích'éna sín éxi tsík'etuenhen Dios tí ch'ín Moisés kíxin sích'éna ch'án kaín nkehe k'uíkon ch'án. ⁴⁵ Ntá tí sín tsík'axrjeníxinni mé k'uáyéhé sín tí njnko kujtonhen sín. Ntá tí sín kjuíkjo cho'ín Josué mé kjuíkjo sín tí njnko tió kjuacha sín k'uáyéhé sín í jnko nonte kuénte í so chojni kuakítsje Dios, kíxin ts'áyéhé tí jehe sín. Mé xíkaha kónhen hasta tí yaon kjuankíxin k'uetjan ch'ín David. ⁴⁶ Imá kjuíncheyaon Dios tí ch'ín rey David la ntá tí ch'ín David mé tjinkaon ch'án sích'éna ch'án ijnko njnko kuénte Dios mé tí Dios k'uékinkáchónki ch'ín Jacob. ⁴⁷ Kjánchó jehe ch'án kjuích'énahya ch'án tí njnko a. Tí ch'ín Salomón mé kjuích'éna. ⁴⁸ Kjánchó Dios nkaya nkajni chrohya tsjak'exenhen ijnko nchia tsíkjich'énaxín chojni itja. Ntáchro ijnko ch'ín nixja itén Dios kíxin:

⁴⁹ Janhan Dios nkaya nkajni itjén tétjanxían ntá chjasintajni tjejkjen totená.

¿Xá nkexéhé tí nchia chrókjuích'énará?

¿Xá nketí chrókjuak'é chrók'ók'ánaxián?

⁵⁰ ¿Xá jehya tjaná kjuít'ánaxián kaín tí nkehe ní?[†]

Mé xíkaha ichro Dios.

⁵¹ A ntá jahará la icha asánrá xráxín titekákonhyará. Jahará tinhínrá kjánchó ich'erá éxi chojni chónhya Dios. Xráxín tjánjonkoará Nchakuen Dios. Jahará mé tóyohará tí sín tsík'axrjeníxinná ósé. ⁵² Tí sín tsík'axrjeníxinná kjuínchekjasóte kaín tí sín tsíchronka itén Dios. K'óyan sín tí sín k'uéchrónka kíxin itsi tí nkexro chónthaha jie. A ntá ó kui tí nkexro a ntá jahará kjuínchekjirá ch'án ntá k'óyan sín ch'án. ⁵³ Jahará k'uayéhérá tí nkehe k'uetjan Dios senó, mé tí nkehe chrónka tí ángel, la kjónté xíkaha kuítekákonhyará —ichro ch'ín Esteban.

Ik'úen ch'ín Esteban

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kíxin nínkakonhen sín ch'án. ⁵⁵ A ntá ch'ín Esteban antsi chónka ch'án Nchakuen Dios la konta ch'án nkajni k'uíkon ch'án kjuachaxién Dios la ko k'uíkon ch'án kíxin ch'ín Jesús tjexín toté ch'án nánko tja chjina Dios. ⁵⁶ Ntá ntáchro ch'ín Esteban kíxin:

—Tsjeherá kíxin k'uíkuan kíxin xitjehé nkajni la ntaha itjen tí Xjeen Dios K'óna Chojni nánko tja chjina Dios.

⁵⁷ A ntá jehe sín la k'uíkjehe sín ntatsjon sín la itsen k'uixité sín ntá sákjuí sín k'uixitja sín ch'án ⁵⁸ sákjuíko sín ch'án ikon chjasin ntá ixro chjéhe sín ch'án. La tí sín tjanchia jie mé kuakítsje sín iké sín la k'uejo sín toté ijnko ch'ín ntasoá it'ín Saulo kíxin ts'ayakonhen ch'án tí ka a. ⁵⁹ La it'e sín xro ntá ch'ín Esteban mé chrónóhehe ch'án Inchéni la ntáchro ch'án kíxin:

—Inchéni Jesús takjá nchakuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kíxin:

—Inchéni jaha mé tahya kuéntá tí jie kjuasin sín.

Mé xíkaha ichro ch'án ntá ik'úen ch'án.

8

Ch'ín Saulo chrók'óyan ch'án tí sín tinkáchónki Jesús

¹ La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

Á ntá tí yaon a na mé kjuankíxín sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxín tinkáchónki Cristo mé xikayehe sín sákjuí sín nkuixín estado Judea la ko estado Samaria. Á ntá jehó tí sín tsíkjejá Jesús mé kuitóhe sín ntíha. ² Na iso sín imá tinkáchónki Dios mé kjuavá sín ch'ín Esteban la ko tsjánkamá sín ch'án la ko t'avéhe sín ch'án. ³ Á ntá tí ch'ín Saulo la kjuankíxín kónínkakonhen ch'án tí sín tinkáchónki Cristo. K'uixenhen ch'án jnkoinko jnkoinko ntóe sín la itsé ch'án tí sín ntoa la ko tí chojni chjin. La ntá kuínkánkákjen ch'án sín sákjuíko ch'án sín kíxín ts'ejóhjiná sín.

Kjuako sín itan jína tí estado Samaria

⁴ Á ntá tí sín sákjuixín chjasin Jerusalén mé xritjako sín nkexrí tí tan tsáaxinni nkuixín tí sákjuí sín. ⁵ La ijnko ch'ín it'ín Felipe mé sákjuí ch'án ijnko chjasin estado Samaria la kjuankíxín ch'án chrónka ch'án itan kuente Cristo. ⁶ Na ntá nchónhya chojni kójnkotsé ntíha la kaín sín kuínhin sín jína tí nkehe ntáchro ch'ín Felipe kíxín ó k'uikon sín tí kjuaxroan kjuakoxín ch'án. ⁷ Itsje chojni chóna nchakuen tí jínahya mé kuitóhe sín jína la tí nchakuen tí jínahya k'óyako k'uaxrxjén tí jehe sín. La nchónhya tí sín chóna chin xitjahya itji la ko tí sín sixénká tóte mé kuitóhe sín jína. ⁸ Á ntá imá kóchéhe kain tí sín siín chjasin ntíha.

⁹ Tí chjasin a mé kjuák'e ijnko ch'ín it'ín Simón mé ijnko ch'ín ósé mé k'uékjinchexroan ch'án. K'uékjich'iyehé ch'án tí sín estado Samaria ntáchro ch'án kíxín ijnko chojni imá tjetoan tí jehe ch'án. ¹⁰ La kaín tí sín ntíha k'uejó sín kuínhin sín jína, mé tí chánjan ntsínsi hasta tí chojni imá táda la k'uéntáchro sín kíxín:

—Tí ch'ín i imá chóna ch'án tí kjuachaxin kuente Dios —ichro sín.

¹¹ K'uékitekakonhen sín ch'án kíxín k'uékjinchexroan ch'án k'uékjich'iyexín ch'án sín itsjé nánó. ¹² Ntá tíó kuítekaon sín tí tan jína kjuako ch'ín Felipe kuente tí kjuachaxin kuente Dios la ko Jesucristo la ntá chojni ntoa la ko chojni chjin mé kuíte sín. ¹³ Á ntá kjaxin tí ch'ín Simón, mé kuítekaon ch'án la kuíte ch'án, koí ch'án. Ntá kjuankíxín k'uájiko ch'án tí ch'ín Felipe la imá chrakon ch'án kíxín k'uikon ch'án tí kjuaxroan jíe kjuasin tí ch'ín Felipe.

¹⁴ Á ntá tí sín apóstol, mé tí sín tsíkitohe chjasin Jerusalén, kuínhin sín kíxín itsjé tí sín estado Samaria ó kuítekaon sín itén Dios. Ntá k'uetuénhen sín ch'ín Pedro la ko ch'ín Juan sátsji sín ntíha. ¹⁵ Ntá tíó kjuíji sín ntá kjuanchehe sín Dios kíxín tí sín ntíha tinkáchónki Cristo chrók'uáyéhe sín Nchakuen Dios ¹⁶ kíxín nijnko tí jehe sín ntíha naxa tsík'áyéhya sín Nchakuen Dios. Jehó tsíkikitexín sín ihnjé Ìnchéni Jesús. ¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaon kja tí sín a la ntá ó k'uáyéhe sín Nchakuen Dios.

¹⁸ Na ntá tí ch'ín Simón mé k'uikon ch'án kíxín tí sín apóstol k'uejotja itja sín chrítaon kja tí sín a ntá k'uáyéhe tí sín a Nchakuen Dios. La ntá xróxin ch'án chichaon ¹⁹ la ntáchro ch'án kíxín:

—Chjehéni jeheni tí kjuachaxin kíxín kjaxin jeheni chrókjuak'etja itjani chrítaon ikja jnkójn chojni ntá chrók'uáyéhe sín Nchakuen Dios —ichro ch'án.

²⁰ Ntá ntáchro ch'ín Pedro kíxín:

—Jaha la ko tí chíchakoán ts'ítájankoa kíxín tjenkayáxian kíxín chrók'uèna tí kjuachaxin kuente Dios. ²¹ Jaha chontahya kjuachaxin ts'ixenhen tí xra a kíxín ó nohe Dios kíxín jaha la tjuáhya asán. ²² Méxra tsjtohé tí ijí la chrónóhé Dios kíxín ách'e tsjakjinhin ch'án tí jie tjenkayáxian. ²³ Ó t'íkuan kíxín imá chjinqxínhin asán la ko nchónhya jie chonta —ichro ch'ín Pedro.

²⁴ La ntá ch'ín Simón kjuátehe ch'án ntáchro ch'án kíxín:

—Nixjehérá Ìnchéni kíxín tí janhan kíxín chrókónnahya tí janhan éxí tí ntáchrórá —ichro ch'án.

²⁵ Ntá kjuixín chrónka tí sín apóstol tí tan kuente Dios ntíha ntá sákjuí sín kjuako sín tí tan tsjanjon kjuachón nchónhya tí chjasin ntsínsi estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkjinín nación Etiopía

²⁶ Á ntá kjuixín tíha ntá ijnko ángel kuente Ìnchéni mé ntáche tí ch'ín Felipe kíxín:

—T'ínkatjen sátsjia nó sur tsoxeta tí ntja t'ínkajjinxín chjasin Jerusalén hasta chjasin Gaza —ichro tí ch'ín ángel.

Na ntá tí ntja a mé ijnko ntja t'atsínka nó nteje. ²⁷ Na ntá tí ch'ín Felipe k'uínkatjen sákjuí tí ntja. La ntíha xringhaya xeta ch'án ijnko chojni tsíkjinín nó nación Etiopía. Jehe ch'án mé ijnko chojni eunuco mé tja ch'án siín chíchakoen tí tjan reina Candace t'etuénhen tí nación Etiopía. Jehe ch'án sátsíkji ch'án chjasin Jerusalén xraxinkakonxín ch'án Dios. ²⁸ Á ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka itén Dios. ²⁹ La ntá tí Nchakuen Dios mé k'uetuénhen tí ch'ín Felipe ntáchro kíxín:

—Sátjia tóchjina antsi tí tjen tí carro.

³⁰ Ntá kóchjinehe tí ch'in Felipe tí tjen tí carro a, la ntá kuínhin ch'án kixin tjenchekuáxin tí ch'in a tí xroon tsikjin ch'in Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'in a ntáchro ch'án kixin:

—¿Nkexrí chrókuianxian kixin kohya nkexro tsjinkitsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'in Felipe ts'it'ótjen la tsjak'etjajin chjinaxón tí tjen ch'án.

³² Na tí xroon itén Dios tjenchekuáxin ch'án mé tíhi:

Jehe ch'án mé sákjuiko sín éxi ijnko kolélo kjuiko sín ts'óyán sín.

La éxi ijnko kolélo tsjánkahya tió kjinhin sín kaxree va

mé xikaha jehe ch'án ninkehó xitjeheya ir'va ch'án.

³³ K'uikón sín ch'án éxi ijnko chojni chóna jig la ntoáhya kjuínchekjasóte sín ch'án.

Kohya nkexro tsjacha tsochrónka kuènte tí sín chrók'uaxrjeníxin ch'án

kixin jehe ch'án la k'uénxín ch'án chjasintajni.*

Mé xikaha chrónka tí xroon itén Dios.

³⁴ Ntá tí ch'in eunuco mé kjuanchankíhi ch'án tí ch'in Felipe ntáchro ch'án kixin:

—Tsotsenkávan chrónka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xikaha kjuanchankí ch'án.

³⁵ La ntá tí ch'in Felipe kjuankíxin chrónka ch'án kuènte tí nkehe tjenchekuáxin tí ch'in a la chrónka ch'án tí tan jina kuènte Jesús. ³⁶ Ntá xrináhya kjuíji sín tí tjia ntá, ntá ntáchro tí ch'in eunuco kixin:

—Tsjehe tjia ntá. ¿Á xitjahya chrókuíkítjena? —ichro ch'án.

³⁷ Na ntá ntáchro tí ch'in Felipe kixin:

—Tí kuítekávan kaín asán la kjá jina tsikitia.

La ntá kjuátehe tí ch'in a, ntáchro ch'án kixin:

—Títekávan kixin tí Jesucristo la Xjeen Dios —ichro ch'án.

³⁸ La ntá tí ch'in tsikjixín Etiopía a k'uetóan ch'án tsochónhen tí carro a la ntá yóí sín mé tí ch'in Felipe la ko tí ch'in tsikjixín Etiopía mé k'uínkajin sín ntá kjuíánkí sín ntá la tí ch'in Felipe kuíkíte ch'án tí ch'in a. ³⁹ La ntá kjuixin k'uaxrjenkí sín ntá la ntá tí Nchakuen Inchéni sátsikjiko tí ch'in Felipe ókjé. Ntá k'uíkonhya kichó sín inaá. Ntá kjónté xikaha la tí ch'in eunuco sákjuí ch'án la antsi chéhe asén ch'án. ⁴⁰ Ntá tí ch'in Felipe xrináhya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Inchéni kixin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'in Saulo

(Hch. 22.6-16; 26.12-18)

¹ Ntá tí ch'in Saulo la imá tjinkaon ch'án chrók'óyán ch'án tí sín tinkáchónki Inchéni Jesús. Méxra sákjuítsjehe ch'án tí ch'in nchat'á t'etóan. ² Ntá kjuanchia ch'án ijnko xroon kixin ts'áyéhe ch'án kjuachaxin kixin sátsji ch'án tí njnko chjasin Damasco tsjeyá ch'án tí sín kuákja ntá njxin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén. ³ La ntá kjuíji ch'án chjinaxón chjasin Damasco, a ntá xrináhya titáya ikui ijnko xrohi t'inkaséyan kuíxin nkaya nkajni k'uantatjen ch'án a. ⁴ Ntá ch'in Saulo mé kjuítsínka ch'án nonte, a ntá kuínhin ch'án njxia ijnko nkexro kixin:

—Saulo, Saulo, ¿nekuènte ninkákonna xritjéyá tí janhan?

⁵ Ntá ch'in Saulo kjuanchankí ch'án kixin:

—¿Xá nkexro jaha?

Ntá tí tan mé kjuátehe, ntáchro kixin:

—Janhan mé Jesús, mé tí nkexro xritjéyá jaha. ⁶ T'áya sátjia. T'ixenhén tí chjasin Damasco, ntá ntíha mé tsinhín nkehe sjch'e —ichro tí ch'in Jesús a.

⁷ La ntá tí sín k'uájiko ch'in Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró. ⁸ La ntá tuénxín k'uàya ch'in Saulo ntá kuakitjenkí ch'án ikon ch'án kjánchó t'ikonhya ch'án. Ntá tí sín xriko ch'án tinkátséhe sín itja ch'án sákjuiko sín ch'án chjasin Damasco. ⁹ Ntá ntíha kjuák'e ch'án la iní yáon k'uíkonhya ch'án la ko kjaxin kjóneha ch'án la ko ninkehó k'uíhya ch'án.

¹⁰ Ntá chjasin Damasco mé kjuák'e ijnko ch'in tinkáchónki Inchéni it'in Ananías. La ntá titáya k'uikóen ch'án Inchéni ntáchro kixin:

—Ananías.

* 8:33 8.32-33 Isaías 53.7-8

Ἀ ntá ch'ín Ananías mé kjuátege ch'án kixin:

—Ntíhi tjenni, Ìnchéni.

¹¹ Ntá ntáchro Ìnchéni kixin:

—T'ínkatjen sátjia tí ntja it'in Ntja Ntoí. Ntá tíó tsjasán ntge ch'ín Judas tjanchankíhi sín á ntahya itjen ijnko ch'ín tsíkixín chjasin Tarso me it'in ch'án Saulo. Jehé ch'án mé tjechrónóga ch'án. ¹² Ἀ ntá títaya k'uikuèn ch'án kixin tsjji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehé ch'án kixin xik'íkon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

—Ìnchéni náhi, tsjlyhani kixin ó kuínhini chrónka nchónhya chojni kixin nkexrí xéhe tí ch'ín a. Imá tsjé nkehe jehya jina kjuich'ehe ch'án tí sín kuítekaon tí jaha chjasin Jerusalén. ¹⁴ Ἀ ntá jie la ó kjuí ch'án ntíhi kixin tsík'áyéhe ch'án kjuachaxin kuente ncha't'á t'etqan kixin tsotsé ch'án kaín tí sín tinkáchónki ihnjá.

¹⁵ Kjánchó Ìnchéni ntáchro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakohe ch'án tí sín ókjé nacióñ la ko tí sín rey la ko kjaxin tí sín israelita. ¹⁶ Janhan tsjákgha ch'án kixin nchónhya tsjasóte ch'án kixin tsinkáchónkina ch'án.

¹⁷ Ἀ ntá ch'ín Ananías sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíchóni Saulo, Ìnchéni Jesús, tí nkexro k'uikuan tí ntja k'uinkaxian, mé k'uetuanna kjuíha kixin sjintak'íkan inaá la ko ts'ayéhé Nchaquen ch'án —ichro tí ch'ín Ananías a.

¹⁸ Ntá tuénxín k'uanotjexín ikon ch'ín Saulo ijnko nkehe éxí kje koche xikaha. Ntá xik'íkon ch'án inaá. La ntá k'uínkatjen ch'án la ko kuíkite ch'án. ¹⁹ La ntá chr'éxín ntá kjóne ch'án la ntá ikjan asén ch'án inaá. Ntá kuítge ch'án iso yaon k'uejókó ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

²⁰ Na ntá kjuankixin ch'ín Saulo kjuakoxin ch'án iso njnko Israel kixin Jesús mé Xjeen Dios. ²¹ La kaín tí sín tjejótinhen imá chakon sín la ntáchro sín kixin:

—¿Á jehya tí ch'ín i tjinkaon sinche'itjáyan ch'án kaín tí chojni tinkáchónki Jesús chjasin Jerusalén? ¿Á jehya tí xra a kjuixín ch'án ntíhi kixin tsotsé ch'án sín la sátsjiko ch'án sín tí tjejó tí sín ncha't'á t'etqan? —ichro sín.

²² Kjánchó antsi má fuerte kjuako ch'ín Saulo kixin chaxin tí ch'ín Jesús mé tí Cristo. La tí sín judío k'uejó chjasin Damasco kjuachahya kjuachaxín sín ch'án.

Kjuachahya tí sín judío chrótsé sín tí ch'ín Saulo

²³ Na ntá ó k'uátsínka nchónhya yaon ntá tí sín judío kjuenkayáxin sín nkexrí chrók'óyán sín tí ch'ín Saulo. ²⁴ Ἀ ntá ó kuínhin ch'án nkehe kjuenkayáxin sín. Ἀ ntá nchaqotjin la ko tie tjejóchónhen tí sín chrók'óyán tí jehé ch'án tí ntója ts'axrjéxin ch'án chjasin. ²⁵ Ἀ ntá tí sín tinkáchónki Ìnchéni mé kjuak'enkaya sín tí ch'ín Saulo ijnko ntaxra jie ijnko tie. Ntá kjuinkajinxín sín tí ntaxra tjenkaya tí ch'ín Saulo nóton tí tja't'q tsik'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

²⁶ Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chakonhen sín ch'án kixin kuítekonhya sín kixin á chrókóchaxín kjaxin ch'án tinkáchónki ch'án Ìnchéni. ²⁷ Ἀ ntá ch'ín Bernabé mé sákjuíko ch'án tí ch'ín Saulo tí tjejó tí sín apóstol la ntá chrónka ch'án kixin ch'ín Saulo mé tsík'íkon ch'án Ìnchéni tí ntja sákjuí ch'án ntá Ìnchéni mé nixjehe ch'án. Méxra chjasin Damasco k'uejkako ch'án ihnjé Ìnchéni la chakonhya ch'án. ²⁸ Méxra ch'ín Saulo kuítge ch'án chjasin Jerusalén la ko k'uájiko ch'án tí sín a. La chakonhya ch'án kjuako ch'án kjuachaxién ihnjé Ìnchéni Jesús. ²⁹ La ikjo ch'án tí sín judío nixja nkiva griego. Ἀ ntá jehé sín la tjinkaon sín chrók'óyán sín tí jehé ch'án. ³⁰ Ἀ ntá tí sín kichó ni tinkáchónki Cristo mé tsikinhen sín nkehe chrókónhen ch'án la ntá sákjuíko sín ch'án tí chjasin Cesarea la k'uetuénhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uejó sín la antsi má tinkáchónki sín Ìnchéni. K'uechónta sín kjuasáyé Ìnchéni la ko tí Nchaquen Dios kjuínkítsa sín la ntá antsi má sítinkákótsjé sín.

Ch'ín Eneas kuítge ch'án jina

³² Na ntá tí ch'ín Pedro xristsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kichó ni tjejó chjasin Lida. ³³ Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kixin tsík'en toté ch'án. ³⁴ Na ntá ntáchro ch'ín Pedro kixin:

—Eneas, Jesucristo mé sintakitqha jina ijie. T'inkatjen tjatsiyan camá —ichro ch'án.

Na ntá ch'ín Eneas tuénxín k'uínkatjen ch'án. ³⁵ La kaín tí sín siín chjasin Lida la ko chjasin Sarón k'uikon sín kixin kuítqhe ch'án jina la ntá kjaxin sín kuinkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkíva griego la mé t'axrjexín kixin Dorcas. A ntá tí tjan a mé jina kjuích'e tjan tí k'uékjak'e tjan la kjuínkítsa tjan tí chojni nóa. ³⁷ Ntá ijnko yaon imá kónihi tjan ntá ik'uén tjan. La ntá kjuínchek'ónti sín cuérpóe tjan la ntá tí yóxin piso noi kjuák'e sín tjan. ³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kixin ntiha tjan ch'án. Ntá ichr'án sín iyó chojni tsonátche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjan tí cuérpóe tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí *naxa* kjuák'e tjan. ⁴⁰ A ntá k'uetqan ch'ín Pedro kixin kaín sín ts'axrje sín ntója. Na ntá kjuák'exín toch'in ch'án nixjehé ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'aya.

Ntá kuakitjenkí tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjaxin tjan. ⁴¹ A ntá itsé ch'án itja tjan la k'uínkatjen tjan. La ntá k'uíyehé ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'ikon sín kixin ó xíxechón tjan. ⁴² Na ntá kaín sín siín chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni. ⁴³ A ntá ch'ín Pedro kuítqhe ch'án itsjé yaon tí chjasin a la kjuák'e ch'án ntqhe ch'ín Simón, ijnko ch'ín nchentá tjeó iko.

10

Ch'ín Pedro la ko ch'ín Cornelio

¹ Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'uetuenghen tí sín soldado italiano. ² Tí ch'ín a la imá jina ch'án la kaín tí sín kjéhya ch'án mé imá xraxinkaon sín Dios. Kjaxin kjuanjon ch'án nchónhya chichaon kixin tjinkaon ch'án tsjínkítsa tí sín judío la ko xráxin nixjehé ch'án Dios. ³ La ntá ijnko yaon las tres kónjin titáya k'uíkuèn ch'án ijnko ángel kuénte Dios k'uíxehen tí tjan ch'án ntáchro kixin:

—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjínhin kixin tí nixjehé ch'án la ko tí jina ch'e tjínkítsa tí sín nóa. ⁵ Ntá jaha tétuenghen jnkójin chojni sátsji chjasin Jope kixin tsjikakjín sín ch'ín Simón kjaxin it'in ch'án Pedro. ⁶ Itjen ch'án ntqhe ijnko ch'ín kjaxin it'in Simón. Tí ch'ín a mé nchentá tjeó iko. Mé tjan ntqhe ch'án chjinaxón tí ntayaon a.

⁷ Ntá tíó sákjuí tí ángel nixjehé ch'ín Cornelio la ntá jehe ch'án k'uíyehé ch'án yaá sín ch'ehe ch'án xra la ko ijnko ch'ín soldado kjaxin xraxinkaon Dios, la chónthehe sín kjuasáya kichó sín. ⁸ Ntá kjuíxin chénka ch'án kaín sín tí nkehe k'uíkon ch'án ntá k'uetuenghen ch'án sín sátsji sín chjasin Jope.

⁹ Íjnko yaon chr'éxin chjina chonkixin tjejóyá sín ntja chjino chjasin Jope ntá ch'ín Pedro mé k'uit'ójen ch'án chrítaón nchia kixin ntaha nixjexín ch'án Dios. ¹⁰ Ntá imá k'uén ch'án kjinta la tjinkaon ch'án chrókjóne ch'án. Nachrohe tsochján tí nkehe sine ch'án la ntá titáya k'uíkuèn ch'án nkehe ¹¹ mé k'uikon ch'án kixin xítjehé nkaya nkajní ntá ntiha k'uínkajjín ijnko ka jíé. Kanoé punté tí ka tjejóte. ¹² Tí nkaxehen tí ka a tjínka ko noó toté la ko konche la ko kaín ko xritjaká. ¹³ Ntá kuínhin ch'án nixja ijnko nkexro ntáchro ch'án kixin:

—Pedro, t'aya, t'oyán tí ko a ntá inte.

¹⁴ Ntá ch'ín Pedro kjuátqhe ch'án kixin:

—Náhí, Ìnchéni. Nunca nehyani tí nkehe tjuáhya.

¹⁵ Ntá kjuátqhe tí tan inaá ntáchro kixin:

—Tí nkehe ó kjuínchetjóá Dios. La ntáchrohya kixin tjuáhya —ichro ch'án.

¹⁶ Xíkaha kónhen iní veces ntá tuénxín sákjuí tí ka nkaya nkajní. ¹⁷ Ntá ch'ín Pedro *naxa* tjenkayáxin ch'án nkehe t'axrjexín tí k'uikon ch'án la xringhya ó kui tí sín ichr'án ch'ín

Cornelio ntója nchia. Ó tsíkjančankí sín nketí tjen ntøe ch'ín Simón. ¹⁸ Ntá kjuanchankí sín itsen kixin:

—¿Á ntihi tjen ch'ín Simón kjaxin it'in ch'án Pedro?

¹⁹ Naḡa tjenkayáxin tí ch'ín Pedro tí nkehe k'uíkón ch'án ntá Nchakuen Dios chrónka kixin:

—Tsjehe ó kui iní sín xritjeyá tí jaha. ²⁰ T'aya t'inkajián sátjikoja tí sín a. Tóxakuanya jaha, janhan mé kuétuanhan sín ikui sín —ichro Nchakuen Dios.

²¹ Ntá k'uínkajin tí ch'ín Pedro tí tjejó tí sín a ntá ntáchro ch'án kixin:

—Janhan tí nkexro xritjeyará. ¿Nkehe tí tsonhen tjinkáonrá?

²² Ntá kjuátehe sín ntáchro sín kixin:

—K'uetóan tí ch'ín capitán Cornelio ikuihi ntihi. Jehé ch'án me ijnko chojni imá jína la ko xraxinkaon ch'án Dios. Kaín tí sín judío tjikosáyehe ch'án la ko tjeuhe sín ch'án. Ijnko ángel kuènte Dios mé nixjehe ch'án chénka ch'án kixin chrók'uíyehé ch'án tí jaha kixin chrókjuia ntøe ch'án la ntá chrókuinhin ch'án tí nkehe tsontáchrua —mé xikaha chrónka sín.

²³ Na ntá tí ch'ín Pedro kjuanjon kjuachaxin kixin ntahó chrók'ok'éhe sín tí tie a. Ntá kóyaon ntá sákjuíko ch'án sín. Kjaxin iso sín tinkáchónki Ìnchéni tjejó chjasin Jope mé sákjuíkotoxin sín.

²⁴ Na ntá í jnko yaon a kjuíji sín chjasin Cesarea. Ntihi chónhen tí ch'ín Cornelio la ko kjaxin kaín sín kjéhya ch'án la ko tí sín chóxin ch'án. K'uíyehé ch'án tí jehe sín kixin tsinhin sín. ²⁵ Ntá tió kjuíji tí ch'ín Pedro ntøe tí ch'ín Cornelio ntá k'uaxrjéxin ch'án nchia nixjehe kíchó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án. ²⁶ A ntá tí ch'ín Pedro kjuínček'inkatjen ch'án tí ch'ín a la ntáchro ch'án kixin:

—T'inkatjen. Tjak'lexián totá. Janhan mé ijnko chojni éxí tí jaha.

²⁷ A ntá kjuixin ikjo sín la ntá k'uixenhen sín ntøe ch'án la ntá k'uíkón tí ch'ín Pedro kixin nchónhya chojni tsikójnkontsé ntiha. ²⁸ Ntá ntáchro ch'án kixin:

—Jahará nohará kixin tí jeheni judióni chóntahyani kjuachaxin tsójnkotsékoni chojni ókjé la ko chóntahyani kjuachaxin ts'ixenhenni ntøe chojni ókjé. Kjánchó Dios kjuakona kixin xitjahya tsontáxrjan kixin tuáhya nijnko chojni. ²⁹ Méxra tió k'uíyanará la tjoka k'uinka. Tjínkavan chrókónona kixin nkekuènte k'uíyanará.

³⁰ Ntá kjuátehe ch'ín Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntøeni kjónehyani la nixjeheni Dios. Ntá xrínahya k'uíkónni ijnko chojni chónka iké tjákini. ³¹ La ntáchro ch'án kixin: “Cornelio, ó kuínhin Dios tí nkehe nixjehé ch'án la ó nohe ch'án kixin imá tjinkítsa jaha tí chojni nòa. ³² Méxra tétuenhén chojni sátsji chjasin Jope kixin tsjikakjín sín tí ch'ín Simón mé kjaxin it'in ch'án Pedro. Itjen ch'án ntøe ijnko ch'ín mé kjaxin it'in Simón nchenta ch'án tjejó iko. Chjino tí ntayaon a itjen ntøe ch'án,” ichro tí ángel. ³³ Méxra xikaha tjoka ichr'anni sín tsíkjeyá sín tí jaha. Jína k'uinka ntøeni. Ntá ijie ó nohe Dios kixin kaín ni tjinkaonni tsinhinni nkehe tí k'uetuanhan Ìnchéni tsochronka tsinhinni.

Ch'ín Pedro kjuakohe ch'ín Cornelio ntøe ch'án

³⁴ Ntá ntáchro ch'ín Pedro kixin:

—Ijie ó t'íkuan kixin jnkokón t'íkón Dios kaín xín chojni. ³⁵ Tí nkexro kaín nación titekaon la chónthehe kjuasáyé Dios la mé tóxrjínhe ch'án. ³⁶ Dios mé nixjehe ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehé ch'án mé Ìnché ch'án kaín nkehe. ³⁷ Jahará ó nohará jína kaín tí nkehe tsikónhen nkuíxin tí tjejó tí sín judío mé kjuankixin estado Galilea tió kjuixin kjuako ch'ín Juan kixin t'ichjánxin tsikite chojni. ³⁸ Jahará ó nohará kixin Dios kjuanjon kjuachaxién ch'án la ko Nchakuen ch'án k'uáyéhe tí ch'ín Jesús tí nkexro tsíkixin chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jína kjuích'e ch'án kixin kjuínčekitøhe ch'án jína kaín chojni tjasótéxin kaín tí kjuachaxién tí jínahya. Mé xikaha jína kjuích'e ch'án kixin Dios tjejó tí jehe ch'án. ³⁹ A ntá jeheni mé chaxín k'uíkónni kaín tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'éxin kjuak'enkanı sín ch'án ijnko ntacruz la k'óyán sín ch'án. ⁴⁰ A ntá Dios kjuínčekexchón ch'án tí níxin yaon la kjuanjon ch'án kjuachaxin kixin k'uíkónni ch'án inaá. ⁴¹ Jehya kixin kaín chojni chrók'uíkón sín ch'án. Náhí. Jehó tí sín tsíkjeyá Dios kixin ts'íkón chaxín xechón ch'án. Jeheni kjónekoni ch'án la ko k'uíkónni ch'án tió xixechón ch'án inaá. ⁴² K'uetóan ch'án kixin jeheni tsjakøhèni chojni la tsochronkani kixin jehe ch'án mé tí nkexro juez sinčekitøexín ijie tí sín tjejóchón la ko tí sín ó tsík'en. ⁴³ Kaín tí sín k'uechrónka itén Dios mé chrónka sín kixin jnkøjnko tí sín tinkáchónki Jesús mé ts'ókika ch'án ijie sín —ichro ch'ín Pedro.

Tí sín jehya judío k'uáyéhe sín Nchakuen Dios

⁴⁴ Naḡa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios. ⁴⁵ Ntá tí sín judío kjuíkotoxin ch'ín Pedro la chrakon sín kixin Dios mé

kjuanjon Nchakuen ch'an, kjaxin k'uáyéhe tí sín jehya judío. ⁴⁶ Méxra kuínhin sín nixja sín jnkoinko nkiva ókjé la ko kuínhin sín tjanchehe sín Dios kjuasáya. ⁴⁷ Ntá ntáchro ch'in Pedro kixin:

—Jehe sín ó k'uáyéhe sín tí Nchakuen Dios xikaha jeheni. Ntá chrókjuanjonni kjuachaxin kixin tsikite sín —ichro ch'an.

⁴⁸ La ntá k'uetqan ch'in Pedro kixin tsikite kaín sín kjuachaxiэн ihnjé Jesucristo. Ntá tí sín kuikite mé kjuanchia sín kixin chrókuitqhe tí ch'in Pedro ntiha iso yaon.

11

Nixjehe ch'in Pedro tí sín tinkáchónki Cristo chjasin Jerusalén

¹ Na ntá tí sín tsikjeyá Ìnchéni la ko kaín tí sín tinkáchónki Ìnchéni k'uéjé estado Judea mé kuínhin sín kixin tí sín jehya judío ó tinkáchónki sín itén Dios. ² Na ntá ch'in Pedro ikjan ch'an chjasin Jerusalén. La ntá iso tí sín judío tinkáchónki sín Ìnchéni tjonta sín ch'an.

³ Kjuanchankihi sín ch'an ntáchro sín kixin:

—¿Nkeuènté kjuitsjehé tí sín jehya judío, la ko kjóntekoa tí jehe sín? —mé xikaha kjuanchanki sín.

⁴ Ntá tí ch'in Pedro kjuankixin ch'an chrónka ch'an desde tí xrankixixin kaín nkehe tsikónhen ch'an. Ntáchro ch'an kixin:

⁵ —Janhan mé kjuak'é chjasin Jope kjuak'énixjaha Dios. La ntá titáya k'uikuèn ijnko ka jíe k'uínkajinxin nkaya nkajní. Kanoé punté tí ka tjejóte la kjuak'e chjino tí tjén. ⁶ Ntá tsjaha jína tí nkehe la k'uikuən kixin tí nkaxenhen tí ka tjínká ko noó toté la ko iko nteje la ko konche la ko iko xritjaká. ⁷ La kjaxin kuínhan itén ijnko nkexro nixjana ntáchro ch'an kixin:

“Pedro, t'áya t'oyán tí ko a ntá inte.” ⁸ A ntá kjuátaha kixin: “Náhi, Ìnchéni. Nunca nehyaní tí nkehe tjuáhya.” ⁹ A ntá kjuátehe tí tan kuixjin nkaya nkajní a inaá chrónka kixin: “Tí nkehe a mé ó kjuínchetjóá Dios. La ntáchrohya kixin tjuáhya.” ichro ch'an. ¹⁰ Xikaha kónhen iní veces. Ntá sákjuí kaín tí nkehe a nkaya nkajní inaá. ¹¹ Ntá xrináhya tuénxín kjuíji iní chojni ntoa tí nchia tjejóni. Tsikjixin sín chjasin Cesarea xritjeyá sín tí janhan. ¹² Tí Nchakuen Dios mé k'uetqan kixin sáchrókjuikian sín la chrókóxakonahya. Kjaxin sákjuikian injon tí sín kichó ní tjejó í. Kaínni k'uixenhenni ntqe tí ch'in a. ¹³ A ntá tí ch'in ntqe ntiha mé chrónka ch'an kixin k'uikon ch'an ijnko ángel tjejín toté la nixja ntáchro kixin: “Tétuénhén chojni sátsji chjasin Jope kixin tsjikakjín sín ijnko ch'in it'in Simón la ko kjaxin it'in ch'an Pedro. ¹⁴ Jehe ch'an mé tsonixjaha ch'an tsochrónka ch'an nkexrí tsaá jaha la ko kaín tí sín kjéhya.”

¹⁵ Ntá kjuanchaxin nixjaha sín na ntá ó kui tí Nchakuen Dios k'uáyéhe sín éxi k'uáyéhení tí senó a. ¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'an kixin: “A ntá chaxín ch'in Juan intá ó kuikítexín ch'an chojni, a ntá ijie jahará tsikitiáxínrá tí Nchakuen Dios.” ¹⁷ Éxi xikaha jeheni tió kjuankixin kuínkáchónkini Ìnchéni Jesucristo ntá kjuanjon Dios Nchakuen ch'an k'uáyéheni mé xikaha ijie la kjuanjon Dios tí Nchakuen ch'an k'uáyéhe tí jehe sín kjaxin. ¿Xá nkexro tí janhan kixin chrókjuánjonkian Dios? —ichro ch'in Pedro.

¹⁸ A ntá tí sín kichó ní tjejó chjasin Jerusalén kuínhin tí nkehe tsikónhen ntá táni sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochrixín —mé xikaha ichro sín.

Tí nínko chjasin Antioquia

¹⁹ Tí kjuixin k'uén ch'in Esteban ntá kjuankixin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquia. Kjuakohe sín tí sín judío nkexrí tjeñ tí tan jína. A ntá tí sín jehya judío la náhi.

²⁰ A ntá í so sín tinkáchónki Ìnchéni tsikjixin chjasin Chipre la ko tsikjixin sín Cirene sákjuí sín chjasin Antioquia. Tió kjuíji sín ntiha mé kjuakohe sín tí sín jehya judío nkexrí tjeñ tí tan jína kuènte Ìnchéni Jesucristo. ²¹ Tí kjuachaxin kuènte Ìnchéni mé chóna tí jehe sín; méxra nchónhya tí sín ntiha mé kuítqhe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsikónhen chjasin Antioquia. Ntá ichr'an sín ch'in Bernabé sákjuí ch'an ntiha. ²³ Ntá tió kjuíji ch'an ntiha ntá k'uikon ch'an kixin Dios imá kjuínkítsa tí sín ntiha kjaxin. Ntá imá kóchéhe asén ch'an. Ntá nixjehe ch'an sín kixin kaín asén sín ts'ejó sín tsinkáchónki sín Ìnchéni. ²⁴ Ch'in Bernabé la ijnko chojni imá jína asén la antsí chóna ch'an Nchakuen Dios la jína tinkáchónki ch'an; méxra kóchjina nchónhya sín kuínkáchónki sín Ìnchéni.

²⁵ Kjuixin tíha a ntá ch'in Bernabé sákjuí ch'an chjasin Tarso sákjuíkjeyá ch'an tí ch'in Saulo. ²⁶ Ntá tió k'uitja ch'an ntá sákjuiko ch'an chjasin Antioquia. Ntá k'uejóko sín tí sín

tinkáchónki Ìnchéni ntiha kuenté ijnko nánó la kjuakõhë sín itsjë chojni. Ntiha chjasin Antioquía kjuankíxin sín kuikítexin sín tí sín tinkáchónki Cristo mé ihnié cristiano.

²⁷ A ntá iso sín chrónka itén Dios sákjuíxin sín chjasin Jerusalén la kjuuji sín chjasin Antioquía. ²⁸ Ijnko ch'in it'in Agabo k'uínkatjen ch'an kjuák'exín toté ch'an tí tsikójnkotsé tí sín tinkáchónki Jesús la kjuachaxién Nchakuen Dios chrónka ch'an kixin tsokjinta nkuixín ntiha. Tí nkehe chrónka ch'an mé chaxín kónhen tió kjuák'e ch'in Claudio k'uetqan ch'an. ²⁹ A ntá tí sín tinkáchónki Ìnchéni chjasin Antioquía kjuenkayáxin sín kixin jehe sín tsjinkítsa sín tí sín kichó sín tinkáchónki Ìnchéni estado Judea. La jnkojnko sín kjuanjon sín tí nkehe chónka sín. ³⁰ Mé xikaha kjuenájín sín chichaon sákjuíko ch'in Bernabé la ko ch'in Saulo chjéhe sín tí sín t'ayakonhen njnko estado Judea.

12

Ik'uen ch'in Jacobo la ko kjuák'echjina ch'in Pedro

¹ A ntá tí yaon a tí ch'in rey Herodes mé ntá kjuankíxin ch'an kónínkakonhen ch'an tí sín tinkáchónki Jesús. ² La k'uetqan ch'an kixin tí ch'in Jacobo ts'enxín ijnko chica espada tjate. Jehe ch'an mé kichó ch'an tí ch'in Juan a. ³ Ntá k'uíkon ch'in Herodes kixin imá kóchéhe tí sín judío kixin xikaha kónhen la ntá kjaxín itsé ch'an tí ch'in Pedro. Tíha mé kónhen tí yaon kia pascua tió kjóne sín niqtja chónthaha tí xroqan nchek'ánki niqtja. ⁴ Kjuixín itsé ch'in Herodes tí ch'in Pedro ntá chr'axenhen ch'an ntqechiso. Ntá ntiha mé tjejónka noó grupo soldado la mé noó soldado jnkojnko grupo. Kjuenkayáxin ch'in Herodes kixin tsjixin ts'átsínka tí kia pascua ntá sátsjiko ch'an tí ch'in Pedro tí siín tí sín israelita kixin ts'ikon kuenté chjasin ntiha kixin nkexrí its'en ch'an. ⁵ Méxra ch'in Pedro naxa tjechjina ch'an la ntaha sínta sín ch'an, la ntá kaín tí sín tinkáchónki Ìnchéni la tjejónixjehë sín Dios kaín asén sín kixin tsjinkítsa Dios tí ch'in Pedro.

Dios kjuínkítsa ch'in Pedro k'uaxrjexín ch'an ntqechiso

⁶ Tí tie a mé kjuenkayáxin ch'in Herodes kixin tsyoyan ntá tsakitsje ch'an ch'in Pedro sátsjiko ch'an tí siín tí sín chjasin. A ntá ch'in Pedro tjejua ch'an la nánánko tí jehe ch'an tjejó yaá soldado la chróntetoxín tjá ch'an yaá chica cadena. Ntá í so sín soldado a tjejónka sín ntója ntqechiso. ⁷ A ntá xrinahya tuénxín ikui ijnko ángel kuente Ìnchéni, a ntá tí nkaxenhen ntqechiso imá k'uínkaséyan ijnkóyé ntiha. Kjuak'etja itja tí ángel tí chjia ch'in Pedro kjuínchekjayehe ch'an. Ntá k'uetqan tí ángel ntáchro kixin:

—Tjoka t'aya.

La ntá tí chica cadena tjejóchróntetoxín itja ch'in Pedro mé k'uánótjen. ⁸ Ntá xik'etqan tí ángel ntáchro kixin:

—T'inkaya iká la tjanka tokatá.

Ntá kuítekaon ch'in Pedro la kjatqë xik'etqan tí ángel ntáchro kixin:

—T'ítsate iká ntá chréhe sátsjini —ichro ch'an.

⁹ Ntá ch'in Pedro chréhe ch'an iton tí ángel a ntá noehya ch'an á chaxín xikaha kónhen tí nkehe kjuích'e tí ángel ó náhi. Ntáchro ch'an kixin ách'e ijnko nkehe k'uíkonxón ch'an. ¹⁰ Ntá kjuixín k'uátsínka sín tí tjejó tí soldado saoxín la kjuixín xik'atsínka sín tí tjejó tí soldado a yóxin. La ntá kjuuji sín ijnko puerta chica ijie chjinaxón ntja. La ntá tí puerta chica la jehó xitjehë. Ntá k'uaxrje sín tjejótji sín ijnko ntja la ntá xrinahya tí ángel ó sákjuí la ntá jehó ch'in Pedro kuitqhe ch'an. ¹¹ A ntá tí ch'in Pedro kónohe ch'an kixin chaxín kónhen tíha. Ntá ntáchro ch'an kixin:

—Ntá ó noheni kixin chaxín Ìnchéni tsíchr'an tí ángel kuente ch'an kixin sinchekaáni kixin ts'yóyanhyani ch'in Herodes la ko tsqenhyani kaín tí nkehe tjinkaon tí sín judío —ichro ch'an.

¹² Ntá ó nohe ch'an kaín nkehe kónhen ch'an ntá sákjuí ch'an ntqë ijnko tjan María, iné ch'in Juan kjaxín tikítexín sín Marcos. Ntaha tsikójnkotsé itsjë sín tinkáchónki Ìnchéni tjejónixjehë sín Dios. ¹³ La ntá t'ínka ch'an tí puerta chjinaxón ntja la nixja ch'an. La ntá ijnko tjan it'in Rode k'uaxrje tjan kjuitsjehe tjan kixin nkexro tíha. ¹⁴ A ntá tió kjuátsqan tjan itén ch'in Pedro ntá k'uitjáyenhen tjan kuakitjehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntiha itjen ch'in Pedro. ¹⁵ Ntá ntáchro sín kixin:

—Lontia.

La naxa chrónka tjan kixin chaxín jehe ch'an ntá xintáchro sín kixin:

—Jehya jehe ch'an. Kjá tí xríntqë ch'an.

¹⁶ A ntá ch'in Pedro naxa t'ínka ch'an tí ntója puerta la ntá tió kuakitjehë sín la k'uíkon sín ch'an ntá chrakon sín. ¹⁷ A ntá kjuakoxín ch'in Pedro itja ch'an kixin tsotáni sín ntá chrónka ch'an kixin Ìnchéni mé kuakitsjexín ch'an ntqechiso. Ntá k'uetqan ch'an ntáchro ch'an kixin:

—Chenkará ch'in Jacobo la ko kaín kichó ni nkehe k'uátsínka janhan —ichro ch'an ntá sákjuí ch'an ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro.
¹⁹ La ntá k'uetōan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetōan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrjexín ch'án estado Judea ntá sákjuí ch'án chjasin Cesarea la ntíha kjuák'e ch'án.

Ik'uéen ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokóá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uáyakonhen ch'án ntōe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etōan. Kjuanchia sín kixin chrókónínkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sítixín tí nkehe ine sín. ²¹ Ntá ch'ín Herodes k'uíyehé ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrxjón kuénte chojni t'etōan la kjuák'enkáya ch'án ijnko silla kuénte chojni t'etōan. La ntá kjuankixin ch'án nixjehé ch'án tí sín tsikójkotsé. ²² A ntá tí sín a kjuankixin k'uèya sín, ntáchro sín kixin:

—Jehya chojni tjenixja. Dios tjenixja —ichro sín.

²³ A ntá tuénxín ijnko ángel kuénte Ìnchéni kjuíncheníhi ch'ín Herodes kixin kjuíncheyóhe ch'án asén ch'án Dios. La ntá kosíntō kjóne nkaya tsee ch'án ntá k'uéen ch'án.

²⁴ La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixrā kuénte sín chjasin Jerusalén la ntá sáxíkji sín chjasin Antioquía la sákjuíko sín ch'ín Juan mé kjaxin tikítexín sín ch'án Marcos.

13

Ch'ín Saulo la ko ch'ín Bernabé sákjuíkjako sín

¹ A ntá tí njnko chjasin Antioquía la sín iso sín nixja sín itén Dios la kjuákohe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkíko ch'ín Herodes tí ch'ín t'etōan estado Galilea, la ko ch'ín Saulo. ² Ijnko yaon la tjejtótójkotsé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xrx sich'e sín.

³ Ntá nixjehé sín Dios la kjónehya sín la ntá kjuixin ntá k'uejotja tja sín chrítaón ikja tí sín a la nixja sín jnkójnko sín kixin ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uixenhen sín ijnko ntabárcō sákjuí sín ijnko nonte it'in Chipre. ⁵ Ntá kjuíji sín ijnko puerto it'in Salamina. Ntaha kjuákoxín sín itén Dios tí njnko kuénte tí sín judío. Kjaxin kjuíjiko sín ch'ín Juan kixin tsjinkítsa ch'án. ⁶ La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuich'ia ch'án ntáchro ch'án kixin kjaxin ch'án nixja ch'án itén Dios. ⁷ A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jína kjuenkayáxin ch'án. K'uíyehé ch'án tí ch'ín Bernabé la ko tí ch'ín Saulo kixin jehe ch'án tjinkaon ch'án tsinhín ch'án itén Dios. ⁸ A ntá tí ch'ín nchexroan, nkíva griego mé tikítexín sín ch'án Elimas, mé nínkakonhen ch'án tí sín tjako a kixin tjínkakonhya ch'án kixin tí ch'ín t'etōan chrókuitekaon ch'án Ìnchéni. ⁹ A ntá tí ch'ín Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan.

¹⁰ Ntáchro ch'án kixin:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuénte kixin ch'éna jínahya tí ntia ntoá kuénte Ìnchéni? ¹¹ A ntá ijie la Ìnchéni sintakjasótia. Tsitōha ntakótán iso yaon la ts'ikonhya tí xrohi kuénte yaon —ichro ch'ín Pablo.

Ntá tuénxín tí ch'ín Elimas la k'uixítie tjen ch'án. La ntá kjuéyá ch'án ijnko nkexro tsinkátséhe tja ch'án sátsjiko ch'án kixin t'íkonhya ch'án. ¹² A ntá xíkaha mé k'uíkón tí ch'ín gobernador nkehe kónhen la ntá kjuankixin tinkáchónki ch'án Ìnchéni kixin k'uíkón ch'án tí kjuachaxin kuénte Ìnchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuíxin sín chjasin Pafos. K'uixenhen sín ntabárcō sákjuí sín kjuíji sín chjasin Perge estado Panfilia. Ntá ntaha ch'ín Juan* kuitōhe

* 13:13 Hechos 12.25

tí jehe sín ntá kjan ch'án chjasin Jerusalén. ¹⁴ Ntá sákjuixin ch'in Pablo la ko ch'in Bernabé chjasin Perge kjuíji sín chjasin Antioquia chjinaxón Pisidia. A ntá tí yaon t'ok'éhe sín ntá k'uúixenhen sín tí núnko Israel na ntaha k'u'éjótjaxin sín. ¹⁵ Ntá kjuixin kjuínchekuáxin sín tí xroon kuènte ley la ko tí nkehe tsíkjin tí sín k'u'échrónka itén Dios ntá tí sín t'etóan kuènte núnko mé k'uúyehé sín tí sín a ntá ntáχρο sín kixin:

—Kíchóni tí chonta nkehe tsóχροnka kixin antsí má tsóchéheni la chrónka jie tsinhinni —íχρο sín.

¹⁶ Ntá ch'in Pablo k'uúinkatjen ntá kjuáqxin itja ch'án kixin tsotáni sín. Ntá ntáχρο ch'án kixin:

—Chrókuinhínra jahará chojni israelita la ko kjaxin chrókuinhínra jahará tsíkjinínra chjasin ókjé tí chaxín tjinkáonra nchexiteyéherá Dios. ¹⁷ Tí Dios tinkáchónki tí sín chjasin Israel mé kjuéyá ch'án tí sín tsík'axrjeníninni. Ntá chr'éxin Dios kjuanjon kjuachaxin kixin chrókótsjé tí jehe sín tí naxá k'u'éjó sín chjasin Egipto. Éxi chojni tsíkjinín ókjé k'u'éjó sín a ntá chr'éxin ntá kjuachaxién Dios kjuínkítsa sín k'uaxrjéxin sín tí nonte ntiha inaá. ¹⁸ Dios kjuínkítsa sín tí cuarenta nánó k'u'éjó sín tí nteje. ¹⁹ Ntá chr'éxin kjuínchek'itjána ch'án yato nación k'uék'ejó nonte Canaán, kixin tí sín tsík'axrjeníninni chrók'uáyéhe tí nonte a. ²⁰ Ntá kaín sín k'u'éjó sín ntiha ijnko cuatrocientos cincuenta nánó. K'uék'etóan tí sín juez hasta ikjui tí ch'in Samuel ijnko ch'in k'u'échrónka itén Dios. ²¹ Ntá kjuanchia tí sín israelita ijnko ch'in rey ts'etugnenhén sín. Ntá kjuéyá Dios tí ch'in Saul la k'uetoan ch'án cuarenta nánó. Jehe ch'án it'é ch'án mé ch'in Cis la k'uaxrjenín ch'án ch'in Benjamín. ²² Ntá chr'éxin Dios kuakitsjehe ch'in Saul tí xra kjuák'e ch'án ntá k'uáyéhe ch'in David tí xra rey. Ntá ntáχρο Dios kixin: “Ó k'uitjá ch'in David, it'é ch'án mé Isaí. Jehe ch'án mé ijnko chojni nchexhána mé sinchexiteyána ch'án kaín nkehe tjínkavan”. ²³ Ijnko tí chojni k'uaxrjenín tí ch'in David mé Jesús. Tíha la Dios tsíchr'án ch'án kixin sinchekáá tí sín israelita. Mé xíkaha tsintáχρο ch'án. ²⁴ Naxá tjakohya ch'in Jesús ntá ch'in Juan kjuako ch'án tí tan kuínhin tí sín israelita la ntáχρο ch'án kixin chrókjan sín chrórxaxinkaon sín Dios ntá chrókuíkite sín. ²⁵ Ntá chjina its'en ch'in Juan ntá ntáχρο ch'án kixin: “Janhan na jehya tí nkexro tjenkayáxinra. Náhi. Chr'éxin na itsi í jnko nkexro la chrókósuána chrókjuasintánka tí correa tókáté ch'án kixin antsí mé t'etóan tí jehe ch'án la kánhyó t'etóan tí janhan,” mé xíkaha tsintáχρο ch'in Juan.

²⁶ Jahará kíchó ní tsík'axrjenínínra ch'in Abraham tinhínra la ko kaín rá chojni tsíkjinín ikjín nchexiteyéherá Dios, tinhínra tí tán tsaáxinra. ²⁷ Méxra tí sín k'uék'ejó sín chjasin Jerusalén la ko tí sín t'etóan ntiha mé kónoehya sín nkexro tí sín Jesús la ko kuienxinhya sín tí nkehe tsíkjin tí sín k'u'échrónka itén Dios senó tió kjuínchekuáxin sín tí xroon tí nkaxenhen núnko jnkojnko tí yaon t'ok'éhe sín. Mé xíkaha jehe sín tió kjuínchekjasetó sín tí ch'in Jesús la kjuínchexiteyá sín éxi níxja tí xroon a. ²⁸ Ntá k'uitjehya sín ninkehó jie kixin chrók'uen ch'án ntá kjónté kjuanchehe sín tí ch'in Pilato kixin ts'etóan ch'án kixin its'en ch'án. ²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuínkajjinxin sín tí cuerpo kuènte ch'án tí ntacruz ntá kjuavá sín ch'án. ³⁰ A ntá Dios kjuínchexechón tí jehe ch'án inaá. ³¹ A ntá nchónhya yaon k'uúkon sín ch'in Jesús tí sín k'uék'ajiko ch'án tió sákjuixin sín estado Galilea la sákjuj sín chjasin Jerusalén. A ntá ijie tí sín a mé tjejónixja sín nkexri kjuako ch'in Jesús, tjakohe sín kaín chojni.

³² A ntá jie jeheni tjakoni tí tan jina, mé tí nkehe tsíkjanjon Dios tsík'áyéhe tí sín tsík'axrjeníninni ósé. ³³ Mé xíkaha xiteyá k'uáyéheni tí jeheni tsík'axrjeníninni tí sín a. A ntá Dios kuènte tí sín a mé kjuínchexechón tí ch'in Jesús éxi níxja tí xroon yóxin Salmo, ntáχρο kixin: “Jaha mé xjanna. Janhan mé tjahá kjuachón jie.”† ³⁴ Ntá tsintáχρο Dios kixin sinchexechón ch'án tí ch'in Jesús kixin tsóxíkaha cuérpóé ch'án. Mé xíkaha chrónka tí xroon itén Dios. Ntáχρο kixin: “Janhan mé sintaxiteyá tí nkehe chaxín tjanka ch'in David.”‡ ³⁵ La ko í jnko Salmo mé ntáχρο xíkiki: “Jaha tsjánjonhya kjuachaxin kixin tsóxíka tí cuérpóé tí nkexro tjóá kjuít'aha xra.”§ ³⁶ A ntá ch'in David kjuínchexiteyá ch'án éxi tsík'etóan Dios tí kjuák'e ch'án ntá kjónté chr'éxin ik'uén ntá xravá ch'án xíkaha k'uéxravá tí sín tsík'axrjeníninni la ntá kjónté la xíka ntqé ch'án. ³⁷ A ntá tí cuérpóé tí nkexro kjuínchexechón Dios la kótjehya. ³⁸ Méxra kíchó ní t'ichjánxin tsonohará kixin nkexri tsjin ijjírá kixin Jesús mé k'uenyákonhánra. ³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetoan ch'in Moisés kjuachahya kótjuáxin tí jie. ⁴⁰ Chrókóxakonhanra kixin chrókuànhyará xíkaha éxi tsíkjin tí sín ósé xíkiki:

† Tsjehérá jahara chojni titekakonhya. Ijie la tsochrakonrá kixin nkehe tsónhen kixin janhan Dios tsjáqxian ijnko nkehe jie ijnko yaon

kjánchó tsitekákonhyará kjónté ókjé nkexro chróchrónka.*

⁴² A ntá ch'in Pablo la ko tí nkexro k'uájiko ch'an k'uaxrjexín sín nkaxenhen tí nínko, a ntá chróna tí sín jehya sín judío tsíkokjéxín, kjuanchia sín kixin í jnko semana tí yaon t'ok'éhe sín la inaá tsochrónka ch'an éxí tí kjuako ch'an. ⁴³ Ntá tí kjuixín xíkaxín sín tí kójnkotsé sín tí nínko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxí tí sín judío la xraxínkaon sín Dios, la mé imá kóxrjínhín sín tí nkehe kjuako ch'in Pablo la ko ch'in Bernabé la ntá sákjuichréhe sín. A ntá jehe sín mé k'uetqan sín kixin ántsi jína chrókuinkáchónki sín tí Dios tjuèhe kaín chojni.

⁴⁴ A ntá í jnko semana kjuéxín, tí yaon t'ok'éhe sín la kójnkotsé kaín tí sín siín tí chjasin ntiha kixin tjínkaon sín tsinhín sín itén Dios. ⁴⁵ A ntá k'uíkon tí sín judío a kixin nchónhya chojni tsíkokjéxín, ntá imá kóchjínnoxínhín sín, ntá kjuankíxín sín k'uántaxínhín sín tí ch'in Pablo. ⁴⁶ A ntá ch'in Pablo la ko ch'in Bernabé la íchá ántsi má chrakonhya sín nixja sín ntáchro sín kixin:

—T'ichjánxín senó jahará judiorá chrókuinhínra itén Dios. Kjánchó tjínkákonyará tsinhínra tí nkehe jína tsjanjon kjuachón jnkochrín. A ntá ijie la tsitohará tí jahara judiorá la ntá jeheni la sátsjini tsjakqeheni tí sín jehya judío ⁴⁷ xíkaha tsík'etqan Ínchéni. Ntáchro ch'an kixin:

Janhan ichr'an tí jahará éxí xrohi ts'inkaséyanxín kaín nación

kixin sátsjikoará tí tan tsjanjon kjuachón tsaáxín chojni hasta tí ántsi má kjin kjuéxín chjasintajni.†

Mé xíkaha k'uetqan Dios.

⁴⁸ A ntá kuínhín tí sín jehya sín judío tíha la kjuankíxín kóchéhe sín la ntáchro sín kixin tí tan kuènte Ínchéni la nkehe jína, ichro sín.

La ntá kjuankíxín kuinkáchónki kaín tí sín tsíkítqenxín sín kixin tsochóna sín kjuachón jnkochrín. ⁴⁹ Ntá xíkaha xrankíxín xrako tí itén Ínchéni nkuíxín tí chjasin ntiha. ⁵⁰ A ntá tí sín judío nixjehe sín iso chojni chjin jína tjetoan la ko tí chojni ntoa t'etqan tí chjasin ntiha la ntá kjuínchekónínkaon tí sín a la ntá kjuankíxín sín chrók'óyan sín tí ch'in Pablo la ko tí ch'in Bernabé ntá sákjuíxín sín chjasin ntiha. ⁵¹ A ntá jehe sín la kótsjénka sín toqaté sín kixin tsoxénjin tí nche chóna toté sín. Tíha mé kjuakoxín sín kixin ntoáhya kjuenkayáxín tí sín a. A ntá sákjuí tí jehe sín chjasin Iconio. ⁵² Ntá tí sín tinkáchónki Ínchéni la imá chéhe sín kixin ántsi chóna sín Nchakuen Dios.

14

Ch'in Pablo la ko ch'in Bernabé tjejó chjasin Iconio

¹ Ntá kjuíji ch'in Pablo la ko ch'in Bernabé tí chjasin Iconio. Ntá k'uíxénhen sín nínkqé tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín. ² A ntá iso tí sín judío kuítekakonyha la ntá kjuankíxín nchekónínkaon sín tí chojni jehya judío kixin tsoñinkakonhen sín tí sín tjako. ³ A ntá tí sín tjako la isé kuitqhe sín ntiha la chrakonhya sín nixja sín la ko tinkáchónki sín Ínchéni Jesús. La ntá Ínchéni kjaxín kóxrjínhín ch'an tí nkehe nixja sín kixin nkexrí tjuèheni Dios la kjuanjón ch'an kjuachaxín tsjasín sín kjuaxroan. ⁴ A ntá tí sín tjejó chjasin ntiha la jnkokónhya kjuenkayáxín sín. Iso sín kuítekakonhen sín tí sín judío la í so sín kuítekakonhen sín tí sín tsíkjeýá Ínchéni. ⁵ A ntá tí sín judío la ko tí sín jehya judío mé kjuenkayáxinko sín tí sín t'etqan kixin sinchechrakon sín tí sín tsíkjeýá Ínchéni la ko tsochjéhe sín xro. ⁶ La ntá tí ch'in Pablo la ko tí ch'in Bernabé kónohe sín nkehe kjuenkayáxín tí sín a ntá sákjuí sín chjasin Listra la ko chjasin Derbe estado Licaonia la nkuíxín ntiha. ⁷ La kjaxín ntaha kjuako sín tí tan jína kuènte Ínchéni.

Chjéhe sín xro ch'in Pablo chjasin Listra

⁸ Ntá tí chjasin Listra itjen ijnko ch'in xitjahya tji. Nunca xitjahya k'uáji ch'an kixin tsíkokjéxín ch'an xitjahya itji ch'an. ⁹ Méxra ó tjetjaxínkoá ch'an ntá kuínhín ch'an nkehe tí tjako ch'in Pablo. Ntá ch'in Pablo komá ch'an tí ch'in a ntá kónohe ch'an kixin tí ch'in ántsi tinkáchónki ch'an Ínchéni kixin tsitqhe ch'an jína. ¹⁰ Ntá jehe ch'an itsen ntáche ch'an tí ch'in a kixin:

—T'inkatjen, ntoá tjak'exián totá —ichro ch'an.

Ntá tuéxín k'uínkatjen ch'an, chrika ch'an, kjuák'exín ch'an toté ch'an ntá ó jína tji ch'an. ¹¹ Ntá kaín tí sín chjasin ntiha k'uíkon sín nkehe kjuích'e ch'in Pablo, ntá kaín sín k'uíyexín sín nkívee sín Licaonia ntáchro sín kixin:

—Dios tsík'óna chojni mé tsíkíxín nkajni tjejókoni ntihi —ichro sín.

¹² La ntá kjuínchek'in sín ch'in Bernabé mé tí dios Júpiter a ntá ch'in Pablo mé tí dios Mercurio kixin imá nixja ch'an. ¹³ Ntá tí ch'in nchat'á kuènte tí dios Júpiter mé chóna ch'an

† 13:47 Isaias 42.6; 49.6

n̄nko tí t'ixenx̄inni ikon chjasin ntá kjuík̄ao ch'án koxinta tjeteyá tsjo. A ntá jehe ch'án la ko kaín tí chojni la chréhe sín k̄ixin tjinkaon sín chrók̄juikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a. ¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín t̄iha ntá kjuank̄ixin sín kótséchje sín iké sín la sákjuík̄jakjan sín tí chojni síin n̄tiha la t'óyao sín ntáchro sín k̄ixin:

¹⁵ —¿Kuénté k̄ixin tjejoch'erá x̄ikaha? Jeheni chojni éxi tí jahará. Tí x̄ra ó kuini k̄ixin tsochrókani itén Dios k̄ixin ts̄joghérá kaín tí nkehe ninkehó sínk̄iha la ntá chrókjanrá chrók̄uinkachónkirá Dios t̄jehón. Jehe ch'án mé kjuích'éna ch'án nkajni la ko chjasintajni la ko tí ntayao la ko kaín tí nkehe síin. ¹⁶ Ntá ósé mé kuit̄ohe Dios chojni k̄ixin jehó ts'aji sín nt̄je sín. ¹⁷ K̄jonté la Dios tjakox̄in ch'án k̄ixin jehe ch'án t'etoan ch'án k̄ixin kjuích'éna ch'án kaín nkehe. Jehe ch'án mé t'etoan k̄ixin ts'aniá chrin ntá ts'enkani la j̄ina ts'óneheni, la jehe ch'án tjanjon ch'án nkehe k̄ixin jnkochr̄ix̄in ts'ixin nkehe sineni, la ko jehe ch'án mé nchechéheni ch'án —mé x̄ikaha ichro ch'ín Pablo.

¹⁸ K̄jonté x̄ikaha ichro tí sín tjako la nax̄a tjinkaon tí chojni chrokuikosáyehe sín chrók'óyán sín koxinta chrók̄jok̄ehe sín tí sín tjako.

¹⁹ A ntá ikui iso tí sín judío kjuix̄in sín chjasin Antioquía la ko chjasin Iconio. Nixjehe sín tí sín n̄tiha k̄ixin ts̄t̄ohe sín tí nkehe jehya j̄ina tjako tí sín a ntá kóninkaon sín ntá kjuank̄ixin ch̄jehe sín x̄r̄o tí ch'ín Pablo. La ntá ách'e ó kjuixin tsík'en ch'án ntá kuinkánkákjen sín ch'án sákjuiko sín ch'án ikon chjasin. ²⁰ Ntá tí sín tinkáchónki Ìnchéni mé kójnkotsé sín k'uantatjen sín tí ch'ín Pablo ntá k'uàya ch'án x̄ikjan ch'án tí chjasin n̄tiha inaá. Ntá tí yaon chr'éxin ntá sákjuiko ch'án tí ch'ín Bernabé chjasin Derbe.

²¹ A ntá ó kjuixin chrónka sín tí tan j̄ina la ko kjuacha sín itsjé chojni kuinkáchónki Ìnchéni n̄tiha ntá kjan sín chjasin Lистра la ko chjasin Iconio la ko chjasin Antioquía. ²² Nkuix̄in tí chjasin k'uátsinka sín mé kjuinchechéhe sín tí sín kuinkáchónki Ìnchéni. K'uet̄oan sín k̄ixin nax̄a j̄ina chrók̄uinkáchónki sín Ìnchéni la ntáchro sín k̄ixin tí ts'ixenheni tí kjuachaxin kuénte Dios t'ichj̄ánxin tsjasóteni. ²³ A ntá n̄tiha k̄jueyá sín chojni jnkójnko n̄nko k̄ixin ts'et̄uenhen sín tí sín tinkáchónki Jesús k̄ixin j̄ina ts'ejó sín. Ntá nixjehe sín Dios tí nax̄a k̄jónehya sín la ntá ntáche sín Ìnchéni k̄ixin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

²⁴ Ntá chr'éxin k'uátsinka sín estado Pisidia la ntá kjuj̄i sín estado Panfilia. ²⁵ Ntá chjasin Perge kjuako sín tí tan kuénte Ìnchéni la ntá kjuixin ntá sákjuí sín chjasin Atalia. ²⁶ Ntá n̄tiha k'uixenx̄in sín ntabárc̄o ntá sákjuí sín chjasin Antioquía tí chjasin k'uénixjehe chojni Dios k'uék̄janchia sín k̄ixin Dios ts̄jnk̄itsa tí sín a sich'e sín tí x̄ra. La ntá ó kjuixin x̄iteyá. ²⁷ Ntá tió kjuj̄i sín chjasin Antioquía ntá kójnkotsé kaín tí sín tinkáchónki Jesús. Ntá kjuank̄ixin chrónka ch'ín Pablo nkexri kjuink̄itsa Dios tí jehe sín la ko nkexri kjuanjon Dios kjuachaxin tsjak̄ohe sín tí chojni jehya judío k̄ixin k̄jaxin sín tsitekaon sín Ìnchéni. ²⁸ A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ìnchéni n̄tiha.

15

Kójnkotsé sín chjasin Jerusalén

¹ A ntá iso chojni tsík̄ix̄in sín estado Judea ntá kjuj̄i sín chjasin Antioquía. Ntá kjuank̄ixin sín kjuak̄ohe sín tí sín kichó ni k̄ixin x̄itjahya tsaáxin sín tí chóntahya sín tí x̄roye tsík'et̄oan ch'ín Moisés. ² Ntá tí ch'ín Pablo la ko tí ch'ín Bernabé la ko tí sín judío kjuank̄ixin kjuanjonkox̄in sín kichó sín. Ntá áxri ntá kónox̄in k̄ixin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha tsónixjehe sín tí sín apóstol la ko tí sín t'et̄oan n̄nko k̄ixin nkexri ts̄onhen tí x̄roye tsík'et̄oan ch'ín Moisés.

³ Tí sín tinkáchónki Ìnchéni chjasin Antioquía mé ichr'án sín tí sín a ntá k'uátsinka sín estado Fenicia la ko estado Samaria la tinkáchrónka sín k̄ixin nkexri tí sín ókjé jehya sín judío kjuitoxin̄in tí k'uék̄jenkayáxin sín ntá kuákja sín nt̄je Dios. Ntá kaín tí sín kichó ni imá kóchéhe sín tí kuínhin sín x̄ikaha.

⁴ La ntá kjuj̄i ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'et̄oan kuénte n̄nko mé kjuanjon sín kjuachaxin ts'ejó tí sín a. Ntá chrónka sín k̄ixin Dios imá kjuink̄itsa tí jehe sín. ⁵ Ntá iso tí sín fariseo ó sík̄itekaon Ìnchéni mé k'uínkatjen sín ntá ntáchro sín k̄ixin:

—T'ichj̄ánxin itsa x̄roye tí sín jehya judío tinkáchónki Ìnchéni la ko t'ichj̄ánxin ts'it̄uenhen sín sinchex̄iteyeh̄e sín kaín tí ley —ichro sín.

⁶ Na ntá kaín tí sín apóstol la ko tí sín t'et̄oan n̄nko mé kójnkotsé sín kjuenkayáxin sín nkexri ts̄onhen k̄ixin x̄ikaha ichro tí sín judío. ⁷ Ntá imá nixjehe kichó sín ntá k'uínkatjen ch'ín Pedro ntáchro ch'án k̄ixin:

—Jahará kichó ni ó nohará nkexrí kixin senó Dios tsíkjeýá tí jeheni kixin tsjakoheni kaín tí sín jehya judío kixin tsinhin sín tí tán jina kuente Cristo kixin kjaxin jehe sín tsitekaon sín. ⁸ Dios mé ó nohe ch'án nkexehe kaín asén chojni. Kjuakoxin ch'án kixin k'uáyéhe ch'án tí sín jehya judío kixin ch'éhe ch'án sín Nchakuen ch'án éxi tí xikaha k'uáyéheni tí jeheni. ⁹ Dios la t'ikon kaín chojni jnkokón éxi tí jeheni. Ntá kjuínchetjóá ch'án asén sín kixin ó tinkáchónki sín Ìnchéni. ¹⁰ Méxra znekuenté titekáonhará tí nkehe kjuich'e Dios la ntá tétuénhénra chojni sinchexiteyá sín kaín tí nkehe ixrá tsitekaon sín? Ní jeheni la ko ní sín tsík'axrjeníxinni kjuachahya sín kjuínchexiteyá sín tíha. ¹¹ Náhí. Ó noheni kixin kjuasáyé Ìnchéni Jesús mé kuaáxinni la ko kjaxin xikaha kuaáxin tí jehe sín kuítekaon —mé xikaha ichro ch'ín Pedro. ¹² Ntá kaín tí sín tsíkójnkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínkítsa sín kjuasin sín itsjé kjuaxroan k'uíkon tí sín jehya sín judío. ¹³ Kjuixin nixja ch'ín Pablo la ko ch'ín Bernabé ntá kjuankixin nixja ch'ín Jacobo, ntáchro ch'án kixin:

—Kíhóni, tinhínra tí nkehe tsoxrjanka. ¹⁴ Ch'ín Simón Pedro chrónka nkexrí kjuakoxin Dios kixin tjuéhe ch'án tí chojni jehya judío la nkexrí kjuéyá Dios iso tí sín kixin tsinkáchónki sín tí jehe ch'án. ¹⁵ Mé xikaha chaxín chrónka tí xroon tsíkjin tí sín k'u'échrónka itén Dios kixin: ¹⁶ Janhan mé tsokjan chr'éxin.

Tió ts'inka ntá sít'ána nixin tí nchia tsík'oya kuente David la janhan la tsjínkítsa sín ts'etoan sín.

¹⁷ Kixin kjaxin kaín xín chojni mé tsjeýá sín Ìnchéni la ko kjaxin kaín xín tí sín ókjé nacióon mé tí sín kótjuáxin nina mé tsinkáchónkina sín.

¹⁸ Ìnchéni mé kjuakoxin kaín tíha tí ósé la tsíkjanjon ch'án tí tan kuente ch'án.* Mé xikaha ichro itén Dios

¹⁹ Méxra ntáxrjan kixin tí sín jehya judío la t'ichjánxinhya sinchexiteyá sín kuenté tí ley kixin ó kuítóhe sín tí nkehe kuinkáchónki sín senó kixin jina chrókjuéyá sín Dios. ²⁰ Méxra tsochr'énhenni sín ijnko xroon la jehó ts'etuénhenni sín kixin chrókjónehya sín tí nto tsíkókehe chojni tí nkehe tsikjanoya la ko chróchóntahya sín chojni chjin ókjé la ko chrókjónehya sín tí nto kuente ko tsichrinjinhya ikja va la ko chrókjónehya sín ijné va. ²¹ A ntá jnkojnko chjasin siin nkexro chrónkaxín tí ley kuente ch'ín Moisés nchekuáxin sín tí nkaxenhen ninko jnkojnko tí yaon t'ok'éhe sín —ichro ch'ín Jacobo.

²² Ntá kaín tí sín tsíkjeýá Ìnchéni la ko tí sín t'etoan kuente ninko la ko kaín tí í so sín tinkáchónki Ìnchéni kjuéyá sín iso chojni tsochr'án sín chjasin Antioquia, mé kjuéyá sín ch'ín Judas, t'ikjéxin sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetooan ntíha. ²³ Ntá ichr'án sín tí xroon sákjuiko tí sín a ntáchro kixin:

“Jeheni chojni tsíkjeýá Ìnchéni la ko chojni t'etoan kuente ninko ntíhi la nixjahaaráni tí jahará, kichó ni jehya judío, tjejórá chjasin Antioquia la ko estado Siria la ko estado Cilicia. ²⁴ Ó noheni kixin iso chojni tsíkixin chjaséni kjónté k'u'échóntahya sín kjuachaxin la kjuínchexakonhanrá sín kixin ntáchro sín kixin t'ichjánxin itsará tí xroye tsík'etoan ch'ín Moisés. ²⁵ Ntá jnkokoá kjuenkayáxinni tsjeýáni nkexro tjejó ntíhi kixin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kixin imá tjuéheni sín. ²⁶ Tí sín a mé ántosen sín kjónté chrók'uenxín sín kixin tí tinkáchónki sín Ìnchéni Jesucristo. ²⁷ Méxra tsochr'ánni ch'ín Judas la ko ch'ín Silas tsjiji sín kixin jehe sín mé tsonixjahaará sín tsochrónkaxín sín kaín tíha. ²⁸ Jina kixin Nchakuen Dios mé kjuínkítsani kjuenkayáxinni kixin jehya chrók'uetuánhanráni ijnko nkehe imá xra. Náhí. Jehó tí nkehe kánhyó xra t'ichjánxin sinchexiteyará mé t'etoanni: ²⁹ chrókjóntehyará tí iko tsíkókehe chojni tí nkehe tsikjanoya la ko kjaxin chrókjóntehyará ijné jí ko a la ko chrókjóntehyará tí nto kuente tí tsichrinjinhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteyará kaín tí nkehe t'etoanni la jina ts'ejorá.” Mé xikaha nixja tí xroon.

³⁰ Ntá kjuixin nixja sín ntá tí sín a sákjuí sín chjasin Antioquia. Ntá tió kjuíji sín ntíha ntá kójnkotsé tí sín tinkáchónki Jesús ntá kjuanjon sín tí xroon a. ³¹ Ntá tió kjuínchekuáxin tí sín kichó ni tí xroon a ntá imá kóchéhe sín kixin xikaha chrónka tí xroon a. ³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jina la imá kjuínchexéhe sín tí sín kichó ni kixin tí nkehe nixja sín. ³³ Ntá ntahó k'u'éjó sín iso yaon, ntá tió sátsji sín ntá kaín tí sín tinkáchónki Ìnchéni nixjehe sín jina ntá ó xikjan sín inaá tí tsíkixin sín tí tjejó tí sín tsíchr'án sín. ³⁴ Kjánchó ch'ín Silas kjuenkayáxin ch'án kixin ntahó chrókuítóhe ch'án. ³⁵ A ntá ch'ín Pablo la ko ch'ín Bernabé kuítóhe sín chjasin Antioquia. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankixin tí yóxin viaje

* 15:18 15.16-18 Amós 9.11-12

³⁶ A ntá chr'éxin ch'in Pablo nixjehe ch'an ch'in Bernabé. Ntáchro ch'an kixin:

—Sátsjtsjeheni tí sín kichó ni kaín tí chjasin kjuakoxinni itén Inchéni ósé. Tsjtsjeheni nkexri tjejó sín ntiha —ichro ch'an.

³⁷ A ntá ch'in Bernabé la tjinkaon ch'an kixin kjaxin sáchrókjuiko sín ch'in Juan kjaxin tikjtexin sín ch'an Marcos. ³⁸ A ntá ch'in Pablo kóxrjjenhya sátsjiko sín tí ch'in Marcos a kixin jehe ch'an kuitóhe ch'an sín estado Panfilia la kjuínkítsahya ch'an kixin naxa tsonhen tí xra.† ³⁹ Méxra jnkókoáhya kjuenkayáxin sín la ntá xikáyehe sín la óké xikáya sín. Ch'in Bernabé sákjuiko ch'an tí ch'in Marcos la k'uixenhen sín ijnko ntabárcó sákjuí sín nonte Chipre. ⁴⁰ A ntá tí ch'in Pablo la jehó ch'an mé kjueyá ch'an tí ch'in Silas ntá chr'éxin sákjuí sín. Tí sín kichó ni ntiha kjuanchehe sín Dios kixin jína ts'ayakonhen sín ch'an la ntá sákjuí sín. ⁴¹ Ntá k'uátsinka sín estado Siria la ko estado Cilicia la kjuínchehéhe sín asén tí sín tinkáchónki Inchéni njnko ntiha.

16

Ch'in Timoteo sákjuiko ch'an ch'in Pablo la ko ch'in Silas

¹ Ntá kjuíji ch'in Pablo chjasin Derbe la ko chjasin Lистра. Ntá ntaha itjen ijnko ch'in tinkáchónki Jesús it'in ch'an Timoteo. Jehe ch'an mé xjeen ijnko tjan judía tinkáchónki Inchéni. A ntá it'é ch'an mé ijnko ch'in griego. ² Ntá tí sín kichó ni tjejó chjasin Lистра la ko chjasin Iconio mé nixja sín kixin jína tí ch'in Timoteo. ³ A ntá ch'in Pablo mé tjinkaon ch'an sáchrókjuiko ch'an tí ch'in Timoteo. Ntá senó k'uetqan ch'an chrókua tí ch'in Timoteo a tí xroye kixin tsonínkakonhya tí sín judío tí chjasin sátsji sín kixin ó nohe tí sín a kixin it'é ch'in Timoteo la mé griego. ⁴ Ntá sákjuí sín la kaín tí chjasin k'uátsinka sín la nixjehe sín tí sín kichó ni la chrónkaxin sín tí nkehe tsik'etqan tí sín apóstol la ko tí sín t'etqan kuénte njnko chjasin Jerusalén. ⁵ Ntá tí chojni tinkáchónki Inchéni mé antsí má ntoá k'uéjó sín la ko jnkojnko yaon sitinkákótsjé sín.

Xríñahya titàya k'uikuèn ch'in Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsinka sín nó estado Frigia la ko estado Galacia. ⁷ Ntá tió kjuíji sín estado Misia ntá kjuenkayáxin sín sáchrókjuí sín nó estado Bitinia. Ntá Nchakuen Jesús kjuanjonhya kjuachaxin kixin sátsji sín nó ntiha. ⁸ Méxra k'uátsinka sín ikjin tí estado Misia la ntá kjuíji sín chjasin Troas chrínta ntayao. ⁹ Ntá ijnko tie xríñahya titàya k'uikuèn ch'in Pablo ijnko ch'in estado Macedonia kjuák'exin toté ch'an chrónóa ch'an kixin: "T'átsinka Macedonia tsjínkítsani," ichro ch'an. ¹⁰ Méxra tíha tsik'ikon ch'in Pablo la ntá tuénxín kóyaxínhinni kixin sátsjini estado Macedonia kixin kónoexinni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'in Lucas ikjinni tí xroon í k'uéjókotoxinni kichó ni ntiha.]

Ch'in Pablo la ko ch'in Silas, k'uéjó sín chjasin Filipos

¹¹ Ntá ntaha chjasin Troas k'uixenxinni ijnko ntabárcó ntá sákjuíni ntoí ijnko nonte ntsí tinkátaon ntá it'in Samotracia. Ntá tí yaon chr'éxin kjuíjini chjasin Neápolis. ¹² Ntá ntiha sákjuixinni la kjuíjini chjasin Filipos. Tí chjasin a mé k'uéchónta tí sín romano ósé ntá ijnko chjasin antsí má tjetooan tí it'ó tí estado Macedonia. Ntaha mé k'uéjóni iso yaon. ¹³ Ntá tí yaon t'ok'éhe sín ntá k'uaxrjexinni tí chjasin Filipos ntá sákjuíni ijnko chrínta ntario mé ntiha kuèhen sín tsojnokotsé sín tsonixjehe sín Dios. Mé ntaha k'uéjótjaxinni la kjuankíxinni kjuakoheni iso chojni chjin tsik'ónkotsé ntiha. ¹⁴ Ntá ijnko tí jehe sín mé ijnko tjan it'in tjan Lidia la tsikjixin tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Inchéni mé kjuínkítsa asén tjan kixin tsinhin tjan jína tí nkehe kjuako ch'in Pablo. ¹⁵ Ntá jehe tjan la ko kaín tí sín tjejó ntqan tjan mé kuikite sín. Ntá chrónóhehe tjan tí ch'in Pablo ntáchro tjan kixin:

—Tí chaxín tjátsqan kixin chaxín tinkáchónkini Inchéni la jína chrókuitqha ntqeni ntihi —ichro tjan.

Ntá kjónté kuitqeheni ntiha.

¹⁶ Ntá ijnko yaon sákjuíni tí nó kuèhen sín nixjeexin sín Dios ntá ó xétani ijnko tjan tjarisoá chóna nchakuen tí jínahya tónoexin tjan. Ó tsik'iná tjan la nchónhya chichaon tjacha tí inché tjan kixin xikaha tónohe tjan. ¹⁷ A ntá tí tjan tjarisoá a kjuankíxín tjan tinkáchréhe tjan tí ch'in Pablo la ko tí jeheni ntá t'èya tjan ntáchro tjan kixin:

—Tí sín í ch'ehé sín xra Dios nkaya nkajni la tjako sín ijnko ntja jína tsaáxin chojni.

¹⁸ Mé xikaha kjuich'e tjan itsjé yaon. Ntá kóchjinhin ch'in Pablo la nkátjá ch'an nixjehe ch'an tí nchakuen tí jínahya chóna tí jehe tjan, ntáchro ch'an kixin:

—Kjuachaxièn ihnjé Jesucristo tétuñhán kixin ts'axrjéxian tí jehe tjan —ichro ch'an.

† 15:38 Hechos 13.13

Ntá tuénxín ó k'uaxrjexín tí nchakuen tí jínahya tí jehe tjan.

¹⁹ Na ntá tí ìnché tí tjan a mé k'uíkon sín nkehe kónhen tjan la ó nohe sín kixin í tsjachahya sín chichaon kuènte tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinánkákjen sín sákjuiko sín tí tjejó tí síxreé ntasin tjeoan. ²⁰ Ntá kjuikaán sín ntaha tí tjejó tí sín juez la ntáχρο sín kixin:

—Tí sín í mé sín judío la imá síjtjé sín chjasénni. ²¹ Tjako sín tí nkehe kuènyhani tsohoheni la tóxrjénhyani sich'eni kixin jeheni mé chojni romanoni.

²² Kaín tí sín ntíha kónínkakonhen sín tí jehe sín. Ntá tí sín juez mé k'ueṭoan ts'axrjehe sín iké sín ntá ts'ekonxín sín nta sé. ²³ Ntá tió kjuixin k'uékón sín nchónhya ntá chr'áxénhen tí sín a ntøechiso ntá k'ueṭuénhen sín tí ch'ín t'ayakonhen ntøechiso kixin jína chrók'uayakonhen sín tí sín a. ²⁴ Ntá tí ch'ín t'ayakonhen ntøechiso mé k'uáyéhe ch'án kjuachaxin ntá chr'áxénhen ch'án tí sín a ijnko cuarto chríka ntøechiso kixin ts'axrjehya sín. Ntá chr'áxénhen ch'án toté sín tí nta tjejóxra la ko ch'ica ye.

²⁵ A ntá tió k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuènte Dios. La tí sín í so tjejóchjina mé tjejótinhin sín kixin xíkaha tjejóch'e sín tjejótsje sín. ²⁶ Ntá xrinahya tjiān kuínkí nonte la kjuínchekínkí kuénté tí xrankixín ntøechiso ntá tuénxín kaín tí ntója puerta mé xítjehe la ko k'uánótjen tí ch'ica cadena tsíchróntetoxín kaín tí sín tjejóchjina. ²⁷ Ntá tí ch'ín t'ayakonhen ntøechiso mé k'uàya ch'án. Ntá k'uíkon ch'án kixin síxítjehe tí ntója puerta ntøechiso a. Ntá kuakitsje ch'án ch'ica espada ntá chrók'óyán ch'án asén ch'án kixin kjuenkayáxin ch'án kixin ó kjuixin tsíkinká kaín tí sín síchjina, ichro ch'án. ²⁸ Ntá ch'ín Pablo k'uèya ch'án itsen ntáχρο ch'án kixin:

—Náhi kohya nkehe ch'ehé asán kixin kaín ní naxa tjejóni ntihyo —ichro ch'án.

²⁹ Ntá tí ch'ín t'ayakonhen ntøechiso kjuanchia kixin ts'ákjen xrohi ntá k'uíxénhen ch'án kuínká ch'án la síxránká ch'án chrakon ch'án ntá kjuítsínka ch'án toté tí ch'ín Pablo la ko tí ch'ín Silas. ³⁰ Ntá tuénxín kuakitsjexín ch'án sín ntíha ntá kjuanchankíhi ch'án sín kixin:

—¿Nkexrí chrókjuít'a kixin chrókuaána? —ichro ch'án.

³¹ Ntá kjuátjehe sín ntáχρο sín kixin:

—Títekávan Ìnchéni Jesucristo la tsaá jaha la ko tí sín tjejó ntøa.

³² Ntá kjuakøhe sín tí jehe ch'án a la ko kaín tí sín tjejó ntøe ch'án tí tan kuènte Ìnchéni. ³³ Na kjónté sítíe la tí hora a sákjuiko ch'án sín kjuínchek'íjmá ch'án tí tsíchrít'ò sín. Ntá tuénxín jehe ch'án la zá imó chrókkuakitsjeni sín ní? Náhi. Tsjijia tí jehe sín tsakitsjeni sín —ichro ch'án. ³⁴ Na ntá chr'èxin tí jehe ch'án sákjuiko sín ntøe ch'án. Ntá ntíha kjuanjon ch'án nkehe sine sín. Imá chéhe ch'án la ko kaín tí sín ntøe ch'án kixin ó kuítekaon sín Dios.

³⁵ Ntá kóyoon nchítjen ntá tí sín juez k'ueṭuénhen sín tí sín policia sátsjtsjehe sín tí ch'ín t'ayakonhen ntøechiso kixin chrókjuanjon ch'án kjuachaxin ts'axrje ch'ín Pablo la ko ch'ín Silas. ³⁶ Ntá tí ch'ín t'ayakonhen ntøechiso mé chénka ch'án tí ch'ín Pablo tí nkehe chrónka sín ntáχρο ch'án kixin:

—Tí sín juez a mé tsík'etøan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policia kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jje chóntani. Náhi. Kjónté la chr'áxénhenni sín ntøechiso. A ntá ijie la zá imó chrókkuakitsjeni sín ní? Náhi. Tsjijia tí jehe sín tsakitsjeni sín —ichro ch'án.

³⁸ Ntá tí sín policia mé sákjuíchénka sín tí sín juez nkehe ntáχρο tí sín tjejóchjina. Ntá imá chrakon sín kixin kuínhin sín kixin tí sín a mé chojni romano. ³⁹ A ntá sákjuí tí sín juez ntá chrónøehé sín tí ch'ín Pablo la ko ch'ín Silas kixin tsoínkakonhya sín kixin xíkaha kónhen sín ntá k'uaxrjexín sín ntíha ntá chrónò a sín a sátsjixin sín tí chjasin ntíha. ⁴⁰ Ntá ch'ín Pablo la ko ch'ín Silas tió k'uaxrjexín sín tí ntøechiso ntá kjuíji sín ntøe tí tjan Lidia. Ntá tió kjuixin sákjuítsjehe sín tí sín kichó ní la kjuínchechéhe sín ntá sákjuíxin sín ntíha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Silas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko njnko judío. ² A ntá ch'ín Pablo sákjuí ch'án njnko éxi kuénhen ch'án la jnkojnko yaon t'ok'éhe sín chjina íni semana ikjo ch'án tí jehe sín la chrónkaxín ch'án nkexrí ntáχρο xroon itén Dios. ³ Kjuako ch'án kixin tí nkexro Cristo mé t'ichjánxin its'en la ko chr'èxin tsoxechón ch'án ínaá. Ntáχρο ch'án kixin:

—Tí ch'ín Jesús a mé jeheni chrónkaxínni kixin tsinhínrá jahará mé Cristo tíha.

⁴ A ntá iso tí sín judío kuítekaon sín ntá k'uító sín tí ch'ín Pablo la ko tí ch'ín Silas. Ntá kjáxin kuítekaon itsjé tí sín griego xraxínkaon Dios a la ko kjáxin nchónhya chojni chjin tjeoan kuítekaon. ⁵ A ntá iso tí sín judío tinkáchónkíha Ìnchéni mé imá kóchjo sín ntá kójnkotséko sín

iso chojni jínahya ch'e, ch'ehya sín xra, ixri ntja. Ntá kaín sín k'uúixité sín la kjuínchexakonhen sín tí sín siín chjasén sín. Ntá itsjé sín k'uúixenhen sín ntöe ijnko ch'in it'in Jasón kjuéyá sín ch'in Pablo la ko ch'in Silas kixin tjinkaon sín sáchrókjuikohe sín tí sín a tí sín t'etöan. ⁶ A ntá k'uitjahya sín tí sín a ntá kjónté itsé sín tí ch'in Jasón la ko í so tí sín tinkáchónki Ìnchéni ntá kuínkánkákjen sín sákjuiko sín tí siín tí síxreé tí chjasin ntiha. Ntaha nínkaon sín k'uéya sín ntáchro sín kixin:

—Tí sín í mé kjuínchexakonhen chojni kuenté chjasintajni. La ntá ó kjuí sín chjasénni ntihi kjaxin. ⁷ La ntá tí ch'in Jasón a mé kjuanjon ch'an kjuachaxin kixin tí sín a mé ts'ejó sín ntöe ch'an. Kaín sín titekakonhya sín tí ley kuènte tí ch'in romano t'etöan. Ntáchro sín kixin itjen í jnko nkexro antsí má t'etöan, ntá tíha mé Jesús —ichro sín.

⁸ Ntá tíó kuínhin kaín tí sín tsíkójkotsé la ko tí síxreé ntá k'uúixité sín kónínkaon sín. ⁹ Ntá ch'in Jasón la ko tí sín tjejóko ch'an kjuenká sín ntá tí síxreé kuitöhe sákjuí sín.

Ch'in Pablo la ko ch'in Silas sákjuí sín chjasin Berea

¹⁰ Ntá tuénxín tí tie a tí sín kichó ní mé ichr'an sín ch'in Pablo la ko ch'in Silas kixin sátsji sín chjasin Berea. Ntá tíó kjuíji sín ntaha k'uúixenhen sín tí núnköé tí sín judío. ¹¹ A ntá tí sín judío ntiha la antsí má jina asén sín, ntá tí sín chjasin Tesalónica la náhi. Antsí má kóxrjínhin sín tsinhin sín tí itén Dios la jnkojnko yaon kjuínchekuáxin sín tí xroon chóna itén Dios kixin tsoñohe sín á chaxín ntoá xíkaha tí ntáchro tí sín a. ¹² Méxra nchónhya tí jehe sín kuítekaon sín la ko kjaxin nchónhya tí chojni chjin griego tjetöan mé kuítekaon la ko kjaxin tí chojni ntoa. ¹³ A ntá tí sín judío chjasin Tesalónica kónohe sín kixin ch'in Pablo mé kjuakoxin itén Dios chjasin Berea inaá. Ntá sákjuí sín ntiha a ntá kjuínchekónínkaon tí sín a. ¹⁴ A ntá tí sín kichó ní tinkáchónki Ìnchéni ichr'an sín tí ch'in Pablo sátsji nó chrínta ntayaon. A ntá ch'in Silas la ko ch'in Timoteo naxá kuitöhe sín tí chjasin Berea. ¹⁵ Ntá iso tí sín ntiha sákjuiko sín tí ch'in Pablo la kjuíji sín tí sín chjasin Atenas. Ntá kjan sín chjasén sín kixin k'uétöan ch'in Pablo kixin tsochrónka sín kixin tjoka chrókóxakonhen tí ch'in Silas la ko tí ch'in Timoteo tsiji sín ntiha tsoxéta sín ch'an.

Ch'in Pablo itjen chjasin Atenas

¹⁶ Ntá nachrohe kjuák'echónhen ch'in Pablo kixin itsji tí ch'in Silas la ko tí ch'in Timoteo chjasin Atenas ntá imá k'uává asén ch'an kixin k'uúikon ch'an kixin tí chjasin ntiha sín nchónhya tí nkehe tsíkangya. ¹⁷ Ntá tí núnko ntiha kjuaköhe ch'an iso sín judío la ko iso tí chojni xraxínkaon Dios. La kaín yaon ntasin kjuák'e ch'an kjuaköexin ch'an tí chojni siín ntiha. ¹⁸ La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankixin nixjehé sín tí ch'in Pablo. Iso sín ntáchro sín kixin:

—¿Nkekuènté kixin ánta tjenixja tí nkexro a?

La í so sín ntáchro sín kixin:

—Méxra tjenixja ch'an kuènte í jnko dios.

Mé xíkaha ichro sín kixin kjuako ch'in Pablo tí tán jina kuènte Jesús la ko kjuako ch'an kixin Jesús kjónté k'uén ntá xechón. ¹⁹ Ntá sákjuiko sín ch'in Pablo ijnko tjo it'in Areópago. Ntiha mé kuènenhén sín tójkotsé sín kixin tjenkayáxixin sín. Ntá nixjehé sín tí ch'in Pablo, ntáchro sín kixin:

—Tjinkaonni tsochrónka tí nkehe nixin kjuíkoa. ²⁰ Itsjé tí nkehe óké tjetjúka la tjinkaonni tsoñohe ní nkehe t'axrjéxín kaín tíha —ichro sín.

²¹ Ntá kaín tí sín chjasin Atenas la ko tí sín tsíkixín óké tjejó ntiha mé tóxrjénhya sín í jnko xra, jehí tóxrjínhin sín chrókuínhin sín la ko chrónixja sín ijnko nkehe nixin.

²² Ntá ch'in Pablo k'uúinkatjen ch'an kjuák'exín toté ch'an tí siín tí jehe sín chrítaón tí Tjo Areópago. Ntá ntáchro ch'an kixin:

—Jahará tjejórá chjasin Atenas tinhínrá. Janhan ó k'uúikaon kixin jahará la itsjé dios tinkachónkirá. ²³ Ntá tí kjuak'é ntiha k'uájia la k'uúikaon itsjé tí nketí tjásixínrá culto ntá k'uitja ijnko altar ts'inixín kixin: “Ntihi xraxínkakonxínni ijnko Dios naxá chónhyani”. Méxra tí Dios xráxínkáonrá kjónté naxá chonhyará mé tí Dios a mé tjákoohará.

²⁴ Tí Dios mé kjuích'éna ch'an chjasintajni la ko kaín nkehe siín chjasintajni. Jehe ch'an mé inché nkájni la ko chjasintajni. La tjejenhya ch'an ijnko núnko tsíkijh'éanaxín chojni tja. ²⁵ La t'ichjánxienhya ch'an kixin chojni chrókjuinkítsa tí jehe ch'an kixin jehe ch'an mé chjéhe kjuachón kaín chojni la ko tjanjon ch'an xrintö la ko kaín nkehe siín.

²⁶ Kaín tí nación k'uaxrjénixín jnkoköá chojni kixin chrók'uejó sín nkúixín chjasintajni. Kjaxin chrónka Dios nkesá la ko nketí ts'ejó chojni. ²⁷ Méxra jeheni t'ichjánxín tsjeyáni Dios kixin ntá tsienxínni nkexrí ts'itjani ch'an. Jehya imá ikjín itjen ch'an, chjino tí tjejóni itjen ch'an. ²⁸ Jehe ch'an tjejóchónxinni ch'an la ko nchekinkíni ch'an la jehe ch'an t'ayakonheni ch'an. Mé xíkaha tsintáchro jnko ch'in chjasánrá ósé kixin: “Jeheni mé naxá kjéhya Dios.” ²⁹ Jeheni mé naxá kjéhyani Dios méxra xitjahya tsjenkayáxinni kixin sich'énani Dios ch'ica oro

o ch'ica plata o xro k'ixin éxi tsikjenkayáxin chojni k'ixin sich'ena sín dios kuènte sín. ³⁰ Senó Dios kónínkakhonhya ch'án k'ixin ó nohe ch'án k'ixin naḡa chónhya sín ch'án. Ntá ijie t'etuenhen Dios kaín xín chojni síin chjasintajni tsokjan sín la tsinkáchónki sín tí jehe ch'án. ³¹ Dios tsikjeyá ijnko yaon sinchekitoxén ijie chojni chjasintajni. Tsikjeyá ch'án ijnko chojni la kjuakoxín kaín kjuachaxin k'ixin tí nkexro kjónté tsík'en la xechón inaá —ichro ch'ín Pablo.

³² Na ntá tió kuínhin sín k'ixin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín k'ixin:

—Chr'éxin tsinhinni inaá tí nkehe ntáchrúa —ichro sín.

³³ Ntá ch'ín Pablo kuítqhe ch'án tí jehe sín. ³⁴ Na ntá iso sín kjuichréhe sín ch'ín Pablo la kjuankixin tinkáchónki sín Ìnchéni. Ijnko tí sín tinkáchónki a mé it'in ch'án Dionisio mé ijnko tí síxreé kjuínchekitoxén ijie chojni chritaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuank'ixin sín tinkáchónki sín Ìnchéni.

18

Sákjuí ch'ín Pablo chjasin Corinto

¹ Ntá kjuixin tíha ntá ch'ín Pablo sákjuíxin ch'án chjasin Atenas la sákjuí ch'án chjasin Corinto. ² Ntíha mé xéta ch'án ijnko ch'ín judío it'in Aquila. Jehe ch'án mé tsíkjiñin ch'án estado Ponto la séhya jehe ch'án la ko ichjién ch'án Priscila mé kjuixín sín nación Italia k'ixin t'ichjánxin ts'axrjexín sín ntíha k'ixin tí ch'ín t'etqan mé it'in Claudio k'uetqan ch'án k'ixin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín. ³ Jnkokón xra ch'e sín la ko jehe ch'án, ch'ena sín kamanta t'óna nchia. Méxra ntá ntaó kuítqeko kichó sín k'ixin jnkokoá sich'e sín tí xra a. ⁴ Ntá jnkojnko tí yaon t'ok'éhe sín sákjuí ch'ín Pablo tí njnko nixjehe ch'án tí sín judío la ko tí sín jehya judío k'ixin tjnkaon ch'án k'ixin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuixín sín estado Macedonia ntá ch'ín Pablo kjuák'e xra ó kjuako ch'án itén Dios k'ixin tsonhe tí sín judío k'ixin Jesús mé tí nkexro Cristo. ⁶ Ntá tí sín judío mé kjuank'ixin kónínkakhonhen sín tí ch'ín Pablo la imá k'uántaxinhín sín ch'án. Ntá jehe ch'án k'ótsjénka ch'án iké ch'án k'ixin kjuakoxín ch'án k'ixin xíkaha tsjasóte sín. Ntá ntáchro ch'án k'ixin:

—A ntá ijie la jahará kjuéyará tí jie ts'itjáyaxínra. A ntá janhan la í chontahya jie k'ixin ó kjuákohará tí tán jina, a ntá kuítékákhonhyará. A ntá ijie la ichá jina sátsjia tsjákqha tí sín jehya judío —ichro ch'án.

⁷ Ntá k'uaxrjexín ch'án njnko ntá sákjuí ch'án ntqje ijnko chojni mé it'in Justo mé jehe ch'án xraxinkaon ch'án Dios. Ntqje ch'án mé chjinaxón njnko. ⁸ Ntá ch'ín Crispo, ijnko nkexro t'etqan kuènte njnko, la ko kaín tí sín tjejó ntqje ch'án, mé kjuank'ixin sín kuítekaon sín Ìnchéni. Kjaxin itsjé tí sín tjejó chjasin Corinto mé kuínhin sín tí tan la ntá kjuank'ixin sín kuítekaon sín Ìnchéni la kuikite sín. ⁹ Ntá ijnko tie titàya k'uíquèn ch'ín Pablo Ìnchéni nixjehe ch'án ntáchro k'ixin:

—Chrakonhya tjákua itan kuèntana. Tjítqehya tsqchronka ¹⁰ k'ixin janhan tjejóko kichó ní k'ixin ninkexró kohya nkehe sit'aha. K'ixin janhan la chonta itsjé chojni tí chjasin ntíhi tinkáchónki tí janhan.

¹¹ Méxra ch'ín Pablo mé kuítqhe ch'án ijnko nánó ko t'q tiha chjasin Corinto, kjuakqhe ch'án sín itén Dios.

¹² A ntá tí yaon k'uetqan ch'ín Galión estado Acaya, ntá itsjé tí sín judío kónínkakhonhen sín tí ch'ín Pablo. Ntá itsé sín ch'án sákjuíko sín ch'án tí tjejó tí sín t'etqan. ¹³ A ntá ntáche sín tí ch'ín t'etqan k'ixin:

—A ntá tí nkexro i xri ch'án tjachroe ch'án chojni k'ixin ókjé nkexrí chrókuínkáchónki sín Dios la ko tsitekakhonhya sín tí nkehe t'etqan tí ley.

¹⁴ Na ntá tjnkaon ch'ín Pablo chrónixja, ntá ch'ín Galión ntáche ch'án tí sín judío k'ixin:

—Tí chaxin ijnko jie jie kjuasin tí ch'ín i ntá kjónté chrókuínhan tí nkehe ntáchrorá jahará judiorá. ¹⁵ A ntá jehí tjanjonxinra tí nkehe nixjará la ko ihnjé chojni la ko tí ley tinkachónkirá. Méxra jahorá chrókuínchekitoxénra tíha k'ixin janhan tjnkakonhya ts'óna juej sintakitoxian kuènte tí nkehe a —ichro ch'án.

¹⁶ Ntá k'uetqan ch'án k'ixin sátsjixín sín ntíha. ¹⁷ Ntá tí sín griego la kónínkaon sín la itsé sín tí ch'ín Sóstenes tí ch'ín t'etqan kuènte tí njnko judío, la ntaó kjuatexín sín ch'án. Jehe ch'ín Galión a la mé kjónté k'uíkon ch'án la ántqsen ch'án.

Ch'ín Pablo xíkjan ch'án chjasin Antioquia ntá sákjuí ch'án nixin viaje

¹⁸ A ntá ch'ín Pablo kuítqhe ch'án chjasin Corinto itsjé yaon ntá nixjehe ch'án tí sín kichó ní ntíha ntá k'uixenhen ch'án ntabárcq sákjuí ch'án nó estado Siria a sákjuíko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naḡa k'uixenhya ch'án ntabárcq inaá

la ikjín ch'án mòlqé kixin xikaha kjuakoxin ch'án kixin kjuínchexiteyá ch'án tí nkehe chrónka ch'án. ¹⁹ Ntá tió kjuíji sín tí chjasin Éfeso ntá kuitqhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko nínko la ikjo ch'án tí sín judío tsíkójkotsé ntiha. ²⁰ Ntá jehe sín chrónòa sín kixin chrókuitqhe ch'án isé ntiha, kjánchó jehe ch'án la chrohya ch'án. ²¹ Ntá tuénxín nixjehe ch'án sín ntáchro ch'án kixin:

—T'ichjánxin tsjak'e chjasin Jerusalén tí yaon kia itsi. Kjánchó tsokjan inaá tsotsjahá tí jahará tí naxá tjínkaon Dios —ichro ch'án.

Ntá kuitqhe ch'án sín ntá k'uixenhen ch'án ntabárcó sákjuíxin ch'án chjasin Éfeso. ²² Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehe ch'án tí sín tinkáchónki Ìnchéni ntiha. Ntá tuénxín xikjan ch'án chjasin Antioquia. ²³ Ntá kuitqhe ch'án ntiha itsjé yaon ntá xíkji ch'án inaá ntá xik'atsínka ch'án itsjé chjasin estado Galacia la ko estado Frigia la kjuínchexéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

²⁴ Ntá tí yaon a mé ijnko ch'ín judío it'ín Apolos ikui chjasin Éfeso mé tsíkixín ch'án chjasin Alejandría. Jehe ch'án mé ijnko nkexro antsí nohe chrónka kixin chóxín ch'án xroon itén Dios. ²⁵ Jehe ch'án ó xrakohe ch'án ntje Ìnchéni ntá imá tóxrjínhín ch'án nixja ch'án la ko tsjako jina kuènte ch'ín Jesús. Kjánchó jehó nohe ch'án nkexrí kuíkite chojni ch'ín Juan. ²⁶ A ntá ch'ín Apolos kjuák'e ch'án kjuako ch'án tí nínko la chrakonhya ch'án. Ntá tió kuínhín tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohe sín ch'án tí nkehe naxá noehya ch'án kuènte ntje Dios. ²⁷ Ntá tjínkaon ch'ín Apolos sátsji ch'án estado Acaya. Ntá tí sín kíchó ni kjuínkítsa sín ch'án la ikjín sín ijnko xroon chr'énhen sín tí sín tinkáchónki Ìnchéni tjejó ntiha kixin jina tsjanjon sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakohe ch'án tí sín tsíkinkítsa Dios tsíkitekaon sín ch'án. ²⁸ Ntá kjuakoxín ch'án kaín chojni kixin ntoáhya ch'e tí sín judío, la xitjahya tsontáchro sín náhi. Kjuakohe ch'án sín kixin tí xroon itén Dios chrónka kixin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naxá itjen ch'ín Apolos tí chjasin Corinto ntá ch'ín Pablo k'uatásínka ch'án nchónhya chjasin chrík'á jna la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios. ² Ntá kjuanchankíhi ch'án sín kixin:

—¿Á k'uayéhérá Nchakuen Dios tió kuinkáchónkirá Ìnchéni? —ichro ch'án.

Ntá kjuátqhe sín kixin:

—Náhi, kíenhyani á tjen Nchakuen Dios —ichro sín.

³ Ntá kjuanchankí ch'ín Pablo kixin:

—¿Nkexro kjuachaxién kuíkitiará? —ichro ch'án.

Ntá kjuátqhe sín kixin:

—Éxí kjuako ch'ín Juan kuíkiteni —ichro sín.

⁴ Ntá ntáchro ch'ín Pablo kixin:

—Ch'ín Juan mé kuíkite ch'án chojni kixin chrókjan sín chrókuinkáchónki sín Dios la ko kjuako ch'án kixin chrókuitekaon sín tí nkexro itsi chr'éxin. Tíha mé Jesús, tí Cristo —ichro ch'án.

⁵ Ntá kuínhín sín xikaha ntá kuíkite sín kjuachaxién ihnjé Ìnchéni Jesús. ⁶ A ntá ch'ín Pablo kjuák'etja itja ch'án chrítaón ikja sín ntá ikui Nchakuen Dios k'uáyéhe sín ntá kjuankixin sín nixja sín itsjé nkiva ókje la ko kjuankixin sín kjuako sín tí nkehe kjuanjon Dios. ⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án nínko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuènte Dios. ⁹ A ntá iso sín la kjónté la imá icha asén sín tjínkakonhya sín tsinkáchónki Ìnchéni. Ntá imá t'ántaxínhín sín tí tan jina kuènte Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijnko escuela it'ín Tiranno ntaha kjuakoxín ch'án kaín yaon. ¹⁰ Mé xikaha kjuák'e ch'án kjuako ch'án iyó nánó, ntá kaín tí sín k'uéjé ntiha estado Asia mé kuínhín sín itén Ìnchéni Jesús, mé tí sín judío la ko kjaxin tí sín jehya judío. ¹¹ Ntá Dios antsí má kjuakoxín kjuaxroan jíé kixin tí nixja ch'ín Pablo. ¹² Ntá itsjé chojni kjuíkjo sín pañitqé sín la ko iké sín kuákoxín ch'ín Pablo ntá sákjuíko sín kjuínchekakóxin sín tí sín níhi ntá kuitqhe sín jina la ko kjaxin nchakuen tí jínahya k'uaxrjéxín tí jehe sín.

¹³ **A** ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehé sín chojni mé tjinkaon sín tí kjuachaxiэн ihñié Jesús. La ntá ntáche sín tí nchakuen tí jínahya kixin:

—Kjuachaxiэн ihñié tí Jesús tjako tí ch'ín Pablo t'etqanxinni kixin jaha nchakuen jínahya sátjixian ntihi —ichro sín.

¹⁴ Mé xikaha k'uékjich'e tí yato xjeen ijnko ch'ín judío it'in Esceva mé ijnko nchat'á t'etqan.

¹⁵ Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátehe ntáchro kixin:

—Chóxinni nkexro ch'ín Jesús la ko ó noheni nkexro ch'ín Pablo. **A** ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'ín chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án kjuincheníhi ch'án kaín sín la imá kjoté sín. Ntá k'uaxrxéjin sín ntqé sín tjóchin sín la ko síchrít'q cuérpóé sín. ¹⁷ Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsikónhen la imá chrakon sín. Imá jié tí kjuachaxin ihñié Inchéni Jesús, ichro sín.

¹⁸ Kjaxin itsjé tí sín tinkáchónki Inchéni mé kjuichrónka sín kixin tí ósé k'uékjich'e sín nchónhya nkehe jínahya. ¹⁹ Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exin sín xra ntá kjuaka sín tí libro a la k'uikon nchónhya chojni. Ntá kuákjixin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín. ²⁰ Ntá tí itén Inchéni sitinkák'ánkí la tjakoxin kixin chaxin chóna kjuachaxin.

²¹ Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá nataha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji sín chjasin Jerusalén ntá kjaxin t'ichjándin sátsji ch'án chjasin Roma. ²² Ntá ichr'án ch'án iyó tí sín tjinkítsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxá kuítqhe ch'án estado Asia iso yaon.

Kóninkaon k'uixité chojni chjasin Éfeso

²³ Ntá itsjé chojni chjasin Éfeso kóninkaon sín la k'uixité sín kixin kóxrjienhya sín tí itén Inchéni. ²⁴ Kixin ntiha mé itjen ijnko ch'ín it'in ch'án Demetrio. Kjuich'éna ch'án nkehe chica plata tsjehe éxí ninko kuénte tí dios Diana la nchónhya chichaon kjuacha ch'án la ko tí sín kjuich'eko ch'án xra. ²⁵ Ntá kójnkotséko sín í so sín jnkokón tí xra ch'e sín. Ntá ntáchro ch'án kixin:

—Jahará nohará kixin tí xra ch'eni la tjachani jina la náxrjón tjejóni. ²⁶ Kjánchó ó k'uikonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsikjangya mé jehya Dios. Kjánchó jehya chjasin Éfeso ó. Náhí, nkuixín estado Asia kuítekaon chojni. ²⁷ Imá tóxakonhenni kixin tí xra ch'eni ts'itjáyán la kjaxin tóxakonhenni tsontáchro sín kixin chónkó tí ninkqé tí dios Diana imá jié la ko ts'itjáyán tí kjuachaxin kuénte tjan. Ntá í tsitekakonhya sín tí kjuachaxin kuénte tjan nkuixín estado Asia la ko kuénté chjasintajni —ichro ch'ín Demetrio.

²⁸ Ntá tí kuínhin sín xikaha la imá kóninkaon sín ntá k'uèya sín ntáchro sín kixin:

—Ts'itjáyanyha tí dios Diana kuénte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuch'e sín kixin kóninkakonhen sín tí ch'ín Gayo la ko tí ch'ín Aristarco mé iyó sín tsikjixin sín Macedonia. Ntá kuínkánkájen sín kuikao sín tí nchia jié tójnkotséxin sín xráxin. ³⁰ Ntá ch'ín Pablo tjinkaon ch'án chrók'uixenhen ch'án tí nchia kixin tsonixjehe ch'án sín, a ntá tí sín tinkáchónki Inchéni mé chrohya sín kixin ts'ixenhen ch'án tí nchia a. ³¹ Kjaxin iso tí síxreé kuénte tí estado Asia mé chóxin sín ch'ín Pablo, ntá k'uetoan sín kixin tsochéna chojni tí ch'ín Pablo kixin chrókjuiatéha ch'án tí síin sín ntiha. ³² **A** ntá iso tí sín tsikójnoktsé ntáchro sín ijnko nkehe, la í so sín ntáchro sín ókjé nkehe kixin nínkaon sín. La itsjé sín la í noehya sín nkehe xra tsikójnoktséxin sín kixin nínkaon sín. ³³ La iso sín judío chénka sín ijnko ch'ín it'in Alejandro nkerí xra kjuixín sín kixin tsonixja ch'án. Ntá kjuák'e ch'án jnkosiné ntá kjuakoxin ch'án itja ch'án kixin tsotáni sín ntá tsonixjixin ch'án tí sín judío tsinhin kaín chojni. ³⁴ Ntá tíó kjuatsqan tí sín tsikójnoktsé kixin kjaxin tí ch'ín a mé judío ch'án ntá kaín sín k'oyako sín chjina iyó hora ntáchro sín kixin:

—Ts'itjáyanyha tí dios Diana kuénte tí sín chjasin Éfeso —ichro sín.

³⁵ Ntá tí ch'ín secretario kuénte tí sín chjasin ntiha mé k'uetoan ch'án tsotáni sín. Ntá ntáchro ch'án kixin:

—Chojni chjasén Éfeso tinhínrá. Kuénté chjasintajni nohe sín kixin tí sín chjasin ntihi mé t'ayakonhen sín tí ninko kuénte tí dios Diana. Tí retrato kuénte tjan mé tsikjixin nkaya nkajni. ³⁶ Kohya nkexro tsontáchro kixin chaxínhya tíha. Méxra tánirá. Tjenkayáxinrá jina nkehe chrókjuch'erá. ³⁷ Jahará kjuikoará tí sín a ntihi la kjánchó k'uántaxienhya sín

tí n̄n̄kogeni la ko k'uántaxiēn̄hya sín tí tjan santo kuènténi. ³⁸ Méxra ch'ín Demetrio la ko tí sín ch'eko ch'án xra la tí tjanchia sín jiē jnkojin nkexro la sín juez sinchekit'ogéxín. Méxra tsochrónka sín tí tjen tí ch'ín juez kíxín jnkojnko sín la chrókuit'ogéxín tí jiē chón̄ta sín. ³⁹ Ntá tí sín ijnko nkehe tsjanchará ntá t'ichjānx̄ín tsojnkotsérá la ntóá chrókuit'ogéxín. ⁴⁰ Tóxakohenni kíxín kjá tí sín t'et'ogān ts'ekani sín jiē kíxín jehya jína k'uúixitēni kónínkaonni. Nohyani nkehe tsjateheni kíxín tí tsjanhankí sín nkeuēntē k'uúixitēni, tsixro sín.

⁴¹ La ntá k'uet'ogān ch'án kíxín sátsji sín kíxín ó kjuixín tí kójnkotsé sín.

20

Sátsji ch'ín Pablo estado Macedonia la ko estado Grecia

¹ Ntá tí kjuixín k'uúixité sín, a ntá ch'ín Pablo k'uúiyēhē kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jína, ntá nixjēhē kíchó sín ntá sáxíkji ch'án nó estado Macedonia. ² Ntá nkuúxín k'uúatsínka ch'án la kjuínchechéhē ch'án tí sín tinkáchónki Ìnchéni kíxín tí nkehe nixjā ch'án. Ntá chr'éxín kjuúji ch'án estado Grecia. ³ Ntiha kuit'oghe ch'án iní nitjó ntá chrók'uíxenhēn ch'án ijnko ntabárcō ntá sáchrókjui ch'án estado Siria. Ntá kónohe ch'án kíxín iso sín judío nínkakohēn sín tí jehe ch'án a ntá kjuenkayáxín ch'án tsojkanx̄ín ch'án tóté ch'án inaá ts'atsínka ch'án Macedonia. ⁴ Ntá tí sín sákjuiko ch'ín Pablo mé tí ch'ín Sópater mé jehe ch'án tsíkijx̄ín ch'án chjasin Berea, la ko kjaxín ch'ín Aristarco, la ko ch'ín Segundo. Jehe sín mé tsíkijx̄ín sín chjasin Tesalónica, la ko ch'ín Gayo tsíkijx̄ín ch'án chjasin Derbe, la ko kjaxín sákjuiko ch'án ch'ín Timoteo, la ko ch'ín Tiquico, la ko ch'ín Trófimo, mé tsíkijx̄ín sín estado Asia. ⁵ Ntá tí sín kíchó ni a mé kuitónxín sín ntjā ntá tjejóchónhēn sín tí jeheni chjasin Troas. ⁶ Kjuixín k'uúatsínka tí kia tió kjóne sín niotjā chón̄tahya tí xroqān t'ánkíxín niotjā, ntá k'uúixenhēni ijnko ntabárcō k'uaxrjex̄inni Filipos ntá k'uúatsínka in'ó yaon ntá kjuújini chjasin Troas ntá ntiha xétani tí sín kuitónxín sín ntjā. A ntá ntiha kuit'ogēni yato yaon.

Ch'ín Pablo sákjuí chjasin Troas

⁷ Ntá tí yaon xránkixix̄ín semana ntá kójnkotséni kíxín tsochrít'og niotjā tsoxraxinkakonx̄inni Ìnchéni. Ntá ch'ín Pablo nixjēhē ch'án kaín tí sín tinkáchónki Ìnchéni la tjinkaon ch'án sátsjixín ch'án ntiha tí yaon chr'éxín, ntá antsi má sé tí nkehe chrónka ch'án la naxā tjenixjā ch'án k'áxrótjen. ⁸ Tí tsíkójnkotsé sín a mé ijnko piso noi la ntiha mé siche nchónhya xrohi. ⁹ Ntá ntiha itjen ijnko ch'ín ntasoá it'ín ch'án Eutico mé tjetjāxín ch'án chrítaón ventana. Ntá tí ch'ín Pablo imá sé nixjā ch'án ntá tí ch'ín ntasoá mé tsíkíhi ch'án kotáchrin. A ntá xrināhya tsík'ajua ch'án ntá tsík'anótjēnx̄ín ch'án tí ventana tí nixín piso ntiha ntá sákjuíkjātsēn sín ch'án la ó tsíkijx̄ín tsík'en ch'án. ¹⁰ Ntá ch'ín Pablo k'uúinkajin ch'án ntá kjuútsínkaták'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín kíchó ni kíxín:

—Chrakonhyará tsík'enhya ch'án, tjechón ch'án —ichro ch'an.

¹¹ Ntá ch'ín Pablo k'uúit'ótjen ch'án inaá tí k'uúinkajinx̄ín ch'án kíxín ntiha ts'óxiqayēhē ch'án niotjā sine sín tsoxraxinkakonx̄ín sín Ìnchéni. Ntá naxā tjenixjā ch'án hasta k'uúinkaséyan a ntá sákjuí ch'án. ¹² Ntá tí ch'ín ntasoá tsík'anótjen sákjuiko sín la tjechón ch'án kohya nkehe xēhe ch'án ntá kaín sín imá kóchéhē sín.

Sákjuúxín ch'ín Pablo chjasin Troas kjuúji ch'án chjasin Mileto

¹³ Jeheni mé kuitónx̄inni ntjā sáoxín la k'uúixenhēni ijnko ntabárcō sákjuíni nó chjasin Asón kíxín ntiha tsoxetani ch'ín Pablo éxi tsintáchro ch'án kíxín tjinkaon ch'án sátsjixín ch'án tóté ch'án ntiha. ¹⁴ Ntá ó xetani tí jehe ch'án chjasin Asón ntá k'uúixenhēn ch'án tí ntabárcō kjaxín ch'án ntá sákjuíkoni ch'án nó chjasin Mitilene. ¹⁵ Ntá tí sákjuix̄inni ntiha ntá tí yaon chr'éxín ntá k'uúatsínkani estado Quío ntá tí yaon chr'éxín kjuújini chjasin Samos. Ntá inaá k'uúixenhēni tí ntabárcō ntá sákjuíni chjasin Trogilio ntá ntiha k'ok'éheni. Ntá xík'ixenhēni ntabárcō inaá ntá tí yaon chr'éxín kjuújini chjasin Mileto. ¹⁶ Mé xíkaha kjuúich'eni kíxín ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kíxín tjinkaon ch'án tjoka chrókjuui ch'án chjasin Jerusalén kíxín ntiha chrókjuak'e ch'án tí yaon Pentecostés, ichro ch'án.

Nixjēhē ch'ín Pablo tí sín t'etuenhēn n̄n̄ko chjasin Éfeso

¹⁷ Tí itjen ch'ín Pablo tí chjasin Mileto k'uúiyēhē ch'án tí sín t'etuenhēn tí n̄n̄ko chjasin Éfeso. ¹⁸ Ntá tió kui sín ntá ntáchro ch'án kíxín:

—Tí jahará la ó nohará nkexrí kjuak'é la ko kjuákua desde tí yaon xránkixix̄ín k'uúinka estado Asia. ¹⁹ Ó nohará kíxín kaín tí yaon k'uéjóni la kaín asenná kjuúit'ahā xra Ìnchéni la kjuúintahnkehya. Imá tsjanka kíxín nchónhya kjuasótēna kíxín tjinkaon tí sín judío chrók'óyāna sín. ²⁰ Janhan la kuit'ogāhya kjuákua kaín tí nkehe jína t'ichjānx̄ín tsohohará.

Mé xikaha kjuákua tió kójnksotserá la ko xikaha kjuíkjàkuaxian jnkojnko ntóará. ²¹ Kjuáqoha kaín chojni judío la ko kaín chojni jehya judío kixin t'ichjánxin tsitqhe sín tí jie tjasin sín la ko tsiteakon sín Dios la ko Ìnchéni Jesucristo. ²² Ntá ije sátsjijá chjasin Jerusalén kixin Nchakuen Dios k'ueṭuanna la í nonahya nkehe tsonna ntiha. ²³ Ntá jehó nõna kixin kaín chjasin ts'atsínka la chrónka Nchakuen Dios kixin tsjak'echjinana la ko tsjasótena. ²⁴ Kaín tíha la tózakonahya. Kjóté chrókjuasótexián la ninkehó sínkíhyana la janhan la chàṅa kixin tí xra chonta la chrókjuintaxin la chrókjuintaxiteyá tí xra chjina Ìnchéni Jesús kixin tsjúka tí tan jina nkexrí tjuéhe Dios chojni.

²⁵ Ntá jie ó nõna kixin tí jahará kjuákoará kjuachaxin kuente Dios la nijnkora ts'ikonharya tí janhan inaá. ²⁶ Méxra tinhínra ije kixin í jehya jiēna kixin jnkojínra chrók'uitjáyánra. ²⁷ Kixin ó kjuákua kaín tí nkehe tjinkaon Dios kixin tsonohará la í t'itjáyánhya ninkehó. ²⁸ Méxra xráxinkáonrá ts'ejorá jnkojína la ts'ayakonhénra kaín tí sín tinkáchónki Ìnchéni kixin Nchakuen Dios mé tjáhará tí xra pastor kixin ts'ayakonhénra tí sín kuente tí ninqoe ch'an k'ueṇaxín ch'an tí ijnjé ch'an. ²⁹ Ó nõna tió sátsjia ntá itsji í so chojni éxi kolóbo jiehe tsotjinkaon sinchek'itjáyán tí sín tinkáchónki Ìnchéni. ³⁰ La ntá kjóté jahará la isorá tjeorá ntihi tsjankixínra tsjákorá kjuach'ia chrínki chrókjuákoherá kíchuára tí nkehe chaxín. A ntá tí sín tinkáchónki tsjichréhe sín tí nkehe ntoáhya. ³¹ Méxra chrórxáxinkáonrá kixin chjina iní nánó kjuak'é kjuákoará nchakotjin la ko tie la kjuṭoahya kjuintaxraxinkávan hasta kjuíncheníhi asenná nixjahará jnkojnko tí jahará.

³² A ntá jie la jahará kíchó ní tjetjácháha Dios kixin t'ayakuanxínra ch'an tí itén ch'an kixin tjuhará ch'an. Jehé ch'an ímá chóna kjuachaxin tsjinkitsará ntá ts'ayéherá kaín tí nkehe tjinkaon ch'an tsochjéhe ch'an kaín tí chojni tsíkótjóá. ³³ Janhan mé kjuakéhya asenná chjichakoen chojni ó iké jnkojín chojni. ³⁴ Náhi. Jahará ó nohará jina kixin janhan na mé tjaná kjuí'axián xra kjuácha k'ueṇaxín tí nkehe t'ichjánxinna la ko kjaxín tí nkehe t'ichjánxinhin tí chojni k'uejókian. ³⁵ Méxra kjuákuaixínra xikaha s'ich'erá xra kixin jina tsjinkitsará tí chojni chónahya. Xráxinkáonrá kixin tsintácho Ìnchéni Jesús kixin: "Antsí tsóchéheni kixin tí nkehe chrókjuanjoni, a ntá kánhyó tsóchéheni kixin tí nkehe chrók'uyéheni."

³⁶ Ntá kjuixín ntácho ch'in Pablo xikaha ntá jehé ch'an la ko kaín sín k'uejóxín toh'in sín ntá nixjehe sín Dios. ³⁷ Ntá kaín sín tsjánka sín la ko kjóá sín ch'an la ko tséhe sín tja ch'an. ³⁸ Imá k'uává sín kixin chrónka ch'an kixin í ts'ikonhaya sín ch'an inaá. Ntá sákjuikotoxin sín ch'an nó tí tjen tí ntabárcó sátsjiko ch'an.

21

Sákjuí tí ch'in Pablo nó chjasin Jerusalén

¹ A ntá tió kuitqheni tí sín kíchó ní ntá k'uíxenhenni ntabárcó la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara. ² Tí chjasin Pátara la mé ntiha k'uitjani ijnko ntabárcó sátsji nó estado Fenicia. Ntá k'uíxenhenni tí ntabárcó a ntá sákjuíni. ³ Ntá tió k'uaútsínkani la k'uíkonni tí nonte Chipre itjani ikjon kuitqhe ntá k'uaútsínkani estado Siria. Ntá tí ntabárcó la ts'atsínka tsitqhe tí nkehe tjínká tí puerto chjasin Tiro, la jeheni la nachrohe sákjuíni tí chjasin a. ⁴ Ntá ntiha k'uitjani tí sín tinkáchónki Ìnchéni a ntá ntiha kuitohékoni sín yato yaon. A ntá jehé sín mé kjuínchenohe sín Nchakuen Dios chénka sín tí ch'in Pablo kixin sáchrókjuíhya ch'an chjasin Jerusalén. ⁵ Ntá kjuixín k'uaútsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuikotoxínni tí k'uaxrjentani ikon chjasin ntá sákjuíni chrinta ntayaon. K'uejóxinni toh'inni nixjeheni Dios ⁶ ntá tuénxín nixjeheni sín jnkojína ntá tséhe tja kíchó ní. Ntá k'uíxenhenni tí ntabárcó, a ntá jehé sín ikjan sín ntqoe sín.

⁷ Ntahó chjasin Tiro kjuixixín tí k'uíxenhenni tí ntabárcó ntá kjuíjini chjasin Tolemaida. Ntiha kjuínixjeheni tí sín kíchó ní tinkáchónki Ìnchéni. Ntá ntiha k'uejókoni sín ijnko yaon. ⁸ Ntá tí yaon chr'éxin sákjuíxinni ntiha ntá kjuíjini chjasin Cesarea. Ntá ntiha sákjuíni ntqoe ch'in Felipe, ijnko ch'in kjaxín tjako itén Ìnchéni. Jehé ch'an mé ijnko tí sín yatoxín tjinkitsa tí sín kjueyá Ìnchéni. A ntá jeheni mé kuitqheni ntiha. ⁹ Tí ch'in Felipe a mé chóna ch'an nóo xjeen ch'an chjin naxa tóteqehya sín. Tí xjeen ch'an a mé chrónkaxín sín tí itén Dios. ¹⁰ Ntá ntaha k'uejókoni sín itsjé yaon ntá ikjui ijnko ch'in nixja itén Dios it'in Agabo, tsíkjixín ch'an estado Judea. ¹¹ Ikjui ch'an kjuínixjehé ch'an tí jeheni la ntá kuákja ch'an tí tjoa t'ínkat'óxin ch'in Pablo na ntá kjuínchentoxín tóté ch'an la ko itja ch'an ntá ntácho ch'an kixin:

—Tí Nchakuen Dios mé ntácho kixin mé xikaha chjasin Jerusalén tí sín judío sinchenteto sín inché tí tjoa sinchek'áyéhe sín ch'an tí sín jehya judío —ichro ch'an.

¹² Ntá kjuixín kuínhinni tíha ntá jeheni la ko tí sín chjasin Cesarea chrónóqeheni tí ch'in Pablo kixin sáchrókjuíhya ch'an tí chjasin Jerusalén. ¹³ Ntá kjuátqhe ch'in Pablo kixin:

—¿Nkekuènté tsjankará la ko nkekuènté nchek'ávaráni? Janhan na chrakonhya kjónté jehya tí sinchentetona sín ó. Náhí. Kjónté kjaxin chrók'uénxian chjasin Jerusalén tí tinkachónkia Ìnchéni —ichro ch'án.

¹⁴ Ntá kjuachahyani nixjeheni ch'án ntá kuítgheni ch'án. Ntáchroni kixin:

—Tí nkehe tjinkaon Ìnchéni mé tsqnhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén. ¹⁶ Ntá sákjuíkoni iso tí sín tinkáchónki Ìnchéni tsíkijxin chjasin Cesarea. Sákjuíkoni sín ntqe ijnko ch'ín tsíkijxin Chipre it'ín ch'án Mnasón. Jehé ch'án mé ósé tinkáchónki ch'án Ìnchéni. Ntá kjuanjón ch'án nketí kuítgheni.

Ch'ín Pablo sákjuitsjehé tí ch'ín Jacobo

¹⁷ Tíó kjuíjini chjasin Jerusalén ntá tí sín kichó ni tinkáchónki Ìnchéni mé kjuanjón sín kjuachaxin k'uéjóni la chéhe sín. ¹⁸ Ntá tí yaon chr'éxin ch'ín Pablo sákjuíkoni ch'án kjuitsjeheni ch'ín Jacobo la ntaha tjejó kaín tí sín t'etqan kuente njnko. ¹⁹ Ntá ch'ín Pablo kjuixin nixjehé ch'án sín ntá tuénxin chrónka ch'án kaín tí xra kjuích'e Dios tíó kjuáqhe ch'án tí sín jehya sín judío. ²⁰ Tíó kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kíchóni, jaha k'uíkuan kixin síin itsjé mil sín judío ó kuinkáchónki sín Jesús kjánchó kaín sín ntáchro sín kixin t'ichjánxin tsítqehyani tí ley. ²¹ Ntá tsikinhin sín kixin jaha mé tsikjáhóhé tí sín judío tjejó chjasin ókjé kixin t'ichjánxienhya sinchexiteyéhé sín tí nkehe k'uétqan ch'ín Moisés. La kjaxin kuínhin sín kixin jaha tsikjáhóhé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxí k'uékinkáchónkini ósé. ²² Ntá nkehe chrókjuich'eni? Kixin tíó tsinhin sín kixin kjuihá la tsojnkotsé nchónhya sín. ²³ Méxra íchá jina jaha sinchexiteyá tíhi. Ntíhi tjejó noó sín t'ichjánxin sinchexiteyá sín tí nkehe chénka sín Dios. ²⁴ Jaha sáchrókjuíkooa sín la chrókótjóa jaha la ko jehé sín. La ko kjaxin chrókjuénka tsokjín sín ntá tsqnoexín tí sín judío kixin chaxínhya tí nkehe tsikinhin sín la ko tsqnoexín sín kixin kjaxian jaha nchexiteyéhé tí ley. ²⁵ A ntá tí sín jehya judío tsíkitekaon Ìnchéni la ikjinni ijnko xroon ó chr'énhenni sín. K'uétuenhenni sín kixin sinehya sín tí nto tsíkjqehe chojni tí nkehe tsíkjanqya, la ko kjaxin sinehya sín jni, la ko sinehya sín tí nto tsíchrinjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí njnko

²⁶ Ntá ch'ín Pablo sákjuíko ch'án tí noó sín la ntá tí yaon chr'éxin kjuínchetjóa asén sín. Ntá kjuixin ntá k'uúixenhen ch'án tí njnko kixin tsochrónka ch'án kixin ó kjuixin kjuínchexiteyá ch'án tí nkehe k'uúitenhen ch'án. Tíhi mé t'axrjexín kixin jnkojnko sín tsíkqao sín nkehe tsjanjón sín.

²⁷ Ó chjina chróxétja tí yato yaon ntá iso tí sín judío tsíkijxin estado Asia mé tsik'ikon sín ch'ín Pablo nkaxenhen tí njnko. Ntá kjuínchekóninkaon sín kaín chojni chjasin ntíha ntá itsé sín tí ch'ín Pablo. ²⁸ Ntá k'uèya sín ntáchro sín kixin:

—Kaínrá chojni chjasin Israel tsjínkisaráni kixin tsotséni tí ch'ín i. Jehé ch'án mé ixri nkuúxin xritjakohe ch'án chojni nkehe jehya jina kuente chjaséni, la ko titekakonhya ch'án tí ley kuente Moisés, la ko titekakonhya ch'án njnqoeni. A ntá ijje la tsik'ixenko ch'án iso sín griego la kjuínchekjita sín nkaxenhen tí njnko tjóa —ichro sín.

²⁹ Mé xikaha ichro sín kixin tsik'ikon sín senó kixin chjasén sín mé xriko ch'ín Pablo tí ch'ín Trófimo tsíkijxin chjasin Éfeso. Kjuénkayáxin sín kixin ch'ín Pablo la kjá tsíkjqko ch'án tí ch'ín a nkaxenhen njnko.

³⁰ Ntá kuenté tí chjasin a kónínkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkájenxin sín ch'án nkaxenhen njnko la kuakitsje sín ch'án ntója ntá tuénxin k'uíkjehe sín tí puerta njnko. ³¹ Ntá tjinkaon sín chrók'óyán sín ch'án ntá ijnko ch'ín comandante k'uétqenhen itsjé tí sín soldado romano kuínhin ch'án kixin kuenté tí chjasin Jerusalén k'uúixité nínkaon sín. ³² Ntá tí ch'ín comandante sákjuíko ch'án iso sín soldado la ko tí sín k'uétqenhen tí soldado a la kuinká sín sákjuí sín tí síin tí chojni. Ntá tíó k'uúikon tí sín a kixin ó kjuíji tí ch'ín comandante la ko tí sín soldado a ntá kuítqhe sín, í kjuatehya sín ch'ín Pablo. ³³ Ntá tí ch'ín comandante kóchjina ch'án la itsé ch'án la itsé ch'ín Pablo. Ntá k'uétqan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehé ch'ín Pablo la ko nkehe tí kjuích'e ch'án. ³⁴ A ntá tí chojni tsíkójnkotsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuente xikaha kjuích'e sín kixin k'uúixité sín. Ntá k'uétqan ch'án kixin tí sín soldado sátsjiko sín tí ch'ín Pablo tí cuartel síin tí sín soldado. ³⁵ La ntá tíó kjuíjiko sín ch'án tí t'it'ótjenxin sín tí nchia a ntá t'ichjánxin kuámá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín. ³⁶ Kaín tí chojni chréhe nóton t'èya sín ntáchro sín kixin:

—Chrók'uen ch'án —ichro sín.

Ch'in Pablo chrónka nkayakon chojni kixin ch'ántahya ch'án jie

³⁷ Ntá tió sáchrókuiko sín ch'in Pablo tí nkaxenhen tí cuartel kuènte tí sín soldado a ntá kjuanchankíhi ch'in Pablo tí ch'in comandante ntáχρο ch'án kixin:

—¿Á jina tsonixjahani jaha intsí? —ichro ch'án.

Ntá kjuátehe tí ch'in comandante ntáχρο ch'án kixin:

—¿Jaha la á noha nixja griego? ³⁸ Méxra ¿á jehya jaha tí chojni tsíkjin Egipto kjuinchenínkaon chojni la ko sákjuiko nteje tí noó mil chojni tsíkjàya? —ichro ch'án.

³⁹ Ntá kjuátehe ch'in Pablo ntáχρο ch'án kixin:

—Náhi, janhan mé ijnko chojni judío. Tsíkokjínaxián chjasin Tarso, estado Cilicia. Janhan me ijnko chojni tsíkjin ijnko chjasin imá tjetooan. A ntá ijie xrxannóaha kixin tsjánjuan kjuachaxin tsonixjaha tí chojni —ichro ch'án.

⁴⁰ Ntá tí ch'in comandante kjuanon kjuachaxin ntá ch'in Pablo kjuák'exin toté ch'án tí tjen escalera ntá tja ch'án ó kjuakoxin ch'án kixin tsotáni sín. Ntá tání sín ntá kjuankixin nixjixin ch'án nkiva hebreo. Ntáχρο ch'án kixin:

22

¹ —Jahará kichó ni la ko chojni it'é xjan tinhínrá nkehe tí tsoxrjanka kixin chontahya jie —ichro ch'án.

² Ntá kuínhin sín kixin nixjixin ch'án nkiva hebreo ntá antsí má tání sín. Ntá ntáχρο ch'in Pablo inaá kixin:

³ —Janhan mé ijnko chojni judío tsíkokjínaxián chjasin Tarso estado Cilicia. K'uankixian ntíhi chjasin Jerusalén la kjuíntakuáxian tí nkehe kjuako tí ch'in Gamaliel la títékavan tí ley tsíkináchónki tí sín tsík'axrjenixinni óse. Tjínkavan chrókjuít'aha Dios xra kaín asenná éxi tjínkáonrá jahará ch'erá tí yaon ijie. ⁴ Tí senó k'uénínkakonhan chrók'oyán tí sín tinkáchónki Inchéni kjuíntanteto chojni ntóa la ko chojni chjin kixin chrók'uejóchjina sín. ⁵ A ntá tí sín ncha'tá t'etooan la ko kain tí sín táda t'ayakonhen njnko la mé nohe sín kain tíha kixin jehe sín mé kjuanon sín xroon ts'áyéhe tí sín kichó ni judío tjejó chjasin Damasco. Ntá sákjuia nó ntíha kixin chrókjuikjéyá tí sín tinkáchónki Inchéni kixin chrótse sín ntá chrókjuikian sín ntíhi Jerusalén chroxuasóte sín.

Ch'in Pablo chrónka nkexrí kjuankixin tinkáchónki ch'án Inchéni
(Hch. 9.1—9; 26.12—18)

⁶ A ntá tió kjuasán chjina chjasin Damasco chjina chonkixin ntá xrinahya k'uinkáséyan jnkontatjén tí tjen ijnko xrohi imá t'inkaséyan kuixin nkajni. ⁷ Ntá kjuachr'itsinka nonte ntá tuénxin kuínhan itén ijnko nkexro nixjana ntáχρο kixin: “Saulo, Saulo, ¿nekuènté ninkákonna xritjéyá tí janhan?” ⁸ Ntá kjuánchánkiá kixin: “¿Xá nkexro jaha?” Ntá kjuátehe ch'án ntáχρο ch'án kixin: “Janhan mé tí nkexro Jesús tsíkjin chjasin Nazaret, mé tí nkexro xritjéyá.” ⁹ La ntá tí sín k'uájikjan mé k'uikon sín tí xrohi la chrakon sín kjánchó kuíenhya sín itén tí nkexro nixjana. ¹⁰ Ntá kjuánchánkiá kixin: “¿Xá nkehe tsonhen tjínkavan sít'aha jaha?” Ntá kjuátehe ch'án ntáχρο kixin: “T'áya sátjia t'ixenhen chjasin Damasco ntá ntíha tsochrónka sín kaín nkehe sích'e.” ¹¹ Ntá tí xrohi a mé k'uixenka ikuan ntá í xitjaha t'ikuan. Ntá tí sín chrikjan mé kuínkátséna sín sákjuikjan sín chjasin Damasco.

¹² Ntá ntaha kjuák'e ijnko ch'in it'in Ananias ijnko chojni jina kjuínchexiteyéhe ch'án tí ley kuènte ch'in Moisés. Kaín tí sín judío síin chjasin Damasco tjíkosáyehe sín tí jehe ch'án. ¹³ Ntá ch'in Ananias mé kuítseje ch'án tí janhan ntá tió kui ch'án ntáχρο ch'án kixin: “Kichóni Saulo, ijie la ts'áyéhe kjuachaxin ts'ikuan inaá.” Ntá ó jina t'ikuan. ¹⁴ Ntá tuénxin ntáχρο ch'án inaá kixin: “Tí Dios kuínkáchónki tí sín tsík'axrjenixinni la ó tsíkjeýá ch'án tí jaha kixin tsonoha nkehe tjínkaon ch'án la ko kixin ts'ikuan tí nkexro jina la ko tsinhín tan k'uaxrxjén ir'va ch'án. ¹⁵ Jaha mé tsochrónka tí nkehe k'uikuan la ko tí nkehe kuínhin tsinhin kaín tí chojni chjasintajni. ¹⁶ A ntá jie la í choénhya má. T'áya la tsíkitaxián ihnjé Inchéni kixin mé ts'imáxin ijia.” ichro ch'in Ananias.

Pablo chrónka kixin Dios ichr'án ch'án tsjakohé tí sín jehya sín judío

¹⁷ Na ntá tió xikjan chjasin Jerusalén ntá sákjuia njnko tsonixjaha Dios ntá titáya k'uikuen ¹⁸ Inchéni ntáχρο ch'án kixin: “Tjoka ts'axrxéxian chjasin Jerusalén kixin tsitekakuenhya sín tí nkehe tjákua mé tí tan kuèntana.” ¹⁹ Ntá janhan ntátjan ch'án kixin: “Inchéni, jehe sín ó nohe sín kixin senó k'uék'atsínka kaín tí njnko la k'uétse tí sín tinkáchónki tí jaha la sákjuikjan sín ntóechiso k'uékon sín. ²⁰ Tí k'óyán sín tí ch'in Esteban tí nkexro k'uékjit'aha xra, k'uénixja tí tan kuènta ntá janhan kjaxin tjéntaxián ntíha la janhan ntáxrjan kixin ó nchoxon its'en ch'án

la k'uáyakonhan tí iké tí sín kjuàya.” ²¹ Ntá Ìnchéni xínixja inaá, ntáchro ch'án kixin: “Tétuñhan jaha kixin sátsjia chjasin kjin kixin tsjákohé tí chojni jehya judío.”

Ntá tí ch'ín comandante k'uáyéhe tí ch'ín Pablo kixin tsjasóte ch'án

²² Ntá tí sín tsikójnkotsé mé kuínhin sín kaín tíha ntá kjuankixin k'uèya sín ntáchro sín kixin: —Its'en ch'án, í tsjak'echónhya ch'án —ichro sín.

²³ Naxá t'ixratáhya sín t'óyako sín ntá tótsjénka sín iké sín la ko kuákja sín nche it'e sín. ²⁴ Ntá tí ch'ín comandante mé k'uètuñhen ch'án tí sín soldado a kixin sátsjiko sín ch'ín Pablo nkaxenhen tí cuartel kuènte sín. Ntá ntiha k'uètoan ch'án kixin tsjatexín sín ch'án chikoté ntá tsonoxín tí ch'ín comandante nkekuènte imá t'óyako sín nínkakohen sín tí jehe ch'án.

²⁵ Ntá kjuixin kjuínchenteto sín ch'án kixin tsjate sín ch'án ntá nixjehe ch'ín Pablo ijnko ch'ín capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxá kjuéyáhyará nkerí jie chonta? —ichro ch'án.

²⁶ Tió kjuixin kuínhin tí ch'ín capitán ntá sákjuíchénga ch'án tí ch'ín comandante ntáchro ch'án kixin:

—¿Nkehe sjch'e jaha kixin tí nkexro i mé ijnko chojni romano?

²⁷ Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án.

Ntá kjuátehe ch'ín Pablo kixin chaxín jehe ch'án.

²⁸ Ntá ntáchro tí ch'ín comandante kixin:

—¿Á ntá nkexrí kixin janhan nchónhya chichaon kjuènká kixin ts'ónana chojni romano?

Á ntá ntáchro ch'ín Pablo kixin:

—Janhan na chojni ntiha tsíkókjínaxián.

²⁹ Na ntá tí sín soldado chrókjuate ch'ín Pablo mé kuínhin sín kixin ch'ín Pablo ijnko chojni romano ntá kuítqhe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsikjinchenteto ch'án.

Ch'ín Pablo nixjehe ch'án tí sín t'etoan kuènte tí sín judío

³⁰ Á ntá tí kóyaon ntá tí ch'ín comandante a mé tjinkaon ch'án tsonohe ch'án nkehe tí jie chrók'ueka tí sín judío tí ch'ín Pablo. Ntá kjuasintanká ch'án chica cadena tsíchróntetoxín tja tí ch'ín Pablo ntá k'uètoan ch'án kixin tsojnkotsé kaín tí ncha't'á t'etoan la ko tí sín t'etoan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí siín tí jehe sín.

23

¹ Ntá ch'ín Pablo komá tí sín t'etoan kuènte sín judío ntá ntáchro ch'án kixin:

—Kíchóni, tí k'uéíjak'é hasta ijie la Dios tjetsjehe kixin ijnko kjuaxrexinkaon jina chonta —ichro ch'án.

² Ntá tí ch'ín Ananías tí ch'ín ncha't'á t'etoan mé k'uètuñhen ch'án tí sín chjino tjejó tí tjen ch'ín Pablo tsochjéhe sín ir'va ch'án. ³ Ntá kjuátehe ch'ín Pablo kixin:

—Dios mé sinchekjasóte tí jaha kixin ntoáhya kjuích'e. Tjetjaxian méhe kixin tsjéyá nkehe tí jie chonta exí nixja tí ley. Á ntá ¿nkekuènte kuítekákonhya tí ley, la kuétoan kixin ts'ékonna? —ichro ch'án.

⁴ Á ntá tí sín siín ntiha ntáchro sín kixin:

—¿Á xikaha ts'antaxínhín tí ncha't'á t'etoan kuènte Dios?

⁵ Ntá kjuátehe ch'ín Pablo ntáchro ch'án kixin:

—Kíchóni, kjuatsqanhya janhan kixin jehe ch'án mé tí ncha't'á t'etoan. Ntáchro tí xroon itén Dios kixin: “Chrók'uantaxíenhya tí chojni t'etuñhen chjasán”^{*} —ichro ch'án.

⁶ Ntá ch'ín Pablo mé kónohe ch'án kixin iso chojni siín ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'uèya ch'ín Pablo, ntáchro ch'án kixin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kixin janhan mé tinkachónkia kixin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankixin sín ikjo kíchó sín ntá xikaha jnkokónhya kjuenkayáxin tí sín tsíkójnkotsé ntiha. ⁸ Kixin tí sín saduceo a mé ntáchro sín kixin tsoxechónhya chojni tsík'en la ko kjaxin kohya sín ángel la ko kohya ncha'kuen. Á ntá tí sín fariseo la titekaon sín kaín tí nkehe a. ⁹ Ntá kaín sín k'uèya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kixin:

* 23:5 Éxodo 22.28

—Tí ch'ín i, kohya ninkehó nkehe jínahya kjuích'e ch'án. Ách'e ijnko nchakuen chojni o ijnko ángel mé nixjehe ch'án —ichro tí sín fariseo.

¹⁰ Ntá ímá sítjité sín níńkaon sín. Ntá tí ch'ín comandante a mé tóxakonhen ch'án ḱixin chrókuinchequen sín tí ch'ín Pablo ntá k'uetuēnhen ch'án tí sín soldado a ḱixin sátsjikakjín sín ch'án la tsíkəo sín ch'án ínaa tí cuartel kuēnte tí sín soldado.

¹¹ A ntá tí tie a na ntá xrinahya titəyə k'uíkuēn ch'ín Pablo Ínchéni nixja ch'án, ntáchro ḱixin: —Chrakonhya Pablo ḱixin éxí chrónka tanná chjasin Jerusalén la mé xíkaha tsóchrónka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxin a ntá iso tí sín judío a mé kjuenkayáxin sín ḱixin ts'óyán sín tí ch'ín Pablo. Ntá k'uákjénxín sín íhnjé Dios chaxín tsoxiteyá la sinehya sín la ko ts'ihya sín ninkehó tí naxə ts'óyánhya sín ch'án. ¹³ Chjina cuarenta sín kjuenkayáxin sín ḱixin xíkaha sich'e sín. ¹⁴ Ntá sákjuichenka sín tí sín ncha'tá t'etəoan la ko tí sín t'etuenhen kuēnte tí sín judío la ntáche sín ḱixin:

—K'uákjénxinni íhnjé Dios ḱixin chaxín tsoxiteyá ḱixin í sinehyani ninkehó tí naxə ts'óyánhyani tí ch'ín Pablo. ¹⁵ Méxra ntá jahará la ko í so tí sín t'etuenhen tí sín judío tsontácherá tí ch'ín comandante a ḱixin tsjikəo sín tí ch'ín Pablo ntihi tí tjejorá ntóye nchítjen ḱixin antsí má tsjanchankíhírá ch'án nkehe siná á chaxín tí jie t'íká ch'án. A ntá jeheni senó ts'ejóchónhenni tí tsjixín ch'án ntá ts'óyánni ch'án ḱixin í tsjihya ch'án ntihi —ichro sín.

¹⁶ Ntá tí xjeen tí kjave tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uíxnen ch'án cuartel kuēnte tí sín soldado ḱixin tsochrónka ch'án nkehe tí tjo sín kuínhin ch'án. ¹⁷ La ntá ch'ín Pablo mé k'uíyehə ch'án ijnko tí sín capitán la ntáchro ch'án ḱixin:

—Sátsjikoá tí ch'ín ntasoá tí tjen tí ch'ín comandante ḱixin tjinkaon ch'án tsochrónka ch'án nkehe —ichro ch'án.

¹⁸ Ntá tí ch'ín capitán a mé sákjuiko ch'án tí tjen tí ch'ín comandante ntá ntáchro tí ch'ín capitán a ḱixin:

—A ntá tí ch'ín Pablo tjechjina mé k'uíyeheni ch'án ḱixin tsjikəoni tí ch'ín ntasoá ntihi ḱixin tjinkaon ch'án tsonixjaha jaha —ichro ch'án.

¹⁹ Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án ḱixin:

—¿Nkehe tí tjinkávan tsochrónka? —ichro ch'án.

²⁰ Ntá ntáchro tí ch'ín ntasoá a ḱixin:

—Iso tí sín judío mé kjuenkayáxin sín ḱixin tsjanchaha sín ḱixin ntóye nchítjen sátsjikoá ch'ín Pablo tí tsojnkotsé tí sín judío t'etəoan. Sit'ayaha sín tsojtáchro sín ḱixin tjinkaon sín tsjanchankíhi sín ch'ín Pablo tí nkehe antsí má xra. ²¹ A ntá jaha la chrókuitekákonhya ḱixin chjina cuarenta chojni tjejóchónhen sín imó la k'uákjénxín sín íhnjé Dios ḱixin sinehya sín la ko ts'ihya sín ninkehó tsjixinjian its'en ch'ín Pablo. Ntá íjie tjejóchónhen sín tsoñohe sín nkehe tsixrua jaha —ichro ch'án.

²² A ntá tí ch'ín comandante a mé nixjehe ch'án tí tí ch'ín ntasoá la k'uetəoan ch'án ḱixin: —Tsochenkahya ninxeró ḱixin xíkaha kjuíchrónka —ichro ch'án.

Ichr'an sín tí ch'ín Pablo tí tjen tí ch'ín gobernador Félix

²³ Ntá tí ch'ín comandante a mé k'uíyehə ch'án yaá tí sín capitán a ntá k'uetəoan ch'án ḱixin tsoyaxínhin sín sátsjiko sín iyó ciento sín soldado sátsjixin toté la ko setenta tí sín tsjiták'á kokaṭe la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án. ²⁴ La ko k'uituenhen sín sinchekamá sín kokaṭe tsjiták'á ch'ín Pablo la ts'ayakonhen sín ch'án jina ḱixin kohya nkehe tsonhen ḱixin tsjiji ch'án tí tjen ch'ín Félix, tí ch'ín gobernador. ²⁵ Ntá tí ch'ín comandante íkjín ch'án ijnko xroon a, ntáchro ḱixin:

²⁶ “Janhan mé tí ch'ín Claudio Lisias chr'anhan ijnko xroon ḱixin jaha ch'ín Félix ijnko gobernador jina, nixjaha. ²⁷ Tí sín judío a mé itsé sín tí ch'ín í ḱixin chrók'óyán sín ch'án. Ntá tíó kónóna ḱixin ijnko chojni romano tí jehe ch'án la ntá sákjuíkian sín soldado kjujntakaá ch'án. ²⁸ Tjinkəvan tsonóna nkekuēnte ḱixin níńkakonhen sín ch'án. Ntá sákjuíkian ch'án tí tsíkójkónté tí sín judío. ²⁹ Ntá kónoxín ḱixin níńkakuénxín sín ch'án ḱixin tí ley kuēnte sín kjuínchexiteyáhya ch'án, ichro sín. Jehya jie jie tsikjasin ch'án ḱixin chrók'óyán sín ch'án o chrókjuak'echjina sín ch'án. ³⁰ Ntá ó kuínhan ḱixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxín kjuáncháha tí sín a ḱixin chrókjujii sín tí tjen jaha chrókjuá sín ḱixin nkekuēnte níńkakonhen sín ch'án. Kjuasáyá. Ó tjen.”

³¹ Ntá tí sín soldado a mé kjuínchexiteyá sín éxí k'uituenhen sín a ntá sákjuiko sín tí ch'ín Pablo tí tie a chjasin Antípatris. ³² Ntá tí yaon chr'éxin tí sín soldado xrixín toté ó a mé xíkjan sín tí cuartel kuēnte sín. Ntá tí sín k'uéjókjen kokaṭe a mé naxə sákjuiko sín tí ch'ín Pablo. ³³ Ntá tíó kjujii sín tí chjasin Cesarea ntá tí sín soldado a mé kjuanjon sín tí xroon a chjéhe sín tí ch'ín gobernador la ko kjaxín kjuínchek'áyéhe sín ch'án tí ch'ín Pablo. ³⁴ Ntá

kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kixin estado Cilicia tsíkixín tí ch'ín a. ³⁵ Ntá ntáχρο ch'án kixin:

—Ntá tsjnhan nkehe tsixro tí sín tsji ts'eka jie.

Ntá k'uetuēnhen ch'án tí sín soldado a kixin ts'áyakonhen sín tí ch'ín Pablo tí nchia kuēnte ch'ín Herodes.

24

Ch'ín Pablo nixjehe ch'án ch'ín Félix chrónka ch'án kixin kjuasinhya ch'án jie

¹ Ntá k'uatásinka in'ó yaon, ntá ch'ín Ananías, tí nchat'á imá t'etoan, kjuíji ch'án chjasin Cesarea. Kjaxin kuikao ch'án iso tí sín t'etoan kuēnte núnko a la ko ijnko ch'ín abogado it'ín Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuēnte ch'ín Pablo. ² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankixin ch'án nixjehe ch'án tí ch'ín Félix ntáχρο ch'án kixin:

—Kjuasáyá jaha gobernador kixin imá kjuínkítsa kixin kjuaxróxin tjeóni la kjuasáyá kixin imá noha kjuíncheyóxian tí nacióon kuēnteni. ³ Kjuasáyá jaha Félix. Imá jina jaha kixin k'uáyéheni kaín tíha. ⁴ Tjínkakonhya sjntak'itjáyanhan nchónhya tiempo la xrjanóaha kixin chrókjuak'é chrókúinhín intsioká tí nkehe tsóxrjanka. ⁵ A ntá jie ó k'uitjani kixin tí ch'ín i mé éxi ijnko chin t'óxika kuēnté chjasintajni kixin ch'iyehé ch'án tí sín judío ntá xika sín. Jehe ch'án mé t'etoan ch'án tí sín tinkáchónki tí ch'ín tsíkixín chjasin Nazaret. ⁶ Jehe ch'án mé kjaxin chrókjuincheckjita ch'án tí núnko. A ntá itséni ch'án ntá chrókjuincheckitóexínni tí ijje ch'án éxi t'etoan tí ley kuēnteni. ⁷ A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakitsje sín tí ch'ín Pablo. ⁸ Ntá k'uetóan ch'án kixin tí sín tjanchia jie chrókuitsjehe sín tí jaha kixin jaha chrókjuanchankíhi ch'án kixin chrókónoha jina nkexéhé tí jie chrókjuincheckjasótéxin sín ch'án —ichro tí ch'ín Tértulo.

⁹ Ntá ntáχρο kaín tí sín judío síin ntiha kixin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxin tja ch'án kixin tsonixja tí ch'ín Pablo a. Ntá ntáχρο ch'ín Pablo kixin:

—Chéheni kixin tsonixjahani tsochrónkani kixin kohya jie kjuasinni kixin ó noheni kixin jaha la juez kuēnte tí nacióon ntihi la nchónhya nánó tétóan. ¹¹ Jaha la kjaxin ó chrókónoha kixin na ntá teyó yaon kjuíjini chjasin Jerusalén kixin ntaha tsóxráinkakónxínni Dios. ¹² Kónoxínhya kixin nijnko nkexro chrókjuachaxínni, la ko kjuínchexakunhyani ninkexró núnko la ko ni tí núnko ntsí la ko ninketé chjasin. ¹³ Tí sín i la xitjahya tsontáχρο sín kixin xikaha tí jie kjuasinni. ¹⁴ Janhan chaxín xrjanka kixin t'ahá xrá tí Dios k'uékinkáchónki tí sín tsik'axrjenixínni mé yóhé tí ntja nixin. A ntá jehe sín ntáχρο sín kixin ókjé nkehe tinkáchónkini. Kjánchó janhan mé tinkáchónkia kaín tí nkehe tsíkjin sín tí xroon kuēnte ley la ko tinkáchónkia kaín tí nkehe k'uénixja tí sín k'uéchrónka itén Dios. ¹⁵ Kjaxin tinkáchónkia tí Dios tinkáchónki tí jehe sín kixin tjéchonhan kixin Dios sinchexechón kaín chojni jina la ko kaín chojni jinhya kjaxin. ¹⁶ Méxra tóxakonna kixin tjóá chrókjuak'é kixin chrókjuanchahya Dios jie la ko kjaxin chojni chrókjuanchahya jie.

¹⁷ Nta kjuixin k'uatásinka iso nánó ixrini ókjé ntá kjuíjini chjasénni kixin tsjanjónni chichaon la ko kjaxin tsochjéheni Dios nkehe. ¹⁸ Méxra mé xikaha tjenni nkaxenhen núnko nta iso sín judío tsíkixín estado Asia ó xetani ntiha. Ntá kjuínchetjóáni asénni la tsjéhya chojni k'uikon la kohya chojni kjuánjónkoni. ¹⁹ A ntá tí sín a mé t'ichjánxin chrókui sín ntihi kixin chrókjuanchia sín jie tí ninkakonna sín. ²⁰ A ntá tí náhi la tí sín tjejó ntihi chróchrónka sín kixin nkehe tí jie k'uitjaxín sín tió kjuak'eni tí tjejó tí sín t'etoan kuēnte tí sín judío. ²¹ Kjá tí tsontáχρο sín kixin náxrjónhya ijnko nkehe itsen k'uéya ntáxrjan kixin: “Ijie sinchekitóexinrá jiēna kixin sinchekjasótenará kixin janhan tinkáchónkia kixin tsóxechón chojni tsik'en” —ichro ch'án.

²² Ntá kjuixin kuínhin tí ch'ín Félix, la jehe ch'án jina kónohe ch'án kixin nkexrí tí ntja nixin. Ntá kjuínchekitóexínhya ch'án ijje ch'ín Pablo. Ntáχρο ch'án kixin:

—Tsjjia tí ch'ín comandante Lisias ntá tsochrónka ch'án nkekuēnte tí jie tjanchiará ntá tsonóna —ichro ch'án.

²³ Ntá k'uetuēnhen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsi la ko tsítóhe sín ts'ixenhen tí sín chóxin ch'án, tsjtsjehe sín ch'án.

²⁴ Ntá iso yaon chr'éxin ntá kjuíjiko ch'ín Félix tjan Drusila ichjién ch'án, mé ijnko tjan judía. Ntá k'uetóan ch'án kixin tsjik'iyehé sín tí ch'ín Pablo kixin tsochrónka ch'án nkexrí tinkáchónki chojni Jesucristo. ²⁵ A ntá ch'ín Pablo mé kjuako ch'án kixin nkexrí ts'ejó chojni jina la ko nkexrí ts'etuēnhen chojni asén sín kixin ch'ehya sín tí jinhya la ko nkexrí Dios sinchekitóexin ijje chojni tí tsjixín. Ntá ch'ín Félix kuínhin ch'án xikaha ntá chrakon ch'án, ntáχρο ch'án kixin:

—A ntá jie la sájtia. Ntá ts'iyaha tió chonta tiempo —ichro ch'án.

²⁶ A nta ch'in Félix tjechónhen ch'án kixin kjá ch'in Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehé ch'án tí ch'in Pablo kixin tsonixjehé ch'án. ²⁷ Ntá xikahó kónhen hasta k'uátsínka iyó nánó ntá tí ch'in Félix kuitóhe ch'án tí xra gobernador la ntá í jnko ch'in it'in Porcio Festo mé k'uixenhen ch'án tí xra a ínaá. A ntá ch'in Félix mé kuitóhe ch'án tí ch'in Pablo tjechjina ch'án kixin tjinkaon ch'án chrókjuinchexiteyá ch'án tí nkehe tjinkaon tí sín judío.

25

Ch'in Pablo nkayakon tí ch'in Festo

¹ Ntá tí ch'in Festo kjuíji ch'án ntiha kixin ts'ixenhen ch'án tí xra gobernador. Ntá íni yaon chr'éxin ntá sákjuixin ch'án chjasin Cesarea la kjuíji ch'án chjasin Jerusalén. ² Ntiha tí sín ncha'tá t'etóan la ko tí sín judío ímá tjetóan mé kjuanchia sín kixin tsjasóte ch'in Pablo. ³ Kjuanchia sín kixin xra ó chrók'uetóan ch'án kixin chrók'ui ch'in Pablo ntiha chjasin Jerusalén. Kixin jehe sín ó tsikjenkayáxin sín kixin tsochr'án sín iso chojni tsochónhen tí ntia ts'óyan sín tí ch'in Pablo. ⁴ Kjánchó ch'in Festo kjuátéhe ch'án ntáchro ch'án kixin ó tsikjenkayáxin ch'án kixin í séhya tsjak'e ch'án ntiha. Méxra tí ch'in Pablo la tjechjina ch'án chjasin Cesarea la xitjahya ts'etóan ch'án kixin tsjixrako. ⁵ Ntá ntáchro ch'án kixin:

—Tí chojni tjetóan kuéntará sáchrókjuikian ntiha chjasin Cesarea. A ntá tí chaxín tsíkjasin ch'án jie ntá ntiha la jína tsjanchia sín jie —ichro tí ch'in Festo.

⁶ Ntá ch'in Festo kjuák'e ch'án chjasin Jerusalén chjina íjni ó ite yaon ntá ikjan ch'án chjasin Cesarea ínaa. Ntá tí yaon chr'éxin a kjuák'etjaxin ch'án tí tjet'etóanxín ch'án ntá k'uetóan ch'án kixin tsjikakjín sín tí ch'in Pablo. ⁷ Ntá tió k'uixenhen ch'in Pablo ntiha ntá tí sín judío kuixin Jerusalén kóchjinehe sín ch'án ntá kjuanchia sín nchónhya jie ímá hyé. Kjánchó jínko nkehe chaxínhya t'ekana sín ch'án jie. ⁸ A ntá tí ch'in Pablo a chrónka ch'án kixin kjuasinhya ch'án jie. Ntáchro ch'án kixin:

—Nínkehó jie kjuasinhyani mé nínkexró kjuánjenkohyani la ko kjaxin jehya chrókuitekakonhyani tí ley kuénte tí sín judío la ko jehya chrókuitekakonhyani tí nínko la ko jehya chrókuitekakonhyani tí ch'in gobernador romano.

⁹ A ntá ch'in Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'in Pablo ntáchro ch'án kixin:

—¿Á tjínkávan sátsjia chjasin Jerusalén kixin ntaha janhan chrókjuíntakitóaxián nkehe tí jie chonta jaha? —ichro ch'án.

¹⁰ Ntá kjuátéhe ch'in Pablo kixin:

—Náhi, jeheni ó ntihi tjenni tí t'etóanxín tí sín gobierno romano la jína chrókjuínchekitoxián íjjeni kixin jaha la ó noha kixin nínkehó íjie kjuích'ehyani tí sín judío. ¹¹ Kja tí chaxín kjuásian íchrén jie jie chrók'uénxián la chrakonhya kjoné chrók'uén. A ntá tí chaxínhya xikaha t'ekana sín jie la nínkexró chónthaha kjuachaxin chrók'uetóan sáchrókjuikoni tí jehe sín. A ntá tjánchíá kixin jehe tí ch'in ímá t'etóan mé sínchekitoxín tí jie —ichro ch'án.

¹² Ntá ch'in Festo mé kjuanchankíhi ch'án iso tí sín tjínkítsa ch'án ntá ntáchro ch'án kixin:

—Jaha mé tjanchia kixin tí ch'in ímá t'etóan sínchekitoxín ch'án íjía. Méxra tétuánhan sátsjia tí tjen tí ch'in a —ichro ch'án.

Ch'in Pablo nkayakon tí ch'in rey Agripa

¹³ Ntá k'uátsínka iso yaon ntá tí ch'in rey Agripa la ko tjan Berenice kjuíji sín chjasin Cesarea kixin tsonixjehé sín tí ch'in Festo. ¹⁴ Ntá ntiha mé kuitóhe sín itsjé yaon ntá ch'in Festo a mé chénka ch'án tí ch'in rey nkehe kuénte tí ch'in Pablo. Ntáchro ch'án kixin:

—Ntihi itjen jínko ch'in tjechjina tsíkítóhe ch'in Félix. ¹⁵ A ntá tió kjuak'é chjasin Jerusalén ntá tí sín ncha'tá t'etóan la ko tí sín t'etuenhen tí sín judío a mé kjuíjitsjehe sín tí janhan ntá kjuanchia sín jie kuénte ch'in Pablo. Kjuanchia sín kixin chrók'óyánni tí jehe ch'án. ¹⁶ Ntá janhan kjuátahá kixin: Jeheni chojni t'etóan kuénte sín romano mé kuénhyani ts'etóanni its'en nínkexró tí naxá tsochjinahya tí ch'in kjuasin jie kixin tsontáchro ch'án á chaxín tí jie tjanchia sín o náhi. ¹⁷ Ntá tí sín judío kui ntihi ntá chuánhya má. Kjóné tí yaon chr'éxin kjuak'etjaxian tí ntákitoxián íjie chojni la kuétoan kixin síxra koa tí ch'in Pablo. ¹⁸ A ntá tí sín kóchjina kohya nínkehó ichro sín kuénte tí jehe ch'án éxí kjuenkayáxian janhan chróntáchro sín. ¹⁹ Jehó nínkakuenxín sín ch'án kixin tí nkehe tínkáchónki ch'án la ko nínkakuenxín sín ch'án kixin tí nkexro it'in Jesús mé ik'uén ch'án ntá jie ntáchro ch'in Pablo kixin tjechón ch'án ínaá. ²⁰ Janhan la nonahya nkexrí tsitoxén tí íjje ch'án ntá kjuánchánkíhā tí ch'in Pablo á tjinkaon ch'án sátsji ch'án chjasin Jerusalén kixin ntaha tsitoxén tí jie ch'án. ²¹ A ntá jehe ch'án tsíkjanhia ch'án kixin tí ch'in ímá t'etóan mé chrókjuínchekitoxén ch'án íjje ch'án. Ntá

kuétoan janhan kixin naxa ntihyó tsjak'echjina ch'án tsononajia janhan nkesá tsétuanhan ch'án sátsji ch'án ntiha —ichro ch'án.

²² A ntá ch'in Agripa ntáche ch'an tí ch'in Festo kixin:

—Kjaxian janhan tjinkavan tsinhan tí nkehe tsochrónka tí ch'in a.

Ntá kjuátehe ch'in Festo ntáchro ch'án kixin:

—Ntóye tsinhín nkehe tsochrónka ch'án.

²³ Ntá tí yaon chr'éxin tí ch'in Agripa la ko tí tjan Berenice kjuúji sín la k'uúixenhen sín la ko tí sín soldado t'etqan tsíkjikqo sín, la ko k'uúixenko sín iso chojni tjetqan kuénte chjasin ntiha. Ntá k'uetqan ch'in Festo kixin tsjixrakoa tí ch'in Pablo. ²⁴ Ntá ntáchro ch'in Festo kixin:

—Jaha ch'in rey Agripa tinhín la ko tinhínrá kain rá tsíkójkotsérá ntihi. Tsjehérá tí ch'in Pablo itjen ntihi. Kain tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuitóehya sín, tjanchana sín kixin chrók'uen ch'án. ²⁵ A ntá tónhenni kixin kohya jie jie kjuasin ch'án kixin chrók'uen ch'án. Kjánchó jehe ch'án mé tsíkjanchia ch'án kixin tí ch'in imá t'etqan chrókjuinchekitóexín ijie ch'án. Ntá kjuenkayáxian kixin tsétuanhan ch'án sátsji ch'án ntiha. ²⁶ Nonahya nkehe chaxín tsokjian ts'ayéhe tí ch'in t'etqan. Ntá jie kuétoan kjuukakjín sín ch'án kjuikqo sín ch'án tí tjeióni ntihi kixin tjetqan kixin jaha ch'in Agripa la ko kain rá tjeorá ntihi tsjanchankihírá ch'án kixin mé tsonóna janhan nkehe tsokjian. ²⁷ Méxra náxrjónhya chróchr'an ijnko tí chojni tjechjina naxa nonahya nkehe tí jie t'eka sín ch'án.

26

Ch'in Pablo nkayakon tí ch'in rey Agripa chrónka ch'án tí jie t'eka sín ch'án

¹ Ntá tí ch'in rey Agripa a mé ntáche ch'án tí ch'in Pablo kixin:

—Ó nchqon jahvá tsochrónka —ichro ch'án.

Ntá tí ch'in Pablo mé kjuaya tja ch'án ntá kjuankixin nixja ch'án, ntáchro ch'án xikihí:

² —Chána kixin tsonixja nkayakuan tí jaha rey Agripa tsoxrjanka kain tí jie t'ekana tí sín judío. ³ Ó noheni kixin jaha la ó noha jina kuénte tí ley la ko tí nkehe tinkáchónki tí sín judío, la ko jaha noha nkehe tí kjuachaxín sín kichó sín. Méxra xrjannógha kixin tjak'etinhín jina.

Chrónka ch'in Pablo nkexrí kjuák'e ch'án tí ósé

⁴ Kain tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána. ⁵ Kjaxin jehe sín la ó nohe sín la kjá jina chróchrónka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhé sín tí ley kuénte tí nkehe tinkáchónkini. ⁶ Ntá ijie sínchekitóexián jiéna kixin núnkaon tí sín judío a kixin tjéchonhan kixin Dios mé sinchexechón chojni inaá xikaha tsíchénka ch'án tí sín tsik'axrjenixinni. ⁷ Tí teyó tribu tsik'axrjenixin ch'in Israel mé tjejóhónhen sín kixin ts'íkon sín tsoxiteyá tí nkehe tsíchronka Dios. Méxra xraxinkaon sín Dios nchakotjin la ko tie. Méxra mé xikaha tjéchonhan, jaha rey Agripa, la mé xikaha ninkakonna tí sín judío ijie.

⁸ ¿Á títékakonhyará jahará kixin Dios sinchexechón chojni tsik'en?

Ch'in Pablo k'uénínkakonhen ch'án tí chojni tinkáchónki Ínchéni

⁹ Janhan mé kjaxin k'uékjenkayáxian nchónhya nkehe k'uénínkakonhan tí sín tinkáchónki Jesús tí nkexro tsíkjin chjasin Nazaret. ¹⁰ Mé xikaha kjaxin k'uékjit'a chjasin Jerusalén. Tí sín nchat'á t'etqan mé kjuanjón sín kjuachaxin kixin janhan tsochr'áxanhan ntóechiso nchónhya tí sín tinkáchónki Ínchéni. Ntá tió k'óyán sín tí sín a mé janhan la ntáxrjan kixin ó nchqon xikaha kónhen. ¹¹ Nchónhya veces kjujntakjasóte tí sín tinkáchónki Ínchéni kixin chrókuítóhe sín tí nkehe tinkáchónki sín. Mé xikaha k'uékjit'a kain xín núnko kixin imá k'uénínkakonhan tí jehe sín la xikaha k'uájichráhə sín kjónté sátsíki sín chjasin ókjé.

Chrónka ch'in Pablo nkexrí kuínkáchónki ch'án Ínchéni

(Hch. 9.1—19; 22.6—16)

¹² Méxra xra ó sákjuia janhan chjasin Damasco. Tí sín nchat'á t'etqan mé ó kjuanjón sín kjuachaxin kixin xikaha t'ahə sín xra. ¹³ A ntá tí ntia a jaha rey chrókónoha kixin chonkixin k'uúkuán éxi ijnko xrohi t'ínkaséyan kuixín nkaya nkajni antsí má fuerte la kánhyó fuerte tí xrohi kuénte yaon la tí t'ínkaséyan mé k'uantatjen tí janhan la ko tí sín xrixian. ¹⁴ Ntá kain ni kjuítsinkani nonte ntá xrinahya kuinhan nixja ijnko nkexro mé nkíva hebreo nixjaxin ch'án. Ntáchro tí nkexro a kixin: “Saulo, Saulo, ¿nkekuénte nínkákónna xritéyá tí janhan? Jahvá nchekjasóte asán kixin tjanjonkoa tí janhan. Éxi yóhe ijnko koxinta kónínkaon va tí chriáte sín va chica yo mé xikaha jaha.” ¹⁵ Ntá kjuánchánkiá kixin: “¿Xá nkexro jaha?” Ntá tí nkexro me kjuátehe kixin: “Janhan mé Jesús mé tí nkexro chréhe jaha. ¹⁶ Ijie t'áya jaha, tjak'exián totá. Janhan kjuánjuan kjuachaxin kixin k'uúkuán tí janhan ijie kixin jaha sjch'ena xra. Janhan kjuéyá tí jaha kixin tsochéna chojni kixin k'uúkuán tí janhan la ko tsochrónka tí nkehe tsjákohá inaá tí xik'íkuan tí janhan inaá. ¹⁷ Janhan ts'ayakonhan kixin kohya nkehe

sit'aha tí sín judío la ko tí sín Jehya judío. *A* ntá jie tétōan satsjia. ¹⁸Méxra tétōan sátsjia tí tjejó tí jehe sín ḱixin takítjenkia ikon sín ḱixin í ts'ajilhya sín ntia sítie la ts'aji sín ntia t'inkaséyan la ko tsochóntahya tí jínahya kjuachaxiēn ts'etuenhen tí jehe sín. Jehe sín mé tsinkáchónki sín tí janhan. Ntá janhan ts'áyáha sín la tsjin ijie sín la ko tsjōnhen sín tí nkehe ts'áyéhe kaín tí sín tsíkjinchetjóá Dios," ichro Inchéni.

Ch'in Pablo kuítekaon ch'an tí nkehe tsik'ikon ch'an

¹⁹Mé xikaha jaha rey Agripa kjuintaxiteyáha tí nkehe k'uikuan kuixin nkaya nkajni. ²⁰Saoxín kjuákoḡa tí sín siin chjasin Damasco, la ntá chr'éxin chjasin Jerusalén, la ko kuente tí estado Judea ntá kjaxin kjuákoḡa tí sín Jehya judío. Kjuákoḡa sín ḱixin chrókuítōhe sín ijie sín, la chrókan sín chrókuinkáchónki sín Dios, la ko chrókuákoḡin sín xra jina ḱixin chaxín ó kjuítóxinhin sín tí nkehe tinkáchónki sín. ²¹Mé xikaha tí xra tséxinna tí sín judío a nkaxenhen nínko la tjinkaon sín chrók'óyána sín. ²²Ntá kjuasáyē Dios kjuinkítsana la ntoá itjēn ijie tjákoḡa kaín chojni ntsintsí la ko chojni ihyé la ninkehó k'uantaxianhya kuente tí nkehe tsíchrónka tí sín tsíchrónka itēn Dios la ko tí nkehe tsíchrónka ch'in Moisés tōnhen, ²³ḱixin t'ichjánxin its'en Cristo la ko tsoxechón ch'an inaá. Tí itēn ch'an éxí ijnko xrohi ts'inkaséyanxín tí sín siin ntihí la ko tí sín siin í so nación ḱixin tsáaxin sín.

Ch'in Pablo nixjeḡe ch'an ch'in Agripa ḱixin chrókuinkáchónki ch'an Inchéni

²⁴Mé xikaha ichro ch'in Pablo ḱixin kohya jie kjuasin ch'an ntá tí ch'in Festo mé itsen k'uèya ch'an ḱixin:

—Pablo jaha la kjá tsík'ixikján. Imá tsíkjinchekuáxian mé xikaha tsikólókoxián —ichro ch'an.

²⁵Ntá kjuátēhe ch'in Pablo ḱixin:

—Jehya tsík'ixikjánna. Jaha Festo imá tjuaha. *A* ntá tí nkehe ntáxrjan la ijnko nkehe jina la ijnko nkehe chaxín. ²⁶Ntíhi itjen tí ch'in rey Agripa. Jehe ch'an mé jina nohe ch'an kaín tí nkehe a. Méxra tjenixjaha ch'an jnkojina ḱixin ó nõna ḱixin jehe ch'an ó nohe ch'an kaín nkehe kónhen ḱixin Jehya ijnko nkehe imó kónhen tíha. ²⁷Jaha, rey Agripa, zá titekávan tí nkehe tsíkjako tí sín tsíchrónka itēn Dios ósé? Janhan la ó nõna ḱixin titekávan jaha.

²⁸Ntá kjuátēhe ch'in Agripa ntáchrō ch'an ḱixin:

—Ó antsikóá chrokuacha chrókuachrōena ḱixin chrók'ónana cristiano —ichro ch'an.

²⁹Ntá ntáchrō ch'in Pablo ḱixin:

—Ntáxrjan ḱixin á isé tsōxrjanka o á séhya la Dios mé tjinkaon ḱixin Jehya jahvá chrókuinkáchónkia ch'an. Náhi. Kjaxin tjinkaon ch'an ḱixin kaín nkexro tjejótinhin chrók'óna sín éxí tí janhan kjánchó xikahya chróchónta sín cadena.

³⁰Ntá kjuixin nixja ch'in Pablo ntá k'uinkatjen tí ch'in rey, la ko kjaxin tí ch'in gobernador, la ko kjaxin tí tjan Berenice, la ko kaín xín tí chojni tjejótaxin ntíha. ³¹Ntá kaín sín k'uaxrjenta sín la ikjo sín kichó sín. Ntáchrō sín ḱixin:

—Kohya jie tsíkjasin tí ch'in a ḱixin chrók'uēnxín ch'an la ko chrókjuak'echjinaxín ch'an ntōechiso.

³²Ntá tí ch'in Agripa ntáche ch'an tí ch'in Festo ḱixin:

—Ó nchōxon chrókjuánjuan kjuachaxin sáchrókjuí tí ch'in a tí jehe ch'an chrókjuanchahya ch'an ḱixin tí ch'in imá t'etōan sinchekitōexín ijie ch'an —mé xikaha ichro tí ch'in Agripa.

27

Ch'in Pablo sákjuí ch'an chjasin Roma

¹Ntá k'uētōan sín sátsjini nación Italia. Tí ch'in Pablo la ko í so sín tjejóchjina a mé k'uáyéhe ijnko ch'in capitán mé it'in Julio. Jehe ch'an me ijnko policía kuente tí ch'in t'etōan Augusto César. ²Ntá k'uixenhenni ijnko ntábárcō tsíkjinxín nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'in Aristarco tsíkjinxín chjasin Tesalónica nó estado Macedonia. ³*A* ntá tí yaon chr'éxin mé kjujini tí puerto chjasin Sidón. Ntá ch'in Julio mé ikjo jnkojina ch'in Pablo ntá chjéhe ch'an kjuachaxin ḱixin sátsjitsjehe ch'an tí chojni chóxin ch'an ntíha ḱixin tsjinkítsa sín ch'an. ⁴Ntá chr'éxin sákjuixinni chjasin Sidón. Ntá kjujini ijnko isla it'in Chipre la nó tja kjonni kuítōhe tíha la imá chjéhe xrintō. ⁵Ntá k'uatōyeni tí ntayaon chjinaxón chjasin Cilicia la ko Panfilia la ntá kjujini chjasin Mira estado Licia.

⁶A ntá ntíha tí ch'in capitán, tí ch'in k'uētuenhen tí sín soldado a, mé k'uitja ch'an í jnko ntábárcō tsíkjinxín nó chjasin Alejandría sátsji nó nación Italia. Ntá ntáchrō ch'an ḱixin tíha sátsjikoni ḱixin tsjijini ntíha. ⁷Nchónhya yaon kjujixinni ḱixin imá iyó la imá xra kjujini chjino chjasin Gnido. Ntá naḡa chjéhe xrintō tsanká ntá k'uátsínkani chjinaxón Salmón ntá kuinkátjixinni chjino tí isla Creta. ⁸Ntá xikahó imá xra k'uátsínkani chjinó chrínta ntá kjujini ijnko chjasin it'in Puertos jina chjino chjasin Lasea.

⁹ Ntá k'uitjáyannkí nchónhya yaon, ntá ó kjuixraká tí yaon xitjahya sátsjiko sín ntabárcø chrítaon ntayaon kixin ó kóchjina tí nchakuen kin. Méxra ch'ín Pablo nixjehe tí sín a.
¹⁰ Ntáchro ch'án kixin:

—Tinhínrá tí nkehe tsøxrjanka. T'íkuañ kixin nchónhya kjuachrakon tsonhen. Sinchek'itjáyanni tí ntabárcø a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuènte tí sín soldado a mé antsí má tjinkaon ch'án chrókuinhin tí nkehe chrónka tí ch'ín tjiko ntabárcø la ko tí nkehe chrónka tí inché tí ntabárcø a ntá tí nkehe ntáchro ch'ín Pablo la náhi. ¹² Jehya jina kixin tí puerto ntahó chrók'uejóni ntá chrók'uatšinkajia tí nchakuen kin, ichro sín. Kaín sín kjuenkayáxin sín kixin ichá jina sátsjixínni ntiha kixin ákué xitjahya chrókjujini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatšinkajia tí nchakuen kin.

Tí xrintø chjéhe chrítaon ntayaon

¹³ Ntá kjuankixin chjehe xrintø kjuixín nó sur kjánchó kánhyó fuerte ntá kjuenkayáxin sín kixin kjá jina sátsjini.

Ntá sákjuixínni ntiha kjánchó kjónté naşa sákjuíni chjinaxón tí chrínta ti isla Creta a. ¹⁴ A ntá chr'éxin ikjui ijnko xrintø kjuixín noroeste k'uíntaté tí ntabárcø. ¹⁵ La kjuankixin xrintø sákjuíko tí ntabárcø kixin tsjachahyani sátsjini tí sitjixín tí xrintø a. Ntá t'ichjánxin kuitøhèni sákjuíko xrintø tí ntabárcø tjejóxenhenni. ¹⁶ Ntá k'uatšinkani chjino ijnko isla ntá it'in Claudia kixin ntiha mé kánhyó tjian chjéhe xrintø. Ntá imá xra k'uitjáianni tí ntabárcø ntá t'etenixin nóton ntabárcø jíé. ¹⁷ Ntá kjuixín kjuínchek'it'ótjen sín tí ntabárcø ntá imá chrakon sín ntá kjuínchenteto sín tí ntabárcø jíé kixin kohya nkehe tsonhen. Kjaxin tóxakonhen sín chrakon sín tsíkijne nchesen tí ntabárcø tí tsjiji sín tí it'in Sirte. Ntá kuakjinjin sín tí ka chóna ntabárcø ntá kuitøhe sín sátsjiko xrintø. ¹⁸ Ntá tí yaon chr'éxin ntá naşa imá tjian chjéhe xrintø. Ntá ik'ue sín tí nkehe sitjinká tí ntabárcø a chrínta ntayaon kixin kánhyó tsøye. ¹⁹ A ntá tí yaon níxin a mé itjani ó kuakitsjexínni tí nkehe kuènte tí ntabárcø. ²⁰ Isé k'uíkonhyani yaon la k'uíkonhyani konosté kixin imá tjian chjéhe xrintø la ko kjaxin ó k'uitjáyenhenni kaín tí tjenkayáxinni kixin naşa chrókuaáni.

²¹ Ntá ó k'uatšínka itsjé yaon kjónehyani ntá k'uíntatjen ch'ín Pablo nixjehe ch'án kaín tí sín tjejóxenhèn ntabárcø a ntáchro ch'án kixin:

—Chrókuitékáonrá tí nkehe xrxjanka kixin chrókuitøhèni tí estado Creta ntá chrók'uitjáyenhanyi tí nkehe tjinká tí ntabárcø a. ²² A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárcø la ts'itjáyán. ²³ Ntá tí tie a mé k'uíkuañ ijnko ángel tsíchr'án Dios tinkachónkia la ko t'aha xra. ²⁴ A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'ín César t'etøan la kjaxin Dios la tsjinkítsa jaha la ko tí sín tjejóka kixin ts'enhya sín.” ²⁵ Méxra chróchrakonhyará jahará kixin tí Dios tinkachónkia la chaxín nchexiteyá tíha, éxi tsíntáchro tí ángel. ²⁶ Kjónté ó jehi t'ichjánxin sátsjikoni xrintø ijnko nonte jnkosiné ntayaon —ichro ch'án.

²⁷ Kjuixín k'uatšínka iyó semana ntá ijnko tie ntá kjujini ijnko ntayaon it'in Adria ntá sákjuíko tí ntabárcø ijnko lado la i jnko lado ti xrintø. Ntá chjino k'áxrótjen ntá tí sín tjiko ntabárcø mé ó kónohe sín kixin ó chjina kjuixraká sín ijnko nonte xamá. ²⁸ Ntá kjuáchrøa sín tí nkekjañ nñkaxín tí ntá mé chóna treinta y seis metro nñkaxín. Ntá sákjuíni kjínhya la ó xíkjachrøa sín la veintisiete metro ó nñkaxín. ²⁹ Imá chrakon sín kixin ts'itjatøn tí ntabárcø itjo ntá kjuinkajin sín noó chica gancho tí nóton tí ntabárcø a kixin ntahó tsochónhen tí ntabárcø hasta chrók'uinkaséyan. ³⁰ Ntá tí sín tjiko ntabárcø kjuenkayáxin sín sáchrókjui sín ntá kjuankixin kjuinkajin sín tí ntabárcø ntá chrítaon ntá éxi tjinkaon sín chrókjuinkajin sín tí gancho chóna tí kja ntabárcø. ³¹ A ntá ch'ín Pablo ntáche tí ch'ín capitán la ko kaín tí sín soldado kixin:

—A ntá tí tsitøehya tí sín i ntihi nkaxenhen ntabárcø ntá xitjahya tsaará —ichro ch'án.

³² Ntá tí sín soldado a mé kóchrínjint'ø sín tí hno kuènte ntabárcø ntá tsitøhe sín tsjankí ntá.

³³ Ntá chjina t'inkaséyan a ntá ch'ín Pablo nixjehe ch'án kaín tí sín siín ntiha ntáchro ch'an kixin chrókjóne sín ichrén nkehe. Ntáchro ch'án kixin:

—Ó k'uatšínka iyó semana k'uejóchrinhyará la ko kjóntehyará. ³⁴ Tinhínrá t'ichjánxin chrókjónterá ichrén nkehe tí tjinkáonrá tsaará kixin ntihi la kohya nkexro ts'itjáyán la nijnko tí kaxihi chóna kjará ts'itjáyán.

³⁵ Ntá xjáhaha ichro ch'ín Pablo ntá kuákja ch'án ijnko niøtja a la ntiha tí tjejó kaín sín ntá kjuanchia ch'án kjuasáyé Dios ntá kóchrít'ø ch'án ntá kjuankixin kjóne ch'án. ³⁶ Ntá kóchéhe sín kaín sín kjuankixin kjóne sín kjaxin. ³⁷ Kaínni tsík'ixenhenni ntabárcø mé iyó ciento setenta y seis chojni. ³⁸ Ntá kjuixín kjóne sín la kókehe sín ntá ik'ue sín tí noa trigo a tjinká tí ntabárcø a chrínki tí ntayaon a kixin kánhyó tsøye tí ntabárcø a.

Tí ntabárc̄o kjuixin k'uániánkí nt̄a

³⁹ A ntá ó k'uínkaséyan, a ntá tí sín tjiko ntabárc̄o la kjuátsoanhya sín tí nonte ntá k'uíkon sín ijnko chrínta nt̄a. Ntáchro sín ḱixin ákué tsjachahya sín sátsjiko sín tí ntabárc̄o ntíha. ⁴⁰ Ntá kóchrinjint'q̄ sín tí hñq̄ síchroéxin tí gancho ḱixin ntahó tsitq̄e chrínkí ntayaon. Ntá kjuínchentá sín tí nkehe tjikoxín sín tí ntabárc̄o a. Ntá kjuínchek'ít'ótjen sín tí ka tjiko nkayakon tí ntabárc̄o. A ntá tí ntabárc̄o kjuanḱixin sákjuj chrínta nt̄a. ⁴¹ Xrínahya kjuuji ntabárc̄o tí iyó kójnkójiéxin ntayaon ntá ntíha kjuíkjiat'ó tí kja tí ntabárc̄o tí nchesen síin ntíha. Ntá í xitjahya nchekínkí ninkehó, a ntá nóton tí ntabárc̄o kjuanḱixin síxika ḱixin imá sítji chjéhe nt̄a a. ⁴² Ntá tí sín soldado a mé tjinkaon sín chrók'óyan sín tí sín tjejóchjina ḱixin tjinkakonhya sín ḱixin ninkexró sáchrókjui ókjé. ⁴³ A ntá tí ch'ín t'etuenhen tí sín soldado a mé tjinkakonhya ch'án ḱixin its'en ch'ín Pablo ntá kjuanjonhya ch'án kjuachaxin. Íchá k'uetq̄an ch'án ḱixin tí sín jína tjitaón nt̄a la senó sátsji sín ḱixin tsjiji nonte xámá ⁴⁴ la ko tí sín noehya tsjitaón nt̄a a mé sátsjiko sín tí ntaba la q̄ it'q̄o tí ntabárc̄o. Ntá xíkaha kaín ní kjujini tí nonte xámá la ó kuaáni.

28*Itjen ch'ín Pablo tí isla Malta*

¹ Ntá tió tjejóni kaín ní kuaáni ntá kónoheni ḱixin tí isla la mé nchek'in sín Malta. ² A ntá tí sín chjasin ntíha mé imá jína kjuínkítsa sín kaín ní la kjuaka sín ijnko xrohi jié ḱixin imá ḱin ḱixin sít'aniá chrin. Ntá k'uéya sín ḱixin tsochjinani kaín ní tsochjixroheni. ³ A ntá ch'ín Pablo mé sákjuikalja ch'án í so nio tsixámá ntá kjuasinkáte ch'án tí xrohi a. Ntá xrínahya k'uarxrenḱixin ijnko konche tí xrohi a ḱixin imá sóa ntá xrínahya k'uísímá itja ch'ín Pablo. ⁴ Ntá tí sín chjasin ntíha mé k'uíkon sín tí konche kjitjankítjen itja ch'án ntá ikjo sín kichó sín. Ntáchro sín ḱixin:

—Kjá tí ch'ín a la ijnko chojni tsikjaya a ḱixin kjónté kuaá ch'án k'uénxinhya ch'án ntayaon la Dios la í tjinkakonhya ḱixin naxá tsjak'echón ch'án.

⁵ A ntá jehe ch'án kótsjénka ch'án itja ch'án chrítaón tí xrohi ḱixin ntíha ts'anótjen tí konche, ntá jehe ch'an la kohya nkehe kónhen ch'án. ⁶ Ntá kaín sín tjejóchónhen sín ḱixin ách'e ts'atjoyé itja ch'án q̄ ách'e its'en ch'án. Ntá kjuixin k'uejóchónhen sín isé la k'uíkon sín ḱixin kohya nkehe kónhen ch'án ntá kjuítóxin sín tí nkehe kjuenkayáxin sín la ntáchro sín ḱixin jehe ch'án mé ijnko dios tíha, ichro sín.

⁷ Ntá chjino tí k'uejóni a mé itjen nontq̄e ijnko ch'ín t'etq̄an kuénte isla me it'in Publio. Mé jína kjuanjon ch'án kjuachaxin k'uejóni ntq̄e ch'án la kjuanjon ch'án nkehe kjóneni iní yaon. ⁸ Ntá it'é tí ch'ín Publio a mé tjetsínka ch'án ḱixin níhi ch'án chóna ch'án sóa la ko chinjni. Ntá ch'ín Pablo sákjuitsjehe ch'án la kjuixin níxjehe ch'án Dios, ntá kjuak'etja itja ch'án tí ch'ín a ntá kuitq̄e ch'án jína. ⁹ Mé xíkaha kjaxin kóchjina í so tí sín níhi síin tí isla ntá kaín sín kuitq̄e sín jína. ¹⁰ Na ntá imá kjuikosáyehe sín ch'án. A ntá chr'éxin tió kjuixin k'uixenhenni ntabárc̄o inaá ntá kjuanjon sín kaín nkehe t'ichjánxinhinni sátsjikoni.

Kjuuji ch'ín Pablo chjasin Roma

¹¹ Ntá k'uátsínka iní nitjó tjejóni tí isla ntá k'uixenhenni ijnko ntabárc̄o mé ntahó tsikítq̄e k'uátsínkajia tí nchakuen ḱin. Tí ntabárc̄o a mé tsíkjixin chjasin Alejandría la ko mé chóna nkehe tsíkjangya chóna ihnjé dios Cástor la ko Pólux. ¹² Ntá sákjuíni ntá kjujini puerto chjasin Siracusa la ntaha kuitq̄eheni iní yaon. ¹³ Ntá xík'ixenhenni tí ntabárc̄o la k'uátsínkani chjinaxón tjen ijnko nonte ntá kjujini chjasin Regio. Ntá tí yaon chr'éxin a ntá kjuanḱixin chjéhe xrínto kjuixin nó sur, ntá yaon yóxin ntá kjujini chjasin Puteoli. ¹⁴ Ntá ntíha xetani iso kichó ní, a ntá tjinkaon sín ts'ejókoni sín ntíha. Ntá k'uejókoni sín ijnko semana ntá chr'éxin sákjuíni chjasin Roma. ¹⁵ Ntá tí sín kichó ní chjasin Roma la ó nohe sín ḱixin tsjijini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án. ¹⁶ Ntá tió kjuuji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuitq̄e ch'án ókjé kjuak'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

¹⁷ Ntá k'uátsínka iní yaon ntá tí ch'ín Pablo a mé k'uíyehé ch'án kaín tí sín judío tjetq̄an kuénte chjasin Roma. Ntá tió kjuixin kójnkotsé kaín sín ntá ntáchro ch'án ḱixin:

—Kíchóni, kohya ninkehó jje kjuásian ḱixin chrókóninkakonna tí sín judío la jehya ḱixin ninkakonxian tí nkehe k'uekínkáchónki tí sín tsik'axrjenixinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a. ¹⁸ Ntá k'uitjahya sín ninkehó jje chonta. Ntá tjinkaon sín chrók'uatjántana sín ḱixin k'uitjahya sín ninkehó jje chrók'ueñxian. ¹⁹ A ntá tí sín judío a mé imá kónínkaon sín tjanchia sín jje. Ntá t'ichjánxín tsjanchiani ḱixin tí ch'ín César mé chrókjuinchekitq̄exin ch'án nkehe tí jje chóntani,

kjónté chóntahyani ninkehó jje ts'eka tí sín tí nació n kuènténi. ²⁰ Méxra k'uíyahará kixin tjinkaonni ts'íkuan tí jahará la ko tsonixjaharáni kixin tinkáchónkini tí nkexo tjejóchónhen kaín tí sín israelita mé xikaha t'ikonrá kixin tjechrontetoxínni cadena ntihi.

²¹ Ntá ntácho sín kixin:

—K'uáyèhyani ninkehó xroon chrókjuixin Judea kuènte tí jaha la ko kuihya nijnko tí sín kichó ni judío chróntácho sín ichrén nkehe jínahya tsíkijch'e. ²² Tjinkaonni chrókuinhini nkexrí tjenkayáxian kixin ó noheni kixin itsjé chjasin t'ántaxínjin sín tí nkehe nixin tjákua —mé xikaha ichro sín.

²³ Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuènté yaon chrónka ch'án nkexrí tí kjuachaxin kuènte Dios. Nixjehé ch'án sín kixin chrókuitekaon sín tí nkehe kjuako ch'ín Jesús, la chrónkaxín ch'án kixin nkexrí nixja tí ley kuènte ch'ín Moisés la ko tí tsíkjin tí sín profeta ósé. ²⁴ Ntá iso tí sín mé kuítekaon sín tí nkehe ntácho ch'ín Pablo. A ntá í so sín na kuítekakonhya sín. ²⁵ Ntá jnkokoáhya kjuenkayáxin tí jehe sín la iso sín tjinkaon sín kixin sáchrókjui sín, ntá ch'ín Pablo mé ntácho ch'án kixin:

—Ntoá nixja tí nkehe chénka Nchakuen Dios tí sín tsik'axrjenixinni ósé chrónkaxín ch'ín profeta Isaías ntácho kixin:

²⁶ Sátjia nixjehé tí chojni a kixin jehe sín kjónté tjejótinjin sín la tienxínhya sín, la kjónté tjejótsjehe sín la t'ikonhya sín.

²⁷ A ntá asén tí chojni tí chjasin i la tsík'óna imá cha la ntatsjon sín la tsík'ikjehé la ikon sín la tsíchr'áto kixin t'ikonxínhya sín

kixin tinhín sín la tjinkakonhya sín chrókuienxín sín, la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kixin ntá janhan chrókjuuntakitohá sín jína.*

Mé xikaha tsíkjin ch'ín Isaías. ²⁸ Méxra chrókónohará jahará kixin ijie tí sín jehya judío me ts'áyéhe sín tí nkehe tsjanjon Dios tsaáxin sín kixin jehe sín mé tsinhin sín.

²⁹ Ntá xikaha ichro ch'ín Pablo ntá tí sín judío sákjuí sín la tinkákjo sín kichó sín.

³⁰ A ntá ch'ín Pablo kuítóhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjé tí sín kjujitsjehe ch'án. ³¹ La kjuako ch'án tí kjuachaxin kuènte Dios la ko kjuako ch'án kuènte Ìnchéni Jesucristo. La kohya ninkexró k'uínkákonhen tió kjuako ch'án. Ó tjen.

* 28:27 28.26–27 Isaías 6.9-10

Tí xroon ikjin ch'ín Pablo chr'énhen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'ahá xrá Jesucristo mé kjian tí xroon i. Kjueyána Dios kixin sít'ahá ch'án xrá tsjákuá tí tan jína tsaáxinni.

² Tíha mé tsintácho Dios senó kixin tsoxiteyá éxi níxja tí xroon níxjaxin tí sín tsíchronka itén ch'án ósé. ³ Tí tan a mé chrónka nkexrí tjen Ìnchéni Jesucristo Xjeen Dios. Jehé ch'án mé tsík'óna ch'án chojni k'uaxrjenixin ch'án tí sín tsík'axrjenixin tí rey David. ⁴ Tí kjuachaxin jie mé kjuákoxin kixin jehe ch'án mé chaxin Xjeen Dios kixin ó xechón ch'án la chóna ch'án Nchakuen Dios imá tjetóan. ⁵ Kjuasáyé Jesucristo k'uáyéheni kjuachaxin kixin sich'ehe ni ch'án xrá sátsjichronkaxinni itén ch'án kixin kaín xin chojni chónhya ch'án kuenté chjasintajni chrókuitekaon sín ch'án la ko chrótjuehe sín ch'án. ⁶ Jahará k'uék'ejorá éxi tjejó tí jehe sín, a ntá jie la kjueyará Dios kixin chrókuitekáonrá Jesucristo.

⁷ Janhan ikjian tí xroon chr'anhánrá kaín rá tjejórá chjasin Roma. Tjuahará Dios la kjueyará ch'án kixin tjóá chrók'uejórá. Kjuasáyé It'éni Dios la ko Ìnchéni Jesucristo kixin kjuanjón ch'án kjuaxróxin k'uayéhérá.

Ch'ín Pablo tjínkaon chrókjuitsjehe ch'án chjasin Roma

⁸ Xrankixín kjuachaxién Jesucristo tjáncháxian Dios kjuasáya kixin jahará ó kuítekáonrá ch'án la ko nkuixín chjasintajni níxja sín nkexrí tinkáchónkirá ch'án. ⁹ Dios, tí nkexro t'ahá xrá kaín asenná xrjanka tí tan jína kuènte Xjeen ch'án, mé nohe ch'án kixin xráxin xráxinkavan tí jahará tió níxjahá ch'án. ¹⁰ Xráxin tjáncháha Dios kixin tí chrókjuanjón ch'án kjuachaxin la chrókjuasántsahará. ¹¹ Kixin tjínkavan chrókjuasántsahará tí jahará kixin chrókjuinkítsa tí jahará kixin chrók'uitjará jina nkexrí chrók'uejórá ntoá. ¹² Mé xíkaha tsócháhará la ko tsóchána kixin jnkokoá tinkáchónkini Ìnchéni, jahará la ko janhan.

¹³ Kichóni, tjínkavan chrókónohará kixin nchónhya veces tjínkavan chrókjuasántsahará kjánchó naxa xitjahya tsjasán. Tjínkavan chrókjuasán kixin chrókjuít'a xrá kuènte Ìnchéni kixin chrókjuachani nchónhya chojni chrókuinkáchónki Dios éxi kjuít'a xrá í so chjasin naxa chónhya sín Dios. ¹⁴ T'ichjánxin tsjákohe kaín chojni, á chojni griego o á chojni jehya griego o á chojni nohe o á chojni noehya. ¹⁵ Mé xíkaha xrá ó tjéchonhan chrókjuasán chrókjuákohará tí tan tsaáxinrá tí jahará tjejórá chjasin Roma.

Tí kjuachaxin kuènte tí tan jína

¹⁶ Tósuánahya xrjanka tí evangelio kixin táha ijnko tan jína kixin chóna kjuachaxin kuènte Dios chrókuaáxin kaín xin tí chojni chrókuitekaon, mé saoxín tí sín judío la ko kjaxin tí sín jehya judío. ¹⁷ Kixin tí tan jína kuènte Dios tjákuexin tí jeheni kixin chrókótjuáxin ijéni kixin tinkáchónkini ch'án la jehó ch'án tinkáchónkini. Exí ntácho xroon itén Dios kixin: "Tí nkexro kótjóá kixin kuítekaon sín Dios mé táhó ts'ejóchónxin sín."^{*}

Tí jie tjasin chojni

¹⁸ Dios tjen nkaya nkajni mé tsonínkakonhen ch'án tí sín jínahya tjasin jie, mé sinchekjasóte sín ch'án. Tí jie jínahya tjasin sín mé t'inkákonhen kixin chrókónohe sín tí nkehe jína chaxín. ¹⁹ Jehé sín ó nohe sín jína nkexrí tjen Dios kixin jehe ch'án kjuakuexin ch'án tí jehe sín. ²⁰ Tí kjuachaxin kuènte Dios kjónté t'ikonhyani la kjánchó noexinni kixin tí nkehe kjuich'éna ch'án. Kixin tí naxa k'ónahya chjasintajni kónoxin kixin jehó ch'án mé Dios t'etóan la ko chóna ch'án kjuachaxin jnkochrín. La ntá tí sín jínahya xitjahya tsontácho sín kixin k'uénoehya sín. ²¹ Kjónté nohe sín kixin xíkaha itjen Dios la tjikosáyeheya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sinklhya kixin jínahya asén sín la tí sítie ó kuithe sín. ²² Kjónté ntácho sín kixin imá nohe sín kjánchó imá lonjí sín kixin ántsi kjuasin sín jie. ²³ A ntá ó kjuixin kjuinkí sín tí nkehe tinkáchónki sín la ko kuítekakonhya sín tí kjuachaxién Dios itjen jnkochrín, t'enhya. A ntá jie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxé tsíkjanoya la ko konche la ko iko chóna noó toté.

²⁴ A ntá xíkaha Dios kuithe ch'án tí jehe sín kixin chrókjuich'e sín tí nkehe jínahya tjenkayáxin sín ntá xíkaha ch'e sín ijnko nkehe chrókósuéxin sín ch'ehe kichó sín ²⁵ kixin kuítekakonhya sín tí nkehe chaxín kuènte Dios, a ntá tí nkehe jínahya mé kjueyá sín. Kjuich'éna sín dios kuènte sín tí nkehe tsíkijch'éna Dios. A ntá tí nkexro kjuich'éna tí nkehe la

* 1:17 Habacuc 2.4

titekakonhya sín. Jehe ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe sín mé kuènte ch'án. Amén.

²⁶ La ntá xikaha kjuich'e sín ntá Dios kuítøhe ch'án tí jehe sín kixin chrókjuich'e sín tí nkehe chrókøsuèxin sín chrókjuich'e sín. Kjónté tí chojni chjin la kuítøhe sín tí ichjin sín la ntá kjuich'èna sín asén sín chojni ntoa. ²⁷ A ntá kjaxin xikaha tí chojni ntoa kuítøhe sín chróhonta sín chojni chjin la tjinkaon sín tí nkehe ntoáhya. La ntá ch'e sín nkehe chrókøsuèxin sín ch'ehe kichó sín jnkokón ntoa sín. Mé xikaha mé tí cuerpo kuènte sín mé tsjasótèxin sín tí jie kjuasin sín.

²⁸ Tjinkakonhya sín tsoxraxinkaon sín Dios ntá jehe ch'án mé kuítøhe ch'án tí jehe sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuich'ehya sín. ²⁹ Nchónhya jie chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróhonta sín tsjé nkehe, la ko imá tjasin sín jie, la ko jehe sín chjinoxínhin sín, la ko tjinkaon sín chrók'óyán sín kichó sín, la ko itje sín kjuanínkaon, la ko ch'ía sín la ko jínahya sín xriko sín kjuach'ia. ³⁰ T'ántaxínhin sín kichó sín la ko nínkakonhen sín Dios, la ko jehó sín chrók'uetøan sín, la ko nchehnke sín, la ko jehó sín ch'èna sín nkehe jínahya tjasixín chojni jie, la ko tjikosáyehya sín it'é sín la ko iné sín. ³¹ Tienxínhya sín la nchexitèyáhya sín nkehe níxja sín, la ko tjuèhya sín kichó sín, la ko tjinkakonhya sín sinchek'itjáyenhen sín ichren jie kjuasinhin kichó sín, la ko tikonóèhya kichó sín. ³² Jehe sín ó nohe sín jína kixin nkexri k'uetøan Dios la jehe sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naḡa tjasin sín jie la kjaxin chéhe sín chrók'uikon sín ókjé nkexro chrókjuasin jie xikaha.

2

Dios nchekitøexín ch'án tí jie tjasin chojni

¹ Mé xikaha jahará xitjahya tsontáchrórá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xritjéyará nkexri chrókjuasótèxinrá kjaxin kixin jahará jnkokón jie tjásinrá. ² Ó noheni kixin ntoá sinchekitøexín Dios tí jie kjuasin chojni kixin sinchekjasóte ch'án tí sín xikaha tjasin jie. ³ A ntá jahará la tékará jie í so chojni ntá jahará kjaxin la xikaha jnkokón jie tjásinrá. ¿Á tjenkayáxinrá kixin tsjachará tsinkehérá tí sinchekjasótiará Dios ní? ⁴ ¿Á kjoniehérá tí kjuaxróxin tsjéjehya tjanjon Dios kixin tjechónhen ch'án naḡa nínkakuanhyará ch'án? A ntá jahará la kuiénxinhyará kixin Dios tjuáhará kixin tjinkaon ch'án chrókjuítøhérá tí nkehe jínahya tjenkayáxinrá. ⁵ Kjánchó jahará imá icha asánrá, tjinkákonhyará chrókjuítøhérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótèxinrá tí yaon tsjixixín tió tsnonoxín kixin sinchekjasóte Dios chojni. ⁶ Jehe ch'án mé tsjenkehe ch'án jnkojnko chojni nkehe tí xṛa tsíkijch'e sín. ⁷ Tsjanjon ch'án kjuachón ts'áyéhe tí sín tjeýa sín tí nkehe náxrjón la ko tí kjuachaxin ts'itjáyanhya la ko xráxín kjuich'e xṛa jína. ⁸ A ntá tsónínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhi, la íchá má kóxrjinhjin sín kjuich'e sín tí nkehe jínahya. ⁹ Mé xikaha tsjasóte sín la ko kjuaxróxinhya tsønhen kaín tí sín kjuich'e tí nkehe jínahya, mé senó tí sín judío la ko kjaxin tí sín jehya judío. ¹⁰ A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikósáyehe ch'án kaín tí sín kjuínchexitèyèhe ch'án kjuich'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kixin kaín chojni la jnkokón sínkí. ¹² Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótèxin sín. ¹³ Jehya tí sín ó chrókuinhón tí ley la ó chrókótjuáxin ijé sín. Náhi. Tí sín sinchexitèyèhe sín tí nkehe k'uetøan Dios mé tsotjuáxin ijé sín. ¹⁴ A ntá tí sín jehya judío chónthaya sín tí ley t'etuenhen sín la ntá tió jehó sín chrókjuínchexitèyèhe sín éxí níxja tí ley la jéhi jehó sín t'etuenhen asén sín. ¹⁵ Kixin tí kjuínchexitèyá sín ch'e sín tí nkehe jína mé tjakoxín sín kixin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín o náhi. ¹⁶ Itsi tí yaon la Dios mé sinchekitøexín kjuachaxin Inchéni Jesucristo kaín nkehe imó kjuich'e chojni éxí níxja tí tan jína tjákua janhan.

Tí sín judío la ko tí ley tsíkjin ch'ín Moisés

¹⁷ A ntá jahará ntáchrórá kixin jahará judiorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios. ¹⁸ Ó nohará tí nkehe tjinkaon Dios la ko tí ley ó kjuakøhará kixin chrókjuéyará tí nkehe jína. ¹⁹ Ihnkerá kixin nohará tsjákohérá tí sín t'ikonhya la ko jahará mé xrohí ts'ínkáséyanxín tí sín ixri sitié, ichrorá. ²⁰ Ntáchrórá kixin nohará tsjákohérá tí sín noehya la ko tsjínkítsará tí sín tienxínhya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá. ²¹ Jahará tjákohérá í

so chojni, a ntá jahará, ¿nkekuènté tjákoéhyará asánrá xíkaha? Jahará tjákoherá chojni kixin chrókueéhya sín, a ntá jahará la, ¿nkekuènté teerá? ²² Ntáchrorá kixin xitjahya tsochónta chojni yaá chojni chjin, a ntá jahará la, ¿nkekuènté xíkaha ch'erá? Ntáchrorá kixin titekákonhyará tí nkehe tsikjanoya, kjánchó jahará, ¿nkekuènté teerá tí nkehe tjeté siin nkaxenhen nijnko? ²³ Nchehnerá kixin chontará tí ley, a ntá jahará chontahyará kjuasáyé Dios kixin kjuinchexiteyáhyará éxi k'uetóan tí ley. ²⁴ Ntoá ntáchro tí xroon itén Dios kixin: "Tí sín jehya judío la t'ántaxínjin sín Dios kixin tí ijjárá."

²⁵ A ntá tí chaxín kjuinchexiteyárá tí ley tsíkjin ch'in Moisés la ntá jehya chónkó tsikará xroye. A ntá tí kjuinchexiteyáhyará tí ley la éxi tsikahyará ninkehó xroye. ²⁶ A ntá tí sín tsikahya xroye kjánchó titekaon sín nkexrí t'etóan tí ley la tjejó sín éxi ó tsíka sín xroye kjónté chaxínhya chónta sín. ²⁷ A ntá tí nkexro kuáhya xroye tí cuerpo chónta kjánchó nchexiteyéhé tí ley, mé jehé sín tsjanchia sín jie tí jahará kixin jahará kuítékákonhyará kjónté chontará tí xroon nixja tí ley la ko kjónté ó tsikará xroye. ²⁸ A ntá tí xíkaha la chaxínhya judío jahará kixin ó ntója ó chontará xroye la chaxínhya tsikará xroye kixin chrítaón cuépporá ó, chontará. ²⁹ A ntá tí chojni chaxín judío la t'ichjánxin chróchónta sín xroye nkaya asén sín. Jehya tí ley chrók'uetóan xíkaha chrókonhen. Náhi. Táha la Nchakuen Dios. Jehya kixin chojni chrókórxjínjin kixin ó nchóxon. Náhi. Dios mé tsórxjínjin kixin nchóxon tíha.

3

¹ ¿A ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye? ² Chaxín xíkaha jína kixin Dios kjuanjón tí itén ch'an saoxín k'uáyéhé tí sín judío kixin chrókjuinchexiteyá sín. ³ A ntá ¿nkehe tsonhen tí jnkójin tí jehé sín chrókjuinchexiteyáhya sín? Kjónté xíkaha chrókjuich'e sín la, ¿á chrókúitóhe Dios chrókjuinchexiteyáhya ch'an tí nkehe tsintáchro ch'an? ⁴ Kjá náhi. Dios la sinchexiteyá káin nkehe tsintáchro ch'an kjónté káin chojni chrókjuich'ia. Ntáchro xroon itén Dios kixin: Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jie.*

⁵ Tí jie chóntani mé tjákoxin kixin Dios mé nohe nkexrí sinchekitóexín ch'an ijjé chojni. ¿A ntá nkehe chróchroni? ¿A ntoáhya chrókjuich'e Dios kixin chrókjuinchekjasóteni ní? (A ntá janhan nixja éxi nixja chojni ó.) ⁶ Kjá náhi. A ntá tí jehya ijnko nkexro jína tí jehé ch'an, ¿ntá nkexrí chrókjuinchekitóexín ch'an ijjé chojni chjasintajni?

⁷ A ntá tí chrókjuínkítsa tí kjuach'ia kuèntana kixin chrókónoaxínrá tí nkehe chaxín kuènte Dios, ¿a ntá nkekuènté ts'ekaráni jie kixin janhan mé ijnko chojni chónta jie? ⁸ Tí xíkaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xíkaha ichro iso chojni t'ekani jie kixin xíkaha tjakoni, ichro sín. Tí sín a chrókjuasóte sín kixin xíkaha ichro sín.

Káinni chóntani jie

⁹ ¿Ntá nkexrí? Jeheni judíoni la, ¿á antsí má tjeoanni, a ntá tí sín í so la, á náhi? Kjá náhi. Kixin káin ní chojni judíoni la ko tí sín jehya judío mé káin ní kjuinchexiteyéhéni tí jie kjuasinni. ¹⁰ Ntáchro tí xroon itén Dios kixin:

Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxín,

Kohya ninkexró chrókjuéyá Dios.

¹² Káin chojni k'uék'aji sín tí ntja jínahya la ko káin chojni jnkokón k'uáji sín ntoáhya,

kohya ninkexró chrókjuich'e tí nkehe jína la kohya nijnko chojni.†

¹³ Tí isin chojni la éxi tòye tsíxrankehe tsíxravá chojni

kixin tí nejen chojni ch'iyaxín.

La tí veneno kuènte konche chónta ir'va chojni.‡

¹⁴ Tí ir'va chojni tsíkaón nkehe jínahya la ko kjuáninkaon.§

¹⁵ Xritinká sín kixin tjinkaon sín chrók'óyan sín chojni.

¹⁶ Tí ntja k'uáji sín tío xíkaha kjuich'e sín mé kjuinchek'itjáyán sín káin kjuaxróxin k'uéchónta ókjé chojni.

¹⁷ Chónhya sín tí ntja tjanjon kjuaxróxin*

¹⁸ kixin kjuenkayáxinhya sín chróchrakonhen sín Dios.†

Mé xíkaha ntáchro itén Dios.

¹⁹ Ó noheni kixin káin tí nkehe nixja tí xroon chónta tí ley mé k'uetóenhen káin tí sín tinkáchónki tí ley kixin ntá káin chojni chjasintajni chrótáni sín kixin káin chojni tsjasóte kixin Dios mé sinchekitóexín ijjé káin chojni. ²⁰ Kixin ninkexró chrókjuacha chrókótjuaxín

* 3:4 Salmo 51.4 † 3:12 3.10-12 Salmo 14.1-3, Salmo 53.1-3 ‡ 3:13 Salmi 5.9, 140.3 § 3:14 Salmo 10.7

* 3:17 Isaías 59.7-8 † 3:18 Salmo 36.1

ijjé sín ḱixin chrókuinchesteyéhe sín tí nkehe t'etqan tí ley. Tí ley la jehó ch'e xra tsoñoexinni ḱixin chóntani jie.

Tsaáxinni ḱixin tinkáchónkini Cristo

²¹ A ntá jehya tí ley chrókuaáxinni. La ntá ó kónoxin nkexrí Dios tsaáxinni la kjaxin tí xroon chónta ley la ko tí nkehe nixja tí sín profeta la ó nixja xikaha. ²² Tsotjuáxin ijjéni ḱixin titekaonni Jesucristo ḱixin kaín chojni chrókuaáxin tí tsitekaon sín tí jehe ch'án ḱixin t'ikon ch'án ḱixin jnkokón tsjehe kaín chojni. ²³ Ḱixin kaín xín chojni kjuasin jie la k'uáyéhya sín tí kjuachaxin chrókuaáxin sín. ²⁴ A ntá kjuasáyé Dios ḱixin k'uenyákonhenni Cristo Jesús la kótjuáxin ijjéni. ²⁵ Dios mé ichr'án ch'án Cristo, kuámá ijjéni, k'uenyákonhenni ch'án ḱixin chrókuinkáchónkini ch'án ntá chrókuaáxinni. Mé xikaha kjuich'e Dios ḱixin kjuakoxin ch'án ḱixin ntoá kjuenkayáxin ch'án ḱixin kónínkakohya ch'án kjónté nchónhya jie tsikjasinni senó. ²⁶ Xikaha kónhen kjuakoxin Dios ḱixin jína ch'án ijie la naxa tjechónhen ch'án sinchetjóá ch'án ijjé tí sín kuitekaon Jesús.

²⁷ A ntá ¿nkekuènté chrókuinchehnenki? Xitjahya sinchehne chojni nkayakon Dios ḱixin jehya ḱixin kjuinchesteyéheni tí nkehe k'uetqan tí ley ntá chrókuaáxinni. Náhí. Ḱixin Inchéni kuitekaonni ntá kuaáni. ²⁸ Mé xikaha ó noheni ḱixin tsotjuáxin ijjéni tí tsitekaonni Dios ḱixin Dios tahya cuenta á kjuinchesteyéheni tí nkehe k'uetqan tí ley.

²⁹ ¿Xá Dios mé kuènte tí sín judío ó? ¿Á kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío. ³⁰ Ḱixin kohya í jnko Dios la jehe ch'án sinchetjóá ch'án ijjéni ḱixin tinkáchónkini ch'án la tahya ch'án cuenta á chóntani xroye o náhi. ³¹ A ntá tí tinkáchónkini Inchéni, la ¿á í chrókuinchesteyáhyani tí ley? Kjá náhi. Ichá qantsí má jína chrókuinchesteyéheni tí ley.

4

Tí kjuakoxin ch'ín Abraham

¹ ¿Nkehe tsixroni ḱixin nkehe k'uitja ch'ín Abraham, tí nkexro k'uaxrjeníxinni ósé? ² Ntá ch'ín Abraham tí chrókótjuáxin ijjé ch'án ḱixin tí xra kjuich'e ch'án ntá chrókóhne ch'án, kjónté jehya nkayakon Dios. ³ A ntá ntáchro xroon itén Dios ḱixin: “Ch'ín Abraham kuitekaon Dios ntá táhó kuaáxin ch'án la ko kótjuáxin ijjé ch'án.”* ⁴ Jnkójín chojni kjuich'e xra la jehya k'uáyéhekoá ch'án tí chichaon. Náhí. Táha la tí xra kjuich'e ch'án mé kjuacha ch'án. ⁵ A ntá kjónté jnkójín chojni kjuich'e hya ninkehó xra ntá chrókuitekaon ch'án Dios a ntá Dios la sinchetjóá ch'án kjónté tí nkexro chónta jie, ḱixin tí kuitekaon ch'án Dios la táhó mé kuaáxin ch'án. ⁶ Mé kjaxin tsintáchro ch'ín David ḱixin náxrxón tí nkexro kótjóá ḱixin Dios kuáhya kuéntá nkeri jie tsikjasin ch'án. ⁷ Ntáchro ch'ín David ḱixin:

Náxrxón tjejó tí nkexro kjuinchesteyéheni Dios kjónté jínahya kjuich'e sín la kjuakjlin ch'án ijjé sín. ⁸ Náxrxón tjejó tí nkexro ḱixin Inchéni kuáhya ch'án kuéntá tí jie k'uéchónta sín.†

⁹ ¿Á jehó tí sín ikuá xroye la náxrxón tjejó sín o á kjaxin náxrxón tjejó tí sín chóntahya xroye? Ó chrónkani ḱixin Dios la kujikonóhe tí ch'ín Abraham ḱixin kuitekaon tí jehe ch'án la táhó mé kótjuáxin ijjé ch'án.‡ ¹⁰ ¿A ntá nkesá tsikjincheyaoon Dios tí ch'ín Abraham? ¿Á ó tsíka ch'án xroye o naxa náhi? Kjá naxa náhi. Senó tsikjincheyaoon Dios tí jehe ch'án. ¹¹ Ntá chr'éxin ch'ín Abraham ikuá ch'án tí xroye éxí jnko sello kjuakoxin Dios ḱixin ó kótjuáxin ch'án ḱixin kuinkáchónki ch'án Dios. Ḱixin ntá xikaha ts'óna ch'ín Abraham xjeen kaín chojni tinkáchónki Dios, kjónté chojni tsikahya xroye. Ntá kjaxin jehe sín la Dios sinchetjóá ijjé sín. ¹² La ko jehe ch'ín Abraham mé ts'axrjeníxin ch'án kaín tí sín tsíka xroye ḱixin ntá chrókuinkáchónki sín éxí kuinkáchónki tí jehe ch'án kjónté naxa tsikahya ch'án xroye.

Tí nkehe tsintáchro Dios la tsoxiteyá ḱixin tinkáchónki sín tí jehe ch'án

¹³ Dios tsintáche ch'ín Abraham ḱixin jehe ch'án la ko tí sín ts'axrjeníxin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya ḱixin kuitekaon ch'án tí ley. Náhí. Ts'áyéhe ch'án tíha ḱixin kuitekaon ch'án Dios la ntá Dios mé kjuinchesteyéhe ch'án. ¹⁴ A ntá tí jehó tí sín tsikjinchesteyéhe tí ley ó chrók'uaáyéhe sín tí nkehe chrókuinchesteyéhe Dios, a ntá tí nkehe tinkáchónkini la ó chrókóhónko xikaha la ko tí nkehe tsintáchro Dios la kjá ninkehó sínkíhya tí xikaha. ¹⁵ Ḱixin tí ley la tjikao ḱixin tsjasótéxin chojni, a ntá tí chrókókohya ley la chrókókohya nkehe chrókuanchia jie.

¹⁶ Méxra tí nkehe tsintáchro Dios la kjuasáyé ch'án tsjanjon ch'án ḱixin kuinkáchónki ch'ín Abraham tí jehe ch'án la ntá Dios sinchekitonhen tíha káin tí sín tsik'axrjeníxin ch'án. Jehya jehó tí sín tinkáchónki tí ley chrók'uaáyéhe sín tí nkehe tsjanjon Dios. Náhí. Kjaxin tí sín tsitekaon éxí kuitekaon ch'ín Abraham mé ts'áyéhe sín tíha. A ntá jehe ch'án mé k'óna ch'án

* 4:3 Génesis 15.6 † 4:8 4.7–8 Salmo 32.1–2 ‡ 4:9 Génesis 15.6

it'é kaín ni. ¹⁷ Éxí nixja xroon itén Dios kixin: “Janhan kjuánjuan kjuachaxin kixin jaha ts'óna it'é nchónhya chojni chjasintajni.”⁸ Mé xikaha tjetsjehe Dios kixin jina kuítekaon ch'in Abraham tí jehe ch'án. Tí Dios a mé sinchexechón tí chojni tsik'en la ko t'et'ogan ch'án kixin ts'óna tí nkehe naḡa kohya.

¹⁸ Kjónté k'uéchóntahya ch'in Abraham xjeen ch'án la kuítekaon ch'án la chónhen ch'án kixin ts'óna ch'án it'é nchónhya chojni éxí tsíchronka Dios kixin xikaha nchónhya chojni ts'axrjenixin ch'án. ¹⁹ Ch'in Abraham k'uéchónta ch'án chjina ijnko ciento nánó la kjánchó k'uitjáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kixin naḡa chróchónta sín xjeen sín. ²⁰ Ch'in Abraham la kóxakuenhya ch'án la ko chrakonhya ch'án kixin tí nkehe tsjanjon Dios. Náhi. Íchá antsí má kuinkáchónki ch'án Dios la ko kjuanchehe ch'án kjuasáyé Dios. ²¹ Ó nohe ch'in Abraham kixin Dios chóna kjuachaxin sinchexiteyá kaín nkehe tsintáchro ch'án. ²² Dios k'uikon kixin jehe ch'in Abraham kuítekaon ch'án ntá Dios kjuínchetjóá ijíé ch'án.

²³ La jehya kixin tsik'óna tí xroon kixin tí ch'in Abraham ó. ²⁴ Náhi. Tsikjin sín xroon kixin kjaxin jeheni chrókótjuáxin ijíéni kixin tsitekaonni Dios. Tíhi mé tí nkexro kjuínchexechón Ìnchéni Jesucristo. ²⁵ Jehe ch'án mé k'uenyákonhenni ch'án kixin tí jje chóntani. Ntá xechón ch'án inaá kixin tsotjuáxin ijíéni kixin ó kuítekaonni tí jehe ch'án.

5

Kótuáxin tí jje chóntani

¹ Kótuáxin tí jje chóntani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo. ² Kjuasáyé Cristo kixin jina tsochjinehene Dios kixin tinkáchónkini ch'án ntá ts'áyéheni kjuachaxin kuénte ch'án. Ntá tí kjuachaxin la jina tsjinkítsa kixin jina ts'ejóni la ko tsóchéheni ts'ejóchónhenni kixin ntá tsjintaxín ts'áyéheni tí kjuachaxin jje kuénte Dios. ³ Kjaxin jehya táhó. Náhi. Kjaxin tsóchéheni kjónté nchónhya nkehe tsónhenni kixin ó noheni kixin xikaha tsónhenni kixin ntá ts'itjani tsónínakonhyani. ⁴ A ntá tí xikaha jina chrók'uejóni ntá tsjachani kixin jina ts'ejóchónhenni. ⁵ A ntá tí tjejóchónhenni la tósuehyani kixin Dios imá tjuèheni ch'án la tí Nchakuen ch'án kjuanjon ch'án mé nchexéhe asénni.

⁶ Tí jehóni xitjahya chrókuaáni. A ntá tió ikui Cristo la k'uenyákonhenni ch'án kixin tí jje chóntani. ⁷ Kjá ninkexró chróntáchro chrók'uenyákonhen sín í jnko chojni kjónté ijnko chojni imá jina tjuèhe kichó. Kohya nkexro xikaha chrókjuich'e. ⁸ A ntá Dios mé kjuakoxin kixin imá tjuèheni ch'án kixin kjónté naḡa chóntani jje la Cristo k'uenyákonhenni. ⁹ A ntá Dios mé kjuínchetjuáxin ch'án ijíéni kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasótéxinni. ¹⁰ Kjónté naḡa k'uénínkakonhenni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án. ¹¹ La jehya chrókótíhó. Kjaxin tsóchéheni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxinni kjuaxróxin tí tjen Dios.

Adán la ko Cristo

¹² Mé xikaha ó jnko nkexro kjuasin jje ntá k'uixin jje kuénté chjasintajni. Mé xikaha kjuankixin k'uén chojni ntá kaín chojni kjuankixin k'uén kixin kaín sín kjuasin sín jje. ¹³ Kixin ósé la k'uékohya ley ntá ó xráxin k'uixin jje chjasintajni kjánchó naḡa kohya ley chrókjuanchia jje chrókjuasótéxín sín. ¹⁴ Desde kjuák'e ch'in Adán hasta kjuák'e ch'in Moisés la k'uéchónta kjuachaxin tí kjuach'én kixin tí jje kjuasin sín mé k'uénxín sín. Kjánchó tí jje kjuasin sín la yóghya tí nkehe kjuích'e ch'in Adán, kuítekakonhya ch'án tí nkehe k'uet'ogan Dios. Ntá ch'in Adán yógh tsotsjehe éxí tí nkexro tsí chr'éxín.

¹⁵ Ntá tí jje kjuasin ch'in Adán la xitjahya chrókóyóghé tí nkehe tsjanjon Dios kixin tí jje kjuasin jnkokoá chojni la ntá nchónhya chojni k'uénxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jina tíha kixin tsaáxin nchónhya chojni. ¹⁶ A ntá tí jje kjuasin jnkokoá chojni la tóyóghya tí nkehe tsjanjon Dios tsaáxinni. Kixin tí jje kjuankixin kjuasótéxín chojni kixin kjuasin jnkokoá chojni jje. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jje chóntani kjónté nchónhya jje kjuasin chojni. ¹⁷ Tí kjuach'én la k'uéchónta kjuachaxin kixin tí jje kjuankixín kjuasin jnkokoá chojni. A ntá kjuasáyé Dios kjuínchetjóá ch'án tí jje chóntani la ntá antsí tsochóntani kjuachaxin ts'ejóni jina kixin k'uenyákonhenni jnkokoá nkexro, mé Cristo tíha.

¹⁸ A ntá tí jje kjuasin ch'in Adán la ntá kaín chojni kjuasin sín jje chrókjuasótéxín sín. A ntá ijie la Cristo mé kótuáxin ijíé kaín chojni kixin tí jina ch'án k'uenyákonhenni ch'án. ¹⁹ Mé xikaha kuítekakonhya jnkokoá chojni, mé Adán tíha, ntá nchónhya chojni kjuasin jje. A ntá

jnkokoá nkekro jína kuíteakon kjuakoxin, mé Cristo tíha, a ntá nchónhya chojni tsaáxin tí jehe nt'án kjónté k'uéchonta sín jie.

²⁰ Ikui tí ley kuínhin sín ntá kónoxín kixin íchá antsi kjuasin sín jie. A ntá antsi k'uixin jie la kjónté xikaha la antsi má kuikónógheni Dios kixin jehe ch'án tsjinkitsani ch'án tsaáxinni. ²¹ Mé xikaha tí jie k'uixin k'uéchóntha kjuachaxin kjuikao kjuach'én chrók'uexínni. A ntá kjuasáyé Dios kjaxin antsi má chóntha ch'án kjuachaxin sinchetjóá ch'án tí ijéni la ko tsjanjon ch'án kjuachón jnkochrixin kixin Inchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jie ntá Cristo kjuinchehexchónni

¹ A ntá ijie ¿nkehe tsixroní? ¿A naxa chrókjuasinni jie kixin ntá Dios naxa chrókjuakoxin ch'án kixin chrókjuikónógheni ch'án? ² Kjá náhi. A ntá jeheni la éxi chojni tsík'en chrokuahya tsjasin jie. ¿A ntá nkeuente naxa chrókjuasinni jie inaá? ³ ¿A noahyará jahará kixin tí kuikiteni kixin tinkáchónkini Cristo la yóhe k'uékoni ch'án? ⁴ Tí kuikiteni la éxi yóhe xravákoni Cristo la ko tsík'enkoni ch'án kixin ntá ó xechónni ntá chrók'uajini ijnko ntia nixin mé xikaha Cristo xechónxin ch'án tí kjuachaxin jie chóntha tí It'é ch'án.

⁵ Kixin tí chaxín k'uexínni éxi ik'uén tí jehe ch'án la ntá kjaxin tsoxechónni éxi xechón tí jehe ch'án. ⁶ Ó noheni kixin nkekri k'uejóni senó mé táha mé k'uexín Cristo kjuak'enkánixin ch'án ntacruz kixin ntá chrók'uitjáyaxín kain tí jie k'uékjasinni kixin ijie í chrókjuinchehexiteyéhiani tí jie. ⁷ Tí nkekro ó k'uén la ntá ó kuítóhe tí jie. ⁸ A ntá jeheni tí k'uexínni Cristo la ó noheni kixin ts'ejókoni tí jehe ch'án. ⁹ Kixin ó noheni kixin Cristo jnkokoá vez xechón ch'án a ntá í ts'enhya ch'án inaá kixin tí kjuach'én í chónthaha kjuachaxin kixin naxa ts'óyán tí jehe ch'án. ¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijéni. Ntá xechón ch'án ijie kixin tsjak'eko ch'án Dios. ¹¹ A ntá kjaxin jahará chrókjuenkayáxinrá kixin ik'uénrá, xitjahya tsjásinrá jie kixin ntá ijie la xíxechonrá chrókjuich'eherá xra Dios kixin tinkáchónkirá Cristo Jesús, mé Inchéni tíha.

¹² Méxra chrókjuítóghyará kixin chrókjan tí jie chrók'uetuennen tí cuépporá inaá kixin tí jie chrók'uetoan kixin chrókjuinchehexiteyéhérá tí nkehe tjenkayáxinrá. ¹³ Tjánjonhyará tí cuépporá kixin chrók'lóna nkehe chrókjuásixinrá jie. A ntá íchá jína chróchjehérá asánrá Dios éxi ijnko chojni tsík'en ó xíxechón inaá. Chjehérá Dios tí cuépporá ts'óna ijnko nkehe sich'exin ch'án xra jína. ¹⁴ Kixin tí jie la í chónthaha kjuachaxin ts'etuennen tí jahará. Jehya tí ley ts'etqan ijie. Náhi, jehó kjuasáyé Dios.

Kjuincheýoxin ch'in Pablo nkekri tí chojni ch'exón xra

¹⁵ A ntá ijie ¿nkekri? ¿A chrókjuasinni jie kixin í t'etuennyani tí ley? Kjá náhi. Kjuasáyé Dios tsaáxinni la kjá í chrókjuasinhanyi jie. ¹⁶ Jahará ó nohará jína kixin tí sich'eheeni ijnko lámō xra la tsitekakhonhenni ch'án la tí xikaha la t'ichjánxin ch'eheeni xra tí lámō la t'ichjánxin sinchehexiteyéheni ch'án. Mé xikaha tónhen tí naxa sinchehexiteyéheni tí jie la táha mé ts'enxínni. A ntá tí tsitekaonni Dios la mé chrók'uejóni jnkójina. ¹⁷ Jahará la ósé k'uékjásinrá jie, a ntá ijie kjuasáyé Dios kuikónóghará ch'án kixin kain asánrá kuíteakonrá tí nkehe xrakohará. ¹⁸ A ntá ó kuítóghérá tí k'uékjinchehexiteyéhérá tí jie. A ntá ijie ó kjuánjonrá asánrá kixin sich'erá xra jína kuente Inchéni. ¹⁹ A ntá jie nixja éxi ijnko chojni ó kixin jahará la tiénxinhyará jína tí nkehe í. A ntá xikaha tí senó kjuinchehexiteyéhérá tí nkehe ntoáhya la ko jínahya kixin sich'erá tí nkehe jínahya. A ntá ijie la xikaha chrókjuánjonrá tí cuéppo kuentará kixin chrókjuich'exinrá tí xra jína éxi tjínkaon Dios kixin ntá jehe ch'án chrókjuinchetjóará ch'án.

²⁰ A ntá tí jahará tió naxa kjuinchehexiteyéhérá tí jie la ntá xitjahya sich'erá tí xra jína ntoá. ²¹ ¿A ntá nkehe chrókjuachará kixin xikaha kjuich'erá tí nkehe chrók'osuáxinrá ó? Ntá xikaha kjuéyará tí nkehe ts'énxinrá ó. ²² Na ntá ijie ó kjuin tí nkehe k'uék'etuánhanrá k'uékjásinrá jie. A ntá ijie ch'eherá xra Dios. Táha la tsjinkitsa kixin ts'ejoxinrá jína kixin ntá tsjixixín tsotjuáxinrá ts'ayéhérá kjuachón jnkochrixin. ²³ A ntá tí chrókjuasinni jie la chrókjuachani kixin éxi chrók'uenni ó. A ntá tí nkehe chrókjuinchehexiteyéhenni Dios la kjuachón jnkochrixin kixin tinkáchónkini Inchéni Cristo Jesús.

7

Kjuincheýoxin ch'in Pablo kuente tí sín tsikótehe

¹ Kichóni, jahará ó choxinrá tí ley la ó nohará kixin tí ley chóntha kjuachaxin ts'etuennen tí chojni naxa tjejóhón ó. ² Tíha mé ts'axrxén éxi ijnko chojni chjin tsikótehe la tí xú tjan chóntha kjuachaxin ts'etuennen tjan kixin naxa tjechón ch'án. A ntá tió tsík'en tí xú la ntá tí tjachjin la ó kuítóhe tí k'uék'etuennen ch'án tjan. ³ A ntá tí jehe tjan chrók'akja í jnko chojni

ntoa tí naxa tjechón xii tjan la ó chrókjuasin tjan jie. A ntá tió tsík'en xii tjan la jehe tjan la ó kuítóhe tí k'uek'etueñhen ch'án tjan la jína tsotehe tjan í jnko chojni ntoa la jehya jie tíha.

⁴ Mé xíkaha jahará kíchó ni mé k'uenyákonhenni Cristo la ntá jahará la éxi tsík'enrá kixin í t'etuanhyará tí ley la éxi chrókuájkárá í jnko xiará la mé xíkaha tinkachónkirá Cristo. Cristo mé xechón ch'án inaá kixin ntá jína chrókjuich'ehe ni xra Dios. ⁵ Tió naxa k'uekjasinni jie a ntá tí ley chrókjuich'e xra kixin chrókjuasinhyani jie, a ntá ichá antsí má kjuasixínni jie tí cuerpo kuénteni, la táha mé kjuixín tí ts'ensínni. ⁶ A ntá ijie la éxi yóhe ik'ueñni, a ntá tí ley chónthaya kjuachaxin naxa ts'etueñhenni. A ntá ijie í kohya nkehe t'inkákonhen kixin jína sich'ehe ni xra Dios kixin k'ónani ijnko chojni nixin kixin tí Nchakuen Dios k'uáyeheni. A ntá í t'etueñhyani tí ley ntaxin tsík'óna.

Tí jie naxa chonta

⁷ A ntá tí xíkaha la, ¿nkehe chróchroni? Kixin tí ley la, ¿a jie táha ní? Kja náhi. Kjánchó janhan chrókónonahya nkehe tí jie tí chrókohya tí ley chróchrónka. Chrókónonahya kixin tí nkehe ókjé chrókjuakéhya asenná tí chróchrónkahya tí ley kixin chrókjuakéhya asenná tí nkehe ókjé. ⁸ A ntá tió kónóna tí ley a ntá tí jie antsí kjuacha k'uetóan. La ntá k'uixín kaín nkehe ntáchro asenná. A ntá tí chrókohya ley la chrókónoxínhya tí jie chrók'uenxian. ⁹ A ntá tí ósé la nonahya nkehe tí ley. A ntá tió nóna nkehe tí ley, a ntá antsí kjuásian jie la ntá ó nóna kixin tí jie kjuásian me ts'énxian. ¹⁰ Mé xíkaha kónhen kixin tí ley chrókjuanjon kjuachón ntá kjuíkao tí ts'ensínni. ¹¹ Ntá tí jie mé kjuacha k'uetóan kixin sjntaxiteyáha tí ley. A ntá tí ley mé kjuanchia jie ts'énxian.

¹² Mé xíkaha tí ley la chaxín jína la ko tí nkehe t'etóan Dios la kjaxin jína. ¹³ Mé xíkaha tí nkehe jína la ¿a táha chrók'uenxian? Kjá náhi. Tí jie kjuásian mé ts'énxian. Mé xíkaha kjuákoxin tí nkehe jie kixin tsónoxín tí jie kixin tí ley la jína. Mé xíkaha kjuákoxin tí ley kixin tí jie tjasin chojni mé imá jínahya tíha.

¹⁴ Ó noheni kixin tí ley la kuénte Dios tíha. A ntá janhan la kjuíntaxiteyáha tí ntáchro asenná kixin tí jie kjuacha k'uetuanna. ¹⁵ A ntá tí janhan la tí nkehe tjé't'a la kjaxin naxa tianxínhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a. ¹⁶ A ntá tí nkehe tjínkakonhya chrókjuít'a tíha mé it'a la mé xíkaha tjátsoanxián kixin tí ley la jína. ¹⁷ A ntá jehya janhan it'a tíha. Náhi tí jie chonta mé ch'e tíha. ¹⁸ Kixin janhan ó nóna kixin tí ntáchro asenná la kohya nkehe jína chrókjuít'a. Tjínkavan chrókjuíntaxiteyá tí nkehe jína kjánchó tjachahya sit'a tíha. ¹⁹ T'ahya tí nkehe jína chrókjuít'a. Tí nkehe jínahya tjínkakonhya chrókjuít'a mé it'a. ²⁰ A ntá tí it'a tí nkehe jínahya tjínkakonhya chrókjuít'a la ntá jehya janhan it'a tíha. Náhi. Tí jie chonta mé ich'e tíha.

²¹ Tónóna tíhi. Tí tjínkavan chrókjuít'a tí nkehe jína la mé ichá antsí it'a janhan tí nkehe jínahya. ²² Kjónté xíkaha la tóxrjínna chrókjuíntaxiteyáha tí ley kuénte Dios. ²³ T'íkuan kixin tí nkehe ntáchro asenná mé t'inkákonhen tí nkehe tjínkavan chrókjuít'a. A ntá tí jie chonta mé éxi tjéchinaxián tíha.

²⁴ Nóna tí janhan. ¿Xá nkexro chrókjuatsen tí jie chóna tí cuerpo kuéntana chrók'uenxian? ²⁵ Kjuasáya tjaħa Dios kixin ikui Ínchéni Jesucristo kuaáxinni. Mé xíkaha tí janhan la it'óna tjenkayáxian kixin chrókjuíntaxiteyáha Dios a ntá tí t'óna mé ntáchro asenná chrókjuíntaxiteyáha tí nkehe kuénte tí jie.

8

Tjejóchónxinni Nchakuen Dios

¹ A ntá ijie tí sín tinkáchónki Cristo Jesús la kohya jie chrókjuasótéxín sín. Jehe sín í tjínkakonhya nchexiteyá sín xíkaha ntáchro asén sín. Jehó tjínkaon sín sinchexiteyéhe sín Nchakuen Dios. ² Kixin tí nkehe t'etóan Nchakuen Dios mé tjanjon kjuachón kixin tinkáchónki Cristo Jesús. Tíha mé kjuatsen tí nkehe kuénte jie chrók'uenxínni. ³ A ntá Dios kjuich'e tí nkehe kjuachahya kjuich'e tí ley kuénte ch'ín Moisés kixin jeheni kjuachahyani chrókjuinchexiteyéhéni tíha. A ntá Dios mé ichr'án ch'án Xjeen ch'án k'óna éxi chojni. La xra ó kui ch'án k'uenyákonhen ch'án tí ijéni kaín ni ntihi chjasintajni la kjuatsen ch'án tí jie chrók'uitjayanxínni. ⁴ Mé xíkaha kónhen kixin ntá jeheni jína chrókjuinchexiteyéhéni tí nkehe t'etóan tí ley la chrókjuinchexiteyéhéni tí nkehe ntáchro asénni ó. Náhi. Chrókjuinchexiteyéhéni tí nkehe ntáchro Nchakuen Dios.

⁵ A ntá tí sín tjínkaon nchexiteyéhé tí nkehe ntáchro asén sín ntá táhó tjenkayáxín sín. A ntá tí sín tjínkaon nchexiteyéhé Nchakuen Dios la ntá xritjeyá sín tí nkehe kuénte Nchakuen Dios. ⁶ A ntá tí sín tóxakonhen tí nkehe ntáchro asén sín la táhó ts'ensín sín. A ntá tí sín tóxakonhen tí nkehe kuénte Nchakuen Dios la tsochóntaxín sín kjuachón la ko kjuaxróxin. ⁷ A ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kixin tjínkakonhya sín la ko titekakonhya sín tí ley. ⁸ Tí sín tóxrjínhin sín tí nkehe ntáchro asén sín ó la xitjahya sinchexéhé sín Dios.

⁹ A ntá jahará la nchexiteyéhyará tí nkehe ntáchro asánrã. Náhi. Jahará nchexiteyéhérá Nchakuen Dios tí chaxín chontará Nchakuen Dios. A ntá tí nkexro chóntahya Nchakuen Cristo la í tinkáchónkihya sín Cristo. ¹⁰ A ntá tí Cristo tjejókoará tí jahará la tí asánrã la tjechón kixin Dios kuikonóghará, kjuínchetjóá ch'án tí ijjará, kjánchó tí cuerpo la éxi tsík'en kixin tí jie chontará. ¹¹ A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochjé ch'án kjuachón nixin tí cuerpo kuéntará kjónté chóna jie kixin tí Nchakuen Dios chontará jahará.

¹² Mé xikaha kichó ní, ó chóntani nkehe sinchexiteyéheni, kjánchó í chrókjuenkayáxinhanyi tí nkehe ntáchro asénni. ¹³ A ntá jahará tí chrók'uejorá éxi ntáchro asánrã la tíha la mé chrók'ueñxinrã. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrã la ntá jehó Nchakuen Dios chrók'uejochonxínrã.

¹⁴ Kaín tí nkexro t'etuenhen Nchakuen Dios la mé ó k'óna xjeen Dios. ¹⁵ Ntá Nchakuen Dios ó k'uayéhérá jahará la jehya tí nchakuen tí nkehe k'uék'etuanhanrã ósé kixin chróchrakonrã. Náhi. Ntá tí Nchakuen chóntani la k'ónaxinni xjeen Dios. A ntá tí Nchakuen ch'án nchexraxinkaonni tsonotáchroni kixin: "It'eni Dios kuéntá tí jeheni." ¹⁶ Tí Nchakuen Dios tónoxin nchakuenni kixin k'ónani xjeen Dios. ¹⁷ A ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxi tsintáchro ch'án ósé. Mé ts'áyékoni Cristo tí nkehe tsjanjon Dios. Tí chaxín tsjasóteni éxi Cristo kjuasóte ntá chr'éxin ts'ejókonni ch'án kjuaxróxin.

Tí kjuachaxin jie itsi chr'éxin

¹⁸ A ntá ijje la tóxakuenhyani kjónté nkehe ts'atsínkani tsjasótexinni kixin tíha la ninkehó sinkíhya kixin tíha la xitjahya tóyóhé tí nkehe ts'áyéheni chr'éxin kixin antsí má jína náxrxón tíha. ¹⁹ Tí nkehe tsík'óna tjejóchónhen kixin ts'íkon tí sín tsík'óna xjeen Dios. ²⁰ Kjónté kaín nkehe tsík'óna sín la ts'itjáyán tíha la jehya kixin xikaha tjinkaon tí nkehe tsík'óna. Náhi. Jehí xikaha tsík'etqan Dios. Ntá tjejóchónhen kaín nkehe tsík'jich'éna Dios ²¹ kixin chróchóna kjuachaxin chrók'uitjáyanyha. Ntá náxrxón ts'ixin kaín nkehe éxi náxrxón ts'ejó tí sín tsík'óna xjeen Dios. ²² Ó noheni kixin kaín tí nkehe kjuích'éna Dios la naça tsjasóte éxi yóhé tjetóxin ijnko chojni nchekokjihi xjeen. ²³ A ntá jehya jehó tí nkehe tsík'óna t'íkon chojni chrókjoté. Náhi. Kjaxin jeheni tsasóteni kjónté chóntani Nchakuen Dios kixin tí Nchakuen Dios la mé tí nkehe xrankixixín kuákjani la naça ts'áyéheni inaá tí nkehe naça tsjanjon Dios. Tjejótjasóteni la ko tjejóchónheni kixin tsjintaxin ts'ónani xjeen Dios la ko ts'áyéheni tí cuerpo chónhya ts'en. ²⁴ Mé ó kuaáxinni la naça tjejóchónheni tí nkehe t'íkonhyani. Tí k'uikonní tí nkehe tjejóchónheni ntá t'ichjánxinhyha chrók'uejochónheni. Tí nkehe ó t'íkonni la t'ichjánxinhyha chrók'uejochónheni naça chrók'uikonní inaá. ²⁵ A ntá tí chónheni tí nkehe naça t'íkonhyani la ntá t'ichjánxin tsonínkakonhyani tsochónheni.

²⁶ Mé kjaxin xikaha tí Nchakuen Dios tjinkítsani tí noehyani nkexrí tsonixjehehi Dios kixin chaxín noehyani tsonixjehehi ch'án éxi chrónixjani. A ntá tí Nchakuen Dios tjinkítsa nixjaxin ch'án tí jeheni kjónté noehyani nkexrí tsochrónóaxinni éxi tjinkaon ch'án. ²⁷ Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxi tjinkaon Dios la nixjaxin ch'án tí sín tinkáchónki Dios.

²⁸ Ó noheni kixin Dios la k'uetqan kaín nkehe chrók'uaxrje jína kixin tí sín tjuèhe ch'án kixin tsík'jeyá ch'án sín kixin xikaha tjinkaon ch'án. ²⁹ Tí sín tsík'jeyá Dios ósé la ntá tsík'íyehé ch'án kixin ts'óna sín éxi tí Xjeen ch'án kixin ntá tí Xjeen ch'án mé ts'etuenhen nchónhya tí sín kichó ch'án. ³⁰ Mé xikaha tí sín tsík'jeyá Dios ósé mé kjaxin k'uíyehé ch'án sín la ko tí sín k'uíyehé ch'án la kjuínchetjóá ch'án ijje sín la ntá tí sín kjuínchetjóá ch'án ijje la kjuanjon ch'án kjuachaxin kuénte ch'án tsochóna sín.

³¹ ¿A ntá nkehe chróchroni tí xikaha? Tí Dios tjuèhe tí jeheni, ¿a ntá nkexro chrókjuacha chrókónínkakonhen tí jeheni? ³² Kixin Dios la kjiakuènyha tí Xjeen ch'án. Kjuanjon ch'án k'uenyákonheni kaín ní, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án. ³³ ¿Nkexro chrókjuacha chrókjuanchia jie chrókónínkakonhen tí sín kjueyá Dios? Kixin Dios la ó kjuínchetjóá ijje tí sín a. ³⁴ ¿Nkexro chrókjuinchekjásóte tí jehé sín? Kixin Cristo la ó k'uenyákonhen sín la kjaxin xechón ch'án inaá la itjen ch'án tí tja chjina Dios tjen nkaya nkajní la tjechronóa ch'án kixin kaín tí jeheni. ³⁵ ¿Xá nkexro chrók'uejochónheni tí tjuèheni Cristo? Kjónté ichrén nkehe chrókónheni la ko chrókónínkakonhen chojni tí jeheni la ko kjónté chrók'uenxinni kjinta la ko chróchóntahyani ikéni ó kjónté tí kjuaxikaon chrók'uenxinni la chrók'uejohya ch'án tí jeheni. ³⁶ Éxi ntáchro xroon itén Dios kixin: Tí tinkáchónkini tí jaha la sín kjuaxikaon kaín yaon chrók'uenxinni.

Chrók'óyánni sín éxi t'óyán sín kolélo tí matanza.*

³⁷ Kaín tíha la antsí chrókjuachaxinni kixin kjuachaxién tí nkexro tjuèheni. ³⁸ Ó noheni kixin ninkehó nkehe tsjachahya tsakitsjeheni tí tjuèheni Dios. Kjónté tí its'enni, ó kjónté

* 8:36 Salmo 44:22

tí tjejóhónni, o kjónté tí sín ángel, o tí kjuachaxién tí jínahya, o kjónté tí nkehe sitónhen ijje, o tí nkehe tsonhen chr'éxin. ³⁹ o kjónté tí nkehe siín nkaya nkajni, o tí nkehe imá njnka siín chjasintajni, o íjnko nkehe kjuích'éna Dios. Mé kohya nijnko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kixin k'uenyákonhenni Inchéni Jesucristo.

9

Dios kjueyá tí sín Israel

¹ Ntoá xrxjanka kixin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kixin chaxin. ² Imá t'avá asenná la ko náxrjónhya tjèn ³ kixin tjínkavan kjónté chrók'uitjáyanxinna tí tinkachónkia Cristo kixin ntá jina chrókuinkáchónki Cristo tí sín kichiná naxa kjéhyana. ⁴ Jehe sín mé tsik'axrjenixin sín tí sín Israel la Dios k'uáyéhe sín éxi xjeen ch'án la ko Dios chónthehe tí jehe sín la kjuanjon kjuachaxién ch'án la kjaxin k'uáyéhe sín tí nkehe k'uetqan Dios la ko tí ley tsikjin ch'in Moisés la ko k'uáyéhe sín kjuachaxin ts'etqan sín kixin nkehe tí xra tsonhen nkaxenhen njnko la ko k'uáyéhe sín tí nkehe tsintáchro Dios. ⁵ Tsik'axrjenixin sín tí sín tsik'axrjenixinni óse la kjaxin Cristo tsik'axrjenixin tí sín israelita tió k'óna ch'án chojni. Jehe ch'án mé Dios kuènte kain nkehe la tinkáchónkini ch'án jnkochríxin. Amén.

⁶ A ntá tí nkehe chrókuakja tí sín Israel kjuanjon Dios la jehya kixin chróxiteyáhya tíha. Náhí. Kixin jehya kain tí sín tsik'axrjenixin tí sín israelita mé chrók'óna sín chojni chjasin Israel. ⁷ Kixin kénhya tí sín k'uaxrjenixin ch'in Abraham chrók'óna xjeen ch'án. Dios mé tsintáche ch'in Abraham kixin: "Tí sín ts'óna kjéhya jaha mé ts'axrjenixin sín ti ch'in Isaac."* ⁸ Tíhi mé tienxinni kixin ninxeró xitjahya ts'óna xjeen Dios kixin tí tsik'axrjenixin sín chojni ó. Náhí. Jehó tí sín tinkáchónki tí nkehe tsichenka Dios tí ch'in Abraham mé jehe sín mé chaxin tsik'axrjenixin sín ch'án. ⁹ Tí nkehe tsichenka Dios tí ch'in Abraham mé tíhi: "Itsi ijnko yaon mé tjan Sara sich'éna tjan ijnko xjan."†

¹⁰ A ntá jehya táhó. Náhí. Kjaxin tí yaá chánjan tsikjich'éna tjan Rebeca mé chóna jnkokoá it'é xjan mé it'in Isaac, mé tsik'axrjenixinni ch'án. ¹¹ A ntá tí xjan la naxa kokjéhya xjan la ninkehó nkehe jina o jínahya kjuích'e xjan. Ntá kjuakoxin Dios kixin chóna ch'án kjuachaxin éxi tsikjenkayáxin ch'án tsjeyá ch'án nkexro ts'iyehé ch'án la tahya ch'án kuentá nkehe tí xra kjuích'e sín. ¹² Ntá kjónté la ntá chenka ch'án tí tjan Rebeca kixin: "Tí ch'in saó mé sich'ehe xra tí ch'in tsoyo."‡ ¹³ Mé kjaxin xikaha ichro xroon itén Dios kixin: "Tjuahá Jacob, a ntá Esaú la náhi."§

¹⁴ A ntá nkehe chróchroni? ¿Á ntoáhya tjenkayáxin Dios? Kjá náhi. ¹⁵ Kixin tsintáche Dios tí ch'in Moisés kixin: "Tsojuaá tí nkexro tjínkavan tsotjuaá la ko tsjkonógha tí nkexro tjínkavan tsjkonógha."* ¹⁶ Jehya éxi tjínkaon chojni o jehya kixin tí nkehe ch'e chojni. Náhí. Ó jehí Dios tsikikonóehé ti jehe sín. ¹⁷ Tí ntáchro xroon itén Dios mé nixjehé Dios tí ch'in rey Egipto kixin: "Kjuánjuan kjuachaxin kixin jaha k'óna rey kixin tjínkavan chrókuakoxian kjuachaxin kuèntana kixin ntá kuenté chjasintajni chrókónohe la chrókuitekaon tí njna."† ¹⁸ Mé xikaha tí tjínkaon Dios tsjkonóehé ch'án chojni la tsjkonóehé ch'án, a ntá tí nkexro tjínkakónhya ch'án tsjkonóehé ch'án la tsjkonóehya ch'án.

¹⁹ A ntá tsontáchorá kixin: "A ntá tí xikaha la, ¿nkekuènté t'eka Dios chojni jie? ¿Nkexro chrókuacha chrókuanjnko tí nkehe t'etqan Dios?" ²⁰ ¿Xá nkexro tí jahará kixin chróntácherá Dios xikaha? ¿Á tí chí tsik'óna nchetje chróntáche tí inché chí kixin: "¿Nkekuènté xikaha kjuích'énani?" chróchro. ²¹ A ntá kjaxin tí nkexro ch'éna chí mé chóna kjuachaxin tjínkaon sich'éna ch'án tí nkehe tóxrjnhin ch'án sich'éna ch'án, tí tjínkaon ch'án nchetje sich'éna ch'án nkehe imá náxrjón o tjínkaon ch'án sich'éna ch'án nkehe náxrjónhya.

²² Tjínkaon Dios chrókuakoxin ch'án tí kjuachaxin kuènte ch'án chrókuinckjasóte ch'án chojni la kjónté xikaha kónhen la kjuacha ch'án kóninkakonhya ch'án la kuíkonóehé ch'án tí sín chrókuinckjasóte ch'án kixin chrókuinck'itjáyan ch'án sín. ²³ Mé xikaha kjuích'e ch'án kjuakoxin ch'án tí kjuachaxin imá jie chóna ch'án kixin jehe ch'án kuíkonóeheni ch'án kixin xikaha tsikjenkayáxin ch'án óse kixin náxrjón chrók'uejókoni tí jehe ch'án. ²⁴ Mé xikaha Dios tsikjeyá ch'án iso tí sín judío la ko iso tí sín jehya judío. ²⁵ Mé xikaha ntáchro tí xroon tsíkin ch'in Oseas kixin:

Tí sín jehya chjasenná la mé sjintak'ian chjasenná.

La tí sín k'uétjuaá mé tsotjuaá sín ijje.†

²⁶ Tí chjasin ntíha tsintáchro ch'án kixin: "Jahará jehya chjasenná",

a ntá ijje sjintak'ian xjeen Dios tjechón.§

* 9:7 Génesis 21.12 † 9:9 Génesis 18.10 ‡ 9:12 Génesis 25.23 § 9:13 Malaquías 1.2-3 * 9:15 Éxodo 33.19

† 9:17 Éxodo 9.16 ‡ 9:25 Oseas 2.23 § 9:26 Oseas 1.10

Mé xikaha ichro itén Dios. ²⁷ Kjaxin nixja ch'ín Isaías kuènte tí sín israelita tsintáχρο ch'án kixin: “Nchónhya chojni ts'axrjenixin tí sín Israel éxi tí nchónhya nchesen síin ntayaon kjánchó tsjéhya tí jehe sín tsjacha sín tsaá sín. ²⁸ Ntá tjoka tsonhen tí nkehe tsintáχρο Inchéni sinchexiteyá ch'án.”* ²⁹ Ntá kjaxin ch'ín Isaías tsintáχρο ch'án ósé kixin:

Tí Inchéni chóna kaín kjuachaxin kuitqehya chrók'uitjáyán kaín tí sín k'uaxrjenixin Israel éxi k'uitjáyán tí sín chjasin Sodoma la ko Gomorra.†

Tí sín judío la ko tí tan jína

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijíé sín ntá kjónté la k'uitja sín kixin tsotjóá ijíé sín kixin tinkáchónki sín Cristo. ³¹ A ntá tí sín israelita chrókjuinchexiteyéhe sín ley kixin chrókótjuáxin ijíé sín kjánchó kjuachahya sín kjuínchexiteyéhe sín tíha. ³² ¿A ntá nkekuénté kixin xikaha k'uitjahya sín nkexrí chrókuínkáchónki sín Dios? Kxin kjueyáhya sín nkexrí chrókjuinchetjóá ch'án ijíé sín kixin tinkáchónki sín ch'án. Jehó tí xra kjuích'e sín chrókuaáxin sín, ichro sín. La méxra xikaha tjen tí xro kóténkixin sín. ³³ Mé xikaha chronkaxín xroon itén Dios kixin: Mé xikaha kjuaké tí xro chjasin Jerusalén mé tí xro tsóténkixin sín la ko tí tjó ts'ánótjénxin sín.

A ntá tí sín chrókuitekaon tí jehe la chrókósuèhya sín.‡

10

¹ Kichóni, kaín asenná níxjaha Dios kixin tjínkavan kixin tí sín israelita chrókuaá sín. ² Janhan ntáxrxan kixin tí sín israelita imá tjínkaon sín chrókjuích'ehe sín xra Dios kjánchó chaxínhya kixin jehe sín la tienxínhya sín. ³ Kjaxin noehya sín kixin nkexrí chrókjuinchetjóá Dios tí ijíé sín. A ntá jehó sín xritjeyá sín nkexrí chrókótjóá sín la tjínkakonhya sín chrókjuinchexiteyéhe sín Dios. ⁴ A ntá Cristo mé kjuínchexiteyá kaín nixja tí ley. A ntá ijie kaín tí sín kuitekaon tí jehe ch'án mé sinchetjóá ch'án ijíé sín.

⁵ A ntá tí chrókótjóá ijíé sín kixin tí ley la ch'ín Moisés mé tsíkjin ch'án xikihi: “Tí nkexro chrókjuinchexiteyéhe kaín tí ley la táhó chrókuaáxin sín.”* ⁶ A ntá tí chrókjuinchetjóá Dios tí ijíéni kixin tí tinkáchónkini ch'án ó mé ntáχρο xikihi: “Ntáχροhyará kixin, ¿Xá nkexro sáχροkjuí nkaya nkajni? (Tí xikaha la t'axrxjén kixin naxá chrókui Cristo.) ⁷ La ko ntáχροhyará kixin: ¿Xá nkexro chrók'uinakajin tí imá njnka?” (Mé t'axrxjén tíha kixin chrókjuíakajin sín Cristo chrók'uaxrjetaón ch'án kixin itjen ch'án tí síin tí sín tsík'en, ichro sín.) ⁸ ¿A ntá nkehe ichro? Ntáχρο kixin: “Itén Dios la chjinaxón tjen tí tjejerá kixin ó nohará la ko xraxinkaon asánrá.”† Tí tan a mé tí nkehe tinkáchónkini kjuakoni. ⁹ Tí ir'va tsontáχροxian kixin choxian Jesucristo mé Inchéni la ko tí asán tsitekaon kixin Dios kjuínchexechón ch'án ntá kjaxian tsaá. ¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáχροxian kixin choxian Jesucristo ntá sinchekaá ch'án tí jaha.

¹¹ Ntáχρο xroon itén Dios kixin: “A ntá tí sín chrókuitekaon tí jehe ch'án la chrókósuèhya sín.”‡ ¹² Dios la t'íkon jnkokón tsjehe kaín chojni á tí sín judío q á tí sín jehya judío. Tí Inchéni la mé Inchéni kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe. ¹³ Mé xikaha ntáχρο xroon itén Dios kixin: “Kaín tí sín tjanchaxín nkehe ihnjé Inchéni la tsaá sín.”§ ¹⁴ ¿A ntá nkexrí chrókjuanchehe sín ch'án kixin chrókjuínkítsa ch'án sín tí naxá kuítekakonhya sín ch'án? ¿A ntá nkexrí chrókuitekaon sín tí jehe ch'án tí naxá kuíenhya sín nkexro tí jehe ch'án? ¿A ntá nkexrí chrókuínhin sín tí kohya nkexro tsjəqəhe sín tí itan a? ¹⁵ ¿La nkexrí chrókjuíchronka sín tí tan tí kohya nkexro ichr'án sín sátsjji? Éxi ntáχρο xroon chóna itén Dios kixin: “Náxrxjón tí sín xrichronka itan jína.”*

¹⁶ Kjánchó kénhya sín titekaon sín tí itan tsaáxinni. Tsintáχρο ch'ín Isaías kixin: “Inchéni ¿xá nkexro ó kuítekaon tí tan xrichronkani?”† ¹⁷ Méxra t'ichjánxin tsinhin sín, a ntá chrókuitekaon sín, a ntá tí tan tsinhin sín mé itén Cristo.

¹⁸ A ntá tjánchánkía kixin: ¿Á kuíenhya sín tí tan? Kjá ó kuínhin sín. Ntáχρο xroon itén Dios kixin:

A ntá tí nkehe kjuako sín la ó kuínhin chojni kuenté chjasintajni.

Tí nkehe nixja sín la ó kjuixraká hasta kjuèxin chjasintajni.‡

¹⁹ Ntá tjánchánkía ínaa: ¿Xá tí sín Israel la naxá kíenxínhya sín ní? Senó ntáχρο ch'ín Moisés kixin:

Ijko chjasin jehya chjasin kuéntana la tsóninkákonhénra sín

* 9:28 Isaías 10.22-23 † 9:29 Isaías 1.9 ‡ 9:33 Salmo 118.22 * 10:5 Levítico 18.5 † 10:8 Deuteronomio 30.12-14 ‡ 10:11 Isaías 28.16 § 10:13 Joel 2.32 * 10:15 Isaías 53.1 † 10:16 Isaías 53.1 ‡ 10:18 Salmo 19.4

kixin ijnko chjasin tjinkakonhya tsinhin la tsoninkákonhénra sín. §

²⁰ Ntá ntáchro ch'in Isaiás kixin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhya kixin nkexro tí janhan.*

²¹ La ko nixja ch'in Isaiás kuénte tí sín israelita kixin: “Kuenté yaon k'uíyaha ijnko chjasin síin chojni titekakonhya sín la ko jiéhe sín.”†

11

Tí sín Israel tsíkjeyá Dios

¹ A ntá ijie tjánchánkiá kixin: ¿Dios la á kuitóhe ch'án tí sín Israel? Kjá náhi, kixin janhan kjaxian israelítana la t'ikiníxinna ch'in Abraham la ko k'uaxrjeníxinna ch'in Benjamín.

² Kixin ósé tsíkjeyá Dios tí sín israelita kixin ts'óna sín chjasén ch'án. A ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'in profeta Elías nkexrí nixjehé ch'án Dios tjanchia ch'án jié kuénte tí sín Israel? Mé ntáchro xíkíhi: ³ “Inchéni, jehe sín k'óyan sín tí sín chrónka itán la ko k'óxiá sín tí altar kuéntá

ntá jehóni kuitóheni tjechónni la tjinkaon sín kjaxin chrók'óyan sín tí jeheni.”* ⁴ A ntá Dios kjuátehe ch'án kixin: “Naxá kuitóhe yato mil chojni kuítekaon sín tí janhan kjuíxienhya sín toh'in sín tí nkehe tsíkjanoya Baal.”† ⁵ Ntá kjaxin xíkaha ijie naxá kuitóhe iso tí sín naxá tinkáchónki Dios. Kjuasáyé Dios kixin kuikonóehé ch'án tí sín la tsíkjeyá ch'án kixin tsaá iso tí jehe sín. ⁶ Mé xíkaha kjuasáyé Dios sinchekaá ch'án tí jehe sín kixin jehya tí xra kjuích'e sín chrókuááxin sín. Náhi. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuááxin sín la jehya kjuasáyé Dios tí xíkaha.

⁷ A ntá tí xíkaha la, ¿nkexrí? Tí sín israelita la k'uitjahya sín tí nkehe xritjeyá sín. A ntá tí sín kjueyá Dios la k'uitja sín. A ntá tí sín í so a la icha asén sín la kuítekakonhya sín. ⁸ Éxi ntáchro xroon itén Dios kixin: “Dios kjuanjonhya kjuachaxin chrókienxín tí sín a la ko mé kjaxin xíkaha naxá sítonhen tí yaon ijie. La kjuanjonhya ch'án kjuachaxin kixin chrók'uíkon sín la ko chrókienxín sín.”† ⁹ Kjaxin tsíntáchro ch'in David kixin:

Tí kia tjasin sín mé tjasixín sín jié,

tsjasótéxín sín.

¹⁰ Tí ikon sín ts'ikonxínhya sín kixin ts'óna sín ntakótán

ntá tí jié kuénte sín mé jnkochrínxín yámá sín. §

Tsaá tí sín jehya sín judío

¹¹ A ntá ijie tjánchánkiá: Tí sín judío la tí kjuasin sín jié la ¿á ó naá kuitóexón Dios tí jehe sín? Kjá náhi. Tíó kuítekakonhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín. ¹² A ntá tí jié kjuasin tí sín judío, a ntá kuitóhe Dios tí jehe sín, a ntá tí sín jehya judío antsí k'uitja sín nkexrí tsinkáchónki sín Dios. A ntá tí nkehe ntoáhya kjuích'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuítekaon sín Cristo la antsí má náxrjón tíha.

¹³ Chonta iso nkehe chrókuinhínra jahará jehya judíora kixin Dios mé chr'ánna kixin tsjakóha tí sín jehya judío la antsí tjetooan tí xra kuénte Inchéni chrókjuít'a. ¹⁴ Tjínkavan kixin tí sín chjasenná chrókóhjinóxínhin sín kixin jahará tinkachónkirá Dios kixin ntá chrókjuacha chrókuáá iso tí jehe sín. ¹⁵ Kuitóhe Dios tí sín judío, a ntá iso tí sín jehya judío k'uitja sín tí kjuaxróxin kuénte Dios. A ntá tí chrókuítekaon tí sín judío kjaxin la yóhé éxi chróxechón chojni tsík'en tí jehe sín. ¹⁶ Tí chrókjuinchetjóá Dios tí niojta xrankíxixín chrók'óna tí ich'ó la ntá kuénté tí ch'ó chrókjuinchetjóá ch'án. A ntá kjaxin tí chrókjuinchetjóá ch'án tí nuéé ijnko ntá la kjaxin kain tí chaon tí nta chrókjuinchetjóá ch'án.

¹⁷ Ntá isó tí sín judío la éxi iso chaon tí nta olivo mé xíkaha tsíchrinjin la ntá jahará la éxi ijnko chaon nta olivo nteje tsík'óna injerto mé xíkaha ts'ejóhónxin tí nta chaon tí tronco tí nta olivo jína xráxin tjechón. ¹⁸ Ntáchrohyará kixin tí chaon tí nta la antsí jína. Íchá jína tsontáchorá kixin jehya tí nta t'etuenhen tí nuéé nta. Náhi. Tí nuéé mé tsjinkítsa tí nta mé xíkaha tí jahará.

¹⁹ Ntá jahará tsontáchorá kixin: “A ntá tí chaon tí nta la tsíchrinjin kixin ntá jeheni tsitóheni lüké tí nta chaon tsíchrinjin”. ²⁰ Tíha la chaxín. Kjánchó chrínjin kixin kuítekakonhya Dios. A ntá jahará la tjejora ntíha kixin tinkachónkirá Dios. A ntá chrokjuinchehnkehýará. Íchá jína chróchrakonrá. ²¹ Kixin Dios la kuíkonóehya ch'án tí nta chaon kuénte tí nta tronco la

§ 10:19 Deuteronomio 32.21 * 10:20 Isaiás 65.1 † 10:21 Isaiás 65.2 * 11:3 1 Reyes 19.10, 14 † 11:4 1 Reyes 19.18 † 11:8 Deuteronomio 29.4; Isaiás 29.10 § 11:10 Salmo 69.22–23

ntá mé xikaha kjaxin tí jaharé la tsikonóahayará ch'án. ²² Tsjehérá kixin Dios la imá jina kjánchó kjaxin sinchehkasóte ch'án tí sín titekakonhya. A ntá jina ch'án la kjuinkitsa ch'án tí jahará. Kjánchó chrók'uejorá jnkójina éxi tjinkaon tí jehe ch'án. A ntá tí náhi la chaxin jahará la tsítóhará ch'án. ²³ A ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco inaá kixin jehe ch'án la imá chóna ch'án kjuachaxin kixin xikaha sich'e ch'án. ²⁴ A ntá jahará jehya judiorá mé tsíkóchrínjinrá ch'án nta olivo nteje. A ntá antsí má xrá tsotséxin tí nta olivo jina. A ntá tí sín judío la nta chaon kuénte tí tronco nta olivo jina la antsí xrahya tsjatsuenhen tsotséxin kichó inaá kixin ó nta chaon kuénte.

Tí tsjixín ntá tsaáxin tí sín Israel

²⁵ Kichóni, tjínkavan tsónohará tí nkehe jehó Dios nohe kixin sinchehnkehyará jahorá kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon. ²⁶ Tió xikaha tsónhen ntá kaín tí sín Israel tsaá sín kixin tí xroon itén Dios ntá chro kixin:

Tí nkexro sinchekaáni mé tsixín ch'án chjasin Jerusalén la tsjatsen ch'án tí jié kuénte tí sín tsik'axrjeníxin ch'ín Jahon.

²⁷ Tíhi mé kjuachaxin nixin kuéntana ts'áyéhe tí jehe sín

kixin janhan mé kjuatsiyán ijie sín.*

²⁸ Xikaha kixin tí tan nixin tsaáxinni ntá tí sín judío mé tsóninkakonhen sín Dios kixin ntá jahará ts'ayéhérá tí nkehe kuénte Dios. Kjánchó Dios naxá tjuéhe tí jehe sín judío kixin jehe ch'án tsíkjeýá ch'án tí sín tsik'axrjeníxin tí jehe sín. ²⁹ Kixin tí kaín nkehe kjuanjon Dios la tsakitsjehya ch'án la ko tsítóheya ch'án tí sín tsik'íyehé ch'án. ³⁰ Senó la jahará k'uékitekákonhyará Dios a ntá ijie la tí sín judío titekakonhya sín. A ntá jahará la kjónté la kujkonóahará Dios. ³¹ Mé xikaha jehe sín kuitekakonhya sín Dios la ntá kjónté xikaha la jehe ch'án tsikonóhehe tí jehe sín éxi kujkonóahará ch'án. ³² Kixin Dios la kuítóhe ch'án kaín chojni kixin chrókjuasin sín jié kixin ntá tsjakoñin ch'án tí kjuachaxin kuénte ch'án kixin sinchetjóá ch'án kaín sín kjónté chojni chóna jié.

³³ A ntá tí kjuachaxin kuénte Dios la imá jié la ko imá nohe ch'án. Ninkexró tsjachahya tsochronkaxin nkexrí tjenkayáxin ch'án la ko ninkexró tsjachahya tsienxín tí tjia kuénte ch'án. ³⁴ Ntá chro xroon itén Dios kixin: “¿Xá nkexro chrókienxín nkexrí tjenkayáxin Ínchéni la xá nkexro chrókjuinkitsa chrókjuakohé tí jehe ch'án? ³⁵ ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe inaá?” ³⁶ Kixin kaín nkehe la tixín tí tjen Dios kixin kaín nkehe la kjuich'éna ch'án kixin jehe ch'án chóna ch'án. Mé xikaha tjancheheni kjuasáyé Dios jnkochrixín. Amén.

12

Chjehérá cuépporá Dios kixin sinchetjóá ch'án

¹ Mé xikaha kichó ni, xrjanóahará kixin Dios ó kujkonóahará ch'án ntá jahará chróhchjehérá cuépporá Dios éxi ijnko nkehe tjechón kixin jehe ch'án ó kjuíntatjórará ch'án la mé xikaha chrókóxrjínjin ch'án. Tíhi mé ijnko nkehe ntoá t'ichjánxin chróhchjeheni ch'án. ² Chrókóxrjínjinyará tí nkehe sín chjasintajni. Náhi. Chrókónixín tí nkehe tjenkayáxinrá kixin jina chrókjuenkayáxinrá. Xikaha ntá chrókónohará kixin nkexrí tjinkaon Dios kixin ntoá chrók'uejorá éxi tóxrjínjin ch'án.

³ Kjuasáyé Dios kjuanjon ch'án tí xrá tjet'ahá ch'án. Mé xikaha nixjahará kaín rá kixin chrókjuenkayáxinhyará kixin imá tjetoanrá. Náhi. Chrókjuenkayáxinrá jina éxi tí kjuachaxin tjáhará Dios éxi nkexrí tinkachónkirá ch'án. ⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xrá chrókjuich'e. ⁵ Mé kjaxin xikaha tí jeheni kjónté nchónhyani la ts'ónani jnkokóá cuerpo kuénte Cristo. Mé xikaha jnkokóá chrókjuenkayáxinni kixin ó k'ónani jnkokóá cuerpo.

⁶ Dios kjuanjon nchónhya clase xrá éxi tjinkaon ch'án chróhchjehé ch'án jnkojnko chojni tí xrá. Ntá t'ichjánxin jina sich'eni tí xrá kjuanjon ch'án. A ntá tí kjuanjon ch'án kjuachaxin kixin tsochronkaxinni tí tan kuénte ch'án ntá t'ichjánxin sich'eni tí xrá éxi titekaonni ch'án. ⁷ A ntá tí kjuanjon ch'án xrá tsjinkitsani í jnko nkexro ntá t'ichjánxin jina sich'eni tí xrá a. A ntá tí nkexro tsik'áyéhe kjuachaxin tsjako la t'ichjánxin jehó tí xrá a chrókjuako. ⁸ Tí nkexro tsik'áyéhe kjuachaxin nchexraxinkaon í jnko nkexro la kaín asén chrókjuich'e ch'án tí xrá a. A ntá tí nkexro tsjanjon ichrén nkehe la chrókójeheya chrókjuanjon ch'án. A ntá tí nkexro t'etóan la jina chrókjuich'e ch'án xrá la ko tí nkexro chrókjuinkitsa tí sín chónahya la kjuaxróxin chrókjuinkitsa sín.

* 11:27 Salmo 14.7, Isaías 59.20 † 11:35 Isaías 40.13–14

Tí nkehe chrókjuich'e tí sín tinkáchónki Cristo

⁹ Kaín asánrà chrótjuèherá kichuárá. Chrókuítóherá tí nkehe jínahya tjenkayáxinrá la chrókjuenkayáxinrá tí nkehe jína. ¹⁰ Chrótjuèherá kichuárá la ko chaxín chrókjuikosáyehérá kichuárá.

¹¹ Chrókósáhyará la chrókjuich'eherá Ìnchéni xra kaín asánrà.

¹² Chrókócháhará kixin tjejóchonénrà la chrókóninkákonhyará kjónté chrókjuasótiará. Chrókuítóéhyará chrónixjehérá Dios.

¹³ Chrókjuinkítsará tí sín tinkáchónki Ìnchéni tí chóntahya sín nkehe sine sín. Chjehérá kjuachaxin ts'ejó tí sín tsjijinxjehará sín.

¹⁴ Nixjehérá Dios la tsjancheherá ch'án kixin sincheyaon ch'án tí sín chonkíhará. Tjancheherá Dios tsjinkítsa tí jehe sín la jehya kixin chrókóninkákonhénrà sín.

¹⁵ Tócháhakoárá tí sín tjejóchéhe sín la ko tí tjejótsjánka sín la koirá chrótsjankará.

¹⁶ Kjuaxróxin chrók'uejorá. Chrókjuinchehnkehyará. Náhi. Chrókóyóhará éxi tí sín nóa. Chrókjuinchehnkehyará kixin nohará.

¹⁷ Chrókjuich'ehyará jínahya tí sín kjuít'ahará ichrén nkehe jínahya. Náhi. Íchá jína chrókjuakóxinrá nkehe jína kixin chrók'uikon kaín chojni. ¹⁸ Chrókjuéyará jnkojína chrók'uejórá. Éxi nkexrí chrókjuachará la kjuaxróxin chrók'uejorá kaín rá. ¹⁹ Tjuahará kichó ni, la chrókjuinchekjásótehyará jahórá tí sín ichrén nkehe kjuít'ahará. Náhi. Tjítóherá kixin Dios sinchekjasóte tí sín a. Ntácho xroon itén Dios kixin: "Ixra kuènta sntaktiqaxián tíha. Janhan tsjénkahá tí sín a, ichro Ìnchéni."* ²⁰ Kjaxin ntácho xroon itén Dios kixin: "Tí sín nínkakonhan t'enxín sín kjinta la chróchjehé sín nkehe chrókjóne sín la tí t'enxín sín ntá la kjaxin chróchjehé sín nkehe chrók'ui sín. Mé xíkaha chrókjuich'e kixin chrókósuéhe sín kixin tí nkehe kjuich'e sín."† ²¹ Chrókuítóéhyará kixin chrókjuacha tí nkehe jínahya chrók'uetuanhará. Náhi. Chrókjuich'erá tí nkehe jína kixin chrókjuachahya tí nkehe jínahya chrók'uetóan.

13

¹ Kaín chojni t'ichjánxin sinchexiteyéhe sín tí gobierno kixin tí kjuachaxin chóna sín la Dios tsíkjanjon kixin kohya nijnko gobierno chrók'uejó tí jehya kjuachaxién Dios. ² Mé xíkaha tí sín tjanjonko tí sín t'etóan la kjaxin nínkakonhen sín tí nkehe k'uetóan Dios. A ntá tí sín xíkaha ch'e la mé jehe sín tjejá sín jje tsjasótéxin sín. ³ A ntá tí sín gobierno t'etóan la sinchekjasótehyá sín tí nkexro titekaon ch'e nkehe jína. Náhi. Tsónínkakonhen sín tí nkexro ch'e tí jínahya. Tí tjinkáonrà tsónínkakuanhyará sín la chrók'uejorá jnkojína. Chrókjuinchehxiteyéherá sín kixin chrókóninkakuanhyará sín. ⁴ Kixin Dios k'uetóan tí xra tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchrakonrà kixin jehya chónkó tjejó tí gobierno. Náhi. Chóna sín kjuachaxin sinchekjasótiará sín kixin jehe sín la Dios k'uetóan tjejó sín tí xra a kixin sinchekjasóte sín tí sín jínahya tjenkayáxin. ⁵ Mé xíkaha t'ichjánxin sinchexiteyéherá tí gobierno la jehya jehí kixin chrókjuinchekjásótiahyará sín. Náhi. Ó jehí jahará chrórxáinkáonrà kixin t'ichjánxin sinchexiteyéherá sín. ⁶ La kjaxin jehya táhó. Náhi. T'ichjánxin chrókjuenkeherá gobierno tí chichaon kuènte tí xra ch'erá tjanchia sín kixin tí gobierno la Dios k'uetóan tjejó sín t'etóan sín.

⁷ Kjaxin chrókjuenkeherá kaín chojni tjasikéherá. Tí nkexro síká kuènte xra la chrókjuenká sín kuènte tí xra, la tí nkexro síká ichrén nkehe nchekji ntá tíha kjaxin chrókjuenká sín, la kjaxin chrókjuikosáyehérá tí sín t'etóan. ⁸ Kjaxin chrókjuasikéhyará ninkexró. T'ichjánxin chrótjuèherá kichuárá kixin tí nkexro tjeúhe kichó la mé xíkaha kjuínchexiteyá tí nkehe k'uetóan tí ley. ⁹ Kixin ntácho tí mandamiento kixin: "Tjakéhya asánrà í jnko chojni chjin la ko t'oyánhyará kichuárá la ko teehyará la nixjahyará kjuach'ia kuènte í jnko chojni. La ko tjaké hya asánrà nkehe ókjé."* Kaín tíha la ko í so nkehe t'etóan Dios mé tienxínni t'axrxéjin kixin: "Chrótjuèheni kichó ni éxi tjeúxin asénni." ¹⁰ Tí chojni tjeúhe kichó la ninkehó nkehe jínahya sich'ehe kichó. Mé xíkaha chrótjuèhe kichuárá la mé xíkaha mé chróxiteyá jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejótsheni chrók'uajuahyani. Tí nkexro tsaáxinni la í séhya itsi ch'án ijie, a ntá tí kjuankíxinni kuítekaonni itén ch'án la ísé tsjxin ch'án. ¹² A ntá tí tie la í séhya tsjak'e kixin ó tsi tí t'inkáséyan la chrókuítóheni tí nkehe ch'eni kuènte sítié la chróchóntani kjuachaxin kuènte Nchakuen Dios kixin tsjinkítsa ts'ajini tí t'inkáséyan, éxi ijnko soldado t'inkáyate ch'án ka tsik'óna chica kixin kohya nkehe tsónhen ch'án. ¹³ Chrók'uejóni jnkojína éxi nkexrí chrók'uajini chaxín ntoá

* 12:19 Deuteronomio 32.35 † 12:20 Proverbios 25.21–22 * 13:9 Éxodo 20.13–15, 17; Deuteronomio 5.17–19, 21; Levítico 19.18

tí t'inkáséyan a. Chrókjuasinhyani kia chrókjuanjonxin chojni la ko chrókókoanhyani la ko chrókjuenkayáxinhyani chróchóntani nchónhya chojni chjin la ko chrókjuenkayáxinhyani tí nkehe ntáchro asénni la ko chrókjuéyáhyani kjuanínkaon la ko chrókóchjínoxíenhyani. ¹⁴ A ntá jahará tákjára tí kjuachaxin kuènte Ìnchéni Jesucristo tsjinkítsará la tíha mé éxi chrók'uinkayára nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

14

Tjontahyará kichuárá

¹ A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjontahyará ch'án kjónté kánhyó nohe ch'án. ² A ntá iso sín chaxín nohe sín la tjinkaon sín chrókjóné sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónéhya sín nto, ntá kayoa ó chrókjóné sín. ³ Tí nkexro chrókjóné kaín nkehe chrókjónéjehya tí nkexro tjinkaon chrókjónéhya nkehe. A ntá tí sín chrókjónéhya nkehe chrókjontahya sín tí sín chrókjóné sín kaín nkehe kixin kjónté xikaha la Dios tsakja tí jehé sín. ⁴ Xá nkexro jaha kixin chrókjóné tí nkexro ch'ehe xra í jnko nkexro? Tíha la xra kuènte tí lámóé ch'án tsontáchro á jína kjuich'e ch'án xra ó náhi. A ntá kjá tsjak'e ch'án jína kixin Ìnchéni chóna ch'án kjuachaxin tsjinkítsa ch'án tsjak'e tí ch'in a jína.

⁵ Iso sín tjenkayáxin sín kixin imá tjetoan ijnko yaon a ntá í jnko yaon la náhi. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín. ⁶ Tí sín xraxinkaon tí yaon la tjikosáyehe sín Ìnchéni la kjáxin tí sín tinkáchónkihya sín xikaha la tjikosáyehe sín Ìnchéni kjónté xraxinkakonhya sín tí yaon. Kjáxin tí sín ine kaín nkehe la ine sín kixin xikaha tjikosáyehe sín Ìnchéni la kjáxin tjanchehe sín kjuasáyé Dios. A ntá kjáxin tí sín nehya kaín nkehe la xikaha mé tjikosáyehe sín Ìnchéni la kjáxin tjanchehe sín kjuasáyé Dios.

⁷ Nijnko tí jeheni tjejóni kixin jehóni chrók'uetóanni la ko jehya jehí chrók'uenni. ⁸ Tí tjejóni la tjejóni kixin sich'ehe ni xra Ìnchéni la kjónté its'enni la kuènte ch'án tí jeheni. Méxra kjónté chrók'uejóhónni ó kjónté chrók'uenni la kuènte ch'án tí jeheni. ⁹ Méxra xikaha ntá Cristo la ik'uén ch'án la ko xechón ch'án inaá kixin k'óna ch'án Ìnché tí sín tsík'en la ko tí sín tjejóhón.

¹⁰ A ntá jahará la, ¿nkekuènte tjóntará tí kichuárá ó nkekuènte chontehyará kaín sín kjuasáya? Kixin kaín ní tsqchjinani tí tjen Dios kixin tsontáchro ch'án á jína xra kjuich'eni ó náhi. ¹¹ Ntáchro xroon itén Dios kixin:

Méxra janhan takjénxian asenná, ichro Ìnchéni, kixin tí tjeñ la ts'ejóxin toch'in kaín chojni kixin kaín chojni la tsjanchia sín kjuasáya kixin janhan mé Dios kuènte sín.*

¹² Mé xikaha jnkójnko chrókónoheni kixin tsochenkani Dios nkexrí kjuich'eni.

Tjachruuehyará kichuárá

¹³ Méxra chrókjontahyará kichuárá. Íchá jína kixin ninkehó nkehe chrókjuich'ehyará kixin ntá tí sín kichó ní chrókjuasinxinhya sín jje kixin tí chrókjuasin sín jje ntá xikaha chrók'uitjáyanxin tí tinkáchónki sín Ìnchéni. ¹⁴ Janhan tinkáchónkia Ìnchéni Jesús la ntá xikaha ó nóna kixin kohya ninkehó nkehe jehí tjuáhya. A ntá ijnko nkexro tjenkayáxin kixin jehya nkehe jína tíha ntá chaxín tjuáhya tí nkehe kixin xikaha tjenkayáxin ch'án. ¹⁵ Tí tjenkayáxin tí kichuá kixin tí nkehe inte la ntoáhya a ntá tí xikaha ch'e la tjuèhya tí kichuá. Kixin jehya tí nkehe chrókjóné ó chrókjuinchek'itjáyanxián tí kichuá kixin Cristo k'uenyákonhen ch'án kjáxin. ¹⁶ Chrókjuich'ehyará nkehe jínahya kixin ntá xikaha chrók'uántaxínjin sín tí nkehe jína tinkáchónkirá. ¹⁷ Kixin tí kjuachaxién Dios la jehya tí nkehe chrokjóneni ó tí nkehe chrok'uini. Náhi. Tí tjen tí kjuachaxién Dios la chrók'uejóni jnkójína la ko kjuaxróxin chrók'uejóni la ko chrókóchéheni kixin chóntani Nchakuen Dios. ¹⁸ Tí nkexro ch'ehe Cristo xra mé chrókjuinchechéhe Dios la ko chrókjuinchechéhe chojni.

¹⁹ Mé xikaha chrókjuéyáni kaín tí nkehe tjikao kjuaxróxin kixin ntá tsjinkítsani tí sín kichó ní kixin ntá kjáxin sín antsí chrókúinkáchónki sín Ìnchéni. ²⁰ Chrókjuinchek'itjáyanhará tí xra kuènte Dios kixin tí nkehe chrókjónterá ó kixin kaín nkehe chrókjónterá la ó tsíkjinchetjóá Dios. Tí jínahya la tí chrókjóneni ókjé nkehe ntá xikaha la í so chojni chrók'uitjáyanxin tí nkehe tinkáchónki sín. ²¹ Ntá íchá jína chrókjontehyará into la ko chrók'uihyará vino la ko ninkehó nkehe chrókjuich'ehyará tí xikaha chrókjuasin jje kichuárá. ²² Tí nkehe tinkáchónkirá la jahórá chrókónohará kixin Dios la tjetsjehe ch'án. A ntá jína tsjak'e tí nkexro tí chrókjuasinxinhya ch'án jje tí nkehe tjenkayáxin ch'án. ²³ A ntá tí nkexro ine nkehe la

* 14:11 Isaías 45:23

tjenkayáxin sín kixin tsjasixín sín jie ntá chaxín xikaha yamá sín jie kixin kénhya asén sín kjóne sín tí nkehe. La tió kénhya asén sín tjenkayáxin sín la ó kjuasin sín jie.

15

Nchechéhérá kichuára la jehya jahóra

¹ Tí antsí tinkáchónkini Inchéni ntá chrókuinkitsani tí sín kánhyó tinkáchónki tí jehe ch'án la chrókuich'ehyani tí nkehe chrókóchéxinni jehóni. ² Kjaxin kaín ni chrókuinchechéheni kichó ni kixin chrók'uejó sín jína la ko kixin antsí chrókuinkáchónki sín Inchéni. ³ Kixin kjaxin Cristo kjuich'ehya ch'án tí nkehe chrókóchéxín ch'án jehó ch'án. Náhí. Kjuínchexiteyá ch'án éxi ntáchro xroon itén Dios kixin: "K'uinka kjuasótexinna kaín tí kjuanínkaon chóna tí sín nínkakonhen Dios."* ⁴ Kaín nkehe chrónka xroon itén Dios senó la tsíjín sín óse kixin chrókónoheni kixin ntá chrók'uejóchéxinneni la chrókónínkakonhyani kixin tsíha mé nchechéheni. ⁵ Dios, mé tí nkexro tjínkítsani la ko nchechéheni, la kjaxin tsjínkítsa ch'án tí jahará kixin ts'ejorá jnkojína la ko jnkokón tsjenkayáxinkoará kichuára kixin xikaha kjuaxóxin Cristo Jesús. ⁶ Kixin kaín ni jnkoqá chrók'uákjénjinni Dios la chrókuancheheni kjuasáyé ch'án mé jehe ch'án mé It'é Inchéni Jesucristo.

Tí tan jína xrakohé tí sín jehya judío

⁷ Chrókuánjónrá kjuachaxin ts'ejó í so chojni la chrótjuéherá sín kixin éxi Cristo tsík'áyéhe ch'án tí jahará mé xikaha tsjikosáyehérá Dios. ⁸ Janhan jína chróntáxrjan kixin Cristo ikui sich'ehe xra tí sín judío kixin tsoxiteyá tí nkehe tsichenka Dios tí sín tsík'axrjenixinni óse kixin xikaha tsjaxóxin kixin Dios la jína ch'án la sinchexiteyá ch'án tí nkehe tsíntáchro ch'án. ⁹ La kjaxin ikui ch'án kixin kjónté tí sín jehya sín judío la chrókjuanchehe sín kjuasáyé Dios kixin kujkonóhéhe ch'án sín éxi chrónka tí xroon itén Dios kixin: Janhan la ko tí sín tjejó ókjé nación mé tsjancheheni kjuasáyé Dios

la ko tsotsjeni himno kixin ts'ákjénjinni ihnjé ch'án.†

¹⁰ Kjaxin ntáchro í jnko parte xroon itén Dios inaá kixin:

Tsocháhaoará kaín tí sín kuénté Dios.‡

¹¹ Kjaxin ntáchro xroon itén Dios inaá kixin:

Tjanchehérá kjuasáyé Inchéni Dios kaín rá kjónté jehya judiorá

mé kaín chojni chrókuanchehe sín kjuasáyé Dios.§

¹² Kjaxin ch'ín Isaías tsíkjin kixin:

Ts'axrjenixin ch'ín Isai jnko nkexro

la ts'etuenhen ch'án kaín tí sín jehya judío,

á ntá tí sín a mé tsinkáchónki sín tí nkexro a.*

Mé xikaha ichro itén Dios.

¹³ Dios mé tjetjanjon ch'án kjuachaxin tjejóchéxinneni la jehe ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehe ch'án kixin ntá ts'ánkí tí kjuachéhe tjejóchéxinneni kjuachaxién Nchakuen ch'án.

¹⁴ Kichóni, chaxín tónóna kixin jahará la jína tjejórá la kaín xín kjuaxrexínkaon jína tjenkayáxinrá la nohará tsjínkítsará chénkará kichuára. ¹⁵ La kjónté xikaha la chrakonhya ikjian tí xroon í chr'anhánrá xrjanka kaín tí nkehe kixin chrók'uitjáyanhyará chrórxínkáonrá kaín nkehe. Mé xikaha it'á tí xra kixin kjuasáyé Dios kjuanjon ch'án tí xra. ¹⁶ Kixin sít'aha Jesucristo xra tsotjanka tí sín jehya judío tí itén Dios. Tí xra mé tjákua tí tan jína tsaáxin chojni kixin ntá janhan tsjánjuan tí sín jehya judío ts'áyéhe Dios éxi ijnko nkehe tsóxrjínjin ch'án kixin Nchakuen ch'án kótjuáxin sín.

¹⁷ Janhan mé ijnko chojni tinkáchónki Cristo Jesús la mé xikaha sín kjuachaxin tsochána kixin t'aha xra Dios. ¹⁸ Chrokjuahya tsohnke tsontáxrjan í jnko nkehe. Jehó tsóxrjanka nkexrí tí kjuachaxin kjuanjon Cristo chjina kixin tsotjanka tí sín jehya judío tí itén ch'án kixin tsitekaon sín Dios. Ntá xikaha kuitekaon sín kixin tí itan kjuákua la ko tí nkehe jína kjuít'a. ¹⁹ Kixin tí kjuachaxién Dios mé kjuákoxián tí kjuásian kjuaxroan la ko kjuákoxián tí kjuachaxin kuénte Nchakuen Dios. Mé xikaha kjuintaxixín kjuákua tí tan jína tsaáxin chojni Cristo xránkixixín chjasin Jerusalén la nkuixín chjinaxón ntiha la hasta estado Ilírico. ²⁰ Mé xikaha tjínkaván tsjijkákua tí tan tsaáxinni tí chjasin naxá tienhyé sín ihnjé Cristo kixin tí janhan tjínkakhonhya tsjixrónkáxián tí xra kuénte í jnko chojni xráxin tjech'e xra. ²¹ Íchá jína éxi ntáchro xroon itén Dios kixin:

Chrókuinhin tí sín naxá kienhyé sín tí tan kuénte tí jehe ch'án.

La ko chrókienxín tí sín naxá kienhyé tí tan kuénte ch'án.†

* 15:3 Salmo 69.9 † 15:9 2 Samuel 22.50; Salmo 18.49 ‡ 15:10 Deuteronomio 32.43 § 15:11 Salmo 117.1

* 15:12 Isaías 11.10 † 15:21 Isaías 52.15

Ch'in Pablo tjenqayáxin ch'an sátsji ch'an chjasin Roma

²² Nchónhya veces tjínkavan chrókjuasántsja há tí jahará kjánchó náxa xitjahya kjuasán ntiha. ²³ Kjánchó ijie la ó kjuixinna tí xra nkuixín tí tjèn ntihi. Ntá itsjé nánó tjínkavan chrókjuasántsja há tí jahará ²⁴ a ntá ijie ts'atsínka tsonixjahará tí sátsjia nació n España. Ntá tsochána ts'íkuan tí jahará ntá tsjixin ntá chr'exín tjínkavan kixin jahará tsjínkítsa rá tí sátsjia. ²⁵ A ntá ijie la sátsjia chjasin Jerusalén, sátsjikian tí nkehe tsjínkítsa tí sín kichó ni ntiha. ²⁶ Kixin tí sín estado Macedonia la ko estado Acaya kjuenqayáxin sín tsjejo sín chichaon kixin tsochr'énhen sín tí sín kichó ni ntiha tsochjéhe tí sín nòna tjejó chjasin Jerusalén. ²⁷ Jehé sín kóxrjínhin sich'e sín xikaha kixin tí sín judío tinkáchónki Cristo kjuínkítsa tí jehe sín tsonohe sín itén Dios. Ntá ijie la jehe sín chrókjuínkítsa sín inaá chrókjuanjón sín iso tí nkehe chóna sín chrók'uáyéhe tí sín judío tinkáchónki Ìnchéni. ²⁸ A ntá tió tsjixin tí xra la ts'áyéhe sín tí chichaon la ntá janhan sátsjia España la ts'atsínkua tsonixjahará. ²⁹ Ó nòna kixin tió sátsjia la Cristo mé imá sincheyaon ch'an tí janhan la ko tí jahará.

³⁰ Kichóni kjuasáyé Ìnchéni Jesucristo la ko tí Nchakuen ch'an tjanjón kjuachaxin tsotjuéheni kichó ni mé xrjannóghará kixin jnkokoá chrókjuenqayáxinni kixin tí xra tje'ta la ko chrónixjehérá Dios kixin tí janhan. ³¹ Tjanchehérá Dios kixin tsjínkítsa ch'an tí janhan kixin kohya nkehe tsonna kixin kaín tí sín titekakonhya Dios siín chjasin Judea. La ko tjanchará kixin jina sátsjikian tí nkehe tsjínkítsa tí sín kichó ni tjejó chjasin Jerusalén kixin jina chrók'uáyéhe sín. ³² Ntá tí tjínkaon Dios la tsochána tsjasán tí tjejorá jahará la ko kjuaxróxin tsjak'é tí tsjasántsjahará. ³³ Dios tjanjón kjuaxróxin ts'ejokoará kaín rá. Amén.

16

Ch'in Pablo nixjehé ch'an tí sín chónin ch'an

¹ Tétuanhanrá tsjínkítsa rá tí tjan kichó ni Febe ch'e tjan xra njnko chjasin Cencrea ² mé tjánjónrá kjuachaxin tsjak'e tjan kjuachaxién ihnjé Ìnchéni éxí ch'eherá í so sín kichó ni tinkáchónki Ìnchéni. Tsjínkítsa rá tjan ichrén nkehe t'ichjánxinhin tjan kixin jehe tjan kjaxin kjuínkítsa tjan nchónhya chojni la kjaxin kjuínkítsa tjan tí janhan.

³ Nixjehérá tjan Priscila la ko ch'in Aquila. Jehé sín jnkokoá kjuich'ekoni xra kixin kjaxin sín mé ch'ehe sín Cristo xra. ⁴ Jehé sín chrók'uenxin sín kixin kjuínkítsana sín tí janhan mé xikaha tjaha sín kjuasáya la jehya janhván, kjaxin kaín sín kichó ni njnkoé tí sín jehya judío. ⁵ Nixjehérá kjaxin kixin kichó ni tóchjina ntóe tjan Priscila la ko ch'in Aquila. Nixjehérá tí ch'in choxian jina Epeneto mé jehe ch'an la saxín kuítekaon ch'an Cristo estado Acaya. ⁶ Nixjehérá tjan María kixin kjaxin tjan kjuich'e tjan xra tí tjejorá ntiha. ⁷ Kjaxin nixjehérá tí sín tsíkjin chjasenná mé ch'in Andréonico la ko ch'in Junias. Tí k'uikjèna ntóechiso la kjaxin tí jehe sín k'uikjehe sín. Kjaxin kaín tí í so sín apóstol la tjikosáyehe sín tí sín a. Jehé sín senó kuinkáchónki sín Cristo ntá chr'exín janhan.

⁸ Nixjehérá ch'in Amplias kixin jehe ch'an mé ijnko nkexro choxian la ko tjuaha tinkáchónki Ìnchéni. ⁹ Nixjehérá ch'in Urbano kixin jnkokoá kjuit'akian ch'an xra kuénte Jesucristo la ko nixjehérá tí ch'in choxian Estaquis. ¹⁰ Nixjehérá ch'in Apeles. Jehé ch'an la kjónté nchónhya nkehe kónhen ch'an kjuasóte ch'an kixin tinkáchónki ch'an Cristo. Kjaxin nixjehérá tí sín kjéhya ch'in Aristóbulo. ¹¹ Kjaxin nixjehérá tí ch'in kjéhyana Herodión la ko kjaxin nixjehérá kaín tí sín kjéhya ch'in Narciso kixin kjaxin sín tinkáchónki sín Ìnchéni. ¹² Nixjehérá tjan Trifena la ko tjan Trifosa. Kjaxin jehe sín kjuich'e sín xra kuénte Ìnchéni la ko nixjehérá kjaxin tí tjan kichó ni Pésida. Kjaxin kjuínkítsa tjan kjuich'e tjan xra kuénte Ìnchéni. ¹³ Kjaxin nixjehérá ch'in Rufo, ijnko chojni tsíkjeýá Ìnchéni la ko nixjehérá tí iné ch'an kjaxin kixin kjaxin tjan kjuínkítsa tjan tí janhan la éxí naná k'uikuan tí jehe tjan. ¹⁴ Kjaxin nixjehérá ch'in Asincrito la ko ch'in Flegonte la ko ch'in Hermas la ko ch'in Patrobas la ko ch'in Hermes la ko tí í so sín kichó ni tjejóko tí jehe sín ntiha. ¹⁵ Nixjehérá kjaxin ch'in Filólogo la ko tjan Julia la ko ch'in Nereo la ko tí tjan kichó ch'an la ko ch'in Olimpas la ko kaín tí sín kichó ni tinkáchónki Ìnchéni tjejóko sín ntiha.

¹⁶ Kjaxin tsehérá tja kichuárá kjuachaxin ihnjé Ìnchéni. Kaín tí sín njnko kuénte Cristo ntihi xraxinkaon sín tí jahará la nixjahará sín.

¹⁷ Kichóni, xrjanóghará kixin chrótsjehérá nkexro tí sín tjixrónkáxin chrók'óxia tí sín jnkokoá tinkáchónki Ìnchéni. Jehé sín titekakonhya sín tí itén Dios kjuákohará k'uitjará. Tí xikaha ch'e sín la chrók'uaxrjekjanxínrá ntiha. ¹⁸ Tí nkexro xikaha ch'e la jehya Ìnchéni Jesucristo ch'ehe xra. Náhi. Jehí tjínkaon sín chrókjuixrónkáxin sín la nixja sín tí nkehe náxrjón ó la xikaha ch'iyehé sín asén tí chojni náxa noehya. ¹⁹ Kaín chojni ó nohe kixin jahará la ó kuítekaonrá Ìnchéni. Mé xikaha chána tí janhan la tjínkavan chrók'oxakonhanrá chrókjuich'erá xra jina. Jehya kixin chrókjuich'erá nkehe jínahya. ²⁰ Tí Dios

tjanjon kjuaxróxin mé tjoka tsinkátja Satanás, í ts'etueñhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetqan ch'ín Pablo la kjaxin nixjahará kjuachaxién Ìnchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntqe ch'án la ko kaín tí sín kuénte nñnko tójnksé ntqe ch'án. La ko nixjahará ch'ín Erasto. Jehe ch'án mé tesorero kuénte chjasin la ko tí ch'ín kichó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjinkítsa ch'án kixin jína chrók'uejorá éxi chrónka tí tan jína tsaáxinni la ko éxi kjuakoni kuénte Jesucristo. Tíha mé chaxin chrónka éxi Dios k'uetqan nchenoheni ch'án tí nkehe ninkexró k'uénoehya desde k'óna chjasintajni. ²⁶ A ntá ijie kaín ni tsonoexinni nkexrí nixja xroon ikjin tí sín profeta kixin nkexrí k'uetqan Dios itjen jnkochrírín. Ntá kaín nkehe k'uénoehya ninkexró a ntá tsochóxin kuénte chjasintajni kixin tsinkáchónki sín la ko tsitekaon sín Dios.

²⁷ Itjen jnkokqá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónkini Ìnchéni Jesucristo jnkochrírín. Amén. Ó tjen.

Tí xroon saxín ikjin ch'ín Pablo chr'énhen ch'án tí sín tinkáchónki Cristo síin chjasin Corinto

Ch'ín Pablo mé ikjin ch'án xroon ichr'án ch'án tí ninko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókuji't'ahá ch'án xra. Janhan la ko kichó ni Sóstenes mé ² ikjinni tí xroon i chr'ánhanrání tí jahará tójnkotsérá ninko chjasin Corinto. Ó kjuínchetjóárá Ìnchéni Jesucristo na mé kjueyará Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueyá ch'án kain xín tí sín tjanchehe sín Ìnchéni Jesucristo kixin chrókujuinktsa ch'án sín, tíha mé Ìnché sín la ko Ìnchéni. ³ Kjuasáyé It'eni Dios la ko Ìnchéni Jesucristo chrókujuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochr'ín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús. ⁵ Na mé Dios tjáhará kjuachaxin kuènte ch'án ntá xikaha antsí jina nohará chonkaxínrá kixin nkexrí tinkachónkirá Ìnchéni la ko kjaxin antsí jina tiénxinrá kain nkehe chaxín ntoá. ⁶ Tí nkehe kuínhínrá kixin nkexrí tjen Cristo na ntá jie jahará tjákoxinrá. ⁷ Ntá jahará ó chontará kain xín tí kjuachaxin kuènte Nchakuen Dios, la í ninkhé t'itjáyankíhya tí kjuachaxin kuènte ch'án k'uayéhérá nachrohe tjejochonhénrá tsokjan Ìnchéni Jesucristo. ⁸ Ntá Ìnchéni ts'ayakonhanrá ch'án kixin tsjtóghyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án. ⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsikjeyará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xrjanóaxínrá tí kjuachaxin ihnjé Ìnchéni Jesucristo kixin jnkokoá chrókuenkayáxinrá la ko chrók'uaxrjentahyará ókjé na mé jnkokoá chrókuenkayáxinkoará kichuárá. ¹¹ Kichóni, ó kuínhan tí nkehe chrónka tí sín kjéhya ch'ín Cloé kixin síin kjuanínkaon tí tjejorá tójnkotsérá ntiha. ¹² Na mé ntáxrjan kixin isorá ntáchrorá kixin jahará chréhérá tí janhan Pablo, la ko í sorá ntáchrorá kixin jahará chréhérá tí ch'ín Apolos, la ko í sorá ntáchrorá kixin jahará chréhérá tí ch'ín Pedro, la ko í sorá ntáchrorá kixin chréhérá Cristo. ¹³ ¿Xá nkekjaín Cristo síin kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuikitexínrá tí njina ní? ¹⁴ Tjáncháha Dios kjuasáya kixin nijnko tí jahará kuikítiahyará ntiha. Jehó ch'ín Crispo la ko ch'ín Gayo mé kuikite janhan. ¹⁵ Na mé nijnkorá xitjahya tsontáchrorá kixin njina kuikitexínrá. ¹⁶ Kjaxin jehó kuikite tí ch'ín Estéfanas la ko tí sín kjéhya ch'án. Xráxinkakonhya á kuikite í so sín o náhi. ¹⁷ Kixin tí xra chjina Cristo jehya kixin chrókuikite chojni. Náhi. Tí xra chjina Ìnchéni kixin tsoxrjankaxián tí tan tsaáxinni. Tjínkakonhya kixin chrókujuákoxián palabra náxrjón noi kixin xikaha chrókujuákua ntá chrókujuintamá tí kjuachaxin jie kónoxin tí k'uénxin Ìnchéni Jesús tí ntacruz, kjuák'enkáni ch'án, k'uényákonhenni ch'án.

Cristo mé tjákoxin tí kjuachaxién Dios la ko tjákoxin ch'án kixin imá nohe Dios

¹⁸ Chronkaxínni kixin k'uényákonhenni Cristo tí ntacruz. A ntá tí tsinhin tí sín xráxin ts'itjáyán ntá ts'ikon sín tíha éxi nkehe chónkó. A ntá kain ni chojni kuaáni mé t'ikonni kixin kjuachaxin jie tíha. ¹⁹ Mé xikaha ntáchro xroon itén Dios tsikjin sín ósé kixin Dios mé sinchek'itjáyán tí nkehe tjenkayáxin tí sín imá nohe, la ko tsitogenta ch'án tí nkehe ntáchro tí sín imá tiénxin sín.*

²⁰ ¿Mé nkehe tsónhen ntáchro sín kixin imá nohe sín la ko nkehe tsónhen tjako sín la ko nkehe tsónhen tí imá nohe sín nixja sín? Táha la nkehe síin chjasintajni ó. A ntá Dios mé t'ikon ch'án kixin lontj sín kixin xikaha ichro sín. ²¹ Kixin Dios antsí nohe ntá xikaha kuíteghya ch'án kixin kjuachaxin kuènte sín ó chrókuacha sín chróchóxián sín ch'án. Ntá kóxrjínhin Dios chrókujueyá ch'án chrókujuincheaká ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jie, ichro sín. A ntá tí sín nkiva griego mé xritjeyá sín kixin antsí chrókónohe sín, ichro sín. ²³ A ntá jeheni kain ni tinkáchónkini Cristo la tjinkakonhyani chrókónoheni kain tíha la mé jehó Cristo tjákoxinni.

* 1:19 Isaías 29.14

Chrónkani kixin ijnko ntacruz kjuák'enkáni ch'án, k'uénxin ch'án. A ntá tí sín judío ntáchro sín kixin ijnko nkehe chrókósuèhèni chrókuinkáchónkini tíha, ichro sín. A ntá tí sín jehya judío ntáchro sín kixin chojni lonṭi tí jeheni kixin xikaha tinkáchónkini, ichro sín. ²⁴ A ntá tí sín kjueyá Dios, kjónté judío sín na o griego sín, la kaín ni ntáchroni kixin Cristo mé k'uenyákonhèni ch'án. Mé xikaha tjákoṣin Dios tí kjuachaxin jié la ko tí kjuaxrexinkaon jina kuènte ch'án. ²⁵ Ntá jehe sín ntáchro sín kixin éxi ijnko nkehe chónkó tí nkehe kjuenkayáxin Dios, na kjónté xikaha la ántsi tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjáxin ntáchro sín kixin jiéhya tí kjuachaxin chóna Dios. A ntá tí sín ántsi má chóna kjuachaxin ntihi chjasintajni kjónté la tóyóehya sín Dios kixin ántsi chóna ch'án kjuachaxin t'etoan ch'án. ²⁶ Kíchóni, xráxinkáonrá nkexri k'uéjorá ntá kjónté kjueyará Dios tí jahará. Na mé tsjéhyará imá kónohará éxi t'ikon tí sín chjasintajni la kjónté kjueyará Dios tí jahará. La ko tsjéhyará imá kuétanrá la ko tsjéhyará k'uaxrjenáxinrá tí sín imá k'uék'etoan. ²⁷ Ntá kjónté Dios mé kjueyá iso tí sín noehya éxi t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá nohe ntihi chjasintajni. La ko kjáxin kjueyá Dios iso tí sín chónahya kjuachaxin éxi t'ikon tí sín chjasintajni kixin xikaha tjinkaon ch'án chrókjuinchesuèhe ch'án tí sín imá chóna kjuachaxin ntihi chjasintajni. ²⁸ Dios mé kjueyá ch'án iso tí sín t'etoanhya la ko iso tí sín ninkeho sínkíhya tónhen sín ntihi chjasintajni kixin jehe ch'án mé chrókjuinchek'itjáyan ch'án kjuachaxién tí sín jehó chrók'etoan. ²⁹ Méxra xikaha ninkexró tsjachahya sinchehnke tí tjen Dios. ³⁰ A ntá tí kjuachaxin kuènte Dios mé tinkachónkirá Cristo Jesús, a ntá chónaxinni Cristo kjuaxrexinkaon jina, la ko tí kjuachaxin kuènte ch'án kóxika tí jié kuènteni, la ko tí kjuachaxin kuènte ch'án sinchetjuáxinni ch'án, la ko tí injié ch'án k'uénaxinni ch'án. ³¹ Mé xikaha éxi chrónka tí xroon tsikjin sín ósé ntáchro kixin: "Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuákoṣin ch'án kixin imá t'etoan tí kjuachaxin kuènte Dios."[†]

2

Ch'in Pablo mé tjako ch'án kixin Jesucristo kjuák'enkáni ch'án ntacruz

¹ Kíchóni, tió kjuasán ntiha chjasánrá níxjahará chrókjuákoahará nkexri tjen Dios la jehya ijnko tan tienxínhya chojni la ko jehya itan imá noi chrókjuákoáxinrá. ² Kixin tió k'uéjóni jnkokoá ntiha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz. ³ K'uéjóni jnkokoá ntiha la ntá jahará ó nohará kixin janhan kjuak'é éxi chrókjuachahya kixin síxránkana, chrákonna. ⁴ Tí kjuankíxian níxjahará la ko xrjánkaxián tí tan tsaáxin chojni, la tjínkakoñhya chrókjuáchrúáxinrá tí nkehe náxrjóni níxja chojni tsikónohe má. Náhi. Tió kjuákoahará kónoxin kixin tjékian Nchakuen Dios la ko kónoxin tí kjuachaxin jié kuènte ch'án, ⁵ kixin jehya kjuaxrexinkaon kuènte chojni tsikónohe má chrókjuinkachónkirá. Náhi. Tí kjuachaxin kuènte Dios mé chrókjuinkachónkirá.

Nchakuen Dios mé tsqochóxixinni ch'án

⁶ Kjánchó tió tjákoṣa tí sín chaxín ó nohe sín tinkáchónki Ìnchéni mé xrjanka tí kjuaxrexinkaon ántsi noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etoan chjasintajni, na mé tí kjuachaxin kuènte sín la tjoka ts'itjáyan. ⁷ Jeheni mé ántsi chrónkani tí nkehe jehó Dios nohe, na mé tí nkehe tsikjenkayáxin ch'án náxa k'ónahya chjasintajni kixin nkexri tsaáxinni. ⁸ Nijnko tí sín t'etoan chjasintajni kienxínhya sín tí nkehe tsikjenkayáxin Dios. A ntá tí chrókiénxin sín tíha la ntá chrókjuák'enkánihya sín Ìnchéni tjetean tí ntacruz. ⁹ Éxi ntáchro xroon itén Dios tsikjin sín ósé kixin: Náxa k'uíkonhya chojni la ko náxa kíenhya chojni, la ko náxa kjuenkayáxinhya chojni

kixin nkexri sín kaín xín nkehe kjuích'éna Dios ts'áyéhe tí sín tjuéhe ch'án.*

¹⁰ A ntá Dios mé nchenoexinni kaín tíha kixin chónani Nchakuen ch'án. Na mé tí Nchakuen Dios mé tjetsjehe kixin nkexri sín kaín xín nkehe la ko kjáxin nkexri tjen tí nkehe tjenkayáxin Dios.

¹¹ Na mé ninkexró mé noehya nkexri tjenkayáxin asén chojni. Na mé jnkobjnko chojni mé nohe kixin nkexri tónhen asén. Méxra xikaha kjáxin kohya nkexro nohe nkexri tjenkayáxin Dios la jehó tí Nchakuen ch'án mé nohe. ¹² A ntá jehya tí nchakuen chojni chjasintajni k'uáyéheni. Náhi. Tí Nchakuen huñxin tí tjen Dios mé k'uáyéheni kixin ntá tsonoexinni kixin kaín xín nkehe kjuínchekitonhèni Dios. ¹³ Kjáxin jeheni chrónkani tíhi, a ntá jehya chronkaxinni tí nkehe tsikónohe chojni ó. Náhi. Tí Nchakuen Dios mé nchenoexinni nkexri tsjakoxéxinni tí sín chóna Nchakuen ch'án.

† 1:31 Jeremías 9.23 * 2:9 Isaías 64.4

¹⁴ Kjánchó tí sín naxá chóntahya Nchakuen Dios mé xitjahya ts'áyéhe sín tí nkehe tjanjon Nchakuen Dios. Na mé éxi lóco t'íkon sín kaín tíha kixin jehó tí sín chóntha Nchakuen Dios mé tsjacha sín tsienxín sín tíha. ¹⁵ A ntá tí nkexro chóntha Nchakuen Dios mé chrókjuacha chrókónohe nkexrí siín kaín xín nkehe. Kjánchó tí nkexró chóntahya Nchakuen Dios tsjachahya tsjanchia jigé tí jehe ch'án. ¹⁶ Méxra ntáchro xroon itén Dios kixin: ¿Xá ninkexró chrókónohe kixin nkexrí tjenkayáxin Ìnchéni kixin chrókjuacha sín chrókjuakohe sín ch'án inaá?† Kjánchó jeheni la ó chóntani tí kjuaxrexinkaon kuénte Cristo.

3

Tí sín jnkokoá kjuich'ehe sín Dios xra

¹ Mé xikaha, kichó ni, kjuachahya janhan chrónixjahará éxi chojni t'etuñhen asén sín Nchakuen Dios. Náhi. Éxi chojni naxá nchexiteyéhe sín tí nkehe ntáchro asén sín, na mé éxi xjan ntsínsi na ntá kjuankixin kuinkáchónki Cristo mé xikaha tí jahará. ² Janhan na kjuakoáxinrá nkehe xrahya éxi yóhe ijnko xjanhnté tí jahará naxá nchekaki mé tsjen kixin naxá xitjahya sine nkehe cha. Mé xikaha tí jahará naxá xitjahya sinterá nkehe cha ³ kixin naxá éxi chojni ó nchexiteyéhérá tí nkehe ntáchro asánrá kixin tí naxá siín kjuachjín oxínhin la ko siín kjuanínkaon la ko jnkokoáhya tjenkayáxinrá, la mé tjejoch'erá éxi ch'e kaín xín chojni chjasintajni. ⁴ Isorá ntáchrorá kixin chréhérá tí janhan Pablo, la ko í sorá ntáchrorá kixin chréhérá tí ch'ín Apolos. Na mé éxi chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehi ijnko chojni kjuich'ehe Dios xra, a ntá jahará kuinkachónkirá Ìnchéni kixin janhan kjuakohará. Jnkojnkoní kjuich'eni tí xra kjuanjón Ìnchéni. ⁶ Janhan kuènka, a ntá ch'ín Apolos intá kjuáka ch'án, a ntá Dios la mé kjuínchek'ánkí ch'án tí nkehe a. ⁷ Méxra tí nkexro k'uengxáxin la ko tí nkexro tjáka ntá la kánhyó tjeotan kixin Dios mé chóntha kaín kjuachaxin la jehe ch'án nchek'ánkí kaín nkehe siín. ⁸ A ntá tí sín t'enká la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuich'e sín. ⁹ Méxra jeheni mé jnkokoá ch'ehe ni Dios xra, a ntá jahará mé éxi tí nontee Dios, ntaha ch'e ch'án xra, la ko kjaxin jahará mé tí nchia tjech'ena ch'án. ¹⁰ Janhan mé tí maestro ch'ena nchia kixin Dios kjuanjón kjuachaxin tsjaké tí xro xrankixixín, a ntá í jnko nkexro sich'ena nchia chrítaón tí xro a. A ntá jnkojnko nkexro t'ichjánxin ntoá chrókjuich'ena sín nchia chrítaón tí xro a, ¹¹ kixin kohya ninkexró tsjacha tsjaké í jnko xro xrankixixín tí nchia a kixin táha la ó tsíkjin tsík'ona, kixin Jesucristo tíha. ¹² A ntá chrítaón tíha mé tsjacha sich'ena chojni nchia tsík'ona chica oro, la ko chica plata, la ko xro náxrjón tje, la ko inta tabla, la ko kanj, la ko ntaxro. ¹³ Na mé tsonoxín nkehe tí xra kjuich'e jnkojnko chojni tíosi tí yaon tsjixixín. Kixin tí yaon a mé tsi xrohi. A ntá tí xrohi mé tsjakoxín nkexéhe tí xra tsoche la ko nkexéhe tí xra tsochehya. ¹⁴ A ntá tí jnkojín chojni kjuich'ena ijnko nchia tsochehya la mé tsjacha ch'án tí xra kjuich'e ch'án. ¹⁵ A ntá tí chróche tí nchia kjuich'ena ijnko chojni, ntá chrók'uitjáyan kuénté. A ntá tí nkexro kjuich'ena nchia la tsaá éxi yóhe chrókuinkéhe ch'án xrohi.

¹⁶ ¿Á noahyará kixin jahará kaín rá na mé ijnko ninkoe Dios la ko Nchakuen Dios mé chóntha asánrá? ¹⁷ A ntá jnkojín nkexro tjinkaon ts'ókika tí ninkoe Dios na mé Dios mé sinchek'itjáyan tí nkexro xikaha sich'e kixin tí ninkoe Dios la tjóá tíha. A ntá tí jnko a mé jahará tíha.

¹⁸ Ninkexró chrókjuenkayáxin kixin imá nohe. Tí jnkojínrá tónhen asánrá kixin imá nohará éxi nohe chojni chjasintajni ó, na ntá chrókjanrá chrók'ónará éxi chojni noehya kixin ntá chrók'uitjárá chrók'ónará ijnko chojni chaxín nohe. ¹⁹ Tí nkehe nohe tí chojni chjasintajni la mé ijnko nkehe lontj t'íkon Dios. A ntá ntáchro tí xroon itén Dios tsíkjin sín ósé kixin: “Tí nkehe tsík'itjá sín ch'iyaxín sín la tíha mé tsokjan ts'enxín sín.”* ²⁰ La ko kjaxin ntáchro xroon itén Dios kixin: “Ìnchéni la ó nohe ch'án kixin kaín nkehe tjenkayáxin tí sín ntáchro sín kixin imá nohe sín la mé ijnko kjuaxrexinkaon lontj tíha, ichro Dios.”† ²¹ Méxra chrókjuínchehnkehyará jahará kixin chréhérá ijnko chojni imá nohe, kixin kaín xín nkehe siín la kuéntará jahará, ²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sitónhen jie, la ko tí nkehe tsonhen chr'éxin, la kaín la kuéntará tí jahará. ²³ A ntá jahará la Cristo mé t'ayakonhará. Kixin Cristo la jehe ch'án la mé kuénte Dios.

4

Tí xra kjuich'e tí sín kjueyá Ìnchéni

† 2:16 Isaías 40.13 * 3:19 Job 5.13 † 3:20 Salmo 94.11

¹ Jahará chrók'uíkonrá tí jeheni éxi chojni ch'ehó Cristo xra k'uáyéheni tí xra tjakoni tí nkehe kuénte Dios ninkexró k'uénoehya. ² A ntá ijnko chojni k'uáyéhe xra ts'etoan chrókjuakoxin kixin jína ch'án la ko jína ch'e ch'án xra. ³ A ntá janhan tóxakonnahya tí nkehe chróntáchorá jahará chrókjuanchiará jie tí janhan kixin tí xra t'ahá Dios, la ko kjaxin tóxakonnahya tí nkehe chróntácho ro i so chojni chjasintajni, chrókjuanchia sín jie tí janhan. Kjaxin janhan la tékahya jie asenná. ⁴ Kjánchó janhan tjenkayáxinhya kixin chonta jie. Kjánchó jehya xikaha tsontáxrjan kixin Dios t'íkon kixin chontahya jie janhan. Náhi. Jehe Inchéni mé tsotsjehe ch'án nkehe tí jie chonta janhan. ⁵ Méxra naxa kjuixrakáhya yaon chrókjuinchekitoxinrá ichrén jie. Chonhénrá tí tsi Inchéni kixin jehe ch'án mé sinchenoxin ch'án kaín tí nkehe síma tí sítié, la ko sinchenoxin ch'án kaín xín nkehe imó tjenkayáxixin asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kíchóni, nixjahará tí nkehe i kixin jína chrók'uejorá jahará ntá xikaha kjuintayóaxian éxi ch'in Apolos la ko éxi janhan kixin chrók'uitjará kixin chrókjuenkayáxinrá jehó tí nkehe tsíkjin sín ósé, kixin nijnko nkexro chrókjuinchehnkehya kixin chréhe sín ijnko chojni, a ntá tsochóntehya sín kjuasáyé tí i jnko chojni. ⁷ ¿Méxra nkexro ntácho kixin jahará antsí tjeoanrá? ¿Xá nkehe chontará naxa kjuanjonhya Dios kixin? Tí kjuanjon Dios kaín nkehe chontará, ¿ntá nkeuente nchehnkerá kixin jahórá tsíkjéyará tíha?

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxi ijnko rey, la i t'ichjánxianhyará ninkehó tí jeheni kixin naxa chrókjuinkitsani. Tí chrókóchaxin chrók'ónará ijnko rey chaxín ntá kjaxinni chróchóntani kjuachaxin chrók'ueñoanni. ⁹ Ntá tónhen asenná kixin jeheni chojni kjueyá Inchéni mé kjuanjon Dios kixin jeheni chrókjuixixin chrók'uejóni éxi chojni kuítónhenni kixin noxín chrók'ueenni ts'íkon kaín xín chojni chjasintajni la ko ts'íkon tí sín ángel kjaxin. ¹⁰ A ntá jeheni tinkáchónkini Cristo, a ntá xikaha t'íkon sín tí jeheni éxi chojni lontj. A ntá t'íkon sín tí jahará éxi imá nohará. Jeheni la éxi chóntahyani kjuachaxin, a ntá jahará la éxi imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. ¹¹ A ntá kjónté naxa jie jeheni t'énxinni kjínta, la ko t'énxinni ntá, la ko chóntahyani ikéni, la ko níkakóhenni chojni, la ko chóntahyani nkeri ts'ejóni. ¹² La ko tóxrjéni kixin itjani ch'exínni xra. A ntá tíó t'ántaxínhjni sín la tjancheheni Dios kixin sincheyaon ch'án tí jehe sín. La ko tíó chónkíhi sín tí jeheni la tónínkakuenhyani sín. ¹³ Tíó t'ántaxínhjni sín la jnkojína tjeheheni tí jehe sín. T'íkon sín tí jeheni éxi chjíninó ntihi chjasintajni, na mé éxi ijnko nkehe ninkehó sínkíhya la ko mé xikaha naxa sítónhen tí yaon jie.

¹⁴ Ikjian tíhi na jehya kixin chrókjuintasuàhará. Náhi. Tjínkavan chrókjuintaxráxinkáonrá kixin éxi xjanna t'íkuan tí jahará, tjuahará. ¹⁵ Kjónté chróchontará ite míl chojni chrókjuakohará nkexri tjen Cristo la chontahyará itjé it'ará. Ntá janhan mé k'óna it'ará tí jahará tíó kuitekáoanrá Cristo Jesús kixin kjuákohará tí tan jína tsaáxinni. ¹⁶ Mé xikaha xrjanóahará kixin chrókjuakoxinrá éxi tí janhan.

¹⁷ Méxra kuétuanhan tí ch'in Timoteo kixin tsjiji ch'án ntiha. Na mé éxi xjanna t'íkuan tí jehe ch'án, tjuahá ch'án, kixin kjuákohá ch'án ntá kuitekaon ch'án Inchéni ntá xráxin jína ch'e ch'án xra. Ntá tsjiji ch'án sintaxráxinkáonrá ch'án nkexri tjákoxian tí ntje Cristo éxi xráxin tjákua kaín xín njnko t'atsínka tí janhan. ¹⁸ Ntá iso tí jahará imá ihnkerá kixin tjenkayáxinrá kixin chaxínhya chrókjuasántsahará. ¹⁹ A ntá tjoka chrókjuasántsahará tí chaxin xikaha tjinkaon Inchéni. A ntá jehya jehó tí nkehe nixja tí sín xriko kjuahnke mé chrókuínhan. Náhi. Na mé ts'íkuan á chaxin chóna sín kjuachaxin kixin xikaha nixja sín. ²⁰ A ntá tí kjuachaxiэн Dios la jehya tí nkehe tsonixjani ó. Náhi. Tí tjákoxinni la tí kjuachaxiэн Dios. ²¹ ¿Nkehe tjínkáonrá tí jahará, kixin á chrókjuasán chrókjuintakjasótiará? o ¿á tjínkáonrá kixin jnkojína chrókjuasán?

5

Tsitoexin ijnko jie tjachéhe kichó chojni

¹ ¿Á chaxin tsík'íkon sín kixin tí tjejorá ntiha la ijnkorá mé chontará nájoanrá éxi ichjiánrá? Tíha mé ijnko jie jie, la mé kjónté tí sín chónhya Dios la xikahya ch'e sín. ² A ntá kjónté xikaha tsíkónhen la imá ihnkerá. Íchá jína imá chrók'uavará. A ntá tí xikaha ch'e ijnko chojni ntá chrókuétuénhénrá ch'án sáchrókjui ch'án, chrók'uejokoahyará ch'án ntiha. ³ A ntá ntáxrjan janhan kjónté tjenhya cuerpo kuéntana tí tjejorá ntiha la tí tjenkayáxian la ntaha tjén éxi chrókjuak'é janhan, ntá t'akjénxian ihnié Inchéni Jesucristo la ntáxrjan kixin ó kjuixin kjuenkayáxian kixin nkexri chrókjuasóte tí ch'in xikaha tsíkjich'e. ⁴ Tíó tsojnkotsérá kaín rá ntiha la éxi koyá tsjak'é ntiha la kjánchó nchakuenná ó la ko kóí tí kjuachaxiэн Inchéni Jesús ts'ejókoará ntiha. ⁵ A ntá tí ch'in la nchek'ayéhérá tí ch'in Tsochen kixin tsjasóte tí cuerpo kuénte ch'án. Ntá tíó tsokjan Inchéni mé tsaá asén ch'án.

⁶ Jahará chrókjuinchehnkehýará kixin tí nkehe tsíkónhen ntiha. ¿Á noahýará nkehe ntáchro sín, kixin tí ch'o a mé tjiko intsikóá tí xroan nchek'ánki niotja, ntá kjónté la tsósán kain tí ch'o? ⁷ Méxra chrókuakítsjerá ntója kain tí xroan ntaxin nchek'ánki niotja, kixin ntá jahará ts'ejorá éxi niotja tsík'óna ch'o nixin tsíkjikohya xroan nchek'ánki niotja. Éxi niotja ine sín tí yaon pascua, mé jahará tíha. Kixin jehe Cristo, éxi ijnko kolélo t'óyan sín tí yaon pascua, mé k'uenyákonhenni ch'án. ⁸ Á ntá chrókjuasinni tí kia a la kain asénni chrórxaxinkaonni, tíha la éxi tí niotja chóntahya xroan nchek'ánkixin. La jehya kixin chrókjuasinni tí kia naxa chróchóntani kjuanínkaon kixin táha la yóhe tí xroan ntaxin nchek'ánki tí niotja a.

⁹ Á ntá í jnko xroon chr'anhánra k'uéntáxrjan kixin ninkehó chrók'uítohyará tí sín tjasin jie chónta chojni chjin ókjé. ¹⁰ Ntá jehya kixin kuétuanhanrá kixin chrók'uítohyará tí sín chjasintajni tjasin jie chónta chojni chjin ókjé, la ko tí sín tjínkaon jehó sín tsochónta itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhí. Tí xikaha chrókjuich'erá la t'ichjánxin chrók'uaxrjéxinrá tí chjasintajni. ¹¹ Méxra ó kuétuanhanrá kixin chrók'uítohyará ninkehó jnkojin chojni ntáchro sín kixin kichó ni tí jehe sín, ntá naxa tjasin sín tí jie chónta sín chojni chjin ókjé, la ko tjínkaon sín jehó sín tsochónta sín itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xikaha ch'e la chrókjóntekoahýará sín. ¹² Jehya xrana chrókjuintakitoaxián tí ijie tí sín jehya kuente njnko ntiha. Á ntá tí xra kuéntará jahará kixin chrókjuinchehkitóexinrá tí ijie tí sín kichó ni tójnkoatsé njnko ntiha. ¹³ Á ntá Dios mé sinchekitóexin ch'án ijie tí sín jehya kuente njnko. Méxra, takítsjekjanxinrá tí ch'in jínahya kjuasin jie tí tjejorá ntiha.

6

Chrókjuikjanahya sín jie nkayakon tí ch'in juez tinkáchónkihya Inchéni

¹ Á ntá jnkojinrá chrókjuánjonkoará kichuára chrókjuikjanahýará jie nkayakon tí ch'in juez tinkáchónkihya Inchéni. Íchá jína chrókjuirá chróchenkará tí sín tinkáchónki Dios. ² ¿Á noahýará kixin tí sín tinkáchónki Inchéni mé sinchekitóexin sín ijie kain xín chojni chjasintajni? Á ntá xikaha sinchekitóexinrá ijie kain xín chojni chjasintajni, ¿ntá nkekuente tsjachahýará sinchekitóexinrá kjónté ijnko jie ntsi? ³ ¿Á noahýará jahará kixin kjónté tí sín ángel tsotsjeheni nkehe tí xra kjuich'e sín? Á ntá ijnko nkehe intsí ntihyó, la ¿á xitjahya chrókjuasiyóxinrá? ⁴ Á ntá xikaha chrókjuánjonkoará kichuára, ¿ntá nkekuente tjikjanchará jie nkayakon tí sín tikiníxinhya kuente njnko? ⁵ Ntáxrjan xikaha kixin chrókjuintasuaahará. ¿Xá kohya ninkexró kichó ni ntiha chónta kjuaxrexinkaon jína tsjacha sincheyóxinhin ijie kichó ni? ⁶ Jahará jnkokoá kichuára ntá tjanjonrá, la ko kjaxin sátjijkjanchará jie nkayakon tí ch'in juez tinkáchónkihya Inchéni.

⁷ Kjónté ijnko jie ntsi ntá imá tjanjonkoáxinrá kichuára; tíha mé t'óna ijnko jie jie. Íchá jína chrókónínkáonhyará kixin tí nkehe jínahya kjuít'ahará sín. Íchá jína chrókuítóherá sín kjónté tsaahará sín. ⁸ Kjánchó kjaxin jahará ntoáhya tjejoch'erá kixin kjónté jnkokoá kichuára la teheerá sín.

⁹ ¿Á noahýará kixin tí sín jínahya ch'e la ts'áyehya sín kjuachaxin kuente Dios? Chrókuítóehýará chrókjuít'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ó chjin, t'ó ntoa, la ko tí sín jnkokón ntoa sín tóxrjínhin kichó sín, ¹⁰ la ko tí xichee, la ko tí sín tjínkaon sín jehó sín tsochónta sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyehya sín kjuachaxin kuente Dios. ¹¹ Xikaha k'uéjorá isorá senó. Ntá jie ó k'uújmára, kjuínchetjóará Dios, ntá ó xika ijjará kjuachaxin ihnié Inchéni Jesucristo la ko kjuachaxin kuente Nchakuen Dios.

Tí cuerpo ó tsikótjóa

¹² Siín kjuachaxin kain nkehe chrókjuít'a, kjánchó iso nkehe la ó chónkó. Siín kjuachaxin kain nkehe chrókjuít'a, kjánchó chrókuítóahya ninkehó nkehe chrók'ueguanna. ¹³ Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjájyan yóí tíha. Á ntá k'ónahya tí cuerpo kuénteni kixin chrókjuasiixinni jie. Náhí. Tí cuerpo kuénteni mé k'óna kixin tsochjéxinni Inchéni kjuasáya, la ko jehe Inchéni mé ts'ayakonhen ch'án tí cuerpo kuénteni. ¹⁴ Méxra Dios mé kjuínchexechón Inchéni, mé xikaha sinchexechónxinni ch'án tí kjuachaxin kuente ch'án.

¹⁵ ¿Á noahýará kixin jnkojnko cuerpo kuéntará mé it'ó tí cuerpo kuente Cristo? ¿Á chrókjuít'a janhan kixin it'ó tí cuerpo kuente Cristo chrók'óna it'ó cuerpo kuente ijnko chojni chjin ch'ieyehe nchónhya chojni ntoa? Méxra kjá náhi. ¹⁶ ¿Á noahýará kixin tió ijnko chojni ntoa chrókuakja ijnko chojni chjin chónta nchónhya chojni ntoa, ntá tí jehe sín yóí sín

chrók'óna sín jnkokoá cuerpo? Kíxin ntáchro xroon itén Dios kíxin: “Yóí sín la ts'óna sín jnkokoá chojni.”* ¹⁷ A ntá tí jnkojín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

¹⁸ Méxra chrókuitohérá chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín. ¹⁹ ¿Á noahyará kíxin jnkojnko cuerpo kuéntará mé éxi ijnko njnko itjen Nchakuen Dios kjanjon ch'án k'uayéhérá, la ko chontará tí Nchakuen ch'án tjóá? Jahará la jehya inché tí cuerpo kuéntará ²⁰ kíxin jahará la tjete k'uenaxínrá Dios. Méxra chjééxinrá kjuasáyé Dios tí cuerpo kuéntará la ko tí nchakónrá kíxin yóí la kuènte Dios.

7

Chenka ch'án tí sín tsíkótehe kíxin nkexrí chrók'uejó sín

¹ A ntá jie tsjatahá tí nkehe tsíjxinrá kjuanchankínará, na mé ntáxrjan kíxin chaxín chrókójina kíxin tí chojni ntoa chrókualjahya ichjién. ² Kjánchó tí xikaha imá tjinkaon sín tsochóna sín itsjé chojni chjin tsjasinko sín jie, la íchá jina jnkojnko chojni ntoa chróchóna jnkojnko ichjién kuènte la ko jnkojnko chojni chjin chróchóna jnkojnko xii kuènte. ³ Tí chojni ntoa la ko tí chojni chjin chrókjuinchexiteyéhe sín kíchó sín. ⁴ Tí chojni chjin jehya inché tí cuerpo kuènte tjan, na mé kuènte xii tjan. Ntá kjaxin xikaha tí chojni ntoa la jehya inché tí cuerpo kuènte ch'án, na mé kuènte ichjién ch'án. ⁵ Chrókjuincheniéhýará kíchuará, jehí jnkokoá chrókjuenkayáxinrá yóírá kíxin tsochonteherá iso yaon kíxin ntá kaín asánrá chrónixjehérá Dios. Ntá tsjixin ntá chrókóchjineherá kíchuará inaá kíxin chrókuitóehýará kíxin ch'in Tsochren chrókjuacha chrókjuachroerá ch'án chrókjuásinrá jie.

⁶ Kaín tíhi tjonkará kíxin tsonohará kíxin sín kjuachaxin xikaha na kjánchó jehya kíxin xikaha tétuanhanrá. ⁷ A ntá janhan ntáxrjan kíxin chrókójina kíxin kaín rá chojni ntoará chrókóyóhará éxi tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naxá tóteghya la ko tí chojni tsíkók'án na ntátjan sín kíxin chrókójina kíxin xikahó chrók'uejó sín chrókóteghya sín éxi tí janhan xikaha. ⁹ Kjánchó tí chrókjuachaha sín tí tjak'e asén kíchó sín, naxá chrókjuasin sín jie, ntá íchá jina chrókótehe sín kíxin jehya jina kíxin jnkochríxín chrókjuak'ó asén sín.

¹⁰ A ntá jahará ó tsíjxin tsíkótahará, la tétuanhanrá tíhi: a ntá jehya kíxin kjuachaxin kuéntana tétuanxínrá. Náhi. Kjuachaxin kuènte Ìnchéni mé tétuanxínrá kíxin tí chojni chjin chrókjuákehya xii. ¹¹ A ntá tí chrókjuákehé ijnko chojni chjin tí xii, ntá xikahó chrókuitóhe tjan jehó tjan la ko chrókójina chrókóyóxin, chrókjuinhin tí kjuanínkaon kíxin tí kjuákehé kíchó sín. Kjaxin xikaha tí chojni ntoa la chrókjuákehya tí ichjién.

¹² A ntá tí nkehe tétuanhan tí í so sín jaí la kuéntana janhván, jehya kuènte Ìnchéni, kíxin tí tjan ijnko ch'in kíchó ní chóna ch'án ichjién ch'án tinkáchónkihya Ìnchéni, na kjónté naxá tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan. ¹³ La ko tí tjan ijnko tjan kíchó ní chóna xii tjan tinkáchónkihya Ìnchéni, ntá kjónté naxá tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án. ¹⁴ Kíxin tí xii tjan tinkáchónkihya Ìnchéni ntá jie ó kótjóá ch'án kíxin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kíxin tí xii tjan mé tinkáchónki Dios. A ntá tí xikaha, la tí xjeen sín chrókótuághya, na ntá jie la mé ó kótjóá tí xjeen sín. ¹⁵ A ntá tí ch'in ntoa o tí tjachjin tinkáchónkihya Ìnchéni tjinkaon chrókjuákehé kíchó sín, la ája nohe sín tjákehé kíchó sín, kíxin Dios tjinkaon kíxin kjuaxróxin chrók'uejorá. ¹⁶ Jahará chojni chjinrá, ¿nkexrí chrókónohará kíxin nkexrí chrókuaá xiará? La ko jahará chojni ntoará, ¿nkexrí chrókónohará kíxin nkexrí chrókuaá ichjiámrá?

¹⁷ A ntá jnkojnko chojni chrók'uejó sín éxi tsíjxin Ìnchéni kjuachaxin tsík'áyéhe sín, la ko éxi tí k'uejó sín tió k'uíyéhe sín Dios, kjánchó chrókuitóehya sín tí jehe ch'án. Mé xikaha tétuanhan kaín tí njnko. ¹⁸ Tí chrók'uíyéhe Dios ijnko ch'in chóna xroye, ntá xikahó chrókuitóhe ch'án. A ntá tí chrók'uíyéhe Dios ijnko ch'in chónahya tí xroye a, ntá kjónté chrókuaahya ch'án tí xroye a. ¹⁹ Na mé tjetuanhaya á chóna chojni tí xroye o á chónahya chojni tí xroye. Na mé tí nkehe tjetuan kíxin chrókjuinchexiteyéheni tí nkehe k'uetóan Dios. ²⁰ Chrók'uejóni jnkojnkonni éxi k'uejóni tí k'uíyéheni Dios. ²¹ A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhaya kjónté xikahó tjech'e xra. Kjánchó tí chrók'uitjá tí tsaáxian la chrókuaákjá tíha. ²² Kíxin tí nkexro kjuich'exón xra tió k'uíyéhe Ìnchéni kíxin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uituenhaya tió k'uíyéhe Ìnchéni la mé jie mé ch'ehe ch'án xra Cristo. ²³ Dios imá tjete

* 6:16 Génesis 2:24

k'ueñaxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna inchárá. ²⁴ Méxra kichó ní, éxí k'uejorá tíó k'uíyáhará Dios kixin tsinkachónkirá ch'án, la xikahó ñaxa chrók'uejorá jie kixin chontará Ìnchéni tsjínkítsa.

²⁵ A ntá tí chojni ñaxa tóteehya sin na mé janhan chontahya nkehe kuènte Ìnchéni chrókuétuanhan sín. Kjánchó tsoxrjanka tí nkehe tjenkayáxian janhvàn, a ntá chrókuítekáonrá tí janhan kixin kujkonóana Ìnchéni. ²⁶ Mé xikaha tónna kixin chrókójína kixin jnkojnko chojni chrókuitohe sín éxí tjejó sín chrókóteehya sín, kixin ijie la kjuaxróxinhya tjejóni. ²⁷ A ntá tí chontará ichjiánrá ntá chrókjuakeéhyará tjan. A ntá tí chontahyará ichjiánrá ntá ichá jína chrókjuéyáhyará. ²⁸ Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsíkótehe la tsochónta sín kjuaxikaon, mé xikaha janhan chrókjuínkítsa sín kixin chróchóntahya sín kjuaxikaon.

²⁹ Mé xikaha tjetjonkará kichó ní kixin tsjéhya yaon ñaxa t'itjáyán tsokjan Ìnchéni. Mé xikaha tí chojni ntoa chóna ichjién sín, la antsí tjeotan saxóin chrórxaxinkaon sín Ìnchéni, la ntá chr'éxin chrótuèhe sín ichjién sín. ³⁰ A ntá tí sín tsjánka la chrók'uejó sín éxí chrótsjánkahya sín. La ko tí sín chéhe la chrók'uejó sín éxí chéhya sín. La ko tí sín t'ena nkehe la chrók'uejó sín éxí chóntahya sín tí nkehe tsík'ena sín. ³¹ La ko tí sín kjuacha nkehe síin chjasintajni la chrók'uejó sín éxí ninkehó chróchóntahya sín, kixin kaín nkehe t'ikonní chjasintajni ntihi mé tjoka tsjeje.

³² Tjínkakhonhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuènte Ìnchéni chrókjuinchexiteyéhe ch'án tí nkehe tóxrjnhin Ìnchéni. ³³ A ntá tí ch'ín tsíkótehe antsí tóxakonhen tí nkehe síin chjasintajni kixin xikaha mé sinchechéhe ch'án ichjién ch'án. ³⁴ Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuènte Ìnchéni kixin tjinkaon tjan kixin Dios sinchetjóá tí cuerpo kuènte tjan la ko tí asén tjan. A ntá tí tjan tsíkótehe mé tóxakonhen tjan tí nkehe síin chjasintajni kixin xikaha sinchechéhe tjan xii tjan.

³⁵ Tjetjonkará tíhi kixin tjínkavan kixin jína chrók'uejorá, jehya kixin xikaha chrókuétuanhanrá. Náhi. Tjínkavan kixin kjuasáya chrók'uejorá jnkojína la jehó Ìnchéni chrókjuich'ehera xra.

³⁶ A ntá jnkojínrá tjenkayáxinrá kixin chrókójína chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsótehe tjan na mé jehya jie. ³⁷ A ntá jnkojínrá tjínkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jína tíha. ³⁸ Mé xikaha tí tjetohérá xjaanrá chjin kixin tsótehe tjan la ó nchoxon. La ko kjaxin tí tjínkakhonhya tjan kixin chrókótehe tjan na mé antsí jína tíha.

³⁹ Tí tjan tsíkótehe mé k'uítuenxín tjan kjuachaxin tí ley kixin tsjak'eko tjan tí xii tí ñaxa tjechón ch'án. A ntá tí chrók'uen ch'án ntá tsochónta tjan kjuachaxin tsótehe tjan inaá tí nkexro tsoxrjnhin tjan, kjánchó jehó ijnko nkexro tinkáchónki Ìnchéni mé chrókótehe tjan.

⁴⁰ Kjánchó antsí chrókóchéhe tjan tí jehó tjan chrókuitohe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuènte Nchakuen Dios.

8

Tí nkehe ine sín tjokehe sín tí nkehe tsíkjanoya

¹ A ntá jie tsoxrjanka kuènte ti ko its'en tjokehe sín tí nkehe tsíkjanoya. Na mé chaxín kaín ní noheni tíha. Nta chrókóxakonhenni kixin tí chrók'uitjani má ntá chrókóhneni má. Antsí tjeotan chrótuèheni kichó ní kixin xikaha antsí chrókuinkáchónkini Ìnchéni. ² Tí jnkojín nkexro ntáchro kixin nohe ch'án, na mé chaxínhya tíha la ñaxa t'itjáyán tí nkehe chrókónohe ch'án. ³ A ntá jnkojín nkexro tsotjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehe sín tí nkehe tsíkjanoya, la ó noheni jína kixin tí nkehe tsíkjanoya la t'etuanhya ninkehó ntihi chjasintajni, la ko ó noheni kixin jnkokoá Dios tjan.

⁵ A ntá síin nkehe nchek'in sín díos nkaya nkajni la ko chjasintajni na, kjánchó tí xikaha la kjá chrók'uixin itsjé díos la ko itsjé inché sín. ⁶ A ntá jeheni chóntani jnkokoá Dios na mé It'eni tíha, la jehe ch'án mé kjuich'ena ch'án kaín xín nkehe la ko tjejóni kixin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe síin la kjuich'ena ch'án la ko kjaxin tí jeheni tsík'ich'ena ch'án.

⁷ Kjánchó kénhya chojni nohe sín tíhi. Na mé iso sín ó kuènnen sín kuinkáchónki sín tí nkehe tsíkjanoya, a ntá jie tíó ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko díos, kixin ñaxa noehya sín má, ntá ntáchro sín kixin ó kuamá sín tí jie kuènte tí nkehe tsíkjanoya. ⁸ Ó noheni chaxín kixin jehya kixin chrókóxrjnhin Dios tí jeheni kixin tí nkehe jína chrókjóneni. Náhi. Jehya kixin chrók'uejójinni jína kixin

tí nkehe chrókjóneni na ko tí nkehe chrókjónenyani. ⁹ Méxra títóéhyará kixin tí kjuachaxin chontará sinterá kaín xín nkehe mé xíkaha chrókjuachroe ijnko chojni kichó ni naḡa noehya jína tinkáchónki Ìnchéni ntá tíha chrókjuasixín sín jié. ¹⁰ A ntá tí chrók'uikon sín kixin jahará ó nohará jína ntá ts'ejorá sinterá nkehe nkaxenhen ijnko nínkoe nkehe tsíkjanoya, ntá tí chojni kichó ni naḡa noehya jína ntá chrók'uikon sín xíkaha ntá kjaxin jehe sín tsojtínkaon sín sine sín tí nkehe tsíkókeḡe chojni ijnko dios chaxínha. ¹¹ A ntá jahará ó nohará jína ntá xíkaha tjejoch'erá itsará sínchek'itjáyanrá tí kichó ni naḡa noehya jína tinkáchónki Ìnchéni kixin Cristo k'uenyákonḡen tí jehe ch'án kjaxin. ¹² Méxra tí xíkaha chrókjuich'erá la chrókjuásinhínra jié tí sín kichó ni naḡa tinkáchónkihya sín Ìnchéni jína, na mé xíkaha kjaxin chrókjuásinrá jié chrókuitekákuenhyará Cristo. ¹³ Méxra tí xíkaha chrókjuasixín jié ijnko kichó ni kixin tí nkehe chrókjóneni, ntá íchá jína chrókjónenyani nto inaá kixin xíkaha ntá chrókjuichroexín tí sín kichó ni ntá chrókjuasixín sín jié.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjeýá Ìnchéni kixin janhan k'uíkuan ch'án. Jahará mé tjákoḡínrá tí xra kjuít'a kuénte Ìnchéni. ² Iso sín ntáchro sín kixin tjátsoanhyana sín kixin ijnko apóstol tsíkjeýá Ìnchéni. Ntá jahará kaín rá mé chrókjuátsoanrá tí janhan kixin tí kuitekáonrá kuinkachónkirá Ìnchéni mé xíkaha tjákoḡínrá kixin chaxín janhan tsíkjeýána ch'án.

³ Méxra janhan jína chrókjuátaha tí sín xritjontana, chróntáxrjan kixin: ⁴ Janhan chonta kaín kjuachaxin chrók'uayáḡa nkehe chrókjoné la ko chrók'ua. ⁵ Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxí chóna tí í so sín tsíkjeýá Ìnchéni, la ko tí sín kichó Ìnchéni, la ko éxí chóna ch'ín Pedro. ⁶ ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítóheni tí xra sich'exínni tjani? ⁷ ¿Nkexro ch'e xra soldado ntá ch'chakḡoen ch'án ó chrókuicháxinhin? Nkexro k'uenka nta to uva ntá kjonéhya ch'án ó? ¿La ko nkexro t'ayakonhen kolélo ntá k'uíhya tí tsjen t'énhen sín va? ⁸ Ntáchrohyará kixin janhvàn kjuenkayáxian tíha kixin kjaxin xroon tsíkjin ch'ín Moisés xíkaha níxja. ⁹ Méxra kjaxin ntáchro tí xroon tsíkjin ch'ín Moisés ósé kixin: “Chrókjuéjójáhyará kamposa ir'iva koxinta tí tsinkátja va noatrigo tió tsónkéhe sín noa.”* Tíha mé t'axrjéxín kixin jehya koxinta ó tóxakonhen Dios. ¹⁰ Náhí. Tóxakonhen ch'án kixin tí jeheni. Méxra xíkaha níxja tí xroon kixin chrók'uejójinní jína. A ntá tí nkexro kjuíncentá nche la ko tí nkexro tsónkéhe noa, yóí sín la chróchónhen sín chrók'uáyéḡe sín tí nkehe k'óna. ¹¹ A ntá tí k'uenkaní tí itén Dios asánra, la kjá chróchóntani kjuachaxin chrókjuanchaharáni ichrén nkehe t'ichjánxinhinni. ¹² A ntá tí xíkaha í so sín chóna sín tí kjuachaxin tjanchia sín nkehe ts'áyéḡe sín, ntá jeheni antsí má chóntani kjuachaxin chrók'uáyéḡeni nkehe.

Kjonté chóntani kjuachaxin xíkaha la kjuanchahyani nkehe, kjonté kánhyó náxrjón k'uéjóni kixin tjínkaonkhaní chrókjuanchiani nkehe chrók'uichjánxinhinni kixin ách'e xíkaha ntá chrók'uinkákonḡen tí itén Cristo chrókjuakoni. ¹³ Náhí. Tóxakonhen ch'án kixin tí sín ch'e xra kúente nínko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntḡe tí ko t'óyánxin sín ntiha. ¹⁴ Méxra xíkaha kjaxin k'uetḡoan Ìnchéni kixin tí sín ch'e tí xra ó chrónka sín tí tan tsaáxinni na mé tí xra á chrók'uaxrjeníxin tí nkehe chrókjóné sín. ¹⁵ Kjonté janhan siín kjuachaxin xíkaha chrókjuít'a, la xíkaha kjuít'a la ko kjaxin xíkaha ikjian tí xroon í kixin jahará chróchjinará ichrén nkehe. Náhí. Kjonté chrók'uénxian kjinta chrókjuáncháhyará nkehe kixin tjínkaonhya kixin ninkexró chrókuakitsjena tí kjuachéḡe chonta.

¹⁶ Jehya kixin chrojuíntahnke chrókjuákua tí tan tsaáxinni. Náhí. Janhan na ó jehí sít'a tí xra á. Nóa tí janhan tí chrókjuákohya tí tan jína chrókjuááxin chojni. ¹⁷ A ntá tí janhvàn tjínkavan chrókjuákua la xíkaho chrókjuacha janhan. A ntá tí tjákua itén Dios kixin xíkaha kuítuanna ntá xíkaho ntaxiteýá tí xra chjina Dios. ¹⁸ ¿A ntá nkehe chrókjuacha janhan? Tíha mé chrókjuacha janhan kixin chrókchóna má kixin chrókjuákua tí itan tsaáxinni la ninkehó chrókjuáncháhya chrókjuacha la ntá tí xíkaha la chrókuákjáhya tí kjuachaxin tí chrókjuákua.

¹⁹ Méxra kohya nkexro t'etuanna. Kjánchó ó jehí chrókjuít'aha kaín xín chojni xra kixin xíkaha antsí tsjé chojni chrókjuacha janhan kixin chrókuitekaon sín Cristo. ²⁰ Tí tjén tí siín tí sín judío ntayóḡa éxí jehe sín xíkaha janhan kixin xíkaha chrókjuacha jnkojín sín chrókuitekaon sín. Na mé t'axrjéxín kixin tí chrókjuacha iso tí sín nchexiteýéḡe tí ley k'uetḡoan ch'ín Moisés, la t'ichjánxin kixin kjaxin janhan chrókjuíntaxiteýá tí ley kjonté janhan la xíkaha t'etuanna tí ley. ²¹ A ntá tí chrókjuacha jnkojín tí sín nchexiteýéḡa tí nkehe k'uetḡoan ch'ín Moisés la

* 9:9 Deuteronomio 25.4

ntayóhã éxi tí jehe sín xíkaha janhan kjaxin, kjónté chaxín t'etuanna tí nkehe k'uetqan Dios méxra ntaxiteyá tí nkehe k'uetqan Cristo. ²² Tió tñen tí sín tí sín tienxínhya jína, ntá kjaxin janhan t'óna éxi tí jehe sín kixin xíkaha chrókjuacha jnkójín tí jehe sín chrókuitekaon sín. Méxra ntayóhã éxi kaín xín chojni xíkaha janhan kixin xíkaha chrókjuacha janhan kixin chrókuáá iso tí jehe sín. ²³ Mé xíkaha kaín tíha tjet'a kixin chrókuinhin sín tí tan chrókuááxin sín la ko kjaxinna qantsí má chrókjuaintayaonna Dios.

²⁴ Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsitonhen nkehe. A ntá jahará xíkaha chrókuinkará kixin chrók'uayéhérá tí nkehe chrókjuonhanrá. ²⁵ Tí sín tinkáko kichó sín na mé jína t'ayakonhen sín asén sín, títehe sín kaín xín nkehe chrókjuich'ehe sín dañó kixin tjinkaon sín chrókjuacha sín, chrók'uayéhe sín kjónté ijnko corona tsík'óna kayoa ó tjoka tsoxamá. Kjánchó jeheni ch'eni xra kuente Inchéni kixin ntá ts'áyeheni ijnko nkehe chónhya tsoxamá. ²⁶ A ntá janhan jehya éxi ijnko chojni t'ikonhya chrókuinka. Jehya éxi xrintó ó chrókjuánjonkian. ²⁷ Náhi. Janhan tjanjonkian tí cuerpo kuéntana, tétuanhan kixin jína chrókjuinchexiteyána kixin tóxakonna kixin chrókjuásian ichrén jie ntá janhan chrókjuachahya kjónté senó kjuáqohã itsjé chojni.

10

Tí nkehe t'etqan ch'án kuente tí nkehe tsíkjanoya

¹ Tjinkavan janhan kixin chrókónohará kichó ní kixin tí sín k'uaxrjenixinni ósé, kaín sín k'uixinkánki sín chrínki tí tjuí, la ko kaín sín k'uatóye sín Ntayaon Kjátse, ² la ko kaín sín k'uechréhe sín ch'ín Moisés éxi yóhe chrókuikite sín kixin jnkokoqá k'uejó sín tí tñen tí tjuí la ko tí ntayaon la ko kjuinchexiteyéhé sín ch'án kixin jehe ch'án k'uek'etqan ch'án. ³ La ko kaín sín kjóne sín jnkokón nkehe kuixin nkaya nkajni ⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexin ijnko tjo kjuincheyaoon Dios, na mé tí tjo a la mé t'axrjexin kixin Cristo tíha. ⁵ Kjánchó itsjé tí jehe sín kjuinchexehya sín Dios, méxra kónínkaon ch'án la tí nteje ó k'uénxin sín a.

⁶ Kaínxín tíha kónhen kixin chrórxaxinkakonxinni jeheni, chróntáchrohya asénni chrókjuich'eni tí nkehe jínahya éxi kjuich'e tí jehe sín. ⁷ Méxra chrókuinkachónkihyará jahará nkehe tsíkjanoya éxi k'uekinkáchónki iso tí jehe sín, éxi ntáchro tí xroon itén Dios tsíkjin sín ósé kixin: "Kaín sín k'uejótjxin sín kjóne sín la ko ik'ui sín, ntá kjuixin la k'uínkatjen sín la ité sín".* ⁸ Méxra chrókjuasinkohyani jie chojni chjin ókjé éxi kjuich'e iso jehe sín ntá ik'uen sín, ventitres mil sín, jnkokoqá yaon.† ⁹ Kjaxin chrókjuinchekóninkakonhyani Inchéni éxi kjuich'e sín ntá ik'uen sín kixin kjónehe sín konche,‡ ¹⁰ la ko chrók'uantaxínhyani Dios éxi k'uantaxínhin tí jehe sín ntá tí ángel kuente kjuach'én mé kui k'óyán sín.§

¹¹ Kaín tíha kónhen tí sín k'uaxrjenixinni ósé kixin chrókónoexinni la ko k'óna xroon chrónka xíkaha kixin nchexaxinkaonni tí jeheni tjejóni jie kixin í séhya tsjixixín tsjeje chjasintajni. ¹² A ntá tí nkexro ntáchro kixin ntoá tñen na chrókóxakonhen kixin chrókjuichroehya. ¹³ Jahará naxã k'uatsínkahyará ninkehó nkehe tí chrókjuachahya chojni chrókónhen. Méxra jahará chrórxáxinkáonrá Dios kixin jehe ch'án chrókuitqehya ch'án tí jahará kixin chrók'uatínkará nkehe imá xra chrókjuachahyará. Méxra tí itsi ichrén nkehe tsonhanrá la Dios tsjinkitsará ch'án kixin chrókjuachará chrók'uatínkará tí nkehe chrókónhanrá.

¹⁴ Méxra tjuahará jahará kichó ní, la ntá ntáxrjan kixin chrókuitqohérá tí nkehe tsíkjanoya. ¹⁵ Nixjahará jahará kixin jahará chojni ó tienxín. Méxra jahórá chrokjuenkayáxinrá kixin á jína tí nkehe ntáxrjan. ¹⁶ Tí tjanchiani kjuasáya kixin tí nkehe it'ini na mé kaín ni jnkokoqá tjáqoxinni tí ijnjé Cristo ó k'úitji. La ko tió tóchrít'oni tí niqta ineni, na mé kaín ni jnkokoqá tjáqoxinni tí cuerpo kuente Cristo. ¹⁷ Kjónté nchónhyani jeheni la kaín ni na jnkokoqá niqotja ineni kixin kaín ni jnkokoqá k'ónani cuerpo kuente Cristo.

¹⁸ Chrókónohará nkexri ch'e tí sín chjasin Israel, na mé ine sín tí ko tsíkjoqehé sín Dios ntá xíkaha tjáqoxin sín kixin xíkaha tinkáchónki sín. ¹⁹ Ntáxrjanhya kixin tí nkehe tsíkjanoya la chónka kjuachaxin, la ko ntáxrjanhya kixin tí nto tsíkjoqehé sín tí nkehe tsíkjanoya la qantsí chónka kjuachaxin. ²⁰ Náhi. Ntáxrjan kixin tí nkehe tjanjon tí sín chónhya Dios na mé tjóqehé sín tí nchakuen tí jínahya la jehya Dios tjóqehé sín tíha. Méxra janhan tjínkakonhya kixin xíkaha chrókjuich'erá jahará chrórxáxinkáonrá tí nchakuen tí jínahya. ²¹ Tí its'ini tí nkehe xraxinkakonxinni ijnjé Inchéni ntá kjaxin tí chrók'ui ní nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrók'ui ní. Tí sineni tí nkehe xraxinkakonxinni tí cuerpo kuente Inchéni ntá kjaxin tí chrók'jóneni tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrók'jóneni tí nkehe. ²² ¿A jína

* 10:7 Éxodo 32.6 † 10:8 Números 25.6–9 ‡ 10:9 Números 21.5–6 § 10:10 Números 16.41–49

chrókuincheqóninkaonni Ìnchéni ní? ¿Á jeheni aqtsí chóntani kjuachaxin la ntá jehe ch'án la náhi ní?

Chóntani kaín kjuachaxin kaín xín nkehe na kjónté aqtsí tjeotan tsotjuèhèni kíchó ní

²³ Síin kjuachaxin ichrén nkehe chrókuich'eni. Kjánchó jehya kixin kaín nkehe la jína. Síin kjuachaxin ichrén nkehe chrókuich'eni na kjánchó kénhya nkehe chrókuinkítsa chrókónoheni tí nkehe kuènte Dios. ²⁴ Chrókuéyáhyará tí nkehe chrók'uejóxinrá jína jahorá. Náhi. Kjaxin chrókuéyará tí nkehe chrók'uejóxin jína í so chojni.

²⁵ Chrókjónterá kaín nto sítóxin la chrókjuanchankíhyará ninkehó kixin tí xíkaha ntá ntoáhya chrókjuenkayáxinrá, ²⁶ kixin kuènte chjasintajni la kaín xín nkehe síin la kuènte Ìnchéni.

²⁷ A ntá jnkójín chojni tinkáchónkihya Ìnchéni chrók'uíyahará sín kixin chrókjóntekoará sín la ko tjínkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóaxuanhyará chrókjuanchankíhyará ninkehó. ²⁸ Kjánchó tí chróntácho jnkójín sín kixin tí nto la ó tsíkjokehé sín ijnko nkehe tsíkjanoya, ichro sín, ntá tí xíkaha la chrókjóntehyará jahará, chrókóaxakonhanrá kixin ntoáhya chrókjuenkayáxin tí nkexro chrónka xíkaha. ²⁹ Méxra ntáxrjan tíhi kixin tjínkakonhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankínará kixin nkekuènte chrókóaxakonhanrá nkehe chrókjuenkayáxin ókjé chojni kixin tí kjuachaxin chontará. ³⁰ Tí tjáncháha Dios kjuasáya kixin tí nkehe inè, ¿ntá nkekuènte kixin chrókjontana chojni kixin kuènte kjoné? ³¹ Tí chrókjónterá nkehe la ko chrók'uirá nkehe la ko ichrén xra chrókuich'erá la chrókjuáqoxinrá kixin Dios kjuinkítsará. ³² Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o tí chojni njnkoé Dios. ³³ Janhan mé tjéyá kixin kaín xín xra tjét'a chrókóxrjinhin kaín xín chojni, na mé jehya kixin tjéyá kixin janhvàn chrókjuak'é jína. Náhi. Kjaxin tjínkavan kixin chrókuaáxin í so chojni.

11

¹ Chrókjuáqoxinrá jahará éxi kjuáqoxian janhan kixin janhan mé kjuáqoxian éxi kjuáqoxin Cristo.

Jína chrók'uejó tí chojni chjin tió tójnkoésé chojni

² Kíchóni, chàna kixin xráxin xráxincháonrá tí janhan la ko nchexiteyéherá tí nkehe kjuakohará. ³ A ntá tjínkavan kixin chrókiénxinrá kixin Cristo t'etuenhen jnkójnko chojni ntoa, la ko kjaxin xíkaha jnkójnko chojni ntoa mé t'etuenhen tí ichjién, la ko kjaxin xíkaha Dios mé t'etuenhen Cristo. ⁴ A ntá tí jnkójín chojni ntoa xrasixin kachjinke ch'án tí tjenixjehé ch'án Dios, o xrasixin ch'án kachjinke ch'án tí tjechronka ch'án iten Dios, mé xíkaha tjáqoxin ch'án kixin chóntehya ch'án kjuasáyé tí Ìnchéni t'etuenhen ch'án. ⁵ A ntá ijnko chojni chjin tjóchin kja tjan tí tjenixjehé tjan Dios la o tjóchin kja tjan tí tjechronka tjan iten Dios, mé xíkaha tjáqoxin tjan kixin chóntehya tjan kjuasáyé tí xii tjan. Mé tóyóhé éxi tsíkjin tjan xíkaha. ⁶ A ntá tí chojni chjin tjínkakonhya kixin chrók'uíáxin kja tjan nkehe mé chrókjin tjan. Kjánchó tí chrókósuèhé tjan chrókjin tjan, ntá chrók'uíáxin kja tjan tóte tió tójnkoésé. ⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxi retratóé Dios la ko t'inkaséyanxin ch'án tí kjuachaxin kuènte Dios. A ntá tí chojni chjin mé t'inkaséyanxin tjan tí kjuachaxin kuènte tí xii tjan. ⁸ Kixin tí chojni ntoa sqoxin k'óna mé k'uaxrjenixinhya ch'án chojni chjin. Náhi. Tí chojni chjin mé k'uaxrjenixin tí chojni ntoa. ⁹ Chaxin k'ónahya tí chojni ntoa kixin jehó tsjak'e ch'án. Náhi. Tí chojni chjin mé k'óna kixin tsjak'ekotoxin ch'án. ¹⁰ Ntá t'ichjánxin kixin tí chojni chjin ts'íáxin kja sín tóte chrókjuáqoxin sín kixin t'ituenhen sín kixin xíkaha ts'ikon tí sín ángel. ¹¹ Kjánchó kaín ní tinkáchónkini Cristo t'ichjánxin kixin tí chojni ntoa chrókjuinkítsa tí chojni chjin la ko tí chojni chjin chrókjuinkítsa tí chojni ntoa. ¹² Kixin chaxin tí chojni chjin na tí chojni ntoa k'uaxrjenixin. A ntá jie tí chojni chjin na mé t'axrjenixin tí chojni ntoa. A ntá kaín ní k'uaxrjenixinni Dios.

¹³ Jahará nkechrorá, ¿á ó nchoxon kixin ijnko chojni chjin tjóchin kja tjan chrónixjehé tjan Dios? ¹⁴ Jahorá chrókónohará kixin chrókósuèhé tí chojni ntoa chóna kaxihi kjinjin. ¹⁵ A ntá tí chojni chjin chóna kaxihi kjinjin la mé ntoá tíha kixin ó kuítuénxin tjan kixin tsochóna tjan kaxihi tjan kjinjin kixin tsotjóchinhya kja tjan. ¹⁶ A ntá tí tjan jnkójín nkexro titekakonhya tíha xíkaha ntá chrókónohará kixin jeheni la ko kaín xín tí sín njnkoé Dios la xíkachó kuènhenni.

Ntoáhya kjóne sín tí niotja xraxinkakonxin sín Ìnchéni

¹⁷ Méxra tí nkehe tjékjian la mé ijnko nkehe tóxrjinnahya tjejoch'erá. Tió tójnkoésé ntiha la ijnko nkehe jína chrókjuich'erá. A ntá náhi la ijnko nkehe jínahya tjejoch'erá. ¹⁸ Na mé sqoxin na mé ntácho sín kixin tió tójnkoésé la jnkokoáhya tjenkayáxinrá. Ntáxrjan kixin ách'e chaxin xíkaha tjejorá. ¹⁹ ¿Xá t'ichjánxin kixin chrók'uaxrjentará kixin chrókónoexinni kixin nkexro chaxin tinkáchónki Ìnchéni la ko nkexro tí náhi? ²⁰ Méxra tí xíkaha jnkokoáhya

tjenkayáxinrá ntá tió tójkotsérá chrókjónterá niotja la chaxínhya xraxinkákoxínrá Ìnchéni tí xíkaha. ²¹ Kíxin tió sinterá la senó isorá tjejonterá tí nkehe tsíkjasánkoará, la isorá la kjónté naxa t'énxinrá kjinta, la í sorá la tsíkókoanrá. ²² ¿Á chontahyará nchia ntoará? Ntahó chrókjóntexínrá la ko chrók'uíxinrá nkehe. Mé xíkaha chontahyará kjuasáyé tí nínkoe Dios la ko nchesuehérá tí sín nóa chóntahya ninkehó. ¿Nkehe tsontáxrjan? ¿Á tsontáxrjan kíxin jína tjejoch'erá? Kjá náhi. Jehya jína tjejoch'erá.

Jína chrórxaxinkakoxínni Ìnchéni

(Mt. 26.26-29; Mr. 14.22-25; Lc. 22.14-20)

²³ Kíxin Ìnchéni mé chjína ch'án tí nkehe kjuákoará: kíxin tí tie tsíkóxi ch'án na mé jehe ch'án kuákja ch'án tí niotja ²⁴ ntá kjuixin kjuanchia ch'án kjuasáya ntá kóchrít'ó ch'án tí niotja ntá ntáchro ch'án kíxin: "Tíhi mé ntona xránjon its'en kíxin jína ts'ejóxin tí jahará. Méxra xíkaha sich'erá kíxin tsoxraxinkákoxínrá tí janhan", ichro ch'án. ²⁵ La ko kjaxin xíkaha tió kjuixin kjóne sín ntá kuákja ch'án tí vaso la ntáchro ch'án kíxin: "Tíhi mé tjákoxin kíxin chaxín tsoxiteya ijnko nkehe njxin kuente Dios kíxin ts'itji njnha. Tió its'irá tíhi mé tsoxraxinkákoxínrá tí janhan", mé chro ch'án. ²⁶ Kíxin tí interá tí niotja la it'irá tí inté to uva mé xíkaha tjejotjákoxinrá kíxin xíkaha k'uénxin Ìnchéni. Mé xíkaha tsjákoxinrá tsjixrakájia yaon tsokjan ch'án.

Ntoá chrókjóne ní niotja kuente Ìnchéni

²⁷ A ntá jnkojín nkexro chjini chrókjóne sín tí niotja la ko chrók'ui sín tí inté to uva xraxinkakoxínni Ìnchéni, mé xíkaha chrókjuasin sín jie chrókjuikosáyehya sín tí cuerpo la ko tí ijnjé Ìnchéni. ²⁸ Méxra jnkojnkonni chrókjuenkayáximni senó kíxin á chóntahyani jie na ntá chrókjóne ní niotja la ko chrók'uini tí inté to uva. ²⁹ A ntá tí xíkaha chjini chrókjóne ní la ko chjini chrók'uini la chaxínhya chrórxaxinkakoxínni tí cuerpo kuente Ìnchéni la mé tí xíkaha chrókjuich'eni la chrókjuasótexinni tíhi. ³⁰ Mé xíkaha itsjérá níhará la ko itsjérá tsánkghyará la ko jnkojínrá k'uénrá. ³¹ A ntá tí chrókjuatsóanni nkexrí tjen asénni jeheni ntá Ìnchéni t'ichjánxienhya chrókjuinчекjasóteni ch'án. ³² A ntá kjónté chrókjuinчекjasóteni Ìnchéni ntá chrók'uitjani chrókjuinчекxiteyéhéni ch'án, ntá chrókjuasótehyani éxi tsjasóte tí í so chojni chjasintajni.

³³ Méxra kichó ní, tió tójkotsérá sinterá la chróchonhénrá chrókui tí í so sín ntá chrókjóntekoará sín jnkojá. ³⁴ A ntá tí nkexro ik'uén kjinta la íchá jína senó chrókjónexín nkehe nteó ó kíxin ntá chrókjuinчекjasótehyará Dios kíxin xíkaha ntoáhya tójkotsérá. A ntá tí í so nkehe la tsjásiyóxian janhan tió tsjasántsahará.

12

Nchakuen Dios mé chjéhe kjuachaxin jnkojnko chojni

¹ Kichóni, tjínkavan kíxin tsoñoará jína kíxin nkexrí siín tí kjuachaxin tjanjon Nchakuen Dios t'áyéhe jnkojnko chojni.

² Jahará ó nohárá jína kíxin tió naxa kuinkachónkehyará Ìnchéni na mé kuinkachréhérá tí nkehe tsíkjangya níxjahya. ³ Méxra chrókónohará kíxin níjnko nkexro níxjaxin kjuachaxin Nchakuen Dios tsjacha ts'ántaxínhin Jesús, la ko níjnko nkexro tsjacha tsontáchro sín kíxin Jesús mé Ìnché sín tí níxjaxínhya sín tí kjuachaxin Nchakuen Dios.

⁴ A ntá nchónhya xra kuente kjuachaxin Nchakuen Dios siín la kjánchó jnkokoá Nchakuen Dios mé tjetjanjon. ⁵ La ko siín nchónhya nkexrí sich'eheni xra Ìnchéni, kjánchó Ìnchéni la ójnkó nkexro tíhi. ⁶ La ko nchónhya nkehe t'axrjéxin tí xra ch'e jnkojnko chojni la kjánchó jnkokoá Dios tjetjanjon tí kjuachaxin ch'exinni xra kaín ní. ⁷ Jnkojnko chojni mé kuitqñhen kíxin chrókjuákoxin kjuachaxin kuente Nchakuen Dios kíxin xíkaha chrókjuinkítsa kichó. ⁸ Iso chojni mé ts'áyéhe kjuachaxin tsonixja sín kjuaxrexinkaon jína kíxin tjinkítsa Nchakuen Dios, la ko í so chojni ts'áyéhe kjuachaxin tsochrónka ijnko nkehe kuente Dios noehya tí í so sín kíxin Nchakuen Dios mé tjinkítsa sín tsonixja sín. ⁹ La ko í so chojni mé ts'áyéhe kjuachaxin antsí tsinkáchónki Dios kíxin Nchakuen Dios mé tjinkítsa. La ko í so chojni mé ts'áyéhe kjuachaxin sinčekitohe chojni jína. ¹⁰ La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kíxin Dios sinchenohe sín ijnko nkehe tsochenka sín tí í so kichó ní, la ko í so chojni mé ts'áyéhe kjuachaxin tsjatsóanxín á kjuachaxin kuente Nchakuen Dios ó á kjuachaxin kuente ijnko nchakuen jínahya chronkaxin ijnko chojni, la ko í so chojni mé ts'áyéhe kjuachaxin kíxin ijnko nkíva ókjé naxa k'uitjahya sín tsonixjaxin sín ijnko nkehe kuente Dios, la ko í so chojni mé ts'áyéhe kjuachaxin tsochronkaxin nkexrí t'axrjéxin tí nkehe ókjé nkíva tsichronka tí í jnko chojni. ¹¹ Kjánchó kaín tíhi jnkokoá Nchakuen Dios mé tjinkítsa, na mé k'uáyéhe

jnkojnko chojni jnkojnko kjuachaxin éxi tjinkaon tí Nchakuen Dios nkerí xra chrókjuich'e sín.

Kaínni k'ónani jnkokoá cuerpo kuènte Cristo

¹² Cristo la éxi yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xikaha Inchéni Cristo la ójnkó tí jehe ch'án. ¹³ Kaínni kjónté chojni judío la kjónté chojni jehya judío, la kjónté chojni ch'exón xra, la kjónté chojni t'ituenhya, kaín ni na mé jnkokoáxón Nchakuen Dios kuikitejinni, na kaín ni k'ónani jnkokoá cuerpo kuènte Cristo, na mé éxi jnkokoá nkehe ik'uúni kaín ni na mé k'uúyéheñi tí jnkokoá Nchakuen Dios.

¹⁴ Kíxin tí cuerpo kuènteni la jehya jnkokoá parte chóna. Náhi. Itsjé parte chóna tí cuerpo. ¹⁵ Tí chróntáchro tí toteni kíxin: "Jehya itja tí jeheni na mé jehya jeheni kuènte tí cuerpo", na mé chaxínhya tíha kíxin ó jehe cuerpo kuènte. ¹⁶ Kjaxin tí chróntáchro ijnko ntatsjoni kíxin: "Jehya ikon tí jeheni na mé jehya jeheni kuènte tí cuerpo a", na mé chaxínhya tíha kíxin ó jehe cuerpo kuènte. ¹⁷ Tí chaxín kuènté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuènté cuerpo kuènteni chrók'óna ntatsjoni, ¿ntá nkexrí chrók'ónaxaxéheñi? ¹⁸ A ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kíxin jehe ch'án nkexrí tjinkaon ch'án kóxrjínjin ch'án. ¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a? ²⁰ Kjánchó jie nchónhya parte chóna tí cuerpo kuènteni la ó jnkokoá tíha.

²¹ Tí ikonni la mé xitjahya tsontáche tí tjani kíxin: "T'ichjánxjenhyani tí jaha", la ko kjaxin tí kjani xitjahya tsontáche tí toteni kíxin: "T'ichjánxjinnahya tí jaha." ²² Náhi. Tí nkehe kuènte tí cuerpo tónhenni kíxin tjetuanhya na mé kjónté antsí má t'ichjánxin ²³ la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakonhenni kíxin tsonoxínhya. ²⁴ A ntá tí nkehe náxrjónhya na mé t'ichjánxjenhyani ka ts'ítsá. Mé xikaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni ²⁵ kíxin ninkehó xitjahya chróxiakayehe tí cuerpo kíxin kaín tí nkehe la jnkokón tjinkítsa kichó. ²⁶ Tíó tsikóníhi ijnko parte kuènte tí cuerpo la kaín tí í so parte la kjaxin tjeté; la ko tíó tjikosáyehe sín ijnko parte la kuènté tsochéhe.

²⁷ A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án. ²⁸ Méxra Dios kjuéyá ch'án chojni sich'ehe ch'án xra kuènte njnko, na mé saoxin kjuéyá ch'án tí sín apóstol; la ko yóxin kjuéyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko níxin kjuéyá Dios iso chojni chjéhe ch'án kjuachaxin tsjako sín itén ch'án, la ko kjaxin kjuéyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjuéyá ch'án í so chojni chjéhe ch'án kjuachaxin sinchekitöhe chojni níhi jína, la ko kjaxin kjuéyá ch'án í so kjojni chjéhe ch'án kjuachaxin antsí tjinkítsa kichó, la ko kjaxin kjuéyá ch'án í so chojni chjéhe ch'án kjuachaxin ts'etoan xra kuènte ch'án, la ko kjaxin kjuéyá ch'án í so chojni chjéhe ch'án kjuachaxin tsonixjaxin sín í jnko nkíva. ²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan, ³⁰ la ko kénhya chojni chóna kjuachaxin sinchekitöhe sín chojni jína, la ko kénhya chojni chóna kjuachaxin tsonixjaxin sín ijnko nkíva ókjé, la ko kénhya chojni chóna kjuachaxin tsochronaxin sín nkexrí t'axrjéxin tí nkehe chrónka tí sín nixjaxin ijnko nkíva ókjé. Chaxín kjá náhi. ³¹ Méxra tjéyará tí kjuachaxin antsí jína chrójtáhará Dios. Ntá jie tsjákohará ijnko ntía antsí jína chrók'uejorá.

13

Chrótjuèhni kichó ni

¹ Tí chrónixja nkívee chojni ó la ko kjaxin chrónixja éxi nixja tí sín ángel, ntá naxa chrótjuahya kichó ni la ó chónkó tíha la mé éxi chrókóyona chica tsjánga ó la ko éxi ijnko chica platillo nchevékjan sín ó, kíxin ninkehó són chónahya. ² La ko tí chrónixja itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónona kaín nkehe, la ko antsí chrókuinkachónkia Dios ntá chrókjuacha chróntátjan ijnko jna sáchrókjui ókjé, kjónté tí xikaha ntá naxa chrótjuahya kichó ni, ntá ninkehó sínkíhya tí janhan. ³ Tí chrókjuintakítonghan tí sín nòa kaín nkehe chonta, la ko tí chrókjuánjuan kjuachaxin kíxin chróchena kuènténa, kjónté tí xikaha ntá naxa chrótjuahya kichó ni la ntá ninkehó sínkíhya tíha.

⁴ Tí tjuèhni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asénni, la ko tsochjínnoxienhyani, la ko sinchehnkehyaní, la ko tsohnkehyaní, ⁵ la ko ch'ehyaní ninkehó nkehe náxrjónhya, la ko tjejáhyani nkehe kuènteni ó, la ko

tsónínkakonhyani tjoka, la ko tsochóntahyani kjuanínkaon isé, ⁶ la ko kjaxin tsochènyani tió í jnko chojni tjasin jie. Náhi. Chróóchéhèni tió ijnko nkehe jina sitónhen. ⁷ Tí tjuèhèni kichó ni la kjónté kaín nkehe chrókuasótéxínni la chrókuitekaonni kixin jina sín la ko naxa chrok'uejóchónhèni chrókónínkakonhyani.

⁸ Tí tjuèhèni kichó ni la jnkochrínin tsjak'e ts'itjáyanyha. A ntá itsi ijnko yaon í t'ichjánxínhyha tsochrónka chojni itén Dios, la ko tsokohya kjuachaxin tsonixjaxin chojni ókjé nkíva, la ko tsokohya kjuachaxin tsonohe chojni má. ⁹ Naxa t'itjáyán tí nkehe chrókónoheni la ko naxa t'itjáyán tí nkehe chróchronkaxínni. ¹⁰ A ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyán.

¹¹ Tió naxa chánjan janhan k'uéníxja éxí chánjan la ko k'uékjenkayáxian éxí chánjan. Ntá kóntetona ntá kujtohá tí nkehe kuènte chánjan. ¹² Méxra éxí ijnko xrosentá t'ikónxínhyani jina jie, ntá tsi ijnko yaon chr'éxín ntá ts'ikónxínni jina kaín nkehe. Ijie naxa t'itjáyán tí nkehe chrókónóna; ntá tsi ijnko yaon tsonóna jina kaín xín nkehe éxí xíkaha kjaxin Dios chóxin ch'án tí janhan. ¹³ Méxra, iní nkehe tjejó jnkochrínin, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kichó. A ntá iní nkehe síin, la kjánchó antsí má t'ichjánxín tsotjuèhèni kichó ni.

14

Tí nixjaxin chojni ókjé nkíva

¹ Chrókóxakonhanrá kixin chrótjuèhérá kichuárá la ko kjaxin chrókuéyará kixin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios. ² Méxra, tí nkexro nixjaxin ijnko nkíva ókjé mé nixjehé sín Dios ó la ntá chojni la náhi, kixin kohya ninkexró tienxín tí nkehe nixja sín la mé nchakuen sín ó mé chronkaxin sín ijnko nkehe kuènte Dios noehya tí í so sín. ³ A ntá tí nkexro chronkaxin ijnko nkíva tienxín tí í so sín ijnko nkehe kuènte Dios mé nixjehé chojni ntá xíkaha tjinkítsa tí í so sín kixin antsí chrók'uitja sín nkehe kuènte Dios la ko chrókóchéhe sín. ⁴ A ntá tí nkexro nixjaxin ijnko nkíva ókjé la mé tjinkítsa jehó ch'án antsí tsonohe tí kjuachaxin kuènte Dios. A ntá tí nkexro chronkaxin ijnko nkehe kjuínchenohe Dios mé tsjinkítsa tí sín kuènte njnko kixin antsí chrók'uitja sín nkehe kuènte Dios.

⁵ Tjínkavan kixin kaín rá chróchontará kjuachaxin chrónixjaxínrá ijnko nkíva ókjé. Kjánchó antsí tjeoan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjeoan chrónixjaxínrá ókjé nkíva tí noahyará tsochronkaxínrá nkexrí t'axrjéxin tí nkehe chróchronkará kixin chrókuinhin kaín tí sín tinkáchónki Inchéni kixin antsí chrók'uitja sín nkehe kuènte Dios. ⁶ A ntá kichó ni, tí chrókjuasántsjahará chrónixjaáxínrá ijnko nkíva ókjé la ó chónkó tíha. Íchá jina chrónixjaáxínrá ijnko nkíva tiénxínrá chróxrjankaxián ijnko nkehe kjuínchenóna Dios la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókjuákoáxínrá ókjé nkehe njxin.

⁷ Kixin kjaxin tí ison flauta la ko tí isón arpa, tí jnkokónhya chróntáchro njkojnko són, ntá chrókjuachahyani chrókjuatsoanni nkehe tí ntáchro tí són a. ⁸ La ko éxi yóhé tí síin guerra, tjanjónko kichó sín, la ntá ntoáhya chrók'uañoa sín tí chica trompeta, ntá kohya nkexro chrókóyaxínhin sín sáchrókjuikjanjónko kichó sín. ⁹ Kjaxin xíkaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchrór? Mé xíkaha tjejonixjará éxí chjéhe xrjntó ó. ¹⁰ Chaxín síin itsjé nkíva chjasintajni la ko kaín nkíva la síin chojni tienxín sín. ¹¹ Kjánchó tí chrókianxínhyha janhan tí nkehe tsootáchro ijnko nkexro, ntá tí nkexro a ts'ikon tí janhan éxí ijnko nkexro tsíkjixín ókjé la ko kjaxin janhan ts'íkuan tí jehe ch'án éxí ijnko nkexro tsíkjixín ókjé. ¹² Méxra jahará imá tjínkáonrá chrók'uayéhérá ijnko xra kuènte Nchakuen Dios, ntá chrókójina chrókjuéyará tí xra chrókjuinkítsa tí í so sín kuènte njnko kixin antsí chrók'uitja sín ijnko nkehe kuènte Dios.

¹³ Méxra tí nkexro nixjaxin ijnko nkíva ókjé la chrókjuanchehe Dios kixin chrókjuinkítsa chróchronkaxin ch'án nkexrí t'axrjéxin tí tan a. ¹⁴ Kixin tí tsonixjaxián Dios ijnko nkíva ókjé, ntá tí nchakuenná ó mé tjenixjehé Dios, la ntá tí kjuaxrexínkaon kuèntana la ókjé tjen. ¹⁵ A ntá tí xíkaha, ¿nkehe chrókjuít'a? Íchá jina chrónixjaxian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan. ¹⁶ Kixin tí tsochjéxínrá kjuasáya Dios nchakuanrá ó ntá tjejótinhin í so chojni, ¿ntá nkexrí kixin tí sín naxa kienxínhyha sín tí nkehe nixjehérá Dios chróntáchro sín "Amén, ó nchoxon"? ¹⁷ Kjónté imá náxrjón tí chrókjuanchehérá Dios kjuasáya la ntá chrókienxínhyha tí sín tjejótinhin, ntá chrokjuinkítsahya kixin chrók'uitja sín nkehe kuènte Dios. ¹⁸ Tjáncháha Dios kjuasáya kixin antsí chonta janhan kjuachaxin tsonixjaxian ókjé nkíva, la ntá jahará la kánhyó nixjará xíkaha. ¹⁹ Kjánchó tió tójnkotsé chojni kichó ni la mé ntáxrjan kixin antsí tjínkavan chrónixja janhan kjónté in'ó palabra ó tienxín sín kixin xíkaha chrókjuákuaxian

sín, la ntá kánhyó chrókójína kjónté ite mil palabra chrónixjaxian ijnko nkíva ókjé tienxínhya chojni.

²⁰ Kíchóni, chrókjuenkayáxinhyará éxi chánjan. Kjánchó chrók'uejorá éxi chánjan naxa noehya nkehe jínahya. A ntá chrókjuenkayáxinrá éxi chojni nteto. ²¹ Tí xroon tsíkjin sín ósé nkexrí k'uetqan Dios mé ntáchro kixin: "Janhan tsonixjaxian ókjé nkíva la ko itén chojni ókjé kixin tsinhin tí nacióon Israel na kjónté tsitekakonhya sín, xíkaha ichro Ìnchéni."* ²² A ntá tí kjuachaxin tsonixjaxin chojni ókjé nkíva mé xránjon kixin chrókjuakoxin chojni chrókuinhin tí sín tinkáchónkihya Ìnchéni, jehya kixin t'ichjánxin chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kixin chrókjuakoxin chojni chrókuinhin tí sín tinkáchónki Ìnchéni, jehya kixin chrókuinhin tí sín tinkáchónkihya Ìnchéni. ²³ A ntá tío tójnkotsérá kaín rá tinkáchónkirá Ìnchéni, a ntá kaín rá chrónixjaxinrá ókjé nkíva, ntá tí chrók'ui xenhen nchia ijnko chojni naxa kuénhya sín xíkaha, o chrók'ui xenhen nchia ijnko chojni naxa tinkáchónkihya Ìnchéni ntá chrókuinhin sín xíkaha la kjá tsontáchro sín kixin ó k'uixikjánrá. ²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'ui xenhen nchia ijnko nkexro tinkáchónkihya Ìnchéni, o chrók'ui xenhen ijnko chojni naxa tienhyé, ntá chrókuinhin sín nkehe tjejonixjará kaín rá ntá chrórxaxinkaon sín tí jie chóna sín ntá chrókuítqhe sín kaín jie chóna sín. ²⁵ Ntá tsonoxin tí nkehe mó tjenkayáxin sín nkaya asén sín ntá ts'ejóxin tocht'in sín tsoxraxinkaon sín Dios la ko tsontáchro sín kixin chaxín tjejókoará Dios.

Ntoá chrókjuich'eni kaín xín nkehe tío tójnkotséni

²⁶ A ntá kíchó ni, ¿nkehe chrókónhen? Tíó tójnkotsérá na mé isorá chrótsjerá salmo, la ko isorá chrókjuakorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkíva ókjé, la ko isorá chróchronkaxinrá nkexrí t'axrxjén tí nkehe nixjaxin tí í so sín ókjé nkíva. Kjánchó kaín tíha tsonhen kixin tí sín kuénte njnko chrók'uitja sín nkehe kuénte Dios. ²⁷ A ntá tí chrónixjaxin sín ijnko nkíva ókjé na mé yaá o iy'á chojni chrónixja sín la ko chrók'ui xinkí chojni tsonixja, la ko t'ichjánxin kixin jnkojin nkexro nohe tsochronkaxin nkexrí t'axrxjén tí nkehe nixja sín. ²⁸ A ntá tí kohya ninxexro tí njnko ntaha tsjacha tsochronkaxin nkexrí t'axrxjén tí nkehe chrónixja sín, ntá chrónixjaxinhyá sín ókjé nkíva tí tjejótójnkotsé sín, na mé chrónixjehé sín asén sín ó la ko chrónixjehé sín Dios ó. ²⁹ Tjánjonrá kjuachaxin kixin tsonixja yaá o y'á chojni k'uáyehé sín kjuachaxin tsochronka sín nkehe kjuínchenohe sín Dios. A ntá tí sín tjejótinhen mé chrókjuenkayáxin sín á ó nchoxón tí nkehe kuínhen sín. ³⁰ A ntá tí xrinahya chrókjuinchenohe Dios ijnko nkehe ijnko nkexro tjetjaxin ntá chróchronka ch'án tíha. A ntá tí nkexro jenó kjuankixin chrónka nkehe la chróchónhen ch'án chrónixjahya ch'án. ³¹ Ó nchoxon jnkojnkorá chróchronkará nkehe tjáhará Dios kixin xíkaha kaín rá chrók'uitjará la ko chrókócháhará. ³² A ntá tí nkexro k'uáyehé kjuachaxin tsochronka nkehe kjuínchenohe Dios kjaxin t'ichjánxin chróchónhen tsochronkaxin í jnko nkexro. ³³ Kixin Dios tjanjon tí kjuaxróxin, a ntá tjnkakonhya ch'án kixin yóxinhya chrók'uejóni.

Tíó tójnkotsé chojni kíchó ni tinkáchónki Ìnchéni ³⁴ chrónixjahya tí chojni chjin jnkosiné servició. Kohya kjuachaxin xíkaha, na mé chrókjuinchexiteyehé sín tí sín ntoa éxi t'etqan tí ley kuénte Dios. ³⁵ Tí tjnkaon sín tsonohe sín nkehe na mé chrókjuanchankíhi sín xii sín tío tjiji sín ntqe sín. Náxrxónhya chrónixja ijnko chojni chjin nkehe jnkosiné servició.

³⁶ Chrókónohará kixin tí itén Dios xránkixixínhya tí tjejorá la ko jehya jahorá k'uayéherá tíha. ³⁷ A ntá tí tjen jnkojin nkexro tjenkayáxin kixin nixja itén Dios o tjenkayáxin kixin tí Nchakuen Dios tjnkjtsa tí jehé ch'án ntá chrókónohe ch'án kixin tí nkehe tjékjian mé ijnko nkehe tsík'etqan Ìnchéni. ³⁸ A ntá tí nkexro titekakonhya tíhi na ntá jahará chrókuitekákueñhyará ch'án kjaxin.

³⁹ Méxra kíchó ni, chrókjuéyará kixin chrók'uayéherá kjuachaxin chróchronkará nkehe kjuínchenohará Dios la ko chrókuiqtqherá tsonixjaxin chojni ókjé nkíva. ⁴⁰ Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

¹ A ntá jie kíchó ni, tjnkavan chrórxaxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína. ² Kjaxin tí nkehe kjuákohará mé kuaáxinrá, tí tjejóyará tí nkehe kjuákohará; tí la náhi la chónkó kuinkachónkirá tí nkehe kjuákua.

³ Saóxín, kjuákohará tí nkehe k'uayáha kixin Cristo k'uenyákonhen ijyéni, na mé xíkaha kjuínchexiteyá ch'án tí nkehe ntáchro tí xroon itén Dios ⁴ la ko tsíkjavá sín ch'án la ko tsíxechón

* 14:21 Isaiás 28.11-12

ch'án tí nínin yaon éxí ntáchro tí xroon itén Dios. ⁵ Ntá k'uikon ch'in Pedro tí jehe ch'án, ntá chr'éxin inaá tí teyó sín k'uék'ajiko ch'án k'uikon sín tí jehe ch'án. ⁶ A ntá chr'éxin chjina quinientos chojni kíchó ni jnkokoá k'uéjé sín k'uikon sín ch'án. A ntá jie itjé tí sín a naxa tjejó sín, a ntá jnkójín sín na ó tsík'en sín. ⁷ Chr'éxin k'uikon ch'in Jacobo tí jehe ch'án, la ko k'uikon kaín tí í so sín apóstol inaá.

⁸ A ntá kjuixixin janhan k'uikuán Ìnchéni éxí ijnko xjan naxa xetjahya yaon chrókokjíhi. ⁹ Kjánchó janhan kánhyó tjetaon la mé tóyóghya tí í so sín tsíkjeýá Ìnchéni la ko tósuaana chrók'óna ijnko nkexro ch'ehe xra Ìnchéni kixin janhan mé k'uénínkakonhan tí sín núnkpe Dios. ¹⁰ Kjóté jínahya kjuít'a la kjuasáyé Dios la ko kjuachaxin kuente ch'án mé kjuítóxinhin tí kjuenkayaxian, na mé chónkóhya kuikonóna ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhí. Dios kjuínkítsana ch'án kjuít'a xra. ¹¹ Kjánchó tjetuanhya á janhan o á jehe sín kjuako sín, kixin xíkaha tí itan kjuakoni, a ntá kuítekaónrá.

Tsoxechón tí sín tsík'en

¹² A ntá tí tjakoni kixin Cristo la xechón, zntá nkekuente ntáchrórá jnkójínrá kixin tsoxechónhya chojni tsík'en? ¹³ Tí chrókóchaxín tí nkehe ntáchrórá kixin tsoxechónhya chojni tsík'en, ntá kjaxin chrókóchónhya Cristo. ¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekaónrá. ¹⁵ A ntá tí chaxínhya xíkaha tsíkónhen, la jeheni la ijnko chojni ntoáhya chrónka kuénté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chrókóchón Cristo, ntá kjaxin chrókóchaxínhya kixin chrókóchón chojni tsík'en ¹⁶ kixin tí chrókóchónhya tí chojni tsík'en, ntá kjaxin Cristo chrókóchónhya ch'án. ¹⁷ A ntá tí Cristo chrókóchónhya ch'án ntá chrókóchónkó tí kuítekaónrá tí jehe ch'án kixin naxa chrókjuínhya tí ijjárá. ¹⁸ La ko tí chrókóchaxin tíha ntá chrók'uitjáyán tí sín kuítekaon Cristo ik'uén sín. ¹⁹ Méxra tí chrókúinkáchónkini Cristo kixin chrókjuínkítsa ch'án tí jeheni chjasintajni ntíhyó, ntá kohya chojni chrókóyóhe tí jeheni, imá chrókónóéni chrók'uejóni kaín ni.

²⁰ Kjánchó náhi, la chaxín ó xechón Cristo. Jehe ch'án éxí tí nkehe tsík'óna saoxín kixin jehe ch'án saoxín xechón ch'án. ²¹ Méxra jnkokoá chojni ntoa kjuankixin kjuasin jie, ntá kjuankixin k'uén kaín xín chojni chjasintajni, la ko kjaxin jnkokoá chojni ntoa xechón, ntá xíkaha tsoxechón kaín chojni tsík'en. ²² Kixin tí jie kjuasin ch'in Adán ntá kaín xín chojni sí'tenxín sín. A ntá Cristo la kaín ni tsochóntaxínni kjuachón. ²³ Jnkójínkoni éxí tsoqhenni tocar, na mé saoxín xechón Cristo, a ntá chr'éxin tió tsokjan ch'án ntá tsoxechónni kaín ni kuítekaonni tí jehe ch'án. ²⁴ A ntá ó tsí yaon tsjixixín ntá sinchek'itjáyán Cristo kaín xín nkehe t'etóan la ko kaín xín kjuachaxin ókjé, ntá tsjanjon ch'án tí xra t'etóan kixin ts'áyéhe It'é ch'án Dios. ²⁵ Na mé t'ichjánxin ts'etóan Cristo tsjixrakája tí yaon tsjachahya tí sín nínkakonhen ch'án. ²⁶ A ntá tí nkehe tsjixixín ts'itjáyán la mé tí kjuach'en. ²⁷ A ntá Dios kjuanjon kjuachaxin kixin kaín nkehe síin mé chrók'uetuennen Cristo.* Kjánchó tió xíkaha ntáchro tí xroon itén Dios tsíkjin sín ósé kixin kaín xín nkehe mé ts'etuennen ch'án, ntá ó noheni jina kixin jehya kixin Dios la chrók'útuennen ch'án inaá. Náhí. Jehe ch'án mé chjéhe Xjeen ch'án kaín kjuachaxin ts'etuennen ch'án kaín xín nkehe. ²⁸ A ntá tió tsjixin tsjacha Cristo ts'etuennen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kixin ntá Dios mé ts'etuennen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuente xíkaha ch'e sín tí titekakonhya sín kixin tí sín tsík'en tsoxechón sín inaá?

³⁰ A ntá tí xíkaha, ¿nkekuente kixin kaín yaon kjuaxróxinhya tjejóni nínkakonhenni chojni? ³¹ A ntá kíchó ni, kaín yaon síin kjuachrakon chrók'uén janhan. Chaxín tíhi, kjánchó chàna kixin jahará kjaxinrá tinkachónkirá Ìnchéni Jesucristo. ³² Kjóté kónínkakonna chojni chjasin Éfeso éxí iko jiehe la kjóté kjuak'é ntíha, ¿la ntá nkehe chrókjuacha tí janhan tí chrókóchaxínhya chrókóchón chojni tsík'en? Tí xíkaha la ó nchóxon tí nkehe ntáchro tí sín titekakonhya Ìnchéni kixin chrókóne sín la ko chrók'ui sín kixin jie la o ntóye chrók'uen sín.

³³ Chrókjuítóéhyará chrokjuít'áyahará sín. Éxí ntáchro sín kixin: “Tí chrók'uejókotoxinini chojni jínahya ntá chrók'uitjáyán tí nkehe jina tjenkayaxinni.” ³⁴ Chrókjanrá ntja jina ntoá la chrókjuásinhýará jie. Méxra isorá naxa chonhyará Dios. Na mé ntáxjan tíhi kixin chrók'úsuhará.

Nkexrí tsoxechón tí sín tsík'en

³⁵ Kjá jnkójínrá tsjanchankínará kixin: “¿Nkexrí tsoxechón tí sín tsík'en la ko nkexrí tsotsjehe tí cuerpo tsochóna sín?” ³⁶ Lontjrá tjanchankínará xíkaha. Tí noatje t'enkanı nonte t'ichjánxin its'en ts'itjáyán kixin tsjak'echón tí nkehe ts'ayan. ³⁷ Tí nkehe t'enkanı

* 15:27 Salmo 8.6

la jehya tí ka a. Náhí. Tí nkehe t'enkani la noatrigo o í jnko tje. ³⁸ Kjánchó Dios kjuanjon kjuachaxin kixin jnkojnko nta ts'óna éxí tjinkaon ch'án, la ko jnkojnko nta tsochónta tje kuènte. ³⁹ A ntá jehya kaín tí cuerpo la jnkokon. Náhí. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxé, la ko í jnko la cuerpo kuènte coche. ⁴⁰ Na mé kjaxin xikaha síin cuerpo kuènte tí sín ángel tjejó nkaya nkajní la ko síin cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe. ⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko. ⁴² Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsojté, a ntá tí nkehe tsoxechón la mé ijnko nkehe ts'itjayanhya. ⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chóntahya kjuachaxin, la ntá tí nkehe tsoxechón la ijnko nkehe tsochónta kjuachaxin. ⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochónta kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochónta kjuachaxin kuènte Nchakuen Dios.

⁴⁵ A ntá éxí ntáχρο tí xroon itén Dios kixin: "Tí chojni ntoa k'óna saoxín mé ch'in Adán tíha mé k'uáyéhe ch'án kjuachón ó."[†] A ntá tí ó kjuixixín ikui í jnko ch'in éxí yóhe Adán, kjánchó jehe ch'án mé chóna ch'án nchakuen tjanjon kjuachón. ⁴⁶ Kjánchó jehya saoxín k'óna tí cuerpo antsí chóna kjuachaxin kuènte Nchakuen Dios. Náhí. Saoxín k'óna cuerpo kuènte chojni chjasintajni ó, la ntá chr'éxín k'óna cuerpo antsí chóna kjuachaxin kuènte Nchakuen Dios. ⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kujxin ch'án. ⁴⁸ Tí cuerpo síin chjasintajni mé yóhe tí cuerpo k'uéchónta tí nkexro tsík'óna nche. A ntá tí cuerpo síin nkaya nkajní mé yóhe tí cuerpo chóna tí nkexro kujxin nkaya nkajní. ⁴⁹ Éxí senó tóyóhēni tí nkexro k'óna nche, ntá xikaha chr'éxín tsoyóhēni tí nkexro kujxin nkaya nkajni.

⁵⁰ Ntá tsojtónkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etoan ch'án. Na mé tí nkehe tsjeje xitjahya ts'áyéhe tí nkehe tsjejehya. ⁵¹ A ntá tsojtónkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani. ⁵² A ntá xrínahya titàya tjejóni ntá éxí chróchr'áton konni la ko chrókuaktjenkíni konni xikaha tió tsjixixín tsinhini tsontáχρο trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani. ⁵³ A ntá tí cuerpo chóntani la tsjeje, ntá t'ichjánxín ts'inkáya nkehe chónhya tsjeje. La ko tí cuerpo chóntani la ts'en, na mé t'ichjánxín ts'inkáya nkehe chónhya ts'en. ⁵⁴ A ntá tió tí cuerpo chóntani la tsjeje, na mé t'ichjánxín ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxín ts'inkáya tí nkehe chónhya ts'en. Ntá tí xikaha na ntá tsoxiteyá éxí nixja tí xroon itén Dios ntáχρο kixin: "Tsjachahya tí kjuach'én la mé tsjacha tí kjuachón."[‡] ⁵⁵ "Jaha kjuach'én, ¿kjá tí kjuachaxin kuènta kixin chrókjuacha jaha? Jaha kjuach'én, ¿kjá tí kjuachaxin kuènta kixin chrók'oyánni?"[§] ⁵⁶ Tí jie tjasinni mé kujxin tí ts'enni. A ntá tí ley k'uetqan ósé antsí k'uixixín jie. ⁵⁷ A ntá tjancheheni Dios kjuasáya kixin ichr'án ch'án Închéni Jesucristo kixin táha mé tsaáxinni.

⁵⁸ A ntá jahará kichó ni, imá tjuahará. Chrókjuetóehyará tinkachónkirá Închéni. Jnkochríxín chrókjuich'ehérá Închéni xra antsí jína kixin ó nohará jahará kixin tí xra ch'eheni Închéni jehya chónkó tíha.

16

Tí ofrenda tjenájín sín tsochr'énnen sín tí sín tjejó chjasin Jerusalén

¹ A ntá tí chichaon tjenájínrá kixin tsjínktsará tí sín kichó ni tinkáchónki Închéni na mé chrókjuich'erá éxí kuétuanhan tí sín njnko estado Galacia. ² Jnkojnko domingo jnkojnko chrókuakitsjenteherá nkerí síká chichaon kjuachará tí semana kjuich'erá xra kixin t'ichjánxínhya chrókjuasánjia janhan ntá chrókjuénájínrá chichaon. ³ A ntá tió tsjasán janhan tsétuanhan tí sín tsjéyará kixin sátsji sín chjasin Jerusalén, na ntá tsokjian xroon tsjikoixin sín tí chichaon tsíkjenájínrá tsjikaán tí sín kichó ni ntiha. ⁴ A ntá tí chrókójina kjaxin janhan sáchrókjuiyá, a ntá sáchrókjuikian tí jehe sín kjaxin.

Tjenkayáxin ch'in Pablo nkexrí sátsji ch'án

⁵ Tí sátsjia la t'ichjánxín ts'atsínka janhan estado Macedonia ntá chr'éxín tsjasán ntiha chjasin Corinto. ⁶ Ach'e ntaó chrókuitqna chrók'uatsínkajia nchakuen kin. A ntá jahará

chrókjuínkĩtsará tí janhan tió sátsjia ókjé chr'éxin. ⁷ Méxrā tĩnkakonhya chrók'uatšínkoá chrótsjahará ó. Náhi. Tĩnkavan chrókuitona iso yaon tí tjejorá ntiha tí Ìnchéni chrókjuanjon kjuachaxin. ⁸ Kjánchó tsitona chjasin Éfeso tsjixrakájia yaon Pentecostés, ⁹ kixin ntihi antsi chonta kjuachaxin chrókjuit'a xrā kuente Ìnchéni la ko jina chrókónhen tí xrā kjónté nchónhya chojni nĩnkakonna.

¹⁰ A ntá tí tsjiji ch'ín Timoteo ntiha la antsi jina chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xrā éxi janhan. ¹¹ Kaín tí jahará chróchonteherá ch'án kjuasáya. Tĩnkĩtsará ch'án kixin jina itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

¹² A ntá tí kichó ni Apolos la imá xrjanóaha ch'án kixin kjaxin chrókjuujiko ch'án tí í so kichó ni, kjánchó tĩnkakonhya ch'án jie. Chr'éxin tsjiji ch'án tió ts'ixranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuitóehyará tí tinkachónkirá Ìnchéni. ¹⁴ Kaín nkehe chrókjuich'erá la koí chrótuèhérá kichuárá.

¹⁵ Na ntá kichó ni, ó nohará kixin tí sín kjéhya ch'ín Estéfanas saoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xrā a tĩnkĩtsa sín tí sín kichó ni tinkáchónki Ìnchéni. ¹⁶ Tĩnkavan kixin chrókjuinchesteyéhérá tí sín tĩnkĩtsa éxi tí jehe sín la ko kaín tí sín ch'e xrā. ¹⁷ Chána kixin ó kui ch'ín Estéfanas la ko ch'ín Fortunato la ko ch'ín Acaico, kixin jahará kjónté tjejohyará. ¹⁸ A ntá jehe sín kjuínchechéhe sín asenná éxi kjuínchecháhará sín. Chróchonteherá kjuasáyé chojni xikaha.

¹⁹ Tí sín tójnkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójnkotsé ntóje sín ima xraxinkaon sín tí jahará kixin tinkachónkirá Ìnchéni. ²⁰ Kaín tí sín kichó ni ntihi xraxinkaon sín tí jahará. Nixjehérá kichuárá kaín rá tsehérá tja kichuárá jnkójina.

²¹ Janhan Pablo xráxinkavan tí jahará ikjian xroon chr'anhanrá la tjaná kjinxian tí letra i.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrakía.

²³ A ntá kjuasáyé Ìnchéni Jesucristo mé sintayaonrá ch'án. ²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énhen ch'án tí ninko chjasin Corinto

¹ Janhan Pablo mé kjuéyána Dios kixin sít'aha Ìnchéni Jesucristo xra, la ko kichó ni Timoteo ikjinni tí xroon i chr'ánhanráni tí jahará ninkoe Dios chjasin Corinto la ko kaín tí í so kichó ni tinkáchónki Ìnchéni tjejorá nkuixín estado Acaya. ² Kjuasáyé It'eni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehé It'eni mé tikonógheni ch'án la ko xráxin nchechéheni ch'án. ⁴ Jehé ch'án mé nchechéhé ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxi yóhé jehé ch'án kjuínchechéhé ch'án tí jeheni. ⁵ Mé xikaha tjejótjasóteni éxi yóhé kjuasóte Cristo ntá kjaxin jehé ch'án imá sinchechéheni ch'án kixin tinkáchónkini ch'án. ⁶ Tjejótjasóteni kixin tí jahará chrókócháxinrá la ko chrókuaáxinrá. A ntá Dios nchechéhé tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxi tjasóteni jeheni. ⁷ Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhé Dios tí jeheni kaín ni.

⁸ Kichóni, tjinkaonni kixin chrókónohará kixin nkexrí imá kjuasóteni tí k'uejóni tí estado Asia. Imá náxrjónhya kjuasóteni la chrókjuachahyani, la k'uitjáyehenni tí tjenkayáxinni kixin chrók'uauxrjéxinni ntiha naxá chrók'uejóhónni. ⁹ Ó kónoheni kixin chrók'uenxínni ntiha. Mé xikaha kónhenni kixin chrókónoexínni kixin tí jehóni la chrókjuachahyani tíha. Náhí. Chrókuinkáchónkini Dios, mé tí nkexro nchexechón chojni tsík'en. ¹⁰ Jehé Dios mé kjuínchekaáni ch'án la ko naxá sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehé ch'án sinchekaáni ch'án ¹¹ tí tjínkítsaráni tjanchehéra Dios kixin tsjinkítsani ch'án. A ntá tí tsjé chojni chrókjuanchehe Dios kixin tsjinkítsani ch'án ntá chr'éxin itsjé chojni tsjanchehe sín ch'án kjuasáyé kixin xikaha jehé ch'án kjuínkítsani ch'án.

Nkekuènte sákjuíhya ch'ín Pablo tí chjasin Corinto

¹² Chéheni kixin noheni kixin ntoá k'uejóni ntihi chjasintajni kjuích'iyehyani chojni, mé xikaha k'uejókoaráni. Ntá jehya kjuachaxin kuènteni kjuachaxínni xikaha. Náhí. Kjuachaxin kuènte Dios mé kjuínkítsani kixin xikaha k'uejóni. ¹³ Tió chr'ánhanráni xroon, kjinhyani nkehe chrókiénxinhyará. Náhí. Jehó tí nkehe chrókjuínchekuáxinrá chrókiénxinrá. Tjéchonhan kixin chrókiénxinrá jína. ¹⁴ A ntá ó tinkakiénxinrá ntsí kixin tió tsokjan Ìnchéni Jesús tsócháhará kixin xikaha kjuakoharáni jeheni la ko kjaxin tsóchéheni kixin jahará kuítekaónrá.

¹⁵ Mé xikaha kjuenkayáxian kixin saoxín chrókjuasántsajahará tí jahará kixin chrókócháhará kixin yáya chrókjuasántsajahará. ¹⁶ Kjuenkayáxian janhan chrókjuasántsajahará saoxín tió sáchrókjuia estado Macedonia la ko chrókjuasántsajahará inaá tió chrókjanxian ntiha. Mé xikaha chrókjuínkítsarána tió sáchrókjuiyá janhan estado Judea. ¹⁷ ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya? ¹⁸ Méxra tjetsjehe Dios kixin xikaha kjuáteheni tí jahará kixin chrókjuijini la ko chrókjuijihyani. ¹⁹ Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuákoxian janhan tí k'uejóni ntiha, mé xikaha k'uechéronka ch'án, kjuích'iyahya ch'án ninkehó. Náhí. Kaín nkehe tjakoni kuènte Cristo la chaxín tíha. ²⁰ Kixin kaín nkehe tsichronka Dios la mé jehé Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni "Amén, ó nchoxon" kixin tí kjuachaxin kuènte Cristo Jesús. ²¹ A ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuinkáchónkini Cristo la ko jehé ch'án mé kjuéyáni ch'án. ²² Kjaxin jehé ch'án tsikjinchekani ch'án xroye, na mé kjuanjon ch'án Nchakun ch'án tsochónta asémmi senó kixin tsoñoxéni kixin chaxin ts'áyéheni nkehe chr'éxin.

²³ A ntá tí naxá kjuasánhya janhan chjasánrá Corinto éxi kjuenkayáxian la tjetsjehe Dios kixin tjínkakonhya kixin chrókóxakonhanrá tí chrókjuéntuáhará tí jahará inaá. ²⁴ Jehya kixin chrókuéтуánhárá kixin nkexrí chrókuinkachónkirá Ìnchéni kixin ó nõna kixin ntoá tinkachónkirá ch'án. Ó jehí tjinkaonni chrókjuínkítsaráni kixin antsi má chrókócháhará.

2

¹ Mé xikaha kjuenkayáxian kixin chrókjuasánhya janhan ntiha inaá tí naça xrásinrá kjuanínkaon. ² A ntá tí naça chrókjuintak'ávára, ¿á ntá nkexro chrókjuinchehána inaá tí chrókjuinchehányará jahará kixin janhan kjuintak'ávára? ³ Mé xikaha ikjian tí xroon chr'anhánrá senó kixin tjñkakonhya chrókjuasán chrókjuinchekóxakonnará inaá. Náhí. Jahará chrókjuinchehányará. Mèxra ó nóna kixin tí chrókóhána janhan ntá chrókóhányará káin rá. ⁴ Kjánchó tíó ikjian tí xroon a chr'anhánrá senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhánrá kixin chrókjuintak'ávára. Náhí. Ikjian tí xroon chr'anhánrá kixin chrókónoaxinrá kixin imá tjuahará tí jahará.

Ch'in Pablo chrókjuinchek'itjáyenhen ch'an tí jie kjuasin tí nkexro a

⁵ A ntá tí nkexro kjuínchekakonna la jehya janhvàn kóxakonna. Náhí. Káinrá kóxakonhanrá. Kjánchó tjñkakonhya tjetóxin tsontáxrjan tíha. ⁶ Na mé itsjé tí jahará nixjehérá ch'an kóyakoterá ch'an kixin chrókjuasinhya ch'an jie xikaha la táhó la ó tjen. ⁷ Ntá jie chrók'uitjáyanhánrá tí jie kjuasin ch'an, chrókjuínkítsará ch'an, kixin tí náhi la ts'itjáyaxin ch'an tí kjuancheníhi. ⁸ Mèxra xrjanóahará kixin chrókjuákoçxinrá inaá kixin chaxín tjuéhérá ch'an. ⁹ Mé xikaha senó ikjian xroon chr'anhánrá kuènte tí kjuanínkaon chontará kixin tsononaxian á chrókjuinchexiteyánará káin nkehe chrókuétuánhánrá. ¹⁰ A ntá tí sinchek'itjáyenhenrá ijnko chojni ichrén jie kjuasin ch'an ntá janhan kjaxian sintak'itjáyanhán ch'an tí jie kjuasin ch'an. Mèxra tí chaxín k'ué ichrén jie chrókjuintak'itjáyanhán ijnko chojni la ó kjuixin kjuintak'itjáyanhán ch'an tí jie a kixin chrók'uejorá jnkojina. Kjaxin xikaha tjetsjehe Cristo, ¹¹ kixin ntá tí ch'in Tsochren na tsjachahya ch'an tsjachroe ch'an tí jeheni, kixin ó noheni nkexrí ch'ia tí ch'in Jínahya.

Kóxakonhen ch'in Pablo tí kjuá'k'e ch'an chjasin Troas

¹² A ntá tíó kjuasán tí chjasin Troas chrókjuákua tí tan jina kuènte Cristo la antsí xránjon kjuachaxin kixin chrókónhen xra kuènte Inchéni. ¹³ Kjánchó náxrjónhya tjen asenná kixin k'uitjajaha tí kichó ni Tito. Ntá tuénxin níxjaha tí jehé sín tjejó ntiha ntá sákjua tí estado Macedonia.

Ntá ó tsjacha sín tsochóna sín kjuachaxin kuènte Cristo

¹⁴ Kjuasáyé Dios kixin xráxin jehé ch'an tjñkítsani ch'an ntá tjachani kixin chóntani tí kjuachaxin kuènte Cristo Jesús. Ntá káin nketí sáchrókjuini mé tjakoçjinni tí tan kuènte ch'an éxi ijnko nkehe xraxé náxrjón chrókóxrjinhin káin xín chojni. ¹⁵ Káinni la éxi yóhé tí xraxé náxrjón kuènte chijnço chrókjuanjón Cristo chrók'uáyéhé Dios kixin tíha mé chrókónoexin tí sín tsáa la ko kjaxin chrókónoexin tí sín ts'itjáyan. ¹⁶ Tí sín ts'itjáyan mé tókaxraxéhé sín éxi ts'enxin sín tí xraxé a. A ntá tí sín tsáa mé tóxrjinhin sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha? ¹⁷ A ntá jeheni mé xrinchekjihyani nkexrí nixja itén Dios éxi ch'e nchónhya chojni chrókjuacha sín chichaon. Náhí. Káin asénni tjakoni itén Dios kixin kjueyáni ch'an sich'eheeni Cristo xra, la ko tjetsjehe ch'an tí xra tjejóch'eni.

3

Ti pacto nixin

¹ A ntá xikaha ntáchroni, ¿á tjenkayáxinrá kixin kjuankíxinni tsochronkani inaá kixin jina tí jeheni, ó á t'ichjánxin kixin chrókjuijikoni xroon kixin tsonoaxinrá kixin jina tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jina tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jina tí jeheni éxi ch'e í so sín? ² Náhí. T'ichjánxienhyani nijnko xroon kixin jahará mé éxi yóhé ijnko xroon tsíkjinri xrikoni chrókóxin la ko chrókjuinchekuáxin káin xín chojni tsonoexin sín kixin jeheni mé ch'eheeni Cristo xra. ³ T'ikon sín noxin kixin tí jahará mé éxi yóhé ijnko xroon tsíkjin Inchéni Cristo xrikoni nchekuáxin chojni. Kjánchó jehya ntáhni tsíkjinxin ch'an. Náhí. Kjuanjon ch'an Nchakuen ch'an tjechón chontará la kjaxin jehya xrotabla tsíkjin ch'an. Náhí. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjñkítsani Cristo. ⁵ Jehya kixin ó jehí chrókóntani kjuachaxin kixin chrókjuich'eni xra. Náhí. Káin tí xra ch'eni na Dios tjetjanjon kjuachaxin. ⁶ Jehé ch'an mé kjuanjon ch'an kjuachaxin kixin chrókjuich'eheeni ch'an xra tsochenkani chojni tí tan nixin kui. Tíha jehya ijnko nkehe tsíkjin chojni chrókjuinchexiteyéhéni. Náhí. Tíha mé kjuachaxin kjuanjon Nchakuen Dios kixin sinchexiteyéhéni ch'an. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kjuíkaço t'inkaséyan la mé kjuachahya tí sín israelita chrókomá sín ikon ch'in Moisés kixin imá tjáçini tsjehe ikon ch'an.* Kjánchó tí

* 3:7 Éxodo 34.29–35

t'inkaséyan kjuankíxin ó tinkák'anka. Méxra tí xíkaha tí ley tjanjon kjuach'én mé kuikao ijnko t'inkaséyan imá náxrjón. ⁸ Já chrókójehya kíxin antsí má t'inkaséyan kuikao tí tan nixin kuixín kjuachaxin Nchakuen Dios? ⁹ Méxra xíkaha tí ley k'u'échóna kjuachaxin jíe kjónté ntácho kíxin its'en chojni, a ntá antsí má jina tí tan chrónka Dios kíxin tsotjuáxin tí jie chóntani. ¹⁰ Méxra tí kjuachaxin k'u'échóna tí ley k'u'ék'etóan óse la ninkehó tóyójehya tí kjuachaxin jíe tjen jie. ¹¹ A ntá tí k'u'échóna kjuachaxin tí nkehe séhyó ntá tinkákjeje, a ntá antsí má chóna kjuachaxin tí nkehe tsjak'e jnkochríxin.

¹² Mé xíkaha tí nkehe tsjejehya tjejóchónhenni ntá chrakonhyani chronkaxinni kaín tíha. ¹³ Ch'ehyani éxi kjuich'e ch'ín Moisés k'uikjèxin ch'án ka ikon ch'án kíxin tsoñoehya tí sín israelita kíxin ó tinkákjeje tí t'inkaséyan chóna ch'án. ¹⁴ Kjánchó jehe sín naça kienxínhya sín la ko naça xíkaha tjejó sín ijie tió nchekuáxin sín tí nkehe k'uituenhen sín óse kíxin tí ka naça t'inkákonhen tí chrókienxín sín kíxin naça kjuinhyia tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a. ¹⁵ A ntá kjónté jie tió nchekuáxin sín tí xroon tsíkjin ch'ín Moisés la tjejó sín éxi naça t'inkákonhen tí ka a kíxin tienxínhya sín. ¹⁶ A ntá tió ijnko chojni tsjankíxin tsinkáchónki Ìnchéni ntá tí ka t'inkákonhen la tsjin. ¹⁷ A ntá Ìnchéni mé Nchakuen Dios tíha. A ntá tí tjen Nchakuen kuente Ìnchéni Dios la ntiha kohya nkehe ts'inkákonhen. ¹⁸ A ntá jeheni kaín ni kohya nkehe t'inkákonhen ikonni la mé tjejóni éxi xrosenta tjákini tí kjuachaxin kuente Ìnchéni, na mé tinkák'ixitóxin tí kjuaxrexinkaon kuénténi kíxin antsí chrókóyóhene éxi tí jehe ch'án kíxin antsí tsochóntani tí kjuachaxin kuente ch'án, kíxin Ìnchéni, na tí Nchakuen a, mé xíkaha ch'e xra.

4

¹ Méxra xíkaha chrókóxrjéhyani chrókjuich'eni tí xra kjuanjon Dios kíxin jehe ch'án kuikónóeheni ch'án. ² Ó kuítóhene kaín nkehe imó la ko kaín nkehe chrókósuèxinni, la ko ch'iyehyani kichó ni, la ko tjitoxienhyani itén Dios. Náhi. Jehí tí nkehe ntoá chrónkani. A ntá xíkaha chrókónoexín kaín xín chojni kíxin ntoá tjejóni éxi tjinkaon Dios. ³ A ntá jeheni mé tjakoni tí itan tsaáxinni, kjánchó iso sín kjónté xíkaha tinhin sín mé tienxínhya sín kíxin xráxin jehe sín la ts'itjáyan sín. ⁴ A ntá jehe sín kuítekakonhyia sín, a ntá tí dios kuente chjasintajni mé kjuinçek'ikonhyia sín kíxin chrókienxínhya sín, kíxin ntá chrók'uikonhyia sín tí t'inkaséyan kuente tí tan kuente Cristo, mé tí nkexro chóna kjuachaxin, a ntá jehe ch'án la mé yóhe éxi tsjehe Dios. ⁵ Tió tjakoni na mé jehya tjakoni kíxin jeheni chrókuitekáonrá. Náhi. Chronkaxinni kíxin chrókuitekáonrá Jesucristo mé Ìnchéni la ko chrónkani kíxin jeheni mé t'aharáni xra tsjinkjtsani tí jahará kíxin tjuaahará Jesús. ⁶ Na mé jehe Dios k'uetóan kíxin tí xrohi ts'inkaséyanxín tí sítié a na mé kjáxin jehe ch'án kjuanjon ch'án xrohi ts'inkaséyanxín nkaya asenni kíxin chrókjuachani chrókónoheni nkexrí tjen tí kjuachaxin jíe kuente Dios t'inkaséyanxín Ìnchéni Jesucristo.

Nkexrí chrók'uejóni kíxin tinkáchónkini Ìnchéni

⁷ A ntá tí cuerpo kuénteni la yóhe ijnko chi tsík'óna nchetje tjinka nkehe tjete, mé xíkaha ts'ikon sín kíxin tí kjuachaxin jíe chóntani la kuixín tí tjen Dios kíxin jehya kuénteni tíha. ⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títóehyani tinkáchónkini ch'án. ⁹ Kjónté chónkíhi sín tí jeheni kjánchó Dios la kuítójehya ch'án tí jeheni. Kjónté k'uékoni kjuitsínkani kjánchó kjuinçek'itjáyanhyani sín. ¹⁰ Kjónté nketí sájtini xráxin chrók'uenxíni éxi k'uénxin Ìnchéni Jesús, kíxin xíkaha tjakóxinni tí kjuachón chóna ch'án. ¹¹ Méxra jeheni naça tjejóchónni la xráxin síin kjuaxikaon kíxin chrók'uenxíni kíxin tinkáchónkini Jesús kíxin kjáxin xíkaha chrókjuakóxinni tí kjuachón chóna ch'án kjónté chrók'uen tí cuerpo chóntani. ¹² Kjónté xíkaha chrók'uenxíni, a ntá jahará tsochontará kjuachón.

¹³ Éxi ntácho tí xroon itén Dios tsíkjin sín óse kíxin: “Kuítekavan ntá xíkaha xrxanka.”* A ntá kjáxin jeheni kuítekaonni ntá xíkaha chrónkani. ¹⁴ A ntá ó nohene kíxin Dios mé tí nkexro kjuinçexechón tí Ìnchéni Jesús kjáxin sinçexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjáxinrá tí tjen Dios. ¹⁵ Kaín tíha kónhen kíxin jahará jina chrók'uejoxinrá. La ko kjáxin xíkaha nchónhyará chrók'uayéherá tí kjuasáyé Dios, ntá antsí tsje chojni ts'ejóni tsjanchehene Dios kjuasáyé kíxin tí kjuachaxin jíe chóna ch'án.

¹⁶ Méxra chrókóxrjéhyani kjónté tinkákjeje tí cuerpo chóntani kíxin ó nohene kíxin jnkojnko yaon Ìnchéni mé tjençek'ánkí ch'án tí kjuaxrexinkaon kuénténi. ¹⁷ A ntá tí nkehe tjasótéximi tí tjejóni ntihi jie mé tíha la tjoka ts'atsínka la ts'áyèxinni ijnko nkehe imá jíe la ko í tsjejehya tíha. ¹⁸ Ntá chrókomáhyani tí nkehe síin chjasintajni ntihyó. Náhi. Chrókjueyáni tí

* 4:13 Salmo 116.10

nkehe *naxa* t'ikonhyéni kixin tí nkehe t'ikonxínni ikonni na mé nkehe chóxin tsjeje. *A* ntá tí nkehe t'ikonhyani mé nkehe tsjejehya.

5

¹ *A* ntá ó noheni kixin tíó tsjeje tí cuerpo chóntani na mé yóhé éxi ijnko nchia tjoka tsjeje, a ntá Dios mé kjuíuch'éna jnkojnko nchia nixin ts'tíjáyanyha jnkochrixin nkaya nkajní kixin jehya tja chojni kjuíuch'énaxín tíha. ² Tí *naxa* chóntani cuerpoéni ntíhi la náxrjónhya tjejóni tjinkaonni tí ókjé cuerpo tsochóntani nkaya nkajní ³ kixin táha ts'inkáyani éxi ijnko ka, ntá xitjahya chrókótjóchínni. ⁴ Tí *naxa* tjejóchónxinni tí cuerpo chóntani jie la náxrjónhya tjejóni tjasóteni. Tjinkakonhyani xikahó chrókuitjokoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyán tí chrók'uenxínni la ntá chrók'ualjani tí kjuachón nixin. ⁵ Dios mé kjuenkayáxin ch'án kixin xikaha sinchekjtonhenni ch'án ntá kjuínchekjtonhenni ch'án tí Nchákuen ch'án kixin ntá chrókónoexínni kixin chaxín ts'áyéheni tí nkehe tsjanjon ch'án.

⁶ Mé xikaha xráxin ó noheni kixin tí *naxa* tjejóni ntíhi *naxa* chóntani cuerpoéni ntá *naxa* tjejókyani Inchéni. ⁷ *A* ntá jeheni tjejóni tinkáchónkini ch'án kjónté t'ikonhyani ch'án. ⁸ Kjánchó jeheni na imá chéheni tjinkaonni chrókuitjoheni tí cuerpoéni chóntani jie kixin sáchrókjuíni tí tjen Inchéni, chrók'uejókoni ch'án ntíha. ⁹ Méxra xikaha tjinkaonni chrókjuínchechéheni Inchéni kjónté *naxa* chrókóntani cuerpoéni ntíhi la ó í chrókóntahyani, la *naxa* chrók'uincháónkini ch'án. ¹⁰ Kixin kaín ni t'ichjánxin tsochjineheni Cristo tí tjen ch'án t'etqan ch'án kixin nkehe ts'áyéheni jnkojnkonni kixin nkerí xra kjuíuch'eni á jina ó náhi tí *naxa* k'uéchóntani cuerpoéni ntíhi chjasintajni.

Tí tan tjanjon kjuaxróxin

¹¹ Méxra xikaha noheni chróchrakonhenni tí kjuachaxin jie kuénte Inchéni ntá tóxakonhenni tjáqoheni chojni kixin chrók'uincháónki sín ch'án. Ó nohe Dios kixin nkexrí tjejóni la ko tjinkaonni kixin kjaxinrá chrókónohará. ¹² Jehya kixin chrótjonkará inaá kixin jina ch'eni xra. Náhi. Jehí ntáchroni kixin síin nkehe chrókócháxinrá kixin tí jeheni ntoá chrónkani kixin chrókónohará nkexrí chrókjuáteherá tí sín imá nchehne sín kixin imá náxrjón nixja sín a ntá xraxinkakonhya sín tí jie chóna asén sín. ¹³ *A* ntá tí lóconi na mé tíha kixin tjinkaonni chrókjuíuch'eheni Dios xra. *A* ntá tí jehya lóco tí jeheni la mé jehí tjinkaonni chrókjuínkítsani tí jahará. ¹⁴ Kixin Cristo la imá tjeuhe kaín xín chojni ntá t'etuenhenni ch'án kixin ó noheni jina kixin jehó ch'án k'uenyákonhenni ch'án tí ijéni kaín ni kixin éxi kjaxinni ik'uénni kaín ni kixin jehe ch'án k'uenyákonhenni ch'án. ¹⁵ Mé xikaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuéntení chrókjuínchexiteyéheni. Náhi. Chrókjuínchexiteyéheni ch'án kixin k'uenyákonhenni ch'án la ko xechón ch'án inaá kixin tsaáxinni ch'án. ¹⁶ *A* ntá jie jeheni tjenkayáxinhyani éxi tjenkayáxin chojni chjasintajni ó. Kjánchó senó k'uéchóxinni Cristo kixin nkexrí kjuák'e ch'án chjasintajni ó, a ntá jie la xikahya t'ikonni ch'án. ¹⁷ Méxra tí nkexo tinkáchónki Cristo mé k'óna ijnko chojni nixin. *A* ntá kaín nkehe ntaxin la ó kjuixin k'uatásinka la ntá jie la kaín nkehe ó k'óna nixin.

¹⁸ Kaín tíha mé tí xra kjuíuch'e Dios. Jehe ch'án mé kjuanjon ch'án kjuaxróxin kixin jina chrók'uejókoni ch'án kixin k'uenyákonhenni Cristo. Ntá jie jeheni k'uáyéheni tí xra tsochénkani í so chojni kixin kjuaxróxin chrók'uejóko sín ch'án. ¹⁹ *A* ntá ó noheni kixin Dios ichr'án Cristo k'uenyákonhenni ch'án, ntá xikaha Dios tjinkaon kixin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuéntá kaín tí jie chóna chojni, a ntá jeheni k'uáyéheni tí xra tsjakoni itén ch'án. ²⁰ Ntá jeheni kjuachaxin kuénte Cristo chronkaxínni kixin Dios chrónóaxinrá ch'án tí jeheni. Mé xikaha tí kjuachaxin kuénte Cristo chrónóaxinráni kixin kjuaxróxin chrók'uejókoar Dios. ²¹ *A* ntá Cristo la ninkehó jie kjuasinhya ch'án, ntá ijéni k'uénxin ch'án. Kjánchó Dios k'uíkon kixin éxi tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

6

¹ Ntá kaín ni jnkokoá ch'eheni Dios xra, ntá chrónóaharáni kixin chrókuitjéhyará tí kjuasáyé Dios kjuakuaaxinrá ch'án. ² Kixin ntáchro xroon itén Dios kixin:

A ntá tí yaon kóxrjínhin Dios kuínhin ch'án tí nkehe chrónóa chojni;

Tí yaon tsaáxin chojni mé kjuínkítsa ch'án tí jehe sín.*

A ntá jie ó kui tí yaon kjueya Dios. *A* ntá jie ó kui tí yaon tsaáxin chojni.

³ Ch'ehyani ninkehó nkehe jínahya kixin ntá chrók'uantaxínhin sín tí xra tjejóch'eni. ⁴ Náhi. Kaín nkehe ch'eni tjáqoxínni kixin ch'eheni Dios xra. Na mé tjachani tóninkakonhyani

* 6:2 Isaias 49.8

kjónté nchónhya nkehe tjasótéxinni, la kjónté ichrén nkehe t'ichjánxinhinni, la kjónté ichrén kjuaxikaon síin. ⁵ Na mé k'ueékoni, la k'uejóchjani, la nchónhya k'uíxite chojni kóninkakonhenni sín, la ko tí xrá kjuich'eni la imá xrá. Kjaxin k'uájuaahyani la ko kjónehyani. ⁶ Tjakoqxinni kixin tjóá tjenkayáxinni, la ko tjakoqxinni kixin ó noheni tí nkehe chaxin, la ko tjakoqxinni kixin tóninkakonhyani, la ko tjakoqxinni kixin ch'eni tí jína. La ko chótani Nchakuen Dios, la ko kain asénni tjuèheni kichó ni, ⁷ la ko chrónkani tí tan ntoá kuènte Dios, la ko tjakoqxinni kixin chótani tí kjuachaxin kuènte ch'án. Ntoá tjejóni ntá xikaha tsjachani ntá kohya nkehe tsonhenni. ⁸ Iso sín náxrjón nixjehe sín tí jeheni la ko iso sín náxrjónhya nixjehe sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'ikon sín tí jeheni éxí chojni ch'ia la ko iso sín ntáchro sín kixin jeheni chojni ntoá chrónka. ⁹ Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté náxa tjejóchónni. Kjuateni sín na kjónté k'óyanhyani sín. ¹⁰ T'áváni la kjónté xraxinkaonni kixin Ìnchéni t'ayakonhenni la chéheni. Éxí nòani jeheni na kjónté chéankani itsjé chojni tí itén Dios tsaáxin sín éxí chróchjeheni sín ijnko nkehe imá tjete xikaha. Éxí chóntahyani ninkehó nkehe la kjónté la kain nkehe chótani.

¹¹ Kichóni tjejórá chjasin Corinto, ntoá chrónkani nixjahaaráni la ninkehó t'ayahyaráni la mé kain asénni tjuahará. ¹² Jehya jeheni chrók'uitjáyan kixin chrótjuahará. Náhi. Jahóra t'itjáyan kixin chrótjuèhérá tí jeheni. ¹³ Janhan xrjanóahará éxí ijnko it'é xjan chrónóehe tí xjeen ch'án kixin kjaxinrá kain asánrá chrótjuèhérá tí jeheni éxí tjuèheni tí jahará.

Jeheni mé éxí ninkoe Dios tjechón

¹⁴ Chrók'uitohyará tí sín tinkáchónkihya Ìnchéni kixin tíha mé éxí yóhe ijnko yunta, jnkokónhya koxinta. ¿La ko nkexrí chrók'óyóhe ijnko chojni ó kótjóá la ko ijnko chojni náxa náhi? ¿La ko nkexrí chrók'óyóhe tí t'inkáséyan la ko tí sitié? ¹⁵ Xitjahya chrók'uíxin kjuaxróxin tí tjen Cristo la ko tí Tsochren. Xitjahya ts'ejóko kichó ijnko chojni tinkáchónki Cristo la ko ijnko chojni tinkáchónkihya. ¹⁶ Xitjahya chrók'uito tí ninkoe Dios la ko tí nkehe tsíkjanoya. Kixin jeheni mé tí ninkoe Dios tjechón, kixin jehe ch'án tsintáchro ch'án kixin:

Ntaha tsjak'é la ko xritjak'é tí tjejó tí jehe sín,

á ntá janhan mé ts'óna Dios kuènte sín

la ko jehe sín mé ts'óna chjasin kuèntana.†

¹⁷ Méxra xikaha kjaxin ntáchro Ìnchéni kixin:

T'axrjekjanxínrá tí jehe sín na ókjé tjejórá;

tsehyará tí nkehe tjuáhya.

Á ntá janhan mé ts'ayáha tí jahará.‡

¹⁸ Ntá janhan mé ts'óna It'ará,

á ntá jahará ts'ónará xjanna ntoa la ko xjanna chjin,

ichro Ìnchéni Dios chóna kain kjuachaxin.§

7

¹ Mé xixaha kichó ni, tí nkehe i mé tsintáchro Dios tsjanjon ch'án. Méxra t'ichjánxin kixin tjóá chrók'uejóni, chrókuítóheni kain nkehe chrókjuinçekjita tí cuérpóeni la ko tí asénni. Ntá chrókóxakonhenni chróchraqnheni Dios la t'ichjánxin chrókjuancheheni ch'án chrókjuinchetjóáni ch'án kixin jehó ch'án chrókuinkáchónkini.

Tí sín Corinto kjuitoxínhin sín ntje sín

² Chrókjuánjonrá kjuachaxin kain asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuich'iyehyani ninkexró. ³ Jehya ntáchroni tíhi kixin chrókuékará jie. Náhi. Ó nohará kixin ósé chrónkani kixin kain asénni tjuèheni tí jahará kixin jnkokoá chrók'uejóni la ko jnkokoá chrók'uenni. ⁴ Janhan la imá tjikosáyahará tí jahará la ko imá chàna kixin jína tjejórá. Kjónté kain nkexrí tjejóntjasóteni na imá chàna.

⁵ Á ntá tió kjuíjini estado Macedonia la xitjahya chrók'ok'éheni kixin nkuíxin síin chojni ninkakonhenni la ko kóxakonhen asénni. ⁶ Kjánchó Dios na mé tí nkexro nchechéhe asén kain tí sín tsíkóxrxé mé kjuínchechéhe ch'án asénni kixin ó kjuíji ch'ín Tito. ⁷ Ntá jehya kixin tí kjuíji ch'án ó chrókóchéxinni. Náhi. Chéheni kixin jahará kjuínchechéhé ch'án. Chrónka ch'án kixin imá tjinkáonrá chrók'uíkonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuñhanrá. Mé kuññan kain tíha ntá ántsi má kóchána.

⁸ Kjuíntak'ávára kixin tí xroon kjian chr'anhánrá la kjónté la ntá jie í tóxakonahya. Na mé senó kóxakonna ntá k'uíkuan kixin tí xroon kjuíntakonhanrá kjánchó kánhyó isé tíha. ⁹ Ntá jie chàna, kjánchó jehya kixin tí nkehe kjuíntak'ávára. Náhi. Chàna kixin tí kjuat'áva á ntá

ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjnhin ch'án. Méxra xikaha jeheni la ninkehó nkehe jínahya kjuít'aharáni. ¹⁰ A ntá tí kjuat'ává kjuacha chojni ntá sinchechéhe sín Dios kixin kjuitóxinhin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxin. A ntá tí sín kuitoehya tí nkehe kuente chjasintajni mé t'ává sín kixin táhó ts'enxín sín. ¹¹ A ntá jahará kjuachará k'uátsínkará tí kjuat'ává éxi kóxrjnhin Dios, a ntá jie kónohará kixin jina tjejorá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuinchecónínkaonrá la ko kjaxin kjuínchechrakonrá. Ntá chr'éxin ntá tjínkáonrá chrók'uikonrá tí janhan. Ntá kjuínchekjásóterá tí nkexro kjuasin jie. Kaín tíha kjuákoxinrá kixin chontahyará ninkehó jie tí nkehe tsikónhen. ¹² A ntá tí nkehe kjian la jehya kixin kjuenkayáxian janhan kuente tí ch'ín kjuasin jie, la ko jehya kixin kjuenkayáxian janhan kuente tí ch'ín k'uává ó. Náhi. Íchá jina kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'uetóanni. ¹³ Mé xikaha kjuich'erá ntá kóchéheni.

Kjánchó antsí má kóchéheni kixin k'uíkoni kixin kóchéhe ch'ín Tito kixin jahará kaín rá kjuínkitsará kixin kjuaxróxin kjuák'e ch'án ntiha. ¹⁴ Janhan k'uetjanka tí ch'ín Tito kixin chána kixin tí jahará la jehya kjuach'ia tíha la kósuánahya. Náhi. Kaín nkehe k'uetjónkará la chaxín la ko kjaxin kain nkehe k'uéntátjan ch'ín Tito la chaxín kixin chéheni kixin kuitekáonrá. ¹⁵ A ntá jie antsí tjuahará ch'án kixin xráxinakon ch'án kixin nkexrí jina kuitekáonrá la ko nkexrí imá kjuíkósáyhérá ch'án kjuánjonrá kjuachaxin kuitohe ch'án ntiha. ¹⁶ Ntá imá chána kixin ó nóna kixin jahará sijnchexiteyánará.

8

Antsí má chrókjuínkitsa sín kichó sín

¹ Ntá jie kichó ní, tjínkaonni chrókónohará kixin nkexrí tí sín tinkáchónki Ìnchéni tójnokoté sín estado Macedonia kjuákoxin sín nkexrí tí kjuasáyé Dios. ² Kjónté nchónhya nkehe tsikónhen sín la kjónté la kóchéhe sín; la ko kjónté nòa sín la antsí má kjuínkitsa sín tí sín í so éxi chojni chóna itjsé chichaon xikaha kjuich'e sín. ³ Chaxín k'uíkuan kixin kjuanjon sín éxi tí nkehe chóna sín la ko antsí má xikjanjon sín inaá kixin xikaha kjuenkayáxin sín. ⁴ Nchónhya chrónógehe sín tí jeheni kixin chrókjuanjonni kjuachaxin kixin chrókjuínkitsa sín tí sín kichó ní tinkáchónki Dios. ⁵ Na mé antsí má kjuanjon sín la xikahya kjuenkayáxinimi kixin xikaha chrókjuanjon sín, na mé senó kuinkáchónki sín Ìnchéni, ntá kjuixin ntá kjuínchexiteyéhé sín tí jeheni éxi tóxrjnhin Dios. ⁶ Méxra chrónógeheni tí ch'ín Tito kixin chrókjuenájín ch'án chichaon tí tójnokoté ntiha éxi kjuankixin ch'án senó. ⁷ A ntá jahará la tjákoxinrá jina kixin antsí tinkachónkirá Ìnchéni, la ko antsí k'uitjará chrónkaxínrá itén Dios, la ko antsí k'uitjará nkehe kuente Dios, la ko antsí chontará kjuachéhé, la ko antsí tjuéhérá tí jeheni. Méxra xikaha antsí chrókjuákoxinrá tí xra jina chrókjuínkitsará tí sín kichó ní.

⁸ Jehya ntáxrjan tíhi kixin chrókuétuganhanrá xikaha. Náhi. Jehi tjínkavan chrókónohará nkexrí jina kjuich'e tí í so sín kixin kjaxínrá chrókjuákoxinrá kixin tjuéhérá kichuárá. ⁹ Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónòa ch'án kixin imá tjuèhe ch'án tí jahará kixin tí kónòaxín ch'án mé jahará kórikóxinrá.

¹⁰ Méxra tsotjónkará tí nkehe tjenkayáxian janhan kuente tí xra í kixin jahará tí nánó k'uátsínka kjuankixinrá kjuínkitsará kjuánjonrá nkehe, la mé jehya kixin ó jehi kjuínkitsará sín. Náhi. Kjaxin imá kócháhará kixin kjuínkitsará sín. ¹¹ A ntá jie chrókjuintaxín chrókjuánjonrá éxi tí chrókjuachará chrókjuánjonrá éxi xrankixixín tsikjatehéherá tsjinkitsará tsjánjonrá nkehe. ¹² Mé xikaha tí chaxín tjínkaon jnkojin chojni chrókjuanjon sín nkehe, ntá tsóxrjnhin Dios tí tjanjon sín tí nkehe chóna sín. Dios la tjanachahya ch'án tí nkehe chónahya chojni.

¹³ Jehya kixin xikaha tí í so sín chrók'uejó sín jina kixin tí nkehe kjuínkitsará sín la ntá jahará chrók'uitjáyan nkehe t'ichjánxinhanrá. Náhi. ¹⁴ Chrókójina chrókóyóge chróchontará nkehe jnkokón. A ntá jie jahará chontará tí nkehe chónahya tí í so sín. A ntá í jnko yaon jehe sín tsochóna sín tí nkehe tsochontahyará. Chrókjuínkitsará tí sín chónahya kixin chróchontará nkehe jnkokón. ¹⁵ Éxi ntáchro xroon itén Dios kixin: "Tí sín kjuenájín sín nchónhya la mé xéhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín.*"

Ch'ín Tito la ko tí sín k'uájiko ch'án

¹⁶ A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxi tóxakonna kixin tí jahará. ¹⁷ Ntá kóxrjnhin ch'án tí nkehe k'uetuénhenni ch'án, la ntá kjaxin jehe ch'án kóxakonhen ch'án kixin á jina tjejorá, ntá jehe ch'án tjínkaon ch'án chrókjuijitsjehe ch'án tí jahará.

* 8:15 Éxodo 16.18

¹⁸ Kjaxin k'uetqanni sátsjikotoxin tí ch'ín Tito í jnko kichó ni, na mé kaín chjasin tí sín tinkáchónki Ìnchéni mé chóxin sín ch'án kixin tí xra jina tjech'e ch'án tjako ch'án tí tan tsaáxinni. ¹⁹ La ko kjaxin tí sín kaín tí ñnko ntíhi kjueya sín tí nkeho kichó ni kixin sátsjikotoxin ch'án tí jeheni tí xra sátsjikoni tí chichaon tsjikéhhenni tí sín nò. Na mé tí xra ch'eni kixin xikaha tsjikosáyehe Ìnchéni la ko xikaha tjakoxxinni kixin tjinkaonni chrókjuinkitsani sín. ²⁰ Tjinkaonni kixin tsokohya nkexro chrók'uaántaxínhinni kixin tí chichaon xrenájín kjuíjikoni. ²¹ Méxra tjinkaonni chrókjuich'eni tí nkeho ntoá, jehya jehó tí nkehe chrókóxrjínhín Ìnchéni. Náhi. Kjaxin tjinkaonni kixin chrók'uikon chojni kixin jina tjejóch'eni.

²² La ko kjaxin k'uetqenhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuakoxin ch'án kixin chéhe ch'án chrókjuinkitsa ch'án kixin itsjé xra kjuich'e ch'án. A ntá jie antsí má chrókjuich'e ch'án xra kixin chóxin ch'án tí jahará. ²³ A ntá jnkojín sín tsjanchankí sín kixin nkehe tí xra ch'e ch'ín Tito la mé chenkará sín kixin jehe ch'án mé tjinkitsa ch'án tí janhan kixin xikaha tjinkitsa ch'án tí jahará. A ntá tí tsjanhankí sín kixin nkehe tí xra ch'e tí í so kichó ni ntá chenkará sín kixin sín kaín ñnko k'uetqan sín kixin sátsji sín ntiha kixin mé xikaha tsjikosáyehe sín Cristo. ²⁴ Méxra chrókjuakoxínra kixin chaxín tjehérá kichuará kixin tsonhe tí sín kichó ni í so ñnko la ko kjaxin tsonhe sín kixin chaxín chéheni kixin tí jahará.

9

Tí chichaon xrenájín tsjinkitsa tí sín kichó ni

¹ A ntá tí xrenájín chichaon kixin tsjinkitsará tí sín kichó ni tinkáchónki Ìnchéni, la t'ichjánxienhya tsokjian xroon tsochr'anhánra ² kixin xráxin kónona kixin jahará tjinkáonra chrókjuinkitsará, na mé xikaha chàna la tjanka tí sín tjejó estado Macedonia kixin jahará chojni estado Acaya desde tí nánó k'uaínsinka xráxin tjejórá tjinkáonra chrókjuinkitsará. A ntá antsí tsjé sín estado Macedonia tjinkaon sín chrókjuinkitsa sín kixin jahará xikaha kjuakoxínra nkexrí tjinkáonra chrókjuinkitsará. ³ A ntá ichr'an tí sín kichó ni kixin tjinkavan kixin tsontáchrohya sín kixin chaxínhya tí nkehe jina ntátjan sín senó. Mé xikaha jahará chrókóyaxínhanra chrókjuinkitsará tí sín kichó ni éxi ntátjan sín senó. ⁴ Kixin tí chrókjuasánkian iso tí sín Macedonia ntá tí chrókónoxín kixin naxa kohya nkehe tsjánjonra ntá chrókósuèheni tí jeheni kixin imá chóxinni kichó ni la ko kjá chrókósuahará kjaxínra. ⁵ Méxra xikaha tóna kixin t'ichjánxin tsontátjan tí sín kichó ni kixin sátsji sín tsitónxin sín ntá tsjijitsjehe sín tí jahará senó tsjinkitsa sín kixin tsjenájínra tí chichaon tsintáchorá senó kixin chrókjuánjonra. A ntá chrókóyaxínhanra kixin chrókjuánjonra tí chichaon éxi ijnko nkehe chaxín tjinkáonra chrókjuánjonra la jehya éxi ijnko nkehe chrókjuanchaharáni afuerza.

⁶ Xráxinkáonra kixin tí nkexro k'uenka tsjéhya na mé tsjéhya tsotjá. A ntá tí nkexro k'uenka itsjé mé tsotjá itsjé. ⁷ Méxra jnkojnko chojni chrókjuanjon tí nkehe kjuenkayáxixin sín asén sín. Na mé tjinkakonhya Dios kixin kénhya asénni chróchjéheni ch'án nkehe, kixin Dios mé tjehe ch'án tí nkexro chéhe tjanjon nkehe. ⁸ A ntá Dios chóna kaín kjuachaxin jie ntá tsotjáhará ch'án kaín nkehe t'ichjánxinhanra kixin tsochontará nkehe tsqchjehérá í so chojni chónthaha kixin xikaha sjch'erá kaín xra jina. ⁹ Éxi ntáchro tí xroon itén Dios kixin: Tí nkexro t'óxikayéhe ch'án itsjé nkehe nchekítqnhen ch'án tí sín nò

na mé nunca tsjejehya tí xra jina ch'e ch'án.*

¹⁰ Dios mé tjanjon noatje kixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanra la ko jehe ch'án sinchek'ánkí ch'án tí nkehe ts'énkará la ko jehe ch'án sinchek'ánkí ch'án tí xra jina tjejóch'erá. ¹¹ A ntá tsochontará kaín nkehe tjehe kixin ntá antsí tsjachará tsjinkitsará tí í so sín kichó ni. A ntá xikaha tsjijikenhenni sín tí nkehe tsqchjehérá tí sín kichó ni ntá tsjanchehe sín Dios kjuasáya. ¹² Kixin xikaha chrókjuinkitsará tí sín kichó ni na jehya kixin chrók'uaýéhe sín tí nkehe t'ichjánxinhnín sín ó, la mé kjaxin chróchjéhe sín Dios kjuasáya. ¹³ Mé xikaha tsjanchehe sín Dios kjuasáya kixin tí nkehe kjuánjonra kjuakoxínra kixin nchexiteyéhérá tí tan kuénte Cristo. Kjaxin tsjikosáyehe sín Dios kixin tí í so nkehe kjuánjonra k'uaýéhe sín la ko tí nkehe k'uaýéhe í so chojni. ¹⁴ La ko jehe sín tsjanchehe sín Dios kixin tsjinkitsa ch'án tí jahará kixin jehe sín tjuahará sín kixin t'ikon sín kixin tjákoxxínra kixin tí kjuasáye Dios chontará. ¹⁵ Tjancheheni Dios kjuasáya kixin kjuínchekítqnhenni ch'án ijnko nkehe imá jie tsaáxinni la tsjachahyani tsochronkaxínni kaín tíha.

10

Kjuachaxin chóna ch'ín Pablo kixin tsik'óna ch'án apóstol

* 9:9 Salmo 112:9

¹ Janhan Pablo tió xrjanóahará nkehe la jnkojína xrjanóahará la mé tjákoxian éxi toxrjínhiñ Cristo. Ntáchrorá kixin tió tjén tí tjejórá ntiha la tósuàna, a ntá tí kjín tjén la imá jiëna, ichrorá. ² Méxra xrjanóahará kixin tí tsjasántsahará tjínkakhonya kixin chrókujuinçekóninkáonráni kixin ntá tsonínkakhonhárá jnkojínrá kixin tsékaráni jië kixin ixria éxi chojni chjasintajni ó, tsixrorá. A ntá xra ó tsjasán tsjentuáha tí jehe sín. ³ Chaxín tjejóni éxi chojni ó, na kjánchó tió tjanjónni la tjanjonyani éxi tjanjón chojni chjasintajni. ⁴ Kixin tí nkehe xraáni tjanjónxinni jehya nkehe kuènte chjasintajni. Náhi. Táha la kjuachaxin kuènte Dios la tíha mé tsjacha sinček'itjáyán kaín kjuachaxin kuènte tí Jínaha. ⁵ Na mé tsjachani sinček'itjáyanni tí nkehe ntoáhya tjenkayáxin chojni la ko kaín nkehe nchehnkexín sín t'inkákonhen kixin chrókochoxin chojni Dios. A ntá kjuachaxin kuènte Cristo tjákoheñi kaín chojni kixin ntá tsitóhe sín kaín nkehe ntoáhya tjenkayáxin sín, a ntá chrókuitekakhonhen sín tí jehe ch'án ⁶ la ko tjejóchónhenni sinček'jasóteni kaín tí sín ntiha naxa tjinkakhonya sín chrókuinchehiteyá sín tí tsjixin tsonoheni kixin á chaxín tsjachará sinchehiteyará jína.

⁷ A ntá jahará tékaráni jië kixin tí nkehe t'ikonrá ó. A ntá tí nkexro tjenkayáxin kixin chaxín ch'ehe Cristo xra la mé kjáxin chrókuátsaon kixin kjáxinni jeheni la ch'eheñi Cristo xra. ⁸ A ntá tí chrókujuintahnkena ntsí kixin tí kjuachaxin chonta janhan ntá chrókosuánahya kixin Ìnchéni kjuanjón tí kjuachaxin kixin chrókujuínkítsa tí jahará kixin antsí chrók'uitjará kuènte Dios, la mé jehya kixin chrókujuíntak'itjáyánrá. ⁹ Tjínkakhonya éxi tjanjón chrókujuíntachrakonxínrá tí xroon chr'anhárá. ¹⁰ Kixin ntáchro sín kixin ixra la ko jiëhe tí nkehe ikjian janhan, a ntá tí chrókuak'é ntiha la jienáhya la ko kánhyó chonta janhan kjuachaxin tí nixja janhan. ¹¹ Kjánchó tí nkexro xikaha ntáchro chrókochohe ch'án kixin jnkokón nixja janhan éxi nixja tí xroon tsíkjan kjónté ikjín tjén la ko kjónté tí chrók'uejóni ntiha.

¹² Tjínkakhonyani chrókuenkayáxinni kixin chrókóyóheñi tí í so sín ntáchro sín kixin jína tí jehe sín. Jehe sín mé lontjín sín kixin ncheyóhe sín asén sín í so chojni. ¹³ A ntá jeheni la chrókuinchehnkexínhyani ijnko xra jehya xra kuènteni. Dios mé kjuako nketí sich'eni xra la kjuanjón ch'án kjuachaxin kixin kjuújini kjuíuch'eni xra tí tjejórá chjasin Corinto. ¹⁴ Jehya kixin chróchóntahyani kjuachaxin chrók'ueuáhanháráni. Tí chaxín jehya jeheni saoxín kjuújini tí tjejórá ntá xikaha chróchóntahyani kjuachaxin. Ntá náhi, kixin jeheni saoxín kjuújini ntiha kjuakoharáni itan kuènte Cristo. ¹⁵ Chrókuinchehnkexínhyani ijnko xra kjuíuch'e ókjé chojni éxi xra chrók'juíuch'eni jeheni. Náhi. Tjinkaonni kixin antsí chrók'uitjará tsinkachónkirá Ìnchéni ntá xikaha la antsí chrókujuínkítsani tí jahará kixin jehó tí xra k'uáyéheñi tjejóch'eni. ¹⁶ Kjáxin tjinkaonni chrókuakoni tí itén Ìnchéni chrókuaáxin chojni í so chjasin sáchrókjuini la ko kjáxin chrókuinchehnkexínhyani tí xra chrók'juíuch'e ókjé chojni.

¹⁷ A ntá jnkojín sín tjinkaon sín chrókuinchehnke sín ntá jehó chróntáchro sín kixin kjuachaxin Ìnchéni mé chóntha sín.* ¹⁸ Kixin tóxrjénhya Dios ijnko nkexro jehó chróntáchro kixin jína ch'án. Náhi. Ìnchéni mé tsontáchro ch'án nkexro chaxín jína.

11

Ch'in Pablo la ko tí sín chaxínhya apóstol

¹ Tjínkavan chrókuinhínrá ntsí tí lontjína. ¿Á chrókuachará chrókuinhínrá nkehe tsontáxrjan? ² Janhan tjínkakhonya kixin í jnko nkexro chrókuinkachónkirá. Kjáxin xikaha tjínkakhonya Dios. Ó ikjuá Cristo kixin chrókuakja ch'án tí jahará. Tjínkavan chrókuánjuan tí jahará chrókuakja tí jehe ch'án éxi yóhe ijnko tjan tjarisó chrókótehe jnkoá xii. ³ Tóxakonna kixin éxi tí konche tí kjuach'ia nkehe ntá kjuíuch'iyehé tjan Eva, ntá xikaha kjáxinrá jahará tsitohérá sit'ayahará ókjé chojni ntá tsitohérá tí nkexrí kaín asánrá tinkachónkirá Cristo. ⁴ A ntá jahará cháhará tjanjónrá kjuachaxin tjiji ókjé chojni ntiha chronkaxín sín í jnko Jesús ókjé jehya éxi tí chronkaxínni jeheni, la ko kjáxin cháhará k'uayehérá ókjé nchakuen jehya tí Nchakuen Dios k'uayehérá saó, la ko cháhará chrókuitekáonrá ijnko nkehe ókjé chrókuaáxinrá jehya éxi tí nkehe kuitekáonrá senó. ⁵ Ó nòna kixin chaxínhya ninkehó sínkílyana janhan, a ntá antsí sínkí tí sín chréhérá jahará, ichrorá. ⁶ Kjónté kánhyó náxrjón nixja janhan la jehya kixin kánhyó chrókónòna chrókuakua. A ntá tjioáxinrá jahará tíhi kixin kaín nkehe t'ha.

⁷ ¿Á ntoáhya kjuít'a janhan xrjanxaxián tí tan tsaáxinni kixin ninkehó kjuáncháhya chrókuacha la ko éxi ijnko chojni nóè kjuak'é janhan kixin tjínkavan chrókujuínkítsará chrók'uitjará? ⁸ Tí sín í so njnko kjuínkítsana sín kjuanjón sín chichaon k'uayáha kixin tsjak'é tsjáohará jahará. ⁹ Tí kjuak'é tí tjejórá jahará la kjónté t'itjáyán nkehe la ninkexró kjuáncháhya nkehe. Jehó tí sín kichó ní kjuíxin estado Macedonia kjuíkaó sín tí nkehe

* 10:17 Jeremías 9.24

t'ichjánxinna. Méxra t'jínkakonhya k'ixin chrótjahará xra t' jahará la ko xikaha naxa tjet'a jie. ¹⁰ Xikaha chaxin choxian t' tan chaxin ntoá kuente Cristo, a ntá kohya ninkexro nkuíxin estado Acaya tsjacha tsakitsjena t' kjuachéhe chonta. ¹¹ ¿Nkekuente xikaha ntáxrajan? ¿Á xikaha ntáxrajan k'ixin tjuahyará t' jahará ní? Náhí. Dios la ó nohe k'ixin imá tjuahará.

¹² Kjánchó ó Jehí tsjintaxin xikaha sít'a k'ixin t'jínkakonhya tsánjuan kjuachaxin k'ixin nchehnkexin t' sín ixri ntáchro k'ixin jnkokón kjuachaxin chóna t' nkehe tjákua la ko t' nkehe tjako sín. ¹³ Kjánchó jehe sín ijnko apóstol chaxínhya mé ch'ia sín ncheyóhó sín éxi chojni kjueyá Cristo. ¹⁴ Jehya ijnko kjuachrakon tíha k'ixin kjaxin ch'in Tsochren kjaxin xikaha ncheyóhe ch'an éxi ijnko ángel kuente t' t'inkaséyan. ¹⁵ Méxra xikaha kjaxin kuènnen t' sín ch'ehe t' Jínahya xra mé ncheyóhe sín t' sín jina. Ntá tsjixixin mé tsjasótéxin sín t' xra jínahya kjuich'e sín.

Kjuasóte ch'in Pablo k'ixin apóstol t' jehe ch'an

¹⁶ Ntáxrajan inaá k'ixin nijnkorá chrókjuenkayáxinrá k'ixin lócona. Kjánchó t' xikaha t'jenkayáxinrá la t'jtghérá tsonixja janhan éxi lócona k'ixin kjaxinna jina chrókjuintahnke ntsí. ¹⁷ T' xikaha ntahnkexián la jehya kjuachaxin kuente Inchéni ntáxrajanxian tíha. Náhí. Jehí éxi ijnko chojni lóco nixja. ¹⁸ A ntá nchónhya chojni sín nchehnkexin sín t' nkehe nohe sín a ntá jie la kjaxin janhan sjntahnke. ¹⁹ K'ixin jahará ntáchrorá k'ixin imá nohará ntá cháhará tjetó t' sín lóco. ²⁰ K'ixin t'jánjonrá kjuachaxin t'etuanhanrá sín la nchexiteyéhérá sín la ko taktisjahará sín t' nkehe chontará la ko ch'ena asén sín éxi inché sín t' jahará, la ntá kjoníehyará sín la ko t'jate sín nkaya ikonrá. ²¹ Kjóté chrókósuána tsontáxrajan k'ixin jeheni la kánhyó jjehe k'uetuanhanráni.

Kjánchó t' nkehe nchehnkexin sín la janhan ntahnkexián kjaxinna, kjóté ntáxrajan tíhi éxi ijnko chojni lóco. ²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'in Abraham? Kjaxin janhan k'uaxrjeníxian ch'an. ²³ Ch'ehe sín Cristo xra kjánchó janhan la antsí má la jehe sín la kénhyó, kjóté ntáxrajan tíhi éxi ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntóechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uíxin kjuaxikaon k'ixin chrók'uén. ²⁴ In'ó veces t' sín judío kjuatena sín la ko treinta y nueve t' kjuatjoté. ²⁵ Níya kjuatexinna sín inta la ko í jnko vez kjuak'e sín xro. Níya k'uániánki ntabarco ntá ntá ijnko yaon la ko ijnko tie t'jenkataván ntayaon. ²⁶ K'uájia má, k'uikuán kjuaxikaon chrók'uénxian t' ntarío la ko chrók'óyánna t' xíchee la ko chrók'óyánna t' sín chjasenná la ko t' sín tsíkjixin ókjé. K'uikuán kjuaxikaon t' chjasin jie la ko t' nteje la ko t' nteje la ko t' chrók'óyánna t' sín chaxínhya t'inkáchónki Inchéni. ²⁷ Kóxrjéna k'ixin t' xra kjuít'a la ko itsjé nkehe náxrxónhya kónna. Itsjé tie kjuak'échrinhya jina la ko itsjé yaon ik'uén kjinta la ko ik'uén ntá la ko itsjé yaon kjónehya ninkehó la ko kókinna la ko chontahya kaná.

²⁸ Kjóté kaín tíha la ko í so nkehe kónna la mé jnkoinjo yaon imá tóxakonna k'ixin kaín t' sín tójnokotsé sín kaín t' njnko. ²⁹ ¿Á t'jen jnkoinjíná níhará? A ntá t' xikaha la koína éxi nina. ¿Á t'jen jnkoinjíná kjuásíná jie? A ntá t' xikaha la kjaxin tóxakonna. ³⁰ T' chrókjuintahnkexian nkehe la mé t'jínkavan k'ixin Jehó chrókjuáqoxian k'ixin kánhyó jjeña. ³¹ Dios, It'é Inchéni Jesucristo, na mé t' nkexro chrórxaxinako jnkochr'ixín mé ó nohe ch'an k'ixin chaxin t' nkehe ntáxrajan. ³² Ntá t' kjuak'é chjasin Damasco la mé t' ch'in gobernador kjuich'ehe ch'in rey Aretas xra mé k'uetuènnen ch'an t' sín soldado k'ixin tsochónnen sín t' ntója t' chjasin k'ixin chrótséna sín chrókjuak'échjina. ³³ Kjánchó siín nkexro k'uínkajinxinna ijnko ntaxra ijnko ventana t' t'jat'o k'uantatjen chjasin la mé xikaha kuaána, tséhyana sín.*

12

T' nkehe k'uikon ch'in Pablo

¹ Ninkehó tsjachahya t' nkehe tsqxrajan ka kuèntana ó. Íchá jina tsqxrajan ka t' nkehe k'uikuán la ko t' nkehe kjuínchenóna Inchéni. ² Choxian ijnko nkexro t'inkáchónki Cristo. A ntá k'uátsínka catorce nánó sátsíkji ch'an t' níxin nkajní. Nonahya á sátsíkjiko ch'an cuerpo kuente ch'an ó asén ch'an ó. Jehó Dios mé nohe. ³ Méxra ó nóna k'ixin xikaha sátsíkji ch'an la ntá nonahya á koí cuerpo kuente ch'an ó asén ch'an ó. Jehó Dios mé nohe. ⁴ A ntá sátsíkji ch'an nkajní. La ntá t' palabra kuínhin ch'an la kohya kjuachaxin nijnko chojni tsochronka. ⁵ Jina chrókjuintahnkexián k'ixin xikaha kónhen t' nkexro a. A ntá t' chrókjuintahnkexián k'ixin kjuachaxin kuèntana la jehya jina tíha. Íchá jina chrókjuáqoxian k'ixin janhván la chontahya kjuachaxin. ⁶ T' chrókjuintahnkexián t' nkehe kónna la chrókólócohyana k'ixin chaxin t' nkehe chrórxrajan. Kjánchó xikahya t'a k'ixin t'jínkakonhya k'ixin xikaha chrókjuenkayáxin

* 11:33 Hechos 9.23-25

chojni kixin antsí jina janhan. Náhi. Tjínkavan kixin tí xra t'ikon sín la ko tí nkehe tinhin sín mé chrókjuenkayáxixin sín kixin á jina tí janhan, tsixro sín.

⁷ Méxra chrókjuintahnkexinyhana ntá xikaha xránjon kjuachaxin kixin chrók'uayáha ijnko kjuatjoté éxi ijnko ch'j kuikjiáte cuerpo kuéntana mé ijnko nkehe tsík'etuenhen ch'in Tsochren ikui kjuinçekjoténa. ⁸ Iní veces xrjanógha Inchéni kixin chrókjuatsen ch'an tí kjuatjoté chonta. ⁹ Kjánchó ntáchro Inchéni kixin jehó tí kjuachaxiэн ch'an chrókjuachaxin janhan. Kixin tí kjuachaxiэн ch'an antsí tsjakoxén chojni fuértehya. Méxra ntá chána kixin fuértehyana kixin ntá xikaha tsjakoxian tí kjuachaxin kuэnte Cristo. ¹⁰ Méxra chána kjónté fuértehyana la ko kjónté t'ántaxina sín la ko kjónté t'ichjánxinna nkehe la ko kjónté chónkina sín chrók'óyána sín la ko kjónté siín kjuaxikaon chrókjuasótexinna kixin tí tinkachónkia Cristo. Chána kixin fuértehyana na mé fuérte janhan kixin Cristo tinkachónkia.

Tóxakonhen ch'in Pablo kixin tí sín tjejó nínko chjasin Corinto

¹¹ ¿Á lócona kixin xikaha xrjanka? Kjánchó jahará kuitekákonhyará ntá xikaha xrjanka. Jahará chróchronkará xikaha kixin jina janhan. Jehya kixin kánhyó sinkína la ntá tí sín chréhérá la antsí sinkí sín. Náhi. Kjónté janhan la chaxin ninkehó sinkíhyana. ¹² Kjuásian itsjé kjuaxroan jié la jina kjuak'é kónínkakhonya kjuakoxian kixin chaxin janhan ijnko nkexro tsíkjeýá Inchéni. ¹³ ¿Xá k'uikuán tí jahará éxi kánhyó sinkírá a ntá tí í so nínko la antsí sinkí sín kixin tí kjuasán janhan la ninkehó xra tjaáhyará? A ntá tí xikaha ntoáhya kjuít'a la tónínkakhonyará.

¹⁴ A ntá ije ó yaxinna tí nixin vez chrókjuasántsahará la ko tjaáhyará ninkehó xra. Janhan la tjéyáhya tí nkehe chontará. Tí nkehe tjéýá janhan la mé jahará kixin jahará éxi yóhe xjanna t'ikuán. Méxra tí sín it'é xjan chrókjuenájín sín chichaon chrók'uayakuénxín sín xjeen sín. Jehya xra kuэnte tí xjan chrókjuenájín xjan chichaon chrók'uayakuénxín sín tí it'é xjan. ¹⁵ Tóxakonnaha kjónté chrókjuíntakjeje kaín nkehe chonta janhan o kjónté chrók'uénxian kixin tí jahará la jina chrók'uejorá. A ntá janhan imá tjuáhará la kjánchó éxi tona janhan kixin jahará kánhyó tjeúherá tí janhan.

¹⁶ Méxra kjónté janhan tjaáhyará ninkehó xra la kjónté xikaha ntáchrórá kixin kjuít'ayahará, ichrorá. ¹⁷ ¿Xá kjuít'ayahará kixin nkjojin sín ichr'an kjuíjitsjehe sín tí jahará? ¹⁸ Kjuáncháha tí ch'in Tito kixin tsjijitsjehe ch'an tí jahará la ko kjaxin kuétuanhan tí í jnko kichó ni sátsjikotoxin ch'an. ¿Á kjuít'ayahará ch'in Tito ní? ¿Á chaxínhya jina k'uejóni yóini ntiha kixin jnkokón Nchakuen Dios chóntani?

¹⁹ ¿Á tjenkayáxinrá kixin xikaha kjuáteheni kixin chóntani jié ní? Kjánchó xikahya. Dios tjetsjehe kixin nixjani éxi chojni tinkáchónki Cristo. Kíchóni tjuáhará la kaín tíha ntáxrjan kixin tjínkavan kixin antsí chrókuinkachónkirá Inchéni. ²⁰ Tóxakonna kixin tió tsjasántsahará la tsóxrjinnahya nkexrí tjejorá la ko kjaxinrá tsóxrjínnyará tí nkehe tsontáxrjan. Tóxakonna kixin naxa ts'ixin kjuanínkaon la ko naxa ts'ixin kjuachjínqoxínhin la ko tsónínkakhénhá kichuárá la ko chrókuétoanrá jahórá la ko naxa tsinkachónkirá kjuach'ia la ko naxa ts'ántaxínhínhá kichuárá la ko naxa chontará kjuahnke la ko jnkóqáhya tsjenkayáxinrá. ²¹ Tóxakonna kixin tió tsjasántsahará inaá la tí Dios kuэntana mé sinchesuána tí tjejorá la ntá imá tsotsjanka kixin itsjérá tsíkjasinrá jié tí ósé la naxa tjeúéhyará tí nkehe tjuáhya ch'erá la ko naxa tjeúéhyará chontará chojni chjin ókjé tjásinkoará jié la ko tjeúéhyará kaín tí í so nkehe jínahya k'uejich'erá ósé.

13

Nhexraxinkaon ch'an sín la ko tsjixixín nixja ch'an

¹ A ntá jié la níyáxin tsjasántsahará. A ntá tí kaín nkehe tjínkáonrá tsónona la mé chróchrónka yaá o iy'á chojni tsík'ikonxín kon sín tí nkehe tsikónhen. ² Nixjahá tí sín tsíkjasin jié ósé, la ko nixjahará kaín rá kixin kjónté ikjín tjén la inaá nixjahará éxi nixja tí kjuak'é k'uejóni tí iyó kjuasántsahará kixin tió tsjasán inaá la í tsikonóghya tí sín kjuasin jié. ³ Jahará tjínkáonrá tsinhínrá á chaxin níxjaxian kjuachaxin kuэnte Cristo. Jehya kixin Cristo tsjachahya tsjakoxin ch'an tí kjuachaxiэн ch'an tí tjejorá ntiha. Náhi. Chaxin tjakoxin ch'an tí kjuachaxin chóna ch'an tí tjejorá ntiha. ⁴ Chaxin tí k'uénxín ch'an tí ntacruz la mé éxi chóntahya ch'an kjuachaxin. Kjánchó ije tjechónxin ch'an tí kjuachaxin kuэnte Dios. Kjaxinni jeheni éxi kjuak'é ch'an k'uéchéntahyani kjuachaxin la ntá ije tinkáchónkini tí jehé ch'an la tjejóchónxinni tí kjuachaxin kuэnte Dios kixin jina tsjinkítsani tí jahará.

⁵ Jahará chrókjuenkayáxinrá á nchoxon tjejorá, á kaín asánrá tinkáchónkirá Inchéni. ¿Á noahyará kixin tjejokoará Jesucristo? A ntá jahará tsónohará á chaxin tinkáchónkirá o náhi. ⁶ Kjaxin tjínkavan chrókónohará kixin jeheni la jehya chojni chaxínhya tinkáchónki Inchéni. ⁷ Nixjeheni Dios kixin chrókuíteghya ch'an tí jahará kixin ninkehó nkehe jínahya chrókjuich'erá. Jehya kixin chrókjuakoxiní kixin jina tí jeheni. Náhi. Jehí tjínkaonni kixin

jahará chrókjuich'erá nkehe jína. Ántosénni kjónté tsóntáchro sín kixin chóntani jie. ⁸Ninkehó nkehe chrókjuich'eni kixin chrókjuinche'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín. ⁹Méxra chrókóchéhēni tí t'ichjánxinhya imá chrók'ueŋoanni, tí chaxín jína chrók'uejorá. Ntá naxa tsonixjehēni Dios kixin chrókjuixraká chrók'uejorá ntoá. ¹⁰Mé xikaha ikjian tíhi senó naxa tsjasántsjáhyará ntiha kixin ntá tíó tsjasán la ts'ichjánxinhya naxa sínchekóninkáonrána tsoníxjaxiān tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókjuintak'itjáyanrá. Náhí. Kjuanjon ch'án tíha kixin jahará ántsí chrókuinkachónkirá Ìnchéni.

¹¹Na ntá kichó ni, chrókócháhará. Tjéyará kixin jína chrók'uejorá. Chrókjuinchechéhérá kichuára la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án. ¹²Nixjehérá kichuára jnkójina la tsehérá tja kichuára. ¹³À ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkitsará kaín rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí nínko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjueyána la ko jehya chojni ichr'ánna. Náhí. Kjueyána Jesucristo la ko It'éni Dios, mé tí nkexro kjuínchexechón Jesús. ² Janhan la ko kain tí sín kichó ni tjejókoni ntihi ikjinni tí xroon ts'áyéhe tí nínko síin estado Galacia. ³ Tjancheheni It'éni Dios la ko Ìnchéni Jesucristo kjuasáyé ch'án chrókjuíncheyaoaná ch'án la ko chrók'uayéherá tí kjuaxróxin kuénte ch'án. ⁴ Jesucristo mé k'uenyákonhen ch'án ijíeni ntá kuaáxinni la mé ijie tsjachahya tí nkehe jínahya síin chjasintajni tsjachroeni mé xikaha tjínkaon It'éni Dios. ⁵ Tjánháha Dios kjuasáya jnkochrínín mé xikaha tsoxiteyá. Amén.

Kohya í jnko tan tsaáxinni

⁶ Janhan tóxakonna kixin jahará imá tjoka tinkakjtoherá Dios kjueyará kjuasáyé Cristo. Jahará la tjoka ó kjuankixínrá chréhérá ókjé tan chrókuaáxinrá. ⁷ A ntá chaxínhya xikaha. Kohya í jnko tan tsaáxinni. Jehí iso chojni tjínkaon nchexakonhanrá la ko tjínkaon sín chrókjuítóxinhin sín tí tan chrókuaáxinni kuénte Cristo. ⁸ A ntá tí jnkojín nkexro chrókjuakohará ókjé tan chrókuaáxinrá yóghya tí nkehe ó kjuakoni la tí xikaha la Dios mé sinchekjasóte tí sín kixin xikaha sich'e sín, kjónté á janhan o ijnko ángel chrókjuixín nkaya nkajni. ⁹ Senó xrjanka la inaá tsoxrjanka kixin jnkojín nkexro chrókjuako ijnko tan ókjé tsaáxinrá yóghya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyáhya kixin chrókóxrjínhin chojni tí xra t'a. Náhí. Tjínkavan kixin Dios mé chrókóxrjínhin tíha. Tí chrókójtínkavan chrókóxrjínhin chojni ó a ntá xikaha la jehya ijnko nkexro ch'ehe xra Cristo.

Ch'ín Pablo k'óna ijnko chojni tjako itén Dios

¹¹ Jahará kichó ni chrókónohará kixin tí tan tjàkua tsaáxinni mé jehya ijnko nkehe kjuenkayáxin chojni ó. ¹² Jehya chojni chjina tí tan la jehya chojni kjuakona. Náhí. Jesucristo mé kjuakona.

¹³ Jahará la kjá ó kuinhínrá nkexrí k'uékjak'é tió naxá k'u'échráha tí sín judío. Ó nohará kixin k'u'échonkíha tí sín tinkáchónki Ìnchéni la ko tjínkavan chrókjuíntak'itjáyán sín.* ¹⁴ Tí naxá k'uék'ájikian tí sín judío la antsí má k'u'éónna. A ntá kain tí sín chjasenná jnkokón nánó k'u'échontakian sín la kánhyó k'u'énohe sín. Antsí má k'u'ékítekavan tí nkehe k'uék'etóan tí sín tsík'axrjenixinni. ¹⁵ Kjánchó Dios kjueyána kjónté naxá tókjinahya la kjuasáyé ch'án kjueyána ch'án kixin xikaha kóxrjínhin ch'án. ¹⁶ Kjuínchenóna ch'án nkexrí tjen tí Xjeen ch'án kixin tsjakoha tí sín jehya judío tí tan tsaáxinni. Tió kjueyána Dios la ninkexró kjuakonahya. ¹⁷ La ko kjáxin kjuítsjáhya janhan tí sín tsík'óna apóstol síin chjasin Jerusalén. Náhí. Janhván tuénxín sákjuia chjasin Arabia, a ntá chr'éxin íkjan tí chjasin Damasco.

¹⁸ A ntá iní nánó chr'éxin na ntá sákjuiyá chjasin Jerusalén kixin tsochoxian ch'ín Pedro la ntá ntiha mé kjuák'ekjan ch'án quince yaon. ¹⁹ Kjánchó k'uíkqhya tí í so sín apóstol. Jehó k'uúkuan ch'ín Jacobo kichó Ìnchéni. ²⁰ Ó tjetsjehe Dios kixin tí nkehe ikjian la mé chaxín tíha.

²¹ A ntá chr'éxin ntá sákjuia nó estado Siria la ko Cilicia. ²² A ntá tí sín kichó ni tinkáchónki Cristo tjejó estado Judea la naxá tjatsqanhyana sín. ²³ A ntá ó kuínhón sín kixin tí nkexro k'u'échréhe sín chrók'óyán sín la ntá ijie mé tjako tí tan chrókjuínchek'itjáyán ch'án. ²⁴ A ntá ijie tjanchia sín kjuasáya kixin janhan ó tinkachónkia Ìnchéni.

2

Tí iso sín kjueyá Jesús k'uáyéhe sín ch'ín Pablo

¹ La ntá catorce nánó chr'éxin ntá sákjuiyá chjasin Jerusalén inaá la sákjuikian ch'ín Bernabé la ko kjáxin ch'ín Tito. ² Sákjuiyá ntiha kixin Dios kjuínchenóna kixin sáchrókjuiyá. Ntiha chjasin Jerusalén la kójnkséskoni tí sín t'etóan núnko ntiha la ntá xrjankaxián nkexrí tí tan tsaáxinni tjákoaha tí sín jehya judío. Mé xikaha kjuít'a kixin janhan tjínkavan jnkokoqá chrókjuenkayáxinni kixin ntá tí xra kjuít'a la jehya chrókóchónkó. ³ A ntá kjónté tí ch'ín Tito kjuák'ekjan ch'án la jehe ch'án mé griego ch'án la k'uétuqhya sín kixin chrókua ch'án xroye. ⁴ A ntá iso tí sín kichó ni chaxínhya tinkáchónki Ìnchéni k'u'éjókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuénte Cristo chóna kjuachaxin. A ntá jehe sín tjínkaon sín kixin chrókjuínchexiteyeheni inaá tí nkehe k'uék'etóan

* 1:13 Hechos 8.3; 22.4-5; 26.9-11

tí ley. ⁵ A ntá tahyani kuente nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etóan kjuakónahya sín ninkehó. A ntá jeheni la tahyani kuente á chojni t'etóan o náhi kixin Dios la jnkokón t'ikon ch'an kaín chojni. ⁷ A ntá kjuátsóan sín kixin Dios ó chjina tí xra tjákoḡa tí sín jehya judío tí tan jina éxi yóḡe tsíchéhe Dios xra ch'in Pedro tjákoḡe ch'an tí sín judío. ⁸ Tí Dios tsík'etuñhen ch'in Pedro ts'óna apóstol tsjákoḡe ch'an tí sín judío la ko kjaxin tsík'etuñna ch'an ts'óna apóstol tsjákoḡa tí sín jehya judío.

⁹ Méxra ch'in Jacobo la ko ch'in Pedro la ko ch'in Juan, mé tí sín t'etóan kuente njnko, mé kjuátsóan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xra la itsé sín tjani la ko itsé sín itja ch'in Bernabé. Ntá kjuenkayáxinkoni sín kixin jeheni la tsjákoḡeheni tí sín jehya judío la jehe sín nachrohe tsjákoḡe sín tí sín judío. ¹⁰ Jehó k'uetóan sín kixin tsoxraxinkaonni la ko tsotjuéheni tí sín ña la xráxín tóxakonhenni sinchexiteyáni tíha.

Ch'in Pablo kjuentuéhe ch'an tí ch'in Pedro chjasin Antioquia

¹¹ A ntá tíó kjuíji ch'in Pedro chjasin Antioquia la kjuentuáḡa ch'an kixin ntoáhya kjuích'e ch'an. ¹² Senó k'uekjineko ch'an iso chojni kjónté jehya sín judío. Ntá ikui iso sín kuixín tí tjen ch'in Jacobo. A ntá kjuankixin k'uaxrjenta ch'an la kuitóḡe kjónekohya ch'an tí sín jehya judío a. Xíkaha kjuích'e ch'an kixin chrakónhen tí sín kui kixin tí sín neko ch'an naḡa tsíkaha sín xroye. ¹³ Tí iso sín kichó ni judío kjaxin kuítekakónhen sín tí ch'in Pedro kjónté ntoáhya kjuenkayáxin ch'an. Kjaxin ch'in Bernabé la kjuacha kjuachroe sín ch'an kixin tí nkehe ntoáhya kjuích'e sín. ¹⁴ A ntá tíó k'uikuñ kixin tí nkehe kjuakóxin sín la tóyóḡehya tí chrónka tí tan jina tsaáxinni tjako sín la ntá nixjaha tí ch'in Pedro nkayakon kaín tí sín tsíkójnkotsé. Ntáxrañ kixin: “Jaha mé ijnko chojni judío la kjónté itjen éxi jehya ijnko chojni judío. ¿A ntá kuente tétuñhén tí sín jehya judío kixin chrók'uejó sín éxi chrókóyóḡe tí sín judío?”

Tí sín judío la ko tí sín jehya judío la jnkokón tsaá sín kixin chóna sín fe

¹⁵ Jeheni la k'uaxrjenixinni chojni judío desde tí kokjéxinni la jeheni na chónahyani jie éxi tí í so chojni chónhya Dios. ¹⁶ Kjónté xíkaha la ó noheni kixin tsotjuáxinhya ijje chojni tí nkehe tsík'etóan ch'in Moisés. Jehó tí sín tinkáchónki Jesucristo mé tsotjóá ijje sín. Méxra kjaxinni tinkáchónkini Jesucristo kixin tjinkaonni sinchetjóá ch'an ijjeni kixin titekaonni ch'an. Méxra ninxeró tsjákhya tsotjuáxin ijje sín kixin chrókjuinchexiteyéhe sín tí nkehe t'etóan tí ley.

¹⁷ Tí tjinkaonni tinkáchónkini Cristo kixin tsotjuáxin ijjeni, a ntá jeheni kjaxin xraxinkaonni kixin ó kjuasinni jie. A ntá í jehya Cristo k'uetóan kixin chrókjuasinni jie. Kjá chaxín náhi. ¹⁸ Tí kuitóḡeheni tí ley la ntá naḡa chrókjanni chrókuiinkáchónkini tí ley inaá la tíha la ó jie kuéntení tíha. ¹⁹ A ntá tí ley la kjuanchia jie k'uénxian. A ntá jie la tjéchuñ kixin tinkáchónkia Dios. ²⁰ Janhan la ó tsík'en kixin ó k'uénkian Cristo. A ntá jie la janhya tjéchuñ. Cristo mé tjéchónxin tí janhan. La ntá jie la tjéchónxian tí cuerpo chonta kixin tinkáchónkia tí Xjeñ Dios kixin jehe ch'an la tjuña ch'an la k'uenyákonhenni ch'an. ²¹ Tjinkakonhya tsjanoá tí kjuasáyé Dios. Tí chrókótjuáxin ijje chojni tí ley tsík'etóan ch'in Moisés, a ntá ó chónkó ik'uén Cristo tí xíkaha.

3

Tí ley o tí fe

¹ Jahará kichó ni gálatas imá lontirá. ¿Nkexro kjuít'ayahará? Kixin tí nkehe kjuákoḡará mé kuinhínrá kixin Cristo k'uénxín tí ntacruz k'uenyákonhenni ch'an. ² Jnkokoḡá nkehe tjinkávan chrókjuateherá. ¿A k'uayéxínrá Nchakuen Dios kixin kuítekáonrá tí nkehe tsík'etóan ch'in Moisés o á k'uayéxínrá Nchakuen Dios kixin kuítekáonrá tí tan chrónkani kuinhínrá? ³ Imá lontirá jahará. Tí kjuankixixínrá la kuítekáonrá kjuachaxiñ Nchakuen Dios. A ntá jie la tjinkáonrá jahorá sinchekjintaxínrá tí xra. ⁴ ¿A chónkó kaín tí nkehe tsík'atsínkará? Kjá chrókjuinkitsa chrókjuích'e xra tíha. Jehya chónkó tí nkehe kjuasótiaxínrá. ⁵ ¿Nkekuénté kjuanjon Dios tí Nchakuen ch'an la ko kjuasin ch'an kjuaxroan k'uíkonrá? Jehya k'uayéxínrá tíha kixin kuítekáonrá tí nkehe tsík'etóan tí ley. Náhi. K'uayéxínrá tí nkehe kixin kuinkachónkirá tí tan kuinhínrá.

⁶ Ch'in Abraham kuítekaon tí nkehe k'uetóan Dios ntá Dios k'uíkon kixin jina ch'an. ⁷ Méxra chrókónohará jahará kixin tí sín chaxín tikínixin sín ch'in Abraham a mé tí sín a chaxín tinkáchónki Dios. ⁸ Tí xroon itén Dios mé chrónka kixin tí sín jehya judío mé sinchetjóá Dios ijje sín kixin tsinkáchónki sín ch'an. Mé xíkaha Dios mé chénka ch'in Abraham óse tí tan jina, ntáchro ch'an kixin: “Ijnko nkexro ts'axrjenixin tí jaha mé tsoyaonxin kaín nación.”* ⁹ Mé xíkaha kjaxin kaín sín tinkáchónki Dios mé tsoyaon sín jnkokón éxi kóyaon ch'in Abraham kixin kuítekaon ch'an.

* 3:8 Génesis 12.3

¹⁰ Kaín sîn jehó tinkáchónki tí nkehe tsík'etöan ch'ín Moisés la tsjasóte sîn kixin ntáchro xroon itén Dios kixin: "Tsjasóte kaín tí sîn tsjachahya sinchexiteyéhe tí nkehe tsík'etöan tí xroon chóna ley."† ¹¹ Ntá ó ntoá ntáchro kixin kohya nkexro tsotjuáxin ijíé sîn tí tsítekaon sîn tí ley. Xroon itén Dios ntáchro kixin: "Tí nkexro tsíkótjóa lá tjejóchónxin sîn kixin tinkáchónki sîn Dios."‡ ¹² Ntá tí chrókuinkáchónkini tí ley tsík'etöan ch'ín Moisés lá chrókuinkáchónkiyhani Cristo. Ntáchro xroon itén Dios kixin: "Tí nkexro sinchexiteyá tí ley lá táhó chrók'uejóchónxin sîn."§

¹³ A ntá Cristo kjuatsen ch'án kaín tí chrókjuasótexinni tí ley. Tí náhi lá chrókjuasóteni kixin chrókjuachahyani sinchexiteyéheni tí ley. Jehe ch'án kjuenka ch'án tí ijíeni kixin k'uenyákonhenni ch'án. Ntáchro xroon itén Dios kixin: "Kaín tí chojni chóna jie ts'ejótjjan sîn ijnko nta ntá its'en lá mé xíkaha k'uáyéhe sîn tí kjuanínkaon kuente Dios."* Mé xíkaha k'uúkon sîn tí ch'ín Jesús. ¹⁴ Mé xíkaha kónhen kixin ntá tí nkehe chénka Dios tí ch'ín Abraham senó mé ts'áyéhe tí sîn jehya judío kixin kjuachaxién Cristo Jesús. Ntá xíkaha kaín ní ts'áyéheni tí Nchakuen Dios kixin tinkáchónkini ch'án mé xíkaha tsintáchro ch'án.

Tí ley lá ko tí nkehe kjuanjon Dios

¹⁵ Kichóni, tíhi mé sintayóaxian kuente chojni ó. Tió ijnko chojni ch'éna ijnko xroon tsochóna firma kuente sîn lá ntá xitjahya ts'óxika í jnko nkexro lá xitjahya í jnko nkexro sich'éna í so nkehe. ¹⁶ A ntá Dios mé tsíkjo ch'án tí ch'ín Abraham kixin tsjanjon ch'án nkehe ts'áyéhe tí nkexro ts'axrjenixin ch'án. Tí xroon itén Dios ntáchrohya kixin kaín nkexro ts'axrjenixin ch'ín Abraham chrók'ueyéhe tíha. Náhi. Ntáchro kixin ts'áyéhe jnkokoá nkexro ts'axrjenixin ch'án lá mé Cristo tíha.† ¹⁷ Méxra xrxanka tíhi. Dios chénka tí ch'ín Abraham ijnko nkehe chaxín lá tsoxiteyá tíha kixin éxi yóhe ijnko xroon chóna firma tíha. A ntá cuatrocientos treinta nánó chr'éxin lá ntá ikui tí ley k'uéchronka ch'ín Moisés. Lá ntá kjónté xíkaha lá xitjahya tsóxika tí nkehe tsíchronka Dios o tsontáchro chojni kixin tjetoanhya tí nkehe tsintáchro ch'án.‡ ¹⁸ Tí chrókjuanjon Dios nkehe kixin chrókjuinchexiteyáni tí nkehe k'uetöan tí ley lá ntá tí nkehe tsintáchro Dios senó mé chróxiteyáha. A ntá Dios mé tsíchénka ch'ín Abraham kixin sinchekjtonhen ch'ín Abraham tí nkehe kjuasáyé ch'án.

¹⁹ ¿A ntá xíkaha lá nkehe tsonhen tí ley tsík'etöan ch'ín Moisés? Chr'éxin kjuanjon Dios tí ley kixin tsonoxéinni nkehe tí jie tjasinni. K'uetöan Dios sinchexiteyéhe chojni tí nkehe tsík'etöan ch'ín Moisés tsijia tí nkexro ts'axrjenixin ch'ín Abraham, mé tí nkexro kjueyá Dios kixin xíkaha tsoxiteyá tí nkehe chrónka ch'án. A ntá tí ley mé chrónka tí sîn ángel ntá k'uáyéhe ch'ín Moisés lá ó chrónkaxón ch'án. ²⁰ A ntá tí nixjehe Dios tí ch'ín Abraham lá jehó ch'án lá ko jehó Dios lá méxra t'ichjánxinhya í jnko nkexro.

Tí xra kuente tí ley

²¹ ¿A ntá á chrók'uaxrxjén kixin tí ley tsík'etöan ch'ín Moisés chrókjuanjonko tí nkehe tsjanjon Dios? Kjá náhi. Tí chrók'uixin ijnko ley chrókjuanjon kjuachón lá ntá chrókótjuáxin ijíeni tí chrókuitekaonni tí nkehe t'etöan tí ley. ²² A ntá tsintáchro xroon itén Dios kixin tí jie mé t'etuenhen kaín xín chojni kixin ntá tí sîn chrókuinkáchónki Jesucristo ntá chrók'ueyéhe sîn tí nkehe tsíchronka Dios.

²³ A ntá tí naxá kuihya Cristo lá ntá tí ley lá k'uetuenhen kaín ní lá k'uejóchónhenni kixin chrókónoxín tí nkehe chrókuinkáchónkini. ²⁴ Tí ley lá éxi ijnko maestro kuente chánjan k'uetöan. A ntá jie ikui Cristo lá jehe ch'án mé kótjuáxin ch'án kixin titekaonni ch'án. ²⁵ A ntá ijie ó titekaonni Cristo lá í nchexiteyéhyani kaín ní nkehe t'etöan tí ley.

²⁶ A ntá jahará ó k'onará xjen Dios kixin ó tinkáchónkirá Jesucristo. ²⁷ Kainrá kuíkitiáxinrá kjuachaxién Cristo mé xíkaha jehe ch'án kótjuáxinrá ch'án. ²⁸ A ntá jehya tjetoan á chojni judío ó á chojni jehya judío ó á chojni ch'exón xra o á chojni t'etöan ó á chojni ntoá o á chojni chjin. Kainni lá ó k'onani jnkokoá kixin tinkáchónkini Cristo. ²⁹ A ntá tí tinkáchónkini Cristo chaxín lá ntá tí xíkaha ó chaxín tsík'axrjenixinni ch'ín Abraham lá ts'áyéheni tí nkehe tsíchronka Dios.

4

¹ Mé xíkaha ntáxrxjan tíhi. A ntá ijnko chánjan tió chrók'uen tí it'é ntá chrókuitegoko tí nkehe kuente tí it'é lá jehe ch'án lá tóyóhó ijnko nkexro ch'exón xra kixin tí jehe lá xitjahya t'etöan xra kjónté chaxín kuente ch'án kaín ní nkehe a. ² Siín nkexro t'ayakonhen ch'án lá t'etöan tí xra kuente ch'án tsjixrakájia tí yaon tsintáchro tí it'é. ³ Mé xíkaha kónhen tí jeheni. Kixin tí naxá k'uechánjanni lá kuitekaonni kaín ní nkehe kuente chjasintajni. ⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjenixin ch'án ijnko chojni chjin. Lá kjuinchexiteyá ch'án kaín ní nkehe tsík'etöan tí ley kuente Moisés. ⁵ Ikui ch'án xíkaha kixin

† 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5 * 3:13 Deuteronomio 21.23 † 3:16

Génesis 12.7 ‡ 3:17 Éxodo 12.40

tsaáxinni ch'án kjónté senó k'uék'etuñhenni tí ley. A ntá jie la chrók'uáyéhe Dios tí jeheni éxi xjeen ch'án.

⁶ A ntá kjuakoxin Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochónta asénni la tí Nchakuen ch'án mé t'èyaxin: “It'èni jaha mé kuéntá tí jeheni.”
⁷ Méxra xikaha jahará la jehya ijnko nkexro ch'exón xra. Náhí. Jahará mé xjeen Dios. Jahará mé xjeen ch'án la jehe ch'án tjinkaon sinchekjtonhanrá tí nkehe kuénte ch'án kixin tinkachónkirá Cristo.

Ch'in Pablo tóxakonhen ch'án kixin tí sín tinkáchónki Ìnchéni

⁸ Ósé la jahará k'uéchonhyará Dios la kjuinchesteyéhérá tí dios chaxínhya. ⁹ A ntá ijie la ó choxínrá Dios, o íchá jína chróntáchroni kixin Dios la ó chóxin ch'án tí jahará. A ntá jehya jína kixin naça chrókuinckachónkirá inaá tí nkehe chóntahya kjuachaxin la ko tí nkehe chónkó kixin tí xikaha naça chrókuinchesteyéhérá tí nkehe tinkáchónki chojni. ¹⁰ A ntá jahará la tjásinrá kia ichrén tí yaon la ko tí nitjó la ko tí yaon kia tí nánó. ¹¹ Imá tóxakonna kixin á chónkó tí xra kjuat'a kjuakohará.

¹² Kichóni, xrjanóahará kixin chrókóyohará éxi tí janhan kixin janhan mé tóyóhe éxi k'uejorá senó kixin t'etuñhyani tí ley. Janhan la tékahyará ninkehó jie. ¹³ Ó nohará kixin tió saoxin kjuakohará tí tan tsaáxinni la k'uétsankahyana kixin k'uénina k'uéchonta ijnko chin k'uékjínckejoténa. ¹⁴ Kjónté xikaha k'uénina la jahará kjuanoahará tí janhan la k'uéchontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxi chrók'uayéhérá ijnko ángel kuénte Dios o éxi chrók'uayéhérá jehe Ìnchéni Jesucristo mé xikaha kjuak'é jína ntiha. ¹⁵ ¿Nkehe kónhen tí kjuachéhe k'uéchontará? Kixin ntáxrjan kixin jína tí jahará kixin tjínkáonrá kjónté ikonrá chrókuakítsjerá chróchjinará tí janhan. ¹⁶ A ntá ijie la, ¿á ninkákónnará jehó kixin kuinhínrá tí nkehe ntoá xrjanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuítóhérá tí jeheni kixin ntá tjinkaon sín kixin jahará chróchréhérá tí jehe sín. ¹⁸ Jína chrókótjínkáonrá tí í so sín kjánchó ntoá chrókjuenkayáxinrá kixin jehya tí chrókuak'é tí tjeorá ó chrókuítekáonrá jína. ¹⁹ T'íkonní tí jahará éxi xjeenni. Ijie la imá kjuíncheníhi asenná kixin tóxakonna tí jahará. Éxi yóhe ijnko iné xjan tsjoté tjan tió sinchekokjíhi tjan xjeen tjan mé xikaha janhan la naça tsjasótena kixin tjínkavan kixin Cristo chrókuinckejoténa tí jahará. ²⁰ Chrókójina ijie naça chrókuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuínckeyóxin ch'in Pablo tí tjan Agar la ko tí tjan Sara

²¹ A ntá jie chrónkará nkehe. Jahará naça tjínkáonrá chrókuinchesteyéhérá tí ley tsík'etqan ch'in Moisés la ¿á kuiénhyará nkehe chro tí ley? ²² Ntáchro kixin ch'in Abraham mé chónka ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjien ch'án mé ijnko tjan t'ítuenhya.* ²³ Tí xjeen tjan ch'exón xra kokjíhi ch'án éxi tokjíhi chojni ó. A ntá tí xjeen tí tjan t'ítuenhya la mé ó kokjíhi ch'án kixin tsoxiteyá tí nkehe tsintáchro Dios. ²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsík'etqan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxi chojni ch'exón xra tí jehe sín kixin t'ítuenhen sín. ²⁵ Mé xikaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kixin tí chjasin la ko tí sín tjejó ntiha la mé t'ítuenhen sín la ko kaín xjeen sín. ²⁶ A ntá tí chjasin Jerusalén itjen nkaya nkajní la mé t'ítuenhya. Náhí. Mé jeheni la kuénteni tíha. ²⁷ Ntáchro xroon itén Dios kixin:

Jaha chojni chjin chontahya chánjan kjónté chrokócháha.

Jaha k'uikonyha ninkehó kjuatjoté kixin kjuínckekokjíheya xjan la kjónté chrokócháha.

Tí tjan kuítínkehe na mé nchónhya inté tjan ts'íkon tjan,

a ntá tí tjan kjuak'eko xii tjan la kánhyó ts'íkon.†

²⁸ Kichóni jeheni la éxi yóheni ch'in Isaac kixin kaín ni la xjeen Dios kixin xikaha tsintáchro ch'án. ²⁹ A ntá éxi senó tí xjan kokjíhi éxi tokjíhi chojni ó la jehe ch'án k'uéchónkíhi ch'án tí xjan kokjéxin kjuachaxién Nchakuen Dios. Mé xikaha kjaxin sítónhen jie. ³⁰ A ntá ntáchro tí xroon itén Dios kixin: “Tétuñhén tí tjan ch'exón xra sátsj tjan la ko tí xjeen tjan kixin tí xjeen tjan la ts'áyéheya ch'án tí nkehe tsjtonhen tí xjeen tí tjan t'ítuenhya.”‡ ³¹ Méxra kichó ni, kaín ni la jehya xjeen ijnko tjan ch'exón xra. Náhí. Jeheni mé xjeen tí tjan t'ítuenhya.

5

Jína chrók'uejorá kixin kuaáxinrá

¹ Cristo mé kuaáxinni la ntá ó tí ley la t'etuñhyani. Méxra jína chrók'uayakonhénrá tí nkehe kuaáxinrá la í chrókjanhyará chrók'ónará chojni t'ítuenhen inaá.

* 4:22 Génesis 16.15; 21.2 † 4:27 Isaías 54.1 ‡ 4:30 Génesis 21.10

² Tinhínrã, janhan Pablo mé ntáxrjan kixin tí chrókuarã tí xroye a ntã ó chónkó chrókuinkachónkirã Cristo. ³ Tjínkãvan tsóxrjanka inaã kixin tí jnkójín nkexro itsã tí xroye la jehe ch'án mé t'ichjánxin sinchexiteyéhë ch'án kaín tí ley tsíkjin ch'ín Moisés. ⁴ A nta jaharã la xritjéyará tsotjuáxin ijjará kixin sinchexiteyéhérã tí ley la ntã ó kujtohérá Cristo la ko ó kujtohérá tí kjuasáyë Dios tjuaharã. ⁵ A ntã jeheni la tinkáchónkini Cristo la chóntani Nchakuen Dios la ntã tjejóhóhenni kixin tsjintaxin tsotjóã ijjéni. ⁶ Jeheni mé tinkáchónkini Jesucristo la ntã kánhyó tjeotan tí xroye. Antsí tjeotan chrókuinkáchónkini Ìnchéni la ntã tí tinkáchónkini Ìnchéni la chrótjuèheni kichó ni.

⁷ Jaharã la jina kjuankíxinrã tinkáchónkirã Ìnchéni. ¿A ntã nkexro k'uetóan kixin chrókujtohérá tí nkehe chaxín? ⁸ Jehya nkehe kuente Dios tí tjejoch'erã méhe. Méxra jehe ch'án la kjueyará ch'án. ⁹ Ntáchro sín kixin tí ch'o t'óna niotjã tsjiko intsikóã tí xroan nchek'ánki niotjã, a ntã ts'ánki kaín tí ch'o. ¹⁰ A ntã janhan tinkáchónkia Ìnchéni la ko ó nòna kixin jaharã kjaxin tinkáchónkirã ch'án la kjã í chrókjuenkayáxinhyarã í jnko nkehe. A ntã Dios mé sinchekjasóte ch'án tí nkexro ixri tjixrónkáxin kixin Dios la chrakuenhya ch'án ninkexró.

¹¹ Kichóni, tí naça chrókúetóan chrókua chojni xroye la ntã tí sín judío chrókónínkakonnahya sín. Tí xikaha la chrók'uantaxienhya sín tí tan jina chrónka nkexri k'uenxin Cristo tí ntacruz. ¹² Méxra tí sín ntaxakonhanrã la t'etóan sín itsarã xroye la íchá jina naã chrók'uatásinkó chrókóchrít'o sín kaín.

¹³ Jaharã kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhí. Chrókjuinkitsani kichó ni la ko chrótjuèheni kichó ni. ¹⁴ Mé xikaha tí ley mé t'axrxjén kixin: "Chrótjuèhérá kichuarã éxi tjuéxinrã asánrã."* ¹⁵ A ntã tí chrókjónterã kichuarã la ko chrókjónterã kichuarã la ntã chrókóxakonhanrã kixin tí xikaha la chrókjuinçek'itjáyánrã kichuarã.

Tí jje chrókjuasin chojni la ko tí nkehe t'etóan Nchakuen Dios

¹⁶ A ntã ntáxrjan kixin chrók'uejorã éxi tjínkaon Nchakuen Dios, a ntã chrókjuéyáhyarã tí nkehe jínahya chrókjuenkayáxinrã. ¹⁷ A ntã tí nkehe jínahya tjenkayáxinrã la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrã la tjanjonko kichó. Méxra jaharã la xitjahya ch'erã tí nkehe tjínkaonrã chrókjuich'erã. ¹⁸ A ntã tí Nchakuen Dios tjetjinkitsarã, a ntã jehya tí ley t'etuánhanrã jie.

¹⁹ Xrahya ts'ikonní tí jje tjasin chojni jínahya tjenkayáxin. Mé tíha la tí sín tjasinko jje chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin, ²⁰ la ko tí chojni tinkáchónki nkehe tsíkjangya, la ko tí chojni nchexroan, la ko tí chojni níincaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjínkaon jehó tsochónta itsjé nkehe, la ko tí chojni tjínkaon ts'axrjenta, la ko tí chojni t'óxika kichó, ²¹ la ko tí chojni chjinoxínhin, la ko tí chojni tjäya, la ko tí chojni tókoan, la ko tí chojni kóchjinka, la í so nkehe tóyóhe xikaha. Na mé éxi yóhe senó mé k'uetjónkarã la ko ijje la xikaha tjetjónkarã inaã kixin tí nkexro xikaha tinkákjasin jie mé xitjahya ts'áyéhë sín tí kjuachaxin kuente Dios.

²² A ntã tíó chóntani Nchakuen Dios ntã tsotjuèheni kichó ni, la ko tsóchéheni, la ko kjuaxróxin ts'ejóni, la ko tsóchóhenni tsónínkakonnahyani, la ko jnkójina ts'ejókoni kichó ni, la ko nchexiteyáni jnkójina. ²³ La ko tsóhnhkehanyi, la ko ts'etueghenni asénni kixin tsjasinhyani jie. Kohya nijnko ley chrókjuinçekjasóteni kixin tí jina chrók'uejóni xikaha. ²⁴ Mé tí chojni tinkáchónki Jesucristo la kaín jie k'uechónta sín la ko tí jínahya k'uejénkayáxin sín la ó jjuenkã Ìnchéni kjuák'enkáni ch'án ntacruz. ²⁵ A ntã tí tjejókoni Nchakuen Dios t'ichjánxin tsítóheni kixin Nchakuen Dios ts'etueghenni.

²⁶ Méxra chrókjuinchehnkehanyi la ko chrókjuachaxinhyani kichó ni la ko chrókóchjinoxienhyani.

6

Tjínkitsarã kichuarã

¹ Kichóni, a ntã tí chrók'uíkonrã jnkójín nkexro kjuasin ichrén jie a ntã tí jaharã tí chaxín chontarã Nchakuen Dios la chrókjuéntuèhérá sín la chrókjuinkitsarã sín. A ntã jnkójina chrónixjehérã sín, a ntã jaharã la chrókóxakonhanrã kixin xikahya chrókónhanrã chrókjuásinrã jie kjaxin. ² Tsjínkitsarã kichuarã kixin jóhya tsamarã tí nkehe ye. Kixin tí xikaha la ó chrókjuinchehiteyáni tí nkehe t'etóan Cristo.

³ Ntã jnkójín nkexro ntáchro kixin imã tjeotan tí jehe ch'án la chaxínhya tíha la jehó ch'iyehë asén. ⁴ Jnkójnko chojni chróxraxinkaon a nchóxon tjenkayáxin la chrókónohe kixin

* 5:14 Levítico 19.18

ó nchoxon la jehya jehó chrókjuikosáyehe asén. Náhi. Chrókjuikosáyehe í so chojni. ⁵ Kíxin jnkojnko chojni yamá tí jię kuęte.

⁶ Tí nkexro xrakohę tí tan jına la chrókjuinkįtsa sín chrókjuanjon sín nkehe chrók'uáyehę tí nkexro tjako.

⁷ Sich'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsotjá. ⁸ Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. A ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochrín ts'áyehę sín. ⁹ Mé xikaha chrókóxrjéhyaní chrókjuich'eni kaín nkehe jına kixin tí tsoxrjéhyaní la ntá chaxín tsjixraká tí yaon tsjachani ts'áyehęni tí nkehe jına. ¹⁰ Méxra xikaha xráxin chrókjuich'eni nkehe jına la antsí t'ichjánxin chrókjuinkįtsani tí sín kichó ni tinkáchónki İnchéni.

Ch'in Pablo nchexraxinkaon tí sín ntiha la ko kjuixixín nixja ch'án

¹¹ Tsjehérá kixin imá ihyé tí letra tjékjinxian tjaná. ¹² Tí sín tjinkaon ts'etuanhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótexín sín tí ntacruz kuęte Cristo. ¹³ Kjóté tí sín tsíka xroye la nchexiteyáhya sín kaín tí nkehe t'etogan tí ley. A ntá tjinkaon sín kixin chrókuará xroye kixin ntá kjaxin sín tsohnke sín kixin tsontácho sín kixin jahará kjaxinrá tjinkáonrá tsochontará xroye tí cuerpo kuętará. ¹⁴ A ntá janhan mé tóxrjínahya sintahnke ninkehó. Íchá jına chróntáxrjan kixin Cristo k'uenyákonhenni. A ntá xikaha k'uenxín Cristo tí ntacruz la ntá tí nkehe k'uék'etogan kuęte chjasintajni la kjaxin k'uitjáyan la ko janhan kjaxin kuitohá tí nkehe kuęte chjasintajni. ¹⁵ La ntá ninkehó sínkihya á tsíka chojni xroye o náhi. Tí nkehe sínki la chrók'ónani ijnko chojni nixin. ¹⁶ A ntá tí sín ts'áyehę kjuaxróxin kixin kujkonohę Dios tí jehe sín la mé kaín tí sín kuítekaon tí nkehe t'etogan ch'án mé kaín tí sín chaxín tsík'óna xjeen ch'án.

¹⁷ A ntá ijie la tjínkakonhya kixin chrók'uekana jię ninkexró. Janhan mé chaxín chonta tí tsíkatsoenxín tsíchrít'o cuerpo kuętana kixin kjuasótexinna kixin kjuít'aha xra İnchéni Jesús.

¹⁸ Kichóni tjáncháha İnchéni Jesucristo kixin kjuasáyé ch'án chrókjuincheyaon ch'án kaín rá. Mé xikaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí ninko chjasin Éfeso

¹ Janhan Pablo tsíkjeýána Jesucristo kixin xikaha tjinkaon Dios tsjækua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko titekáonrá Cristo Jesús. ² Tjétjáncháha It'éni Dios la ko Ìnchéni Jesucristo kixin kjuasáyé ch'án chrókjuintayonará ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xikaha jehe ch'án mé kjuíncheyaonni ch'án kixin kaín nkehe jína tuxin nkaya nkajni kjuanjon ch'án. ⁴ Dios mé kjuéyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóani ch'án kixin kaín jie kjuatsenhenni ch'án. ⁵ Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xikaha tsíkjenkayáxin ch'án kixin xikaha kóxrjinhin ch'án. ⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án. ⁷ Imá tjuèhe Dios tí jeheni la xikaha kuaáxinni ijné tí Xjeen ch'án k'uitji la xikaha tsjixin kaín ijnéni. ⁸ Dios kjuakoxin ch'án kixin imá tjuèheni ch'án. Kjuanjon ch'án kaín kjuachaxin kixin chrókuiénxinni jína la ko kjuanjon ch'án kjuaxrexinkaon jína. ⁹ Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjinhin ch'án tsoxiteyá. ¹⁰ Tí nkehe tsíkjenkayáxin ch'án la tsoxiteyá tí yaon tsíchronka ch'án. La ntá jehe ch'án tsjanjon kjuachaxin kixin Jesucristo ts'etuñhen ch'án kaín xín nkehe siín nkaya nkajni la ko chjasintajni.

¹¹ Dios kjuéyáni kixin chrókuinkáchónkini Cristo la ntá xikaha chrók'uáyéheni tí nkehe tsík'áyéhe ch'án. Kaín tíha la mé xikaha tsonhen éxi tóxrjinhin Dios. ¹² Mé xikaha kjuich'e ch'án kixin ntá jeheni kuítekaonni Cristo saoxin chrók'uejóni chrókjuancheheni kjuasáya Dios kixin tí kjuachaxin jie chóna ch'án. ¹³ A ntá kjaxin jahará ó kuinhínra tí tan jína ntoá chrónka nkexri tsaáxinni, a ntá ó kuinkachónkirá Cristo. La ntá jnkokóá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsintáchro ch'án. ¹⁴ Tí Nchakuen Dios kujtonhenni mé kjuínchenoexinni Dios kixin tsakjani kaín nkehe tsjanjon ch'án tió tsaáxin kaín ni tinkáchónkini ch'án. Ntá xikaha kaín ni tsjancheheni kjuasáyé ch'án kixin tí kjuachaxin jie chóna ch'án.

Ch'in Pablo kjuanchehe Dios kixin antsí chrókónohe tí sín tinkáchónki Ìnchéni

¹⁵ Méxra ó kuinhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios. ¹⁶ Ntá janhan nunca títuáhya nixjahá Dios tjáncháha kjuasáya kixin ó tinkachónkirá ch'án. ¹⁷ Tjénixjahá Dios, mé jehe ch'án mé ichr'án Ìnchéni Jesucristo, mé It'éni imá tjeotan la tjétjáncháha ch'án kixin tsotjáhará ch'án kjuaxrexinkaon jína kuènte Nchakuen ch'án kixin ntá antsí chrókuiénxinra jína tí nkehe kuènte ch'án kixin ntá antsí má chróchoxinra ch'án. ¹⁸ Kjaxin tjétjáncháha Dios kixin tsjinkjitsa ch'án tsjanjon ch'án ijnko kjuaxrexinkaon jína kixin ntá tsonohará ts'ejochonhénra kixin xikaha kjuéyará ch'án. La ko tsonohará kixin imá tjeotan tí nkehe sinchekjtonhenni ch'án kixin jeheni mé tinkáchónkini ch'án. ¹⁹ La ko kjaxin tjétjáncháha Dios tsjinkjitsará ch'án tsonohará kixin tí kjuachaxin kuènte ch'án mé ijnko nkehe imá jie noehyani nketi kjuéxin. Tí kjuachaxién ch'án mé nchexraxinkaon tí sín tinkáchónki ch'án. Jnkokón tí kjuachaxin chónani la ko tí kjuachaxin imá jie kjuakoxin ch'án ²⁰ tió kjuínchexechón ch'án Cristo. Ntá Cristo sákju kjuák'etjaxin ch'án tja chjina tí It'é ch'án itjen nkaya nkajni. ²¹ Mé xikaha kjuanjon Dios kjuachaxin kixin Cristo ts'etuñhen ch'án kaín xín gobierno la ko kaín tí sín t'etjan. Ijie tjet'etuñhen ch'án kaín xín nkehe siín chjasintajni la ko chr'éxin ts'etjan ch'án kjaxin. ²² Cristo k'uáyéhe ch'án kjuachaxin ts'etuñhen kaín xín nkehe siín. Jehe ch'án mé ts'etuñhen kaín tí sín k'óna ninkóé ch'án. ²³ Tí ninko mé éxi tí cuerpo kuènte ch'án la jehó ch'án mé t'etuñhen ch'án. Jehó ch'án mé kuènte ch'án kaín xín nkehe siín.

2

Kuaáxinni kjuachaxién Dios

¹ La ntá ijie Dios mé kjuínchekjtonhanra tí kjuachón jnkochrixin kixin tinkachónkirá Cristo. Senó la jahará la éxi tsík'enrá kixin tí jínahya k'uékjich'erá la ko tí jie k'uékjásinra. ² Mé xikaha k'uéchréhérá éxi sitónhen chjasintajni. K'uékjinchexiteyéhérá éxi tóxrjinhin tí nchakuen jínahya t'etuñhen tí xrintó la ko t'etuñhen kaín xín tí chojni titekakuenhya

Dios. ³ Kaínni xikaha k'uék'ejóni tí ósé a naḡa kjuínchexiteyéheni tí nkehe ntáchro asénni la ko kjuínchexiteyáni tí kjuaxrexinkaon jínahya k'uéchóntani. A ntá tí naḡa xikahó chrókjuih'eni la Dios imá chrókjuihchekjasóteni éxi tsjasóte tí í so sín. ⁴ A ntá Dios mé imá kuikonóeheni ch'án la ko imá tjuèheni ch'án. ⁵ La ntá kjuanjón ch'án tí kjuachón éxi chónata Cristo. Jeheni la éxi chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsaáxinrá ch'án. ⁶ Dios mé kjuínchexéchón Cristo Jesús la ko kjaxin jeheni tsóxechónni kixin ts'ejókoni ch'án nkaya nkajní. ⁷ Mé xikaha kjuíh'e ch'án kjuakoxin ch'án la naḡa tjetjakoxin ch'án kixin tjuèheni ch'án la ko kjuínktsani ch'án kixin tinkáchónkini Cristo Jesús. ⁸ Kjuasáyé Dios kixin kuaáxinrá ch'án kixin tinkáchónkirá ch'án kixin táha la jehya jahóra k'uitjará tíha. Náhí. Táha la mé kjuasáyé Dios kixin tjáhará ch'án. ⁹ Kixin jehya ichrén nkehe jína kjuíh'eni kixin chrókjuihchekjénni. ¹⁰ Dios mé kjuíh'éna tí jeheni ntá chr'éxin kjuínktsa ch'án kixin tsinkáchónkini Cristo Jesús, kixin ntá chrókjuih'eni tí xṛa jína kixin xikaha tsíkjenkayáxin ch'án tí senó a.

Kjuaxróxin tjejóni kixin tinkáchónkini Cristo

¹¹ Méxṛa jahará la jehya chojni judíora. Mé tí sín judío ntak'inrá sín chojni chónthaha tí xroye tí jahará. A ntá tí sín judío, mé tí sín itsa sín xroye cuerpo kuente sín, mé nchek'in sín asén sín tí chojni chónthaha xroye. ¹² Xráxinkáonrá kixin tí senó la k'úechonhyará Cristo. Jahará la jehya kuente tí nación Israel la xikaha k'úechonhyará tí nkehe tsík'etqan Dios la ko tí nkehe tsintáchro ch'án tsjanjon ch'án. Mé xikaha k'uék'ejorá la k'úechonhyará Dios la k'úechoénhyará kixin chrókuaará. ¹³ La ntá ijie la ó tinkáchónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánrá ch'án, k'uitjé ijijé ch'án. ¹⁴ Jehé Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá chrókjuihchekjénni sín kixin k'óna éxi jnkokoá chjasin. Cristo k'óxika ch'án tí kjuanjón éxi ijnko tjt'ó k'úáinkonhén. ¹⁵ Jehé ch'án kjuasóte ch'án, la kjuatsen ch'án tí ley. Tí iyó chjasin k'uejó kjuíh'éna ch'án jnkokoá chjasin nixin kixin tinkáchónki sín ch'án. Mé xikaha kjuanjón ch'án kjuaxróxin. ¹⁶ Mé xikaha k'uenyákonhenni ch'án k'uenxin ch'án tí ntacur la kjuakjiih ch'án tí kjuanjónkaon k'uék'ixin tí iyó chjasin k'uekjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxi jnkokoá cuerpo kuente ch'án.

¹⁷ Cristo mé ikui la kjuakohé ch'án kaín chojni tí tan jína kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjeñ Dios la ko kjaxin tí sín chjinaxón k'uejó. ¹⁸ A ntá kjuachaxin kuente Cristo la kaín ni kjónté jeheni o í so chojni mé tsóchjineheni It'éni Dios kixin jnkokoá k'uayéheni Nchakuen ch'án. ¹⁹ A ntá jahará la í tóyóahyará chojni tsíkjiñin ókjé la ko jahará la jehya ókjé chjasin tjejorá. Kaínni la chónthani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án. ²⁰ Jahará la mé tsík'ónará ijnko nchia tjt'ó jie k'óna chrítaón tí xṛo k'uejo tí sín kjueyá Jesús la ko tí sín tsichr'án Dios chrónka itén ch'án ósé. La ntá Jesucristo mé tí xṛo imá t'etqan kuente tí tjt'ó a. ²¹ Tí xranikixixín mé Cristo la chrítaón k'óna kuente nchia la tinkák'ánkí tí nchia kixin jína tsjak'e, ntá tsjixraká kixin ts'óna ijnko njnko tjóá kuente Inchéni. ²² Mé xikaha jahará tinkáchónkirá Cristo la tsójnoktsérá kaín rá ts'óna éxi ijnko nchia kuente Dios la ntaha tsjak'exenhen tí Nchakuen ch'án.

3

Ch'in Pablo k'uayéhe ch'án tí xṛa tsjakohé ch'án tí sín jehya judío tí tan jína

¹ Mé xikaha janhan Pablo mé tjejchinaxián tí tjákua itén Cristo Jesús kixin jína ts'ejorá kjónté jehya chojni judío tí jahará. ² Chrókónohará kixin kjuasáyé Dios kjuanjón ch'án tí xṛa k'uaýaha kixin tsjákohará. ³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xikaha ikjian ijnko xroon kánhyó tsjé nixja k'uayéherá. ⁴ Tíó sinchekuáxinrá tíha ntá tsonohará kixin ó nóna tí nkehe kuente Cristo ninkexró k'ueñoehya. ⁵ Tí nkehe la ninkexró k'ueñoehya tí ósé a. A ntá jie kjuachaxin kuente Nchakuen Dios la Dios kjuínchenoéxin tí sín kjueyá Jesús ch'ehe ch'án xṛa la ko tí sín chrónka itén ch'án. ⁶ Tí nkehe ninkexró k'ueñoehya la tíhi: Kuínhin tí sín jehya judío tí tan jína kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jína éxi ts'áyéhe tí sín judío. La ntá jnkokoá ts'óna sín tí cuerpo kuente Cristo la jnkokón ts'áyéhe sín kaín tí nkehe tsichrónka Dios sinchexiteyá Cristo Jesús.

⁷ Janhan k'uekitekakonhya, a ntá jie kjuasáyé Dios kjuanjón ch'án tí xṛa í sít'a kixin tsjákuu tí itén ch'án kixin tí kjuachaxin kuente ch'án. ⁸ Janhan mé kánhyó tjeoan kixin janhan la imá intsína la kaín tí í so sín tsíkjinchetjóá Dios la antsí tjeoan sín. Kjónté la Dios mé kjuínchekjénni tí xṛa imá tjeoan kixin tsotjanka tí sín jehya sín judío tí tan jína nkexrí imá tjeoan tí nkehe kuente Cristo. ⁹ La k'uaýaha tí xṛa tsotjanka kaín xín chojni nkexrí tsíkjenkayáxin Dios tí ósé kixin nijnko nkexro k'ueñoehya tíha. Mé jehe ch'án mé kjuíh'éna ch'án kaín xín nkehe. ¹⁰ Mé xikaha kónhen kixin ntá tí sín kuente njnko tsjákuéxin sín kaín xín

tí sín t'etəan nkaya nkajni kixin tsoñohe sín kixin xikaha kaín nkehe jina tsíkjenkayáxin Dios. ¹¹ Kaín tíha kjuich'e Dios éxi tsíkjenkayáxin ch'án ntá Ìnchéni Jesucristo la ó kjuínchaxiteyá tíha. ¹² Kjuasáyé Cristo ntá ó chóntani kjuachaxin tsochjimeheni Dios kixin tinkáchónkini ch'án. ¹³ Méxra xranóahará kixin chrókuitoéhyará chrókuinkachónkirá ch'án kjónté tjetjasótena kixin kain tíha kónhen kixin jahará chrók'uejoxínrá jina.

Cristo imá tjuèheni

¹⁴ Méxra xikaha tjak'éxian tóch'ian nkayakon It'é Ìnchéni Jesucristo. ¹⁵ Mé tsik'áyéhe ihnéjé Dios kaín xín chojni tinkáchónki ch'án mé tí sín siín nkaya nkajni la ko tí sín siín chjasintajni. ¹⁶ Tjáncháha It'eni kixin tsjanjon kjuachaxin kuènte ch'án ts'ayéhérá kjuachaxièn Nchakuen ch'án ¹⁷ kixin Cristo chróchóna asánrá kixin tinkachónkirá ch'án la ntá ntoá chrók'uejorá éxi ijnko nta tsikji nuèe ninka la chrójtjuéhérá kichuárá. ¹⁸ Ntá jahará la ko tí í so sín tinkáchónki Ìnchéni mé chrókuiéxinrá nkexrí tonxín la ko kjínxin la ko nínkaxín la ko ntetoxín kixin nkexrí tjuèheni Cristo. ¹⁹ Tjáncháha Dios kixin antsí chrókónohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxínni kaín tíha. A ntá tí jehe ch'án chrókjuiñkítsani ch'án la antsí chrókuiénxinni tí kjuachaxin kuènte ch'án.

²⁰ Ijie la chjéheni kjuasáya Dios kixin jehe ch'án chóna kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kain tíhi kjuachaxin kuènte ch'án mé tsjinkítsa tí jeheni. ²¹ Kjuasáyé Dios itjen jnkochríxín kixin Cristo Jesús kjuíncheaka ch'án tí nínko, mé xikaha ó xiteyá jnkochríxín. Amén.

4

Jina chrók'uejókoni kichó ni kixin chóntani Nchakuen Dios

¹ Janhan mé tjechjinaxián tí xra kuènte Ìnchéni. Méxra xranóahará kixin jina chrók'uejorá kixin xikaha Dios tsíkjeýá tí jahará. ² Méxra chrókjuiñchehnkehyará la ko chrókójiyahará la ko chrókójinará chrókóninkáonhyará la ko chrójtjuéhérá kichuárá. ³ Méxra jina chrók'uejokoará kichuárá kixin chrókjuiñkítsa Nchakuen Dios kjuaxróxin chrók'uejorá la ko jnkokoá chrókjueñkayáxinrá. ⁴ Itjen jnkokoá cuerpo la ko itjen jnkokoá Nchakuen Dios la ko Dios k'uíyéhe kaín ni kixin jnkokoá nkehe ts'ejóchónhenni. ⁵ Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni. ⁶ Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etueñhen ch'án kain nkehe.

⁷ Jnkojnkonni k'uáyéheni kjuachaxin sich'eheni Dios xra kixin xikaha kjuanjon Cristo. ⁸ Méxra xikaha nixja xroon itén Dios kixin:

“Jehe ch'án sákjuí ch'án nkaya nkajni la ko sákjuíko ch'án tí sín tjejóchjina, la ntá kjuínchekitonhen ch'án chojni jnkojnko kjuachaxin kuènte ch'án.”*

⁹ Ntá nkexrí t'axrxéjin kixin sákjuí ch'án? Tíhi mé t'axrxéjin kixin jehe ch'án mé senó k'uínkajinxín ch'án nkaya nkajni la kjuák'e ch'án chjasintajni. ¹⁰ Jehe ch'án mé k'uínkajinxín ntiha mé ntá jie sákjij ch'án tí nkajni imá noi. La ntá tjet'etueñhen ch'án kain xín nkehe. ¹¹ Jehe ch'án mé kjuínchekitonhen ch'án ijnko kjuachaxin jnkojnko chojni. Kjueyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako sín itén ch'án. ¹² Mé xikaha tí xra k'uáyéhe tí sín kjueyá ch'án kixin sich'ehe sín ch'án xra kixin ntá ts'ánkí tí sín k'óna tí cuerpo kuènte Cristo. ¹³ Ntá xikaha kaín ni jnkokoá tsinkáchónkini tí Xjen Dios la ko tsochóxinni ch'án jina kixin ntá xikaha ts'ónani chojni ntoá nchexiteyá la ko chrókónoheni éxi nkexrí tjinkaon Cristo. ¹⁴ Méxra chrók'ónahyani éxi xjan ntsíntí. Tí xjanntí la xrahya tsjinkí kjuaxrexinkaon éxi ijnko nkehe sákjuíko xrinto xikaha kixin sich'iyehé sín chojni ijnko nkehe nixin la xrahya titekaon sín. Tí chojni ch'ia tjinkaon sín tsjachroñni sín í jnko ntja ntoáhya kixin chrok'uitjáyehenni Cristo ntá chrókjuaasinni jie. ¹⁵ A ntá íchá jina chrónixjani tí nkehe chaxín ntoá la kain asénni chrójtjuèheni kichó ni ntá xikaha chrókónoheni kixin xikaha tjinkaon Cristo. Jehe ch'án mé tí kja t'etueñhen tí cuerpo kuènte ch'án. ¹⁶ A ntá kjuachaxièn Cristo kuènte tí cuerpo, tí ch'e xra jnkokón la tjinkítsa kuénté. Ntá jnkojnkonni jina ch'eni xra la mé xikaha ts'ánkí tí xra kuènte ch'án la mé jina chrójtjuèheni kichó ni.

Tí kjuachaxin nixin kuènte Cristo

¹⁷ Tíhi mé ntáxrxjan la ko tétuanhanrá kjuachaxièn ihnéjé Ìnchéni. Ijie la chrók'uejohará éxi ch'e tí sín chónhya Dios. Kain nkehe tjenkayáxin sín la ntoáhya tíha. ¹⁸ Tí nkehe tjenkayáxin sín la sítíe la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios. ¹⁹ Ó tsíkjinchek'itjáyán sín tí kjuaxrexinkaon kuènte sín la í tósuehya sín chrókjuasin

* 4:8 Salmo 68.18

sín jie. Imá tóxrjnhjn sín chrókjuich'e sín kaín nkehe jínahya. ²⁰ A ntá jahará xikahya xrakohará tí nkehe kjuako Cristo, ²¹ tí chaxín kuinhíná kuènte ch'án la ko tsíxrakohará tí nkehe chaxín ntoá kuènte ch'án. ²² Méxra tìtohérá tí kjuaxrexinkaon ntaxin k'uékjenkayáxinrá ósé k'uék'ejorá mé ijnko nkehe jínahya naça t'ayahará. ²³ Jahará t'ichjánxin kixin chrókónjxin tí kjuaxrexinkaon kuèntará la ko tí nchakuanrá. ²⁴ Méxra chrókuákjárá tí kjuaxrexinkaon nixin kjuich'éna Dios xikaha tjinkaon ch'án la ntá chrókuákoxinrá ijnko ntja jína ntoá.

²⁵ Méxra chrókuítóhérá tí kjuach'ia. Méxra jnkojnkórá chrónixjehérá kíchuára ntoá kixin kaín ni tsík'onani jnkokoá cuerpo.

²⁶ Tí chrókóninkáonrá la chrókjuásinhyará jie la chrókóninkákonhyará kuènté yaon. ²⁷ Chrókuítóehyará kixin Tsochren chrókjuít'ayahará.

²⁸ Tí jnkojíná kugerá la tìtohérá kjuachee. Íchá jína kixin itjárá chrókjuich'exíná xra kixin tsochontará chichaon sinchekítqnhéná jnkojín nkexro t'ichjánxinhin.

²⁹ Nixjahyará tí nkehe náxrjónhya. Nixjará ijnko tan jína kixin tsjinkitsará ts'ánki kjuaxrexinkaon kuènte kíchuára la xikaha tsjinkitsará tí sín tjejóthin. ³⁰ Nchek'aváhyará tí Nchakuen Dios kixin tíha mé k'uayéxinrá éxi ijnko xroye kixin tsonoaxínrá kixin jahará mé tinkachónkirá Dios la ko tsochónhéná tí yaon itsi ch'án ntá tsjintaxin tsáará.

³¹ Tìtohérá tí kjuanínkaon chontará la ko tìtohérá tí nkehe ntoáhya tjenkayáxinrá la ko tìtohérá tí kjuanqon la ko kaín nkehe jínahya. ³² A ntá chrókójinárá chrókuikonóehérá kíchuára. Sinchek'itjáyehéná ijie kíchuára kixin Dios kjuatsen tí jie chontará kixin tinkachónkirá Cristo.

5

Jína chrók'uejó tí sín k'óna xjeen Dios

¹ Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxi kjuákoxin tí jehe ch'án. ² Chrótuéhérá kíchuára éxi Cristo tjuéhe tí jeheni kixin jehe ch'án la k'uenyákonhenni ch'án, éxi yóhe ijnko kolélo xikaha kjoqehé sín Dios la kóchéhe Dios k'uáyéhe ch'án tí xraxé náxrjón.

³ Ntá jahará mé tsík'onará chojni kuènte Dios la ntá chrónixjahyará kuènté ijnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará. ⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuènte Cristo tíha. Íchá jína antsí má chrókjuancheherá Dios kjuasáya. ⁵ Ó nohará kixin tí nkexro tjasinko jie í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchóna sín la mé tíha ó yóhe tí nkexro tinkáchónki nkehe tsíkjanoya xikaha. Mé tí nkexro xikaha ch'e mé tsjachahya ts'ixenhen tí tjet'etoan Cristo la ko Dios. ⁶ Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xikaha ntá itsi tí kjuanínkaon kuènte Dios la tsjasóte tí sín titekakuenhya sín tí jehe ch'án. ⁷ Méxra chrók'uitohyará tí sín xikaha ch'e.

⁸ Senó la k'uék'ájará ntja sitié. A ntá ijie ó k'ónará chojni kuènte Inchéni la ó xritjéorá tí ntja t'inkaséyan kuènte ch'án. Méxra tjenkayáxinrá jína éxi tí sín xritjéjó tí ntja t'inkaséyan. ⁹ Tí t'inkaséyan t'axrjenixin kaín nkehe jína la ko tí nkehe chaxín la ko tí nkehe ntoá. ¹⁰ Tóxakonhanrá chrókjuich'erá tí nkehe tóxrjnhjn Inchéni. ¹¹ Tankiéhyará tí sín ch'e xra náxrjónhya mé tí sín a ch'e xra tí sitié. Íchá jína tsjákoxinrá tí xra tí itjen tí t'inkaséyan. ¹² Chrókósuehéní chrónixjani kuènté tí nkehe imó ch'e tí sín jínahya. ¹³ Tí t'inkaséyan mé tsonoxixin kaín xin nkehe la mé tí xrohi ts'ikonxinni jína kaín nkehe. ¹⁴ Mé xikaha ntácho xikihí:

T'áya jaha tjéchrian t'inkatjenxian tí síin tí sín tsík'en.

Cristo mé tjetjoka xrohi.

¹⁵ Méxra imá chrókóxakonhanrá jnkojína chrók'uejorá. Jehya éxi tí sín noehya chrók'uejorá. Náhi. Chrók'uejorá éxi ijnko chojni nohe má. ¹⁶ Chrókóxakonhanrá chrókjuich'erá xra tí jie kixin itsi ijnko yaon jínahya xitjahya sich'erá xra. ¹⁷ Chrókólqntjhyará. Chrókóxakonhanrá chrókuiéxinrá tí nkehe tóxrjnhjn Inchéni. ¹⁸ Chrókóoanhyará kixin tíha mé chrók'uitjáyaxíná. Íchá jína chrókjuánjonrá kjuachaxin chrók'uetuánhanrá Nchakuen Dios. ¹⁹ Chrónixjéxinrá kíchuára tí salmo la ko tí himno la ko chrótsjerá la xikaha kaín asánrá chrókjuancheherá kjuasáyé Inchéni. ²⁰ Jnkochrixin chjehérá kjuasáya It'éni Dios kixin kaín nkehe kjuanjon ch'án la ko chrókjuanchaxíná kjuasáya kjuachaxién ihnjé Inchéni Jesucristo.

Jína chrók'uejókoní tí sín kjéhyani kixin tinkáchónkini Inchéni

²¹ Títékákonhénrá kíchuárá kixin ó tinkachónkirá Ìnchéni. ²² Tí chojni chjin chrókjuinchexiteyéhe xii sín éxi nchexiteyéhe sín Ìnchéni. ²³ Tí chojni ntoa chóna kjuachaxin ts'etuenhen ichjién éxi Cristo mé ikja t'etuenhen tí nínko. Kjaxin jehe ch'án kjuíncheakaá ch'án tí nínko, mé tí cuérpogé ch'án. ²⁴ Méxra éxi tí nínko nchexiteyéhe Cristo mé xikaha kjaxin tí chojni chjin chrókjuinchexiteyéhe tí xii.

²⁵ Tí chojni ntoa chrótjuéhe tí ichjién kixin éxi Cristo la tjuéhe tí nínko la k'uenyákonhen ch'án. ²⁶ Mé xikaha kjuich'e Cristo kixin sinchetjóá ch'án tí nínko mé kjuínchetjuáxin ch'án tí nta kuíkitéxin sín kjuachaxién itén ch'án. ²⁷ Nta tsjanjon ch'án tí jeheni éxi ijnko nínko imá jina chónahya jie la ko chónahya nínkehó nkehe náxrjónhya, mé ijnko nínko tjóá la ko ntoá. ²⁸ Mé xikaha tí chojni ntoa chrótjuéhe tí ichjién sín éxi tjuéxin ch'án cuérpogé ch'án. Tí nkexro tjuéhe ichjién mé kjaxin tjuéhe asén ch'án. ²⁹ Kohya nínkexró nínkakhén tí cuerpo kuénte. Kaín chojni la ine sín la t'ayakonhen sín cuérpogé sín la mé xikaha Cristo t'ayakonhen tí nínko. ³⁰ Kaínni mé k'ónani cuerpo kuénte ch'án. Jeheni mé ntogé ch'án la ko huésogé ch'án. ³¹ Ntácho kixin: "Méxra ijnko chojni ntoa mé tsítoghe it'é la ko iné kixin tsakja ichjién la yói sín mé ts'óna éxi jnkokogá chojni."* ³² Tíhi mé ijnko nkehe imá jie tiexínhya nínkexró. Mé janhan xrxanka kuénte Cristo la tíha mé nínkogé ch'án. ³³ Méxra kjaxin tjéxrxanka kixin chojni ntoa t'ichjánxin tsotjuéhe ichjién sín éxi tjuéxin asén sín la tí chojni chjin chróchónthehe sín kjuasáya tí xii sín.

6

¹ Jahará chánjanrá la t'ichjánxin sínchexiteyéhérá it'ará la ko inará kixin tjuéhérá Ìnchéni kixin tí xikaha mé jina. ² Tí nkehe saoxín tsík'ítuenhenni kixin chrókuitekaonni nta chrókjuanjon Dios nkehe mé tíhi: "Chrókjuikosáyehérá it'ará la ko inará ³ kixin mé náxrjón chrók'uejorá la isé chrók'uejorá ntihi chjasintajni."*

⁴ Jahará it'é xjan la chrókjuínchekónínkakhonará tí xjanrá. Íchá jina kixin sínchek'ánkixínrá xjanrá ijnko kjuaxrexinkaon jina kixin ts'ánkixín xjan tsínkáchónki xjan Ìnchéni.

⁵ Jahará chojni ch'e xra mé chrókuítekákónhénrá tí lámogárá ntihi chjasintajni la chróchontehérá sín kjuasáya. Sích'eherá sín xra éxi ch'eherá xra Ìnchéni Cristo.

⁶ Chrókjuich'erá xra jina la jehya kixin tí tjejó sín tjejótsjehe sín kixin nta xikahó nta jina chrók'uejoxínrá. Náhi. Éxi ch'eherá xra Cristo kaín asánrá sích'erá xra kixin mé xikaha tóxrjínjin Dios. ⁷ Kaín asánrá chrókjuich'erá xra éxi ch'eherá xra Ìnchéni la jehya éxi chojni ó chrókjuich'eherá xra. ⁸ Ó nohará kixin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kixin nkexrí tí xra jina kjuích'e sín.

⁹ Tí jahará chojni lámó mé jnkojina chrókuétuenhénrá tí sín t'ahará xra la séchrókónínkákónhénrá sín. Xráxinkáonrá kixin jahará la ko jehe sín mé jnkokón chrókjuínchexiteyéhérá Ìnchéni itjen nkaya nkajní kixin kaín chojni la jnkokón t'ikon ch'án.

Tí nkehe tjinkítsa t'ayakonhen tí sín tinkáchónki Ìnchéni

¹⁰ A nta jie kichó ni, nchefuérte asánrá kixin tjejókoni Ìnchéni la tjetooan tí kjuachaxin kuénte ch'án. ¹¹ Chrókuáaxínrá kaín tí kjuachaxin tsjanjon Dios kixin nta xikaha jina chrók'uejorá la chrókjuít'ayahyará Tsochren. ¹² Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nchakuen tí jínahya sín chjasintajni. Tíha mé tjínkaon chrók'uetooan tí chjasintajni sítié. ¹³ Méxra chrókuáájárá kaín tí kjuachaxin kjuanjon Dios kixin nta chrókjuachará tí itsi tí yaon jínahya nta tí xikaha chrókjuich'erá la ch'éxin la jina chrók'uejorá. ¹⁴ Nchefuérte asánrá. Jina chrók'uejorá. Chrókuítekáonrá tí itan chaxín kixin tí nkehe ntoá mé chrók'uayakonhanrá. ¹⁵ Méxra listo chrók'uejorá sátsjichronkará tí tan tjanjon kjuaxróxin. ¹⁶ La antsí tjetooan chrókuínkachónkirá Ìnchéni. Tíha mé chrok'uínkakhén tí chica flecha tsochr'án Tsochren. ¹⁷ Tí chrókuáaxínrá la táha éxi yóhe ijnko chica casco t'ayakonhen ikja chojni la tí itén Dios la éxi yóhe ijnko chica espada mé tjanjon Nchakuen Dios. ¹⁸ La ko kjaxin chrókjuítóéhyará chrónixjehérá Dios la jnkochríxin chrókjuanchehérá ch'án kaín nkehe t'ichjánxinhanrá la chrokjuanchatóxixínrá Nchakuen ch'án. Chrók'uejotsjehérá la chrókjuanchiará kixin tsjinkítsa Dios kaín tí sín tinkáchónki ch'án. ¹⁹ Chrónóhérá ch'án kixin kjaxin janhan tsjinkítsana ch'án tsjanjon ch'án tí tan t'ichjánxin tsoníxja janhan kixin nta janhan antsí jina chrónixja kixin nta tsinhín sín tí nkehe nínkexró k'uénoehya kixin nkexrí tjen tí itén ch'án tsaáxin chojni. ²⁰ Dios mé

* 5:31 Génesis 2.24 * 6:3 Éxodo 20.12; Deuteronomio 5.16

ichr'anna tsoxrjanka tí itén ch'án, mé xíkaha tjéchinaxián ijie. Nixjehérá ch'án kixin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kíchóni Tíquico, tí nkeexo imá tjuèheni la ko xráxín ch'ehe xra Ìnchéni mé tsochenkará ch'án tí jahará nkexrí tjén la ko nkexrí tí xra tjét'a. ²² Mé xíkaha tétuanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xíkaha chrókócháhará.

²³ Tjánháha It'éni Dios la Ìnchéni Jesucristo kixin tsochjéhe ch'án kaín kichó ni kjuaxróxin kixin tsojtjuèhe kichó sín la ko tsinkáchónki sín ch'án. ²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xíkaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí sín siín chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'eheni xra Jesucristo, mé ikjinni tí xroon i chr'anhánrá kain tí jahará kichó ni tinkachónkirá Cristo Jesús tjejorá chjasin Filipos la ko tí sín t'etqan kuènte nínko ntiha. ² Tjanchiani káxin It'éni Dios la ko Ìnchéni Jesucristo kjuasáyé ch'án imá chrókjuincheyaoonrá ch'án la ko chrók'uayéhérá kjuaxróxin.

Ch'ín Pablo tjechrónóhehe ch'án Dios káxin tí sín tinkáchónki Jesús ntiha

³ A ntá tió xráxinkavan tí jahará la imá tjaha Dios kjuasáya ⁴ la ko nixjaha Dios la imá chàna tjáncháha ch'án káxin tsjinkítsa ch'án kain tí jahará. ⁵ Jahará la kjuínkítasará tió kjuákua tí tan jína tí saoxín kuinhínra itén Dios la naxa tjejtjinkítsará ijie. ⁶ Ó òna chaxín káxin xikaha Dios ó kjuankáxin ch'án ch'e ch'án xra jína káxin kuítekáonrá mé xikaha naxa tsjintaxín sich'e ch'án tsjixrakájia tí yaon tsokjan Jesucristo. ⁷ Jína káxin tjenkayáxian kuènte kain tí jahará. Méxra xikaha imá tjahará. Jahará la ko janhan la jnkókón kjuachaxin k'uáyéheni la kjónté janhan tjéchjina o itjén tí tjejó tí sín t'etqan tjéxrjanka káxin jína tí tan tsaáxinni. ⁸ Dios la ó nohe káxin imá tjínkavan chrók'uikuan kain tí jahará káxin éxi tjuaixinrá Cristo. ⁹ Tjáncháha Dios káxin tsjinkítsa ch'án tí jahará káxin antsí má chróktjuehéra ch'án la ko chrók'uánkí tí kjuaxrexinkaoon kuéntará káxin antsí chrókuiénxinrá kain nkehe. ¹⁰ La ntá chrókónohará chrókuákjárá tí nkehe jína. A ntá tí xikaha chrókjuich'erá la jína tjóá chrók'uejorá la ko kohya nkehe chrókjuanchia jje tió tsokjan Jesucristo. ¹¹ Méxra jahará chrókjuich'erá xra jína éxi ijnko nkehe jína chrók'óna káxin kjuasáyé Jesucristo la ntá xikaha la chrókjuikosáyehérá Dios.

A ntá janhan la tjéchonxian Cristo

¹² Kichóni tjínkavan tsonohará káxin tí nkehe kjuasótexinna la kjuínkítsa káxin kuínhin chojni tí itén Dios tsaáxinni. ¹³ Kaínxín tí chojni siín palacio la ko kain tí í so sín mé nohe sín káxin tjéchjinaxián káxin tinkachónkia Jesucristo. ¹⁴ A ntá tí tjéchjina la itsjé tí sín kichó ni antsí má kóxrjínhin sín tjako sín itén Ìnchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinqóxinhin sín káxin tjínkaon sín chrókjuachaxinna sín. A ntá í so sín tjako itén ch'án káxin tjínkaon sín jína chrókjuinkítsana sín. ¹⁶ Kjánchó iso sín tjínkaon sín chrókjuako sín káxin chrókjuacha sín la ntá kénhya asén sín tjako sín. Mé xikaha ch'e sín káxin tjínkaon sín chrók'uekana sín antsí má jje káxin naxa tjéchjina. ¹⁷ La í so sín nixja sín kuènte Cristo káxin tjeuhe sín ch'án la ko tjuaa sín la ó nohe sín káxin ntihi tjén káxin tsoxrjanka tí itan tsaáxinni. ¹⁸ Kjánchó ántosenná kjónté á chaxín kain asén sín tjako sín o náhi, la imá chàna káxin chrónka sín tí tan jína kuènte Cristo la antsí má chéhe asenná.

¹⁹ Ó òna janhan káxin kjónté kain nkehe tsonna la kjónté xikaha la tsaáxinna káxin kjuasáyará jahará tjejónixjehérá Dios la ko tí Nchakuen Jesucristo mé tjetjinkítsana. ²⁰ Jína tjéchonhan káxin Dios la tsítqehya tí janhan káxin ichréni nkehe jínaha chrókóna. Tjínkavan tsochonta kjuachaxin káxin jína tsonixja kain asenná nkayakon chojni. Ntá xikaha senó la xikaha ijie tió ts'ikon chojni tí janhan la tsonoxén sín káxin Cristo imá chóna kjuachaxin kjónté á naxa tjéchuqan o á ó tsik'ena. ²¹ Káxin janhan na Cristo tjéchonxian la ntá kjónté ts'énxian xikaha la mé chrókjuácha. ²² A ntá tí naxa tsjak'é naxa tjéchuqan ntá naxa jína sit'aha Ìnchéni xra. Nonahya nkehe tí chrókuákjaá, á chrók'uén o á chrókjuak'échuqan. ²³ Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókjuak'ékjan Cristo. A ntá janhan la ntáxrjan káxin íchá jína tíha. ²⁴ Kjánchó t'ichjánxin naxa chrókjuak'é káxin naxa chrókjuinkítsa tí jahará. ²⁵ Méxra ó òna káxin naxa tsitona tí tjejorá káxin chrókjuinkítsa tí jahará káxin ntá antsí chrókónohará la chrókócháhará káxin jína chrókuinkachónkirá Ìnchéni. ²⁶ Ntá tió tsjasán janhan ts'ejóni inaá la imá tsocháhará la tsjanchehéra kjuasáyé Jesucristo.

²⁷ A ntá jahará chrókjuakóxinrá chrók'uejorá jína éxi ntáchro tí tan kjuakóxin Ìnchéni Cristo. Mé xikaha tí tsjasántsahará o náhi la tjínkavan chrókjuinhan káxin naxa imá tinkachónkirá Cristo la ko jnkokóá tjenkayáxinrá la ko jnkokóá tjejoch'erá xra tjakorá tí itan jína tsaáxinni. ²⁸ Chrókuiqóehyará káxin tí sín nínkakonhanrá chrókjuintachakonrá sín. Tí xikaha chróchrakonhyará la chrókónoxén sín káxin ts'itjáyán sín, a ntá chrókónoxin káxin jahará mé chaxín tsaárá. Tíha mé Dios tsjinkítsará. ²⁹ Ó kuítonhanrá tí kjuachaxin káxin tsinkachónkirá Jesucristo la ko kjaxin kuítonhanrá kjuachaxin tsjasótiaxinrá káxin jahará mé tinkachónkirá

ch'án. ³⁰ Jahará la ko janhan jnkokón ch'eni xṛa. Jahará ó k'uikonrá senó nkexrí kjuít'a xṛa la ó kuinhínrá ijie kixin naxa tjet'á xṛa kjónté nínkakonna sín.

2

Kuítohe Jesús tí kjuachaxin chrók'ueṭoan ch'án ntá ijie imá tjeoan ch'án

¹ Tí chaxín tí Cristo nchexraxinkaonrá la tí chaxín Cristo tjuàhará ch'án nchekhàhará ch'án la tí chaxín tí Nchakuen ch'án xrikoará la tí chaxín nohará kixin tikonóahará ch'án ² la nchekhànará kixin jnkokoá chrók'uejokoará kichuárá la ko jnkokoá chrótjuèhérá kichuárá la ko jnkokoá chrókjuenkayáxin nchakuanrá la ko jnkokoá xṛa chrókjuich'erá. ³ Chrókjuenkayáxinhyará chrókuéṭoanrá la ko chrókjuinchehnkehýará. Náhí. Chrók'ónará chojni t'etóanhyá. Chrók'uikonrá éxí antsí tjeoan tí í so sín, a ntá kánhyó tjeoan tí jahará. ⁴ Ninkexró chrókjuéyá tí nkehe kuènte jehó. Náhí. Chrókjuéyará tí nkehe chrókjuinkítsa tí í so chojni.

⁵ Jahará chrókjuenkayáxinrá éxí kjuenkayáxin Cristo Jesús. ⁶ Jehé ch'án chóna ch'án kaín kjuachaxin kuènte Dios la kjónté xikaha la tjinkakonhyá ch'án chrókjuincheyóhé ch'án éxí Dios. ⁷ A ntá kuítóhe ch'án ntáha tí kjuachaxin k'uéchóna ch'án la k'óna ch'án ijnko chojni ntoa chjasintajni la ko kjuich'e ch'án xṛa. ⁸ La éxí ijnko chojni k'ueṭoanhyá kjuak'e ch'án la kjuínchexiteyéhé ch'án Dios kaín asén ch'án kixin ik'uén ch'án, mé k'uénxin ch'án tí ntacruz. ⁹ Méxṛa Dios imá kjuikosáyehe tí jehé ch'án la ko kjuínchek'in ch'án ijnko ihnjé imá tjeoan. ¹⁰ Kixin ntá tsinhin kaín chojni tí ihnjé Jesús ntá ts'ejóxin toch'in sín, mé tí sín siín nkaya nkajni la ko tí sín siín chjasintajni la ko tí chojni siín chrinki nche. ¹¹ La ko kaín xín chojni tsochrónka sín kixin Jesucristo mé Ìnché sín mé xikaha tsjikosáyehe sín It'eni Dios.

Tí sín tinkáchónki Cristo tóyóhé éxí xrohi t'inkaséyanxín chjasintajni

¹² Jahará kichó ni imá tjuàhará la xráxin kjuínchexiteyànará tí k'uék'ejóni. A ntá ijie la chrókjuínchexiteyànará kjónté ikjín tjén. Chrókuítóéhyará tí nkehe tsjanjon kjuachón la chrók'uayakonhénrá jnkójina ¹³ kixin Dios ntaxraxinkaonrá s'ich'erá tí nkehe jina tjinkaon ch'án.

¹⁴ Kaín xṛa ch'erá la chrókóninkákuénhyará kichuárá la ko chrókjónthahýará kichuárá ¹⁵ kixin tsokohya ninkexró tsontácho kixin jahará la chontará jie. Kixin jahará la mé tí xjeen Dios chróchontahýará jie, la tjejorá tí siín tí sín jínahya tjasin jie. Na ntá jahará chrók'uinikaséyanxín tí jehé sín éxí tí konoté t'inkaséyanxín tí chjasintajni sítié. ¹⁶ Méxṛa jahará chrók'uayakonhénrá jina tí tan tjanjon kjuachón. Tí xikaha chrókjuínchexiteyárá jnkójina ntá tíó tsi Cristo tsóchéhé asenná kixin xikaha xṛa tjejoch'erá kixin ntá tsonóna kixin jehya ó chónkó kjuak'ékjít'a xṛa. ¹⁷ Kjónté chrók'uénxian la éxí nkehe chrókjuachatóxixínrá Dios chrók'uikonrá tí janhan. Mé xikaha chrókjuintaxín tí nkehe chrókjehérá ch'án kixin tinkáchónkirá ch'án, la ntá mé janhan mé tsóchàna la ko tjínkavan kixin kaín rá xikaha chrók'uayéhérá kjuachéhe. ¹⁸ Méxṛa chrókóchàhará jahará kjaxin la chrók'uayéhérá éxí tí kjuachéhe chonta.

Ch'in Timoteo la ko ch'in Epafrodito

¹⁹ Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'in Timoteo tsjijitsjehe ch'án tí jahará kixin ntá tsochàna tsinhan nkexrí tjejorá. ²⁰ Kohya í jnko nkexro chrókjuenkayáxin éxí tí janhan la ko chrókóxakonhen kixin jahará chrók'uejorá jina. ²¹ Kaín tí í so sín tjeýá sín tí nkehe tóxrjínhin sín ó la jehya tí nkehe tóxrjínhin Jesucristo. ²² A ntá jahará ó nohará kixin ch'in Timoteo ó kjuakoxin ch'án kixin jina asén ch'án kixin jehé ch'án kjuít'akian ch'án xṛa kjuakoni tí tan jina. Éxí ijnko xjanna xikaha kjuínkítsana ch'án. ²³ Mé xikaha tjínkavan tsochr'an ch'án tsjijitsjehe ch'án tí jahará tíó tsonóna nkexrí tsji tí xṛa kuèntana. ²⁴ La ko kjaxin chonhan kixin Ìnchéni tsjinkítsana kixin tjoka tsjasán kjaxinna.

²⁵ A ntá kjaxin tónhen asenná kixin t'ichjánxin tsochr'an kichó ni Epafrodito tsjiji ch'án tí tjejorá. Jehé ch'án mé jnkokoá ch'ekoní ch'án xṛa kjónté nínkakonhenni chojni. Jahará k'uéch'ranrá ch'án ntihi kixin jehé ch'án tsjinkítsana ch'án kaín nkehe tjínkavan. ²⁶ Imá tóxakonhen ch'án tsjijitsjehe ch'án tí jahará kixin ó nohe ch'án kixin tsikinhínrá kixin k'uéníhi ch'án. ²⁷ Chaxín k'uéníhi ch'án ó mero chrók'uen ch'án, a ntá Dios kujikonóhéhe tí jehé ch'án kjánchó jehya jehó ch'án, kjaxin kujikonóna Dios tí janhan kixin kánhyó chrók'uavá. ²⁸ Méxṛa tjínkavan tsochr'an ch'án kixin ó nóna kixin tsóchàhará ts'ikonrá ch'án ina la ko xikaha janhan í kánhyó chrók'uavá. ²⁹ Imá chrókóchàhará chrókjuiji ch'án kixin jehé ch'án mé ijnko kichó ni tinkáchónki Ìnchéni la ko chrókjuikosáyehérá ch'án éxí chrókjuikosáyehérá kaín tí í so sín éxí jehé ch'án. ³⁰ Jehé ch'án ó mero chrók'uenxin ch'án tí ch'ehe ch'án xṛa Cristo. Mé siín kjuaxikaon chrók'uenxin ch'án kixin jehé ch'án kjuínkítsana ch'án kixin jahará xitjahya ts'inkará tsjinkítsará tí janhan.

3

Tí nkehe chaxín sínkí

¹ A ntá tí ijie, kichó ní, chrókócháhará kixin jahará la kuènte Ìnchéni. A ntá tí janhan la xrahya tsokjatee tsokjian tí nkehe ó kjian kixin tíha la chrókuinkitsa tí jahará. ² Chróchontará cuidado tí sín ch'e jínahya éxí konjá la tóchrít'ò sín cuérpòé sín. ³ A ntá tí chojni chaxín chóna xroye la mé tí jeheni kixin jeheni chaxín xraxinkakonxinni Dios kjuachaxièn Nchakuen ch'án la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpòéni chrókóchrínjinni. ⁴ A ntá janhan kjaxin jina chróntáxrjan kixin chrókóchrít'ò tí cuérpòé chojni. Ninkexró ántsí chrókóhonta kjuachaxin kixin chrókuitekaon tí nkehe a. ⁵ Janhan mé tsíkana xroye tí k'uéchonta ijní yaon la ko janhan mé tikiñixian tí sín israelita la tsík'axrjenixinna tí sín tsík'axrjenixin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkáchónkia tí ley éxí tinkáchónki tí sín fariseo. ⁶ A ntá imá k'uénínkakonhan k'uéchonkíha tí sín tinkáchónki Jesús la ko imá kjuintaxiteyáha tí ley la kohya ninkexró tsontácho kixin chaxínhya tíha. ⁷ Ntá kaín tíha la tí ósé k'uéjkenkayáxian janhan kixin sínkí tíha, a ntá ijie la tinkáchónkia Cristo la ntá tí nkehe k'uékóxrjinna k'uéjkjít'a la ntá jie la ninkehó sínkíhya. ⁸ La kjaxin kaín xín nkehe t'íkuan éxí chónkó tíha kixin ántsí má tjeotan tsochoxián Ìnchéni Jesucristo. Kaín kjuaxrexinkaon jínahya k'uéchonta la kjuintak'itjáyán kixin ijie ó tinkáchónkia Cristo la kaín xín tí nkehe k'uéchonta la t'íkuan éxí chjínínó ó kixin ntá xíkaha jina chrókjuak'ékian Cristo. ⁹ Chrókóchána kixin jnkokoá chrók'uejókoni ch'án. Tjéyáhya kixin tí ley chrókjuinixín ijieni tí chrókjuinchexiteyéheni. Náhi. Tinkáchónkia Cristo la tsaáxinni kixin Dios la tsjakjün tí ijieni kixin tinkáchónkini ch'án. ¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'án tíó xechón ch'án la ko tjínkavan tsjasótexinna éxí kjuasóte ch'án la ko kjónté chrók'uéna éxí k'uénxin ch'án ¹¹ kixin ntá tjínkavan tsjácha tsoxechónna inaá.

Ch'ín Pablo tjínkaon chrókjuacha ch'án

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'án senó xíkaha. ¹³ Kichóni, ntáxrjanhya kixin janhván kjuácha tíha. Náhi. Janhan mé ts'itjáyanna kaín xín tí nkehe ó kuitóhe senó la t'ichjánxin kaín asenná tjichráha tí nkehe naxá t'itjáyán tsjácha. ¹⁴ Kixin xíkaha ntá chrókjuácha chrók'uayáha kaín tí nkehe jina tsjanjon Dios. Jehé ch'án la sinchexiteyá kaín tíha kixin tinkáchónkia Jesucristo.

¹⁵ Kaínni tí tinkáchónkini Jesús kaín asénni la méxra xíkaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha. ¹⁶ A ntá t'ichjánxin chrók'uejóni éxí tí nkehe ó kjuachani.

¹⁷ Kichóni, chrók'uejorá éxí kjuak'é janhan la ko chrótsjehérá nkexrí tjejó tí í so chojni tjejóch'e éxí kjuakoni kixin xíkaha kjuakoharáni tí jahará. ¹⁸ Nchónhya xrjankaxián senó la ntá xrjanka inaá la imá tsjanka kixin sín nchónhya sín tjejó sín éxí ninkakonhen sín tí Cristo k'uénxin ntacruz. ¹⁹ Tí sín a mé ts'itjáyán sín. Tí dios kuènte sín la mé tí nkehe ntácho asén sín ó la ko tjínkaon sín chrókjuinchehnexín sín tí nkehe chrókósuèxin sín. Jehó tjenkayáxin sín tí nkehe sín chjasintajni ó. ²⁰ A ntá jeheni kaín ní la mé chojni kuènte nkajni la tjejóchónhenni kixin ts'inkajinxin nkaya nkajni tí nkexro tsaáxinni, mé Ìnchéni Jesucristo. ²¹ Ntá jehé ch'án mé tsjinkí ch'án tí cuerpo náxrjónhya chóntani kixin ntá tí cuerpo chóntani tsoyóhé éxí tí cuerpo náxrjón chóna ch'án. Tíha mé tsoxiteyá kjuachaxièn ch'án jíé kixin ó chóna ch'án kjuachaxin ts'etuenhen ch'án kaín xín nkehe.

4

Jnkochrín chrókócháhará kixin tinkáchónkirá Ìnchéni

¹ Jahará kichó ní imá tjuahará la ko imá tjínkavan chrókjuasántsjahará tí jahará kixin jahará imá nchechánará kixin jahará mé éxí ijnko nkehe ó kjuácha. Méxra jina chrók'uejorá chrókuinkáchónkirá Ìnchéni kixin tjuahará kichó ní.

² Xrjanógha tjan Evodia la ko tjan Síntique kixin jnkokoá chrókjuenkayáxin sín kixin jehé sín la jnkokoá kichó sín kixin tinkáchónki sín Ìnchéni. ³ Jaha la jina k'uéjóni kjuích'eni xra, méxra xrjanógha tjínkita tí sín chjin kichó ní kixin jnkokoá chrókjuenkayáxin sín. Jehé sín kjaxin kjuích'e sín xra tíó kjuakoni tí tan jina tsaáxinni. Koí tí ch'ín Clemente la ko í so sín kjuích'ekoni xra. Tí ihnjé sín la ó ts'ínixín ts'ínixín ihnje chojni tsaá.

⁴ Nchéchéhérá asánrá jnkochrín kixin tjejókoará Ìnchéni. Inaá kjatee xrjanka nchéchéhérá asánrá. ⁵ Kaín chojni chrókónohe kixin jahará la chojni jinará. Chróráxinkáonrá kixin í séhya tsokjan Ìnchéni.

⁶ Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxinhanrá la kjaxin chrókjuancheherá ch'án kjuasáya. ⁷ A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuènte ch'án kixin imá ijíé tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuéntará kixin jnkokqá tinkáchónkirá Cristo Jesús.

Tjenkayáxinrá tí nkehe jína

⁸ Méxra tsjixixín tétuanhanrá kichó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xikaha tjenkayáxinrá kaín xín tí nkehe náxrjón la ko tí nkehe tóxrjínjin Dios.

⁹ Chrókjuich'erá kaín tí nkehe kjuákoahará la ko tí nkehe kuínhínrá xrjanka la ko tí nkehe kuétuanhánrá la ko tí nkehe k'uikonrá kjuít'a, mé kaín tíha chrókjuinchexiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjón tí sín filipenses tsjinkítsa sín tí ch'in Pablo

¹⁰ Inchéni imá nchechána kixin jahará xráxinkáonrá tí janhan inaá. Ntáxrjanhya kixin tsik'itjáyanhanrá tí janhan kixin jahará xitjahya k'uékjínkítsará tí janhan. ¹¹ Jehya kixin ntáxrjan tíha kixin imá t'ichjánxinna kixin janhan na ó kuàna kjuaxróxin tjén kjónté tí nkehe chonta ó. ¹² Janhan ó kuàna tjén kjónté nóana la ko kjaxin ó kuàna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántoséna. ¹³ Kaín xra tsjácha sít'a kixin Cristo tsjinkítsana. ¹⁴ Kjánchó jahará jína kjuich'erá kixin kjuinkítsará kjuánjonrá nkehe t'ichjánxinna.

¹⁵ Tió sákjuixian estado Macedonia la kjuankíxian kjuakua tí tan tsaáxinni inaá la jahóra tí ninjo chjasin Filipos ichr'anrá chichaon k'uayáha kixin cháhará kjuákoahará itén Dios. ¹⁶ Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuinkítsará tí nkehe k'uichjánxinna ntiha. ¹⁷ La jehya kixin tjínkavan kixin jehó nkehe chrók'uayáha. Náhí. Jehí tjínkavan kixin jahará ántsi má chrókjuich'erá tí nkehe tjínkaon Dios kixin ntá ántsi chrókjuachará. ¹⁸ Ó k'uayáha kaín nkehe tsíkjánjonrá la ántsi itsjé chonta. Ó k'uayáha tí nkehe tsichr'anrá mé tí nkehe kuikao ch'in Epafrodito, la kaín tíha la ó tsjácha. Tíha la éxi yóhe ijnko nkehe xraxé náxrjón chróchjehérá Dios mé éxi ijnko iko chrók'oyánrá imá chrókóxrjínjin ch'án. ¹⁹ Tí Dios kuéntana mé tsotjáhará kaín xín nkehe naxa t'itjáyan tsákjára kixin chóna ch'án kaín xín nkehe imá náxrjón tjele la tsjanjon ch'án kixin jahará la tinkáchónkirá Cristo Jesús. ²⁰ Kjuasáyé It'eni Dios jnkochrixín. Mé xikaha tsoxiteyá. Amén.

Tsjixixín nixja ch'in Pablo

²¹ Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kichó ni tjejókoni ntihi nixjahará sín. ²² Kjaxin kaín tí sín tinkáchónki Dios la ko tí sín ch'ehe xra tí ch'in t'etōan romano mé nixjahará sín. ²³ Tjáncháha kixin Inchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjin ch'ín Pablo chr'énhen ch'án tí sín chjasin Colosas

Ch'ín Pablo ikjin xroon k'uáyéhe tí nínko chjasin Colosas

¹ Janhan Pablo tsíkjevána Jesucristo t'aha ch'án xra kixin xikaha tjinkaon Dios, la ko kichó ni Timoteo ² mé ikjinni tí xroon i tsochr'ánharáni tí jahará tsíkjinchetjóará Dios la ko kuitekáonrá Jesucristo tjejórá chjasin Colosas. Kjuasáyé It'eni Dios chrókjuintayaonrá kixin kjuaxróxin chrók'uejórá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochr'ixin tjancheheni kjuasáya Dios la ko tjanchiani kixin chrókjuintátsa ch'án tí jahará mé jehe ch'án It'é Inchéni Jesucristo. ⁴ Ó kuínhini kixin jina tinkachónkirá Inchéni Jesucristo la ko tjuéhérá kaín tí sín ó tsíkjinchetjóá Dios. ⁵ Mé xikaha tjejochonhénrá kixin ts'ayéhérá tí nkehe chóna Dios tjan nkaya nkajni. Jahará la xikaha tjejochonhénrá kixin tjejotinhénrá tí tan chaxin kuente Dios tsaáxinni. ⁶ Tí tan i mé kuínhin chojni la itsjé sín tinkáki tekaon sín la tinkák'ánki tí kjuachaxin kuente Dios kuente chjasintajni. Mé xikaha kónhen tíó kuinhínra la ko kuitekáonrá kixin chaxin tjuahará Dios. ⁷ Tíhi mé kjuakochará kichó ni Epafras. Jehe ch'án la jnkokoá kjuich'ekoni ch'án xra kixin jehe ch'án la jina ch'ehe ch'án xra Cristo kixin xikaha tjinkítsa ch'án tí jahará. ⁸ Jehe ch'án mé kui ch'án ntihi chrónka ch'án nkexrí tjuéhérá kichuárá kixin Nchakuen Dios tjinkítsa tí jahará.

⁹ Méxra xikaha tí yaon tíó kuínhini nkexrí tjejórá la títoehyani tjancheheni Dios kixin tsjinkítsa tí jahará kixin tsoñohará jina nkexrí tóxrjinhin ch'án la ko tjanchiani kixin tsjanjon ch'án kjuachaxin kixin tsiénxinrá kaín nkehe kuente ch'án. ¹⁰ Tjancheheni ch'án kixin jina chrók'uejórá kixin tinkachónkirá Inchéni la ko chrókujitoéhyará chrókujich'erá éxi tóxrjinhin tí jehe ch'án. Ntá jina chrókjuachará chrókujich'erá xra kuente ch'án la ntá chrókónohará jina nkexrí tjan Dios. ¹¹ Tjanchiani kixin jehe ch'án chrókujinkítsa kixin chrók'uejórá fuerte kixin tí kjuachaxin jíé kuente ch'án kixin ntá chrókjuachará la kjónté ichrén nkehe chrókónhanrá la chrókóninkákonhyará. ¹² La ko chrókócháhará chróchjehérá kjuasáya It'eni Dios kixin kjuanjon ch'án kjuachaxin kixin ts'áyéheni tí nkehe tí tjan tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án. ¹³ Jehe ch'án mé kuakitsjekjanxinni ch'án tí sítié la ntá kjuanjon ch'án kjuachaxin ts'ejóni tí t'etóan tí Xjeen ch'án, tjuéhe ch'án. ¹⁴ Jehe ch'án kjuínchekaáni ch'án kixin k'uenyákonhenni ch'án la tí ijníé ch'án mé kjuenka ch'án tí ijíeni.

Kjuaxróxin ts'ejókoni Dios kixin k'uenyákonhenni Cristo

¹⁵ Éxi tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xráxin tjan tí naça t'ónahya ninkehó. ¹⁶ Kjuachaxién tí jehe ch'án kjuich'énaxin Dios kaín tí nkehe siín nkajni la ko chjasintajni la ko kaín tí nkehe naça t'ikonhyani la ko tí nkehe ó t'ikonni. Kjaxin kaín tí sín ángel t'etóan la ko chóna kjuachaxin la mé jehe ch'án kjuich'éna ch'án kixin sich'ehe sín ch'án xra. ¹⁷ Cristo la ó xráxin tjan kjónté naça t'ónahya ninkehó la jehe ch'án t'ayakonhen ch'án kaín nkehe siín kixin tí kjuachaxin kuente ch'án. ¹⁸ La kjaxin jehe Cristo mé tí kja t'etughnen tí cuerpo mé tíha mé tí nínko. Jehe ch'án senó xechón ch'án kixin jehe ch'án mé ts'etughnen ch'án kaín nkehe siín. ¹⁹ Dios tjinkaon chróchjéhe ch'án tí Xjeen ch'án kjuachaxin éxi tí kjuachaxin chóna tí jehe ch'án. ²⁰ Kjaxin tjinkaon Dios kixin kjuachaxién Cristo chrók'uixin kjuaxróxin nkuíxin mé chjasintajni la ko nkaya nkajni. Mé xikaha tsjasin ch'án kjuaxróxin kixin jehe ch'án kjuak'enkáni ch'án ntacruz ik'uén ch'án.

²¹ Jahará la ósé ikjin k'uék'ejórá la k'uéninkákonhénra Dios kixin tí nkehe jínahya k'uékjich'erá. A ntá jie la kjuaxróxin tjejókoará Dios ²² kixin k'uenyákonhánra Cristo, kjuasóte tí cuérpóé ch'án. Mé xikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahará ninkehó jie. ²³ Méxra xikaha chrókujitoéhyará chrókuinkachónkirá Inchéni la ko chrókujitoéhyará tí nkehe tjejochonhénra kixin ó kuinhínra tí tan tsaáxinni. Tí tan i mé ó chrónka chojni kuente chjasintajni la ko janhan Pablo kjaxin tjinkítsa xranaka xikaha.

Ch'ín Pablo ch'e ch'án xra kuente nínko

²⁴ Méxra jie la tjasótexinna kixin tí jahará la chàna kixin xikaha mé tsjintaxin tjasóte janhan kixin tí nkehe t'itjayan tí naça chrókjuasóte Cristo kixin jehe ch'án mé kjuasóteyákonhen ch'án tí nínko mé tí cuérpóé ch'án. ²⁵ Mé xikaha Dios kjuéyána kixin sit'a xra kuente nínko kixin xikaha tí xra k'uegtaanna ch'án kixin ntá jina chrók'uejoxinrá tí jahará kixin chrókjuintaxin chróxrjankaxián tí itan kuente Dios. ²⁶ Tí nkehe ninkexró k'uénoehya tjemá ósé nchónhya nánó a ntá jie kjuínchenohe Dios kaín tí sín tinkáchónki tí jehe ch'án. ²⁷ Dios

tjinkaon chrókjuinchenohe tí jehe sín tí nkehe tjemá náxrjón tjeje ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénrú ts'áyéhérá tí kjuachaxin jíe kuènte ch'án.

²⁸ Jeheni mé chronkaxinni nkehe kuènte Cristo la nchexraxinkaonni kaín chojni la ko tjakoheni sín kixin chrókuienxín sín jína. Ntá jnkojnko sín chrók'uánkí kjuaxrexinkaon kuènte sín kixin tinkáchónki sín ch'án. ²⁹ Méxra xíkaha tí xra it'a la kaín asenná it'a xra tí kjuachaxièn chjina Cristo.

2

¹ Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxá t'íkonyha tí janhan. ² Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuehe sín kichó sín. Mé xíkaha chrók'uánkí kjuaxrexinkaon kuènte sín chrókuienxín sín jína kixin ntá chrókónohe sín tí nkehe ninexró k'uénoehya kuènte It'éní Dios, mé Cristo tíha. ³ Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe. ⁴ Kaín tíha xrxánka kixin ntá ninexró chrókjuít'ayahyará tí jahará kixin tí náxrjón chrónixja sín ó. ⁵ Kjóné tjenhya tí cuerpo kuèntana tí tjejorá la ntá nchakuenná la mé tjen ntiha kixin xráinkávan tí jahará la chána kixin t'ikuán kixin jína tjejorá naxá tinkáchónkirá Cristo.

⁶ Méxra xíkaha kuinkáchónkirá Inchéni Jesucristo la mé xíkaha jnkokoá chrókjuenkayáxin koará tí jehe ch'án. ⁷ Éxí ijnko nta tsíkji nuèé njnka mé xíkaha chrókuienkáchónkirá tí jehe ch'án éxí kjuakohará ch'án la ko chrókjuanchehérá Dios kjuasáya jnkochrixín.

Cristo tjanjon ijnko ntia nixin

⁸ Chrókjuítóehyará kixin ninexró chrókjuít'ayahyará kixin tí nkehe ntoáhya chrókjuakohará sín. A ntá jehe sín chrónkaha sín éxí tjinkaon Cristo. Náhí. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya síin chjasintajni.

⁹ Kaínxín kjuachaxin chóna Dios mé chóna Cristo kjóné k'óna ch'án chojni. ¹⁰ La jahará chontará kaín kjuachaxin kuènte Dios kixin ó tinkáchónkirá Cristo. Jehe ch'án t'etuenhen ch'án kaín nkehe síin la ko t'etuenhen ch'án kaín nchakuen t'etóan. ¹¹ Kjaxin tío kjuankixínrá tinkáchónkirá Cristo ntá jehe ch'án kjuanjón ch'án jnko xroye k'uayéhérá kjánchó jehya tí xroye kuènte tí cuerpo. Náhí. Kjuakjiin ch'án tí jíe k'uékóxrjínhanrá la kjuintakaará ch'án, mé tíha mé tí xroye kjuanjón Cristo. ¹² Tí kuíkiterá jahará mé xíkaha éxí xravákoará Cristo. Ntá ó xechón tí jehe ch'án la kjaxínrá xechónrá kixin ó kuíteáonrá tí kjuachaxin kuènte Dios kixin Cristo la ó xechón ch'án inaá. ¹³ Jahará ósé la éxí tsík'en asánrá k'uék'ejorá kixin tí jíe k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxí xechónrá kixin Cristo kjuatsen tí jíe chontará. ¹⁴ Mé Dios kjuatsen ch'án kaín tí nkehe tsík'etóan ch'án ósé kjuachahyani nchexiteyáni la ko kjuatsen ch'án kaín tí jíe k'uéchóntani kixin Cristo kjuák'enkáni ch'án tí ntacruz la xíkaha kjuatsenxín ch'án tíha. ¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchóna tí nchakuen jínahya kixin jehe ch'án kjuínchesuèhe ch'án tí sín jínahya noxín kixin jehe ch'án mé kjuacha ch'án.

Tjéyará tí nkehe síin nkaya nkajni

¹⁶ Méxra ninexró chrókjontahyará kixin tí nkehe chrókjónterá ó tí nkehe chrók'uirá ó á tjikosáyehérá tí yaon kia ó tí nitjó nixin ó tí yaon t'ók'éheni. ¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha. ¹⁸ Méxra chrókjuítóehyará kixin ninexró chróntáchro sín kixin ts'itjáyánrá kixin tinkáchónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchién sín t'íkonxín sín la nchehnke sín kixin tí nkehe t'axrxénixín kja sín ó. ¹⁹ A ntá jehe sín la chaxínhya tinkáchónki sín Cristo kixin jehe ch'án mé tí kja t'etuenhen kaín ní la jehe ch'án mé ch'éna ch'án jnkokoá cuerpo kuènte ch'án kaín ní la nchek'ánkí ch'án tí cuerpo kixin jehe ch'án t'ayakonhenni ch'án kixin xíkaha tjinkaon Dios.

²⁰ A ntá jahará la ó k'uénkoará Cristo la kuítoghérá tí nkehe k'uék'etóan kuènte chjasintajni ó. ¿A ntá nkekuènté naxá tjejorá éxí tí chojni síin chjasintajni chrókjuínchexiteyará tí nkehe t'etóan sín? ²¹ Mé xíkaha t'etóan sín kixin jahará chrótshehará tíha la chrókjóntehyará tí nkehe la chrókuaákjáhýará nkehe. ²² Kaín tí nkehe ntáchro sín mé nixja kuènte tí nkehe tsjeje la tíha mé t'axrxénixín ikja chojni ó. ²³ Chaxín kixin jehe sín ntáchro sín kixin jína xíkaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpóé sín, kjánchó kaín tí nkehe ch'e sín xíkaha la chónkó kixin tjínkítsahya kixin chrókjuítóhe sín tí nkehe ntoáhya tjenkayáxin sín.

3

¹ A ntá tí jahará la ó tsíxechónkoará Cristo. Méxra chrókjuéyará tí nkehe síin nkaya nkajní kixin Cristo la ntiha tjetjaxin ch'án tí tja chjina Dios. ² Chrókjuenkayáxinrá tí nkehe síin nkaya nkajní. Chrókjuenkayáxinhyará tí nkehe síin chjasintajni. ³ Kixin jahará la ó ik'uenrá la ntá ijie la Cristo la ko Dios chónthe tí kjuachón kuéntará. ⁴ Jehu Cristo mé chontáxinrá kjuachón jahará la tió tsokjan tí jehe ch'án ntá kjaxinrá ts'ejókoará ch'án ntá ts'íkonrá tí kjuachaxin jie kuente ch'án.

Tí ntia ntaxin la ko tí ntia nixin

⁵ A ntá chrókjuítoghérá kaín tí jie tjenkayáxinrá chjasintajni. Ninkexró chrókjuasinko jie chojni chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro asén sín, la ko kjaxin chróórjjenhya sín chróchónta sín itsjé nkehe kixin tíha mé yóhé tí chrórxaxinkaon sín tí nkehe tsíkjanoya. ⁶ Méxra tí nkexro titekakonhya tí nkehe t'etóan Dios la tsónínkakonhen Dios tí jehe sín la sinchekjásóte sín ch'án. ⁷ Mé xíkaha k'uékjich'erá jahará tí ósé. ⁸ Méxra ijie chrókjuítoghérá kaín tí kjuáninkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kichuára la ko tí nkehe jínahya t'axrxjén ir'vará. ⁹ Chrókjuich'iyéhyará kichuára kixin ósé xíkaha k'uékjich'erá a ntá jie la ó chrókjuítoghérá kaín tí nkehe ntaxin k'uékjich'erá. ¹⁰ A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxi tí jehe ch'án kixin jehe ch'án kjuich'éna ch'án tí jahará. Mé xíkaha chrókjuixraká chróchoxinrá tí jehe ch'án jina. ¹¹ Jehya tjetóan á chojni judío o náhi o á chojni tsíka xroye o náhi o á chojni tsíkjin kjin o náhi o á chojni noehya o á chojni ch'exón xra o á chojni t'etóan. Tí nkehe tjetóan la tinkáchónkini Cristo la jehó ch'án t'etuñhen kaín nkehe.

¹² Dios la tjuèhe ch'án tí jahará la tsíkjeýará ch'án kixin tsinkachónkirá ch'án. A ntá jahará la ó k'ónará ijnko chojni nixin la chrókjuikonóghérá kichuára la jina chrók'uejorá la ko chrókjuinchehnkehyará la ko chrókójjahará la ko chrókóninkákonhyará. ¹³ Chrókóninkákuénhyará kichuára la chrók'uitjányanhanrá ichrén jie kjuasinhánrá í jnko chojni kixin Cristo la k'uitjányenhen ch'án tí jie kjuásinrá la kjaxin jahará la xíkaha chrókjuich'erá. ¹⁴ Mé xíkaha chrótjuéherá kichuára la jnkokoá chrókjuenkayáxinrá. ¹⁵ Tí kjuaxróxin kuente Cristo mé chrók'uetuñhen asánrá kixin xíkaha kjuenkayáxin Dios k'uiyáhará ch'án kixin chrók'ónará jnkokoá cuerpo kuente ch'án mé xíkaha chrókjuancheherá ch'án kjuasáya.

¹⁶ Tí tan kuente Cristo jnkochrínin chróchónta asánrá. Mé xíkaha chrókjuákohérá kichuára la chrókjuinchehéherá kichuára kaín kjuaxrexinkaon jina. Chrótsjerá salmo la ko himno la ko canto kuente Dios la chrókjuancheherá Dios kjuasáya kaín asánrá. ¹⁷ Kaín xra chrókjuich'erá la ko tí nkehe chróntáchorá la kaín táha chrókjuanchaxinrá ihnjé Ìnchéni Jesús la chrókjuancheherá kjuasáya It'éni Dios kjuachaxién Jesucristo.

Jnkójina chrók'uejóko kichó tí sín tinkáchónki Cristo

¹⁸ Jahará chojni chjin la chrókjuinchehxiteyéherá tí xiyará kixin mé t'ichjánxin xíkaha chrókjuich'erá kixin tinkachónkirá Ìnchéni. ¹⁹ Jahará chojni ntoa la chrótjuéherá tí ichjiánrá la chrókóninkákuénhyará tí jehe tjan. ²⁰ Jahará chánjanrá la chrókjuinchehxiteyéherá it'ará la ko inará kaín nkehe chrók'uetóan sín kixin xíkaha mé tóxrjnhin Ìnchéni. ²¹ Jahará it'é xjan la chrókjuinchehónínkakonhyará tí xjaanrá kixin tí xíkaha la chrókjuincheh'ávahyará tí jehe xjan. ²² Jahará chojni ch'exón xra chrókjuinchehxiteyéherá tí lámóará ntíhi chjasintajni. Jehya kixin tí tjeótsjehe sín ó chrókjuich'erá xra kixin ntá jina chrók'uejoxinrá. Náhi. Kaín asánrá chrókjuich'erá xra kixin ó nohará kixin xíkaha ch'eherá Ìnchéni xra. ²³ Kaín nkehe chrókjuich'erá la kaín asánrá chrókjuich'erá xra éxi chrókjuich'eherá xra Ìnchéni la jehya kixin éxi chojni ó chrókjuich'eherá xra. ²⁴ Ó nohará kixin Ìnchéni la sintakitonhanrá tí nkehe chóntha ch'án kixin jahará ch'eherá Cristo xra la jehe ch'án mé chaxin Ìnchéni. ²⁵ A ntá tí sín ch'e tí jínahya tsjacha sín tí nkehe jínahya kjuich'e sín kixin Dios la tükonóghya ninkexró ch'e tí nkehe jínahya.

4

¹ Méxra jahará lámorá la jina chrónixjehérá tí sín t'ahará xra. Chrórxáxináonrá kixin kjaxinrá jahará chontará ijnko Dios tjen nkaya nkajní.

² Chrókjuítoghéhyará nixjehérá Dios la ko chrókjuanchehéherá ch'án kjuasáya. ³ Kjaxin tjanchehéherá ch'án tsjinkítsa tí jeheni kixin tsjanjon Ìnchéni kjuachaxin chrókuinhin chojni tsochrónkaxiníni tí itén Cristo. Tí xra k'ueñoehya ninkexró mé tjechjjaxián jie. ⁴ Tsjanchehéherá Dios kixin tsjinkítsa ch'án tí janhan kixin chrókjuánxjan jina chrókjuákua éxi tjnkaon Dios.

⁵ A ntá jahará la jína chrókjuáakohérá itén Dios tí sín naxa tinkáchónkihya Ìnchéni kixin kánhyó tiempo siin kixin tsjåkorá. ⁶ Chrónixjehérá sín jnkojína kixin chrókóxrjinhin sín la chrókónohará chrókjuáteherá nkexrí tsixro jnkojnko chojni.

Kjuixin nixja ch'in Pablo

⁷ Kichóni Tiquico, mé ijnko nkexro jína tjinkitsa tí janhan ch'ehe Ìnchéni xra, mé tsjiji ch'án tsochrónka ch'án nkexrí tjén janhan. ⁸ Méxra kuétuanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará. ⁹ Jehe ch'án la ko kjaxin ch'ín Onésimo mé tjuèheni kichó ni la ko jehe ch'án mé kjaxin jína ch'e ch'án xra, la mé tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sitónhen tí tjejóni ntihi.

¹⁰ Ch'ín Aristarco mé jnkokoá tjechjinakian ch'án ntøechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénrá tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína. ¹¹ Kjaxin nixjahará ch'ín Jesús, kjaxin tikítexin sín ch'án Justo. Jehó tí sín a mé sín judío tinkáchónki Cristo, a ntá ijie tjinkitsa sín tí xra tjet'a la chrónkaxin sín nkehe kuènte tí kjuachaxin kuènte Dios. La tí sín a mé imá kjuínchehána sín tí janhan. ¹² Ch'ín Epafras nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánrá. Jehe ch'án jnkochrínin chrónøehé ch'án Dios tjinkaon ch'án kixin kaín asánrá chrókuinkachónkirá Dios éxi tjinkaon ch'án. ¹³ Ó nõna kixin ch'ín Epafras la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis. ¹⁴ Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérá tí sín kichó ni tjejó chjasin Laodicea la kjaxin nixjehérá tjan Ninfas la ko tí sín tójnkotsé ntøe tjan. ¹⁶ Tió tsjixin sinchekuáxinrá tí xroon tsikjiji tí tjejorá ntiha la ichr'anrá xroon sátsji sinchekuáxin tí sín tjejó nínko chjasin Laodicea la ko kjaxin sinchekuáxinrá tí xroon tsikjijihí tí jehe sín tió tsjiji tí xroon tí tjejorá. ¹⁷ Kjaxin chenkará ch'ín Arquipo kixin chrókjuinchexiteyá ch'án jína tí xra tsíkjanjon Ìnchéni sich'e ch'án.

¹⁸ Janhan Pablo tjaná kjinxjan tí palabra nixjahará. Jahará chróxråxinkáonrá kixin janhan la tjechjina la Dios mé chrókjuintayaonrá. Amén. Ó tjen.

Xroon saoxín ikjin ch'ín Pablo chr'énnen ch'án tí sín tinkáchónki Cristo chjasin Tesalónica

Ch'ín Pablo nixjehę ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni nínko chjasin Tesalónica kixin jnkokoá tinkáchónkini It'eni Dios la ko Inchéni Jesucristo. Kjuasáyé It'eni Dios la ko Ichéni chrók'uejorá.

Tí sín ókję chjasin mé kjuíncheyóhę sín tí sín Tesalónica

² Jnkoyaxón chjeheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkitsa ch'án tí jahará. ³ Tió nixjeheni It'eni Dios xraxinkaonni kixin kaín asánrá kuítekáonrá Inchéni, a ntá tjejoch'erá xrá la ko imá tjuéhérá kichuárá ntá jnkokoá tjejochonhénrá tsokjan Inchéni Jesucristo. ⁴ Kichóni jahará, imá tjuahará Dios la ó noheni kixin jehe ch'án tsíkjayará ch'án tí jahará. ⁵ Na mé xikaha tió kjuíjini chjasánrá kjuakoharáni tí tan jína nixin tsaáxinni chrónkani na jehya iténni ó. Náhí. Kjaxin kjuachaxiэн Nchakuen Dios kjuakoxinni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jína kixin nkexrí k'uejóni tí tjejorá kixin xikaha chrók'uejorá chrókjuakoxinnrá.

⁶ Mé xikaha kjuíncheyóhérá tí jeheni la ko kjuíncheyóhérá tí Inchéni Jesucristo. A ntá tió kuínhinnrá tí itén Dios ntá kaín asánrá kuinkachónkirá Inchéni la ko kócháhará kixin tí Nchakuen Dios mé t'etugenhen asánrá kjónté nchónhya nkehe k'uatinsinkará. ⁷ Mé xikaha kjuakuexinrá kaín tí sín tinkáchónki Inchéni ntiha estado Macedonia la ko tí sín estado Acaya. ⁸ Jahará kjuakoxinnrá tí itén Dios la jehya jehó estado Macedonia la ko tí estado Acaya kjuakoxinnrá. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichjánxinhya i jnko nkehe naxa chróchronkani, ⁹ kixin ijie jehe sín mé tjejóchronka sín kixin nkexrí kjuíjini chjasánrá a ntá kaín rá kjuánjonrá kjuachaxin k'uejóni la ko kuítekáonrá tí itén Dios kjuakoharáni la ntá kujtohérá kaín tí nkehe tsíkjanoya kixin ntá kjuankixinnrá kuinkachónkirá Dios tjechón chaxín. ¹⁰ La ko kjaxin tjejóchronka sín kixin jahará tjejochonhénrá tsokjanxin nkaya nkajni tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókjuasótéxinhvani tí nkehe jínahya chrókjuasótéxinni itsi.

2

Tí xrá tsíkjih'e ch'ín Pablo tí chjasin Tesalónica

¹ Kónohará kaín rá kichó ni kixin jehya chónkó kjuíjini chjasánrá. ² Ó kónohará kixin senó tí sín chjasin Filipos k'uekjinchekjásóteni sín la ko k'uek'ántaxínhinni sín. Kjánchó Dios mé kjuinkitsa ntá chrakonhyani kjuakoharáni tí tan tsaáxinni kuénte Dios kjónté imá k'ueíninkakonhenni sín. ³ Kónohará kixin jehya ntoáhya kjuakoharáni la ko jehya ijnko nkehe náxjónhya kjuakoni la ko kjuít'ayahyaráni ninkehó. ⁴ Náhí. Dios mé kjueyá ch'án tí jeheni kixin chrókjuakoni tí tan tsaáxinni, mé xikaha ntoá tjakoni. Jehya kixin chojni ó nchechéni. Náhí. Nchechéni Dios tí nkexro nohe nkehe tónhen asénni. ⁵ Ó nohará kixin kjuích'iyaxínhyani itan imá náxjón kixin xikaha chrókuakitsjexinni chichaon chrókjuachani. Náhí. Dios la ó nohe ch'án kixin xikahya kjuích'eni. ⁶ Tjeyáhyani kixin chojni chrókjuikosáyeheni sín la á jahará la o í so chojni. Náhí, xikahya ch'eni, kjónté chóntani kjuachaxin chrók'uetuqhanránani kixin chrókjuánjonrá nkehe chrók'uaýéhéni kixin jeheni ch'eheni xrá Cristo. ⁷ Jnkojína k'ueénixjaharáni k'uek'ejóni. Éxi yóhę ijnko iné xjan t'áyakonhen xjeen kixin ts'ánki xjan mé xikaha jeheni k'uaýakonhanránani tí jahará. ⁸ Imá tjuáhará ntá jehya jehó tí itén Dios chrókjuakoharáni. Náhí. Kjónté chrók'uenxinni tí tjakoharáni kixin xikaha imá tjuáhará. ⁹ Kichóni, chrórxaxinkáonrá kixin tió k'uejóni chjasánrá la mé nchónhya xrá kjuích'eni nchakotjin la ko tie ntá kjuachani chichaon k'uenaxinni nkehe sineni kixin tjnkakonhyani kixin chrójtáharáni xrá chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

¹⁰ Jahará la ó nohará la ko ó nohe Dios kixin chaxín jína k'uejókoaráni jahará chojni tinkáchónki Inchéni. Nijnko nkexro ts'ekahyani jje kixin ichrén nkehe jínahya chrókjuich'eni. ¹¹ Jahará ó nohará kixin kjuakoharáni la ko kjuínchechéni tí jahará jnkojnkórá éxi ch'e ijnko it'é xjan tjuéhe xjeen ch'án. ¹² La ko k'uetuqhanránani kixin jína chrók'uejorá éxi

tjinkaon Dios chrók'uejó tí sín tinkáchónki ch'án kixin jehe ch'án ó k'uíyahará ch'án kixin chrók'uayéherá tí kjuachaxin kuènte ch'án.

¹³ Méxra jnkochrixin tjancheheni Dios kjuasáya kixin tió kuínhínra tí tan jina kuènte ch'án kjuakoharáni na ntá kjuátsoanrá kixin chaxín tí tan jina kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxítóxin ntjará. ¹⁴ Mé xikaha jahará kichó ni kjuasótiará kónínkakonhará tí sín chjasánrá éxi yóhé kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankixin kuínkáchónki sín Ìnchéni ntá tí sín judío chjasén sín mé kjuankixin sín kónínkakonhen sín chrók'óyan sín. ¹⁵ A ntá tí sín judío a mé tsík'óyan sín Ìnchéni Jesús la ko tsík'óyan sín tí sín tsíchronka tí itén Dios ósé la xikaha kjaxin k'uinkíténi sín. A ntá xikaha kjuich'e sín la kónínkakonhen sín kaín chojni. A ntá Dios la kóxrjénhya ch'án kixin xikaha kjuich'e sín. ¹⁶ A ntá tjinkaonni kixin chrókjuakohéni tí sín jehya judío tí tan jina chrókuaáxin sín a ntá tí sín judío tjinkakonhya sín chrókjuakoni. Na mé xikaha imá nchek'ánkí sín tí jie kuènte sín. A ntá xikaha kjuich'e sín ntá Dios sinchekjasóte ch'án tí jehe sín.

Ch'in Pablo tjinkaon ch'án sáchrókjuitsjehe ch'án inaá tí sín chjasin Tesalónica

¹⁷ Kichóni, tió kuitóheni tí jahará a ntá kjónté ókjé k'uejóni la k'uexraxinkaonni kaín asénni tí jahará la ko imá tjinkaonni chrókjuitsjeheni tí jahará inaá. ¹⁸ Na mé xikaha janhan Pablo itsjé veces mé tjínkavan chrókjuasántsajahá tí jahará, a ntá tí ch'in Tsochren mé k'uínkákonna ntá xitjahya tsjasán. ¹⁹ ¿Nkehe tsonhen tí xra tjejóch'eni tjejóchóenxinni la ko nkekuènte tjejóchéheni? Jahará mé tsochéxinni tió tsi Ìnchéni Jesucristo kixin kuítekáonrá ch'án. ²⁰ Méxra jahará mé kóchéxinni kixin kuítekáonrá.

3

¹ Ntá imá kóxakonhenni. Ntá kjuenkayáxinni kixin chrókójina jehóni chrókuítóheni chjasin Atenas 2 na ntá ichr'ánni tí kichó ni Timoteo a tsjijitsjehe ch'án tí jahará kixin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkaonrá ch'án tí itén Ìnchéni la ko sinchechéhe ch'án asánrá ³ kixin tsoxrxjéhya asánrá má kixin tí kjuaxróxinhya tjejó'tatsínkará. Kixin xikaha ó nohará kixin t'ichjánxin tsjasótéxinni tí xra kuènte Ìnchéni. ⁴ Naxa k'uejóni jnkokoá ntiha la ó tjonkará kixin kaín ni kjuaxróxinhya tsonhenni tsjasóteni. A ntá jie la ó nohará kixin chaxín xikaha kónhen. ⁵ Méxra imá kóxakonna ntá ichr'an kichó ni Timoteo kjujijitsjehe ch'án nkexrí tjejórá, á naxa tinkachónkirá Ìnchéni o ách'e ch'in Tsochren chrókjuachroerá chrókuítóhéra tí ntje Ìnchéni a ntá chrókóchónkó kaín tí xra kjuich'eni kjuakoharáni.

⁶ Na ntá ó kjanxin ch'in Timoteo chjasánrá Tesalónica chrónka ch'án kixin jina tjejórá naxa tinkachónkirá Ìnchéni, la ko naxa tjejórá tjeuhérá kichuárá la ko chrónka ch'án kixin xraxínkáonrá tí jeheni tjínkáonrá chrókjuitsjeheni tí jahará. Kjaxin jeheni xikaha tjinkaonni chrók'uikonni tí jahará. ⁷ Mé xikaha kichó ni tjejó'tatsínkani kjuaxróxinhya ntíhi na ntá kjónté kóchéhe asénni kuínhinni kixin kaín asánrá naxa tinkachónkirá Ìnchéni. ⁸ A ntá kuínhinni xikaha kixin jina tjejórá naxa tinkachónkirá Ìnchéni Jesús a ntá antsí kóchéheni. ⁹ Ntá imá tsjancheheni Dios kjuasáya kixin xikaha imá chéhe asénni kixin tí jahará tinkachónkirá ch'án. ¹⁰ Tie la ko nchakotjin chronóghéni Dios kixin tsjanjon ch'án kjuachaxin tsjijitsjeheni tí jahará inaá kixin naxa t'itjáyan iso nkehe chrókjuakoharáni naxa chrók'uitjárá nkexrí jina chrókuínkachónkirá Ìnchéni.

¹¹ Tjejó'tjancheheni T'éni Dios la ko Ìnchéni Jesucristo kixin chrókjuínkítsani ch'án chrókjuitsjeheni tí jahará ¹² la ko tjancheheni Ìnchéni kixin chrókjuínkítsa ch'án tí jahará kixin antsí má chrótuéhéra kichuárá la ko chrótuéhéra kaín sín chojni éxi yóhé tjuáhará. ¹³ Tjancheheni ch'án kixin sintaxraxinkaonrá ch'án kixin kaín asánrá chrókuítekáonrá ch'án kixin ntá tsochóntahya asánrá ninkehó jie nkayakon It'éni Dios tió tsokjan Ìnchéni Jesús tsikao ch'án kaín tí sín ó tsikótjóá.

4

Nkexrí tóxrjnhin Dios chrók'uejóni

¹ Jahará kichó ni chronógharáni la ko ntaxraxinkaonráni tí kjuachaxin ihnjé Ìnchéni Jesús kixin jina chrók'uejórá tinkachónkirá Ìnchéni éxi tjejóch'erá jie kixin éxi kjuakoharáni. Mé xikaha jina sinchechéhéra Dios.

² Ó nohará tí nkehe kjuakuaxinráni kjuachaxin kuènte Ìnchéni Jesús. ³ Tí nkehe tjinkaon Dios kixin jina tjóá chrók'uejórá la ko chrókjuásínkoahyará jie í jnko chojni chjin ókjé. ⁴ Jnkojnkora chrókónohará chróchontará jnkojnko ichjiánrá la ko jina chrók'uejórá

chrótuèhérá kíchuára. ⁵ Jehya kixin chrókuakérá asánrá tí nkehe jínahya chrókjuich'erá éxi ch'e tí chojni chónhya Dios. ⁶ Nijnkorá chrókjuich'iyehérá ichjién kíchuára xikaha kixin Ìnchéni mé imá sinchekjasóte ch'án tí chojni xikaha sich'e mé xikaha kjuíntaxraxinkaonráni senó. ⁷ Dios mé k'uíyeheni ch'án kixin jína chrók'uejóni, jehya kixin naḡa chrókjuasinni jie. ⁸ A ntá tí sín chónthya kjuasáyé tí nkehe tjakoní na mé jehya kixin chónthya sín kjuasáyé chojni. Náhí. Chónthya sín kjuasáyé Dios, tí nkexro kjuanjón tì Nchakuen chónrani.

⁹ A ntá tí tjuèhérá kíchuára la í t'ichjánxinhya naḡa chrókjinni tosochronani kixin nkexrí chrótuèhérá kíchuára kixin jehe Dios mé tjetjakohará ch'án nkexrí chrótuèhérá kíchuára. ¹⁰ Xráxín xikaha tjeoch'erá tjuèhérá kaín tí sín kíchó ní tjejó estado Macedonia. Kjánchó chronóaharání kíchó ní kixin antsí má chrótuèhérá kíchuára. ¹¹ Tóxakonhanrá kixin kjuaxróxin chrók'uejorá. Jnkojnkorá nohará nketi xra chrókjuich'exinrá tjára éxi k'uetuñhanráni. ¹² Na mé xikaha chrók'uikon tí sín chónhya Dios ntá chróchóntahará sín kjuasáya la ko chrók'uitjányanhya ninkehó nkehe chrókuicháxinhanrá.

Itsi Ìnchéni Jesús

¹³ Kíchóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjankamará sín chrókóyóahyará tí sín tinkáchónkihya sín Ìnchéni naḡa chónhya sín kixin chróxechón sín inaá. ¹⁴ Kuítekaonni kixin ik'ueñ Ìnchéni Jesús la ko xechón ch'án inaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani tí jahará tí nkehe kjuako Ìnchéni kixin tí naḡa tjejóchónni tió tsi ch'án na kjónté naḡa tsitónxinhyani ntja, naḡa tsochónhenni tí sín tsík'en. ¹⁶ Jehe Ìnchéni mé ts'inkajinxín ch'án nkaya nkajní la ko itsen tsonixja ch'án kixin tí kjuachaxin jie kuènte ch'án la ko ts'èya tí ángel t'etjoan la ko tsontácho tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín. ¹⁷ A ntá chr'exín kaín xínni tjejóchónni la ko kaín xín tí sín tsíxechón mé jnkokqa tosochriinni kixin tí kjuachaxin jie kuènte Ìnchéni. A ntá xrikan tjuj tsoxetani ch'án. Mé xikaha ts'ejókoni ch'án jnkochrixín. ¹⁸ Méxra xikaha chrókjuinchechéxínrá kíchuára tí tan í kixin xikaha tsonhen tió tsokjan Ìnchéni.

5

¹ A ntá tí yaon tsonhen tíhi kíchó ní t'ichjánxinhya naḡa tsokjinni í jnko nkehe tsinhínra. ² Jahará ó nohará jína kixin titàya itsi tí yaon tsokjan Ìnchéni éxi yóhe chrókui jnko xíchee tí tie a. ³ Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrinahya titàya itsi tí kjuaxikaon jie la ko kjuachrakon mé ts'itjayanxín tí kjuachón chróchóntha sín éxi yóhe jnko tjan tjejá xrinahya titàya tsjankixín ts'óntáki tjan kixin sinchekokjilhi tjan xjeen tjan na mé jehe tjan xitjahya tsontácho tjan “Náhí”, mé xikaha jehe sín chónthaha sín nkerí tsaáxin sín. ⁴ Ntá jahará kíchó ní sítiéhya tjejorá ntá chróchakonhyará tí yaon itsi Ìnchéni. Tí náhi chróchakonrá éxi chrókui jnko xíchee chrókjuintachrakonrá. ⁵ Ntá jie kaín rá mé tjejorá tí ntja t'inkáséyan. Jeheni la jehya tjejóni tí ntja sítié a. ⁶ Méxra xikaha chrók'uejójuahyani éxi tjejójua tí sín í so na mé chrók'uejótsheni chrókjuenkayáxinni jína. ⁷ A ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a. ⁸ A ntá jeheni na tjejóni tí ntja t'inkáséyan t'ichjánxín kixin jína chrók'uejóni chrókjuasinhyani jie. Chrókuinkáchónkini Ìnchéni la ko chrótuèhenni ch'án. Ntá jeheni na Ìnchéni ts'ayakonhenni ch'án tsaáxinni ch'án éxi tí ch'in soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejójóhónhenni itsi Ìnchéni tsaáxinni ch'án na mé éxi tí ch'in soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án. ⁹ Kjueyáhya Dios tí jeheni kixin chrókjuincheckjasóteni ch'án. Náhí. Kjueyá ch'án tí jeheni kixin chrókuaáxinni Ìnchéni Jesucristo. ¹⁰ Jehe Jesucristo mé k'uenyákonhenni ch'án kixin chrók'uejókoni ch'án jnkochrixín kjónté naḡa tjejóchónni o kjónté ó tsík'enni tió tsokjan ch'án. ¹¹ Méxra xikaha chrókjuinchechéhérá kíchuára la ko chrókjuínktsará kíchuára kixin jína chrók'uejó sín éxi xráxín tjejoch'erá.

Ch'in Pablo mé nchexraxinkaon ch'án tí sín tinkáchónki Cristo

¹² Kíchóni chronoàharání kixin chróchontehérá kjuasáyé tí sín tjejóch'e sín xra kuènte Dios ntíha tjejótjitaón sín ntja chrónka sín itén Ìnchéni. ¹³ Na mé chróchontehérá sín kjuasáya la ko chrótuèhérá sín má kixin tí xra tjejóch'e sín. A ntá jahará kaín rá jnkójina chrók'uejokoará kíchuára.

¹⁴ Méxra tétuñhanráni kíchó ní kixin chrókjuéntuèhérá tí sín tjínkakonhya sich'e sín xra la ko chrókjuinchechéhérá asén tí sín kóxrjé asén sín la ko chrókjuínktsará tí sín naḡa noehya sín jína la ko chrókóninkákuénhyará ninkehró.

¹⁵ Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejtjenkayáxinrá.

¹⁶ Méxra nchechéhérá asánrá jnkochrín. ¹⁷ Chrókjuítóehyará chrónixjehérá Dios jnkochrín. ¹⁸ Kjónté ichrén nkehe chrókónhanrá la chróchjehérá Dios kjuasáya kixin xíkaha mé tjinkaon ch'án chrókjuákoxinrá kixin tinkachónkirá Ìnchéni Cristo Jesús.

¹⁹ T'ók'ankahyará tí xrohi t'inkáséyanxín Nchakuen Dios. ²⁰ Chonteherá kjuasáyé nkehe tjako tí sín kichó ni chronkaxín sín kjuachaxin kuènte Nchakuen Dios. ²¹ Chrótsjehérá jína tí nkehe tjejóch'e sín. A ntá tí jína na chrókuítekaonrá. ²² Chrókjuítóhérá kaín xín nkehe jínahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'ayakonhen ch'án nchakuanrá la ko asánrá la ko cuerpo kuèntará kixin tsochóntahya ninkehó jię tió tsi Ìnchéni Jesucristo. ²⁴ Dios tí nkexro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjehé ch'án sín la ko tjanchehe ch'án Dios kixin chrókjuincheyaoon tí jehe sín

²⁵ Kichóni chrónóehérá Dios kixin tsjinkitsani ch'án kaín ni.

²⁶ La ko nixjehérá kaín xín tí sín kichó ni ntiha tsehérá tja sín.

²⁷ T'etoanxínni tí kjuachaxin kuènte Ìnchéni kixin nchekuáxinrá tí xroon chr'anhánrá tsinhin kaín xín tí sín kichó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehé ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni núnko chjasin Tesalónica kixin jnkokoá tinkáchónkini It'eni Dios la ko Ìnchéni Jesucristo. ² Kjuasáyé It'eni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitoexín ch'án tí ijé chojni tió tsokjan Ìnchéni Cristo

³ Kichóni chrókjuancheheni Dios kjuasáya jnkochrixin kixin tí jahará. Na mé jina xikaha chrókjuich'eni kixin tinkák'ánki tí tinkáchónkirá Ìnchéni Jesús la ko tinkák'ánki tí tjuéhérá kichuárá tjejorá ntiha. ⁴ Ntá chéheni chenkaní tí sín kichó ni kaín tí núnkqe Dios kixin naxa tjákoxinrá kixin naxa tinkáchónkirá Ìnchéni kjónté síin chojni núnkakhonhará la ko kjónté t'atsínkará itsjé kjuaxróxinha. ⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuénte ch'án. Méxra xikaha tjejtjasótxínrá jie.

⁶ Méxra ó nchoxon kixin sinchekjasóte Dios tí sín tjejónchekjasótiará jie. ⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'eheni tí yaon itsi Ìnchéni Jesús ts'inkajinxin ch'án nkaya nkajni tsikao ch'án kaín tí sín ángel t'etqan kuénte ch'án na mé tsikao ch'án xrohi nene. ⁸ Mé xikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jina kuénte Ìnchéni Jesucristo chrókuaáxin sín. ⁹ A ntá tí sín kuítekakonhya mé tsjasóte sín jnkochrixin ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etqanxin ch'án. ¹⁰ Xikaha tsqohen tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jie kuénte ch'án. Mé xikaha kjaxinrá jahará kixin ó kuítekaonrá tí nkehe kjuakoharáni.

¹¹ Mé xikaha jnkochrixin tjancheheni Dios kixin jina chrók'uejorá éxi tjinkaon ch'án chrók'uejó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuénte ch'án kixin chrókjuinkitsará ch'án kixin chrókjuachará ch'erá kaín tí xra jina tjinkáonrá chrókjuich'erá kixin tinkáchónkirá ch'án. ¹² Mé xikaha kaín xínrá tsjikosáyehérá tí ihnjé Ìnchéni Jesucristo la ko jehe ch'án mé kjaxin tsjikosáyahará ch'án kixin tinkáchónkirá ch'án. Mé xikaha kjuasáyé Dios la ko Ìnchéni Jesucristo kixin kuikonóeheni ch'án.

2

Tsonoxín ijnko ch'ín jínahya

¹ Kichóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni ² kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkojin nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xikaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxi jeheni tsíkjanjoni chrónka kixin xikaha tsqohen. ³ Tjítóehyará kixin jnkojin nkexro chrókjuit'ayahará xikaha. Naxa tsihya tí yaon ntá senó itsjé chojni tsonínkakhonhen sín Dios, la ko tsonoxín ijnko ch'ín jínahya chóntha jie, na ntá tíha mé tsjasóte jnkochrixin. ⁴ Tsjak'etjaxin ch'án nkaxenhen tí núnkqe Dios kixin jehe ch'án mé sich'éna asén ch'án éxi Dios tí jehe ch'án.

⁵ ¿Á xráxinkákonhyará kixin xikaha k'uéxrjanka senó tí naxa k'u'éjóni jnkokoá? ⁶ Ntá jahará ó nohará nkehe tí kjuachaxin naxa chónthehe kixin naxa tjexrakáhya tí yaon tsonoxín tí ch'ín jínahya. ⁷ Ntá jie imó ch'e xra tí kjuachaxin jínahya. Kjónté naxa t'itjayan kixin sáchrókjui tí nkexro chónthehe. ⁸ A ntá tí ch'ín jínahya tsonoxín ch'án. Ntá tió tsi Ìnchéni Jesús ntá tí itén ch'án ts'axrjéxin ir'va ch'án ó mé ts'enxin tí jínahya a kixin mé xikaha sinchek'itjayanxin ch'án tí jínahya tí kjuachaxin jie tsikao ch'án. ⁹ Méxra tí ch'ín jínahya mé tsikao ch'án tí kjuachaxin kuénte ch'ín Tsochren la mé xikaha tsochóntha ch'án kjuachaxin jie tsjakoxin ch'án sich'iyaxin ch'án tsjan ch'án kjuaxroan ntoáhya. ¹⁰ Mé xikaha kaín nkehe jínahya sich'iyexin ch'án tí sín xráxin ts'itjayan sín kixin chrohya sín chrókuitekaon sín tí tan chaxin ntoá chrókuaáxin sín. ¹¹ Méxra tsítqhe Dios tí jehe sín kixin tsitekaon sín kaín nkehe chaxinhyá ¹² kixin ntá tsjasóte kaín tí sín kuítekakonhya sín tí tan chaxin chrókuaáxin sín na mé ántsi kóxrjinhin sín chrókjuasín sín jie tsjasótéxin sín.

Dios mé kjueyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnchéni kixin tí tsíkjeýá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuítekáonrá. ¹⁴ Méxra xíkaha k'uíyahará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jíe kuénte Ìnchéni Jesucristo.

¹⁵ Mé xíkaha kichó ní, jína chrók'uejorá chrók'uitjáyanhyará tí nkehe kjuakoharáni tío k'uejóni jnkogqá la ko tí nkehe chrónka tí xroon ikjinni k'uayéherá. ¹⁶ Ntá Ìnchéni Jesucristo la ko It'éni Dios na mé tí nkeexo kjuasáyé ch'án tjeùhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnchéni ¹⁷ na mé sinchechéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios kixin tsjinkítsa kaín ní

¹ Méxra kjuixixin chrónogaharáni kichó ní kixin chrókjuancheherá Dios kixin chrókjuinkítsa ch'án tí jeheni kixin tjoka sáchrókjuikakoni itén Ìnchéni nkuixín kixin ntá tsinhin chojni la tsjikosáyehe sín ch'án éxí yóhe kuítekáonrá jahará. ² Kjaxin nixjehérá Dios kixin chrókjuinkítsani ch'án kixin kohya nkehe chrókónhenni tí siin chojni jínahya nínkakohenni kixin kénhya sín tinkáchónki Ìnchéni. ³ Ntá Ìnchéni mé chaxín jína ch'án la jehe ch'án tsítóehya ch'án tí jahará naxa tsjinkítsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsónhanrá. ⁴ Ó noheni kixin Ìnchéni la tsjinkítsa ch'án tí jahará kixin naxa sich'erá xra éxí k'uetuanhanráni. ⁵ Ìnchéni tsjinkítsará ch'án tsónohará kixin Dios la tjuahará ch'án la ko tsjinkítsará ch'án kixin chrókóninkákonhyará éxí kónínkakohya Cristo.

T'ichjánxin chrókjuich'eni xra

⁶ Kichóni t'etogaxínni tí kjuachaxin ihníé Ìnchéni Jesucristo kixin chrók'uaxrjekjanxinrá tí sín kichó ní tjinkakonhya sich'e xra la ko xrihya sín éxí kjuakoharáni. ⁷ Ó nohará kixin nkexrí chrók'uejorá chrókjuákoxinrá éxí k'uejó tí jeheni kixin tí k'uejókoaráni la jehya kixin kjuich'ehyani xra. ⁸ Jehya kixin kjóneni niqtjé jnkójn nkexro ntá chrókjuenkahyani. Náhi. Kóxakohenni nchakotjin la ko tie kjuich'eni xra kixin ninkehó chónitaxinhyani tí jahará kixin chrókjuánjonrá tí nkehe chrókjóneni. Náhi. ⁹ Kjónté chónitani kjuachaxin chrókjuanchaharáni kixin chrókjuinkítsará tí jeheni kjánchó jeheni na kjuich'eni xra kjuákoxinni kixin xíkaha jahará chrókjuich'erá xra. ¹⁰ Kixin tí naxa k'uejóni jnkogqá ntiha k'uetoganni kixin: Tí nkexro tjinkakonhya ch'e xra la kjaxin chrókjonehya. ¹¹ Ó kuínhinni kixin tjejorá jnkójnra ninkehó xra ch'ehyará a ntá kjuach'ia ó xrikoará. ¹² A ntá tí kjuachaxién Ìnchéni Jesucristo t'etogaxínni la ko chrónóexinni tí sín a kixin chrókóninkakonhya sín chrókjuich'e sín xra kixin chrókjuacha sín chichaon chrók'uite tí nkehe chrókjone sín.

¹³ Ntá jahará kichó ní, chrókóxrjéhyará chrókjuich'erá tí nkehe jína. ¹⁴ A ntá tí tjen jnkójn nkexro titekakonhya tí nkehe t'etogaxínni tí xroon i la tsjehérá jína nkexro tíha la ntá chrók'uitohyará ch'án la ntá chrókósuèhe ch'án. ¹⁵ Kjánchó jehya kixin chrókjuánjonkoará ch'án. Náhi. Chrókjuinchexraxinkáonrá ch'án jnkójna éxí ijnko chojni kichó ní.

Ó kjuixixin nixja ch'ín Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochrín kjónté ichrén nkehe chrók'uatínkará. Jehe ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xíkaha chrókjuátsoanxinrá tí letra kaín carta tsikjan.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehé ch'án tí ch'ín Timoteo

¹ Janhan Pablo kjueyána Jesucristo la ko Dios mé tsik'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi. ² Ikjian tí xroon chr'anhan jaha Timoteo. T'íkuan éxi xjanna tí jaha kixin jaha tinkachónkia Cristo Jesús. Kjuasáyé It'éni Dios la ko Ìnchéni Jesucristo chrókjuintayavan ch'án la ko chrókujkonóaha ch'án kixin kjuaxróxin tsjak'e jaha.

Chrókjuinchexráxinkaon ch'án sín kixin chrókuitekakuenhya sín tí nkehe chaxínhya

³ Éxi xrxannóaha tíó sákjuia estado Macedonia la mé jaha chrókuitoaha tí chjasin Éfeso la ntaha chrókuétuénhén iso tí sín ntiha kixin chrókjuakohya sín tí nkehe ntoáhya. ⁴ La ko chrókuétuénhén sín kixin chrókjuakohya sín kuenté tí cuento tsíchronka chojni tí ósè a. Tí tinhin sín tíha la imá tjachaxin kichó sín la ó chónkó tíha. Kaín tíha la í tsjinkitsahya kixin sinchexitéyeheni Dios kixin tinkáchónkini ch'án.

⁵ Tí nkehe tjinkaonni la chrótjuèheni kichó ni kaín ni kixin ó kótjóá asénni la ko ó noheni kixin jina tjenkayáxinni la ko kaín asénni tinkáchónkini Cristo. ⁶ Iso sín la kjuichròe sín kixin itjo tí nkehe chónkó. ⁷ Tjinkaon sín chrók'óna sín maestro chrókjuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jina tí chrokjuakoni éxi tjinkaon Dios. ⁹ Ó noheni kixin tí sín tjasinhyahya jje t'ichjánxienhyahya sín tí ley tsik'etoan Moisés. Tíhi la t'ichjánxinhin tí sín titekakonhyahya la ko tí sín jjehe la ko tí sín jinhahya tjasin jje la ko tí sín chóntahya kjuasáyé Dios la ko tí sín t'óyán it'é la ko iné sín la ko kaín tí sín tjáya. ¹⁰ La ko tí sín tjinsako jje ijnko chojni chjin ókje la ko tí sín jnkokón ntoa sín takja kichó sín la ko tí sín teé chojni ntá nchekeji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jinhahya la nínkakonhen tí nkehe jina tjakoni. ¹¹ Tí nkehe tjakoni mé chaxín tí tan jina sinchekaá chojni la tí Dios tjetoan mé k'uetuanna kixin tsjákuu tíha.

Ch'ín Pablo kjuanchehe ch'án kjuasáyé Dios

¹² Tjáncháha kjuasáyé Ìnchéni Jesucristo kixin imá kjuínkítsana ch'án la ko k'uikon ch'án kixin jina sjt'aha ch'án xra ntá chjina ch'án tí xra i. ¹³ Mé xikaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkíha sín la ko chrók'oyán sín. Kjónté la Dios imá kujkonóehé ch'án tí janhan kixin ó nohe ch'án kixin k'uékinkachónkihya janhan tí jehe ch'án la ko k'uénonahya nkehe tí xra k'uékjít'a. ¹⁴ Méxra Ìnchéni antsí má kjuíncheyonna kixin ntá kjuanjon ch'án kjuachaxin kixin tsinkachónkia ch'án la ko tsotjuaha ch'án. Mé xikaha kaín ni chóntani tí kjuachaxin tinkáchónkini Cristo Jesús.

¹⁵ Tíhi mé chaxín la kaín ni chrókuitekaonni. Ikui Jesucristo chjasintajni kixin sinchekaá ch'án tí sín kjuasin jje. Ntá janhan mé antsí má kjuasian jje. ¹⁶ Kjónté xikaha kjuít'a la Dios antsí má kujkonóana ch'án tí janhan kixin xikaha kjuakoxin Jesucristo kixin kónínkakonhyahya ch'án. Mé xikaha tsjákuaxian kaín nkexro tsitekaon tí jehe ch'án kixin tsochóna sín kjuachón jnkochrixín. ¹⁷ Ntá jnkochrixín tsochónteheni kjuasáyé tí Rey t'etoan. Jehe ch'án mé ijnko nkexro xráxin tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

¹⁸ Timoteo, éxi xjanna t'íkuan tí jaha, la kaín tí xra i tjaha kixin tsjanjonkoa tí jinhahya la tsjacha kixin tinkachónkia jina Ìnchéni la ko tjenkayáxian tí nkehe jina. Mé xikaha sinchexitéyá tí nkehe kuínhin senó kixin tí sín kichó ni chrónkaxin ihnjé Dios. ¹⁹ Í so sín la kjuenkayáxinhya sín tí jina ntá kjuichròe sín kuitohe sín tí nkehe tinkáchónki sín. ²⁰ Mé xikaha kónhen ch'ín Himeneo la ko ch'ín Alejandro. Janhan kjuánjuan kjuachaxin kixin ch'ín Tsochren mé sinchekjasóte sín kixin mé xikaha ts'itja sín kixin í ts'ántaxienhyahya sín Dios.

2

Nkexrí chrónixjeheni Dios

¹ A ntá saoxín la xrxannóaha kixin kaín chojni chrónixjehé sín Dios la chrókjuanchehe sín kjuasáyé ch'án kixin chrókjuinkítsa ch'án kaín xín chojni. ² Chrókjuanchia sín kixin Dios imá chrókjuinkítsa ch'án kaín tí sín t'etoan la ko tí sín gobierno kixin ntá kjuaxróxin ts'ejóni la ko sinchexitéyeheni Dios la ko ntoá ts'ejóni. ³ Xikaha mé imá jina la tóxrjinhin Dios, mé tí nkexro tsaáxinni. ⁴ Jehe ch'án mé imá tjinkaon ch'án kixin tsaá kaín xín chojni la ko tjinkaon ch'án

kixin tsonohe chojni tí nkehe chaxín ntoá. ⁵ Mé itjen jnkokoáxón Dios la ko itjen jnkokoáxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikui ch'án chjasintajni. ⁶ Jehe Jesucristo mé k'uenyákonhenni kaín xínni, kjuenkayákonhen ch'án ijíeni kixin tsaáxinni ch'án. Táha mé xiteyá tí tsintáchro Dios ósé kixin xíkaha tsonhen ch'án. ⁷ Méxra tí xra mé kjueyána Dios kixin tsíjkákoha tí sín jehya judío kixin tsinkáchónki sín Jesucristo la ko tsonohe sín tí nkehe chaxín. Janhan mé tinkáchónkia Cristo la xrxanka tí nkehe chaxín mé t'ayahya.

⁸ Méxra tjínkavan kixin kaín tí sín ntoá mé chrónixjehe sín Dios la chrókjuaya sín tja sín la chrókótjóá asén sín la ko chrókóninkakonhya sín la ko chrókjuehya sín kjuanínkaon. ⁹ A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxíhi sín nkehe tjete xroxrjo náxrjón la ko chrók'uitsahya sín ika imá tjete. ¹⁰ Íchá jína kixin tí chojni chjin chrókjuich'e sín tí xra jína éxi chrókjuich'e kaín tí sín tsikjinchetjóá Dios. ¹¹ Tí chojni chjin t'ichjánxin chrókuinlin sín itén Dios la chrónixjahya sín la ko chrók'uetjoanhya sín. ¹² A ntá janhan tjánjonhya kjuachaxin kixin chojni chjin chrókjuako tí nchónhya chojni síin la ko tjánjonhya kjuachaxin chrók'uetjoanhen sín chojni ntoá. Jehe sín la tání sín chrók'uejó sín ¹³ kixin saoxín la Dios kjuich'éna ch'án tí ch'ín Adán la ntá chr'éxin kjuich'éna ch'án tjan Eva. ¹⁴ A ntá ch'ín Adán la ninkexró kjuich'iyehya ch'án. Náhi. Tí tjachjin mé tsíkitekakonhen tjan tí nkexro tsíkijch'iyehye tjan ntá xíkaha xrankíxixín k'uixín jie. ¹⁵ A ntá tí chojni chjin la kjónté xíkaha tsíkijch'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejó tí sín t'etuenhen tí nínko

¹ Ijko nkehe chaxín tjonka. Tí nkexro tjinkaon sich'e xra kuènte nínko mé imá jína xra tjínkaon ch'án. ² Tí ch'ín chrók'uetjoan mé ntoá chrókjuak'e ch'án kixin kohya nkexro chrók'ueka ch'án jie la ko kjaxin chróchónta ch'án jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchónta ch'án kjuasáyé ch'án la ko kjaxin jína chrónixjehe ch'án tí nkexro tjiji ntqe la ko kjaxin chrókónohe ch'án tí nkehe chrókjuako ch'án. ³ La ko kjaxin chrókókoanhya ch'án la ko chrókjuehya ch'án kjuanínkaon la ko kjaxin chrókóxrjénhya ch'án kixin chrókjuacha ch'án nchónhya chichaon. A ntá chrókójehya ch'án la ko kjuaxróxin chrókjuak'e ch'án la ko chrókóxrjénhya ch'án chróchónta ch'án itsjé chichaon. ⁴ Jehe ch'án mé kjaxin jína chrók'uetjoanhen ch'án tí sín tjejó ntqe ch'án la ko chrókjuentuèhe ch'án xjeen ch'án kixin tsitekaon xjan la tsjikosáyehye xjan it'é xjan. ⁵ Tí tsjachahya ch'án ts'etuenhen ch'án tí sín tjejó ntqe ch'án la zntá nkexrí chrók'uetjoan ch'án tí nínko kuènte Dios? ⁶ Íchá jína kixin jehya ijko nkexro na ntá k'uixenhen chrókjuako kixin tí nkexro na ntá k'uixenhen la imá chrókjuinchehnke ch'án la ntá chrókjuasin ch'án jie éxi kjuasin ch'ín Tsochren ijie senó. ⁷ Kjaxin t'ichjánxin kixin kaín xín tí sín naxa tinkáchónkihya Inchéni mé tsochónta sín kjuasáyé tí ch'ín t'etjoan a. Tí náhi la ts'eka sín ch'án jie ntá tí xíkaha la ch'ín Tsochren tsjacha tsjachróe tí ch'ín a ntá tsjasin ch'án jie.

Nkexrí chrók'uejó tí sín tsjinkítsa tí xra kuènte nínko

⁸ Kjaxin tí sín diácono ch'e xra kuènte nínko la kjaxin ntoá chrók'uejó sín kixin chróchóntehe sín kjuasáyé chojni. Kjaxin t'ichjánxin kixin chrókjuinchehiteyá sín tí nkehe ntáchro sín la ko chrókókoanhya sín la ko kjaxin chróchóntiaxinhya sín itsjé chichaon chrókjuacha sín. ⁹ T'ichjánxin chrókónohe sín jína tí nkehe tinkáchónki sín kixin jehye sín chróxraxincaon sín á nchoxon tí xra ch'e sín. ¹⁰ Saoxín chrótsjehe kaín chojni á ninkehó jie chóntahya sín nkexro la ntá tí chaxín jína jehe ch'án la ninkehó jie chóntahya ch'án ntá jína ts'ixenhen ch'án tí xra kuènte nínko. ¹¹ La ko kjaxin tí chojni chjin mé chrók'uejó sín jína kixin chróchónta sín kjuasáyé sín. Kjaxin chrókuinkáchónkihya sín kjuach'ia la ko jína chrók'uejó sín la ko chrókjuinchehiteyá sín kaín nkehe. ¹² Tí sín diácono la mé chróchónta sín jnkokoá ichjién sín la jína chrók'uetjoanhen sín xjeen sín la ko jína chrók'uetjoan sín ntqe sín. ¹³ T'ichjánxin ijko xra jína sich'e sín kixin ntá tsjacha sín ts'áyehye sín ijko nkehe jína tsjanjon inchéni la ko kjaxin tsosuehya sín tsochrónka sín nkexrí tinkáchónki sín Cristo Jesús.

Dios mé kjuinchenoheni tí nkehe k'uékiexínhyani

¹⁴ Tjínkavan tjoka chrókjuasantsjahá tí jaha kjánchó senó tsokjian tí xroon i. ¹⁵ A ntá tí tsoxrjenna isé ntá kjónté tsonohe nkexrí chrók'uejó tí sín naxa kjéhya Dios mé tí sín t'óna nínkoe Dios tjechón. Jeheni kaín ni mé tjejó't'ayakonhenni tí tan chaxín ntoá. ¹⁶ Ninkexró chróntáchrohya kixin chaxínhya tí nkehe tinkáchónkini mé ijko nkehe imá jie tíha la ninkexró k'uénoehya tí senó a. Dios mé ikui k'óna chojni;

ikui ch'an kjuakoxin ch'an kjuachaxien Nchakuen Dios ch'onta ch'an kixin jina ti jehe ch'an. La ntá ti sín ángel mé k'uikon sín ch'an la kuenté chjasintajni mé ó kuínhin sín nkehe chrónka ch'an ntá itsjé sín kuítekaon sín ch'an. Ntá Dios k'uáyéhe ti jehe ch'an nkaya nkajni.

4

Tí sín kuítghe tinkáchónkihya Cristo

¹ A ntá ntáchro Nchakuen Dios kixin tí chjina tsjeje chjasintajni mé iso sín mé tsítghe sín í tsinkáchónkihya sín Inchéni la ntá tsitekaon sín nchakuen tí jínahya sich'iyehe sín la ko tsitekaon sín tí nkehe tjako tí sín demonio. ² Mé tsinhin sín tí nkehe tjako tí chojni tjuáhya la ch'ia sín. Kjonté imá tsjasin sín jie la í tsosuèhya sín kixin éxi tsíchján tí tjenkayáxixin sín la í tjenkayáxinhya sín jina. ³ Jehe sín mé tjinkakonhya sín kixin chrókótghe chojni la ko kjaxin tjinkakonhya sín kixin chrókjóneni nto. A ntá jeheni ó noheni kixin Dios mé kjuich'ena ch'an kaín xín nkehe ineni la tjinkaon ch'an kixin tí jeheni tinkáchónkini ch'an la ó noheni tí tan chaxín ntoá mé chrókjuancheheni ch'an kjuasáya ntá chrókjóneni. ⁴ Méxra kaín xín tí nkehe kjuich'ena Dios la jina la kohya nkehe chróntáchroni kixin jehya jina sineni. Chrókjuancheheni Dios kjuasáya la ntá jina chrókjóneni ⁵ kixin tíó tsoxraxinkaonni itén Dios la tsonixjeheni ch'an la ntá sincheyaoon ch'an tí nkehe sineni.

Ijko chojni jina ch'ehé xra Jesucristo

⁶ Jaha tjákohe tí sín kichó ni kaín tí nkehe i la ntá xikaha imá jina sich'ehé xra Jesucristo la ko antsí tsjinkítsa ch'an ts'ánki kjuaxrexinkaon kuéntá tí tinkáchónkia tí tan kuénté ch'an la ko naxa tjákua tí nkehe jina ó xráko. ⁷ Jaha mé tahya kuenté tí cuento chónkó la ko tí nkehe ntoáhya tinkáchónki iso sín. A ntá jaha la chrókuítgèhya chrókuinkáchónkia Dios. ⁸ Tí chojni tsítán la jina tíha kjánchó antsí má tjetooon chrórxaxinkaonni Dios. Tíha la tsjinkítsa kixin jina xritjéjóni ijie la ko kjaxin tsjinkítsa kixin ts'áyéheni kjuachón jnkochríxín tíó tsokjan Inchéni. ⁹ Kaín tíhi mé chaxín la kaín chojni chrókuítekaon. ¹⁰ Mé xikaha kjonté t'ántaxínihinni chojni la jina ch'eni tí xra í kixin tinkáchónkini Dios tjechón. Jehe ch'an chaxín sinchekaá ch'an kaín tí chojni titekaon tí jehe ch'an.

¹¹ Kaín tíha mé t'ichjánxin tsétoan la ko tsjákua. ¹² Jaha chrókuítgèhya kixin chrókjuaoná sín kjonté naxa ntasoyá. Chrókjuaókoxián tí sín tinkáchónki Inchéni nkexrí chrónixja sín la ko nkexrí ntoá chrók'uejé sín la ko nkexrí chrótjuehe sín Dios la ko nkexrí chrókuítekaon sín Inchéni la ko nkexrí tjóá chrók'uejé sín. ¹³ Nachrohe tsjasán la jaha sinchekuáxian tí xroon itén Dios kixin tsinhin kaín sín la ko sinchexraxinkávan kaín tí sín kichó ni la ko tjákohe sín. ¹⁴ Sinchek'itjáyanhya tí kjuachaxián Dios k'uáyéhé tíó tí sín t'etooon kuénte njnko kjuachaxián Dios k'uejotja tja sín chrítaón ikjá.

¹⁵ Chrókóxakonhan chrókjuinchexiteyá kaín tíha kixin kaín chojni tsotsjehe sín kixin jina noha. ¹⁶ Chrókjuenkayáxian jina tí nkehe tjákua kixin jina chrókjua'k'e jaha, chrókjuinchexiteyá kaín nkehe la ntá tí xikaha sich'e la tsaá jaha la ko tí sín tjejótinhin tjákua la tsaá sín kjaxin sín.

5

Jina chrók'uejé tí sín tinkáchónki Cristo

¹ Jaha la chrókóninkákuenhya tí sín ó táda. Náhi íchá jina chrónixjehé sín jnkojína éxi chrónixjehé it'á. La kjaxin tí sín ntasoá chrónixjehé sín éxi chrónixjehé kichuá mero. ² A ntá tí sín ó nána la mé chrónixjehé sín éxi chrónixjehé iná xikaha. Kjaxin tí sín tjarisoá mé jnkojína chrónixjehé sín éxi chrónixjehé kichuá mero la kjaxin chróchóntehé sín kjuasáya.

³ La ko kjaxin chrókjuinkitsa tí síhjin tsikók'an la ko nchekjtonhén sín nkehe sine sín tí chaxín kohya nkexro tsjinkítsa sín. ⁴ A ntá tí chojni chjin tsikók'an ch'onta xjeen o ch'onta inté, a ntá tí jehe sín mé chrók'uitja sín chrókjuinkitsa sín kixin sine tí sín kjéhya sín. Tíha mé chrókjuenkaxin sín tí it'é, iné sín kixin kjuínchek'ánki sín, kixin xikaha mé jina tóxrjinhin Dios. ⁵ Tí tjan chaxín tsikók'an na jehó tjan tjen tjan mé jehó Dios tinkáchónki tjan la imá chrónóghe tjan Dios tie la ko nchakotjin. ⁶ A ntá tí sín tsikók'an ixri sín tjasin sín jie la kjonté tjejóchón sín la éxi tsik'en sín xikaha tjejó sín. ⁷ Tétuénhén tí sín kixin sinchexiteyá sín kaín tíha kixin tsókohya nkexro tsjanchia jie. ⁸ A ntá tí nkexro tóxakuenhya kixin sín sín naxa kjéhya la ko kjaxin tóxakuenhya kixin sín tjejó ntge ch'an mé xikahó tjakoxin kixin ninkehó tinkáchónkihya ch'an Dios. Mé xikaha antsí ch'onta ch'an jie a ntá tí sín tinkáchónkihya Inchéni la kényó.

⁹ Tí ts'ínixin ihnié tí sín tsikók'an la chrók'uínixin jehó tí sín ch'onta sesenta nánó la ko tí sín k'uéch'onta sín jnkokoá xii. ¹⁰ Kjaxin chrókjuaókoxin tjan kixin jina ch'e tjan xra la ko

chrókjuakoxin tjan kixin jina kjuíncheh'ánkí xjeen tjan la ko kjaxin jina nixjehe tjan tí nkexro tjiiji ntoe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuínkítsa tjan tí sín níhi la ko í so xra jina kjuích'e tjan.

¹¹ A ntá chrók'uénixinhya ihnié tí sín tsíok'án naxa tsjehya nánó chóna kixin tsontáchro asén sín kixin í jnko chojni ntoa tsotéhe sín inaá la ntá tsítóhe sín ixra kuente Cristo. ¹² Ntá xíkaha tjasin sín jie kixin sinchexiteyáhya sín tí nkehe tsintáchro sín. ¹³ Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jina tí xíkaha chrónixja sín. ¹⁴ Méxra tí sín tsíok'án naxa tjarisoá sín la íchá jina chrókótéhe sín chróchóna sín xjeen sín la ko chrók'uàyakonhen sín ntoe sín. A ntá tí xíkaha la tí sín nínkakonhan la chrókjontahya sín tí jaha. ¹⁵ A ntá iso tí sín tsíok'án ó kuítóhe sín tinkáchónki sín Ìnchéni kixin ch'in Tsochren tsíjachróe sín.

¹⁶ A ntá jnkojin chojni tinkáchónki Cristo ts'ikon sín kixin tsíok'án tí síhjin kjéhya sín ntá t'ichjánxin tsjinkítsa sín kixin sine tí sín a kixin tsochóntahya sín tí nínko tsjinkítsa. Méxra jehó tí sín chaxín tsíok'án chónahya nínkexró tsjinkítsa mé chrókjuinkítsa tí nínko.

¹⁷ Tí nkexro jina t'etóan xra kuente nínko la jehé sín chrókjuacha sín la ko kjaxin antsí chrókjuikosáyehe chojni tí sín chaxín xra ó tjejóchronkaxín sín la ko tjako sín. ¹⁸ Kixin xroon itén Dios mé ntáchro kixin: “Chrók'uejóyáhyará kampoza ir'va tí koxinta tjejóch'e xra”, la ko kjaxin ntáchro kixin: “Tí sín ch'e xra la síin kjuachaxin chrókjuacha sín.”*

¹⁹ Chrókuahya kuente jnkojin nkexro tsjikaó kjuach'ia t'eka jie tí nkexro t'etóan xra kuente nínko. T'ichjánxin tsnoxin yaá o iy'á sín tsochrónka kixin chaxin chóna jie tí nkexro a. ²⁰ Chrókjuéntuéhé tí sín tjasin jie nkayakon kaín sín kixin ntá tsinhin tí í so sín kixin tsochakon sín, í tsjasinhya sín jie. ²¹ Tétuanxian kjuachaxién Dios la ko Ìnchéni Jesucristo la ko tí sín ángel kjueyá ch'án kixin jnkokón tsjéntuéhé kaín chojni la ko jnkokón tétuénhén sín kaín tí nkehe xrxanka. ²² Chrókjuéyáhya chjini jnkojin sín kixin ts'etóan sín xra kuente nínko kixin tí chróchóna sín jie la kjaxin jaha chrókuamá tí jie. A ntá jaha chrókuitóhé kaín nkehe jínahya.

²³ Jaha la jnkoyaxón tóniha tjeté tsaa. Jehya intá ó chrók'uaia. Kjaxin intsí xranvino chrók'uaia ntá chrókuitóaxián jina.

²⁴ Tí ijje jnkojin chojni la t'íkonní noxin tí naxa kuítóexinhya ijje sín. A ntá í so sín nóxinhya tjasin sín jie kjánchó tió tsjixixín la tsnoxin tí jie tjasin sín. ²⁵ Mé xíkaha kjaxin ó t'íkonní kixin iso chojni imá ch'e sín tí xra jina. A ntá í so sín kjónté t'íkonhyani la xitjahya tsjak'emá sín tí nkehe jina ch'e sín.

6

¹ Tí sín ch'exín xra mé t'ichjánxin tsochóntehe sín kjuasáya tí lamo kuente sín, kixin ntá tí í so sín la ts'ántaxiéhya sín ihnié Dios la ko ts'ántaxiéhya sín tí nkehe tjakoni. ² A ntá tí sín ch'exín xra la chóna sín lámé sín tinkáchónki Cristo la mé chrókuitóehya sín tsjikosáyehe sín tí lamo kixin jnkokóá kichó sín. La mé antsí jina chrókjuinkítsa sín kixin ó nohe sín kixin tjinkítsa sín ijnko nkexro tinkáchónki Cristo la chrótuéhe sín kichó sín. Jaha mé tjákehé sín kaín tíha.

Tí nkehe tinkáchónkini tsochèxinni

³ Iso sín tjako tí nkehe jehó sín tjenkayáxin sín la tóyóehya tí nkehe jina kjuako Ìnchéni Jesucristo la ko jehya tí nkehe tinkáchónkini. ⁴ Ó jehí nchehnke sín la nínkehó noehya sín. Tí ntoáhya nixja sín la tíha mé éxi ijnko chin chóna sín la tíha mé tjiixin tí kjuachjinoxinhin la ko tjanjonko kichó sín la ko t'ántaxinhin sín kichó sín la ko chóntehya sín kichó sín kjuasáya. ⁵ Mé tí sín la náxjónhya tjenkayáxin sín la jnkochrín tjanjonko kichó sín la noehya sín tí nkehe chaxin. Mé tjenkayáxin sín kixin tinkáchónki sín Ìnchéni kixin xíkaha chrókjuacha sín nchónhya chichaon, ichro sín. Jaha la chrókuitóhé tí sín xíkaha ch'e. ⁶ Tí tinkáchónkini Ìnchéni la ijnko nkehe imá tjetóan la ko tjete tíha a ntá kjuaxróxin chrók'uejóni kjónté tí nkehe chónani ó. ⁷ A ntá tí koljihiní la nínkehó kuikohyani tí kuini chjasintajni la kjaxin tió ts'enni la nínkehó nkehe xitjahya sátsjikoni. ⁸ A ntá tí chónani nkehe sinení la ko chónani ikéni la kjónté táhó la chrókóhéheni. ⁹ A ntá tí sín tjinkaon sín imá chrókóroko sín mé tí sín a mé tsjichróe sín la lonji sín kixin xíkaha tjenkayáxin sín, la mé ts'itjáyanxin sín tíha. ¹⁰ Tí imá tjuéheni chichaon la tíha mé nuéé kaín nkehe jínahya. Jnkojin chojni imá tjinkaon sín tsochóna sín chichaon ntá tsjichróe sín tsítóhe sín tsinkáchónki Ìnchéni la tíha mé imá sinchekjasótéxin sín asén sín.

Jina tí nkehe tinkáchónkini

* 5:18 Deuteronomio 25.4, Mateo 10.10; Lucas 10.7

¹¹ Jaha mé tinkachónké Dios la t̄t̄ohé kaín tí nkehe i. Chrókjuak'e ntoá la ko kaín asán chróxráinkávan Dios la ko chrókuinkachónkia ch'án la ko chrótjuéhé kichua la ko chrókónínkákonhya tjoka la ko chrókjuínchehnkehya asán. ¹² Tjanjonkoa kaín nkehe jehya tí jína la ko kaín asán tinkachónkia Ìnchéni kixin ntá chrókjuacha chrók'ua'yéhé tí kjuachón jnkochrixin kixin mé x̄ikaha k'uiyaha Dios tí jaha. Jaha la ó tsichronka kixin tinkachónkia Ìnchéni la ó kuínhin la ko k'uikon nchónhya chojni. ¹³ Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsichronka jína nkayakon ch'ín Poncio Pilato, mé tétuəghan ¹⁴ kixin s̄inchexiteyá kaín tí nkehe t'etəan Dios kixin í chrókjuínkíhya tí nkehe chrókuinkachónkia la ntá tsokohya ninkexró ts'eka j̄e tío tsjixrakájia tí yaon tsokjan Ìnchéni Jesucristo. ¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chón̄ta ch'án kjuachaxin ts'etəan ch'án. Jehe ch'án mé tí Rey t'etuenhen kaín xín tí s̄in rey la ko jehe ch'án mé Ìnché kaín chojni. ¹⁶ Jehó Dios mé chón̄hya ts'en la tí t̄jen ch'án la imá t'ínkaséyan la ko kohya nínkexró tsjacha tsəchjina tí t̄jen ch'án. Nínkexró k'uikonhya tí jehe ch'án la ko ninkexró xitjahya ts'ikon tí jehe ch'án. Tsjikosáyeheni ch'án kixin jehe ch'án chón̄ta ch'án kjuachaxin ts'etəan jnkochrixin. Amén.

¹⁷ Tí s̄in chón̄ta itsjé nkehe chjasintajni mé tétuəhén s̄in kixin sinchehnkehya s̄in la ko tétuəhén s̄in kixin tsochón̄tiəx̄in̄hya s̄in tí nkehe chón̄ta s̄in kixin jnkochrixin̄hya tsochón̄ta s̄in tíha. Íchá jína chrókuinkáchónki s̄in Dios t̄jechón kixin jehe ch'án tjanjon ch'án kaín xín nkehe kixin mé x̄ikaha tjinkaon ch'án tsəchéhēni. ¹⁸ Tétuəhén s̄in kixin chrókjuich'e s̄in tí nkehe jína kixin tí chaxín chrókóríko s̄in la chrókjuínk̄itsa s̄in kichó s̄in la chrók'óxiəyēhe s̄in tí nkehe chón̄ta s̄in. ¹⁹ Mé x̄ikaha chrókjuacha s̄in tí nkehe t̄jete kixin chr'əx̄in la jína chrók'uejé s̄in kixin chrókjuacha chróchón̄ta s̄in tí kjuachón jnkochrixin.

Kjuixixín k'uituenhen ch'ín Timoteo

²⁰ Jaha Timoteo t'ayakonhén tí x̄ra la tiénhya tí nkehe ntoáhya nixja chojni. Ntáchro s̄in kixin imá nohe s̄in k̄jánchó chaxínhya tíha. ²¹ Iso s̄in ó x̄ikaha ntáchro s̄in kixin imá nohe s̄in la ntá kjuíchrəe s̄in í tinkáchónkihya sin Ìnchéni. Dios chrókjuintayavan tí jaha. Amén. Ó t̄jen.

Tí xroon yóxin ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo mé kjueyána Jesucristo t'aha ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochónta chojni kjuachón jnkochrixin tí tsinkáchónki sín Jesucristo. ² Ikjian tí xroon i chr'anhan jaha kichó ni Timoteo. T'ikuan éxi xjanna tí jaha mé imá tjuaha. Kjuasáyé It'eni Dios la ko Ìnchéni Jesucristo chrókjuintayavan ch'án la ko chrókuiikonòaha ch'án la ko chrótjaha ch'án kjuaxróxin.

Chróchrónka ch'án kixin tinkáchónki ch'án Jesucristo

³ Xráxinkávan tí jaha tió níxjaha Dios nchakotjin la ko tie la ko tjétjáncháha kjuasáyé Dios kixin imá tinkáchónka ch'án. Jehé ch'án mé t'aha xra kaín asenná éxi xikaha mé k'uekjich'e tí sín tsik'axrjenixinna. ⁴ Xráxinkávan jnkochrixin nkexrí tsjanka la tjínkavan kixin chrótsjaha tí jaha inaá kixin tsóchéhe asenná. ⁵ Ó nòna kixin kaín asán tinkáchónka Jesucristo. Kjaxin náchrja tjan Loida la ko iná tjan Eunice mé saoxin kuinkáchónki sín Ìnchéni Jesús la ntá ó nòna kixin kjá kjaxin jaha xikaha tinkáchónka ch'án.

⁶ A ntá ijie ntáxráxinkávan kixin chrók'uitjányanhya tí kjuachaxién Dios kjuanjon ch'án k'uayéhé tió kjuaké tjaná chrítaón tí jaha. ⁷ Dios la kjuanjonyha Nchakuen ch'án kixin tsochrakonni. Náhl. Kjuanjon ch'án tí Nchakuen ch'án kixin tsochóntani kjuachaxin la ko jína tsotjuèheni ch'án la ko jína tsjenkayáxinni. ⁸ Chrókósuàhya chróchrónka kixin tinkáchónka Ìnchéni la ko kjaxin chrókósuàhya chróchrónka kixin janhan tjéchjinaxián tí xrxjanka itén ch'án. Kjónté la íchá jína chrókjuasótexián tí tjákua tí tan tsaáxinni kixin tí kjuachaxin kuènte Dios ó k'uayéhé. ⁹ Jehé Dios mé kuaáxinni la ko kjueyá ch'án tí jeheni kixin jína chrók'uejóni. La jehya tí xra jína kjuich'eni ntá chrókuaáxinni. Náhl. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxa xrankixixinnya chjasintajni mé tsikjenkayáxin ch'án tíha kixin jehé ch'án mé imá tjuèheni ch'án. ¹⁰ Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjáyvan ch'án tí kjuachaxin k'uechónta tí kjuach'én kixin kjuacha ch'án xechón ch'án inaá. Chronkaxin itén ch'án nkexrí tsaáxinni ntá ó kónoexinni kixin tí kjuachón kjuakoxin ch'án mé xitjahya ts'itjáyvan.

¹¹ Dios mé k'uetuanna sátsjixrxjanka itén ch'án la ko kjueyána ch'án tsjákoħa tí sín jehya sín judío tí tan jína. ¹² Mé xikaha tjétjasótexinna kaín tí nkehe i la kjónté tósuànahya kixin ó choxian jína tí nkexro tinkáchónka. Mé ó nòna kixin chónka ch'án kjuachaxin ts'ayakonhenni ch'án tsjixrakájia tí yon tsokjan ch'án. Méxra janhan tjaha ch'án asenná kixin ts'ayakonhen ch'án.

¹³ T'itjáyvanhya tjákua kaín nkehe jína ó kjuákoħa. Naxa titekávan la ko tjuèhé kichuára kixin tinkáchónka Cristo Jesús. ¹⁴ Kjuachaxién tí Nchakuen Dios chóntani jnkobjnkoni mé t'ayakonhén jína tí tan tjákua kjuíntakjtonhan Dios k'uayéhé.

¹⁵ Jaha mé ó noha kixin kaín tí sín estado Asia mé jehé sín kuítóna sín la ko kjaxin tí ch'ín Figelo la ko ch'ín Hermógenes. ¹⁶ Tjánháha Ìnchéni kixin imá tsikonóhehe ch'án tí sín tjejó ntøe tí ch'ín Onesiforo kixin jehé ch'án mé imá kjuínkítsana ch'án la ko kósuèhya ch'án ikui ch'án kjónté tjéchjina. ¹⁷ Tí nantá kjuuji ch'án chjasin Roma ntá kuitøehya ch'án kjueyána ch'án hasta k'uitjana. ¹⁸ Tjánháha Ìnchéni kixin tí yon itsi ch'án ntá chrókuiikonóhehe ch'án tí ch'ín a kixin jaha ó noha jína kixin nkexrí kjuínkítsa ch'án tí janhan tí chjasin Éfeso kjaxin.

2

Kjuíncheyóxin ch'ín Pablo kixin jeheni éxi yóhe ijnko soldado jína kuènte Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjínkítsa kixin tinkáchónkini ch'án. ² Tí nkehe kuínhín kjuákua nkayakon nchónnya chojni mé xikaha chjehé tí xra tí sín jína choxian jína ch'e xra kixin ntá jehé sín mé xikaha chrókjuakøhe sín i so chojni inaá.

³ Jaha la kjónté nchónnya nkehe kjuasótia la chrókjuacha kixin ijnko soldado jína kuènte Jesucristo. ⁴ Kohya nijnko soldado jína ch'e xra chrók'ui xenhen ókjé xra kixin t'ichjánxin jnkójnón xra sich'e ch'án kixin éxi tjinkaon tí nkexro t'etøenhen ch'án. ⁵ Mé xikaha éxi yóhe ijnko nkexro tsotsítán. Ntá tsjachahya ts'áyéhé ch'án nijnko nkehe tí sinchexiteyèhya ch'án tí sín t'etøan. ⁶ La éxi yóhe ijnko nkexro ch'e xra nonte ntá chónka ch'án kjuachaxin

saoxín tsakja ch'án tí nkehe ts'óna. ⁷ Chrórxaxinkávan jína kaín tí nkehe xrjanka la ìnchéni mé tsjinkítsa tsiénxian kaín nkehe.

⁸ Xráxinkávan kixin Jesucristo la ó xechón ch'án. Jehé ch'án mé k'uaxrjenixin ch'án ch'ín rey David. Tíha mé tí tan jína tsaáxinni tjétjákua. ⁹ Tí tan tjéxrjanka mé tjasótexinna. Tíha mé tjéchronretoxinna cadena éxí ijnko chojni tsíkjàya la kjónté tí itén Dios la jehya tjéchronretoxín cadena. ¹⁰ Méxra kjónté nchónhya t'atsínka tí janhan la ntáxiteyá kixin tí í so sín kjueyá Dios tsaáxin sín ch'án kixin tsochóna sín kjuachón jnkochríxín kixin tinkáchónki sín Jesucristo.

¹¹ Tíhi mé chaxín:

Tí jehé ch'án k'uénxinni ch'án a ntá chr'éxin ts'ejókoni ch'án.

¹² La tí tsjasótexinni tí jehé ch'án la ntá kjaxin ts'áyéhéni kjuachaxin kuènte ch'án ts'etoanni. A ntá tí chrókjuinchemáni tí jehé ch'án na ntá kjaxin ch'án la xíkaha sich'e ch'án.

¹³ Kjónté nchexiteyèhyani ch'án la jehé ch'án tjenchexiteyá ch'án kixin Dios la xitjahya sich'ia ch'án.

Chrókuich'eni tí xra jína

¹⁴ Nchexraxinkávan sín kaín tí nkehe i. Dios tjetsjehe tétuénhén sín kixin chrókuítoghe sín tí nixja sín tjanjonxin sín kixin ó chónkó tíha la ninkehó sínkíhya. Tí xíkaha ch'e sín la sinchek'ítjáyán sín tí sín tjejótinhin. ¹⁵ Sich'e xra jína kixin tsóxrjínhin Dios tí xra tjech'e a. Ntoá chrókuákua tí tan jína chaxín kixin ntá chrókuichjánxinhya chrókósuaha. ¹⁶ La títoghé tí nkehe náxrxónhya la ko chónkó nixja iso sín kixin tí sín nixja xíkaha la antsí tsinkák'ánkí tí nkehe jínahya nixja sín. ¹⁷ Tí nkehe jehya jína tjako sín mé éxí yóhé ijnko iton sóa sitinkáchr'enka. Mé xíkaha tjako tí ch'ín Himeneo la ko ch'ín Fileto. ¹⁸ Jehé sín mé ó kjuixin kuitoghe sín tí ntja ntoá la ntáchro sín kixin ó kjuixin k'uátsínka tí tsóexochon chojni. Ntá xíkaha ch'iyehé sín tí í so sín la tsjitóxinhin sín tí nkehe tinkáchónki sín. ¹⁹ Kjánchó tí sín tinkáchónki Dios éxí yóhé tí xro xrankíxín tjat'o xitjahya tsókika la chóna éxí ijnko sello tí itén Dios ntáchro kixin: “Ìnchéni mé tjatsoan ch'án tí chojni kuènté ch'án”,* la kjaxin ntáchro kixin: “Kaín tí sín tinkáchónki Cristo mé t'ichjánxin chrókuítoghe sín kaín nkehe jínahya,” mé xíkaha ichro itén Dios.

²⁰ Ijnko nchia jíé kuènte tí sín rico la síin vaso tsík'óna chica oro la ko vaso tsík'óna chica plata. La kjaxin síin nkehe tsík'óna ntachiso la ko nkehe tsík'óna nchetje. Iso la xra ó tsík'óna kuènte tí xra tjetooan la í so la tsík'óna kuènte tí xra tjetuanhya. ²¹ A ntá ijnko chojni chrókuítoghe kaín jíe chrókóyóhé éxí ijnko vaso tjóá jína kixin chrókuicháxinhin Ìnchéni. A ntá tí nkexro xíkaha chrókuich'ehya tí nkehe jínahya kixin chrókuicháxinhin Ìnchéni tí xra jína.

²² Títoghé kaín tí nkehe jehya tí jína tóxrjínhin í so tí sín ntasoá a. Chrókuak'e tí ntja ntoá la ko kaín asán chrókuinkachónkia Cristo la ko chrótuèhé kaín chojni la ko kjuaxróxin chrók'uejokoa kaín sín. Mé xíkaha chrók'uejó kaín xín tí sín kótjóá asén mé kaín tí sín tinkáchónki Ìnchéni. ²³ Jaha chrókuaaha kuènté tí sín lontj tjenkayáxinhya jína kixin jaha ó noha kixin xrahya chrókjuanjonko kíchó sín. ²⁴ A ntá nkexro ch'ehé xra Ìnchéni chrókjuanjonko kíchó sín kixin jína chrókjuinkítsa kíchó sín. Chrókónohe sín kaín nkehe jína chrókjuako sín la ko chrókóninkakuenhya sín kíchó sín. ²⁵ Kaín asén sín jnkojína chrónixjehé sín tí sín titekakonhya kixin chróchónhen sín kixin Dios chrókjuinkítsa tí sín a chrók'uíxinkí tí ntoáhya tjenkayáxin sín kixin ntá chrókónohe sín tí nkehe chaxín ntoá chrókjuich'e sín ²⁶ kixin t'ichjánxin chrókónohe sín nkexrí chrókuaáxin sín kixin ch'ín Tsochren tjinkaon chrókjuich'iyehé sín ntá chrókjuasin sín jíe.

3

Nkexrí ts'ejó tí chojni chjasintajni tí yaon tsjixixín

¹ T'ichjánxin chrókónoha kixin tí yaon tsjixixín ntá itsi tí yaon kjuaxróxinhya ts'ejó chojni. ² Tí sín chjasintajni tsinkáchónkihya Ìnchéni mé imá chrók'uetooan sín jehó la ko imá tsóxrjínhin sín chichaon la ko sinchehnke sín la ko imá ts'ántaxínhin sín Dios. Sinchexiteyèhya sín it'é sín la ko iné sín la ko tsochóntahya sín kjuasáya la ko tsinkáchónkihya sín ninkehó díos. ³ Tsojtúèhya sín kíchó sín la ko tsikonóèhya kíchó sín la ko tsjonta sín kíchó sín la ko nkexró tsochrakuenhya sín la ántosén sín tsjasin sín jíe, la ko imá tsojtíehé sín la ko imá tsonínkakonhen sín kaín nkehe jína. ⁴ Jehé sín mé sinchekji kíchó sín la ko tsjenkayáxinhya sín jína la ko sinchehnke sín. Tsojtínkaon sín tsjeyá sín tí nkehe ntáchro asén sín ó a ntá tsjeyáhya sín Dios. ⁵ Jehé sín la éxí chojni tinkáchónki Dios xíkaha ts'ejó sín. Kjánchó chaxínhya. Tsinkáchónkihya sín tí kjuachaxin kuènte Dios chaxín ntoá.

Méxra jaha la chrókuankíehya tí chojni ch'e xíkaha. ⁶ Iso tí sín a mé ixri sín t'ixenhen ntog ókjé chojni la ch'iyehé sín tí chojni chjín lontj tjasin jíe la nchexiteyèhé sín kaín tí ntáchro

* 2:19 Números 16.5; Juan 10.14

asén sín. ⁷ La xráxín ó tinkák'itja sín kjánchó nunca kuénxínhya sín tí nkehe chaxín ntoá. ⁸ A ntá éxi yóhe tí sín k'uékjinchexroan mé ch'in Janes la ko ch'in Jambres mé k'uénínkakonhen sín ch'in Moisés mé xikaha tí sín tjako ijie nínkakonhen sín tí nkehe chaxín ntoá. Imá jínahya tí kjuaxrexinkaon kuénte sín la ko titekakonhya sín tí nkehe chaxín tinkáchónkini. ⁹ Kjánchó tsjachahya sín sich'ia sín isé káxin kaín chojni tsonohe káxin tí sín a mé lóntj sín káxin éxi xikaha tsíkónhen tí yaá sín k'uékónínkakonhen ch'in Moisés.

Tí nkehe kjuixixín k'uetuēnhen ch'in Pablo tí ch'in Timoteo

¹⁰ A ntá jaha mé ó kuitekávan tí nkehe kjuákua. Ó noha nkexrí kjuak'é janhan la ko ó noha tí xrá kjuít'a janhan. Ó noha nkexrí tinkáchónkia Ìnchéni la ko noha káxin tjokahya kónínkavan la ko noha nkexrí tjuahá chojni. Ó noha káxin kjónté kónínkaon chojni la kuitóahya tí xrá a ¹¹ kjónté chónkina sín la ko kjuasótena. Ó noha nkehe kónna tí chjasin Antioquia la ko Iconio la ko Listra. Chrók'óyánna sín la kjuínchekjuasótena sín kjánchó Ìnchéni mé kjuínkítsana kjónté kaín tí nkehe chrókónna. ¹² Kaínxín tí sín tjínkaon tjóá chrók'u'ejó sín nchexiteyéhe Cristo Jesús la t'ichjánxin tsjasóte sín. ¹³ A ntá tí sín jínahya la ko tí sín ixrí ch'ia sín mé ts'óna sín antsí jínahya. Jehé sín xrich'ia sín la ch'iaxín sín nkehe jínahya.

¹⁴ Jaha la jína chrókjuak'e la í chrókjuínkíhya tí nkehe k'uitjá la ko tí nkehe ó kuitekávan. Jaha la ó noha tí nkexro kjuakoha. ¹⁵ Jaha la desde xjanntsia k'uitjá nkexrí nixja xroon itén Dios la tíha mé tónoexínni káxin Cristo Jesús tsaáxinni káxin tinkáchónkini ch'án. ¹⁶ Ntá kuenté xroon Biblia kjuachaxiēn Nchakuen Dios kjuínkítsa tí nkexro ikjin la tíha mé jína tsoxrácuexinní tí nkehe chaxín la ko tíha mé jína tsjentuēheni la ko tsjinkítsani tsonoheni nkexrí chrók'uejóni ntoá ¹⁷ káxin tí nkexro tinkáchónki Dios chrókónohe jína la ko chrókjuacha sich'e kaín tí xrá jína.

4

¹ Kjuachaxiēn Dios la ko Ìnchéni Jesucristo, tí nkexro itsi éxi ijnko rey la sinchekitóexín ijje kaín chojni tjejóchón la ko tí chojni tsík'en, ² mé tétuanhan chrókjuákua itén Dios kaín asán kjónté á chrókuinhin sín o náhi. Nixjehé sín jnkojína káxin tsitekaon sín la ko tjéntuéhé sín jnkojína. Chrókónínkákónhya chrókjuákohé sín. ³ Itsi ijnko yaon ntá tsotjinkakonhya sín tsinhin sín tí nkehe jína. A ntá sinchexiteyéhe sín tí nkehe ntácho asén sín ó. Tsjeýá sín nchónhya maestro tsjakohé sín jehó tí nkehe tóxrjínhin sín chrókuinhin sín. ⁴ Méxra tsítóhe sín tí nkehe chaxín ntoá la ntá itsa sín kuénté kaín nkehe chaxínhya. ⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xrá chrókjuákohé chojni itén Dios tsaáxinni mé xikaha sinchexiteýá jína tí xrá chonta.

⁶ Ntá janhan ó kjuixiraká tí hora tsjasótena la ko ó kjuixiraká tí hora its'én. ⁷ Ó kjuánjonkian jína kaín tí nkehe jínahya la ko ó kjuixinna tí xrá kuéntana la ko kuitóahya jína kuínkachónkia Ìnchéni. ⁸ A ntá ijie la tí nkehe tsjónna mé tjechónhen káxin jína kjuak'é ntihi. Tíha mé tsjanjon Ìnchéni tí yaon itsi ch'án. Jehé ch'án mé ijnko juez jína. Jehya káxin janhván tsákjaá tí nkehe tsjanjon ch'án. Náhi, kjáxin kaín tí nkexro kuitekaon sín ch'án la ko chéhe sín tjejóchónhen sín tió tsi ch'án.

Ch'in Pablo k'uetqan tsjijitsjehe sín ch'án

⁹ Jaha chrókóxakonhan tjoka chrók'uinkatsjehé tí janhan ¹⁰ káxin ch'in Demas la kuitóhe ch'án tí janhan káxin imá kóxrjínhin ch'án tí nkehe kuénte chjasintajni. Sátsíkji ch'án chjasin Tesalónica. Ch'in Crescente mé sátsíkji ch'án chjasin Galicia a ntá ch'in Tito sátsíkji ch'án chjasin Dalmacia. ¹¹ Jehó ch'in Lucas naxa tjékjan ch'án. Tjikjéýá ch'in Marcos la tsjikuana ch'án ntihi káxin jehé ch'án mé jína tsjinkítsa ch'án tí xrá chonta ntihi. ¹² A ntá ch'in Tíquico mé kuétuanhan ch'án sátsji ch'án chjasin Éfeso. ¹³ Tió ts'inka ts'inkakuana tí ka t'itsate kuitóha chjasin Troas ntóhé ch'in Carpo la ko kjáxin ts'inkakuana tí libro kuéntana la ko kóí tí tjeó iko tsík'óna xroon.

¹⁴ Tí ch'in Alejandro tí ch'in ch'e xrá chica mé nchónhya nkehe jínahya kjuich'ena ch'án. Kjánchó Ìnchéni mé tsjenkehe ch'án kaín nkehe kjuich'e ch'án. ¹⁵ Jaha mé tóxakonhan káxin tí jehé ch'án káxin imá nínkakonhen ch'án tí nkehe tjakoni.

¹⁶ A ntá tí saoxín k'uéya tí síxree tí kjuia tí tjejó sín la ninkexró kjuínkítsahyana. Kaín sín mé kuitóna sín janhván. Kjónté xikaha la tjáncháha Dios káxin chrókjuahya ch'án kuéntá káxin xikaha kjuich'e sín. ¹⁷ Kjánchó Ìnchéni mé chaxín kjuínkítsana ch'án la kjuanjon ch'án kjuachaxín káxin tsjachana naxa jína tsjakua itén ch'án. Ntá kuínhin kaín tí sín jehya judío. A ntá Ìnchéni kjuínkítsana káxin kjóneyhana koxra. ¹⁸ Ìnchéni mé tsjinkítsana káxin naxa tsonnahya kaín nkehe jínahya. Jehé ch'án mé ts'ayakonna ch'án ts'ixanhan tí tjet'etqan ch'án nkaya nkajni. Kjuasáyé ch'án káxin xikaha jnkochrín tsoxiteýá. Amén.

Ch'in Pablo kjuixixín nixja ch'án

¹⁹ Jaha nixjehé tí tjan Prisca la ko ch'ín Aquila la ko nixjehé tí sín síin ntɔe ch'ín Onesíforo.
²⁰ Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kixin kóníhi ch'án. ²¹ Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kichó ni ntihi nixjaha sín jnkojína.

²² Ínchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

Tí xroon ikjin ch'ín Pablo chr'énnen ch'án tí ch'ín Tito

Ch'ín Pablo nixjehe tí ch'ín Tito

¹ Janhan Pablo mé t'aha xra Dios la ko tsíkjeýána Jesucristo káxin tsjákoḡa tí í so sín tsíkjeýá Dios kjaxin káxin ts'itja sín tsoḡoḡa sín káxin nkexrí chrókuinkáchónki sín tí nkehe chaxín. ² Ntá ts'ejóchónhen sín tsochónḡa sín kjuachón jnkochr'ín. Dios la xitjahya sich'ia la káin tí nkehe tsíchronka ch'án ósé tí naḡa k'ónahya chjasintajni la mé xíkaha tsoḡnhen. ³ Ntá tí yaon tsintácho Dios la mé jie ó xiteýá la ntá kónoxín tí tan kuente ch'án. A ntá Dios tí nkexro tsaáxinni mé k'uetḡan káxin sit'aha ch'án xra tsjákuá itén ch'án. ⁴ Ikjan tí xroon í chr'anhan jaha Tito. T'íkuan éxi chaxín xjanna tí jaha káxin yóini tinkáchónkini Jesús. Kjuasáyé It'eni Dios la ko Jesucristo tí nkexro tsaáxinni, chrókuinjuntayavan la ko chrókuikonóḡa ch'án la ko chrótjaha ch'án kjuaxróxin.

Tí xra sich'e tí ch'ín Tito chjasin Creta

⁵ Kujtḡa jaha tí isla Creta káxin jaha chrókuétuēnhén tí sín siín ntiha káxin nkexrí chrók'uejó sín la ko chrókónoxín nkexro ts'etḡan kuente jnkojnko njnko jnkojnko chjasin éxi tí kuétuanhan jaha. ⁶ T'ichjánxin káxin tí nkexro ts'etḡan xra kuente njnko la jina chrókjuak'e káxin kohya nkexro chrók'ueka jie, la ko chróchónḡa jnkokḡa ichjién la ko tí xjeen sín chrókuinkáchónki Inchéni káxin tsokohya nkexro chrókjuanchia jie káxin jehya tí jina tjejóch'e sín, la ko kjaxin chrókójiēhya sín. ⁷ Mé xíkaha tí nkexro ts'áyehe tí xra ts'etḡan xra kuente njnko mé ts'etḡan nkexrí tsoḡnhen xra kuente Dios la ntá t'ichjánxin jnko nkexro tsjenkayáxin jina, chrókjuasinhya jie. La chrókjuinchehnkehya la ko chrókóninkakonhya tjoka. La ko kjaxin jehya jnko nkexro tókoan la ko jehya jnko nkexro tjeýá kjuánkaon la ko chrókóxrjienhya sín chrókjuich'ia sín ntá chrókjuacha sín chichaon. ⁸ Kjaxin jina chrókjuak'e ch'án káxin tí tsjiji jnko nkexro ntḡe ch'án chrókjuanjon ch'án kjuachaxin chrókjuak'e tí nkexro a. La ko jina chrókjuak'e ch'án la ko jina chrókjuenkayáxin ch'án káxin jnko nkexro ó tsíkjinchetjóa Dios la ko chróchónḡa ch'án kjuasáyé ch'án. ⁹ Kjaxin t'ichjánxin chrókúḡehya ch'án tí tan jina xrákoḡe ch'án káxin ntá jina tsjákoḡe ch'án í so chojni tí nkehe ntoá la kjónté nkexro tjinkakonhya tsinlin la jina chróchenka ch'án chrókuinlin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxi lontjé sín mé xíkaha ch'iyehé sín chojni. ¹¹ Tí sín a la chrók'uík'jeḡeni ir'va sín káxin tjachróe sín nchónhya chojni káxin tjako sín tí nkehe jehya jina káxin chrókjuich'ia sín chrókjuacha sín nchónhya chichaon.

¹² Jnko ch'ín kuente chjasin Creta la mé tsíchronka ch'án nkexrí tjejó tí sín chjasén ch'án. Ntácho ch'án káxin: “Káin tí chojni chjasénni mé imá ch'ia sín la ko imá jiehe sín la ko imá kóchjinka sín la ko séhe sín”, mé xíkaha chrónka ch'án. ¹³ Tí nkehe tsíchronka ch'án mé chaxín ntoá. Méxra antsi fuerte chrókjuéntuēhé sín káxin ntá jina chrók'uejó sín chróxraxinkaon sín Dios. ¹⁴ Nixjehé sín káxin chrókuahya sín kuente káin tí nkehe tsík'axrjenixin kja tí sín judío tjako la ko chrókuitekakonhya sín tí nkehe t'etḡan tí sín nínkakonhen tí nkehe chaxín.

¹⁵ Tí sín chaxín tjóa kjuaxrexinkaon kuente sín ntá káin nkehe ch'e sín la jina. A ntá tí nkexro titekakonhya la tjuáhya kjuaxrexinkaon kuente la kohya ninkehó nkehe jina tí kjuaxrexinkaon kuente sín la káin nkehe tjenkayáxin sín mé tjuáhya. ¹⁶ Ntácho sín káxin chóxin sín Dios a ntá tí t'ikonni nkexrí ch'e sín ó noexinni káxin chaxínhya tíha la ch'ia sín. Jehé sín mé ntoáhya tjenkayáxin sín la ko jiehe sín la ko titekakonhya sín. A ntá tí xíkaha ch'e sín la, ¿nkexrí chrókjuich'e sín tí xra jina?

2

Chrókjuako ch'ín Tito tí tan chaxín

¹ A ntá jaha chrókjuákua éxi tí chrónka tí tan jina chaxín. ² Tjákoḡe tí sín ó táda káxin chrókókoanhya sín la ko jina chrók'uejó sín la ko chróchónḡa sín kjuasáyé sín la ko chróchónḡa sín jnko kjuaxrexinkaon jina la ko jina chrókuinkáchónki sín tí nkehe chaxín la ko chrótjuehe sín kichó sín la ko chrókóninkakonhya sín kjónté tsjasóte sín. ³ A ntá kjaxin xíkaha tí sín ó nána la kjaxin jina chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuakoxin sín jnko kjuaxrexinkaon jina ⁴ káxin xíkaha chrókjuakuexin sín tí chojni chjin tjarisoá a káxin chrótjuehe sín xii sín la ko chrótjuehe sín xjeen sín ⁵ la ko chrókjuich'e sín xra jina la ko ntoá chrókjuenkayáxin sín la ko jina chrók'uáyakonhen sín nchia ntḡe sín la ko chrókójina sín la ko chrókuitekakonhen sín xii sín. Tí xíkaha chrókjuich'e sín chrókjuinchehiteýá sín la kohya nkexro chrók'uántaxinlin tí itén Dios tinkáchónkini.

⁶ Kjaxin xíkaha chrókjuinchehraxinkávan tí sín ntasoá káxin jina chrók'uejó sín chróchónḡa sín kjuasáyé sín. ⁷ Jaha mé chrókjuákoéxian sín káin nkehe jina la ko chrókjuákoḡe sín káxin

ntoá chrók'uejó sín. ⁸Jaha la chrónixja tí nkehe jína kixin kohya nkexró chrók'uaántaxín la ntá xíkaha chrókósuèhe tí sín nínkaon la ntá kohya nkehe jínahya chróntáchro sín kuènte tí jeheni.

⁹Tétuènhén tí sín xrich'exón xrá kixin chrókjuinchexiteyéhe sín tí lamo kuènte sín la ko chrókójina sín la ko chrónixjankjehya sín tí nkexro ch'ehe sín xrá ¹⁰la ko kjaxin chrókueéhya sín kixin jehya ijnko chojni chee tí jehe sín. Ntá kaín chojni chrók'uikon sín kixin tjakoxin sín kixin náxrjón tí itén Dios chrókuaáxinni.

¹¹Kixin Dios mé kjuakoxin ch'án kixin nkexrí tjuèhèni ch'án kixin jehe ch'án mé tsaáxin kaín chojni. ¹²Kjuasáyé Dios mé tjakqeheni ch'án kixin chrókuitqeheni kaín nkehe jje la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókukáchónkini Dios. ¹³Kjaxin chrók'uejóni jína kixin chrókóchéhèni chrók'uejóchónhenni tí yaon kjuachaxièni Dios jje itsi Dios la ko Jesucristo tí nkexro tsaáxinni. ¹⁴A ntá jehe ch'án mé k'uenyákonhenni ch'án kixin tjinkaon ch'án tsaáxinni ch'án kixin tsotjuáxin kaín jje chóntani kixin ntá jeheni mé ts'ónani ijnko chojni sich'ehe ch'án xrá la ko tsoxrjinhjini sich'eni kaín xrá jína tjinkaon ch'án.

¹⁵Tíhi mé chrókjuákua la ko chrókjuinchexraxinkávan sín la ko chrókueétuènhén sín kjuachaxièni Dios. Chrókuitqéhya kixin ninkexró chrókókqjonièhya tí nkehe tjákua jaha.

3

Jína chrók'uejó tí sín tinkáchónki Cristo

¹Chrókjuinchexraxinkávan sín kixin sinchexiteyéhe sín tí gobierno la ko tsitekaon sín ichrén xrá ts'etoan tí sixréé kixin chrókjuich'e sín kaín xrá jína ts'etoan tí sín a. ²La ko chrók'uaántaxiènhya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxin sín kixin jehya ijnko chojni nchehnke la chrókjuikosáyehè sín kaín chojni.

³Jeheni kjaxin ósé k'uélontjini la ko k'uékitekakonhyani Dios. Chjini k'uék'ajini la k'uékóxrjinhjini kaín nkehe jínahya. La ko jehya jína k'uék'ejóni la ko k'uéchóntani kjuachjinqoxínhin la ko k'uéchjinoxiènhenni í so chojni. ⁴A ntá tí Dios tsaáxinni mé kjuakuèxinni ch'án kixin jína ch'án la ko tjuèhe ch'án kaín chojni. ⁵Jehe ch'án kuaáxinni ch'án la jehya kixin ichrén xrá jína chrókjuich'ehehèni ch'án. Náhi, ó jehi kuikonóehèni ch'án la ntá kjuínchekaáni ch'án la ko kjuínchetjóáni ch'án. Ntá kokjìhini nixin kixin tí Nchakuen ch'án la mé k'uáyèxinni kjuachón nixin. ⁶Kjuasáyé Jesucristo tí nkexro tsaáxinni ntá kjuínchekitonhenni Dios Nchakuen ch'án kixin tsochóntani kjuachaxin kuènté ch'án. ⁷A ntá xíkaha kjuasáyé ch'án kjuínchetjóáni ch'án kixin ntá tjejóchónhenni tí kjuachón jnkochrixín tsjanjon ch'án.

⁸Kaín tíha mé chaxín. Tjinkávan kixin jaha chrókueétoan kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkítsa kaín chojni. ⁹A ntá jaha mé tjtóhé tí sín tjachaxin kichó sín lontjín sín la ko tjtóhé tí nkehe tinkáchónki sín kuènte tí sín tsik'axrjenixin sín la ko tjtóhé tí sín tjantonxin tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

¹⁰Jnkojín nkexro tjinkaon tsjixrónkáxin tí tójnkotsé nínko ntiha la nixjehé ch'án jnkojína senó la ko yóxin inaá ntá tí titekakonhya ch'án ntá tjtóhé sátsji ch'án ¹¹kixin ó noha kixin tí chojni xíkaha a mé ntoáhya tjenkayáxin sín kixin jehó sín nchek'ánkí sín ijje sín.

Tí nkehe k'ueétoan ch'ín Pablo

¹²Ti tsétuanhan ch'ín Artemas la ko ch'ín Tíquico kixin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kixin ntiha tsjak'é ts'atsínkajia tí nchakuen kin. ¹³Jína chrókjuinkítsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchéhé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanyha tí t'ichjánxinhin sín. ¹⁴Ntá tí sín í so chrók'uitja sín nkexrí sich'e sín tí xrá jína la ko chrókjuinkítsa sín kichó sín ichrén nkehe t'ichjánxinhin sín kixin chrókjuakoxin sín kixin jína tjejó sín.

Ó kjuixixin nixja ch'ín Pablo

¹⁵Kaín tí nkexro tjékian janhan ntihi nixjahá sín jnkojína. Jaha mé nixjehé kaín tí sín tinkáchónki Ìnchéni ntiha mé kaín tí sín imá tjuèhèni sín. Dios mé chrókjuincheyaonrá ch'án kaín rá. Amén. Ó tjen.

Tí xroon chr'énhen ch'ín Pablo tí ch'ín Filemón

Ch'ín Pablo nixjehe ch'ín Filemón

¹ Janhan Pablo tjéchinaxián tí xra kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóh'eni xra kuènte Dios. ² Kjaxin chrókuinhin kaín tí sín tinkáchónki Ìnchéni tójnokotsé ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxi tí jeheni. ³ Kjuasáyé It'éni Dios la ko Ìnchéni Jesucristo chrókujintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xrácín tjáncháha kjuasáyé Dios tí xrácinkavan tí jaha tí nixjaha Dios ⁵ kixin ó kujnhan kixin imá tinkáchónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios. ⁶ Tjáncháha Dios kixin tsjinkítsa ch'án tí sín kuítekaon tió kjuákohe sín kixin ntá tsienxín sín jína nkexrí kaín tí nkehe chótani kixin kjuincheyaonni Cristo Jesús. ⁷ Imá chàna kixin ó nòna kixin jaha kichó ni imá tjuèhé tí sín kichúa ntiha la ko imá kjuinchechéhé asén tí sín tinkáchónki Ìnchéni.

Ch'ín Pablo chrónóhehë tí ch'ín Filemón kixin tsikonóhehë ch'án tí ch'ín Onésimo

⁸ Janhan na kjueyána Jesucristo t'aha ch'án xra méxra chonta kjuachaxin tsétuanhan jaha tí nkehe chrókuich'e. ⁹ A ntá íchá jína jehó xrjannóaha tsítekavan kixin jaha tjuèhé tí janhan. Janhan Pablo mé ó tádana la ko tjéchinaxián tí xra kuènte Jesucristo. ¹⁰ Méxra xrjannóaha tsjinkítsa tí ch'ín Onésimo. Jehé ch'án mé t'ikuan éxi xjanna kixin kjuankixin ch'án tsinkáchónki ch'án Jesucristo tí tjéchinakian ch'án ntihi.

¹¹ A ntá tí ósé ch'ín Onésimo mé kjuit'ahya xra jína. A ntá ijie ó nòna kixin imá jína sit'aha ch'án xra tí jaha la ko jína sich'ena ch'án xra kjaxin. ¹² Ntá ijie tsétuanhan ch'án tsjiji ch'án tí tjen jaha inaá. Chrótjuèhé ch'án éxi chrótjuèhé tí janhan. ¹³ Janhan tjínkavan chrókuitonakian ch'án ntihi kixin chrókuinkítsana ch'án chrínki tí chrókuak'e jaha kixin tjéchinaxián tí itén Jesucristo. ¹⁴ Kjánchó tjínkakonhya tsjáncháha xikaha tí tjínkakonhya jaha. Jehya kixin jaha chrókuinkítsani kixin chrókuétuanhan xikaha. Náhí. Jehí tjínkaonni éxi jaha tóxrjínhan chrókuich'e. ¹⁵ Tí ch'ín Onésimo kuítóha ch'án iso yaon a ntá jie la tsochonta ch'án jnkochrixín. ¹⁶ Ijie la jehya éxi ijnko chojni tsik'íná chrók'uikuan ch'án. Náhí. Ntá jie la éxi ijnko nkexro ch'e xra antsí jína mé éxi ijnko kichua chrótjuèhé ch'án. Janhan na tjuaha ch'án kjánchó tí jaha la antsí má chrótjuèhé ch'án. Jehya éxi chojni ó chrók'uikuan ch'án. Náhí. Chrók'uikuan ch'án éxi ijnko kichua kuènte Ìnchéni.

¹⁷ Méxra tí chaxín t'ikuan tí janhan éxi kichó ni jnkokoá tinkáchónkini Ìnchéni ntá chrók'uayéhé ch'án éxi chrók'uayéhé tí janhan. ¹⁸ A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha. ¹⁹ Janhan Pablo mé tjaná kjinxian tí xroon i na mé janhan tsjénkaha tíha. A ntá janhan tjínkakonhya chrókujintaxraxinkávan tí jaha kixin kaín tí nkehe tsjikána tí janhan kixin kjuákohá jaha. ²⁰ Méxra kichó ni tsotsenkávan sich'e tí nkehe tjáncháha chaxín tinkáchónkia Ìnchéni. Mé xikaha sjinchechéhé asenná kixin jaha mé kichó ni tinkáchónki Cristo.

²¹ Méxra ikjian tí xroon i chr'anhan kixin ó nòna kixin jaha la sjnchexiteyá tíha la ko ó nòna kixin jaha la sich'e antsí má que tí nkehe tjáncháha jaha. ²² Kjaxin tjáncháha kixin tjéyá ijnko nchia tsjak'é. Tjéchnghan kixin jahará la nixjehérá Dios la ntá Dios chrókujanjon kjuachaxin kixin chrókuasántsajahará.

Kjuixixín nixja ch'ín Pablo

²³ Kjaxin ch'ín Epafras mé nixjaha ch'án jnkójina. Jehé ch'án mé tjéchinakian ch'án jnkokóá tí ntoéchiso ntihi kixin kjaxin tinkáchónki ch'án Cristo Jesús. ²⁴ Ch'ín Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkójina. Jehé sín mé tjinkítsana sín tí xra.

²⁵ Tjéjtáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehe tí sín tsik'axrjenixinni nchónhya veces kixin nchónhya nkexrí chrókiénxín sín, nixjaxin ch'án tí sín k'uéchrónka tí itén ch'án. ² A ntá jie tió tsjixixín Dios nixjaxin ch'án tí Xjeen ch'án, na mé Dios kjuich'éna ch'án kaín xín nkehe siín kixin kjuachaxién tí Xjeen ch'án, mé tí nkexro k'uáyéhe kaín xín nkehe. ³ Jehé ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxi tsjehe Dios xikaha tsjehe tí jehe ch'án. Jehé ch'án t'aykonhen ch'án kaín xín nkehe siín kixin tí kjuachaxin jie chóna tí tan nixja ch'án. A ntá kjuixin kjuinchetjóa ch'án tí jie chónatani, ntá sákjui ch'án kjuák'etjaxin ch'án tí tja chjina It'é ch'án tí tjen ch'án t'etqan ch'án nkaya nkajní.

Tí Xjeen Dios imá t'etqan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuenhen tí sín ángel, kixin tsik'áyéhe ch'án tí kjuachaxin kuènte It'é ch'án, a ntá imá t'etqan ch'án, a ntá tí jehe sín la náhi. ⁵ Méxra Dios ntáchehya nijnko ángel kixin:

Jaha mé Xjanna,

janhan mé kjuít'ána tí jaha ijie.

la ko kjaxin ntáchroya Dios kuènte nijnko ángel kixin:

Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ A ntá tió kui tí jnkokóá Xjeen Dios chjasintajni, ntá ntáchro Dios kixin:

Kaín tí sín ángel kuènte Dios chrókjuikosáyehe tí jehe ch'án.†

⁷ A ntá ntáchro Dios kuènte tí sín ángel kixin:

Tí sín ángel ch'éna ch'án éxi xrjnto kixin nchakuen sín ó,

la ko tí sín ch'ehe ch'án xra la ch'éna ch'án éxi xrohinene.‡

⁸ A ntá ntáche ch'án tí Xjeen ch'án kixin:

Tí trono kuéntá itjen jnkochrín, jaha Dios,

la mé jaha mé ijnko nkexro t'etqan jina.

⁹ Jaha tóxrjnhan tí nkehe jina, a ntá ninkákonhén tí nkehe jínaha.

Mé xikaha tí Dios tsíkjejá jaha, la Dios kuéntá kjuíntacháha má,

a ntá tí í so sín k'uájikoa la kánhyó.§

¹⁰ Kjaxin ntáchro kixin:

Jaha Inchéni, tí xrankixín kjuich'éna chjasintajni,

la ko jaha kjuich'éna nkajní.

¹¹ Táha mé ts'itjáyan, a ntá jaha la tsjak'e jnkochrín.

Kaín tíha tsontaxín éxi iké chojni,

¹² éxi ijnko iké chojni xikaha tsoxrát'o,

ts'ixinkí éxi ijnko iké chojni.

A ntá jaha la ts'ixitóxinhya jnkochrín tsjak'e,

a ntá tí kjuachón chonta jaha la nunca tsjejehya.*

¹³ Dios la ntáchehya nijnko tí sín ángel kuènte ch'án kixin chrók'uejó sín tja ch'án chjina ntahó chrók'uetqan sín, tsjixinjian kaín xín tí sín nínkakonhen sín la chrókjuachahya sín chrók'uetqan sín.† ¹⁴ Kaín tí sín ángel mé nchakuen sín ó mé ch'ehe Dios xra mé k'uituenhen sín tsjinkítsa tí sín ts'áyéhe kjuachaxin tsaá sín.

2

Chrókjeníehyani tí nkehe tsaáxinni

¹ Mé xikaha chrókjuenkayáxinni jina tí nkehe ó kuínhinni kixin chrókuítoehyani tí ntja ó kuákjani. ² A ntá tí tan tsíchrónka tí sín ángel ósé la mé tsíkónoxin kixin chaxin tíha. A ntá tí sín kuítekakohya sín tí tan jina kuínhin sín la kjuasin sín jie, na mé kjuasóte sín la táhó mé kjuacha sín. ³ Xá nkexrí chrókuaáni tí chrókuaahyani kuéntá tí nkehe jie chrókuaáxinni? Jehé Inchéni tsíchrónka ch'án saoxín nkexrí chrókuaáxinni, a ntá chr'éxin tí sín tsíkinhin mé kjuakohé sín tí jeheni. ⁴ Méxra Dios kjuakoxin ch'án kjuaxroan jie la ko kjuachaxin jie

* 1:5 Salmo 2.7; 2 Samuel 7.14; 1 Crónicas 17.13 † 1:6 Deuteronomio 32.43 ‡ 1:7 Salmo 104.4 § 1:9 1.8-9 Salmo 45.6-7 * 1:12 1.10-12 Salmo 102.25-27 † 1:13 Salmo 110.1

kixin chaxín tíha, la ko noexinni kaín tí kjuachaxién Nchakuen ch'án tsík'áyéhéni éxi tjinkaon ch'án tsjanjon ch'án.

Jesucristo k'óna ch'án chojni

⁵ Dios la tsichjéhya tí sín ángel kjuachaxin kixin chrók'uetqan chjasintajni chr'éxin éxi tí jie tjejónixjani. ⁶ Náhí. Éxi nixja xroon itén Dios chronkaxín kixin:

ǂXá nkexéhe tí chojni a, jaha It'eni Dios, kixin imá xráxinkávan tí jehe ch'án?

ǂXá nkexro tíha kixin imá tóxakonhan kixin tí jehe ch'án?

⁷ Jaha tsíkijich'éna ch'án éxi ijnko chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin,

a ntá jie la imá kjuikosáyehé ch'án;

⁸ la jaha tsichjéhe ch'án kjuachaxin kixin kaín nkehe ts'etuenhen ch'án.*

Mé xíkaha ntáchoo tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuítqehya ninkehó nkehe chrók'uitekakenhya ch'án. Kjánchó naxá t'ikonhyani kixin á kaín nkehe titekakonhen ch'án. ⁹ Kjánchó ó noheni kixin Jesús la tsíkijich'éna Dios éxi chojni t'etqanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuéhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyéhé ch'án kjuachaxin náxrjon la ko Dios tjikosáyehé tí jehe ch'án kixin tí kjuasóte ch'án, ik'uén ch'án.

¹⁰ Kaín nkehe sín la kuénte Dios la ko tjejó kixin tí kjuachaxin kuénte tí jehe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjeen ch'án tí t'inkaséyan. Méxra Dios kjuanjon Inchéni Jesucristo kixin tsjasóte ch'án kixin ntá jina kjuakoxin ch'án kixin ntá jehe ch'án tsaaxinni ch'án. ¹¹ Kaín tí sín tsíkótjóá la ko tí nkexro kjuínchetjóá na mé chóna jnkokqá It'é. Méxra tí Xjeen Dios tósuehya ch'án tsontácho ch'án kixin kichó ch'án tí jehe sín. ¹² Éxi ntáchoo tí xroon itén Dios kixin:

Tsochénkani tí sín kichó ni kixin nkexro tí jaha,

tsjikosáyahani tsotsjeni himno tí tójnksékoni tí sín kichó ni.†

¹³ Kjaxin ntáchoo kixin:

Janhan titekavan Dios.‡

La ko kjaxin ntáchoo inaá kixin:

Ntíhi tjékian tí xjeen Dios tsikjanjon ch'án tsík'ayáha.§

¹⁴ A ntá tí xjeen chojni mé jnkokqá kichó la k'óna nto la ko ijni; la kjaxin ch'ín Jesús xíkaha tsík'óna ch'án nto la ko ijni kixin jina its'en ch'án kixin jina sinchek'itjáyán ch'án tí nkexro chóna kjuachaxin t'oyán chojni, na mé t'axrjexín kixin diablo tíha, ¹⁵ mé xíkaha chrókjuinchekaá ch'án kaín tí sín chraqnhen sín tí kjuach'en, tjejó sín éxi t'ítuenhen sín kaín yaon tjejó sín. ¹⁶ Kjaxin kuihya ch'án kixin chrókjuinkitsa ch'án tí sín ángel. Náhí. Ikuí ch'án kixin tsjinkitsa ch'án tí sín tsík'axrjenixin ch'ín Abraham. ¹⁷ A ntá t'ichjánxin chrókóyóhe ch'án éxi tí sín kichó ch'án kixin jina chrók'óna ch'án nchat'á t'etqan kuénte Dios la chrók'uiakonéhéni ch'án, ntá jina tsjatsen ch'án ijje kaín chojni kixin k'uenyákonhenni ch'án. ¹⁸ Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jina tsjinkitsa ch'án tí sín chrókjuachroe tí Jínahya kixin chrókjuasinhya sín jie.

3

Antsí tjeoan ch'ín Jesús, a ntá ch'ín Moisés la kánhyó

¹ A ntá kichó ni, jahará la tsíkótjóará, la mé Dios tsík'iyahará ch'án kixin ts'ónará xjeen ch'án, a ntá chrórxaxinkáonrá jina Cristo Jesús na mé jehe ch'án mé tí apóstol la ko tí nchat'á t'etqan kuénte tí nkehe tinkáchónkini. ² Tí ch'ín Jesús jina kuítekakonhen ch'án Dios, mé tí nkexro tsikjeyá ch'án sich'ehe ch'án xra, éxi kjaxin ch'ín Moisés jina kjuích'e ch'án xra k'uáyakonhen ch'án ntqeo Dios. ³ Dios antsí kjuikosáyehé tí ch'ín Jesús, a ntá ch'ín Moisés la kénhyó, éxi antsí tjikosáyehé sín tí nkexro kjuích'éna ijnko nchia, a ntá tí nchia la kénhyó tjikosáyehé sín. ⁴ Jnkojnko nchia k'óna kixin siín nkexro kjuích'éna, kjánchó Dios mé kjuích'éna kaín nkehe sín. ⁵ Ch'ín Moisés jina kjuích'e ch'án xra k'uáyakonhen ch'án tí nchia kuénte Dios. Tí xra kjuích'e ch'án mé k'uénixja ch'án kuénte tí nkehe tsontáchoo Dios chr'éxin. ⁶ A ntá Cristo la mé Xjeen Dios tí jehe ch'án, ntá kjuínchexiteyá ch'án jina la t'ayakonhen ch'án tí nchia kuénte Dios, la tíha mé jeheni, kixin tí tsítqehyani ch'án la naxá tsinkáchónkini ch'án ntá tsochéhenni kixin tí nkehe tjejóhónhenni.

Ts'ok'éhene tí tjeen Dios

⁷ Mé xíkaha éxi ntáchoo Nchakuen Dios nixja xroon itén Dios kixin:

* 2:8 2.6-8 Salmo 8.4-6 † 2:12 Salmo 22.22 ‡ 2:13 Isaías 8.17,18 § 2:13 Isaías 8.17,18

A ntá jie tí chrókuinhínrá tí nkehe ntáchro Dios,
 8 chrókjuich'ehyará éxí kjuich'e tí sín ósé kuítekakonhya sín Dios
 tí yaon kjuich'ehe sín prueba Dios tí nteje.

9 A ntá ntaha tí sín tsík'axrjenixínrá ósé kjuich'èna sín prueba,
 kjónté cuarenta nánó k'uíkon sín tí xra kjuít'a.

10 Méxra kónínkakonhan tí chojni a,
 ntáxrjan kixin: "Xráxín xrichoe asén sín,
 tjínkakonhya sín tsochóxin sín ntjaná."

11 Méxra kónínkakonhan tí jehe sín, ntátjan sín

kixin chaxín tsoxiteyá kixin ts'ixenhya sín ts'ok'éhe sín tí tjén janhan.*

12 Kichóni, chrókóxakonhanrá kixin chrókókohya nijnko tí jahará chróchontará
 asánrá jínahya chrókuítóhéra Dios tjechón chrókuítekakuenhyará tí jehe ch'án.

13 Chrókjuinchehéherá kichuárá jnkojnko yaon naxa tjen tiempo kixin nijnko tí jahará
 chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa
 chrókójjahará. 14 A ntá tí chrók'uejóni jnkojina hasta tsjixixín éxí kuinkáchónkini tí
 xrankixixín, ntá síin kjuachaxin ts'ejókoni Cristo.

15 Mé xikaha ntáchro kixin:

A ntá jie tí chrókuinhínrá jahará tí nkehe ntáchro Dios,

chrókjuich'ehyará éxí kjuich'e tí sín ósé kuítekakonhya sín Dios.†

16 ¿A ntá nkexro tí sín kuínhin itén Dios, a ntá tí chr'èxin kuítekakonhya sín? ¿Á jehya kain tí sín
 tsíkakitsjéxin ch'ín Moisés tí nación Egipto? 17 ¿A ntá nkexro tí kónínkakonhen Dios tí cuarenta
 nánó? ¿Á jehya tí sín kjuasin jie k'uénxin nteje? 18 ¿A ntá nkexro ntáche Dios kixin chaxín
 tsoxiteyá kixin ts'ixenhya sín ts'ok'éhe sín tí tjen tí jehe ch'án? ¿Á jehya tí sín kuítekakonhya?
 19 A ntá ó noheni kixin kjuachahya sín k'uíxehen sín kixin kuítekakonhya sín.

4

1 Méxra, tsíntáchro Dios kixin tsjanjon ch'án kjuachaxin ts'ixenhenni ts'ok'éheni tí tjen
 ch'án, a ntá tóxakonheni kixin ách'e jnkojín tí jahará chrókjuachahyará chrók'uixenhenrá
 ntiha. 2 Kixin kjaxin jeheni kuínhini itén ch'án tsaáxinni éxí kuínhin tí jehe sín, kjánchó tí
 jehe sín la ninkehó kjuínkítsahya sín tí tan jina kuínhin sín, kixin kjónté kuínhin sín tí tan na
 kuítekakonhya sín. 3 A ntá jeheni kuítekaonni, ntá ts'ixenhenni ts'ok'éheni ntaha, éxí tsíntáchro
 Dios kixin:

Méxra kónínkakonhan sín tí jehe sín ntátjan sín kixin chaxín tsoxiteyá

kixin ts'ixenhya sín ts'ok'éhe sín tí tjén janhan.*

Kixin Dios la tíó kjuixinhin ch'án xra kjuich'èna ch'án chjasintajni ntá kjuák'e ch'án k'ok'éhe
 ch'án. 4 Mé xikaha í jnko nketí nixja tí xroon itén Dios chrónka kuénte tí yaon yatoxin ntáchro
 kixin:

Kjuixinhin Dios kain xra ntá kjuák'e ch'án k'ok'éhe ch'án tí yaon yatoxin.†

5 A ntá inaá ntáchro tí xroon itén Dios kixin:

Ts'ixenhya sín ts'ok'éhe sín tí tjén janhan.‡

6 Kjánchó naxa t'itjayan jnkojini chrók'uixenhen sín chrók'ok'éhe sín. A ntá tí sín saoxín
 kuínhin tí tan chrókuaáxin sín la k'uíxehenya sín kixin kuítekakonhya sín tí tan a. 7 Méxra Dios
 tsíkijeyá ch'án í jnko yaon, mé tí yaon jie, a ntá chr'èxin nixjaxin ch'án tí nkehe tsíchronka
 ch'án David éxí ntáchro tí xroon itén Dios kixin:

A ntá jie tí tsinhínrá tí nkehe ntáchro Dios, chrókjuinchexiteyará.§

8 Kixin tí chrókjuanjon ch'ín Josué kjuachaxin kixin chrók'ok'éhe tí sín israelita,* ntá Dios la í
 chrónixjahya ch'án kuénte í jnko yaon. 9 A ntá naxa tjechónhen tí ts'ok'éhe tí sín tinkáchónki
 Dios; 10 kixin tí nkexro ts'ixenhen ts'ok'éhe tí tjen Dios tsíkixinhin ch'án tí xra kuénte ch'án
 éxí yóhe kjaxin Dios kjuixinhin ch'án tí xra kuénte ch'án ntá kjuák'e ch'án k'ok'éhe ch'án.

11 T'ichjánxin kixin kain aséni chrókjueyáni nkexrí chrók'uixenhenni chrók'ok'éheni, kixin
 chrókóyóghyani éxí tí sín kuítekakonhya.

12 Kixin tí itén Dios la mé tjechón la ko chóna kjuachaxin. Tíha la imá taté, a ntá kánhyó
 taté tí chica espada yánjin taté, la tíha mé t'ixenhen tí njnka asén chojni la ko nchakuen
 chojni hasta tí nkaya asén chojni. Tíha mé nchexraxinkaon chojni kain nkehe tjenkayáxin
 sín la ko kain nkehe ntáchro asén sín. 13 Kohya ninkehó nkehe tsíkijich'èna Dios tsjacha
 chrók'uejóméhe tí jehe ch'án kixin kain nkehe la noxín síin t'íkon tí nkexro ts'áyéhe kuéntá.

Jesús mé tí nchát'á imá tjetoan

* 3:11 3.7-11 Salmo 95.7-11 † 3:15 Salmo 95.7-8 * 4:3 Salmo 95.11 ‡ 4:4 Génesis 2.2 † 4:5 Salmo 95.11

§ 4:7 Salmo 95.7-8 * 4:8 Josué 22.4

¹⁴ Jesús ti Xjeen Dios mé tí nchat'á tjeotan kuènténi mé k'uúixenhen tí tjeen Dios la méxra chrókuítqehyani tí tinkáchónkini tí jehe ch'án. ¹⁵ Méxra jehe ch'án mé tí nchat'á tjeotan kuènténi mé tsjinkítsa ch'án tí jeheni kixin fuértqehyani kixin kjaxin tí Jínahya chrókuachroe tí jehe ch'án éxi sítónhen tí jeheni, kjánchó jehe ch'án la ninkehó jie kjuasinhya ch'án kjónté xíkaha kónhen ch'án. ¹⁶ Méxra kaín asénni chrókóchjineheni Dios tí tjeen ch'án t'etqan ch'án kixin chrókuikónqeheni ch'án la ko chrókuinkítsa ch'án tí jeheni tí nkehe chrók'uichjánxinhinni.

5

¹ Kaín nchat'á t'etqan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kixin ts'itjáyaxín tí jie kuènte chojni. ² Kjaxin tí nchat'á a la fuértqehya kixin chojni ó, a ntá chrókóninkakuenhya ch'án tí sín noehya la ko tí sín tsíkjichroe. ³ Kjaxin jehe ch'án, kixin fuértqehya ch'án t'ichjánxín tsjanjon ch'án iko its'en kixin tí jie chóna ch'án jehe ch'án éxi tjanjon ch'án nkehe kuènte tí í so chojni chóna jie.

⁴ Ninkexró xitjahya jehó sich'éna asén nchat'á t'etqan. Náhi. Jehó tí sín tsíkjeýá Dios tsík'áyéhe tí xra éxi tsík'áyéhe ch'ín Aarón. ⁵ Mé xíkaha Cristo, kjuich'énahya ch'án jehó ch'án asén ch'án nchat'á t'etqan. Náhi. Dios mé kjuikosáyehé ch'án mé tsíkjanjon tí xra éxi tsintáchro kixin:

Jaha mé xjanna;

Janhan mé kjuít'ána ijie.*

⁶ Kjaxin í jnko nketí nixja xroon itén Dios ntáchro kixin:

Jaha mé ijnko nchat'á tsjak'e jnkochríxín,

éxi yóhe k'uékjak'e ch'ín Melquisedec.†

⁷ Tió kjuák'e Cristo ntíhi chjasintajni imá tsjánka ch'án la ko itsen chrónqehé ch'án Dios, kixin Dios chóna kjuachaxin chrókuinchekaá ch'án kixin chrók'uenhya ch'án; la Dios la kuínhin kixin xíkaha kuítekaon ch'án. ⁸ Méxra Cristo, kjónté Xjeen Dios, la kuítekaon ch'án kjuínchexiteýá ch'án kjónté tí kjuasote ch'án. ⁹ Mé kjuínchexiteýá ch'án, ntá kjuacha ch'án k'óna ch'án tí nkexro sinchekaá jnkochríxín kaín tí chojni sinchexiteýéhe tí jehe ch'án. ¹⁰ A ntá Dios mé tsík'ich'éna ch'án nchat'á t'etqan éxi yóhe kjuák'e ch'ín Melquisedec.

Jehya jína chrókuítqeheni tí tinkáchónkini Ìnchéni

¹¹ Chóntani nchónhya nkehe chróchrónkani kuènte tíha, kjánchó imá xra chróchrónkaxínni tíha kixin tiénxinhyará jahará. ¹² Ntá k'uúátsínka nchónhya tiempo, a ntá ó jína chrók'ónará maestro, ntá náhi kixin naxa t'ichjánxínhanrá nkexro chrókuakohará inaá tí nkehe xrahya kuènte itén Dios. Éxi xík'ónará lontrá, t'ichjánxín chrók'uirá tsjen inaá kixin xitjahya sinterá nkehe cha. ¹³ A ntá tí sín it'i tsjen ó, na mé yóhe chánjan takí tsjachahya sín tsjeýá sín nkexrí chrók'uejó sín jína. ¹⁴ A ntá tí nkehe cha mé ine tí chojni nteto kixin ó nohe sín tí nkehe jína la ko tí nkehe jínahya.

6

¹ Naxa chrókjueýáni kixin jína chrókuenkayáxinni éxi chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankíxixín kuènte Cristo. Náhi. T'ichjánxínhya naxa chrókuakoharáni kixin chrókuítqehérá tí jie k'uékjásínrá chrók'ueúxínrá, la ko nkexrí chrókuinkachónkirá Dios, ² la ko nkexrí chrókuikite chojni, la ko nkexrí ts'ejotja tjárá chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítqexín ijie chojni. ³ A ntá tí Dios chrókuanjon kjuachaxin la chrókuakoni í so nkehe.

⁴ A ntá tí sín ó tsík'áyéhe sín tí xrohi, la ko ó tsjéxín sín tí nkehe kjuanjon Dios, la ko tsík'áyéhe sín tí Nchakuen Dios, ⁵ la ko kóxrjínhin sín tí nkehe jína kuènte itén Dios, la ko kónohe sín nkexrí tí kjuachaxin tsochóna tí chjasintajni chr'éxín, ⁶ a ntá tí chrókuítqehé sín Dios, í chrókuinkáchónkihya sín, ntá xitjahya tsokjan sín inaá, kixin tí xíkaha la éxi chrókuak'enkani sín ntacruz tí Xjeen Dios inaá la ko chrókuanoá sín ch'án nkayakon nchónhya chojni. ⁷ Éxi nonte jnkojnko vez t'aniá chrin la tsjatan la ts'óna jína, a ntá kjuacha tí sín kjuich'e xra kixin Dios kjuíncheyaoon ntíha. ⁸ A ntá tí ts'óna ntach'í la ko kach'í la ninkehó sínkíhya la tsqínkakonhen Dios, la tí tsjixixín mé tsoche.

Tí nkehe tjejóchónhenni mé tjinkítsa kixin jína ts'ejóni

⁹ Kjónté nixjani xíkaha, kichó ni, ó noheni kixin chaxín jína tjejórá k'uitjará tí ntja tsaáxínrá. ¹⁰ Kixin Dios la jína, la ts'itjáyenyha ch'án tí xra jína tjejóch'erá kixin tjeúherá kichuará, mé xíkaha kjuákojínrá kixin kjuinkítsará tí kichuará tinkáchónki Cristo la naxa tjejójtjinkítsará sín xíkaha. ¹¹ Tjinkaoonni kixin jnkojnkorá chrókuakoxínrá hasta tsjixixín

* 5:5 Salmo 2.7 † 5:6 Salmo 110.4

kixin chontará kjuachéhe chrókjuínkĩtsará kíchuárá kixin chaxín ts'ayéhérá tí nkehe tje-jochonhénrâ. ¹² Tjinkakonhyani kixin chrókjanrâ chrókósáhará. Náhi. Tjinkaonni kixin chrókjuákoxinrâ éxi tí sín chaxín tĩnkáchónki Inchéni tjejóchónhen sín ts'áyéhe sín tí nkehe tsintácho Dios kixin tsjanjon ch'án.

¹³ A ntá Dios, tió tsintácho ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uákjenxin asén kixin kohya nkexro antsí tjeotan chrók'uákjenxin ch'án. ¹⁴ Ntácho ch'án kixin chaxín sincheyao ch'án tí ch'ín Abraham la ko nchónhya chojni ts'axrjenixin tí jehe ch'án.* ¹⁵ Ch'ín Abraham kjuák'echónhen ch'án isé kixin ts'áyéhe ch'án tí nkehe tsintácho Dios. ¹⁶ A ntá tió t'ákjenxin chojni ijnko nkexro la mé t'ákjenxin sín ijnko nkexro antsí tjeotan, a ntá jehó sín la náhi. A ntá ts'ákjenxin sín tí xikaha kixin ijnko nkehe tsoxiteyá, a ntá kohya nkexro tsontácho ninkehó. ¹⁷ Méxra Dios k'uákjenxin ch'án asén ch'án tsintácho ch'án kixin chaxín tsoxiteyá, kixin tjinkaon ch'án chrókjuákoxin ch'án noxín kixin chrókónohe tí sín ts'áyéhe tí nkehe tsjanjon ch'án kixin sinchexiteyá ch'án tí nkehe tsintácho ch'án la í tsjítóxjenhya ch'án ninkehó tíha. ¹⁸ Mé xikaha sín yaá nkehe xitjahya ts'ixitóxin, kixin Dios la xitjahya sich'ia; kixin tíha Dios nchenoexinni kixin chaxín tsoxiteyá, la mé jeheni kjuancheheni ch'án kixin chrók'uayakonhenni ch'án la ko tjejóchónhenni tí nkehe tsjanjon ch'án. ¹⁹ Tí tjejóchónhenni xikaha la jina ts'ejó asénni éxi yóhe tí tabárcó chóna gancho tjechruéxin kixin kohya nketí sátsji. Méxra xikaha kjaxin tí nkehe tjejóchónhenni la sátsikji hasta nóton tí ka cortina tjen nkaxenhen njnko tjen nkaya nkajni. ²⁰ Tí senó k'uixenhen Jesús kuakitjehé ch'án ijnko ntja ts'ixenxinni. Mé xikaha jehe ch'án k'óna ch'án nchat'á t'etöan jnkochríxin éxi yóhe kjuák'e tí ch'ín Melquisedec.

7

Ch'ín Jesús mé nchat'á éxi yóhe k'uékjak'e ch'ín Melquisedec

¹ Tí ch'ín Melquisedec mé k'ué rey kuénte chjasin Salem la ko nchat'á kuénte Dios tjen nkaya nkajni. A ntá tió ch'ín Abraham kjanxin ch'án tí tsíkikjanjonko ch'án tí í so sín rey, kjuacha ch'án, ntá ch'ín Melquisedec kjuixinhin ch'án ntja ikui ch'ín Abraham, ntá jehe ch'ín Melquisedec kjuíncheyao ch'án tí ch'ín Abraham. ² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjacha ch'án tí tsíkikjanjonko ch'án tí sín rey.* A ntá ihnjé ch'ín Melquisedec mé t'axrjéxin saoxín kixin “ijnko rey jina”; a ntá jehe ch'án k'ué rey kuénte chjasin Salem, tíha mé t'axrjéxin kixin “kjuaxróxin”, la mé xikaha jehe ch'án mé “ijnko rey tjanjon kjuaxróxin”. ³ A ntá ch'ín Melquisedec la noehya sín nkexro it'é ch'án la ko nkexro iné ch'án la ko nkexro tsík'axrjenixin ch'án; la ko noehya sín nkesá tsíkókjihi ch'án la ko nkesá tsík'en ch'án. Mé xikaha tóyóhe tí Xjeen Dios kixin jehe ch'án mé ijnko nchat'á jnkochríxin.

⁴ A ntá jie, tsjehérá kixin imá t'etöan tí ch'ín Melquisedec kixin tí ch'ín Abraham k'uaxrjenixinni, la tsichjéhe ch'án tí ch'ín Melquisedec diezmo tí nkehe tsíkjacha ch'án tí tsíkjanjonko ch'án tí sín rey. ⁵ Éxi nixja ley tsík'etöan ch'ín Moisés, kixin tí sín nchat'á tsík'axrjenixin tí ch'ín Leví chóna sín kjuachaxin tsjanchehe sín kaín xín chojni diezmo kjónté naxa kjéhya sín, tsík'axrjenixin sín tí ch'ín Abraham éxi tí jehe sín. ⁶ A ntá ch'ín Melquisedec, kjónté tsík'axrjenixinhya ch'án tí ch'ín Leví, na mé kjuich'ehe ch'án cobra tí ch'ín Abraham, mé tí ch'ín tsík'áyéhe tí nkehe tsintácho Dios. Mé xikaha tí ch'ín Melquisedec tsíkjincheyao ch'án tí ch'ín Abraham. ⁷ Kohya nkexro tsontácho kixin chaxínhya kixin tí nkexro ncheyao la antsí má t'etöan, a ntá tí nkexro tsikóyao la t'etöanhya. Náhi. ⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntácho tí xroon itén Dios kixin tí ch'ín Melquisedec mé ijnko chojni naxa tsík'enhya, la naxa tjechón. ⁹ Mé t'axrjéxin kixin ch'ín Leví la ko kaín xín tí sín nchat'á tsík'axrjenixin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sín diezmo tí ch'ín Melquisedec tió tsíkjenka ch'ín Abraham, ¹⁰ kixin naxa tjiko cuerpo kuénte ch'án tí sín ts'axrjenixin ch'án, naxa koljéhya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kixin tí sín nchat'á levita, mé tsík'axrjenixin sín tí ch'ín Aarón. A ntá jie tí chaxín chrókjuacha sín chrókjuentoá sín sín tĩnkáchónki tí ley, la í t'ichjánxinhya naxa chrókónoxín í jnko nchat'á í chrókóyóehya éxi tí ch'ín Aarón. A ntá kjuachahya sín xikaha ntá t'ichjánxin chrókónoxín ijnko nchat'á chrókóyóhe éxi tí ch'ín Melquisedec. ¹² A ntá tí chrók'uixinkí tí nchat'á la kjaxin chrók'uixinkí tí ley. ¹³ A ntá tí xroon itén Dios chrónka tíhi kuénte Inchéni. A ntá jehe ch'án la tsík'axrjenixin ch'án í jnko nkexro kuénte Israel la kohya ninxeró tsík'óna nchat'á tsík'axrjenixin tí sín a. ¹⁴ Kixin ó noxín kixin Inchéni tsík'axrjenixin ch'án tí ch'ín Judá, a ntá ch'ín Moisés la chrónkahya ch'án ninkehó kuénte tí sín ts'axrjenixin tí ch'ín a tió nixja ch'án kuénte tí sín nchat'á.

* 6:14 Génesis 22.16-17 * 7:2 7.1-2 Génesis 14.17-20

¹⁵ A ntá tîhi la antsî má kónoxín kîxín tí nchat'á nîxín la tóyóhë éxí ch'ín Melquisedec ¹⁶ kîxín tió k'óna ch'án nchat'á la jehya kîxín xîkaha chrók'uetóan ijnko ley kîxín nkexro chrók'uaxrjénîxín ch'án. Náhi. Ó jehí k'óna ch'án nchat'á kîxín tí kjuachaxín chóna ch'án la xitjahya ts'itjáyan. ¹⁷ Kîxín nîxja Dios kîxín nkexrí tjen tí jehë ch'án, ntáchro kîxín: Jaha mé ijnko nchat'á tsjak'e jnkochrîxín,

éxí yóhë k'uékjak'e ch'ín Melquisedec.†

¹⁸ Méxra tí nkehe k'uék'etóan senó mé ch'ehya xra jie kîxín kánhyó kjuachaxín k'uéchóna la ko kjuachahya, ¹⁹ kîxín tí nkehe k'uetóan ch'ín Moisés kjuachahya kjuínchetjóá ninkehó nkehe. A ntá jie chónani ijnko nkehe antsî jîna tjejóchónhenni kîxín tíha mé antsî jîna tsochjînexînni Dios.

²⁰ A ntá tió ntáchro Dios tíha la tsík'ákjénxín ch'án asén ch'án jehó ch'án. ²¹ La ntá tí í so nchat'á, tió tsíkónoxín sîn, tsík'ákjénxínhya Dios asén ch'án. A ntá tió tsíkónoxín tí nchat'á i la Dios tsík'ákjénxín ch'án asén ch'án. A ntá ntáchro xroon itén Dios kîxín:

Închéni tsík'ákjénxín asén ch'án

a ntá ts'ixitóxínhya tí nkehe tsintáchro ch'án:

“Jaha mé ijnko nchat'á tsjak'e jnkochrîxín

éxí yóhë k'uékjak'e ch'ín Melquisedec.”‡

²² Méxra ch'ín Jesús ntáchro kîxín tí pacto t'etóan ch'án la antsî má jîna, a ntá tí pacto senó la náhi. ²³ Ntá k'uixín nchónhya sîn nchat'á, kjánchó nkák'en sîn, ntá xitjahya naxa chrókjuich'e sîn tí xra a. ²⁴ A ntá ch'ín Jesús la ts'enhya ch'án la t'ichjánxínhya kîxín í jnko nkexro chrókuaqja tí xra kuente ch'án chrók'óna nchat'á. ²⁵ Méxra jehë ch'án tsjacha sinchekaá ch'án jnkochrîxín tí sîn tsochjînehë Dios kîxín tinkáchónki sîn tí jehë ch'án kîxín itjen ch'án jnkochrîxín chrónóhë ch'án Dios kîxín chrókjuínchekaáni ch'án.

²⁶ Mé xîkaha Jesús mé tí nchat'á t'etóan t'ichjánxínhinni; jehë ch'án mé ijnko nkexro tjóá, chónahya ninkehó jie, la ko tjenkákjanhya ch'án tí sîn tjasin jie, a ntá sákjuj ch'án nkaya nkajní. ²⁷ Ntá tóyóhëya tí í so nchat'á t'etóan, kîxín t'ichjánxín ts'óyán sîn iko tjanjon sîn tsochjîhë sîn Dios kain yaon, saoxín kîxín tí jie kuente sîn, a ntá chr'éxín kîxín tí jie chóna tí í so chojni. A ntá ch'ín Jesús jnkokoaxón vez kjuanjon asén ch'án ik'uén ch'án. ²⁸ Tí ley k'uék'etóan ch'ín Moisés t'etóan kîxín chojni naxa chóna jie chrók'óna nchat'á, a ntá Dios tsík'ákjénxín asén ch'án tió kjuixín k'óna tí ley, ntáchro ch'án kîxín tí Xjeen ch'án mé ts'óna nchat'á t'etóan kîxín jîna kjuínchexitéyá ch'án jnkochrîxín.

8

Ch'ín Jesús nîxjâxín ch'án ijnko pacto nîxín

¹ Tí nkehe antsî má tjetóan chrónkani la mé tîhi kîxín tí nchat'á kuénteni mé t'etóan ch'án, la ko tjetjâxín ch'án nkaya nkajní, nó chjîna tí trono t'etóanxín Dios, ² k'óna ch'án nchat'á tí nînko chaxín tsíkjich'ëna Închéni, la jehya chojni tsíkjich'ëna tíha. ³ Kain nchat'á t'etóan tsík'áyêhë xra kîxín tjanjon nkehe la ko iko its'en. Méxra Jesucristo t'ichjánxín kîxín tjanjon ch'án ichrén nkehe. ⁴ Tí chrókjuak'e ch'án chjasintajni, chrók'ónahya ch'án nchat'á kîxín naxa siin nchat'á tjanjon nkehe k'uetóan tí ley tsík'áyêhë ch'ín Moisés. ⁵ A ntá tí sîn nchat'á k'uékjanjon nkehe tóyóhó tí nkehe siin nkaya nkajní. Noheni kîxín tóyóhó kîxín tió ch'ín Moisés chrókjuich'ëna ch'án nînko la ntáche Dios tí jehë ch'án kîxín: “Tjenkayâxian jîna, a ntá sîch'ëna jaha éxí tí nkehe kjuákuâxian chrítaón jna.”* ⁶ A ntá tí nchat'á t'etóan kuénteni tjech'e ch'án xra antsî jîna kîxín jehë ch'án mé tí nkexro nîxjâxín tí pacto nîxín tsintáchro Dios chrónka tí nkehe jîna tsohnen chr'éxín.

⁷ A ntá tí pacto tsík'etóan saoxín la tí chróxitéyá jîna, la t'ichjánxínhya chrók'óna yóxín pacto. ⁸ A ntá Dios k'uíkon kîxín kjuínchexitéyáhya tí sîn a, éxí ntáchro xroon itén Dios kîxín:

Ntáchro Închéni kîxín: Itsi ijnko yaon

mé tsjânjuan ijnko pacto nîxín tsochóna tí sîn nación Israel la ko tí sîn chjasin Judá.

⁹ Jehya xîkaha tí pacto kuétuñhan tí sîn tsík'axrjénîxínrá ósé,

tí yaon kjuínkîtsa sîn k'uaxrjénîxín sîn tí nación Egipto;

kjánchó kjuínchexitéyáhya sîn tí pacto kuétuñhan sîn,

méxra kuítôha sîn, ichro Închéni.

¹⁰ Tí pacto tsétuñhan tí sîn chjasin Israel tió ts'atsínka tí ygon a, mé xîkaha tíhi, ichro Închéni:

Sintaxráxinkâvan asén sîn tí ley tsétóan,

a ntá tí kjuaxrjénîxínkaon kuente sîn tsokjian tí nkehe tsétuñhan sîn.

A ntá janhan ts'óna Dios kuente sîn,

a ntá jehë sîn mé ts'óna chjasin kuéntana.

† 7:17 Salmo 110.4 ‡ 7:21 Salmo 110.4 * 8:5 Éxodo 25.40

11 Ts'ichjánxinhya naxa tsjakohé kichó sín
kixin chróchóxin sín Inchéni,
kixin kain sín tsochóxinna sín,
kjónté chojni imá ntsínsi la ko chojni imá hyé.

12 Sintak'itjáyán tí nkehe jínahya kjuich'e sín

la ko í tsoxráxinkákonhya inaá tí jie chóna sín.†

13 Xikaha nixja Dios kuénte tí pacto nixin ts'etóan ch'án kixin tsikóntaxin tí pacto saoxín k'uetoan ch'án, tíha mé tinkákóntaxin la ko tinkákjeje, na í séhya ts'itjáyán.

9

Tí nínko chjasintajni la ko tí nínko nkaya nkajni

1 A ntá tí pacto saoxín t'etóan nkexrí chrórxaxinkaonni Dios, kixin tí nínko ntihyó chjasintajni. 2 A ntá tí nínko k'uekjak'e mé tí cuarto saoxín k'uekjinchek'in sín tí Cuarto Tjóá, tí kjuák'e tí candelero la ko tí mesa tjejóken tí niotja k'uérxaxinkakonxín sín Dios. 3 Nóton tí yóxin ka cortina kjuák'e tí cuarto k'uekjinchek'in sín tí Cuarto Antsi Tjóá. 4 Ntiha k'uekjak'e tí altar tsik'óna chica oro k'uekjakaxín sín tí chjincó la ko k'uekjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uekjak'e ijnko nchésen tsik'óna chica oro k'uek'inka maná k'óna niotja, la ko kjaxín k'uekjak'e tí nta k'uekjixin ch'in Aarón kjuankixin k'uayan nta ntahnte, la ko kjaxín ntiha kjuák'e tí xró chóna tí tan k'uetoan Dios. 5 Chritaón tí ntacajón k'uek'ejó yaá ángel tsikjanoya tsikjentoá kanenee chritaón tí kjuák'e tí kjuachaxin kuénte Dios; ntaha k'uekjinxín tí jie k'uechóna chojni. A ntá ijie la t'ichjánxinhya naxa tsonixjani kuénte tíha.

6 A ntá xikaha k'uejó tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuénte nínko kixin tí xra ch'e sín kuénte nínko. 7 A ntá tí yóxin cuarto jehó tí nchat'á t'etóan t'ixenhen ch'án jnkokoá vez jnkojnko nánó; a ntá tí t'ixenhen ch'án t'ichjánxin ts'ixenko ch'án ijnié iko tsochjéhe ch'án Dios tsojtúaxín ijie ch'án la ko ijie tí i so chojni. 8 A ntá tí Nchakuen Dios nchenoexínni tíhi kixin nachrohe k'uekjich'e xra tí cuarto saoxín la naxa tjeprankehya kixin chrók'uixenheni tí Cuarto Antsi Tjóá. 9 Kain tíha tjeqoxín ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyan sín xitjahya nchenoexín sín kixin á chaxín kótjótá tí jie k'uechóna sín kixin xikaha k'uérxaxinkaon sín Dios. 10 A ntá tíha jehó t'etóan kuénte tí nkehe chrókjóné sín la ko tí nkehe chrók'ui sín la ko tí chrók'ónti sín kixin chrókótjúaxín ijie sín, kain tíha mé k'uituhenhen sín kuénte cuerpo ó la jehó k'uechóna kjuachaxin tí naxa kjuinkíhya Dios nkexrí chrórxaxinkaon sín ch'án.

11 A ntá ó kui Cristo, jehe ch'án mé nchat'á t'etóan kuénte tí nkehe antsi jina itsi. A ntá tí nínko ch'e ch'án xra la antsi jina la ko antsi ntoá, la jehya chojni tsikjich'éna tíha kixin jehya chjasintajni ntíhi tjen. 12 Tió k'uíxnenhen Cristo tí Cuarto Tjóá, la jehya kixin chrókjuanjon ch'án ijnié koténtsó la ko ijnié koxintáxjan. Náhi. Ijnié ch'án kjuanjon ch'án; mé xikaha k'uíxnenhen ch'án jnkokoá vez ntiha mé xikaha kjuenká ch'án kixin chrókuaáxinni jnkochríxín. 13 A ntá tí ijnié koxinta la ko ijnié koténtsó la ko tí nteso kuénte tí koxintáxjan tsíchexín tí altar tsikitexín tí sín tjuáhya la mé tíha chóna kjuachaxin tsojtúaxín tí chritaón ó. 14 A ntá tí xikaha, la kjá antsi má chóna kjuachaxin tí ijnié Cristo. Kixin tí kjuachaxin Nchakuen Dios tjen jnkochríxín, la Cristo kjuanjon asén ch'án ik'uéen ch'án k'uáyéhe Dios, la jehe ch'án la ninkehó jie chónahya ch'án. A ntá ijnié ch'án nchetjótá tí nkehe kjuich'eni senó chrók'uenxínni kixin ntá jie la jina chrókjuich'ehe ni xra Dios tjechón.

15 Méxra Jesucristo nixjaxín ch'án tí pacto nixin k'uetoan Dios. Kixin k'uenyákonhenni Cristo ntá tsojtúaxín tí jie kjuasinni kjuinchexiteyáhyani tí pacto k'uituhenheni senó; kixin tí sín k'uáyéhe Dios la jina chrók'uáyéhe sín tí nkehe tsjejehya kixin jehe ch'án xikaha tsintáchro ch'án tsjanjon ch'án. 16 A ntá tí siin ijnko nkehe tsintáchro ijnko chojni kjuák'e na ntá ik'uéen la t'ichjánxin tsonoxín kixin chaxín tsik'en tí nkexro tsikjich'éna. 17 A ntá tí nkehe tsintáchro ch'án la sínkíhya tí naxa tjechón tí nkexro tsikjich'éna; jehó tió chrók'uen ch'án mé sínkí. 18 Méxra tí pacto xrankíxixín tsik'etóan Dios kjuankixin kjuich'e xra kixin k'uitji ijni. 19 Ch'in Moisés tsichrónka ch'án kain nkehe tsik'etóan tí ley kuínhin kain tí chojni; a ntá chr'éxín kuákja ch'án ichjóen kolélo kjátse la koí ntarama hisopo, ntá kjuínchekjatjaxín ch'án ijnié koxintáxjan la ko ijnié koténtsó tsikjiko intá, ntá kuikjanjin ch'án tí libro chóna ley la ko kuikjanjin ch'án kain tí chojni. 20 A ntá ntáchro ch'án kixin: "Tí jni i tsoxiteyáxin tí pacto k'uetoan Dios chrókjuinchexiteyéhérá jahará."* 21 Tí ch'in Moisés kjaxín kuikjanjin ch'án jni tí nínko la ko kain nkehe t'ichjánxin tí nkaxenhen nínko. 22 Kixin xikaha ntáchro tí ley kixin kain nkehe la chrókótjúaxín tí jni; a ntá xitjahya chrókótjótá tí jie tí chrók'uiixikjanjinhya jni.

Tí ik'uéen Cristo mé tsjinxín ijieni

† 8:12 8.8–12 Jeremías 31.31–34 * 9:20 9.19–20 Éxodo 24.6–8

²³ Méxra t'ichjánxin kixin ik'uén iko kótuáxin tí nkehe a, táha mé tóyóhó tí nkehe siín nkaya nkajni; a ntá tí nkehe chaxín kuente nkaya nkajni t'ichjánxin ijnko nkehe antsí jína chrók'uen. ²⁴ A ntá Cristo k'uixenhya tí nínko tsíkijich'énaxín chojni tja, táha mé ijnko nkehe tóyóhó tí nínko chaxín. Náhí. Jehé ch'án mé k'uixenhen ch'án tí nkaya nkajni, a ntá jie mé tjen ch'án tí tjen Dios nixjajin ch'án kaín ni. ²⁵ A ntá jehe ch'án la jehya jnkoyaxón k'uixenhen ch'án ntiha k'uenyákonhenni ch'án. Náhí. A ntá tí nchat'a t'etoan t'ixenhen tí Cuarto Tjóá jnkojnko nánó kixin tsjanjon ch'án ijnjé ko ó. ²⁶ A ntá tí xikaha chrókónhen Cristo la t'ichjánxin kixin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kixin tsjinxín ijjéni. ²⁷ Mé xikaha kaín ni its'enni jnkokoá vez, a ntá chr'éxin tsitoxén ijjéni. ²⁸ Mé xikaha kjaxin Cristo jnkokoá vez ik'uén ch'án kixin tsjinxín ijjé nchónhya chojni. A ntá chr'éxin itsi ch'án inaá, jehya kixin naxa tsjatsen ch'án ijjé chojni. Náhí. Sinchekaá ch'án tí chojni ó tsikótjóá tjejóchónhen itsi ch'án.

10

¹ A ntá tí ley k'uetqanxín ch'in Moisés la tóyóhó tí nkehe jína tsi la jehya tí nkehe chrókuaaxinni. Méxra tí ley kjuachahya kjuínchetjóá tí sín kóchjinehe Dios kjuanjon sín iko its'en jnkojnko nánó. ² A ntá tí chrókjuacha tí ley chrókjuínchetjóá ijjé sín, ntá chrókjuenkayáxinhya sín kixin naxa chróchóna sín jie, la chrókuítqhe sín, í chrókjuanjonyha sín iko its'en. ³ A ntá xikaha ich'e sín t'óyán sín ko, la jnkojnko nánó xraxinkakonxín sín tí jie tsikjasin sín ⁴ kixin ijnjé koxinta la ko ijnjé kotétso xitjahya tsjinxín ijjé chojni.

⁵ A ntá tió Cristo kui chjasintajni ntáche ch'án Dios kixin: Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhí. Jaha tsíkijich'éna ijnko cuerpo kixin tsochonta janhan. ⁶ Jaha tóxrjánhya iko tsíchján la ko tí í so nkehe chrókjuanjonni chrókjuakjuínxian ijjé. ⁷ A ntá ntátjan ch'án kixin: "A ntá ijje la ntihi tjeñ janhan kixin sintaxiteyá tí nkehe tóxrjánhan jaha Dios,

éxi nixja xroon chrónka nkexrí chrókjuít'a."*

⁸ Senó ntácho kixin Dios tjinkákonhya la ko tóxrjénhya ch'án iko its'en chrókjuanjonni la ko ninkehó nkehe chrókjuanjonni chrókjuínxian ijjéni kjónté tí ley k'uetqan kixin xikaha chrókónhen. ⁹ A ntá chr'éxin tsintácho kixin: "A ntá k'uinka janhan kixin sintaxiteyá tí nkehe tóxrjánhan jaha Dios," ichro ch'án. Mé xikaha kjuatsen ch'án tí ko k'uék'óyán sín ósé, a ntá jehe ch'án kjuanjon ch'án ijnko nkehe nixín. ¹⁰ Dios kjuínchetjuáxinni kixin Jesucristo kjuínchexiteyá éxi tóxrjénhya Dios kixin tí cuerpo kuente ch'án kjuanjon ch'án ik'uén ch'án jnkokoáxón vez para jnkochrín.

¹¹ A ntá kaín nchat'a judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjinxín ijjé chojni. ¹² A ntá Jesucristo mé jnkokoá vez k'uenyákonhenni ch'án kixin tsojtuáxin ijjéni la tíha mé sich'e xra jnkochrín. A ntá kjuixín ntá sákjuí ch'án kjuák'etjajin ch'án nó tí tja chjina kuente Dios. ¹³ A ntá ntiha tjechónhen ch'án tsjixinjian kaín tí sín nínkakhonhen ch'án tsjachahya sín ts'etqan sín. ¹⁴ Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsikótjóá. ¹⁵ A ntá tí Nchakuen Dios nchenoheni tíhi kixin senó tsintácho kixin:

¹⁶ Tí pacto tsojtjahá tí jehe sín tió ts'atsínka tí yaon a, ichro Ìnchéni;

Sintaxráxinkavan asén sín tí ley tsétoan,

a ntá tí kjuaxrexinkaon kuente sín tsokjian tí nkehe tjínkavan.†

¹⁷ Kjaxin ntácho kixin:

Í tsoxráxinkakonhya inaá tí ijje sín la ko tí nkehe jínahya kjuích'e sín.‡

¹⁸ Mé xikaha tí ó kótjóá ijjéni la t'ichjánxinhya í so nkehe chrókjuanjonni chrókótuáxin tí ijjéni.

Méxra t'ichjánxin tsochjinehene Dios

¹⁹ Kíchóni, a ntá la í kohya kjuachrakon ts'ixenheni tí Cuarto Antsí Tjóá tí tjen Dios kixin kjuachaxjén ijnjé Jesucristo, ²⁰ chréheni tí ntja nixín mé tí ntja tjechón kuakítjehé ch'án nóton tí ka cortina, tíha mé tí cuerpo kuente ch'án. ²¹ Jesús mé tí nchat'a tjeoan kuenteñi t'etqan tí ntqé Dios. ²² Méxra xikaha chrókóchjinehene Dios kaín aséni chrókjuínkáchónkini ch'án chaxín kixin jehe ch'án tsíkjinchetjóá ch'án aséni kixin chrókjuenkayáxinhyani kixin naxa chótani jie kixin tí cuerpo kuenteñi kótuáxin tí ntá jehó. ²³ Chrókuítqehyani chrók'uejóchónhenni tí nkehe tinkáchónkini kixin Dios la chaxín sinchexiteyá ch'án tí nkehe tsintácho ch'án. ²⁴ Chrókjueyáni nkexrí chrókjuínkítsani kíchón ní kixin chrórtjuehene kíchón ní la chrókjuích'eni tí nkehe jína. ²⁵ Chrókuítqehyani chrókójnkoatséni, chrókóyóqehyani éxi tí sín

* 10:7 10.5-7 Salmo 40.6-8 † 10:16 10.16-17 Jeremías 31.33-34 ‡ 10:17 10.16-17 Jeremías 31.33-34 § 10:22 Ezequiel 36.25

í tójnokotséhya sín. Náhí. Chrókuinchechéheni kíchó ni ántsi má jie kixin ó noheni kixin í séhya tsokjan Ìnchéni.

²⁶ A ntá tí naxa chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani. ²⁷ A ntá jehó itjen tí kjuachrakon jie tsitqexin jie la ko tí xrohi tjeche ts'itjáyanxin tí sín nínkakonhen Dios. ²⁸ A ntá tí tjen jnkojin nkexro titekakonhya tí ley k'uetqoxin ch'ín Moisés, la tsonoxin yaá o y'á tí sín tsík'ikon tí jie tsíkjasin sín, tíha mé ts'enzín sín la kohya nkexro tsíkonóehé tí jehe sín. ²⁹ Á tjenkayáxinhyará kixin ántsi má chrókjuasóte tí sín kuítekakuenhya tí Xjeen Dios la ko chóntehya sín kjuasáya tí jnié ch'án la ko t'ántaxínhin sín tí Nchakuen Dios tjuéheni? Kixin tí jni chrónkaxín kixin ts'etqoxin tí pacto la ko tí jni k'u'ujmáxinni. ³⁰ Noheni kixin tsintáchro Ìnchéni kixin: "Janhan mé tóna tocar sintakitqaxián ijie chojni la ko janhan tsjénkahá sín."* Kjaxin tsintáchro kixin: "Ìnchéni sinchekitqoxin ijie tí sín tinkáchónki ch'án."† ³¹ Méxra kjuachrakon jie chrók'uanótjenyáni tí tja Dios tjechón.

³² A ntá chrórxáinkáonrá jahará tí nkehe tsíkónhen ósé kixin tíó jahará nantá tsík'ayéhérá tí nkehe t'ínkaséyan, a ntá kjuachará kjónté tí nchónhya nkehe tsíkónhanrá. ³³ A ntá jnkojin tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuinkitsa tí sín tsík'ekon. ³⁴ A ntá jahará kuíkonóehérá tí sín tjejóchjina ntóechiso, a ntá jahará kóninkákonhyará kjónté k'uaxrjahará kaín nkehe chontará, kixin ó nohará kixin nkaya nkajin chontará nkehe ántsi jina chónhya tsjeje. ³⁵ Chrókuítqóehyará tí nkehe tinkachónkirá kixin ó nohará kixin tíha mé ts'ayéxinrá nkehe chr'éxin. ³⁶ Kjaxin jahará t'ichjánxin chrók'uejochonhénrá chrókóninkákonhyará kjónté ichrén nkehe chrókónhanrá, kixin s'ich'érá tí nkehe tjinkaon Dios, kixin xikaha chrók'uayéhérá tí nkehe tsintáchro tí jehe ch'án. ³⁷ Kixin xikaha ntáchro xroon itén Dios kixin:

Kánhyó sé

itsi tí nkexro tsi, í sinchexrjenhya.

³⁸ Tí sín kótjóá asén mé tjejóchónxin sín kixin tinkáchónki sín Dios;

a ntá tí sín tsítóhe tí janhan la í tsochánahya tí xikaha ch'e sín.‡

³⁹ Kjánchó jeheni jehya xikaha chrókuítqóeheni chrókuinkáchónkiyhani tí jehe ch'án kixin ntá chrókjuasinni jie chrók'uitjáyanxinni. Náhí. Tinkáchónkini ch'án la tíha chrókuaáxinni.

11

Tí fe

¹ Tí fe chóntani la mé noexínni chaxín kixin tsoxiteyá ts'áyéheni tí nkehe tjejóchónhenni, la ko noexínni chaxín kixin kjónté ijnko nkehe t'íkonhyani la chaxín tjen. ² Tí sín tsík'axrjenixinni ósé la kóxrjínhin Dios kixin k'u'échóna sín fe.

³ Tí fe mé noexínni kixin Dios tsík'ich'éna kaín nkehe tí kjuachaxin tí nixja ch'án la ko noexínni kixin tí nkehe t'íkonni mé tsík'óna tí nkehe t'íkonhyani.

⁴ A ntá tí fe k'u'échóna ch'ín Abel mé k'óyan ch'án ijnko kolélo chjéhe ch'án Dios. Tíha ijnko nkehe ántsi jina kjuanjon ch'án, a ntá tí nkehe tsík'janjon ch'ín Caín la náhi. Méxra Dios kóxrjínhin tí nkehe kjuanjon ch'ín Abel ntá ntáchro Dios kixin jina tí ch'ín a. Kjónté ó tsík'en ch'ín Abel la tí nkehe tsík'ich'e ch'án naxa tjakoqxín kixin jina tí fe k'u'échóna ch'án.*

⁵ A ntá tí fe k'u'échóna ch'ín Enoc la Dios sátsík'jiko tí jehe ch'án la k'uénhya ch'án, a ntá k'uitjahya sín ch'án kixin Dios sátsík'jiko. Naxa sákjujhyá ch'án la xráxin kóxrjínhin Dios nkexri k'u'ékjak'e ch'án.† ⁶ A ntá tí chróchónahyani fe la xitjahya chrókjuinchechéheni Dios, kixin t'ichjánxin kixin tí sín chrókóchjinehe sín Dios chrókuítekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

⁷ A ntá tí fe k'u'échóna ch'ín Noé tí Dios chénka tí jehe ch'án tí nkehe naxa k'uíkonhyá ch'án tsonhen, la kuítekaon ch'án kjuich'éna ch'án ntabarco kixin tsaáxin ch'án la ko tí sín naxa kjéhya ch'án. Tí fe k'u'échóna ch'án kjuakoqxín kixin tí í so chojni chjasintajni la jínahya sín tsjasóte sín. A ntá kóxrjínhin Dios tí jehe ch'án kixin kuítekaon ch'án la tí xra kjuich'e ch'án mé kuaáxin ch'án.‡

⁸ A ntá tí fe k'u'échóna ch'ín Abraham tí k'uíyehé Dios tí jehe ch'án la kuítekaon ch'án sákjui ch'án tí nonte tsjanjon Dios ts'áyéhe ch'án, ntá k'uaxrjexín ch'án chjasén ch'án kjónté noehya ch'án nketi nó sátsji ch'án.§ ⁹ A ntá tí fe k'u'échóna ch'án k'u'ékjak'e ch'án tí nonte chrókjuanjon Dios, éxi jehya nontee ch'án tíha. Kjuák'e ch'án nchia tsík'óna ka, la ko kjaxin xikaha k'u'échóna ch'ín Isaac la ko ch'ín Jacob la ko kjaxin jehe sín tsík'áyéhe sín tí nkehe

* 10:30 Deuteronomio 32.35-36 † 10:30 Deuteronomio 32.35-36 ‡ 10:38 10.37-38 Habacuc 2.3-4 * 11:4 Génesis 4.3-10 † 11:5 Génesis 5.21-24 ‡ 11:7 Génesis 6.13-22 § 11:8 Génesis 12.1-5

tsíntáχρο Dios.* ¹⁰ A ntá ch'ín Abraham k'uékjak'echónhen ch'án tí chjasin tsíkijh'éna Dios ts'ítjáyanhya.

¹¹ A ntá tí fe k'uéchóna tjan Sara kjónté ó nána tjan, k'uáyéhe tjan kjuachaxin sich'éna tjan ijnko xjan; a ntá kjuich'éna tjan ijnko xjan kixin kuítekaon tjan kixin Dios sinchexiteyá tí nkehe tsíntáχρο ch'án.† ¹² Kjaxin xíkaha ch'ín Abraham, kjónté ó mero chrók'uen ch'án kixin ó táda ch'án, la k'uaxrjeníxin ch'án nchónhya chojni éxi konotsé siin nkajní o éxi nchesen siin chrínta ntayaon, xitjahya ts'ekini.‡

¹³ A ntá káin tí chojni a ik'uén sín k'uáyéhya sín tí nkehe tsíntáχρο Dios kixin chrók'uáyéhe sín, a ntá k'uéchóna sín fe, la kjónté ikjín k'uíkon sín la ko kuítekaon sín kóchéhe sín. Mé xíkaha k'uéchónka sín kixin tí chjasintajni jehya chjasén sín. ¹⁴ Mé xíkaha k'uénixja sín la tienxínni jina kixin naxá xritjeyá sín nketí chrók'óna chjasén sín. ¹⁵ A ntá tí chrórxaxinkaon sín tí chjasin tsík'axrjexín sín ntá jina chrókjan sín ntiha inaá. ¹⁶ Kjánchó tjínkaon sín ijnko chjasin antsí má jina, tíha mé chjasin nkaya nkajní. Méxra Dios la tósuehya ch'án kixin chrókjuinçek'in sín ch'án tí Dios kuénte tí jehe sín, kixin ó tjechónhen tí chjasin ts'áyéhe tí jehe sín.

¹⁷ A ntá fe k'uéchóna ch'ín Abraham kixin Dios kjuich'e prueba tí jehe ch'án kjuanchia tí xjeen ch'án Isaac, a ntá kjuíkqo ch'án chrók'oyán ch'án, chrókjuanjon ch'án. Tjechónhen ch'án chrókjuanjon ch'án kjónté jnkokoqáxon xjeen ch'án tsíkjanjon Dios§ tsíntáχρο kixin: ¹⁸ “Tí ch'ín Isaac ts'axrjeníxin nchónhya xjan.”* ¹⁹ A ntá ch'ín Abraham kjuátsoan ch'án kixin Dios imá chóna kjuachaxin, la kjónté chojni tsík'en na nchexechón ch'án, la éxi yóhe chrók'uen tí xjeen ch'ín Abraham ntá chrók'uáyéhe ch'án inaá.

²⁰ A ntá tí fe k'uéchóna ch'ín Isaac kjuíncheyaon ch'án tí xjeen ch'án ch'ín Jacob la ko Esau, kixin jina ts'ejó sín.† ²¹ A ntá tí fe k'uéchóna ch'ín Jacob tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí nta tjixin ch'án kjuisójjixín ch'án nixjehé ch'án Dios.‡ ²² A ntá tí fe k'uéchóna ch'ín José tió chjina its'en ch'án tsíntáχρο ch'án kixin tí sín israelita la chr'éxin ts'axrjexín sín chjasin Egipto, tsík'etqan ch'án kixin tió sátsji sín la sátsjiko sín tí huesogé ch'án.§

²³ A ntá tí fe k'uéchóna it'é la ko iné ch'ín Moisés tió kokjíhi ch'án kjuak'emá sín ch'án iní nitjío kixin tsík'ikon sín kixin ijnko xjan ntoa náxrjón tsjehe ch'án, la ko chrakuenhya sín tí nkehe tsík'etqan tí ch'ín rey kixin chrók'oyán sín xjan.* ²⁴ A ntá tí fe k'uéchóna ch'ín Moisés tió kónteto ch'án la chrohya ch'án its'in ch'án xjeen tí tjan xjeen ch'ín rey Egipto.† ²⁵ Náhi. Kjueyá ch'án kixin kjónté chrókjuasóteko ch'án tí sín tinkáchónki Dios, la kóxrjienhya ch'án kixin séhya náxrjón chrókjuak'e ch'án chrókjuasin ch'án jie. Náhi. ²⁶ Kjuenkayáxin ch'án kixin antsí tjeoan chrókjuasótéxin ch'án tí tinkáchónki ch'án tí Cristo itsi chr'éxin, a ntá kánhyó tjeoan chróchóna ch'án káin nkehe tjete siin chjasin Egipto. Kjuenkayáxin ch'án kixin chrók'uáyéhe ch'án tí nkehe chrókjuanjon Dios. ²⁷ A ntá tí fe k'uéchóna ch'ín Moisés sákjuixín sín tí chjasin Egipto,‡ chrakonhya ch'án kjónté kónínkaon tí ch'ín rey, a ntá kuítqehya ch'án tí tinkáchónki ch'án Dios kixin éxi t'íkon ch'án tí Dios ninkexró t'íkonhya.

²⁸ A ntá tí fe k'uéchóna ch'ín Moisés kjuasin ch'án tí kia pascua, k'uetqan ch'án kixin chrókuiqanjín sín jni tí puerta, kixin tí ángel t'óyan chojni chrókjuincheníehya nijnko tí xjan sqo kuénte tí sín Israel.§ ²⁹ A ntá tí fe k'uéchóna tí sín israelita k'uátóye sín tí Ntayaon Kjátse kixin k'óna nche xamá, a ntá tió tí sín Egipto tjínkaon sín chróchréhe sín xíkaha la kjánchó kjuínhin sín tí nta a.*

³⁰ A ntá tí fe k'uéchóna tí sín israelita la xítjen tí tjt'qo t'ínkakuènxín tí chjasin Jericó, tió kjuixín k'uántatjen sín yato yaon tí chjasin a.† ³¹ A ntá tí fe k'uéchóna tí tjan Rahab, na mé ijnko tjan k'uéchóna nchónhya chojni ntoa, ntá k'uénkohya tjan káin tí sín jiehe kuítekakonhya, kixin tsíkjanjon tjan kjuachaxin kixin kjuaxrxín tsíkítohe ntqo tjan tí sín israelita kjuíjtsáya sín tí chjasin Jericó.‡

³² ¿Nkehe naxá chróntáxrjan? Sintak'itjáyán tiempo naxá chrónixja kuénte ch'ín Gedeón, la ko ch'ín Barac, la ko ch'ín Sansón, la ko ch'ín Jeffé, la ko ch'ín David, la ko ch'ín Samuel, la ko tí sín profeta. ³³ Kixin tí fe k'uéchóna tí jehe sín kjuacha sín k'uetqan sín jina ókjé chjasin, la ko jina kjuínchekitoexín sín ijje chojni, la ko k'uáyéhe sín tí nkehe tsíntáχρο Dios kixin tsjanjon ch'án, la ko k'uíkjehe sín ir'va koxra, ³⁴ la ko k'uanka tí xrohí chróchéxin sín, la ko kjuachahya tí espada chrók'uenxín sín. A ntá tí sín chrakon la kófuérte sín, k'óna sín chojni

* **11:9** Génesis 35.27 † **11:11** Génesis 18.11–14; 21.2 ‡ **11:12** Génesis 22.17 § **11:17** Génesis 22.1–14 * **11:18** Génesis 21.12 † **11:20** Génesis 27.27–29,39–40 ‡ **11:21** Génesis 47.31–48.20 § **11:22** Génesis 50.24–25 * **11:23** Éxodo 1.2; 2.2 † **11:24** Éxodo 2.10–12 ‡ **11:27** Éxodo 2.15 § **11:28** Éxodo 12.21–30 * **11:29** Éxodo 14.21–31 † **11:30** Josué 6.12–21 ‡ **11:31** Josué 2.1–21

tsehe kjuacha sín kjuánjonko sín tí sín soldado tsíkjin ókjé. ³⁵ Kjaxin k'uék'ixin chojni chjin k'uáyéhe inaá tí chojni tsík'en kuènte sín tsíxechón inaá.

A ntá í so sín la kjuasote sín k'uénxin sín kixin kjuínchemáhya sín kixin kuinkáchónki sín Dios kixin ó nohe sín kixin tsoxechón sín antsí jína inaá. ³⁶ A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín. ³⁷ Í so sín la ixró k'uénxin sín, la í so sín cierra chrít'oxin sín, la í so sín la nchónhya nkehe kjuasótéxin sín, la í so sín k'uénxin sín espada, la í so sín k'uék'aji sín tsik'inkáya sín tjje kolélo la ko tjje kotèntso, nòa sín, kjuasóte sín, kjuaxróxinhya la náxrxónhya k'uéjéj sín. ³⁸ A ntá tí sín chjasin ntiha kjuikosáyehya tí sín a la ntá k'uínkite sín, la tí sín a la chóntahya chjasén sín la sákjuj sín nteje, la ko jna, la ko tjo síxra la ko tóye. ³⁹ Kain tí sín a kónhen sín prueba kixin á chaxín chóna sín fe la kjónté xikaha k'uáyéhya sín tí nkehe tsintácho Dios kixin tsjanjon ch'án ⁴⁰ kixin Dios kjuenkayáxin ch'án ijnko nkehe antsí jína kixin jehó jnkokoá chrók'uáyékoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxra tí jeheni la tsík'antátjenni nchónhya chojni tsíkjakoxín sín tí fe k'uéchóna sín, la ntá chrókuítgheni ntáha kain tí nkehe t'inkákonhen, la ko tí jje chrókujachroeni, a ntá chrókuich'eni jína tí xra chótani la ntá chrókuachani antsí má chrókónoheni. ² Jehó Jesús chrókuinkáchónkini kixin jehe ch'án kjuanjon tí fe chótani kixin jína kjuakoxín ch'án kjuínchexiteyá ch'án, la kjuasótéxin ch'án tí ntacruz, la kuáhya ch'án kuentá kósuéhya ch'án tí nkehe kónhen ch'án ik'uén ch'án, kixin nohe ch'án kixin tsjixin tsjasóte ch'án ntá náxrxón tsjak'e ch'án la ko tschéhe ch'án kixin tsjak'etjaxín ch'án tí tja chjina tí trono kuènte Dios.

³ Méxra chrókuenkayáxinrá jahará nkexrí kjuakoxín ch'in Jesús. Tí sín chóna jje imá kjuínchekjasóte tí jehe ch'án la kjónté jahará xikaha chrókjuasóterá la chrókórxjéhyará chrókuinkachónkirá ch'án. ⁴ A ntá jahará naxa k'uénxinhyará tí tjanjonkoará tí jje. ⁵ ¿Á k'uitjányanhará tí jahará tí nkehe ntaxraxinkaonrá Dios kixin éxi xjeen ch'án t'ikon ch'án tí jahará? Éxi ntácho xroon itén Dios kixin:

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

⁶ Kixin Ìnchéni mé tjentuéhe tí sín tjuehe ch'án la ko nchekjasóte kain tí sín ts'áyéhe ch'án ts'óna xjeen ch'án.*

⁷ Chrókuítékáonrá tí nkehe t'etqan Dios kixin Dios t'ikon kixin éxi xjeen ch'án tí jahará. ¿Á siín ijnko it'é xjan chrokuentuéhya tí xjeen? ⁸ A ntá tí chrókuentuáhyará Dios tí jahará éxi tjentuéhe ch'án kain tí xjeen ch'án, ntá jahará kjá jehya xjeen ch'án chaxín. ⁹ A ntá tí naxa k'uéchánjanni, na mé it'éni ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókuínchexiteyéheni It'éni tjen nkaya nkajni kixin chróchóntaxínni kjuachón. ¹⁰ It'éni ntihi chjasintajni kjuentuéheni ch'án kjónté kánhyó sé éxi nkexrí kórxjínhin ch'án; a ntá It'éni Dios tjentuéheni ch'án kixin jnkójina chrók'uejóni, kixin chrók'ónani tjóá kixin jehe ch'án la tjóá ch'án. ¹¹ Chaxín ninkehó xikaha chrókuínchekjasóte Dios tí jeheni chrókórxjínhinni tí nantá chrókónhenni kixin tí kjuatjoté. A ntá xikaha ts'itjaxínni tí kjuaxróxin éxi ijnko nkehe náxrxón kjuachani.

Tí sín tjanoá tí kjuasáyé Dios

¹² Méxra tjisójirá tí tjárá tsíkóxrjé la ko tóch'inrá chóntahya fuerza, ¹³ la ko chrókuéyará tí ntja ntoá. A ntá tí totará níhi xitjahya tjixinrá chrókuítghe jína la ko chrókóniehya inaá.

¹⁴ Chrókóxakonhanrá kixin kjuaxróxin chrók'uejorá kain rá, jnkójina tjóá chrók'uejorá. A ntá tí tjúahya chrók'uejorá la xitjahya ts'ikonrá Ìnchéni. ¹⁵ Chrókóxakonhanrá kixin nijnkorá chrókuítghehyará tí kjuasáyé Dios la ko nijnkorá chrók'ónahyará éxi ijnko nuèe ka tsjá chóna veneno chrókónéxin tí í so chojni. ¹⁶ Nijnko tí jahará chrókjuásinkoará jje ijnko chojni chjin ókjé, la ko chrókjóniehýará tí nkehe tjóá éxi kjuich'e ch'in Esaú, kixin jnkokoá comida kjuínchekjixin ch'án tí nkehe chróchóna ch'án kixin xjan saó jehe ch'án.† ¹⁷ Jahará ó nohará kixin chr'éxin, tíó tjínkaon ch'án kixin chrókuíncheyaoon it'é ch'án tí jehe ch'án la í xitjahya tsoyaon ch'án kixin kohya nkexrí chrók'uixitóxín tí nkehe tsík'ich'e ch'án kjónté imá chrótsjánka ch'án.‡

¹⁸ A ntá jahará la jehya kóchjinará éxi kóchjina tí sín israelita tí jna jína chrótsé sín tí síchr'ákjen xrohi, tí tjen tí sitié t'inkaséyanhya la ko tí chjéhe xrinto. ¹⁹ Na ní tsíkienhyará tí tsintácho trompeta, la ko tí itén Dios níxja. A ntá tí sín tsíkinhin tí tan a na mé chonòa sín kixin í chrónixjahya ch'án inaá,§ ²⁰ mé xikaha ichro sín kixin tsjachahya sín sinchexiteyá sín

* **12:6** Job 5.17; Provérbios 3.11–12 † **12:16** Génesis 25.29–34 ‡ **12:17** Génesis 27.30–40 § **12:19** Éxodo 19.16–22, 20.18–21

tí nkehe k'uetqan ch'án kixin "Tí nkexro tsinkátja tí jna mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jna la chrók'uen."* 21 Ijnko kjuachrankan jieé tí nkehe k'uikon sín la kjónté ch'in Moisés tsintáχρο ch'án kixin: "Kjaxin sixrànkana chrakonna."†

22 A ntá jahará tsikóchjineherá tí jna Sión, tí chjasén Dios tjechón, mé tí Jerusalén itjen nkaya nkajni, la ko nchónhya miles ángel 23 tsikójnkontsé sín kixin tsochjéhe sín kjuasáya Dios, la ko tí sín tsikójnkontsé sín tsik'óna sín xjeen Dios saxín ts'ínixin ihnié sín nkaya nkajni. Jahará tsikóchjineherá Dios, jehe ch'án mé Juez sinchekitqoxin ch'án ijje kaín chojni, la ko tsikóchjineherá tí nchakuen chojni jina ó tsikjinchetjóa Dios, 24 la ko tsikóchjineherá ch'in Jesús, jehe ch'án mé nixjaxin ch'án tí pacto nixin kixin tí ijnié ch'án k'uitji kjuinchetjuáxinni ch'án. A nte antsí jina chrónkaxín tí ijnié ch'án, a ntá kánhyó tí ijnié ch'in Abel.

25 Chrókóxakonhanrá chrókúitekákonehénrá tí nkexro tjenixja. Kixin tí sín kjuanoá Dios tío kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kujxin nkaya nkajni. 26 A ntá tí itén Dios tí yaon a kjuínchekinkí nonte. A ntá jie tsintáχρο ch'án kixin: "A ntá inaá jehya nonte ó sintakinkia. Náhí. Kjaxin nkajni sintakinkia,"‡ 27 A ntá tí tsintáχρο ch'án kixin "inaá" mé t'axrjexín kixin tsjakjin ch'án tí nkehe jina tsinkí, a ntá tsitqhe ch'án tí nkehe xitjahya tsinkí. 28 A ntá tí ts'áyeheni tí kjuachaxin kjuanjon Dios la xitjahya ts'ixinkí tíha. Méxra chróchjeheni Dios kjuasáya chrórxaxinkaonni ch'án chróchrakonhenni ch'án 29 kixin tí Dios kuènteni mé éxi ijnko xrohi tsjacha sinchek'itjayan kaín nkehe.§

13

Nkexri chrók'uejóni kixin chrókóchéhe Dios

1 Méxra chrókuitqéhyará chróttjueherá kichuára. 2 Chrók'uitjáyanyará chrókjuánjonrá kjuachaxin chrókuitqhe ntqará tí sín tsikjixin kjin. Mé xikaha kjuich'e iso sín la kjónté ángel tsik'áyéhe sín la kónoehya sín.*

3 Xráxinkáonrá tí sín tjejóchjina éxi kjaxinrá chrók'uejochjinakoará tí jehe sín. Xráxinkáonrá tí sín tsik'ekon éxi kjaxin tí jahará xikaha chrókonhanrá kjaxin.

4 Kaínrá chróchonteherá kjuasáya tí kótehe chojni. A ntá jahará tsikótqhará la jina chrók'uejokoará kichuára chróttjuehéra kichuára. A ntá tí sín tjinkaon tsochónta chojni chjin ókjé la Dios sinchekjasóte sín kixin xikaha ich'e sín.

5 Kénhyó má chrókóxrinhanrá itsjé chichaon. Chrókócháhará kjónté tí kánhyó tsjé chon-tará; kixin tsintáχρο Dios kixin: "Janhan na tsitqahya tí jahará la ko ts'itjáyannahya tí jahará."† 6 Mé xikaha chrakonhyani tsontáchroni kixin:

Ínchéni mé tjinkitsani,

méxra chróchrakonhyani kjónté ichrén nkehe chrókjuich'e heni chojni.‡

7 Chrórxáxinkáonrá tí sín kjuinkitsa tí jahará kjuakqhará sín itén Dios, chrókjuenkayáxinná nkexri k'uejó sín ntá xikaha chrókóyóhará sín éxi tí fe k'uechónta sín.

8 Jesucristo mé itjen ch'án ijna la ko ijie la ko jnkochrín. 9 Chrókuitqéhyará chrókjuakqhará chojni ijnko nkehe ókjé chrókuinkachónkirá. Íchá jina tí asánná chrók'uaýéhe fuerza kixin Dios tjuahará la jehya tjeotan chrókjuinchexiteyeheni tí nkehe t'etqan nkehe sineni. Mé xikaha tí sín kjuich'e xikaha kjuínchexiteyá tí nkehe k'uituenhen sín nkexri chrókjóné sín la ninkehó kjuínkítsahya tíha.

10 A ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchat'á kjuich'e xra nkaxenhen njnko ósé. 11 A ntá tí nchat'á t'etqan judío kjuiko sín tí ijnié ko nkaxenhen tí Cuarto Antsi Tjóa kixin tí nkehe la tsjatsen tí ijje sín. A ntá tí cuérpóe tí ko kjuakaxin sín ikon tí chjasin k'uejó sín. 12 Kjaxin Ínchéni Jesús kjuasóte ch'án k'uenxin ch'án ikon chjasin kixin tsotjuáxin kaín ijje chojni tí ijnié ch'án. 13 Tsochréheni Ínchéni Jesús éxi k'uenxin ch'án ikon chjasin kjónté tsjasóteni éxi kjuasóte tí jehe ch'án kjuikosáyehya sín tí jehe ch'án. 14 A ntá ntihi chjasintajni chóntahyani njnko chjasénni chrók'uitjáyanyá; a ntá xritjeyáni tí chjasin itsi chr'éxin. 15 Méxra chrókuitqehyani chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhé tí ko tsik'en tsíchjéhe sín Dios. Yóhé xikaha chrókjuanjoni kixin ir'vani ó chrókjuikosáyexinni ch'án. 16 Chrók'uitjáyanyará chrókjuich'erá xra jina la ko chrókjuinkitsará kichuára. Tí xikaha chrókjuich'erá la imá tóxrjinhin Dios.

* 12:20 Éxodo 19.12-13 † 12:21 Deuteronomio 9.19 ‡ 12:26 Hageo 2.6 § 12:29 Deuteronomio 4.24 * 13:2 Génesis 18.1-8, 19.1-3 † 13:5 Deuteronomio 31.6 ‡ 13:6 Salmo 118.6

¹⁷ Chrókuítekákónhénrá tí sín tjakohará chrókjuínchexiteyéhérá tí jehe sín. Jehe sín mé t'ayakonhen sín asánrá kixin jehe sín la ó nohe sín kixin tsjanjon sín kuentá tí tjen Dios. Tsjínkítsará sín kixin tsochéhe sín sich'e sín xra la tsonínkakonhya sín. A ntá tí chrókjuínchek'ávára sín, ntá ninkehó tsjachahya sín tsjinkítsa sín tí jahará.

¹⁸ Nixjehérá Dios kixin tí jeheni kaín ni, kixin chaxín jína kjuenkayáxinni la ko tjinkaonni kixin jína chrók'uejóni. ¹⁹ Tjánchíá xra ó kixin chrónixjehérá Dios kixin chrókjuanjon ch'án kjuachaxin kixin tjoka chrókjan janhan chrók'uejóni.

Tjanchia ch'án kixin chrókóyaon sín

²⁰ Tí Dios tjanjon kjuaxróxin, mé tí nkexro kjuínchexechón Inchéni Jesucristo kjónté tsík'en ch'án, jehe Jesucristo mé tí Pastor tjetoan t'ayakonhen tí kolélo, la tí ijnié ch'án mé tsoxiteyáxin tí pacto sich'e xra jnkochrín, ²¹ jehe Dios mé tsjinkítsa tí jahará kixin jína chrók'uejorá la ko kaín xra jína chrókjuích'erá kixin xíkaha tjinkaon ch'án; kixin jehe ch'án t'etuehenni ch'án kaín nkehe nkexrí tjinkaon ch'án kixin tí kjuachaxin chóna Jesucristo. Mé xíkaha chjéheni Cristo kjuasáya jnkochrín. Amén.

²² Kíchóni, xrjanóahará kixin tóninkákonhyará kixin tí palabra xrjanka sintaxraxinkáonrá. Méxra ikjian tí xroon kjónté kánhyó tsjé nixja ts'ayéhérá. ²³ Chrókónohará kixin kichó ni Timoteo la í tjechjahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

²⁴ Nixjehérá jnkójina kaín tí sín tjítaón ntja tjako la ko kaín tí sín kichó ni tinkáchónki Dios. Tí sín tinkáchónki Inchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhe kaín tí sín tsíxikayéhe

¹ Janhan Santiago mé t'gha xra Dios la ko Ìnchéni Jesucristo nixjaha kaín tí sín tsík'axrjenínxín tí teyó xjeen ch'ín Israel tsíxikayéhe sátsíkji kuenté chjasintajni.

Dios mé tsjanjon tí kjuaxrexinkaon jína

² Jahará kichó ni, chrókócháhará kjónté chrók'uat'sínkará ichrén nkehe náxrxjónhya. ³ Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará. ⁴ Chrókónohará kixin tí chrókóninkákonhyará la tíha mé ijnko xra jína chaxín kixin ntá jahará ijnko chojni chaxín kjuacha titekaon la í t'itjáyannya ninkehó.

⁵ Tí jnkójín tí jahará t'itjáyannya kjuaxrexinkaon la chrókjuancheherá Dios la Dios mé chrótjáhárá ch'án tíha. Jehe ch'án mé xráxin tsjanjon ch'án kaín nkehe ts'áyéhe tí chojni tjanchia la tsonínkakonhya ch'án. ⁶ Tíó chrókjuancheherá Dios nkehe la kénxin asánrá chrókjuanchiará la chrókjóhya asánrá ninkehó. A ntá tí chojni tjo asén la éxí ntayaon tjiko xrintó ijnko lado la í jnko lado. ⁷ A ntá tí xíkaha itjo asén sín la chróntáchrohya sín kixin chrók'uáyéhe sín ichrén nkehe chrókjuanjon Ìnchéni. ⁸ A ntá tí nkexro xíkaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

⁹ Tí kichó ni tinkáchónki Cristo la kjónté nda chóntahya itsjé nkehe chjasintajni la kjónté xíkaha chrókóchéhe kixin tí tinkáchónki ch'án Ìnchéni la antsí má sínkí tíha. ¹⁰ A ntá tí nkexro rico kjónté chrók'uitjáyannya tí nkehe chóna la antsí chrókóchéhe kixin tinkáchónki ch'án Ìnchéni, kixin tí nkehe chóna ch'án la kánhyó sínkí la ts'itjáyannya éxí itsjo tsík'óna ka. ¹¹ Tíó tsjijon yaon la tsosó imá la tí ka tsoxámá la ko tí tsjo la ts'ánótjen la tí náxrxjón tsjehe la tsjeje. Mé xíkaha tsonhen tí ch'ín rico, ts'itjáyannya ntá tsítoghe ch'án tí xra k'uéchóna.

Tí nkehe tsonhen chojni

¹² Náxrxjón tí nkexro tsjacha ts'atsínka tí nkehe náxrxjónhya tsonhen. A ntá tí tsjacha ch'án ts'atsínka kaín tí nkehe náxrxjónhya tsonhen ntá ts'áyéhe ch'án tí corona kuente kjuachón kixin Dios tsíntáchro ch'án kixin tíha mé tsochjéhe ch'án tí sín tjuéhe ch'án. ¹³ A ntá jnkójínrá tí chróntáchro asánrá chrókjuich'erá ichrén nkehe jínahya, la chróntáchrohya kixin Dios tsíkjanjon kjuachaxin xíkaha s'ich'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'uetqan ch'án kixin ninkexró chrókjuich'e ijnko nkehe jínahya. ¹⁴ A ntá jnkójín chojni tí ó jého tjenkayáxinín asén tí jínahya la mé xíkaha tsjachroe, tsjasin sín jie. ¹⁵ Mé xíkaha tí nkehe jínahya tjenkayáxin chojni mé tjixin tí jie. La mé xíkaha ts'ánkí tí jie la ntá tíha ts'enxín chojni.

¹⁶ Kichóni, chrókjuich'iyéhyará asánrá. ¹⁷ Kaín nkehe jína ntoá t'áyéheni mé tjixin nkajni tí tjen Dios tí nkexro kjuich'éna kaín tí xrohi kuente nkajni. Jehe ch'án mé Dios jnkochrín la jehe ch'án mé xitjahya ts'ixitoxín. ¹⁸ Jehe ch'án kjuanjon ch'án kjuachón k'uáyéheni kixin tí tan ntoá nixja ch'án, kixin éxí tí nkehe senó tsík'óna, mé xíkaha tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxra chrórxáinkáonrá tíhi jahará kichó ni. Kaínrá chrók'uejorá chrókuinhínrá jína la tjokahya chrónixjará kixin tjokahya chrókóninkáonrá. ²⁰ A ntá tí chojni tjoka tónínkaon la ch'ehya tí xra jína éxí tórxjínhín Dios. ²¹ Méxra títoghérá tí nkehe tjuáha la ko tí nkehe jínahya kjuachjínóxinhín sín nkuixín la chrókjuinchehnehýará, chrók'uáyéhérá tí itén Dios chrók'uinka nkaya asánrá. Tí tan a mé chóna kjuachaxin kixin chrókuaáxinrá.

²² Jehya kixin chrókuinhónrá; jahará chrókjuich'erá éxí tí nkehe tjako tí tan a. A ntá tí náhi la jahórá ch'iyehérá asánrá. ²³ A ntá tí chojni tsinhón tí tan la ntá sinchexiteyáha la éxí ijnko chojni tsjexin xrosentá tí kon ó. ²⁴ A ntá tí k'uíkon tí kon la sátsji la tuénxin k'uitjáyanyen nkexrí tsjehe. ²⁵ A ntá tí nkexro k'uitjáyanyenya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etqan tíha la ntá náxrxjón tsjak'e kixin kjuinchexiteyá ch'án.

²⁶ A ntá jnkójín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jého ch'iyéhe asén la ninkehó sínkíhya tí nkehe tinkáchónki ch'án. ²⁷ A ntá tí nkexro tinkáchónki Dios chaxín jína la ko tjasinhyá jie nkayakon It'éní Dios la mé tíhi: mé chrókjuinkítsa tí chojni nóe la ko tí chojni k'án chóntahya nkehe sine sín o níhi sín, la ko chrókjuasinhyá tí jie jínahya síin chjasintajni.

2

Jnkokón chrókuikosáyehe kíchó ni

¹ Kíchóni, jahará tinkáchónkirá Ìnchéni Jesucristo imá tjetooan la t'ichjánxin chrókuikosáyehérá káin chojni jnkokón. ² Éxi ijnko chojni rico chrók'uixenhen tí tójkotsérá la chóna koch'aninko oro la ko chóna iké náxrjón, a ntá ntíha kjaxin chrók'uixenhen ijnko chojni nòa chóna iké ntaxin. ³ A ntá tí chrókuikosáyehérá tí chojni t'itsa ka jína la tsontácherá ch'án kixin: "Ntíhi antsí jína tjak'e." A ntá tí chojni nòa tsontácherá ch'án kixin: "Jaha la tjak'èxian tótá ntíha o tjak'e nonte ó." ⁴ Mé xikaha la jnkokónhya tjikosáyehérá kichuára la tí nkehe jínahya tjenkáyaxinrá.

⁵ Kíchóni tjuahará, tsinhínrá tíhi: Dios tsíkjeýá tí sín nòa ntíhi chjasintajni kixin antsí má tsinkáchónki sín tí jehe ch'án kixin ts'áyéhe sín tí kjuachaxin kuènte ch'án éxi tsintáchro ch'án tsochjéhe ch'án tí sín tjuéhe ch'án. ⁶ A ntá jahará mé tjikosáyehará tí sín nòa. A ntá tí sín rico mé tjikosáyehérá. ¿Á jehya tí sín rico tjanchia sín jie sájtjiko sín tí jahará nkayakon tí sín t'etooan ní? ⁷ ¿La á jehya jehe sín t'ántaxínhin sín tí ihnié Cristo tjikosáyeheni?

⁸ A ntá jahará la jína tjejoch'erá tí nchexiteýará éxi t'etooan tí ley éxi níxja tí xroon itén Dios kixin: "Chrótjuéherá kichuára éxi tjuéxína asánrá." ⁹ A ntá tí jnkokónhya tjikosáyehará chojni la ntá xikaha la tjasínra jie la nchexiteýehará éxi tí níxja tí ley kuènte Dios. ¹⁰ A ntá ijnko nkexro titekaon káin tí ley la ntá kjuínchexiteýáhya jnkokoá tí nkehe tjetooan la mé tí xikaha la kjuínchexiteýéhya káin tí nkehe t'etooan tí ley. ¹¹ Ntá Dios tsintáchro kixin: "Chrókuákhahará í jnko chojni chjin ókjé", la kjaxin tsintáchro ch'án kixin: "T'oyánhará kichuára." A ntá tí nkexro kuákhahya í jnko chojni chjin ókjé kjánchó kjuáya la kjuínchexiteýéhya tí nkehe t'etooan tí ley. ¹² A ntá jahará chrónixjará la ko chrókuínchexiteýará kixin chrókuanchiahya jie tí ley sinchekaáni. ¹³ A ntá tí nkexro kuikonóghya í jnko chojni la kjaxin tsjikonóghya Dios tí jehe. A ntá tí nkexro kuikonóghé kichó la mé xikaha tsjacha tsaáxin ch'án tí yaon tsjixixín tsitooxín jie.

Tí fe ch'ehya xra la tsík'en

¹⁴ Kíchóni, ¿nkehe tsohnen ntáchrórá kixin chontará fe a ntá ninkehó nkehe jína tjákoxinhará? ¿Á ntáchrórá kixin xikahó chrokuááxinrá? ¹⁵ Éxi ijnko kichó ni ntoa o kichó ni chjin chónahya iké o chónahya nkehe sine sín t'ichjánxinhin sín jnkojín yaon. ¹⁶ Ntá jnkojín tí jahará tsontácherá sín kixin: "Sátjia jnkojína la ko ts'itsa ká la ko sinte jína." A ntá tí kjuánjonhará tí nkehe t'ichjánxinhin tí cuerpoé sín la sínkíhya tí nkehe ntáchrórá. ¹⁷ La mé xikaha tónhen tí fe la tí tjákoxinhará ninkehó nkehe jína kjuích'erá la éxi nkehe tsík'en tí ntáchrórá.

¹⁸ A ntá jnkojín chojni tsontáchro kixin: "Jaha chonta fe a ntá janhan it'á tí xra jína." Tí xikaha la jaha tjákoxian tí fe k'jonté kohya xra la janhan tsjákoxian tí fe la ko tí xra jína tjét'a. ¹⁹ Jaha titekávan kixin jnkokoá Dios itjen la chaxin jína xikaha, kjánchó kjaxin tí jínahya titekaon tíha la ko síxránká chrakon. ²⁰ T'ónahará lontí. Jahará la nohará kixin tí fe ch'ehya xra la chónkó tíha. ²¹ Dios kóxrjínhin tí nkehe chrókuích'e ch'in Abraham, tí nkexro k'uaxrjenixinni ósé, tíó chrók'óyán ch'án tí xjeen ch'án Isaac la chrókuanjon ch'án chrók'uáyéhe Dios. ²² Chrókónohará kixin tí fe k'úechóna ch'in Abraham la kjuákoxin ch'án tí xra kjuích'e ch'án la ntá xikaha kjuákoxin ch'án kixin antsí má kuinkáchónki ch'án Dios. ²³ Mé xikaha xiteýá éxi ntáchro xroon itén Dios kixin: "Abraham kuítekaon Dios la ntá Dios ntáchro kixin jína ch'án", la ntá Dios kjuínchek'in ch'án amigo kuènte ch'án.

²⁴ Chrókónohará jahará kixin Dios la t'áyéhe ch'án chojni la nchetjóá ch'án kixin tí xra jína ch'e sín la jehya kixin jehó chrókuínkáchónki sín ch'án. ²⁵ Mé kjaxin xikaha kónhen tí tjan Rahab, tí tjan k'úechóna nchónhya chojni ntoa. Jhe tjan kjuanjon tjan kjuachaxin kuitóhe ntge tjan tí sín kjuítsjehe chjasén tjan la ko kjuínkítsa tjan sákjuixin sín ókjé ntjia, a ntá Dios la kóxrjínhin tí nkehe kjuích'e tjan. ²⁶ Éxi tí cuerpoé chojni chónahya nchakuen la tsík'en la kjaxin xikaha tí fe la tsík'en tí ninkehó tjákoxinhya tí nkehe jína chrókuích'e sín.

3

Tí kjuachaxin chóna nejen chojni

¹ Kíchóni, chrók'ónahya tí jahará nchónhya maestro kixin tí ntoáhya chrókuákorá la tíha mé chrókuasótiaxinrá imá. ² Káinini chónani jie, a ntá tí nkexro ninkehó jie ntáchrohya la ijnko chojni jína tíha la ó tsjacha ch'án ts'etuenhen ch'án kuénté tí cuerpo kuènte ch'án. ³ Éxi tí kokaté tsochóna chica freno tí ir'va va kixin tsitekaon va la sátsjiko tí inché va la tsjacha ch'án ts'etuenhen kuénté tí cuerpo kuènte va. ⁴ Tjenkáyaxinrá kjaxin nkexrí tjejó tí ntábarco k'jonté imá jie la tsjacha tí xrínto chjéhe tjan sátsjiko, la ntá tí ch'ín tjiko la k'jonté ijnko nta ntsí la tsjacha ch'án sátsjikoxín ch'án tí tjinkaon ch'án sátsjiko ch'án. ⁵ Mé xikaha tí ir'va chojni. K'jonté ijnko nkehe imá ntsí kuènte tí cuerpo kjánchó nchónhya nkehe jínahya ntáchro

éxi ijnko xrohi ntsi la tsjacha tsochéxin kuenté ijnko jnā jíé. ⁶ Mé xikaha tí ir'vani la éxi ijnko xrohi kixin nchónhya jie t'axrjéxin la éxi ijnko veneno ncheníhi cuerpo mé xikaha mé tsjasixín kuenté cuerpoé chojni jie. La tí kjuachaxin kuente ir'vani la mé tjixín tí infierno la tíha mé tjixín tí ts'itjáyaxínni. ⁷ Tí chojni la tsjacha sinchesáncho kaín ko jiehe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va. ⁸ A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsósáncho. Tíha mé éxi ijnko nkehe chóntha nchónhya veneno ts'énxín chojni. ⁹ Tí ir'vani la kjaxín tjikosáyexinni It'eni Dios la tíha kjaxín t'ántaxiēnxinni chojni tsíkijich'éna Dios éxi tsjehe tí jehe ch'án. ¹⁰ Kjaxín tí ir'vani t'axrjéxin tí nkehe itsjeni kuente Dios la kjaxín tíha t'ántaxínxinni. Kichóni, xikahya chrókjuich'erá. ¹¹ Jnkokoá tòye xitjahya ts'axrje ntā xé la ko kjaxín ntā tsjá. ¹² Kichóni, ¿á jína tí nta híguera chrók'óna to aceituna o tí nta to uva chrók'óna to higo? Kjaxín xitjahya ijnko tòye chrók'uaxrje ntā xíjnta la ko ntiha kjaxín chrók'uaxrje ntā xé.

Tí kjuaxrexinkaon jína

¹³ Tí tjen jnkojín nkexo tí tjeorá nohe jína la ko tienxín la chrókjuakoqxín ch'án jnkojína la ko chrókjuinchehnkexínhya ch'án tí nkehe imá nohe ch'án. ¹⁴ A ntá tí jahará chóntha kjuachjinoxínhin asánrá la tjínkáonrá jahórá chrókuétoanrá. A ntá tí xikaha la chrókjuinchehnkexínhyará tí nkehe nohará kixin tí xikaha la ch'iyará la tjínkáonhyará chróchronkará tí nkehe chaxín ntoá. ¹⁵ A ntá tí xikaha sinchehnkerá la jehya tí kjuaxrexinkaon kujixín tí tjen Dios. Tí xikaha la kjuachaxin kuente chojni chjasintajni ó la ko kuente ch'ín Tsochren. ¹⁶ A ntá tí xikaha sín kjuachjinoxínhin la ko tjínkaon chojni jehó chrók'uetóan la ntá xitjahya tsónhen xrā yóxin kixin xikaha sín nkehe jínahya. ¹⁷ A ntá tí sín kjuaxrexinkaon jína tsíkixín tí tjen Dios la sáoxín tjejó chojni jína la ko kjaxín kjuaxróxin tjejó sín la ko náxrjón tjejó sín la ko jnkojína nixjehé kichó sín la ko kjaxín tjikónóehé kichó sín la ko tí xrā jína tjejóch'e sín la tí nkehe ntoá nixja sín. ¹⁸ Tí nkexro tjejá tí kjuaxróxin xikaha chrók'uēnkā sín kjuaxróxin la ko xikaha chrótjá sín tí nkehe jína.

4

Tí tjanjonxin chojni

¹ ¿Nketí tjixín tí guerra la ko tí kjuanínkaon tjanjonkoaxínrá kichuárá? Táha la mé jahórá t'axrjenixínrá kaín tí kjuanínkaon a. ² Jahará tjínkáonrá tsochontará ichren nkehe ntá chontahyará ntá tónínkáonrá t'oyánrá kichuárá. Tóchjinoxínhanrá kixin tsjachahyará sincheyóherá í so chojni ntá tónínkáonrá. Jahará ts'ayéhyará tí nkehe tjínkáonrá kixin tjanchehyará Dios. ³ La tí tjanchará la ts'ayéhyará kixin ntoáhya kjuanchiará kixin tjínkáonrá chrókuicháxinhanrá ó la chrókjuinchehnkexínrá. ⁴ Jahará chojni titekakonhya Dios. ¿Á noahyará tí jahará kixin tí imá tsotjuéhérá chjasintajni la ntá tsóninkáonhénrá Dios? A ntá tí jnkojínrá tjínkáonrá tsotjuéhérá chjasintajni la tsokjanrá tsóninkáonhénrá Dios. ⁵ ¿Á tjenkayáxinrá kixin tí nkehe ntáchro xroon itén Dios la á chónkó? Ntáchro xíkíhi: “Tí Nchakuen Dios kjuanjon ch'án k'uayéherá la tjuahará ch'án la tsónínkaon tí tsítóherá ch'án.” Mé xikaha ichro Dios. ⁶ Kixin Dios la imá tjínkítsani ch'án, méxra ntáchro xroon itén Dios kixin: “Dios la nínkakonhen tí chojni nchehne a ntá tjínkítsa ch'án tí chojni nchehnehya.”* ⁷ Méxra chrókjuinchehnkehyará. Íchá jína chrókuítekáonrá Dios la chrókjuánjonhyará kjuachaxin tí jínahya chrók'uetuághanrá ntá chrók'uikon tí jínahya kixin chrók'uetuághya ntá sáchrókjuí. ⁸ Chrókóchjineherá Dios, la tí jehe ch'án kjaxín tsóchjinahará ch'án. Jahará chojni chóntha jie la chrókjonemará tjárá. Chrókjuinchetjóará asánrá kixin chrótjuéhérá Dios la kánhyó chrótjuéhérá chjasintajni. ⁹ Chrók'uavará la ko chrótsjankará. Chrókjuínkirá tí tjanorá la chrótsjankará la chrókjuínki tí cháhará la chrók'uavará. ¹⁰ Chrókjuinchehnkehyará chróxráxincháonrá Ínchéni a ntá jehe ch'án chrókjuínkítsa ch'án qntsi chrókónohará.

Chrók'uántaxiēnhyani kichó ni

¹¹ Kichóni, chrók'uántaxiēnhyará kichuárá. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jie tí ley. A ntá tí t'eka ch'án jie tí ley la mé t'óna juez chrínki chrókuítekaon tí ley. ¹² Kixin jnkokoá nkexro kjuanjon tí ley la tí nkexro a mé tí juez la jehe ch'án sinchehá ch'án chojni la ko sinchekjásote ch'án chojni. ¿A ntá nkexro tí jaha kixin chrókjuanchéhé jie tí kichuá?

Í noehyani nkehe tsónhen ntóye

¹³ A ntá jie jahará chrókjuinhínrá tíhi kixin tsintáchrórá kixin: “Ijie o ntóye sáchrókjuini ijnko chjasín la ntiha chrók'uejóni ijnko nánó chrókjuinchejini nkehe chrókjuachani chichaon.”

* 4:6 Proverbios 3.34

¹⁴ A ntá jahará noahyará nkehe tsonhen ntóye kixin tí tjejóchónni la éxí ijnko tjuí nonte ts'ikonní a ntá tuénxín ts'itjáyan. ¹⁵ Íchá jína chróntáchrórá kixin: “Tí tjínkaon Ìnchéni la naxa chrók'uejóchónni la chrókjuich'eni tíhi o tíha.” ¹⁶ A ntá jahará tí nixjará la imá ihnkerá la káin tí kjuahnke la mé jínahya. ¹⁷ A ntá tí nkexro nohe chrókjuich'e tí nkehe jína la ntá ch'ehya xíkaha la mé antsí tjasin jie.

5

Tí nkehe chrókuinhin tí sín rico

¹ Jahará ricorá chrókuinhínrá tíhi. Chrótsjankará la ko chrók'uíyatorá kixin tí nkehe tsonhanrá tsjasótíará. ² Tí nkehe rícoxínrá la ó tsíkótje la ko tí ka chontará la ó tsík'in kué. ³ Tí oro la ko tí plata chontará ó tsíkóchjisen. Tíha mé tjácoxín kixin nkexrí tsonhen ntóará tsoche. ¿Nkehe tsonhen kjuásintonrá nkehe kixin ó tsí tí yaon tsjixixín? ⁴ A ntá tí nkehe chrókjuacha tí sín kjuít'ahará xra la kjuénkehýará sín la ntá tjanchia sín jie tí jahará la t'eya sín, ntá Ìnchéni imá t'etóan mé kuinhin kixin xíkaha ichro tí sín kjuich'e xra. ⁵ A ntá níhi chjasintajni la náxrjón tjeorá la káin nkehe tóxrjínhanrá ch'erá la éxí iko imá jína ine la tsíkótsanğa la ntá itsji yaon ntá its'en la mé xíkaha tsonhanrá. ⁶ Kixin jahará la kjuínchekjasóterá la k'oyánrá chojni ninkehó jie chóntahya kjónté kohya nkehe kjuít'ahará sín.

Chrókóninkakonhyani chróchónhenni la chrónixjeheni Dios

⁷ Méxra kichó ni, chrókóninkákonhyará chróchonhénrá tsokjanjian Ìnchéni. Éxí tí ch'in ch'e xra nontje chónhen xrakoa chrin senó la ko tí chrin tsjixixín ntá tsotjá ch'án tí nkehe náxrjón k'óna. ⁸ Mé xíkaha jahará la kjaxin chrókóninkákonhyará chróchonhénrá chrókóxrjéhyará kixin tí yaon itsi Ìnchéni la ó chjina tsí. ⁹ Kichóni, chrókoninkákuenhyará kichuárá kixin ntá chrókjuanchahya Dios jie tí jahará kixin Dios la mé tí juez la ó tjen ch'án tí ntója puerta. ¹⁰ Kichóni, chrókuankihírá éxí tí sín k'uéchrónka itén Dios k'uéchrónkaxín sín kjuachaxin ihníé Ìnchéni. Jehé sín kjónté kjuasóte sín la kónínkakonhya sín. ¹¹ A ntá jeheni ntáchroni kixin kóchéhe tí sín a kjónté kjuasóte sín la kjuacha sín. Jahará la ó kuinhínrá kixin nkexrí kónhen ch'in Job. Ó nohará kixin Ìnchéni kjuínkítsa ch'án hasta kjuixixín kixin Ìnchéni la imá jína ch'án la kuikonógehe ch'án tí ch'in a.

¹² A ntá kichó ni, chrókuakjénxínhyará ihníé Dios tjen nkaya nkajní la ko ni chjasintajni la níjnko nkexro chrók'uakjénxínhyará. Tí chróntáchrórá chaxín la chaxín la tí náhi la náhi kixin Dios la chrókjuínchekjasótíahýará.

¹³ A ntá jnkojín tí jahará náxrjónhya tjeorá la chrónixjehérá Dios, a ntá jnkojínrá náxrjón tjeorá la chrótsjerá kuente Dios. ¹⁴ A ntá tí jnkojín nkexro níhi la chrók'uíyehé sín tí sín táda t'etóan kuente njnko kixin ntá chrónixjehé sín Dios kixin tí sinníhi la ko chróchjéhe sín aceite tí sín a kjuachaxín ihníé Ìnchéni. ¹⁵ Chrónixjehérá Dios káin asánrá kixin tí sinníhi chrókuítóhe jína la ntá Ìnchéni chrókjuínkítsa sín, a ntá ichrén jie kjuasin sín la jehé ch'án sinchek'itjáyan tíha. ¹⁶ Méxra chróchenkará kichuárá tí jie chontará la ko chrónixjehérá Dios kixin chrókuitóhará jína. Tí nixjehé Dios ijnko chojni jína tinkáchónki Ìnchéni la chóna nchónhya kjuachaxin tíha. ¹⁷ Tí ch'in Elías, tí nkexro k'uéchrónka itén Dios, mé ijnko chojni éxí tí jeheni la jehé ch'án kjuanchehe ch'án Dios káin asén ch'án kixin ts'aniáhya chrin la ntá k'uaniáhya chrin chjasintajni iní nánó ko t'ó. ¹⁸ A ntá chr'éxin kjuanchehe ch'án Dios kixin ts'aniá chrin la ntá k'uaniá chrin inaá chjasintajni la jína k'óna tí nkehe k'uengka sín.

¹⁹ Kichóni, tí jnkojín chojni chrókjuichroe chrókuítóhe tí nkehe ntoá la í jnko nkexro chrókjuínkítsa kixin chrókjan tí nkexro a ²⁰ la chrókónohará tí jahará kixin jnkojín chojni tjinkítsa ijnko nkexro chóna jie tsokjanxin tí ntja jínahya k'uék'aji ch'án la ntá ó kjuínkítsa kixin tsaáxin asén tí ch'in a kixin ts'itjáyanhya ch'án la ntá chrók'uitjáyan tí nchónhya jie k'uéchóna ch'án. Ó tjen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énhen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'ahá ch'án xra mé ikjian tí xroon chr'anánhá jahará sátsikjirá ókjé chjasin tjejórá, mé tjejórá estado Ponto, la ko Galacia, la ko Capadocia, la ko Asia, la ko Bitinia. ² Kjueyará It'éni Dios kixin jehe ch'án tsíkjenkayáxin ch'án ósé xikaha. Kótjuáxinrá Nchakuen ch'án kixin chrókuftékáonrá ch'án la ko kótjuáxinrá ijiné Jesucristo. Kjuasáyé ch'án chrókujintayaonrá ch'án kixin ántsi chrókuákjárá tí kjuaxróxin kuénte ch'án.

Tjejóchónhenni kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kujkonóeheni ch'án kixin éxi kokjixinni nixín kixin xechón Jesucristo. Mé xikaha tjejóchónhenni sinchekaáni ch'án. ⁴ Mé xikaha ts'ayéhérá jahará tí nkehe tsjanjon Dios chóna ch'án nkaya nkajni mé ijnko nkehe chónhya ts'itjáyán, la ko chónhya tsókjita, la ko chónhya tsoxamá. ⁵ Dios mé t'ayakuanxínrá ch'án tí kjuachaxin kuénte ch'án kixin jahará tinkachónkirá ch'án kixin ntá tsjacha tsaára éxi tsíkjenkayáxin ch'án ósé mé tjinkaon ch'án kixin chrókuaará tí tsjixixin tsjeje chjasintajni.

⁶ Méxra xikaha chrókócháhará kjónté ihrén nkehe chrókónhanrá iso yaon kixin jehi t'ichjánxin xikaha itsjé nkehe chrókónhanrá. ⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxi yóhé chica oro xikaha t'ichjánxin ts'atsínka tí síin xrohi tsotsjexín sín á chaxín jina kohya nkehe tsónhen. A ntá ántsi má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xikaha tí tinkachónkirá Ìnchéni t'ichjánxin xikaha tsónhanrá kixin tsontáchro Dios kixin jina kjuachará ntá ts'ayéhérá kjuachaxin tió tsi Jesucristo.

⁸ Jahará tjeuhérá Jesucristo kjónté k'uíkonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jie kohya nkehe sincheyóhenni kixin imá náxrjón tíha. ⁹ Mé xikaha k'uitjará nkexrí tsaáxin asánrá. Tíha mé tí nkehe tjejochónhénrá tinkachónkirá.

¹⁰ Mé xikaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjon ch'án chrók'uayéhérá tí jahará. ¹¹ Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'áyéhe ch'án tí kjuachaxin jie. A ntá tí sín k'uéchrónka mé tjinkaon chrókónohe sín nkexro tíha la ko nkésá tsónhen tí nkehe chrónkaxín Nchakuen Ìnchéni. ¹² Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uéjó sín. Náhi. Hasta tí tjejóni jie mé ó xiteyá tíha. Tí nkehe chrónka sín la mé yóhé tí nkehe kuínhínrá, mé tí tan tsaáxinni k'uéchrónkaxín tí sín kjuakohará kixin tí kjuachaxin Nchakuen Dios kujxin nkaya nkajni mé kjuínkita sí jehe sín. Kjaxín tí sín ángel tjinkaon sín chrók'uinkon sín nkexrí tíha.

Dios k'uíyehé ch'án tí jeheni kixin tjóá chrók'uejóni

¹³ Méxra chrókjuenkayáxinrá jina nkehe chrókjuich'erá kixin chrók'uejórá jnkójina. Káin asánrá chrók'uejochónhénrá kixin tí nkehe sintakjtonhanrá Dios tió tsi Ìnchéni Jesucristo. ¹⁴ Éxi ijnko xjan titekaon mé xikaha jnkójina chrók'uejórá jahará, chrókjuenkayáxinhyará éxi k'uéjjenkayáxinrá senó naxa k'uéchonhyará Dios. ¹⁵ Náhi. Jnkójina tjóá chrók'uejórá kixin Dios k'uíyáhará la mé jina ch'án la ko tjóá ch'án. ¹⁶ Kixin ntáchro xroon itén Dios kixin: "Jahará chrók'uejórá tjóá kixin janhán na mé ijnko nkexro tjóá."*

¹⁷ Tí ntáchrorá jahará kixin It'ára mé Dios la ko ó nohará kixin jehe ch'án sinchekitogéxin ch'án ijie jnkoinko chojni, kixin t'ikon kixin jnkokón sínkí jnkoinko chojni, a ntá jahará chrórxáinkáonrá ch'án jnkochrixín tí naxa tjejochónrá ntíhi chjasintajni. ¹⁸ Dios mé kjuintakaará ch'án kixin chrók'uejohyará éxi k'uék'ejó tí sín tsik'axrjenixínrá. Jahará ó nohará jina kixin tí nkehe k'uínáxinrá tsaáxinrá jehya ijnko nkehe chrókjuéje éxi chica oro o chica plata. ¹⁹ Náhi. Ná mé k'uínáxinrá ijiné Jesucristo imá tjeje. Jehe ch'án mé k'óyán sín la k'uáyéhe Dios éxi ijnko kolélo ninkehó xéhya va. ²⁰ Kixin Cristo mé ósé tsíkónoxín ch'án tí naxa k'ónahya chjasintajni. Kjánchó jehya tuénxin kónhen tíha hasta tí chr'éxin ntá kónoxín ch'án kixin jina chrók'uejoxínrá tí jahará. ²¹ Ntá xikaha kónhen Cristo a ntá jie jahará la kuftékáonrá Dios, mé tí nkexro kjuínchexechón Cristo la ko kjuikosáyehe ch'án. Mé xikaha jahará tinkachónkirá Dios la ko tjejochónhénrá sintakaará ch'án.

²² A ntá jie ó kuftékáonrá tí tan chaxín ntoá kixin tjínkqtsará Nchakuen Dios. Tíha mé kótjuáxin asánrá kixin ntá tsotjuéhérá kichuára. Mé xikaha chrótjuéhérá kichuára

* 1:16 Levítico 11.44

kaín asánrá. ²³ Méxra jahará kokjíhará nixin, jehya kixin naxa chrók'uauxrenixinrá it'ará chjasintajni ntiló ts'itjayan. Náhí. Kokjixínrá itén Dios itjen jnkochrixin. ²⁴ Kixin ntáchro xroon itén Dios kixin:

Kaín chojni chjasintajni tóyóhe kayoa ó,
a ntá tí kjuachaxin chóna la tóyóhe itsjo t'óna kayoa.
Tí ka la tsqxámá a ntá tí tsjo la ts'anótjen

²⁵ a ntá tí tan kuente Ìnchéni la tsjak'e jnkochrixin.†
Tí tan í mé tsaáxinni la kuinhínrá tí jahará.

2

¹ Méxra tjtóherá kaín nkehe jínahya, la ko kaín kjuach'ia, la ko tí ntoáhya tjenkayáxinrá, la ko tí kjuachjinoxínhin, la ko tí xrikoará kaín xín kjuach'ia. ² Chrók'uejorá éxi chánjan na ntá tsíkokjiji la itsjen ó chrók'ui, mé xikaha jahará chrók'uejorá itén Dios, tíha mé chrókónohará la chrók'uánkixin kjuaxrexinkaon kuéntará kixin chrók'uaáxinrá, ³ tí chaxín kjuátsoanrá kixin Ìnchéni la jina.

Cristo mé tí xro tjechón

⁴ Chrókóchjineherá Ìnchéni, mé jehé ch'án me éxi tí xro tjechón. A ntá tí chojni la kuitekakonhya tí xro a, a ntá Dios la kjueyá ch'án tí xro a imá tjete sínkí. ⁵ Mé xikaha Dios kjuich'énará tí jahará éxi xro tjechón la Dios chrók'uejorá ch'án tí jahará jnkokoá ninko kuente ch'án, la mé ts'ónará nchat'á tsíkjinchetjóá Dios, a ntá chrók'uejorá ch'án tí nkehe tóxrjínhin ch'án kixin tinkachónkirá Jesucristo. ⁶ Mé xikaha kjaxin xroon itén Dios ntáchro kixin:

Tsjaké chjasin Jerusalén ijnko xro t'etóan ts'óna nchia, ijnko xro tsíkónoxín imá tjete sínkí
a ntá tí sín tsitekaon tí jehé ch'án mé tsosuehya sín.*

⁷ A ntá jahará titekáonrá tí xro kixin imá tjete. A ntá tí sín kuitekakonhya, la mé tsoxiteyá éxi ntáchro xroon itén Dios kixin:

Tí xro náxrjónhya kuitgenta tí sín ch'éna tjat'o,

mé ijie mé k'óna tí xro tjetóan.†

⁸ La ko kjaxin tsoxiteyá tí nkehe ntáchro xroon itén Dios kixin:

Tí xro mé tsóténkixin sín la mé tíha ijnko tjo tsjitsínkaxín sín.‡

Kjánchó jehé sín kóténkixin sín tí xro kixin kuitekakonhya sín tí itén Dios mé xráxín tsíkítóenxín sín xikaha tsóhnen sín.

Tí sín tinkáchónki Dios

⁹ A ntá jahará tsík'axrenixinrá tí sín tsík'uejorá Dios la ko tsík'ónará nchat'á ch'eherá xra tí rey, la ko tsík'ónará ijnko nación tjóá, la ko tsík'ónará ijnko chjasin kuente Dios kixin ntá tsochronkará tí xra náxrjón kuente Dios. K'uíyahará ch'án kixin ts'axrjéxinrá tí sítie ntá ts'ixenhénerá tí siín xrohi náxrjón t'inkaséyan kuente ch'án. ¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'án. Tí ósé la Dios k'uekikonóahyará. A ntá jie la kuikonóahará Dios.

Chrók'uejóni ch'eheni xra Dios

¹¹ Kichóni, xrjanóahará tí jahará kixin éxi chojni tsík'uejorá ókjé chrók'uejorá ntili chjasintajni chrók'uejorá kjuachaxin chrók'uejorá asánrá tí nkehe sín chjasintajni, mé tí nkehe tjanjonko asánrá. ¹² Jina chrók'uejorá tí sín tí sín chónhya Dios kixin kjónté t'ántaxínhanrá sín éxi chojni jínahya chóna jie tí jahará, ichro sín, la ntá tí chrók'uejorá sín kixin jina tjeoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuich'erá.

¹³ Jahará tinkachónkirá Ìnchéni chrók'uejorá ch'eheni ch'eheni kaín tí sín t'etóan kuente chjasintajni, a tí ch'ín rey kixin imá t'etóan ch'án. ¹⁴ O á tí ch'ín gobernador ichr'án Dios kixin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jina. ¹⁵ Dios tjinkaon kixin jina chrók'uejorá kixin tí sín noehya la ko tí sín lóntj la kohya jie ts'ekará sín tí jahará.

¹⁶ Chrók'uejorá éxi chojni t'ítuenhya, a ntá tí kjuachaxin chontará jehya kixin chrók'uejorá kjuachaxin kixin chrók'uejorá ch'eheni jínahya. Náhí. Chrók'uejorá éxi chojni ch'eheni Dios xra. ¹⁷ Chrók'uejorá ch'eheni kaín chojni. Chrók'uejorá tí sín kichó ni, la ko chrók'uejorá Dios kjuasáya, la ko chrók'uejorá ch'eheni ch'ín gobierno t'etóan.

Tóyóxin éxi tí nkehe kjuasótéxin Cristo

† 1:25 1.24-25 Isaías 40.6-8 * 2:6 Isaías 28.16 † 2:7 Salmo 118.22 ‡ 2:8 Isaías 8.14

¹⁸ Jahará chojni ch'exón xra, chrókjuinche xiteyéhérá tí lámóará, chróchontehérá kjuasáyé sín, kjónté tí sín jína la o tí sín jínahya. ¹⁹ Tíha mé ijnko nkehe jína chrókjuáko xínrá kjónté chrókjuasótiaxínrá ijnko nkehe jínahya kixin xíkaha mé chrókjuinche xiteyéhérá Dios. ²⁰ A ntá tí tjejoch'erá ichrén nkehe jínahya, ntá nchekjasótiaxínrá sín la nkehe tsonhen kixin chrókóninkákonhyará? A ntá tí chrókjuasótiaxínrá ijnko nkehe jína la ntá chrókjuachará chrókóninkákonhyará, la tíha mé tóxrjínhjn Dios. ²¹ Méxra xíkaha k'uíyahará Dios kixin Cristo kjuasóteyákonhánrá. Tíha mé kjuáko xín ch'án kixin mé xíkaha chrókjuich'erá. ²² Kixin Cristo la ninkehó jie kjuasínhya ch'án la ko ninke xró kjuíuch'iyehya ch'án, ²³ la ko ninkehó kjuáteehya ch'án tíó k'uántaxínhjn sín ch'án; a ntá tíó kjuínche kjasóte sín ch'án la ninkehó k'ókjanxínhya ch'án. Náhí. Jehé ch'án kjuanchia ch'án kixin Dios ts'ayakonhen tí jehe ch'án kixin Dios mé ntoá nchekítogéxín ijje chojni. ²⁴ Cristo mé kuamá ch'án tí ijje ní kixin tí cuérgé ch'án kjuák'enkání ntacruz kixin éxí tsík'enni k'uék'ejóni kixin tí jie k'uéchóntani, a ntá jie chrók'uejóni jnkojína. Kixin Cristo kjuasóte ch'án, chrít'o ch'án kixin jahará chrókuitogaxínrá jína. ²⁵ A ntá jahará k'uék'ejorá éxí kolélo tsík'ichroé. A ntá jie k'uitjará tí nkexro ts'ayakonhen asánrá.

3

Nkexrí chrók'uejó tí sín tsíkótehe

¹ Kjaxín jahará chojni chjín ó tsíkótahará chrókuitekákónhénrá tí xlyará, kixin kjaxín jnkojín tí sín titekakonhya itén Dios chrókuitekaon sín kixin jína tjen tí tjachjín, kjónté t'ichjánxínhya chróchrónka tjan kixin jína tjen tjan, ² kixin chrók'uíkon sín xíkaha kixin jína tjen tí tjachjín chónka kjuasáyé tjan. ³ Chrókjuínchehnkexinhyará nkehe náxrjón chróchontará la ko tí nkehe náxrjón chróchónka kaxíhará la ko nkehe náxrjón tsík'óna chica oro la ko tí ikará imá náxrjón. ⁴ Náhí. Chrókjuínchejínará asánrá, kixin tí nkehe náxrjón chrók'uitjáyanhya na mé tí asén chojni tójehya la ko náxrjón. Tíha mé imá sínkí nkayakon Dios. ⁵ A ntá tí ósé xíkaha k'uékjenkayáxín tí chojni chjín jína. Jehé sín mé kuínkáchónki sín Dios la ko kjuínche xiteyéhé sín xii sín. ⁶ Mé xíkaha kjuíuch'e tjan Sara kjuínche xiteyéhé tjan tí ch'ín Abraham, mé kjaxín ntáchro tjan kixin ínché tjan tí jehe ch'án. A ntá tí jahará tí xjeen tí jehe tjan la chrókjuínche xiteyará jína la ko ninkehó kjuachrakon chróchontahyará.

⁷ Kjaxín jahará chojni ntoará tsíkótahará chróchontehérá ichjiánrá kjuasáya kixin ó nohará kixin kánhyó tsehe tjan la ko ó nohará kixin yóirá tjáhará Dios tí kjuachón. Xíkaha chrókjuíuch'erá ntá tíó chrónixjehérá Dios la kohya nkehe chrók'uínkákónhen.

Tí sín tjasótéxín sín kixin jína kjuíuch'e sín

⁸ Méxra, jnkokqá chrókjuenkayáxínrá kaín rá chrókjuíkonóhéhérá kichuárá, chrórtjuéhérá kichuárá. Jnkojína chrónixjehérá kichuárá la chrókjuínchehnkexinhyará asánrá. ⁹ Tí ichrén nkehe jínahya chrókjuít'ahará sín la jahará la xíkaha chrókjuíuch'ehérá sín. Tí chrók'uántaxínhanrá sín la jahará chrók'uantaxienhyará sín. Náhí. Íchá jína chrókjuancheherá Dios kixin chrókjuíncheyaon ch'án sín kixin Dios la k'uíyahará ch'án kixin chrók'uayéhérá kjuachaxín kuénte ch'án. ¹⁰ Kixin:

Tí nkexro tjínkaon tsotjuéhe asén kixin jína chrókjuak'e kaín yaon

la chrónixjahya ch'án ninkehó nkehe jínahya

la ko ninkehó kjuach'ia chrók'uaxrjexínhya ir'va ch'án.

¹¹ Tí nkexro la chrókuitóge tí nkehe jínahya la íchá jína chrókjuíuch'e tí nkehe jína,

la ko íchá jína chrókjuéyá ch'án kjuaxróxín chrókjuak'e ch'án.

¹² Kixin Ínchéni t'ayakonhen tí nkexro jína

la ko tinhin ch'án tí nixjehé sín ch'án,

a ntá tí sín ch'e tí jínahya la tjínkítsahya ch'án.*

¹³ Xá nkexro chrókjuít'ahará nkehe jínahya tí jahará tjejoch'erá nkehe jína? ¹⁴ Kjónté chrókjuasótéxínrá tí nkehe jína tjejoch'erá kjónté la chrókócháhará chróchrakuenhyará ninkexró la ko chróchrakonhyará. ¹⁵ Náhí. Íchá jína chrókjuíkosáyehérá Cristo nkaya asánrá kixin Ínchárá. Chrók'uejorá listo chrókjuáteherá tí nkehe chrókjuanchankíhará kaín chojni kixin nkexrí tinkachónkirá Ínchéni, la chrókjuínchehnkexinhyará la kjuasáya chrókjuáteherá. ¹⁶ Chróchontará ijnko kjuaxrexínkaon jína kixin ntá tí sín xrich'ia sín t'ántaxínhanrá sín kjónté jína tjejorá tinkachónkirá Cristo la mé chrókósuéhe sín kixin tí nkehe ntáchro sín la ntoáhya. ¹⁷ Íchá jína chrókjuasótiaxínrá kixin tí jína tjejoch'erá tí xíkaha tjínkaon Dios, a ntá chrókósuáhará chrókjuasótiaxínrá tí ichrén jie chrókjuíuch'erá.

¹⁸ Kixin Cristo kjuasóte ch'án la ko k'uénxín ch'án tí jie kuénteni, ónaá k'uén ch'án kixin para jnkochríxín. Jehé ch'án la jína ch'án la kjuasóteyákonhénni ch'án kjónté jínahyani, kixin

* 3:12 3.10–12 Salmo 34.12–16

ntá jína sáchrókjuikoni ch'án tí tjen Dios. A ntá ik'uéen ch'án éxí chojni, a ntá Nchakuen ch'án la k'uénhya mé xechón inaá, ¹⁹ kixin tí Nchakuen ch'án sákjuikjakohe tí nchakuen tí sín tsík'en tjejóchjina. ²⁰ Tí sín a mé kuítekakonhya sín tí ósé tió kjuák'e ch'in Noé na mé Dios la kónínkakonhya ch'án kjuák'echónhen ch'án nachrohe sí'óna tí arca, na mé ijníkoá chojni kuítekaon sín mé kuaá sín tí kuítee sín nta. ²¹ Tí nta a mé tóyóhe tí tikitéxín chojni ijie kixin tí xikaha tsonhenni la tsaáxinni ijie. A ntá tí tikite chojni la jehya kixin tsotjuáxin tí cuerpo. Náhí. Tsjancheheni Dios kixin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Inchéni Jesucristo, ²² mé tí nkexro sátsíkji nkaya nkajni itjen ch'án itja chjina Dios. A ntá jehe ch'án la mé t'etuenhen tí sín ángel la ko tí sín t'etoan.

4

Chrókjuich'eheni Dios xra éxí tí kjuachaxin kjuanjon ch'án

¹ Méxra éxí Cristo kjuasóte tí cuérpoé ch'án ntá kjaxinrá kjónté xikaha chrókjuasóterá chrókóxakuanhyará kixin tí nkexro kjuasóte tí cuérpoé la ó kuítóhe tí jie. ² A ntá tí naxa chrók'uejochónrá intsi la chrók'uejorá éxí tóxrjinhin Dios. Jehya éxí k'uékóxrjinhánrá. ³ A ntá tí ósé nchónhya nkehe k'uékjich'erá éxí ch'e tí sín naxa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jie k'uéehontará ókjé chojni chjin la ko k'uékókoanrá la k'uékjásinrá kia ntá ntiha kjuánjonxin chojni la ko k'uékinkachónkirá tí nkehe tsíkjanoya. ⁴ A ntá ijie la jahará t'itohyará tí sín a kixin tí jínahya ch'e sín. Méxra xikaha t'antaxínhanrá sín. ⁵ A ntá tí jehe sín tsjanjon sín kuentá tsochéna sín tí nkexro tjechónhen sinchekitoxén ijie tí sín tjejóchón la ko tí sín tsík'en. ⁶ Méxra kjónté tí sín tsík'en tsixrákohe sín tí itén Dios kixin tí nchakuen sín chrók'uejorá éxí tjinkaon Dios kjónté naxa k'uejorá sín ntihi chjasintajni la kuítóexín tí ijie sín éxí tsitoxén ijie káin chojni.

⁷ Ó kuichjina tsjeje chjasintajni a ntá xikaha chrók'uejorá jnkojína la ko chrók'uejotsjehérá chrónixjehérá Dios. ⁸ Tí nkehe imá tjeotan kixin antsi chrótjuéhérá kichuárá. A ntá tí tjeéhérá kichuárá la mé tih ch'á chrók'uitjayanxín tí nchónhya jie chonteherá kichuárá. ⁹ Chrókjuánjonrá kjuachaxin chrókuitohe jnkojín kichuárá ntoará chrókóninkákuénhyará nijnko tí jehe sín. ¹⁰ Jnkojnkorá nkehe tí xra tjáhará Dios k'uayéhérá chrókjuínkítisará kichuárá. Xikaha jína chrókjuáoxinrá tí kjuasáyé ch'án tjáhará ch'án kixin nchónhya xra k'uayéhérá. ¹¹ Tí jnkojínrá tjínkáonrá chrónixjará ichrén nkehe la chrónixjará éxí nijja itén Dios. Tí jnkojínrá tjínkáonrá chrókjuínkítisará la chrókjuáoxinrá tí kjuachaxin tjáhará Dios. Káin tí xra chrókjuich'erá chrókjuanchehérá Dios kjuasáya kixin kjuasáyé Jesucristo tinkachónkirá tí jehe ch'án. Kixin jehe ch'án la káin tí kjuachaxin siín la kuénte ch'án jnkochrixin. Mé xikaha chaxín. Amén.

Íchá jína chrókjuasótéxinni kixin tí tinkáchónkini Cristo

¹² Kichóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xikaha tsonhanrá. Chróntáchrohyará kixin ókjé nkehe tjasótiaxinrá. ¹³ Náhí. Íchá jína chrókócháhará kixin xikaha chrókjuasóterá éxí kjuasótéxín Cristo, kixin kjaxinrá tsocháhará imá tió ts'ikonrá tí kjuachaxin tsjkaó Inchéni tí itsi ch'án. ¹⁴ Chrókócháhará tí t'antaxínhanrá sín kixin tinkachónkirá Cristo kixin tí Nchakuen Dios chóna kjuachaxin t'ayakonhanrá. Jehe sín t'antaxínhin sín ch'an, a ntá jahará tjíkosáyehérá ch'án. ¹⁵ A ntá tí jnkojínrá tjejotjasóterá chrókójehya kixin ichrén nkehe chrókjuich'erá chrókjuayará o chrókuegerá o ichrén nkehe jínahya chrókjuich'erá o chrókjiatérá kjuanínkaon kuénte ókjé chojni. ¹⁶ Náhí. A ntá jnkojínrá chrókjuasótiaxinrá kixin tinkachónkirá Cristo la chrókósuahyará. Náhí. Chrókjuanchehérá Dios kjuasáya kixin xikaha kónhanrá.

¹⁷ Ntá jie ó kui tí tsitoxén ijie chojni mé xrankixixín tí sín tsík'óna xjeen Dios. A ntá tí xikaha tsitoxén ijie tí jeheni xrankixixín, a ntá íchá tí ó tsjixixín tí sín titekakonhya tí itén Dios. ¹⁸ Íchá tí sín jína la ko xikaha tsonhen sín ntá tsaá sín a ntá íchá tí sín jínahya chóna jie kjá antsi tjasóte sín.* ¹⁹ A ntá tí nkexro tjasóte éxí tjinkaon Dios la kjónté xikaha la naxa chrókjuich'e sín nkehe jína la ko chrókjuanjón sín asén sín chrók'uayakonhen Dios mé tí nkexro kjuich'éna sín la mé jehe ch'án xráxín jína ch'án.

5

Tí k'uútuhenhen tí sín t'etoan kuénte njnko

¹ Tjínkavan tétuanhan tí chojni t'etoan kuénte tí njnko tjejorá ntiha kixin kjaxin janhan t'etoan kuénte njnko éxí tí jehe sín, a ntá janhan mé k'uikuán kixin nkexri kjuasóte Cristo, la ko kjaxin janhan mé tsochonta kjuachaxin kuénte Dios éxí tsochóna tí jehe sín tió itsi Inchéni chr'éxin. ² Jahará chrók'uayakonhénrá tí kolélo kuénte Dios ntiha kixin xikaha

* 4:18 Proverbios 11.31

tí xra k'uayéherá. Jnkojína chrókuínkítsará sín éxí tjinkaon Dios la jehya kixin ijnko chojni chrók'uetuanhanrá chrókuich'erá xra, la ko kjaxin jehya kixin imá chrókóxrjínhanrá chichaon. Náhí. Kaín asánrá chrókuich'erá xra jína. ³ Jehya jahará kuéntará tí jehe sín kixin chjini chrókuétueñhénrá sín. Náhí. Jnkojína chrókuákoéxínrá tí jehe sín. ⁴ A ntá tió tsi tí Pastor chaxín t'etōan ntá jahará ts'ayéherá ijnko corona náxrjón tsjehehya.

⁵ Kjaxin jahará ntasoará chrókuinchehiteyéhérá tí sín t'etōan kuente ñínko. Káinrá chrókuinchehiteyéhérá kichuárá chrókuinchehnkehyará kixin:

Dios la tsónínkakohen tí sín nchehnke,

a ntá tí sín nchehnkehya mé tsjinkítsa ch'án.*

⁶ Méxra chrókuinchehnkehyará, chrókuinchehiteyéhérá Dios kixin jehe ch'án imá ts'etōan ch'án kixin tsjixraká tí yaon mé jehe ch'án tsotjáhará ch'án kjuachaxin kixin tsétoanrá. ⁷ Chróchjehérá Dios kaín tí kjuaxrexinkaon chontará kixin kjaxin jehe ch'án tóxakohen ch'án tí jahará.

⁸ Chrókóxakohenrá jína chrók'uejorá. A ntá ijie ixri tí nkexro nínkakohenrá mé tí ch'ín Tsochren éxí ijnko koxra tsjanka va xritjeyá va nkehe sine va. ⁹ Tjánjonhyará kjuachaxin kixin jehe ch'án chrókuacha ch'án chrókuachroerá ch'án, kixin ó nohará kixin kaín tí sín kichuárá nkuixin chjasintajni xikaha tjejótjasóte sín kixin tinkáchónki sín Inchéni. ¹⁰ Kjánchó kánhyó sé tsjasótiará, a ntá Dios antsí tsjinkítsará ch'án kixin tsjachará ts'ejorá jína. A ntá jehe Dios a mé tjuahará ch'án la k'uíyahará ch'án kixin ts'ejokoará ch'án jnkokoá tí tjen Jesucristo chóna kjuachaxin jnkochríxín. ¹¹ Jehe ch'án tsjancheheni ch'án kjuasáya kixin chóna ch'án kjuachaxin ts'etōan ch'án jnkochríxín. Amén.

Kjuixixín nixja ch'ín Pedro

¹² Ch'ín Silvano mé t'íkuān ijnko kichó ni jína mé kjuínkítsa ikjinni tí xroon kjónté kánhyó tsjé nixja, la ntaxraxinkáonrá kixin kjuíntayaonrá Dios ntá xikaha kjuákoxín ch'án kixin chaxín tjuahará ch'án. Méxra xikaha jína chrók'uejorá kixin tjuahará ch'án.

¹³ Tí ñínko tjen Babilonia mé tsíkjeýá Dios éxí tsíkjeýá ch'án tí jahará nixjahará sín la ko kjaxin nixjahará ch'ín Marcos, mé éxí xjanna t'íkuān tí jehe ch'án.

¹⁴ Nixjehérá kichuárá jnkojína. Kjuaxróxin chrók'uejorá tinkachónkirá Jesucristo. Amén.

* 5:5 Proverbios 3.34

Xroon yóxin tsíkjin ch'ín Pedro

Ch'ín Pedro chr'énhen ch'án tí xroon tí sín tinkáchónki Cristo

¹ Janhan Simón Pedro, na mé t'gha xra Jesucristo. Ikjian tí xroon ts'ayéhérahá jahará ó tinkáchónkirá Ìnchéni éxí tinkáchónkini jeheni kixin Dios la ko Jesucristo tí nkexro sincheakaáni na mé jina ch'án. ² Sintayaonrá Dios la ko antsí ts'ayéhérahá kjuaxróxin kixin ó nohará nkexrí tjen Dios la ko Ìnchéni Jesús.

Jina chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jina chrórxaxinkaonni tí jehe ch'án. Kixin ó noheni nkexrí tjen tí nkexro k'uiyeheni kixin tí kjuachaxin jié chóna ch'án la ko tí xra imá jié kjuich'e ch'án. ⁴ Mé xikaha kjuanjon ch'án kaín xin tí nkehe a, táha la mé imá jié la ko imá tjele sínkí. Mé xikaha kjuakoxin ch'án kixin chrók'uayéhérahá kjuachaxin chrók'uejorá éxí tjinkaon ch'án la ko chrókuítoghérahá tí nkehe jínahya kixin chrók'uitjáyaxinhyará tí nkehe k'uékjenkayáxinrá siin chjasintajni. ⁵ A ntá jahará tinkáchónkirá Ìnchéni la kjaxin chrók'uejorá kixin chrók'uejorá jnkójina; a ntá tí jina tjejorá ntá chrók'uejorá antsí chrókónohará; ⁶ a ntá tí kónohará ntá chrók'uejorá chrók'uejorá kjaxinrá jina; a ntá tí tjenkayáxinrá jina ntá chrók'uejorá chrókóninkákonhyará tjoka; a ntá tí tóninkákonhyará ntá chrók'uejorá chaxín xráxinkáonrá Dios; ⁷ a ntá tí chaxín xráxinkáonrá Dios ntá chrók'uejorá chrók'uejorá kichuárahá; a ntá tí tjejorá kichuárahá ntá chrók'uejorá chrók'uejorá kaín chojni.

⁸ A ntá xikaha tjejoch'erá tinkák'ánki tí kjuaxrexinkaon kuéntará, ntá jehya kixin chónkó kuinkáchónkirá Ìnchéni Jesucristo. ⁹ A ntá tí nkexro ch'ehya xikaha la mé éxí ijnko chojni t'ikonhya ó ijnko chojni t'ikonhya jina, kixin ó k'uitjáyehen kixin Ìnchéni ó kjuixin kjuinchetjorá tí jié k'uechóna ósé. ¹⁰ Méxra xikaha kichó ni jnkójina chrók'uejorá kixin ntá tsonohará jina kixin Dios tsík'uejorá tí jahará la ko tsík'uejorá ch'án kixin xikaha jina chrók'uejorá kjaxinrá, a ntá xitjahya chrók'uejorá. ¹¹ A ntá xikaha chrók'uejorá ntá tsojtáhará Dios kjuachaxin ts'ixenhenrá tí tjen Ìnchéni Jesucristo t'etōan ch'án jnkochrixin. Jehe ch'án mé tí nkexro kjuincheakaáni.

¹² Méxra titoahya ntáxráxinkáonrá kaín tí nkehe i, kjónté ó nohará tí nkehe ntoá kjuakohará. ¹³ Ntáxrxan kixin jina tí naxa tjeen chrók'uejorá kjaxinrá kaín tí nkehe a ¹⁴ kixin Ìnchéni Jesucristo kjuinchenóna kixin í séhya its'én janhan. ¹⁵ Na mé kaín tíha tjet'a kixin tió its'én, ntá jahará tsoxráxinkáonrá jnkochrixin kaín tí nkehe kjuit'a.

Tí sín k'uíkon tí kjuachaxin kuente Cristo

¹⁶ Tí nkehe kjuakoharáni kuente tí kjuachaxin kuente Ìnchéni Jesucristo la ko nkexrí itsi ch'án na mé jehya ijnko cuento kjuich'ena chojni chrók'uejorá. Náhi. Ikonní k'uíkonxínoni Ìnchéni la ko tí kjuachaxin kuente ch'án. ¹⁷ K'uíkonni tíha tió It'eni Dios kjuikósáyehe ch'án tí Xjeen ch'án, la ntá kuínhinni nixja Dios tjeen nkaya nkajni ntáchro ch'án kixin: “Tíhi mé xjanna tjuahá ch'án. Imá chána kixin nchexiteyá ch'án éxí tjinkávan janhan,” ichro Dios. ¹⁸ Mé kuínhinni itén Dios kjuixin nkaya nkajni kixin xikaha ntáchro tió k'uejókoni Ìnchéni chrítaón tí jna tjorá.

¹⁹ Mé xikaha k'uejorá kjaxinrá tí sín tsíkjin itén Dios ósé ntá noexinni kixin chaxín tsoxiteyá. A ntá jahará chrók'uejorá chrók'uejorá jina nkehe k'uejorá sín kixin tí tan mé éxí ijnko xrohi t'inkaséyanxín tí sítié tsjixrakájia tí yaon ts'inkaséyan itsi tí konotsé t'inkaséyanxín tí nchtjén mé xikaha ts'inkaséyanxín nkaya asánrá. ²⁰ A ntá tjeon chrókónohará tíhi: kixin nínkehó xroon itén Dios tsík'óna jehó chojni chrók'uejorá chrók'uejorá. ²¹ Náhi. Tí sín k'uejorá itén Dios la nixjahya sín tí nkehe jehó sín chrók'uejorá kjaxinrá sín. Náhi. Tsíkjinchetjorá Dios tí jehe sín, a ntá Nchakuen Dios kjuinkitxa k'uejorá sín itén Dios.

2

*Tí sín tjako kjuach'ia
(Judas 4–13)*

¹ Kjaxin k'uejorá kjaxinrá tí sín ntoáhya k'uejorá itén Dios tí chjasin Israel, mé kjaxin xikaha tí jehe ts'ixin maestro sit'ayahará. Jehe sín tsochr'ákjenhen sín iso nkehe ntoáhya ts'itjáyaxin tí nkehe chaxín tsaáxinni la xikaha sinchemá sín tí Ìnchéni chrók'uejorá. Tíha mé tsjixin tsjasótéxin tí jehe sín. ² Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxienxín chojni tí ntja ntoá kuente Ìnchéni. ³ Tsoxrxínjin sín tsochóna sín

nchónhya chichaon, ntá tsjanchiáxinrá sín chichaon tí nkehe ntoáhya tsjakohará sín. A ntá tí nkehe ts'itjáyánxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

⁴ Dios la kjónté tí sín ángel kjuasin jie la kuikonóehya ch'án sín la k'uetóan ch'án kixin sátsji sín tsjasóte sín sátsjik'ikjehé sín tí sítie na tjejóchjina sín tsjixrakájia tí tsitogéxín ijie sín. ⁵ La ko kjaxin kuikonóehya Dios tí sín k'uejó chjasintajni ósé ntá ichr'án ch'án ntá kuítée tí sín jínahya, a ntá Dios kjuíncheakaá jehó tí ch'in Noé, na mé tí nkexro kjuako tí tan jína la ko kjuíncheakaá ch'án tí yato sín ó. ⁶ Kjaxin Dios kjuíncheak'itjáyán tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejó chr'éxin kixin xikaha tsonhen sín. [†] ⁷ Kjáncho Dios kjuíncheakaá ch'án tí ch'in Lot kixin ijnko chojni jína tí jehe ch'án la ko imá kóxakonhen ch'án tí k'uikon ch'án tí jie kjuasin tí sín jínahya. ⁸ Tí ch'in Lot mé jína asén ch'án mé k'uekjak'e ch'án tí sín tí sín jínahya ntá kain yaon kóxakonhen asén ch'án k'uikon ch'án la ko kuínhin ch'án tí nkehe jínahya k'uekjich'e sín. [‡] ⁹ A ntá Ìnchéni na sincheakaá ch'án tí sín kain asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjásóte ch'án tí yaon tsitogéxín ijie chojni.

¹⁰ Dios ántsi sinchekjásóte ch'án tí sín nchexiteyéhe tí nkehe jínahya ntáchro asén sín a ntá nchexiteyéhya sín tí nkehe t'etóan Ìnchéni. Titekakonhya sín la ko chrakonhya sín chrók'uántaxínhin sín tí sín ángel chóna kjuachaxin. ¹¹ A ntá tí sín ángel imá tsehe sín la ko imá chóna sín kjuachaxin la kjónté tjinkakonhya ts'ántaxínhin tí sín a nkayakon Ìnchéni.

¹² A ntá tí chojni a la éxi yóhé iko tjenkayáxinhya ninkehó la nchexiteyéhe tí nkehe ntáchro asén, la kokjili kixin ts'óyan kichó ó. T'ántaxínhin sín tí nkehe tienxínhya sín, mé xikaha its'en sín éxi its'en tí ko a. ¹³ Tíha mé tsjasótéxín sín kixin jehe sín kjuínchekjásóte í so chojni. Xráxin tóxrjínhin sín ich'e sín tí nkehe ntáchro asén sín. Ijnko kjuatósuehe kixin tjejontaxín sín ntekoará sín tí kia chontará la kjónté tí xikaha la naxa tjasin sín jie.

¹⁴ Kohya nijnko chojni chjin chrokjuasinkohya sín jie. Tóxrjéhya sín tjasin sín jie tsjasótéxín sín. ¹⁵ Kuítóhe sín tí ntja ntoá ntá chréhe sín ntja kuente ch'in Balaam xjeen ch'in Beor, kixin kóxrjínhin ch'án chrókjuacha ch'án nchónhya chichaon tí nkehe jínahya chrókjuich'e ch'án. ¹⁶ A ntá t'ichjánxín tsjasóte ch'án kixin tí jie kjuasin ch'án. A ntá ijnko kolócho chjin xitjahya nixja la xrinahya nixja itén chojni la kjuentuéhe tí ch'in Balaam kixin tí jie chóna ch'án ntá kuítóhe ch'án tí nkehe jínahya chrókjuich'e ch'án. [§]

¹⁷ Tí chojni tjako mé éxi yóhé tòye tjáhya ntá la ko éxi tjuj tjakáko xrinto ó; ó kjuixin k'uituenhen sín sátsji sín tí imá sítie tsjasóte sín jnkochríxín. ¹⁸ Kain nkehe jínahya nixja sín, a ntá tí jie tjasin sín tóxrjínhin sín chojni chjin ókjé ntá tjachroéxín sín tí sín na ntá tjinkaon chrókuitehe sín tí jie. ¹⁹ Chrónka sín kixin kain nkehe jínahya la jína, kixin jehe sín nchexiteyéhe sín tí nkehe jínahya ntoáhya; kixin jnkojnko chojni mé nchexiteyéhe tí nkehe kjuacha k'uetuenhen sín. ²⁰ A ntá tí nkexro ó chóxin Ìnchéni Jesucristo tsaáxinni mé kuítóhe sín tí nkehe chrók'uitjáyánxín sín kuente chjasintajni. A ntá chr'éxin tí chrókuakja sín ntja jínahya inaá tí chrókjuacha tí jínahya chrókjuachroe sín, a ntá ántsi má jínahya chrókónhen tí jehe sín. ²¹ Íchá jína chrókónoehya sín tí ntja jína. A ntá jehya jína tí ó nohe sín ntá tsitóhe sín tí nkehe k'uetóan Dios kuínhin sín. ²² A ntá tí jehe sín kjuínchexiteyá sín éxi ntáchro tí proverbio kixin: “Tí konja t'ókjan ntá xikjan xikjine inaá,* la ko tí cochino na ntá tsik'ónti tjóá ntá xikjan kjánkí tí nchet'o kjita.”

3

Tió tsi Ìnchéni

¹ Kichóni tjuahará tíhi la xroon yóxin ikjan ts'ayéhéra. Yóí tí xroon a ntáxráxinkáonrá kixin jína chrókjuenkayáxinrá. ² Chróxráxinkáonrá tí nkehe tsichrónka tí sín k'uechrónka itén Dios ósé la ko tí nkehe k'uetóan Ìnchéni, mé tí nkexro tsaáxinni, kjuakohará tí sín kjueyá ch'án.

³ Tjetoan chrókónohará tíhi kixin tí yaon tsjixixín la itsi chojni tsjanoá tí tan jína kuente Ìnchéni, la sinchexiteyéhe sín kain nkehe jínahya ntáchro asén sín. ⁴ Tsjanchankí sín nkehe kónhen tí nkehe tsintáchro Cristo kixin tsokjan ch'án, kixin desde ik'uén tí sín tsik'axrjenixinni k'uejó ósé la xikahó naxa sítónhen éxi tíó k'óna chjasintajni. ⁵ Tí sín a titekakonhya sín kixin ósé k'uénixja Dios ntá k'óna nkajni la ko chjasintajni na mé kjuin tí ntá ntá kuítóhe nonte xámá. ⁶ A ntá tí ntá k'uitjáyánxín chjasintajni inaá. ⁷ A ntá tí nkajni la ko tí chjasintajni naxa tjejó jie tjejóchónhen tsoche kixin xikaha k'uetóan Dios kixin xrohi tsochexín tí yaon tsjixixín tsitogéxín ijie chojni la ko kain tí sín jínahya tsjasóte sín.

* 2:5 Génesis 6.1–7.24; 8.18 † 2:6 Génesis 19.24 ‡ 2:8 2.7–8 Génesis 19.1–16, 29 § 2:16 Números 22.35–46

* 2:22 Proverbios 26.11

⁸ A ntá kichó ni, chrók'uitjáyanyhará kixin Ìnchéni tí ijnko yaon t'ikon ch'án éxí mil nánó la ko mil nánó t'ikon ch'án éxí ijnko yaon ó.* ⁹ Ntá Ìnchéni í séhya sinchexiteyá ch'án tí nkehe tsintáchro ch'án la jehya éxí tjenkayáxin í so chojni kixin ó má sé tjejóchónhen sín. Náhi. Jehí tjechónhen ch'án kixin nínkexró chrók'uitjáyanyhaya kixin tjinkaon ch'án kixin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxí xíchge itsi tí tie. A ntá tí nkajní ts'itjáyán, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyán tsoche, la ko tí chjasintajni tsoche la ko kaín nkehe síin.

¹¹ A ntá tí xíkaha kaín nkehe ts'itjáyán, a ntá jahará la jína chrók'uejorá chróxráxinkáonrá Dios. ¹² Chrók'uejochonhénrá tí yaon itsi Dios chrókóxakonhanrá chrókjuich'erá xrá kixin ntá tjoka chrókui Ìnchéni. A ntá tí yaon tsjixixín mé ts'itjáyán nkajní tsoche, la ko kaín nkehe tsoxika ts'itjáyán kixin imá tsosóa. ¹³ A ntá jeheni tjejóchónhenni nkajní nixin la ko chjasintajni nixin éxí tsintáchro Dios kixin tsjanjon ch'án. A ntá ntiha la mé imá náxrjón la ko kjuaxróxin ts'ixin tí chojni jína.

¹⁴ Méxra xíkaha kichó ni, nachrohe tjejochonhénrá kixin itsi tí yaon tsonhen xíkaha la kaín asánrá chrókjuéyará jnkójina chrók'uejorá kixin ts'ikon Dios kixin kjuaxróxin tjejorá chontahyará jię. ¹⁵ Chrókónohará kixin naxá tjechónhen Ìnchéni, tjokahya itsi ch'án kixin í so chojni naxá chrókuitekaon sín ch'án. Kjaxin xíkaha tsíkjin tí kichó ni Pablo tí xroon chr'ánhanrá ch'án éxí tí kjuachaxién Dios tsik'áyéhe ch'án chrónka xíkaha. ¹⁶ Jnkójnko tí xroon tsíkjin ch'án nixja xíkaha la imá xrá chrókiénxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrjexín tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xíkaha jehó sín tjeýa sín nkehe ts'itjáyánxín sín.

¹⁷ Méxra kichó ni, ó nohará tí nkehe senó, ntá chrókóxakonhanrá kixin chrókjuachruèhyará tí kjuach'ia xríko tí sín jínahya ntá chrókujtqhérá tí nkehe jína ntoá tinkáchónkirá. ¹⁸ Ichá jína antsí má chróchoxinrá Ìnchéni Jesucristo, mé tí nkexro sinchekaáni la ko antsí chrók'uánkí tí kjuachaxién ch'án chróchontará. Méxra tsjikosáyehehni ch'án ijje la ko jnkochrín. Amén. Ó tjen.

* 3:8 Salmo 90.4

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon í ts'ayéhérá kixin tsonohará kuénte tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uikónxín konni. Kixin tí nkexro mé k'uikonni la ko tí nkexro kuákóxín tjani, mé tí nkexro nixja tí tan tsjanjon kjuachón. ² Kjuakoxín ch'án nkexrí kjuák'e ch'án, a ntá kaín tí jeheni k'uikonni ch'án, mé xikaha chrónkaxínni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni. ³ Chrónkaxínni tí nkehe k'uikonni la ko tí nkehe kuínhinni, kixin kjaxinrá jnkokoá chrókuinkachónkirá éxi tinkáchónkini tí jeheni, éxi tí jeheni jnkokoá tinkáchónkini It'éni Dios la ko tí Xjeen ch'án Jesucristo. ⁴ Mé xikaha ikjinni tí nkehe i, kixin chrókujintaxín chrókóchéhara la ko chrókóchéhni.

Dios mé tí xrohi

⁵ Tí tan í mé Ìnchéni Jesucristo kjuakoxe tí jeheni, a ntá jie tjakoharáni tí jahará, kixin Dios mé tí xrohi, a ntá kohya ninkehó sítie tí tjen tí jehe ch'án. ⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítie, na mé xikaha ch'iani kixin ch'ehyani tí nkehe ntáchroni. ⁷ A ntá tí xritjejóni tí t'inkaséyan kixin tí Dios mé jehe ch'án tí t'inkaséyan, na mé xikaha jnkokoá tinkáchónkini ch'án, a ntá tí ijnje Xjeen ch'án Jesucristo mé ts'íjmáxin kaín jie chóntani.

⁸ Tí chróntáchroni kixin ninkehó jie chóntahyani, mé xikaha la jehóni ch'iyeheni asénni, a ntá tí nkehe chaxín la chóntahyani. ⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jina ch'án la ts'itjáyehnen ch'án kaín jie chóntani la ko sinchetjóáni ch'án kixin kaín tí nkehe jínahya kjuich'ení. ¹⁰ A ntá tí tsontáchroni kixin kjuasinyani ninkehó jie, la éxi chróntáchroni kixin Dios la ch'ia ch'án, a ntá tí xikaha tsixroni la chaxínhya tsík'áyeheni tí tan kuénte ch'án.

2

Cristo mé tsonixjayákonhenni ch'án

¹ Kichóni, éxi xjanna t'ikuán tí jahará, a ntá tjékjian tí xroon ts'ayéhérá tsochronka kixin chrókuásinhyará jie. A ntá tí jnkójnra chrókuásinrá jie la chóntani ijnko nkexro tsonixjayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jina. ² Jesucristo mé k'uenyákonhenni ch'án kixin tí jie chóntani; a ntá jehya ijjeeni ó. Náhí. Ijje kaín chojni síin chjasintajni.

³ Tí tsitekaonni tí nkehe k'uetqan Dios ntá tsonoxénni chaxín kixin chóxinni ch'án. ⁴ A ntá jnkójn nkexro ntácho kixin chóxin Dios, a ntá titekakhya tí nkehe tsik'etqan Dios, la mé ch'ia la noehya tí nkehe chaxín. ⁵ A ntá tí nkexro titekaon tí nkehe tsik'etqan Dios la chaxín tjuéhe Dios; mé xikaha noheni kixin chaxín jnkokoá tjejókonni ch'án. ⁶ Tí nkexro ntácho kixin chaxín tinkáchónki Dios chrókjuak'e éxi kjuák'e Jesucristo.

Tí mandamiento nixin

⁷ Kichóni, méxra tí nkehe tjékjian jehya ijnko nkehe nixin tsik'etqan Dios. Náhí. Tíha mé tí nkehe k'uayéhérá tí xrankixixín, mé tí mandamiento óse tjen, mé tí nkehe ó tsíkinhínra. ⁸ Kjánchóni tí nkehe ikjian mé yóhe ijnko nkehe nixin, éxi kjuakoxín Cristo mé xikaha tjakoxinni, kixin tí sítie la tinkák'itjayan kixin ijje la ó t'inkaséyanxín tí xrohi chaxín.

⁹ A ntá tí nkexro tsontácho kixin ixri tí t'inkaséyan, a ntá naxa nínnakonhen kichó, na mé tí xikaha naxa itjen tí sítie a. ¹⁰ A ntá tí nkexro tjuéhe kichó mé tjen tí t'inkaséyan, a ntá xikaha jina tjen, chóntahya jie la chrókjuachruéhya ch'án ninxeró kixin chrókjuasin sín jie ina. ¹¹ A ntá tí nkexro nínnakonhen kichó mé tjejó sín la ko ixri sín tí sítie a la ko noehya sín nketí nó sátsji sín kixin tí sítie la kjuich'éna ntakótán sín.

¹² Éxi xjanna t'ikuán tí jahará, la méxra tjékjian tí xroon ts'ayéhérá kixin tsonohará kixin kjuachaxin ihnje Dios kjuínchetjuáxinrá tí ijjará kixin k'uenyákonhenni Ìnchéni Jesucristo. ¹³ Jahará it'é xjan, ikjian tí xroon ts'ayéhérá jahará kixin choxínra tí nkexro tjen tí xrankixixín. A ntá jahará ntasoíra kjaxin ikjian tí xroon ts'ayéhérá jahará kixin kjuachará kixin kjuachahya tí jínahya chrók'uetuqanhanrá.

Ikjian tí xroon ts'ayéhérá jahará chánjanrá, kixin choxínra It'éni. ¹⁴ A ntá jahará it'é xjan ikjian tí xroon ts'ayéhérá kixin ó choxínra tí nkexro itjen tí xrankixixín tí naxa t'ónahya chjasintajni. Ikjian tí xroon ts'ayéhérá jahará ntasoíra, kixin naxa fuérterá, la ko k'uayéhérá tí itén Dios, la ko kjuachará kixin kjuachahya Tsochren chrók'uetuqanhanrá.

¹⁵ Chrótjuèhyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'èni Dios. ¹⁶ Kíxin ninkehó tí nkehe chrókjuanjon chjasintajni chrókuixín tí tjen It'èni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókuich'eni, la ko tí chrókuak'e asénni tí nkehe ts'ikonni, la ko tí kjuahnke xrikonni kíxin itsjé nkehe chróchóntani. ¹⁷ A ntá tí chjasintajni sitinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjnhin Dios mé ts'ejó sín jnkochrínin.

Tí nkehe chaxín la ko tí nkehe kjuach'ia

¹⁸ Éxi xjanna t'íkuan tí jahará, la chrókónohará kíxin ó kuichjina tí yaon tsjixixín. Jahará ó kuinhínra kíxin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kíxin ó kuichjina tí yaon tsjixixín. ¹⁹ Jehe sín tsík'axrjekjanxín sín tí tjejóni; kjánchó chaxínhya kuinkáchónki sín éxi tinkáchónkini. Náhí. Tí chaxín chrókuinkáchónki sín éxi tinkáchónkini la chrók'uaxrjekjanxínhya sín tí tjejóni, naaxá chrók'uejókonni sín jnkokóá. A ntá xíkaha kónhen k'uaxrjekjan sín kíxin tsonoxín kíxin kuinkáchónkihya sín éxi tinkáchónkini.

²⁰ A ntá jahará la Cristo tsíkjanjon Nchakuen ch'án tsík'ayéhéra kaín rá, ntá jie tiénxinrá intsi kuènte ch'án. ²¹ Ikjian tí xroon ts'ayéhéra kíxin ó nohará tí nkehe chaxín, jehya kíxin chrókónohayará; jahará la ó nohará kíxin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kíxin Jesús la jehya tí Cristo. Tí nkexro a mé nínkakonhen Cristo, mé titekakonhya It'èni Dios la ko tí Xjeen ch'án. ²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kíxin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkinhínra tí xrankixixín la chrórxáinkáonrá jnkochrínin. A ntá xíkaha tí chrórxáinkáonrá jnkochrínin tí nkehe tsíkinhínra tí xrankixixín, la kjaxin xíkaha jnkokóá chrókuinkáchónkirá tí Xjeen Dios la ko tí It'é ch'án. ²⁵ Kíxin Jesucristo tsintáchro ch'án kíxin tsjanjon ch'án tí kjuachón jnkochrínin.

²⁶ Méxra xíkaha tjékjan tí xroon í ts'ayéhéra kíxin chrókónohará kuènte tí sín tjinkaon chrókjuít'ayahará. ²⁷ Kjánchó jahará la ó chontará Nchakuen Dios tsítjáhara Jesucristo, a ntá xíkaha la í t'ichjánxínhya kíxin ókjé nkexro chrókjuakohará, kíxin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkáchónkirá Cristo éxi kjuako tí Nchakuen ch'án.

²⁸ A ntá jie éxi xjanna t'íkuan tí jahará, chrókujtóèhyará chrókuinkáchónkirá Cristo, kíxin tíó tsi ch'án la antsí chróchóxinrá ch'án la ko chrókósuàhyará chrókóchjinará tíó tsi ch'án, ²⁹ kíxin ó nohará kíxin Jesucristo la jína ch'án. A ntá chrókónohará kíxin kaín nkexro jína la xjeen Dios tíha.

3

Tí sín xjeen Dios

¹ Chrókónohará kíxin It'èni Dios, imá tjuèhe tí jeheni kíxin nchek'in ch'án xjeen ch'án tí jeheni, la mé chaxín jeheni tíha. Mé xíkaha tí sín chjasintajni chónhya sín tí jeheni kíxin jehe sín la xráxin chónhya sín Dios. ² Mé xíkaha kichó ní, ó tsík'onani xjeen Dios, a ntá naaxá tjakoxínhya ch'án nkehe tsonhenni tí tsjixixín. Kjánchó ó noheni kíxin tíó itsi Inchéni Jesucristo la ts'onani éxi tí jehe ch'án, kíxin ts'ikonni kíxin nkexri tjen tí jehe ch'án. ³ A ntá kaín nkexro tjejóchónhen tí tsi ch'án la chrókuítóhe sín ijíé sín kíxin tsotjóá sín kíxin jehe ch'án la tjóá ch'án.

⁴ Kíxin kaín tí nkexro tjasin jie mé jínahya ch'e sín, kíxin tíó tjasin chojni jie la mé xíkaha kuítetekakonhya sín tí ley a. ⁵ Jahará ó nohará kíxin Jesucristo kui chjasintajni kíxin tsjatsen ch'án tí ijíéni, a ntá jehe ch'án la ninkehó jie chóntahya ch'án. ⁶ Mé xíkaha kaín tí sín chaxín tinkáchónki tí jehe ch'án la mé tjasinhya sín jie; a ntá kaín tí sín tinkákjasin jie la tsík'ikonhya sín ch'án la ko xráxin chónhya sín ch'án. ⁷ Éxi xjanna t'íkuan tí jahará; méxra chrókujtóèhyará kíxin ninkexró chrókjuít'ayahará; a ntá tí nkexro ch'e nkehe jína la jína ch'án, kíxin Inchéni la jína ch'án. ⁸ A ntá tí nkexro xritjasin jie la mé kuènte tí Jínahya; kíxin tí Jínahya mé kjuankixín kjuasin jie desde tí xrankixixín k'óna chjasintajni. Méxra tí Xjeen Dios mé kui chjasintajni kíxin sinchek'itjáyán ch'án kaín tí xra kjuích'e tí Jínahya.

⁹ Nijnko tí chojni tsík'axrjenixín Dios naaxá chrónkákjasin jie, kíxin ó chóna tí kjuachón kjuanjon Dios; la í xitjahya naaxá chrókjuasin jie kíxin ó tsík'óna xjeen Dios. ¹⁰ Mé xíkaha tónoxín kíxin nkexro tí xjeen Dios la ko nkexro tí xjeen tí Jínahya, kíxin tí nkexro ch'ehya tí jína la ko tjuèhya kichó mé jehya xjeen Dios tíha.

Chrótjuèheni kichó ní

¹¹ Méxra tí tan tsíkinhínra tí xrankixixín mé tíhi, kíxin chrótjuèheni kichó ní. ¹² Chrókjuích'ehyani éxi kjuích'e ch'in Caín, kíxin jehe ch'án mé kuènte tí Jínahya, kíxin

k'óyán ch'án tí kíchó ch'án. ¿Nkekuènte kixin k'óyán ch'án? Kixin tí ch'in Caín la tí nkehe jínahya kjuích'e ch'án, a ntá tí kíchó ch'án la kjuích'e ch'án tí nkehe jína.

¹³ Kíchóni, chróchrakonhyará tí nínkakonhanrá tí sín síin chjasintajni. ¹⁴ A ntá noheni kixin k'uatínkani tí kjuach'én, a ntá kjuachón, mé noexínni tíhi kixin tjuèheni kíchó ni. Tí nkexro tjuèhya kíchó la éxi tsík'en sín xíkaha xritjejó sín. ¹⁵ Kaín tí nkexro imá nínkakonhen kíchó na mé chojni tjàya tíha, la ko ó nohará kixin ijnko chojni tjàya la xitjahya tsochónta kjuachón jnkochríxín. ¹⁶ Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxín jeheni kjónté chrók'uenyákonhenni tí sín kíchó ni. ¹⁷ A ntá tí tjen ijnko nkexro rico t'ikon kixin ijnko tí kíchó ch'án t'ichjánxínhin nkehe, a ntá tí tsjinkjtsahya tí kíchó, ¿a ntá nkexrí chrótjuèhe ch'án Dios kaín asén ch'án? ¹⁸ Éxi xjanna t'íkuan tí jahará, méxra chrótjuèxínhyani tí kíchó ni tí tan náxjón chrónixjani ó. Náhi. Chrókjuakoxínni tí nkehe jína chrókjuich'eni.

Jína tsochjineheni tí tjen Dios

¹⁹ Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxi tjinkaon Dios. ²⁰ A ntá tí tjoni asénni kixin chóntani ichrén jie, a ntá Dios la imá nohe ch'án la nohe ch'án kaín nkehe tónhen asénni. ²¹ Mé xíkaha kíchó ni, tí tjohya asénni kixin náxa ichrén nkehe jínahya tjenkayáxinni, a ntá antsí jína tsochjineheni tí tjen Dios, ²² a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéheni tí nkehe k'uetqoan ch'án la ko ch'eni tí nkehe tóxrjínhin ch'án. ²³ Tí nkehe tsík'etqoan ch'án la mé tíhi kixin chrókuitekaonni tí Xjeen ch'án Jesucristo, la ko chrótjuèheni kíchó ni éxi k'uetqoan ch'án. ²⁴ Tí nkexro nchexiteyéhe tí nkehe k'uetqoan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókoni ch'án kixin tí Nchakuen ch'án tsíkjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

¹ Kíchóni, chrókuitekákonyará kaín tí sín ntácho sín kixin Nchakuen Dios mé nixjaxín tí jehe sín. Náhi. Chrótsjehérá tí nkehe ch'e sín kixin chrókónohará kixin á chaxín chónta sín Nchakuen Dios o náhi, kixin tí chjasintajni la ixri nchónhya chojni ch'ia, ntácho sín kixin nixja sín tí itén Dios. ² A ntá xíkaha mé chrókónoaxínni kixin á chaxín chónta sín Nchakuen Dios kixin kaín tí sín chaxín titekaon sín kixin Jesucristo ikui éxi chojni mé chónta sín Nchakuen Dios. ³ A ntá tí nkexro titekakonhya kixin xíkaha tsíki Jesús, na chóntahya sín Nchakuen Dios. Náhi. Chónta sín tí nchakuen tí nkexro nínkakonhen Cristo. Jahará ó kuínhínni kixin itsi tí nchakuen a, a ntá jie ó tsíki chjasintajni.

⁴ T'íkuan tí jahará éxi xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetqoan, kixin tí nkexro tjejókoará la imá t'etqoan, a ntá tí nkexro t'etqoan chjasintajni la kánhyó t'etqoan. ⁵ Kixin jehe sín la kuènte chjasintajni ó, méxra nixja sín tí nkehe kuènte chjasintajni ó. A ntá tí chojni kuènte chjasintajni ó mé tjejótínhin sín. ⁶ A ntá jeheni mé xjeen Dios. A ntá tí sín chóxin Dios mé tjejótínhin sín tí nkehe tjakoni. A ntá tí nkexro chónhya Dios mé tjínkakonhya sín chrókuínhin sín tí nkehe tjakoni. A ntá tíha mé tjatsqanxínni nkexro chónta tí Nchakuen tí nkexro chaxín la ko nkexro chónta tí nchakuen tí nkexro xrich'ia.

Dios mé tjuèheni

⁷ Kíchóni, méxra chrótjuèheni kíchó ni, kixin tí tjuèheni kíchó ni mé tíxín tí tjen Dios. Kaín nkexro tjuèhe kíchó mé xjeen Dios, la ko chóxin Dios. ⁸ A ntá tí nkexro tjuèhya kíchó na mé chónhya Dios kixin Dios la xráxin tjuèhe chojni. ⁹ Dios la ó kjuakoxín ch'án kixin tjuèhe tí jeheni kixin tsíchr'án ch'án tí jnkoqó Xjeen ch'án chjasintajni kixin tsochóntaxínni kjuachón tí jehe ch'án. ¹⁰ A ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhi. Jehé ch'án mé xráxin tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chóntani.

¹¹ Kíchóni, a ntá tí xíkaha Dios tjuèhe tí jeheni, a ntá kjaxínni jeheni xíkaha chrótjuèheni kíchó ni. ¹² A ntá Dios la ninxeró k'uíkonyha. Kjánchó tí chrótjuèheni kíchó ni la Dios ts'ejókoni ch'án, a ntá tsjinkjtsá ch'án kixin chaxín tsotjuèheni kíchó ni. ¹³ Tíhi mé noexínni kixin tjejókoni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani. ¹⁴ Jeheni mé k'uíkoxín konni la mé chrónkaxínni kixin It'eni Dios tsíchr'án ch'án Xjeen ch'án kixin tsaáxin chojni síin chjasintajni. ¹⁵ A ntá jnkojín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xíkaha mé noexínni la ko titekaonni kixin Dios la tjuèhe tí jeheni. Dios mé xráxin tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín. ¹⁷ Mé xíkaha chaxín chrótjuèheni Dios kixin ntá chróchrakonhyani tí yaon tsitqéxín ijíeni kixin ó noheni kixin Jesucristo la tjuèheni ch'án la ko jeheni la kjaxín tjuèheni tí jehe ch'án.

¹⁸ Kíxin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkojín chojni chrakon la mé chaxínhya tjuèhe Dios.

¹⁹ A ntá jeheni la tjuèheni Dios kíxin jehe ch'án senó tjuèhe ch'an tí jeheni. ²⁰ A ntá jnkojín nkexro ntáchro kíxin jehe mé tjuèhe Dios, a ntá tuénxín nínkakonhen kíchó mé kjuach'ia xríko. Tí tjuèhya ch'án tí kíchó chóxin ch'án, la kjaxín xitjahya tsotjuèhe Dios kíxin tsík'ikonhya ch'án Dios. ²¹ Tíhi mé tsík'etqan Jesucristo kíxin tí nkexro tjuèhe Dios la mé kjaxín chrótjuèhe kíchó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kíxin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxín tsotjuèhe tí xjeen tí nkexro a. ² A ntá tí tjuèheni Dios la ko nchexiteyáni tí nkehe t'etqan ch'án, a ntá noheni kíxin kjaxín tjuèheni tí sín tsík'óna xjeen Dios. ³ Tí tjuèheni Dios la t'ichjánxín kíxin chrókuitekaonni tí nkehe k'uetqan ch'án, kíxin tí nkehe t'etqan ch'án la jehya ijnko nkehe imá xra ⁴ kíxin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Ínchéni la mé tsjachaxínni la tsjachahya tí chjasintajni. ⁵ A ntá tí sín tinkáchónki kíxin Jesús mé tí Xjeen Dios mé tsjachahya tí chjasintajni ts'etugnenhén sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxín tí ínta la ko tí jni. La jehya kíxin jehó tí ínta kjuakoxín ch'án. Náhi. Kjaxín ínta la ko íjní kjuakoxín ch'án. A ntá tí Nchakuen Dios mé chrónkaxín tíha, kíxin tí Nchakuen Dios la chaxín ntoá. ⁷ Siín iní nkexro chrónkaxín nkaya nkajni: ijnko la It'eni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha. ⁸ A ntá siín iní tí nkehe chrónkaxín ntíhi chjasintajni, mé tí Nchakuen Dios, la ko tí ínta la ko tí jni; a ntá tí iní mé jnkokón chrónka. ⁹ ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjeotan kíxin táha la Dios tsíchrónkaxín kíxin nkexrí tjen tí Xjeen ch'án. ¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchro sín kíxin Dios la ch'ia ch'án kíxin kuítetekakonhya sín tí nkehe tsíntáchro Dios kíxin nkexrí tjen Xjeen ch'án. ¹¹ Tí nkehe tsíchrónka Dios mé tíhi kíxin tsjanjon ch'án kjuachón jnkochríxín, a ntá tí kjuachón mé chóna tí Xjeen ch'án. ¹² A ntá tí nkexro chóna tí Xjeen Dios mé kjaxín chóna kjuachón; a ntá tí nkexro chónahya tí Xjeen Dios la mé chónahya kjuachón.

Chrónkaxín nkehe kuènte kjuachón

¹³ Tí nkehe mé kjinni kíxin jahará ó titekáonrá tí Xjeen Dios, kíxin mé tsoñoaxínrá kíxin chaxín chontará kjuachón jnkochríxín.

¹⁴ Tíhi mé chóxixínni Dios kíxin noheni kíxin ichrén nkehe tsjancheheni ch'án éxí tjinkaon ch'án la jehe ch'án la tsinhín ch'án. ¹⁵ A ntá tí xíkaha ó noheni kíxin Dios tjetinhín tí nkehe níxjeheni ch'án, a ntá kjaxín ó noheni kíxin ó chónani tí nkehe kjuancheheni ch'án.

¹⁶ A ntá jnkojínrá ts'íkonrá ijnko kíchuárá tjasin jie, a ntá tí jehya ijnko jie chrók'uenxín ch'án, la chrókjuancheherá Dios kíxin chrókjuinchexraxínkaon ch'án kíxin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kíxin íchá jina chrókjuanchehyará Dios kíxin chrókjuinkítsa tí ch'ín a. ¹⁷ Kaín nkehe jínahya la íjie tíha. Kjánchó siín jie ts'enxínhya chojni.

¹⁸ Ó noheni kíxin tí nkexro tinkáchónki It'eni Dios tjasínhya sín jie, kíxin tí Xjeen Dios tjinkítsa tí jehe sín, a ntá tí Jínahya tsjachahya tsjachroe tí jehe sín.

¹⁹ Ó noheni kíxin Dios t'ayakonhen tí jeheni, a ntá tí Jínahya chóna kjuachaxín t'etugnenhén kuènte chjasintajni.

²⁰ Ó noheni kjaxín kíxin Xjeen Dios kui, la ko kjuínkítsa ch'án tí jeheni kíxin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochríxín. ²¹ Éxí xjanna t'íkuan tí jahará, la títqhérá tí dios tsíkangya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakonhen nínko mé ikjian tí xroon ts'áyéhe tí sín tsíkjeýá Dios tójnoktsé sín ntiha, la mé chaxín tjuahá sín: a ntá jehya janhván, la kjaxín kain tí sín chóxin tí tan chaxín. ² Tjuahará tí jahará kixin tí tan chaxín ó chónta asénni, tíha mé ts'ejókoni jnkochrixín. ³ It'éni Dios la ko Inchéni Jesucristo mé Xjeen Dios chrókjuintayaonrá ch'án la ko chrókujikonóahará ch'án la ko chrótjáhará ch'án kjuaxróxin kixin chaxín tjuahará ch'án.

⁴ Imá chàna k'uikuán kixin isorá tjejorá titekáonrá tí nkehe chaxín, éxí tsík'etóan It'éni Dios. ⁵ A ntá jie jahará kichó ni, xrxanóahará kixin chrótjuèhéra kichuárá. Méxra xikaha tjékjian tí xroon í, la jehya ijnko nkehe nixin tsík'etóan Dios. Náhí. Tíha la mé tí nkehe tsík'áyéheni tí kjuák'e Inchéni Jesucristo. ⁶ A ntá tí tjuèheni kichó ni la mé tíhi kixin chrók'uejóni éxí tsík'etóan Dios; a ntá tí nkehe tsík'etóan Dios la mé ó tsíkinhínra jahará tí senó kixin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xikaha mé ixri xrich'ia la ko nínkakonhen Cristo. ⁸ Chrókóxakonhanrá kixin chrók'uitjáyanhya tí xra kjuich'erá kixin naxa chrók'uayéhéra tí nkehe tsjintaxín ts'ayéhéra.

⁹ A ntá tí sín ijnko nkexro kuitóhe tí nkehe kjuako Cristo ntá kjuichroe la mé chóntahya sín Dios; a ntá tí nkexro títóehya tí nkehe kjuako Cristo mé chónta sín It'éni Dios la ko tí Xjeen ch'án. ¹⁰ A ntá jnkójin sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxín chrókuitóhe tí sín a ntoará la ko ni chrónixjeéhyará sín jnkójina. ¹¹ A ntá tí nkexro tsonixjehe tsontácho kixin: “¿Á jina k'uinka?” na mé éxí tóxrjínhin sín tí nkehe jínahya ich'e tí sín a.

Tí tan tsjixín

¹² Chonta nchónhya nkehe chrókuinhínra jahará, kjánchó tjínkakonhya chrókjian xroon ó. Náhí. Tjínkavan kixin tjoka chrókjuasántsahará tí jahará tsonixjahará kixin chrókjuintaxín chrókóchéheni.

¹³ Tí sín kichuárá tójnoktsé kuénte nínko ntihi, mé tí sín kjaxín tsíkjeýá Dios, mé nixjahará sín. Amén. Ó tjen.

Tí nixin xroon tsíkjin ch'ín Juan

¹ Janhan mé tí nkexro t'ayakonhen nínko mé tjékjian tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuahá.

² Kíchóni, tjáncháha Dios kixin éxi jaha jína tjen tinkachónkia Ìnchéni la jína chrók'uaxrje kain xra ch'e la ko jína chrókjuak'e jaha. ³ Imá kóchàna tió kui iso tí sín kíchó ni chrónka sín kixin jína tjákoxian tí tan chaxín. ⁴ Kohya ijnko nkehe antsí má nchechàna éxi tió kuínhan kixin tí sín t'íkuan éxi xjanna tjejóititekaon sín tí tan chaxín

⁵ Kíchóni, chaxín jína tjech'e xra tjínkítsa tí sín kíchó ni la ko antsí tjínkítsa tí sín tsíkjin ójé chjasin. ⁶ A ntá tí tsíkójkotsé tí sín kíchó ni la tsichrónka sín kixin nkexrí tjuéhé tí jehé sín. Jaha chrókjuínkítsa tí nkehe t'ichjánxinhin sín tí sátsji sín. Xíkaha mé tóxrjínhin Dios. ⁷ Tió sákjuí sín kjuankixin sín chrónka sín itén Ìnchéni la chrohya sín chrók'uáyéhe sín ninkehó nkehe kuènte tí sín chónhya Dios. ⁸ Méxra tí jeheni t'ichjánxin chrókjuínkítsani tí jehé sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'ín Diótrefes

⁹ Janhan ikjian ijnko xroon k'uáyéhe tí sín tójkotsé ntiha. Kjánchó ch'ín Diótrefes kuitekakonhya ch'án tí nkehe k'uetuenhenni ch'án kixin tjinkaon ch'án chrók'uetóan ch'án jehó ch'án. ¹⁰ Méxra xíkaha tí sátsjia níha tsonixjahá ch'án kixin tí kjuach'ia ntáchro ch'án t'ántaxínhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanjon kjuachaxin la t'etóan ch'án kixin tsjanjonhya sín kjuachaxin la ko t'etóan ch'án kixin tsochjinahya sín tí tójkotsé tí chojni.

¹¹ Kíchóni chrókjuákoxínhya tí nkehe jínahya. Íchá jína chrókjuákoxian tí nkehe jína. Tí nkexro ich'e nkehe jína na mé kuènte Dios. A ntá tí nkexro ich'e nkehe jínahya la mé tsík'ikonhya sín Dios.

Jína tjákoxín tí ch'ín Demetrio

¹² Kain sín ntáchro sín kixin jína tjákoxín tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixín nixja ch'án

¹³ Janhan chonta nchónhya nkehe tsontáxrjan, kjánchó tjínkakhonhya tsokjian ó ¹⁴ kixin tjínkavan tjoka ts'íkuan tí jaha, a ntá tsjoni.

¹⁵ Kjuaxróxin chrókjuak'e jaha. Kain nkexro choxian níhi nixjaha sín. Tétuanhan nixjehé jnkojnko tí sín chóxinni.

Tí xroon tsíkjin ch'ín Judas

¹ Janhan Judas, t'ahá xra Jesucristo, la sana mé Jacobo la mé ikjian tí xroon í ts'áyéhe tí sín tsíkjeýá It'eni Dios tsíkjinchetjóá ch'án kixin tsínkáchónki sín ch'án. Mé xíkaha Jesucristo t'ayakonhen ch'án tí jehe sín. ² Imá kuikónóahará ch'án ntá ts'ayéhérá kjuaxróxin kixin tjuahará ch'án.

*Tí sín ntoáhya tjako
(2 Pedro 2.1–17)*

³ Kíchóni, imá tjínkavan tsokjian tí xroon ts'ayéhérá tsochrónka nkexrí tsaáxinni kain ni. A ntá t'íkuan kixin t'ichjánxin tsokjian tí xroon ts'ayéhérá tsoxrjanóaxínrá kixin jina chrókiénxinrá nkehe chrókuátéherá kixin nkexrí tinkachónkirá Ìnchéni kixin tí fe la mé ónaá tsík'áyéhéó tí sín tsíkjinchetjóá Dios. ⁴ A ntá jie ó kuik'ixenhen iso sín ch'ia tí tjejórá. A ntá ósé nixja xroon itén Dios kuénte tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etqan, la ko titekakonhya sín Ìnchéni Jesucristo.

⁵ Jahará kjónté ó nohará la jehí tjínkavan sintaxráxináoaná inaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xíkaha la chr'éxin kjuínchek'tíjáyán ch'án tí sín kuítekakonhya sín tí jehe ch'án. ⁶ Kjaxin tí sín ángel kuítekakonhya sín tí k'uetqan Dios ntá kuitohe sín tí kjuachaxin tsíkjanjon Dios tsík'áyéhe sín la ko kuitohe sín tí k'uek'ejó sín jina, a ntá jie Dios k'uetqan ch'án kixin ts'ejóchjina sín tí sítié la ts'ejóchónhen sín tsijia tí yaon tsitqexín ijje sín. ⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokón ntoa sín. Tíha mé chrórxaxinkakonxín kain chojni kixin nkexrí tsonhen tí sín titekakonhya tsjasótéxin sín tí xrohi nkochrín ts'ankahya.

⁸ Méxra kjaxin tí chojni a kotáchrién sín tsík'ikonxín kixin ó nchoxon chrókjuasinko sín jie chojni chjin ókjé la ko chrókuítekakonhya sín tí kjuachaxién Ìnchéni la ko chrók'uántaxínjin sín tí sín ángel chóna kjuachaxin t'etqan. ⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjó sín kjuánjonxin sín nkehe tsonhen tí cuerpo kuénte ch'ín Moisés. † A ntá jehe ch'án kjónté xíkaha la kjuínchekjasótehya ch'án tí ch'ín Tsochren. Jehó ntáche ch'án kixin: “Ìnchéni mé tsjentuáha tí jaha.” ¹⁰ A ntá tí chojni i t'ántaxínjin sín tí nkehe tiénxínhya sín la tjenkayáxin sín éxi ko tiénxínhya nchexiteyéhe tí nkehe ntáchro asén, mé xíkaha tí nkehe jínahya kjuích'e sín ts'itjáyánxin.

¹¹ jNoa tí jehe sín! Chréhe sín éxi kjuích'e ch'ín Caín. ‡ Tjinkaon sín chrókjuacha sín chichaon ntá ntoáhya kjuích'e sín éxi kjuích'e Balaam, la ko its'en sín éxi ik'uén ch'ín Coré kixin kuítekakonhya sín. § ¹² Ijnko kjuatósuehé kixin tjejóyákjanxin sín tí síin kia náxrjón chontará, kixin tjejóne sín la ko tjejó'ti sín chéhe sín la kjónté xíkaha la ninkehó kjuasáya chóntahya sín. Tjejó sín éxi tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxi tjuj chóntahya ntá tjakáko xritq; la ko éxi ijnko nta t'ónahya to tí nitjó chrók'óna to, éxi yáya tsík'en tsík'axrjenkixin nuéé. ¹³ Jehe sín na mé éxi ntayaoon jiehe síxróji lóxrjó ó chóntahya ntá jina mé xíkaha chónkó tí nkehe ch'e sín mé ijnko kjuatósuehé tíha; la ko éxi konotsé kjuíchroe sákjuí ókjé; a ntá tjechónhen sátsji sín tsjasóte sín sítié jnkochrín.

¹⁴ A ntá kjuák'e ch'ín Adán, a ntá yatqxin chr'éxin kui ch'ín Enoc nixjaxin kjuachaxién Dios ntáchro ch'án kixin k'uikon ch'án itjen Ìnchéni kuíkqao nchónhya mil tí sín ángel kuénte ch'án, ¹⁵ kixin sinchekitqexín ch'án ijje kain tí sín jínahya kixin kain tí jínahya kjuích'e sín la ko kain nkehe k'uénixja tí sín jínahya k'uántaxínjin sín tí jehe ch'án. ¹⁶ Xráxin tóxrjénhya sín nkehe sitónhen la ko ixri sín tjonta kíchó sín. Jehó xritjeýá sín tí nkehe tóxrjínjin sín tjenkayáxin sín. Ihnke sín nixja sín la ko itjo sín jina chojni kixin ntá tí sín a chrókjuinkítsa jehe sín.

Nchexraxínkaon ch'án tí sín tinkáchónki Cristo

¹⁷ A ntá jahará kíchó ni, xráxináoaná kixin tí sín tsíkjeýá Ìnchéni Jesucristo ¹⁸ ntáchro sín kixin tí yaon tsjixixín tsjejexin chjasintajni ts'ixin chojni tsitekakonhya sín ts'ántaxínjin sín tí nkehe tjinkaon Dios la ko tsotjinkaon sín sinchexiteyéhe sín tí nkehe jínahya ntáchro asén sín ó. ¹⁹ Tí sín a mé tjinkaon ts'ókika tí sín jnkokoá tjejó'tojnkotsé kixin naxá tóxrjínjin sín sich'e sín nkehe síin chjasintajni kixin chóntahya sín Nchakuen Dios.

* 1:5 Éxodo 12.51 Números 14.29–30 † 1:9 Deuteronomio 34.6 ‡ 1:11 Génesis 4.3–8 § 1:11 Números 31.16

* 1:11 Números 16.1–3

²⁰ A ntá jahará kichó ni tjuahará, antsí jína chrók'uejorá tinkachónkirá Ìnchéni. Chrónixjeexínrá Dios tí kjuachaxin kuènte Nchàkuen ch'án. ²¹ Jína chrók'uejorá kixin tjuahará Dios ts'ejochonhénrá tí yaon tsokjan Ìnchéni Jesucristo kixin kjuasáyé ch'án tsotjáhará ch'án kjuachón jnkochrín.

²² Chrókuikonóghérá tí sín naxa tienxínhya. ²³ Jnkojín sín chrókuincheakaará chrókuakitsjekjanxínrá sín chríkjan xrohi, la ko chrókuikonóghérá í so sín kjánchó chróchontará cuidado tí jehe sín kixin kjónté ti iké sín kjaxin chóna jié.

Tjanchia ch'án kjuasáya

²⁴⁻²⁵ Jnkokoá Dios tjen mé imá nohe ch'án la ko sincheakaáni ch'án la chóna ch'án kjuachaxin ts'ayakonhenni ch'án kixin chrókjuasinhyani jié la ko tió tsjijini tí tjen ch'án la ninkehó jié chróchóntahyani, imá tsóchéhēni tí tjen ch'án ntiha. Kjuasáyé Dios imá chóna ch'án kjuachaxin t'etōan ch'án la ko kjuíncheakaáni ch'án kjuachaxin Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

¹ 18

Kaín tí nkehe í mé chénka Dios Jesucristo kixin jehe ch'án tsochéna tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuénte ch'án kixin nkexrí chrókoñohe tí ch'ín Juan ch'ehe ch'án xra. ² A ntá jehe ch'án mé k'uútuénhen ch'án ntá chrónkaxín tí nkehe chaxín tsintácho Dios la ko tí nkehe chrónka Jesucristo la ko kaín tí nkehe tsík'íkon ch'án nkexrí kjuakoxín Dios.

³ Náxrxón tjejó tí sín nchekuáxin tí xroon í la ko kjaxín tí sín tjejótinhin tí palabra chrónka nkehe tsonhen la ko tóxrjínhin sín titekaon sín nkehe nixja tí xroon í kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato nínko

⁴ Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá la ko kjaxín tí yato Nchakuen ch'án tjejó tí trono t'etoanxin ch'án mé tjanjon kjuaxróxin. ⁵ La ko kjaxín kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankixín xechón kjónté tsík'en kixin tjetooan ch'án kixin t'etuenhen ch'án kjónté kaín tí sín rey la ko tí sín t'etoan síin chjasintajni. Jehe ch'án mé tjuéheni ch'án la ko tí ijnjé ch'án mé k'uújmáxinni kaín tí jie chótani. ⁶ Jehe ch'án mé tsikjanjon kjuachaxín tsík'ónani nchat'á kixin sich'eheni xra It'éni Dios. Tí kjuachaxín kuénte ch'án me ts'etoan jnkochrín. Mé xikaha tsoxiteyá. Amén.

⁷ Ts'íkon chojni kixin Cristo la ó tsi chríkjan tju. Kaín chojni ts'íkon ch'án la ko kjaxín tí sín k'uékónínkakonhen tí jehe ch'án tsikjinchekjasóte sín ch'án mé ts'íkon sín ch'án la ko kaín chojni chjasin síin chjasintajni tsotsjanka sín tió ts'íkon sín tí jehe ch'án. Mé xikaha tsonhen. Amén.

⁸ Janhan mé tí xrankixín la ko tí tsjixín éxi tí letra xrankixín A la tsjixín Zeta. Mé xikaha ichro Inchéni Dios, tí nkexro imá t'etoan. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá.

Ch'ín Juan tsík'íkon ch'án kixin Cristo chónka kjuachaxín

⁹ Janhan Juan mé ijnko kichó tí jahará mé tjékjan Jesús la ko tí kjuachaxín kuénte Dios chonta la mé jahará la ko jeheni jnkokón tjejótasóteni la jehe ch'án tjinkitsani kixin tsjachani. Kjuakua itén Dios éxi chrónka Jesucristo la mé tíha kjuak'échjinaxián tí isla it'in Patmos. ¹⁰ A ntá ijnko yaon xraxinkakonxíni Inchéni la ikui kjuachaxín Nchakuen Dios tí tjeñ tí janhan la kujnhan kixin nóton tí janhan ijnko nkexro nixja imá itsen éxi itén ijnko trompeta. ¹¹ Mé ntácho ch'án kixin:

—Janhan mé tí xrankixín la ko tí tsjixín éxi tí letra xrankixín A la tsjixín Zeta. Mé tsokjian jaha ijnko xroon kaín tí nkehe k'uúkuan kixin tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjá tsjaha kixin nkexro itén tí tjenixjana ntá xrinahya k'uúkuan yato candelero tsík'óna chica oro. ¹³ A ntá chríkjan tí yato candelero k'uúkuan ijnko nkexro éxi yóhe Xjeen Dios tsík'óna chojni. Ntá tí iké ch'án la ika kjínjin tjenkáya ch'án hasta tsík'óyóhe toté ch'án la ko mé chónka ijnko cinta jehó oro tjenkáni ntaquin ch'án. ¹⁴ Tí kaxjhi ch'án la tjóá éxi kaxree kolélo tjóá o éxi chrinta tsjehe la ko tí ikon ch'án la éxi xrohi nene tsjehe. ¹⁵ Ntá tí toté ch'án la éxi chica sine tjákini na ntá tsík'axrxén tjá. A ntá tí itén ch'án la itsen éxi tóvéntó nchónhya ntario. ¹⁶ A ntá tí tjá ch'án chjina mé chónka yato konotsé. A ntá tí ir'va ch'án k'uaxrxén chica espada iyo, yánjin taté. A ntá imá tjákini tsjehe ikon ch'án la éxi yaon t'inkaséyanxín imá.

¹⁷ A ntá tí k'uúkuan xikaha la kjuachr'itsinka toté ch'án éxi tsík'énna. A ntá jehe ch'án kjuak'etja tjá ch'án chjina chrítaón tí janhan ntá nixjana ch'án ntácho ch'án kixin:

—Chrakonhya jaha. Janhan mé tí xrankixín la ko tí tsjixín. ¹⁸ Janhan tí nkexro tjechón. Ik'uén, a ntá ijje la tjéchuán inaá la itjén jnkochrín. Amén. Janhan chonta llave kuénte chojni its'en la ko kuénte tí síin tí sín tsík'en. ¹⁹ Méxra ikjian jaha tí nkehe k'uúkuan mé tí nkehe síin ijje la ko tí nkehe tsonhen chr'éxin. ²⁰ Ninkexró k'uékiexínhya nkexrí t'axrxén tí yato konotsé k'uúkuan chonta tjana chjina, la ko tí yato candelero tsík'óna chica oro. Mé tí yato konotsé t'axrxén kixin tí yato ángel t'ayakonhen tí yato nínko la ko tí yato candelero k'uúkuan me kjaxín t'axrxén tí yato nínko.

2

Tí tan k'uáyéhe tí yato nínko: Tí tan k'uáyéhe tí sín chjasin Éfeso

¹ Tsokjian tí nkehe ts'áyéhe tí ángel t'ayakonhen tí nínko Éfeso: “Xíkaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsik'óna oro. Ntáchro xíkahi: ² Janhan nõna kaín tí xra ch'erá la ko nõna kixin tóxrjíanhyará tí sín jínahya. Janhan la ó nõna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín. ³ Nchónhya kjuasótiará la kjónté chonhénrã kóninkákonyará la imã kjuich'erá xra kixin tinkachónkirã njina la ko nunca kóxrjéhyará. ⁴ Kjánchó tjánchiã ijnko jie tí jahará kixin tinkachónkihyará éxi kjuankixixínrã k'uétjuanarã. ⁵ Méxra chróxrãxinkáonrã kixin ó kujtohérá tí k'uétjuanarã la ntã chrókujuínkirã tí nkehe tjenkayáxinrã la ko chrókujuich'erá xra éxi tí kjuankixixínrã. A ntã tí náhi, la tjoka tsjasán la tsjakíyan tí candelero tí tjejórá tí nunca tsjínkihyará tí nkehe jínahya tjenkayáxinrã la tí tsokjanhyará tsóxrãxinkáonrã Dios. ⁶ Kjánchó chrókónohará kixin tóxrjina tí nkehe tjejóch'erá kixin tóxrjíanhyará tí xra ch'e tí sín nicolaitas kixin kjaxin janhan nínkãkonhan tí nkehe ch'e sín. ⁷ Tí nkexro tjínkaon chrókuinhin la chrókuinhin sín tí nkehe nixjehé Nchãkuen Dios tí nínko ntáchro kixin: Tí sín tsjacha sinchexiteyãna sín la tsotjãhã sín kjuachaxin sine sín tí to t'óna tí nta tjanjon kjuachón itjen tí tjen Dios.”

Tí tan k'uáyéhe tí sín chjasin Esmirna

⁸ Ikjian tí nkehe ts'áyéhe tí ángel t'ayakonhen tí nínko Esmirna: “Xíkaha ichro tí nkexro xránkixixín la tsjixixín, mé tí nkexro ik'uén la ntã jie tjechón: ⁹ Janhan la ó nõna kaín nkehe tjejóch'erá. Ó nõna kixin nkexrí tjejójtásótiará la ko ó nõna kixin nõarã kjánchó jehya. Náhi. Jehe sín mé tójnko tsé sín tí nínkqé tí Jínahya. ¹⁰ Kjánchó chrakonyará kjónté tsjasótiará. Tí ch'ín Tsochren tsochr'ánxanhanrã ntóechiso jnkójín tí jahará kixin tsotsjéxín nkexrí tí jahará ntã t'ichjãnxin tsjasótiará iso yaon. Kjánchó chrókujtóhéhyará Dios kjónté chrók'uenrã ntã janhan tsotjãharã tí kjuachón chr'éxín. ¹¹ Tí nkexro tjínkaon chrókuinhin la chrókuinhin tí nkehe nixjehé Nchãkuen Dios tí nínko: Tí nkexro tsjacha sinchexiteyãna sín la í tsjasótehya, la tí yóxin its'en chojni la í ts'enhya tí jehe sín.”

Tí tan k'uáyéhe tí sín chjasin Pérgamo

¹² Tsokjian tí nkehe ts'áyéhe tí ángel t'ayakonhen tí nínko Pérgamo: “Mé xíkaha ichro tí nkexro chóna chica espada yánjín taté: ¹³ Janhan ó nõna kaín nkehe tjejóch'erá la ko ó nõna nketi tjejórá kixin tí tjejórá la t'etqan ch'ín Satanás la kjónté la jina kuinkachónkirã tí janhan. Jahará kujtóhéhyará kuinkachónkirã tí janhan kjónté tí yaon tsik'en ch'ín Antipas, ijnko nkexro kjuínchexiteyãna jina. Jehe sín tsik'óyãnxin sín ch'án tí tjejórá ntíha kixin ntaha t'etqan ch'ín Satanás. ¹⁴ Kjánchó janhan tjánchiã ijnko jie tí jahará kixin iso nkehe ntoáhya ch'erá. Siín ntíha chjasin Pérgamo tí tjejórá iso sín tjínkãkonhya sín tsítqhe sín tí nkehe k'uéjkjako ch'ín Balaam, tí nkexro k'uék'etuenhen ch'án tí ch'ín Balac kixin tí sín israelita chrókjuasin sín jie chrókjóne sín tí nkehe tsikjokehe sín tí nkehe tsikjanyã la ko chróchóna sín chojni chjín ókjé chrókjuasinko sín jie. ¹⁵ Kjãxin xíkaha tí tjejórá la siín iso sín tjínkãkonhya sín tsítqhe sín tí nkehe tjako tí sín nicolaitas. Janhan mé tjínkãkonhya tí sín a. ¹⁶ Méxra chrókjanrã chrókuinkachónkirã Dios. A ntã tí náhi, la tjoka tsjasán tí tjejórá la tsjãnjonkianxian sín tí espada t'axrjéxín ir'va. ¹⁷ Tí nkexro tjínkaon chrókuinhin la chrókuinhin sín tí nkehe nixjehé Nchãkuen Dios tí nínko ntáchro kixin: Tí nkexro tsjacha sinchexiteyãna sín la tsotjãhã sín kjuachaxin chrókjóne sín manã tjechónhen la ko tsotjãhã sín ijnko xro tjóã la tí xro la ts'inixín ihnjé sín nixin chónhya ninkexró. Jehó tí nkexro ts'áyéhe mé tsonhe.”

Tí tan k'uáyéhe tí sín chjasin Tiatura

¹⁸ Tsokjian tí nkehe ts'áyéhe tí ángel t'ayakonhen tí nínko chjasin Tiatura: “Mé xíkaha chro tí Xjeen Dios, tí nkexro ikon éxi yóhe xrohi nene sín'axrjéxín la ko toté éxi chica sine tjãkíni tsjehe. ¹⁹ Janhan ó nõna kaín tí nkehe tjejóch'erá la ko ó nõna kixin tjuanarã la ko tinkachónkirã tí janhan la ko ó nõna tí xra tjejóch'erá la ko ó nõna kixin tjejóchónhénrã tóninkákonyará. La ko ó nõna kixin qantsi tjejóch'erá xra ijie ntã tí kjuankixixínrã la kénhyó. ²⁰ Kjánchó tjánchiã ijnko jie tí jahará kixin tjãnjonrã kjuachaxin tjako tí tjan Jezabel. Kjãxin ntáchro tjan kixin nixja tjan itén Dios kjánchó ch'iehye tjan tí sín ch'ena xra kixin kjãxin sín chrókjuasinko sín jie chojni chjín ókjé la ko chrókjóne sín tí nkehe tsik'óyãnxin sín tsikjokehe sín tí nkehe tsikjanyã. ²¹ A ntã janhan ó kujtohá tjan intsi kixin chrókjuinkí tjan tí tjenkayáxin tjan kjánchó tjínkãkonhya tjan sich'e tjan xíkaha la tjínkãkonhya tjan chrókujtóhe tjan tí jie tjasinko tjan chojni ntoã. ²² A ntã jie tsjãnjuan kjuachaxin tsoníhi tjan tsjak'etãk'ã tjan cama la ko kjãxin tsjasóte kaín tí nkexro kjuasinko tjan jie tí nunca tsítqehya sín tí nkehe tjínkaon tjan sich'e tjan. ²³ A ntã janhan ts'oyãnxin tí xjeen tí jehe tjan. Ntã kaín tí nínko tsonoxín sín kixin janhan choxian nkehe tónhen asén kaín chojni. A ntã jnkójnko tí jahará la tsjénkãharã nkexrí tí xra kjuich'erá. ²⁴ A ntã tí í sorã tjejórá chjasin Tiatura

tí chréhyará tí nkehe ntoáhya tjako sín la ko tjínkákonhyará chrókónohará tí nkehe jínahya kuénte ch'ín Tsochren la xikahó la í tsétuanhyará í jnko xra. ²⁵ A ntá jahará la tí nkehe ó chontará la t'ayakonhénrā hasta tsokjan janhan. ²⁶ A ntá tí sín tsjacha sinchexiteyána sín la ko xikaha sich'e sín hasta tsjixixín kixin janhan tjínkavan xikaha chrókjuich'e sín na mé janhan tsjánjuan kjuachaxin ts'etuenhen sín kaín nació. ²⁷ Na mé xikaha T'aná mé chjina kjuachaxin tsétuan la kjaxin xikaha jehe sín mé ts'etuenhen sín tí nació yóhe chróchónta sín ijnko chica vara kixin chróchjéhe sín tí chj chrók'ókuen tí chj tsík'óna nchetje. ²⁸ Me kjaxin tsotjaha sín tí konotsé tí tji nchitjen. ²⁹ A ntá tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko.”

3

Tí tan k'uáyéhe tí sín chjasin Sardis

¹ Tsokjian tí nkehe ts'áyéhe tí ángel t'ayakonhen tí njnko chjasin Sardis: “Xikaha ichro tí nkexro chónta yato Nchakuen kuénte Dios la ko chónta tí yato konotsé: Janhan nóna kaín nkehe ch'erá, ó nóna kixin éxi tsík'en tí xra ch'erá kjónté nchehnerá kixin tjejóhónrā. ² T'ayarā. Naxa t'ayakonhénrā kjónté í tsjéhya tí nkehe kuitohe kixin kjaxin tíha mero its'en. Ó k'uikuán kixin tí xra ch'erá la t'ikon tí Dios kuéntana kixin ntoáhya. ³ Chróxráxinkáonrā tí nkehe tsíxrakohará la ko tíha chrókjuich'erá la chrókjanrā chróxráxinkáonrā Dios. A ntá tí naxa tjejóchrínrā la titáya tsjasán éxi ijnko síchee la tsónoahyarā nkesá tíha. ⁴ Kjánchó naxa sín iso chojni ntaha chjasin Sardis naxa kjuínchekjítahya sín iké sín la jehe sín la ts'ájikjan sín kixin chónta sín ka tjóá kixin jehe sín la jina sín. ⁵ Tí sín tsjacha sinchexiteyána sín la ts'áyéhe sín ka tjóá ts'ínkáya sín la ko tsóxikahya ihnjé sín chónta tí libro ts'ínixín ihnjé tí sín tsaá la ko tsochoxian sín nkayakon T'aná la ko nkayakon tí sín ángel kuénte ch'án. ⁶ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko.”

Tí tan k'uáyéhe tí sín chjasin Filadelfia

⁷ Tsokjian tí nkehe ts'áyéhe tí ángel t'ayakonhen tí njnko chjasin Filadelfia: “Xikaha ichro tí nkexro tjóá la ko chaxín mé tí nkexro chónta llave kuénte ch'ín rey David. A ntá tí tsakitjehé ch'án puerta la ninkexró tsjachahya ts'íkjéhe, a ntá tí ts'íkjéhe ch'án puerta la ninkexró tsjachahya tsakitjehé. ⁸ Janhan ó nóna kaín nkehe tjejóch'erá. Kjuaké tí tjejórá ijnko puerta xitjehé la ninkexró xitjahya ts'íkjéhe. Kjónté intsíkoá kjuachaxin chontará la jahará kjuínchexiteyará tí nkehe kjuákua la ko kjuínchemáhyará tí janhan. ⁹ Tí sín tsíkitekaoon Satanás la ntáchro sín kixin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrínkí otará la ntá tsónohe sín kixin chaxín janhan tjuahará. ¹⁰ Ó kuitekáonrā tí nkehe kuétuanhanrā la jina tjejórá la mé xikaha janhan ts'ayakonhanrā tí ichrén nkehe tsónhanrā tíó tsi tí nkehe tsónhen kuénté chjasintajni kixin ó jehí xikaha tsónhen kaín chojni tjejó chjasintajni. ¹¹ Janhan mé tjoka ts'ínka. Méxra t'ayakonhénrā tí nkehe chontará kixin ninkexró chrókuakitsjehará tí nkehe ó kjuachará. ¹² Tí nkexro tsjacha sinchexiteyána la ts'óna sín columna kuénte njnko kuénte Dios kuéntana la nunca xitjahya sátsjixín sín ntiha. La janhan tsokjian ihnjé tí Dios kuéntana tsjiko sín la ko tsokjian ihnjé chjasén Dios kuéntana mé tí Jerusalén nixín tsixín nkajní tí tjen Dios kuéntana. Kjaxin tsokjian njina nixín tsóchónta sín. ¹³ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko.”

Tí tan k'uáyéhe tí sín chjasin Laodicea

¹⁴ Tsokjian tí nkehe ts'áyéhe tí ángel t'ayakonhen tí njnko chjasin Laodicea: “Xikaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuich'éanaxín Dios kaín nkehe. ¹⁵ Ó nóna kaín nkehe tjejóch'erá. Ó nóna kixin jahará la ní jehya kinrā ó sóará. Chrókóchaxín chrókókinrā ó chrókóchaxín chrókósóará. ¹⁶ A ntá jahará la yásorá la jehya ikinrā la jehya sóará. A ntá ijie ir'va ó tsíkja tí jahará la ts'ítjia. ¹⁷ Ntáchrorá kixin jahará rícorá la imá jina tjejórá la ko ninkehó t'itjáyanhya tí tjejórá, ichrorá. Kjánchó chontahyará kjuachéhe la ko jehya jina tjejórá la ko nóará la ko ntakótánrā la ko tjóchínrā. ¹⁸ Méxra ijie ntáxraxinkáonrā janhan sintakjihará tí nkehe oro náxrxón ts'ík'axrxjén tja kixin ntá chaxín ts'ónará rico. La ko janhan sintakjihará ika tjóá kixin ts'ínkayará ntá tsjínhanrā kjuatósuehé kixin í tjóchínhyará. La ko janhan tsjánjuan xroan kolirio tsjiankí ikonrā kixin ts'íkonrā. ¹⁹ Janhan mé tsjéntuáha kaín tí sín tjuaha. Méxra íchá jina chrókjan sín chrókuinkáchónki sín Dios. ²⁰ Tsjehérá janhan itjén ntója puerta, tjé'teya. A ntá njkojin nkexro chrókuinhin tí tanná ntá chrókuakitjehé tí puerta ntá chrók'úxanhan ntóe sín la chrókjónékian sín la ko jehe sín la ko janhan. ²¹ A ntá tí sín chrókjuacha chrókjuinchexiteyána la tsjánjuan kjuachaxin ts'ejóqjan sín tí tétóanxian ntiha la éxi xikaha janhan kjuacha ntá T'aná kjuanjon kjuachaxin tjékjan ch'án tí tjen ch'án t'etóan ch'án ntiha. ²² Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko.”

4

Tí sín tjikosáyehe Dios nkaya nkajní

¹ Ntá chr'éxin janhan k'uikuán ijnko puerta tjexrankehe nkaya nkajní. Ntá kuinhan ijnko itén nkexro éxi trompeta mé tí nkexro nixjana tí xránkixín, ntá jehe ch'án nixjana ch'án, ntáchro ch'án kixin:

—T'it'ótjen ntihi ntá tsjákoħa kaín nkehe tsonhen chr'éxin.

² Ntá tuéxín ikui tí kjuachaxin kuénte Nchakuen Dios k'uayáħa ntá k'uikuán tí trono itjen nkaya nkajní ntá ntiha tjetjaxin ijnko nkexro. ³ A ntá tí ch'ín tjetjaxin tí trono mé tjákini tsjehe éxi ixro jaspe o ixro cornalina. A ntá jnkotatjen tí trono itjen ijnko koncheħa tjákini tsjehe éxi ijnko xro esmeralda. ⁴ A ntá kjaxin jnkotatjen tí trono k'uikuán í so veinticuatro trono kjaxin tjetótjaxin veinticuatro sín táda, iké sín la tjóá la ko tjejóya kja sín corona tsik'óna chica oro. ⁵ A ntá tí trono kuénte Dios la ntiha sí'axrxjén tí síjtónkixin la ko síjtonta. A ntá nkayakon tí trono a kjaxin tjejóche yato xroħi la mé tí yato Nchakuen Dios. ⁶ A ntá nkayakon tí trono la kjaxin itjen ijnko ntayaon éxi xroxro tsjehe.

A ntá tí jnkosiné la ko jnkotatjen tí trono tjejó noó nkexro tjejóħón chóna nchónhya ikon nkayakon la ko nóton. ⁷ A ntá tí nkexro tjeħón k'uikuán saoxin mé éxi koxra tsjehe. A ntá tí nkexro yóxin tóyóħe éxi koxinta, a ntá tí nkexro nixin tsjehe éxi chojni. A ntá tí noóxin la éxi kotjuanhko xritjaká tsjehe. ⁸ A ntá jnkoinko tí noó nkexro tjejóħón chóna injon kanenge sín la chóna nchónhya ikon nóton la ko nkaxenhen, la nchakotjin la ko tie títøehya sín ntáchro sín kixin:

Santo, santo, santo,

İnchéni Dios, jaha chonta kaín kjuachaxin,

jaha xráxin tjen la ko itjen ijie la ko jaha ts'inka inaá.

⁹ A ntá tí nkexro tjejóħón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehe sín ch'án chjehe sín kjuasáyé tí nkexro tjetjaxin tí trono mé tí nkexro tjeħón jnkochrixin. ¹⁰ La ntá tí veinticuatro tí sín táda tjejóxin toħ'in sín nkayakon ch'án ntiha la tjikosáyehe sín tí jehe ch'án kixin jehe ch'án tjeħón jnkochrixín la ko tjakjinjin sín corona tjoka sín tí tjen tí trono la ntáchro sín kixin:

¹¹ İnchéni Dios kuéntení, jaha la imá jına la t'ayéħe kjuasáya kixin tjikosáyahani tí jaha kixin tí kjuachaxin chonta;

kixin jaha kjuħ'ena kaín nkehe síin kixin jaha kóxrjínhan xikaha k'óna.

5

Tí libro la ko tí Kolélo

¹ A ntá tí tja chjina tí nkexro tjetjaxin tí trono, k'uikuán ijnko libro mé tsikjin sín nkaxenhen la ko nóton la ko mé tsikjéxin yato sello. ² La k'uikuán ijnko ángel chóna kjuachaxin ntá kjuanchankí ch'án itsen ntáchro ch'án kixin:

—¿Nkexro tí jına chrókuacha chrókuakitjehe tí libro la ko chrókóħritøn tí sello chóna?

³ La ninkexró ní nkajní o ní chjasintajni o ní chrínki nonte tsjachahya tsakitjehe tí libro la ní komáhya sín. ⁴ A ntá janhan la imá tsjanka kixin naħa tónoxínhya ninkexró chrókuacha chrókuakitjehe tí libro o chrókuinchekuáxin tí libro o chrókomá nkehe tí ntáchro tí libro. ⁵ Ntá ijnko tí sín táda ntá nixjana ntáchro kixin:

—Tsjankahya, tsjeħe ntihi tí Koxra k'uaxrxjenixin Judá la ko tsík'axrxjenixin rey David. Mé kjuacha la ó tsjacha tsakitjehe tí libro la ko tsóħritøn tí yato sello —ichro ch'án.

⁶ A ntá jnkosiné tí trono la ko tí tjejó tí noó tí nkexro tjejóħón la ko jnkosiné tí tjejó tí sín táda ntaha mé k'uikuán tjeħín toté ijnko Kolélo tsjehe éxi tsik'óyan sín mé chóna yato ntéħe la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuénte chjasintajni. ⁷ A ntá tí Kolélo a kuákja tí libro itjen tja chjina tí nkexro tjetjaxin tí trono. ⁸ A ntá tió k'uáyéħe ch'án tí libro la ntá tí noó sín tjejóħón la ko tí veinticuatro tí sín táda k'uejóxin toħ'in sín nkayakon tí Kolélo. A ntá kaín tí jehe sín chóna sín ison arpa la ko xraá sín ihnti tsik'óna chica oro tsikaon chjincø. Tíha mé oración nixjehe Dios kaín tí sín tsikjinchetjóá ch'án. ⁹ Itse sín nkehe nixin ntáchro kixin:

Jaha mé ijnko nkexro jına kjuacha kuákja tí libro la ko kóħritúan tí sello;

kixin tsík'óyan sín tí jaha la ko tí ijniá k'ueñaxian tí jeheni ts'áyéħe Dios,

mé ts'áyéħe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsikjich'énani reyes la ko nħat'á sich'eħeni xra Dios kuéntení,

la ko jaha tsikjánjuan kjuachaxin ts'etøanni chjasintajni.

Mé xikaha ichro sín.

¹¹ Ntá tuénxín k'uíkuan la ko kuñhan itén nchónhya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín. ¹² Itsen nixja sín ntáchro sín kixin:

Tí Kolélo tsik'óyán sín,
tíha mé kjuacha k'uáyéhe kjuachaxin ts'etqan la ko k'uáyéhe tí nkehe tjete kuénte Dios,
la ko tí kjuaxrexinkaon jína la ko kjuachaxin sich'e xra
la ko mé xikaha tjikosáyeheni ch'án.

¹³ Kjaxin kuñhan kixin kaín nkehe kjuich'éna Dios síin nkajní la ko chjasintajni la ko tí nkehe síin chrínki nonte la ko kaín nkehe síin ntayaon la kaín tíha mé ntáchro kixin:
Chjéheni kjuasáya tí nkexro tjetjaxín tí trono la ko tí Kolélo
kixin chóna kjuachaxin jnkochrixín.

¹⁴ A ntá tí noó sín tjejóchón ntáchro sín kixin:

—Xikaha tsonhen. Amén.

La ko tí veinticuatro tí sín táda k'uejoxin toch'in sín la chjéhe sín kjuasáyé tí nkexro tjechón jnkochrixín.

6

Tiyato sello

¹ A ntá k'uíkuan kixin tí Kolélo kóchrítón tí xránkixixín tí yato sello ntá kuñhan ijnko tí noó tí noó tí sín tjejóchón nixja ch'án éxi kjóna, la ntáchro ch'án kixin:

—Xrákiá tsjehé.

² Ntá k'uíkuan ijnko kokate tjóá. A ntá tí nkexro tjejen tí kokate chóna ch'án ijnko arco tí tja ch'án la tsik'áyéhe ch'án ijnko corona. Jehe ch'án mé kjuacha ch'án la naxa xikjacha ch'án inaá.

³ A ntá tí Kolélo kóchrítón tí yóxin sello ntá kuñhan tí nkexro yóxin tjechón ntáchro kixin:
—Xrákiá tsjehé.

⁴ Ntá sákjuí í jnko kokate kjátse. A ntá tí ch'in tjejen k'uáyéhe ch'án kjuachaxin tsjakjín tí kjuaxróxin síin chjasintajni kixin ntá chojni mé ts'óyán kichó sín kixin jehe ch'án mé tsik'áyéhe ch'án ijnko espada ijíé.

⁵ A ntá tí Kolélo kóchrítón tí nixin sello la ntá kuñhan nixja tí nixin nkexro tjechón ntáchro kixin:

—Xrákiá tsjehé.

Ntá k'uíkuan ijnko kokate tié. A ntá tí nkexro tjejen tí kokate chóna itja ch'án ijnko báscula. ⁶ La ntá kuñhan itén ijnko nkexro jnkosiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókjujnek'itjáyanhya tí aceite la ko tí vino. (Tíha mé t'axrxén tsokjinta.)

⁷ A ntá tí Kolélo kóchrítón tí noóxin sello ntá kuñhan tí noóxin tí nkexro tjechón ntáchro kixin:

—Xrákiá tsjehé.

⁸ Ntá k'uíkuan ijnko kokate sine. A ntá tí ch'in tjejen va a mé it'in ch'án Muerte. A ntá nóton tí jehe ch'án la ikui nkehe tóyóhe tí tjejó tí sín tsik'en. Jehe ch'án k'uáyéhe kjuachaxin ts'etqan ch'án noóxin parte chjasintajni kixin ntá ts'óyán kichó sín la tsokjinta la ko ts'énxin sín ichin la ko kaín ko jehe síin chjasintajni mé tsjáya va.

⁹ A ntá tí Kolélo kóchrítón tí n'óxin sello ntá k'uíkuan chrínki tí altar tí asén tí sín tsik'énxin tí tan kuénte Dios tsichrónka sín. ¹⁰ Ntáchro sín itsen kixin:

—Jaha mé Inchéni tjóá jína la jaha mé sijnchexiteyá tí nkehe tsintáchrúa, ¿la nkesá sijnchekitoexián ijíé tí sín síin chjasintajni tsik'óyán tí jeheni? —ichro sín.

¹¹ A ntá tí sín a mé k'uáyéhe sín iké sín tjóá ntá k'uituenhen sín naxa ts'ok'éhe sín í so yaon tsoxetajia tí número tí kichó sín ch'ehe xra Cristo naxa ts'énxin sín éxi k'uén tí jehe sín.

¹² A ntá tí Kolélo kóchrítón tí injonxin sello ntá xrínahya imá kuínki nonte. A ntá tí yaon la kótié éxi ika tjiko chojni tsik'en. A ntá nitjó k'óna kjátse éxi jnj. ¹³ A ntá konotsé sit'ánótjénxin nkajní sitjitsínka nonte éxi yóhe tí inta t'óna to higo la sixénjin tí to yoa tió tsjixraya tí nta kixin tí imá fuerte chjéhe xrinto. ¹⁴ A ntá nkajní k'uitjayan éxi ijnko xroon tsixréya. Ntá kaín jna la ko tí nonte ntsínsi síin jnkosiné ntayaon sákjuí ókjé. ¹⁵ A ntá kaín tí sín reyes síin chjasintajni la kjaxin tí sín t'etqan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhi mé k'uixenhen sín tqo síin nteje ts'ejómaxin sín. ¹⁶ Ntáche sín tí jna la ko tí tqo kixin:

—Xrákiá xrátja tí jeheni nchemáni kixin chrók'uikonhyani tí nkexro t'etqan tjetjaxín trono la ko chrókjuasótehyani tí kjuachrakon jíé tsjanjon tí Kolélo.

¹⁷ Kíxin ó kui tí yaon imá jié kuènte kjuachrakon la, ¿xá nkexro chrókjuacha chrók'uejó ntiha?

7

Tí sín israelita chóna sello

¹ A ntá chr'èxin k'uikuán noó sín ángel tjejóxin toté sín la jnkoinko sín tjejó sín tí chrínta chjasintajni chónetehe sín tí noó xrintó kíxin tsochjéhya xrintó chjini chrítaón chjasintajni la ko ní chrítaón ntayaon la ko nijnko tí nta yoa. ² Kjaxin k'uikuán í jnko ángel kjuixín nó tjtóxin yaon la chóna sello kuènte Dios tjechón. Ntá tí ángel mé k'uíyehé ch'án itsen tí noó ángel tsík'áyéhe kjuachaxin sincheníhi nonte la ko ntayaon. ³ Ntáchro ch'án kíxin:

—Náhi, sincheníehya nonte la ko ntayaon la ko kjaxin tí nta la náhi tí naxá tsíkaha sello totjen tí sín ch'ehe xra Dios kuènteni.

⁴ Kuñhan tí número tí sín tsika sello la me ciento cuarenta y cuatro mil kain tí sín tsík'axrjeníxin tí sín israelita. ⁵ Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin Rubén la ko teyó mil tí sín tsíka sello tsík'axrjeníxin sín Gad ⁶ la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés ⁷ la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Levi la ko teyó mil tí sín tsíka sello tsík'axrjeníxin Isacar ⁸ la ko teyó mil tí sín tsíka sello tsík'axrjeníxin sín Zabulón la ko teyó mil tí sín tsíka sello tsík'axrjeníxin José la ko teyó mil tí sín tsíka sello tsík'axrjeníxin sín Benjamín.

Sín nchónhya chojni chóna ka tjóá

⁹ Ntá kjuixín tíha ntá k'uikuán nchónhya chojni kaín xín nación la ko kaín xín nkexri tsjehe sín la ko kaín xín nkíva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín. ¹⁰ Kaín sín itsen nixja sín ntáchro sín kíxin: Dios kuènteni mé kjuíncheakaáni.

Jehe ch'án mé tjetjaxín tí trono tí tjen tí Kolélo kjuíncheakaáni.

¹¹ Kaín tí sín ángel tjejóxin toté sín jnkotatjen tí trono la ko jnkotatjen tí sín táda la ko tí noó sín tjejóchón la ntá k'uejóxin toch'in sín la k'uísen sín hasta káxin ikja sín nonte nkayakon tí trono la tjanchehe sín kjuasáye Dios. ¹² Ntáchro sín kíxin:

Amén. Kjuíncheyaonni Dios la tsochjéheni Dios kjuasáya kíxin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuènte ch'án kíxin tjinkítsani ch'án jnkochríxin. Amén.

¹³ A ntá íjnko tí sín táda kjuanchankina, ntáchro kíxin:

—A ntá tí sín tjejóya ika tjóá la, ¿xá nkexro tíha? la ko ¿xá nketí tsík'jixín sín?

¹⁴ Ntá janhan ntáxrjan kíxin:

—Ínchéni, jaha ó noha. Ntá jehe ch'án ntáchro ch'án kíxin:

—Tí sín í tsík'jixín sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkótjuáxin íjnje tí Kolélo. ¹⁵ Méxra xíkaha ntá íjie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen nínko kuènte ch'án. A ntá tí nkexro tjetjaxín chrítaón tí trono mé t'ayakonhen ch'án sín. ¹⁶ A ntá tí sín a mé ts'enixinhya sín kjinta la ko ts'enixinhya sín ínta la ko tsochjánxinhya sín yaon la ko ní sóa kohya nkehe sich'ehe sín. ¹⁷ Kíxin tí Kolélo tjen jnkosíné tí trono mé t'ayakonhen ch'án tí jehe sín éxi iko kuènte ch'án la ko sájtjiko ch'án tí tjáá ntá tjanjon kjuachón la Dios mé sinchexamá kain tí ntakon tí jehe sín.

8

Tí yatóxín sello la ko tí ihnti oro

¹ A ntá tí Kolélo kóchrifón tí yatóxín sello kuènte tí libro la ntá kohya ninkehó ruido nkajni chjina it'ó hora. ² Ntá tuénxin k'uikuán yato ángel tjejóxin toté nkayakon Dios la jnkoinko sín k'uáyéhe sín jnkoinko trompeta. ³ Ntá chr'èxin ikui í jnko ángel xraá ihnti tsík'óna chica oro la kjuák'exin toté nkayakon tí altar. K'uáyéhe ch'án nchónhya chjincó tsjak'e ch'án kíxin sátsjiko tí oración kuènte kaín tí sín tsíkjinchetjóá Dios kíxin tsjak'e chrítaón tí altar oro nkayakon tí trono. ⁴ A ntá tí ihnchi kuènte chjincó chríinxín tja tí ch'ín ángel tí tjen Dios la ko kjaxin tí oración kuènte chojni tsíkjinchetjóá Dios. ⁵ A ntá tí ch'ín ángel kuákja ch'án tí ihnti kjuíncheakaón ch'án xrinta kuènte xrohi kuènte tí altar la ik'ue ch'án chjasintajni. La ntá kjóna la ko nchónhya ruido la ko sítjónkíxin la ko kuínki nonte.

Tí trompeta

⁶ A ntá tí yato ángel mé chóna sín jnkoinko trompeta ó yaxinhin sín kíxin ts'ánoa sín.

⁷ A ntá tí ángel saoxín k'uánoa trompeta ntá k'uániá toni la ko xrohi tsinkíkjan jni mé xíkaha ikui chrítaón chjasintajni. A ntá iche nixin parte nonte la ko nixin parte tí nta la ko kaín tí kayoa síin.

⁸ A ntá tí yóxin ángel k'uánoa trompeta la ijnko nkehe yóhe tsjehe éxi ijnko jnā jíe tjeche la sákjuí kjuánki ntayaon la ntá nixin parte tí ntayaon la k'óna jni. ⁹ A ntá tí nixin parte kaín tí nkehe síin tí ntayaon la ik'uén la ko nixin parte kaín tí ntabárcō la xíka.

¹⁰ A ntá tí nixin ángel k'uánoa trompeta la ntá xríñahya k'uánótjen ijnko konotsé jíe k'uánótjenxin nkajni mé tjeche éxi ijnko xrohi jíe. K'uánótjen chrítaón nixin parte ntario la ko tí sí'taxrje nta. ¹¹ Tí konotsé mé it'in Itsjá la tsíkjaníki nixin parte tí nta ntá kótsjá tí nta la nchónhya chojni ik'uén kixin tí nta xíkaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijnko nixin parte tí yaon la ko nixin parte tí nitjó la ko nixin parte tí konotsé. Méxra tí nixin parte kuitóhe sítié la í kohya t'inkaséyan tí nixin parte tí nchakotjin la ko tí tie.

¹³ Ntá tuénxin k'uikuán la ko kuínhan ijnko ángel tjetjaká jnkosiné nkajni t'eya ch'an itsen, ntáchro ch'an kixin:

—Noa tí sín tjejó chjasintajni tío tsontáchro tí trompeta ts'ánoa tí iní ángel inaá.

9

¹ A ntá tí n'óxin ángel k'uánoa trompeta la k'uikuán ijnko konotsé tsik'ánótjenxin nkajni chrítaón chjasintajni ntá k'uáyéhe tí llave kuente tí tóye nínka. ² A ntá tuénxin xitjehe tí tóye nínka ntá ntiha chriínxin nchónhya ihnchi kuente tja ntá tí t'inkaséyanxin yaon la ko tí xrintō k'uúxin tié kixin tí ihnchi kuente tí tóye. ³ A ntá tí ihnchi mé k'uaxrxén kochjōa xritjaká chrítaón chjasintajni. A ntá tí kochjōa k'uáyéhe kjuachaxin éxi tí chóna konchjā síin chjasintajni. ⁴ K'uituenhen va kixin sincheníehya va tí kayoa síin chjasintajni la ko ninkehó nkehe yoa la ko ninkehó ntayoa. Jehó chojni chónthya sello kuente Dios tí totjen mé sincheníhi va. ⁵ Kjánchó k'uáyéhya va kjuachaxin ts'óyan chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxi chojni tsíkjinéhe konchjā. ⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjónté tjinkaon sín chrók'uen sín la tí muerte sátsíkji ókjé.

⁷ A ntá tí kochjōa éxi kokate tsjehe, listo tjen sátsjikjanjon va. A ntá tí ikja va itjen nkehe tóyóhe ijnko corona tsik'lóna oro la ko tí kàré la tóyóhe éxi kàré chojni. ⁸ A ntá tí kaxree va tsjehe tóyóhe éxi kaxíhi chojni chjin, a ntá tí neno va la tóyóhe neno koxra. ⁹ A ntá tí cuérpōe la tjejanjin nkehe tsik'lóna chica kixin kohya nkehe tsonhen va. A ntá ruido kuente kanenee la éxi nchónhya carro tinkánákjen kokate tío xritinká tí síin kjuanínkaon. ¹⁰ A ntá tí ntané va mé tsjiate chojni la éxi ntané konchjā, la tíha mé tsochóna kjuachaxin sincheníhi chojni hasta in'ó nitjó. ¹¹ A ntá tí kochjōa mé chóna ijnko nkexro t'etgan mé ijnko ángel kuente tí tóye nínka. Tí ángel mé nkíva hebreo mé it'in Abadón la nkíva griego la mé Apolión mé t'axrxén kixin táha mé sinchek'itjāyan nkehe.

¹² Mé xíkaha kónhen tí kjuachrakon xrankixín. A ntá naxa t'itjāyan yaá inaá.

¹³ A ntá tí injonxin ángel k'uánoa trompeta la kuínhan ijnko itén nkexro k'uaxrxén tí tjejó tí noó ntéé kuente tí altar oro tí tjen Dios. ¹⁴ A ntá tí itén tí nkexro ntáche tí injonxin ángel chóna trompeta kixin:

—Tjasintankehé tí noó ángel kuente tí jínahya tjejóchroé chjinaxón tí ntario jíe it'in Eufrates.

¹⁵ Ntá xíkaha xintankehe tí noó sín ángel kixin ts'óyan sín tí nixin parte chojni. Mé xíkaha yaxínhin sín sátsji sín tí hora la tí yaon la tí nitjó la tí nánó. ¹⁶ Ntá kuínhan tí número tí soldado la ko tí kokate la doscientos millones.

¹⁷ Mé xíkaha xríñahya k'uikuán tí kokate. A ntá tí sín tjejójen kokate la tí ntakuin sín chóna nkehe tsik'lóna chica kjátse la azul la sine. A ntá tí kokate la ikja la éxi kja koxra la tí ir'va la k'uaxrxén xrohi la ko ihnchi la ko azufre. ¹⁸ A ntá nixin parte chojni tsik'enxin tí iní clase tí chin tsik'axrxén ir'va kokate mé xrohi la ihnchi la azufre. ¹⁹ Tí kjuachaxin chóna tí kokate la k'uaxrxén ir'va va la ko tí ntané va. A ntá ntané la éxi konche tsjehe la tí kja va mé sincheníhi chojni.

²⁰ A ntá tí í so chojni kuitóhe k'uénxinhya tí chin a la kjónté kjuinkíhya sín tí nkehe tjenkayáxin sín la kuitóehya sín tinkáchónki sín nchakuen jínahya la ko tí nkehe tsíkjanoya chica oro la ko chica plata la ko chica bronce la ko ixrō la ko inta, mé tí nkehe t'ikonhya la ko tienhya la ko tjíhya. ²¹ La kjónté xíkaha la kuitóehya sín tí nkehe jínahya ch'e la ko tí chrók'óyan kichó la ko tí nchekjiko kichó la ko tí chóna sín chojni chjin ókjé la ko tí tjinkaon sín chrókúeé.

10

Ijnko ángel la ko tí librito nsí

¹ Ntá k'uíkuan í jnko ángel imá chonta kjuachaxin k'uínkajinxin nkajní tjenkakjan ch'án tjuj la ko ijnko konchecha chrítaón tí kija ch'án. A ntá tí kàré ch'án imá tjákiní tsjehe éxi yaon, a ntá tí toté la éxi xrohi síchr'ákjen. ² Tjexraá ch'án ijnko libro ntsí tjexrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche. ³ Ntá xrinahya k'uèya ch'án itsen éxi ijnko koxra tsjánka va tí tónínkaon va mé xikaha k'uèya la yato kjóna kjuatéya tí itén ch'án. ⁴ Ntá kjuixin ntáχρο tí yato kjóna la chrókjan ntá kujnhan ijnko itén nkexro nkaya nkajní ntáχρο kixin:

—Chróchronkahya tí nkehe ntáχρο tí yato kjóna la ko ni chrókjinhya tíha.

⁵ Ntá tuénxin tí ángel k'uíkuan ijnko toté tjekjen ntayaon la ijnko toté tjekjen nche ntá kjuaya tja chjina nó nkajní. ⁶ Ntá kjuasin ch'án testigo tí nkexro tjan jnkochríxin mé tí nkexro a mé kjuích'ena nkajní la ko chjasintajni la ko ntayaon la ko kaín xin nkehe siín la ntáχρο ch'án kixin:

—Í séhya má naxa tsoxrjen ⁷ ntá tsjixraká tí yaon tí yatoxin ángel ts'ánoa trompeta ntá tsoxitéya tí nkehe jého Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchronka sín itén ch'án.

⁸ A ntá tí itén nkexro kujnhan k'uaxrjéxin nkaya nkajní ntá xínixjana inaá ntáχρο kixin:

—Sátjia tákjá tí libro ntsí tjexrankehe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjua kjuáncháha tí ángel tí libro ntsí ntá jehe ch'án ntáχρο ch'án kixin:

—Tákjá la inte. A ntá tí ir'va la tsqxé éxi tsjen kjánchó tí tsaa la tsotsjá.

¹⁰ Ntá kuákjaá tí libro ntsí tjexraá tí ángel ntá kjoné. A ntá ir'va kóxe éxi tsjen ntá chr'éxin la kótsjá nkaya tsena. ¹¹ Ntá tuénxin k'uétuanna ch'án kixin:

—Inaá tsochronkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjina ch'án ijnko ntavara éxi tji tsjehe tsjáχροaxián ntá ntáχρο ch'án kixin:

—T'áyá tjáχροa nkaxenhen njnko kuénte Dios la ko tí altar la tékia nkekjain nkexro tjejó ntiha tinkáchónki Dios. ² Kjánchó tí ntásin itjen ntója njnko la tjáχροahya kixin táha ó tsík'áyéhe tí sín tsíkjinjin kjin la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó. ³ A ntá mé janhan tsochr'an iyó testigo kuéntana tsonixjajinxinna mil doscientos sesenta yaon. Tí iké sín la ika tié ts'ejóya sín.

⁴ Tí yaá testigo í mé iyó nto olivo la ko iyó candelero tjejó tí tjan Ìnchéni kuénte chjasintajni.

⁵ A ntá tí jnkojin sín tjínkaon sich'ehe sín daño la jehe sín la xrohi ts'axrjéxin ir'va sín la tsoche kain tí sín nínkakonhen sín la mé xikaha its'en kain tí sín tjínkaon sich'ehe sín daño tí jehe sín. ⁶ A ntá tí testigo í chóna kjuachaxin ts'íkjehe nkaya nkajní kixin í ts'aniáhya chrin tí tsonixja sín kuénte Dios la ko kjáxin chóna sín kjuachaxin tsonátche sín tí ntá kixin ts'óna jni la ko sinchekjasótéxin sín chojni chjasintajni nchónhya clase chin nchónhya veces éxi tí tjínkaon sín. ⁷ A ntá tí kjuixinhin sín tí xra ntá tí ko jiehe ts'axrjéxin tí tóye njnka mé tsjankáxin tsjanjonko tí jehe sín ntá tsjacha va ts'óyan va tí jehe sín. ⁸ A ntá tí cuérpóé sín tsitqhe sítsinka tí calle kuénte chjasin jieé tí tsíkjak'enkanı sín Ìnchéni ntacruz mé tí chjasin mé kjáxin nchek'in sín Sodoma la ko Egipto. ⁹ A ntá iní yaon ko t'lo la kaín chojni itsjé chjasin la ko kaín nkexrí tsjehe sín la ko nchónhya nkiva la ko nchónhya nación ts'ikon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a. ¹⁰ A ntá tí sín tjejó chjasintajni tsochéhe sín kixin xikaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kixin xikaha ik'uén tí yaá sín k'uéchronka itén Dios kixin jehe sín kjuaxróxinhya k'uék'ixin sín tí chjasintajni tí k'uék'ejó tí sín a. ¹¹ A ntá chr'éxin ó k'uátsínka iní yaon ko t'lo la ntá Dios kjuínchexechón tí iyó tí sín a inaá la k'uáya sín inaá la ntá kain chojni k'uíkon la imá chrakon sín. ¹² Ntá tuénxin tí iyó sín testigo kuínhin sín ijnko nkexro nixja itsen nkaya nkajní ntáχρο kixin:

—Chriyan xrákiá antsí ntiha.

Ntá chríinxin sín nkajní ijnko tjuj. A ntá kaín tí sín nínkakonhen sín la k'uíkon sín kixin xikaha kónhen sákjuj tí iyó sín a. ¹³ Ntá tuénxin imá kuínki nonte la ntá ijnko ite parte chjasin ntiha la k'uújtáyan la yato mil chojni tsík'en kixin tí kuínki nonte. A ntá kaín tí sín xéhe imá chrakon sín la kjuankáxin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxíkaon la ntá tuénxin itsi tí nixin kjuachrakon inaá.

Tí yatoxin trompeta

¹⁵ A ntá tí yatoxin ángel k'uánoa trompeta ntá kuínhin sín ijnko tan nkajní itsen ntáχρο kixin:

Ἀ ντά τί σίν κ'υάyéηε κjuachaxin kuènte chjasintajni la ó κjaxin nchexiteyéηε σίν

Ἰνchéni Jesucristo

kixin jehe Jesucristo mé ts'etōan ch'án jnkochrixín.

¹⁶ Ἀ ντά τί veinticuatro tí σίν táda tjejójtjaxin σίν trono nkayakon Dios la mé k'uísén σίν hasta káxin ikja σίν nonte la tjanchehe σίν kjuasáya Dios. ¹⁷ Ntáchro σίν kixin:

Tjáhani kjuasáya jaha Ἰνchéni Dios imá chonta kjuachaxin.

Jaha itjen la ko xráxin tjen la ko jaha ts'inka inaá.

Kixin jaha k'uayéηé κjuachaxin jié kixin xráxin tétōan.

¹⁸ Ἀ ντά kaín tí naciόν kónínkaon,

a ntá ó kui tí yaon jaha sìnchekjasóte σίν

la ko κjaxin jaha sìnchekitōexián ijié tí σίν tsík'en

la ko tsjénkehé tí σίν kjuít'aha xrá chrónkaxín itán

la ko tí σίν ó κjuínchetjóá la ko tí σίν κjuikosáyehe tí ihniá,

mé tí chojni nteto la ko tí σίν chánjan ntsíntsi.

Jaha tjoka sìnchek'itjáyan tí σίν chrókjuinçek'itjáyan chjasintajni.

¹⁹ Ἀ ντά xitjeηé tí nñkōe Dios tjen nkaya nkajni, a tí nkaxenhen kónoxín tí caja tjinká tí nkehe tsík'etōan Dios. Ἀ ντά sítjónkixin la ko nchónhya ruido sítjonta la ko kuínki nonte la ko imá tsanká k'uániá toni.

12

Tí chojni chjin la ko tí dragón

¹ Ἀ ντά kónoxín nkajni ijnko kjuaxroan jié mé ijnko chojni chjin iké tjákini éxi yaon tsjehe la chrínki toté tjan itjen nitjō. Ἀ ντά tí kja tjan tjenkáya ijnko corona chóna teyó konotsé.

² Ἀ ντά tí chojni chjin a mé tjejá tjan la t'eya tjan kixin tjeté tjan kixin sìnchekokjilhi tjan

xjeen tjan. ³ Kjaxin kónoxín í jnko kjuaxroan nkajni mé ijnko dragón kjátse chóna yato kja

la ite ntéé la jnkojnko corona jnkojnko kja. [Tí dragón mé ijnko kots'aja jié.] ⁴ Tí ntané mé

nkánákájen nixin parte konotsé kuènte nkajni la ik'ue chrítaón chjasintajni. Ἀ ντά tí dragón

kjuák'e chók'èxin tí tjen tí chojni chjin mero tsokjilhi xjeen kixin tjínkaon tjoka chrókjōe tí

xjan tsokjilhi. ⁵ Ἀ ντά tí xjan kjuínchekokjilhi tjan mé xjan ntoa kixin jehe ch'án mé ts'etuenhen

ch'án kaín naciόν la tsochóna ch'án ijnko vara chica ts'etōanxín ch'án. Ntá tí xjeen tjan la

mé Dios sákjuiko tí tjen ch'án t'etōan ch'án. ⁶ Ἀ ντά tí chojni chjin la kuínká tjan sákjuí tjan

nteje kixin tsíkjincheyóxin Dios nketi sátsji tjan kixin ntaha tsoxranjon nkehe sine tjan mil

dos cientos sesenta yaon.

⁷ Ntá chr'èxin xrinahya k'uixín kjuanínkaon jié nkajni la mé tí arcángel Miguel la ko tí

í so ángel xriko ch'án mé kjuánjonko σίν tí dragón, la tí dragón la ko tí ángel kuènte mé

kjuánjon σίν. ⁸ Kjánchó κjuachahya tí dragón la kohya lugar kuènte nkaya nkajni. ⁹ Mé

xíkaha kuakítsjexín σίν tí dragón nkajni. Jehe mé tí konche ósè ikjí mé nchek'in σίν diablo

la ko Satanás. Jehe mé k'uékjich'iyehé tí chojni kuènté chjasintajni. Jehe la ko tí σίν ángel

kuènte k'uaxrjexín ntaha la kjuítsinka chjasintajni.

¹⁰ Ntá kuínhan itén ijnko nkexro nkaya nkajni itsen nixja ntáchro kixin:

—Ó kui tí tsaáxinni tí κjuachaxién tí Dios kuènténi la ko tí κjuachaxin t'etōan Cristo

kixin ó k'uaxrjexín nkajni tí nkexro t'eka jié tí kichó ni mé kjuanchia jié nchakotjin la

ko tie nkayakon Dios kuènténi. ¹¹ Tí σίν kichó ni la kjuacha σίν kuaáxin σίν kixin tí ijnié

tí Kolélo k'uitji la ko kixin jehe σίν chrónkaxín σίν tí tan tsík'áyehé σίν la chrakonhya σίν

kjónaté chrók'uenxín σίν. ¹² Ἀ ντά jie la tócháhará kaín rá tjejorá nkajni. Ntá nòa tí σίν tjejó

chjasintajni la ko ntayaon kixin k'uínkajin tí ch'ín diablo la imá nínkaon ch'án kixin ó nohe

ch'án kixin í kánhyó sé tsjak'e ch'án.

¹³ Ntá tí ch'ín dragón ó nohe kixin k'uánótjenxin nkajni ikui chjasintajni ntá sákjuíchréhe

tí chojni chjin chóna tí xjan ntoa kixin chrókjuinçek'itjáyan tjan. ¹⁴ Kjánchó tí chojni chjin

k'uyéηé yaá kanēēē kuènte kotjuanhnko ijié kixin jina tsjaká tjan sátsji nteje kixin ntá ikjin

tsitōhe tí konche. Sátsji tjan kixin ntaha tsoxranjon nkehe sine tjan ini nánó ko t'ō. ¹⁵ Ἀ ντά

tí konche mé k'uaxrjexín ntá ir'va kixin ts'óna ijnko ntario kixin tjínkaon va chrók'uatjōáko

tí tjan a tí ntá a. ¹⁶ Ἀ ντά tí nonte kjuínkítsa tí tjan a kixin xitjeηé ir'va nonte la kaín tí ntá

k'uaxrjexín ir'va tí konche la ntahó sákjuí k'uixenhen. ¹⁷ Ἀ ντά tí dragón la imá kónínkakohen

tí tjan a ná imá kónínkaon kjuánjonko tí í so σίν naḡa kjéhya tí tjan a kixin naḡa titekaon σίν

tí nkehe tsík'etōan Dios la naḡa tinkáchónki σίν tí nkehe tsíchrónka Jesucristo.

13

Tí yaá bestia

¹ Tí κjuak'é chrínta ntayaon ntá ntaha k'uíkuañ chriinxín ijnko bestia chóna yato kja la ko

ite ntéé chojni t'ántaxínjin Dios. ² Tí bestia k'uíkuañ mé tóyōhē kotigre la chóna toté éxi toté

ko oso la ko tí ir'va la éxi ir'va koxra. Tí dragón kjuanjon kjuachaxin imá ts'et'əoan tí bestia a. ³ A ntá ijnko kja tí bestia chóna ijnko ts'ichrít'ə jíé chóna chrók'uenxín ntá tsíkitohe jina ntá kuenté chjasintajni la chrakon chojni ntá chréhe sín tí bestia. ⁴ Kjuikosáyehe sín tí dragón kixin jehe kjuanjon tí kjuachaxin k'uáyéhe tí bestia ntá kjaxin kjuikosáyehe sín tí bestia la ntáchro sín kixin:

—Xá nkexro chrók'oyóhe tí bestia la xá nkexro chrókjuacha chrókjuanjonko tí jehe?

⁵ Kjaxin tí bestia k'uáyéhe kjuachaxin tsontáchro kixin chóna kjuachaxin má la ts'ántaxínhin Dios la tsochóna kjuachaxin cuarenta y dos nitjó. ⁶ Ntá mé xikaha kjuich'e k'uántaxínhin Dios la ko k'uántaxínhin ihnjé Dios la ko k'uántaxínhin tí nínko tjen nkaya nkajni la ko kaín tí sín tjejó ntiha. ⁷ Kjaxin tsik'áyéhe kjuachaxin tsjanjonko tí sín tinkáchonki Dios hasta tsjacha ts'et'ueñhen tí sín ntá k'uáyéhe kjuachaxin ts'et'ueñhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nació. ⁸ A ntá tí bestia mé kaín xín chojni síin chjasintajni mé tsjikosáyehe sín tí bestia. Tí chojni a mé ts'inixínhya ihnjé tí k'óna chjasintajni, mé ts'inixínhya ihnjé sín tí libro ts'inixín ihnjé tí sín tsaá. Tí xroon a mé chóna tí Kolélo tsik'óyán sín.

⁹ La jnkojin nkexro tjinkaon chrókuinhin la chrókuinhin tíhi. ¹⁰ Tí nkexro sátsjiko tsjik'ikjehe í so chojni la kjaxin ch'an ts'ikjehe ch'an la tí nkexro tsjayaxin espada la kjaxin espada ts'enixín. A ntá tí nkexro tinkáchonki Dios la t'ichjánxin tsonínakonhya la ko tsochóna fe.

¹¹ A ntá chr'éxin k'uikuán í jnko bestia k'uaxrxéjin nonte, chóna yaá ntéé éxi tsjehe ntéé coronta la mé nixja éxi nixja tí dragón. ¹² Tí bestia la chóna kaín xín kjuachaxin éxi k'uéchóna tí bestia saoxín tí k'ué la t'etueñhen tí sín síin chjasintajni kixin tinkáchonki sín tí bestia saoxín mé tí bestia ts'ichrít'ə kja ntá tsíkitohe jíina. ¹³ Kjaxin kjuasin kjuaxroan jíé hasta xrohi k'uánótjexín nkajni ikui nonte ntá nchónhya chojni k'uikonxín kon sín kixin xikaha kónhen. ¹⁴ Mé xikaha tí bestia tsik'áyéhe kjuachaxin kjuasin kjuaxroan tí tjen tí bestia saoxín la kjuich'iyehe nchónhya chojni síin chjasintajni. La ntá k'uetueñhen tí sín síin chjasintajni sich'éna sín ijnko nkehe tsikjanoya éxi yóhe tsjehe tí bestia ts'ichrít'əoxín espada la kjónté xikaha naxa kjuak'echón. ¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsikjanoya tóyóhe tí bestia saoxín kixin ntá tí nkehe tsikjanoya la jina tsonixja la ko jina ts'et'əoan its'en kaín nkexro tinkáchonkihya tí jehe. ¹⁶ Kjaxin ts'et'əoan kixin kaín chojni tsochóna marca, á chojni hyé ə chojni ntsintsí, la á chojni rico, la á chojni nòla la á chojni ch'exón xra la ko chojni náhi, mé kaín sín tsochóna sín marca, á tja sín chjina ə totjen sín. ¹⁷ Ntá ninkexró xitjahya ts'ena la ko ninkexró xitjahya sinchekji tí chónthaha sín marca ə ihnjé sín tí bestia ə chónthaha sín número kuente ihnjé tí bestia. ¹⁸ T'ichjánxin chrókienxínrá tíhi. Tí nkexro tienxín la chrókónohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uikuán tí Kolélo tjexín toté chrítaón tí jna Jerusalén. Jehe ch'an tjeko ch'an ciento cuarenta y cuatro mil chojni ts'inixín totjen sín ihnjé tí Kolélo la ko ihnjé It'é ch'an. ² Ntá tuénxín kuñhan ijnko itén nkexro kuixín nkaya nkajni mé ijnko ruido éxi nchónhya ntárió la ruido éxi sitjonta itsen la éxi ijnko ruido nchónhya chojni it'in sín isón arpa. ³ Itsje sín nkehe nixin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni. ⁴ Tí sín a mé k'uéchónthaha sín itsjé chojni chjin la tjóá sín la chréhe sín tí Kolélo kjónté nketi k'uáji. Tí sín a mé kuaá sín tí k'uék'ixín chojni k'uék'jasin jie la ko tí sín a mé éxi ijnko ofrenda xrankixín k'uáyéhe Dios la ko tí Kolélo kjaxin. ⁵ Kónoxínhya ninkehó kjuach'ia k'uaxrxéjinhya ir'va sín. La tí sín la ninkehó jie chónthaha sín tí tjejó sín nkayakon tí trono kuente Dios.

Tí nkehe chrónka tí iní ángel

⁶ A ntá k'uikuán í jnko ángel tjetjaká jnkosiné nkajni chrónka tí tan tsaáxinni jnkochrínxín tsinhín tí sín síin chjasintajni, mé tsinhín kaín nació la ko kaín nkexrí tsjehe chojni la ko kaín xín tan la ko kaín chjasin. ⁷ Ntá t'èya itsen ntáchro kixin:

—Chróchrakonrá la chrórxárxinkáonrá Dios la chróchjehérá ch'an kjuasáya kixin ó kjuixraká tí yaon sinchekitəoxín ch'an ijje chojni. Tjikosáyeherá ch'an kixin jehe ch'an kjuich'éna ch'an nkajni la ko chjasintajni la ko ntəyaon la ko tí sít'axrje ntə.

⁸ Ntá xiki yóxin ángel, ntáchro kixin:

—Ó kjuixín kjuitsínka, ó kjuixín kjuitsínka tí chjasin jie Babilonia. Mé ntiha kuixín tí vino kókuaxín sín kaín nació ntá kjuasin sín jie chóna sín chojni chjin ókjé.

⁹ Ntá xiki tí nixin ángel nixja itsen, ntáchro kixin:

—Jnkojín sín tsjikosáyehe sín tí bestia la ko tí nkehe tsíkjanoya kuènte o tsítøhe sín tsochóna tí marca tí totjen sín o tí tja sín, ¹⁰ mé t'ichjánxin its'i sín tí vino tsjasótéxín sín kujxin tí tjen Dios kixin xikaha tjechónhen tí kjuanínkaon kuènte Dios ntá ntiha tsjasótéxín sín tí xrohi la ko azufre mé xikaha tsonhen tí sín a ts'ikon tí sín ángel kuènte Dios la ko tí Kolélo. ¹¹ Tí ihnchi kuènte xrohi sítjasótéxín sín síchriin jnkochríxín la tí sín a kuinkáchonki tí bestia la ko tí nkehe tsíkjanoya kuènte o chóna sín ihnjé kuènte. ¹² A ntá tí sín tinkáchonki Dios la kuítekaon sín tí nkehe k'uətoan ch'án la ko naxa jína tinkáchonki sín Jesús mé t'ichjánxin chrókuíteghya sín titekaon sín ch'án.

¹³ Ntá kujnhan itén ijnko nkexro kujxin nkajní ntáχρο kixin:

—Ikjian tíhi: “Náxrjón tjejó tí nkexro kjónté its'en sín ijje o chr'éxin kixin tinkáchonki sín Ìnchéni.” Kjá jína, ichro Nchakuen Dios, kixin tí jehe sín ts'ok'èhe sín kixin ó kjuíuch'e sín xra la tí xra kjuíuch'e sín mé kjuacha sín.

Tí nkehe tsík'óna chjasintajni

¹⁴ Ntá xrinahya k'uíkuan ijnko tjuj tjóá la chrítaón tí tjuj tjetjxin ijnko nkexro éxi yóhe tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjexaa ch'án. ¹⁵ A ntá nkaxenhen njnko mé k'uaxrjéxín í jnko ángel itsen nixja ch'án nixjehe ch'án tí nkexro tjetjxin chrítaón tjuj ntáχρο ch'án kixin:

—Tjankíxian tətexian chica hoz kixin ó kjuixraká tí yaon tsojtá tí nkehe síin chjasintajni kixin tí nkehe tsík'óna chjasintajni la ó tsicha.

¹⁶ Ntá tuénxín tí nkexro tjetjxin chrítaón tjuj ntá kjuínček'átsínka ch'án chica hoz kuénté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjéxín í jnko ángel tí njnko tjen nkaya nkajní la kjaxin sákjuiko ch'án ijnko chica hoz imá taté. ¹⁸ Ntá sákjuíxín í jnko ángel tí tjen altar la chóna ch'án kjuachaxin kuènte xrohi la itsen k'uíyehé ch'án tí nkexro chóna tí chica hoz imá taté la ntáχρο ch'án kixin:

—Tjankíxian tətexian tí chica hoz taté la tjankíxian itjá tí racimos to uva tsík'óna chjasintajni kixin ó tsíchjé to —ichro ch'án.

¹⁹ A ntá tí ángel kjuínček'átsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuík'enka ch'án to tí tját'o ts'ényaxín sín to. Tíha mé t'axrjéxín kixin xikaha Dios sinchejasóte chojni. ²⁰ A ntá tí to uva tsík'ényaxín sín tját'o tí ikon chjasin a ntá tí tját'o a mé k'uaxrjéxín nchónhya jni noixín éxi tí freno tjnká ir'va kokəte la trescientos kilómetro kjínxin sátsíkji tí jni a.

15

Tí yato tí ángel la ko tí chin tsjixixín

¹ Ntá k'uíkuan tí nkajní í jnko kjuaxroan jié mé ijnko kjuachrakon: mé tí yato sín ángel kujkəo tí yato chin tsjixixín tsonéxín chojni. Tíha mé tí kjuanínkaon kuènte Dios tsjixixín.

² Kjaxin k'uíkuan ijnko nkehe tóyøhe ijnko ntayaon tsík'óna éxi xrosəntə sínkíkjan xrohi. La tí sín tsíkjacha kixin kuinkáchonkihya sín tí bestia la ko tí nkehe tsíkjanoya kuènte la ko kuáhya sín tí número kuènte ihnjé tí bestia mé tjejóxin toté sín chjinaxón ntayaon tsík'óna éxi xrosəntə la ko chóna sín isón arpa tsikjanjon Dios tsík'áyehé sín. ³ Itsje sín isón k'uétsje ch'ín Moisés, tí nkexro kjuíuch'ehe xra Dios la ko isón kuènte tí Kolélo la mé ntáχρο kixin: Imá ijje tí kjuaxroan kuéntá kixin kaín nkehe tsíkjich'éna.

Jaha Ìnchéni Dios kaín kjuachaxin chonta.

Ntoá la ko chaxín tí ntja kuéntá.

Jaha mé ijnko Rey t'ətoan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya kixin jaha mé ijnko nkexro jína tjóá?

Kuénté chjasintajni tsjikosáyehe sín tí jaha

kixin k'uíkon sín tí xra tsíkjich'e la jína tíha.

⁵ Kjuixín tíha la k'uíkuan nkajní tjebrankehé tí njnko la ko tí cuarto tjóá t'inkachjina tí nkehe tsík'ətoan Dios. ⁶ A ntá tí njnko a k'uaxrjéxín yato ángel kujkəo yato chin. Tí iké sín la ika tje te tjóá tjákini. A ntá tí cinta chóna ntakuin sín mé jehó oro. ⁷ A ntá ijnko tí noó tí nkexro tjejóxon mé kjuanjon ijnko copa k'uáyehé jnkojnko tí yato ángel mé copa tsík'óna chica oro tsikaón tí nkehe tsjasótéxín chojni kujxin tí tjen Dios tí nkexro tjechón jnkochríxín. ⁸ A ntá tí nkaxenhen njnko la tsikaón ihnchi kujxin tí kjuachaxin jié kuènte Dios la njnko nkexro xitjahya ts'ixenhen ntiha tsjixinjian ts'átsínka tí yato tí chin kujkəo tí yato ángel.

16

Tí copa tjnká nkehe tsjasótéxín chojni

¹ Ntá kuñhan ijnko itén ijnko nkexro imá itsen k'uaxrjéxín nkaxenhen nínko, ntáche tí yato sín ángel kíxín:

—Sátjia tikíkanjian chrítaón chjasintajni tí nkehe tjía tí yato copa la táha mé tsjasótéxín chojni kuixín tí tjen Dios —ichro ch'án.

² A ntá tí ángel saoxín sákjuik'itji tí nkehe tjía tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsíkjanoya kuènte tí bestia mé tsík'ayan sín tosóa, imá tjetéhe sín.

³ A ntá tí yóxin ángel sákjuik'itji tí nkehe tjía copa chrítaón ntayaon. A ntá tí ntayaon la k'óna jni éxi ijnié ijnko chojni tsík'óyán kichó la kaín ko sinkánki ntayaon ik'uén.

⁴ A ntá tí nixin ángel sákjuik'itji tí nkehe tjía copa chrítaón ijnko ntario la ko chrítaón tí ntá sit'axrje toye, la ntá tí ntá k'óna jni. ⁵ Ntá tuénxín kuñhan nixja tí ángel kuènte ntá ntáχρο kíxín:

—Jaha mé ijnko nkexro jína kíxín kjuínchekitoexián ijie chojni. Ichéni jaha ijnko Dios jína, óse tjen la ko naxá tjen ijie ⁶ kíxín jehe sín k'óyán tí sín tinkáchónki tí jaha la ko tí sín tsíchronka itan la ntá jaha Inchéni chjehé sín ijni its'i sín kíxín mé xíkaha sitjasóte tí jehe sín.

⁷ Kjaxin kuñhan nó altar ijnko nkexro ntáχρο kíxín:

—Chaxín Inchéni Dios, jaha mé chonta kaín kjuachaxin la ntoá jína kjuínchekitoexián tí ijie a.

⁸ A ntá tí noóxin ángel sákjuik'itji tí nkehe tjía copa chrítaón yaon, a ntá tí yaon antsí k'uáyéhe kjuachaxin tosóa kíxín tsochjánxin chojni tí sóa kuènte. ⁹ A ntá kaín chojni chjánxin tí imá sóa kuènte yaon la k'uántaxínhín sín ihnié Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuik'itji tí nkehe tjía copa chrítaón tí trono t'etoxánxín tí bestia. A ntá kaín tí k'uéchóna kjuachaxin k'uék'etoxan tí bestia la k'uixín tié. A ntá tí chojni a la netja nejen sín kíxín tjetéhe sín. ¹¹ La kjónté xíkaha la kjuinkíhya sín tí nkehe jínahya ch'e sín. Náhí. Íchá má k'uántaxínhín sín Dios tjen nkaya nkajni kíxín tjetéhe sín kíxín xíkaha kónhen sín.

¹² A ntá tí injoxín ángel sákjuik'itji tí nkehe tjía copa chrítaón ijnko ntario jie it'in Eufrates. A ntá tí ntario la kjuixié kíxín jína tsakitjehe sín ijnko ntja tsjixín tí sín rey tsjixín nó tjitoxin yaon.

¹³ A ntá k'uikuán kíxín ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjéxín iní nchakuen tí jínahya éxi korána tsjehe. ¹⁴ Tíha mé nchakuen tí jínahya kjuasixín sín kjuaxroan. A ntá sákjuikjinchekójkotsé kaín rey siín chjasintajni kíxín tsjanjón sín ijnko yaon jie kuènte Dios chóna kaín kjuachaxin. ¹⁵ “Tsjehe, janhan titáya ts'inké éxi ijnko xíche. Chéhe tí nkexro tjejótsjehe la t'ayakonhen tí iké kíxín ts'itjáyanhya kíxín chrók'uajihya sín tjóchin sín la chrókósuéhya sín kíxín chrókónoxín kíxín tjóchin sín.” ¹⁶ A ntá tsojnkotsé tí sín rey tí nonte it'in Armagedón nkíva Hebreo.

¹⁷ A ntá tí ángel yaotoxin sákjuik'itji nkehe tjía copa chrítaón tí xrinto ntá nkaxenhen nínko nkaya nkajni k'uaxrjéxín ijnko itén chojni itsen nixja mé kuixín tí tjen tí trono la ntáχρο kíxín:

—Ó kjuixín kónhen tíha.

¹⁸ A ntá sítjónkíxín la ko ruido sítjonta la ntá imá kuínki nonte fuerte. La desde tí kjuankíxín k'uixín chojni chjasintajni la xíkaha kónhen kuínki nonte a ntá jie antsí fuerte kuínki nonte.

¹⁹ A ntá tí chjasin jie xitjehe nonte la iní k'óna, chjenca. La koí kaín chjasin siín chjasintajni tsík'oya. A ntá Dios xraxínkaon kíxín chrókjuínchekjasóte tí sín siín tí chjasin jie Babilonia la k'uetoan ch'án its'i sín tí vino tsjasótéxín sín kíxín mé xíkaha kónínkaon ch'án. ²⁰ A ntá kaín tí nonte sinkátaón ntayaon k'uaniánki ntá la ko tí jna k'uuitjayan. ²¹ A nta nkajni k'uánótjénxín toni ijie xrátja choni mé cuarenta kilo yexín nkjojnko toni. A ntá chojni na antsí má k'uántaxínhín sín Dios kíxín tí xíkaha kónhen sín xrátja sín toni la imá kjoté sín.

17

Tsjasóte tí tjan jínahya

¹ A ntá ikui ijnko tí yaotoxin ángel chóna tí yato copa la ntáχρο ch'án kíxín:

—Xrákiá tsjákoħa nkexrí tsjasóte tí chojni chjin tjasin jie tjetjaxín tjan chrítaón tí nchónhya ntá. ² Tí sín rey t'etoxan chjasintajni kjuasínko tjan jie la ko tí chojni siín chjasintajni kokuaxín sín tí vino a mé kjaxin kjuasixín sín jie.

³ A ntá tuénxín Nchakuen Dios sákjuikian netje ntá k'uikuán ijnko chojni chjin tjetjaxín chrítaón ijnko bestia kjátse la kuenté tí ko a la simá ihnié náxrxónhya tsík'ántaxínxín sín Dios la chóna yato kja la ko ite ntèe. ⁴ A ntá jehe tjan chóna tjan iké tjan morado la ko kjátse la teyá tjan chica oro la ko xro náxrxón la ko perla. Tjexraá tjan ijnko copa tsík'óna chica oro tsikaón nkehe jínahya tsjasixín tjan jie. ⁵ Tí totjen tjan ts'ínixín ijnko ihnié kohya nkexro

tienxín. “Tíha mé tí chjasin jié Babilonia, mé iné tí chojni chjin tjasin jié la ko kain chojni jínahya ch'e síin chjasintajni.” ⁶ Ntá kónóna kixin tí tjan a la tsékanxin tí iijné tí sín tinkáchónki Dios la ko tí iijné tí sín tsík'énxín tí chrónka sín kixin tinkáchónki sín Jesús. Ntá k'uíkuan xíkaha imá chrakonna. ⁷ A ntá ijnko ángel ntáchro ch'án kixin:

—¿Nkeuènté chrakuan? Ntá ijie sintonoha tí nkehe tienxínhya chojni kuènte tí tjan a la ko kuènte tí bestia tjejen tjan chóna yato kja la ko ite ntèé. ⁸ Tí bestia k'uíkuan jaha kjuák'e ósé la ijie tjechónhya kjánchó senó tsochrínxín tí tòye núnka ntá chr'èxin ts'itjáyán. A ntá tí sín síin chjasintajni ts'ínixínhya ihnjé sín tí libro ts'ínixín ihnjé chojni tsaá desde k'óna chjasintajni, la mé jehe sín tsochrakon sín tió ts'íkon sín tí bestia kjuák'e ósé la tsík'en la ntá ijie xikjan inaá.

⁹ Tí jnkojín nkexro chrókiénxín la mé tí yato kja la t'axrjéxín yato jna tjejen tí chojni a. ¹⁰ A ntá tí kja kjaxin t'axrjéxín yato rey la ntá in'ó tí sín rey la í t'etuanhya sín ijie la ijnko tí jehe sín t'etóan ijie la í jnko naxá tjihya. A ntá tió tsji tí yatóxín la í kánhyó sé ts'etóan. ¹¹ A ntá tí bestia kjuák'e senó la ijie tjechónhya mé tí jnixin rey la jehe ch'án kuènte tí yato rey la chr'èxin la ts'itjáyán.

¹² A ntá tí ite ntèé tsík'íkuan mé ite rey naxá t'etuanhya. A ntá ijie la ts'áyéhe sín kjuachaxin ts'etóanko tí bestia kjánchó kánhyó sé. ¹³ Tí ite tí rey la jnkokoá tsjenkayáxín sín la tsjanjon sín kjuachaxin kuènte sín kixin ts'etóan tí bestia. ¹⁴ Tsjanjonko sín tí Kolélo a ntá tí Kolélo la tsjacha ts'etóan kixin jehe ch'án mé Inché kaín chojni la ko jehe ch'án mé tí Rey ts'etuenhen kaín rey la ko tí sín tjejóko ch'án mé tsík'íyehé Dios la tsík'jeyá ch'án sín la jina nchexiteyá sín.

¹⁵ Kjaxin ntáchro tí ch'ín ángel kixin:

—Tí ntá k'uíkuan la chrítaón tjetjaxín tí chojni chjin tjasin jié la mé t'axrjéxín kixin nchónhya chjasin la ko nchónhya chojni la ko nchónhya nación la ko nchónhya nkíva. ¹⁶ A ntá tí bestia k'uíkuan la ko tí ite ntèé la tíha mé tsonínkakonhen tí tjan tjasin jié la tsitóhe tjan tjóchin tjan la sine tí bestia tí nto chóna cuérpóé tjan la ko tsoche tí huésóé tjan. ¹⁷ Dios tsík'etuenhen asén sín kixin xíkaha sich'e sín éxi tjinkaon ch'án kixin jnkokoá tsjenkayáxín sín la ko tsjanjon sín kjuachaxin kuènte tí sín rey kixin ts'etóan tí bestia tsoxiteyáxia tí nkehe tsintáchro Dios. ¹⁸ A ntá tí chojni chjin k'uíkuan la táha mé tí chjasin jié t'etóan tí sín rey t'etóan chjasintajni.

18

Kjuítsínka chjasin Babilonia

¹ Ntá chr'èxin k'uíkuan í jnko ángel k'uínkajinxín nkajni chóna nchónhya kjuachaxin ntá chjasintajni antsí k'uínkaséyanni tí tjákiní tsjehe ch'án. ² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jié Babilonia. Ntá tí jínahya ó kjuacha k'uíxénhen t'etóan ntiha la ntiha síin kaín xín clase nchakuen jínahya la ko síin kaké ko xritjaká tjuáhya la ko jínahya. ³ A ntá kaín xín nación kókuaxín tí vino kjuínchekji tjan ntá kjuasinko tjan sín jié la ko tí sín rey t'etóan chjasintajni kjaxin kjuasinko tjan jié. La tí sín nchekji nkehe chjasintajni kórikoxín sín kixin k'uena tjan nchónhya nkehe.

⁴ Ntá kuñhan í jnko itén nkexro kuixín nkaya nkajni ntáchro kixin:

—T'axrjéxínrá tí chjasin ntiha kixin tí jahará tinkachónkirá tí janhan kixin chrók'uícayahará tí ijie sín la ko chrókjuasótéxínhyará tí nkehe tsonhen sín. ⁵ Kixin tí nchónhya jié tinkák'ánki hasta kjuixraká nkajni la Dios ó nohe tí jié chóna sín. ⁶ Ch'eherá tjan éxi tí jehe tjan kjuich'ehe tjan í so chojni kixin xíkaha tsjasótéxín tjan. Chrókjuenkehérá tjan iyó veces éxi tí tsík'ich'éna tjan ik'ui í so chojni. ⁷ Antsí chrókjuasóte tjan tóyóhe tí nkehe kjuich'e tjan kixin kjuínchekhe tjan la ko k'uéchóna tjan kaín nkehe tóxrjnhín tjan. Jehe tjan ntáche asén tjan kixin: “Ntíhi tjetjaxian éxi ijnko reina. Jehya ik'ána kixin chrókjuasótena.” ⁸ Mé xíkaha kjaxin jnkokoá yaon itsí tí kjuaxikaon tsonhen tjan mé its'en tjan la ko tsjasótéxín tjan kjinta la tsoche tjan kixin Inchéni imá chóna kjuachaxin la jehe ch'án sínchekjasóte ch'án tjan.

⁹ A ntá tí sín rey síin chjasintajni tsíkjasinko sín tjan jié la ko nchónhya nkehe kjuínchexenko sín tjan la mé tsotsjánka sín la ts'èya sín tió ts'íkon sín ts'aya ihnchi tió tsoche tjan. ¹⁰ Ntá jehe sín tsitóhe sín ikjín kixin chrakon sín kixin xíkaha tsjasóte tjan la tsontáchro sín kixin:

—Nóa tí jaha chjasin jié Babilonia, chjasin imá t'etóan kixin titáya kjuasótia.

¹¹ Tí sín xrinchekji nkehe la kjaxin tsjánka sín, t'èya sín kixin xíkaha kónhen tí chjasin ntiha kixin kohya nkexro ts'enghe sín tí nkehe sínchekji sín. ¹² Kjuínchekji sín chica oro la chica plata la ko ixro náxrjón la ko perla la ko ika náxrjón lino la ko ka seda la ko ika color morado la kjáse la ko kjaxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixro chica la ko ixro mármol. ¹³ Kjaxin xrinchekji sín canela la ko xroqan xraxé náxrjón la ko chjincq la ko xroqan mirra la ko crema la ko vino la ko

aceite la ko harina náxrjón la ko noa trigo la ko iko tamá nkehe la ko kolélo la ko kokate la ko carreta la ko chojni ch'exón xra kjaxin kjuínchejki sín. ¹⁴ Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'uitjáyán kaín nkehe náxrjón tjete k'uéchonta.

¹⁵ Tí sín k'uékjinchejki tí nkehe la kóricó sín kixin kjuacha sín tí xra kjuích'e sín tí chjasin ntiha. Ikjín k'uéjo sín kixin chrakon sín kixin xikaha kónhen kjuasóte tí chjasin. Tsjánka sín la t'èya sín ¹⁶ la tsontácho sín kixin:

—Nòa tí chjasin jié. Éxí ijnko chojni chjin tsik'itsa ka lino náxrjón la ko ika morado la kjátse la ko teyá nkehe oro la ko xro náxrjón tjete la ko perla. ¹⁷ A ntá jnkorato koá kjuixin kjuéje tí nkehe imá tjete —ichro sín.

Kaín tí nkexro t'etóan tí ntabárcó la ko tí sín tsik'ixenhen tí ntabárcó la ko tí sín ch'e xra chrítaón ntayon kuítóhe sín ikjín ¹⁸ la tió k'uíkon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jié í?

¹⁹ La tjikjanjin kja sín nche la tsjánka sín t'èya sín kixin:

—Nòa tí chjasin jié. Kóricó tí sín k'uéchónta ntabárcó chrítaón ntayon kixin tí chjasin í la ntá jnkorató koá kjuixin k'uitjáyán tí nkehe chóna sín.

²⁰ A ntá jahará tjejórá nkajní tócháhará kixin xikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kaín rá kuinkachónkirá tí jehe ch'án kixin Dios kjuínchejasóte tí chjasin a kixin tí jié kjuasin sín kjuínchejasótiará sín tí jahará.

²¹ A ntá ijnko ch'ín ángel chóna kjuachaxin kjuatsen ijnko xro éxí ijnko xro jié kuènte molino la k'uenkí ch'án ntayon la ntá ntácho ch'án kixin:

—Mé xikaha tsonhen tí chjasin Babilonia, tí chjasin jié la nunca ts'ikonhya chojni chr'éxin. ²² Nunca tsienhya sín música kuènte isón arpa la ko flauta la ko trompeta tí ntja la ko ninxeró xitjahya sích'e ninkehó xra ntiha la ko kjaxin tsienhya sín ninkehó tóvéntó xro molino. ²³ Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsótehe chojni ntiha. Tí sín k'uékjinchejki nkehe ntiha la imá k'uék'etóan kuènte chjasintajni la tí sín k'uékjich'iyehé tí sín siín chjasintajni la k'uékjich'e sín jínahya, k'uédkjinchexroan sín.

²⁴ A ntá tí chjasin jié ntiha tsikónoxín ijnié tí sín tsik'en k'uéchronka itén Dios la ko tí sín tinkáchónki tí jehe ch'án la ko kain tí sín tsik'enxín chjasintajni.

19

¹ Ntá chr'éxin ntá kuínhan itén nchónhya nkexro tjejó nkaya nkajní itsen nixja, ntácho sín kixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án tí jeheni la imá chóna kjuachaxin Dios kuènteni.

² Kixin jehe ch'án ntóá kjuínchejasóte ch'án tí tjan kjuasin nchónhya jié kixin jehe tjan kjuachroe tjan chojni siín chjasintajni kixin tí nkehe jínahya k'uékjich'e tjan. Dios kjuínchejasóte tjan kixin k'óyán tjan tí sín k'uékjich'ehe ch'án xra.

³ La ntá kjaxín inaá xintácho kixin:

—¡Aleluya! Kjuasáyé Dios kixin tí ihnchi síchexín tí jehe tjan tsítóehya chrín hasta tí ntihi.

⁴ A ntá tí veinticuarto tí sín táda la ko tí noó nkexro tjejóchón tjejóxin toh'in sín hasta káxin kja sín nonte kjuikosáyéhe sín Dios tí nkexro tjetjaxín tí trono la ntácho sín kixin:

—¡Amén! ¡Aleluya! ¡Kjuasáyé Dios!

⁵ Ntá xrínahya kuínhin sín itén ijnko nkexro tjen nó trono ntácho kixin:

Chjehérá kjuasáya tí Dios kuènteni kaín rá ch'ehérá ch'án xra la kuítékákonhénra ch'án,

mé kaín tí jahará kjónte chánjan ntsínsí o chojni nteto.

Tí kia tsótehe tí Kolélo

⁶ Kjaxin kuínhan nkehe éxí itén nchónhya chojni éxí nchónhya ntárió sítóvéntó la ko imá itsen sítjonta la ntácho kixin:

¡Aleluya! Kjuasáyé Ìnchéni ó kjuankixin t'etóan Ìnchéni Dios kuènteni chóna kaín kjuachaxin.

⁷ Chrókóchéheni la chrókjuikosáyeheni Dios

kixin ó kjuixraká tí yaon ts'ixin kia kuènte Kolélo.

La tí tjan tsótehe la tsikóyaxínhin tjechónhen,

⁸ mé tsik'áyéhe kjuachaxin tsik'itsa ka lino náxrjón tjóá tjákiní.

A ntá tí ka lino náxrjón a mé t'axrjéxin kixin tí jina k'uéjó tí sín tinkáchónki Dios.

⁹ Ntá tí ch'ín ángel k'uetoan ch'án kixin:

—Ikjian tíhi: “Náxrjón tjejó tí nkexro k'uáyéhe kjuachaxin sátsji tí kia tsótehe tí Kolélo.”

Ḃ ntá ntáchro ch'án inaá kixin:

—Tí palabra a mé chaxín ntoá nixja Dios.

¹⁰ Ntá kjuak'éxian toçh'ian toté tí ángel kixin chrókjuikosáyaha ch'án, kjánchó jehe ch'án ntáchro ch'án kixin:

—Xikahya chroçkjuich'e kixin janhan kjaxian t'aha xra Dios éxí tí jaha la ko éxí tí sín kichúa kuítekaon tí tan jina chrónka Jesús. Jehó Dios mé chrókjuikosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokate tjóá

¹¹ Ntá k'uikuan kixin nkajní tjaxrankehe la ntaha kónoxín ijnko kokate tjóá la ko tí nkexro tjekjen va mé it'in Jína la ko Chaxín kixin ntoá kjuínchekitogéxín ch'án ijíé chojni la ko ntoá kjuánjonko ch'án chojni. ¹² Ḃ ntá tí ikon ch'án mé tjákini éxí xrohi nene xikaha tsjehe. Ḃ ntá tí kja ch'án la chóna nchónhya corona la ko ts'ínixín ijnko ihníé ijnko nkexro la jehó ch'án mé nohe ch'án tíha. ¹³ Tjenkáya ch'án ijnko ka tsík'ixikjanjin jni ntá ihníé ch'án mé Itan Kuénte Dios. ¹⁴ Chréhe tí sín soldado kuénte nkajní. Iké sín mé ka lino náxrjón tjóá la tjejójken sín kokate tjóá. ¹⁵ Ir'va tí jehe ch'án k'uaxrjéxín espada imá taté kixin táha mé tsjik'óyánxin ch'án tí sín siín kaín nación la ko ts'etogánxin ch'án ijnko chüca vara. Jehe ch'án mé sinchekitogéxín ch'án ijíé sín éxí t'énxin sín to uva toté sín mé xikaha ts'etuénhen ch'án kixin its'i sín vino tsjasótéxín sín kixin mé xikaha tsixín tí kjuánkaon kuénte Dios chóna kaín kjuachaxín. ¹⁶ Iké ch'án mé ts'ínixín kixin jehe ch'án me Rey t'etuénhen kaín rey la ko jehe ch'án mé Inché kain chojni.

¹⁷ Ntá tuénxín k'uikuan ijnko ángel tjaxín toté tí tjen yaon la k'uéyato ch'án itsen k'uéyatohe ch'án tí ko xritjaká, ntáchro ch'án kixin:

—Xrákirá tójnkotsérá ntihi kixin Dios tsjanjon nkehe sinterá ijie. ¹⁸ Sinterá cuerpo kuénte reyes la ko sinterá cuerpo kuénte tí sín comandante la ko cuerpo kuénte chojni jjehe la ko ntog kokate la ko cuerpo kuénte tí sín tsikjiták'á va la ko cuerpo kuénte kaín chojni libre o chojni ch'exón xra la chojni hyé o chojni ntánsísi.

¹⁹ K'uikuan tí bestia la ko tí sín reyes t'etogán chjasintajni la ko tí soldado kuénte sín, tsikójnkotsé sín tsjanjonko sín tí nkexro tjekjen kokate la ko koí tí sín soldado kuénte ch'án. ²⁰ Ḃ ntá itsé sín tí bestia kixin sátsji tsjasóte la ko kjaxín itsé sín tí nkexro ntoáhya k'uékjako itén Dios la ko k'uékjasín ch'án kjuaxroan náxrjón nkayakon tí bestia mé xikaha kjuich'e tí nkexro ntoáhya kjuako, kjuich'iyehé ch'án tí sín tsikítóhe tsíka marca kuénte tí bestia la ko kjuikosáyehé sín tí nkehe tsikjanoya kuénte tí bestia. Ntá tí bestia la ko tí nkexro ntoáhya kjuako itén Dios mé k'uítuennen sín sátsji tí siín xrohi tsoche tjejóchónxinhín sín tsochéxín azufre. ²¹ Ḃ ntá tí í so sín la ts'énxin tí espada k'uaxrjéxín tí ir'va tí nkexro tjekjen tí kokate tjóá la kaín ko xritjaká ts'ixín tí siín tí cuerpo kuénte tí jehe sín la hasta tsokjehe va sine va.

20

Tí mil nánó

¹ Ntá xrináhya k'uikuan ijnko ángel k'uínkajinxín nkajní tjaxraá llave kuénte tí tóye njnka la ko ijnko cadena jíé tjaxraá ch'án. ² Ḃ ntá tí ángel a itsé tí dragón mé tí konche ósé kjí mé tíha tí ch'in diablo la ko Satanás la kjuak'eçhroé ch'án ijnko mil nánó. ³ Ich'án ch'án sákjuí tóye njnka ntá k'uikjehe ch'án la ko kjuak'e ch'án ijnko sello ch'raáoñ puerta kixin ntá tí dragón chrókjuich'iyehya tí chojni siín kaín nación hasta chrók'uatsínkajia tí mil nánó. Ḃ ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uikuan tí trono la ko tí sín tjejótxajín tsík'áyéhe sín kjuachaxín sinchekitogéxín ijíé chojni. Kjaxín k'uikuan asén chojni tsíchrimjin kja kixin kuítekaon sín Jesús la ko tsíchrónkaxín sín itén Dios. Jehe sín la kuínkáchónkihya sín tí bestia la ko tí nkehe tsikjanoya kuénte la ko kuíteohya sín ikuá sín marca tí totjen sín o tí itja sín. Mé k'uikuan kixin tsíxechón sín la ko ts'etoganko sín Cristo ijnko mil nánó. ⁵ Ntá í so chojni tsík'en la naça xechónhya hasta ts'atsínkajia tí mil nánó. Tíha mé xrankixín tsoxechón chojni. ⁶ Náxrjón tjejó tí sín tsíkjinchetjóá Dios mé tí sín a mé senó tsoxechón sín. Ḃ ntá tí yóxin chrók'uen sín la tíha chónthaha nínkehó kjuachaxín naça xikaha chrókónhen sín. Jehe sín mé nçat'á kuénte Dios la ko kuénte Cristo la ts'etoganko sín ch'án tí mil nánó.

⁷ Ḃ ntá ts'atsínka tí mil nánó ntá ch'in Satanás tsoxintankehe tí kjíçhroé. ⁸ La sátsjikjich'iyehé tí chojni siín kuenté chjasintajni la ko sátsjikjich'iyehé tí chjasín Gog la ko Magog. La tsojnkotsé sín kixin tsjanjon sín la ko tí soldado kuénte tí jehe sín. Nchónhya sín tsojnkotsé ntiha éxí tí nchesen siín ntayaon. ⁹ Mé xikaha sátsji sín tí tonxín la ko tí tekaxín nonte la ts'ántatjen sín tí tjejó tí sín tsíkjinchetjóá Dios mé tí chjasín jíé tjehe ch'án. Ḃ ntá xrohi tsixín nkajní kixin tsochéxín tí sín jínahya ts'itájyanxín sín. ¹⁰ Ḃ ntá tí diablo tsikjich'iyehé tí jehe sín kjaxín sátsji tsochéxín xrohi la ko azufre tí sátsíkji tsíchéxín tí bestia

la ko tí nkeixo ntoáhya kjuako itén Dios. Mé ntiha mé tsjasótéxín nchakotjin la ko tie jnkochríxín.

Tsitoxín ijíe chojni tí tjen tí trono jíe tjóá

¹¹ Ntá k'uíkuan ijnko trono jíe tjóá la ko tí nkeixo tjetjaxín nó ntiha. A ntá tí tjen ch'án ntiha la ó k'uitjáyankoá nonte la ko nkajní la í kónoxínhya ínaá tí nonte. ¹² Ntá k'uíkuan tí sín tsík'en; chojni hyé la ko chojni ntsíntí tjejóxín toté sín nkayakon Dios la ntá xitjehe iso libro la ko xitjehe í jnko libro ts'ínixín ihníé tí sín tsaá. Ntiha tsitoxín ijíe chojni tsík'en éxí nixja tí í so libro nkehe tí xra kjuích'e sín ts'ínixín ntiha. ¹³ Tí sín tsík'enxín ntayaon la ntiha xrakuaxín sín la tí sín sátsíkji tí síin chojni tsík'en la ntiha xrakuaxín sín kaín sín tsochjina sín tsitoxín ijíe jnkojnko sín káxin nkexrí tí xra kjuích'e sín. ¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha. ¹⁵ La ko ntaha sátsji tí chojni ts'ínixínhya ihníé sín tí libro ts'ínixín ihníé chojni tsaá.

21

Nkajní nixín la ko nonte nixín

¹ Ntá k'uíkuan ijnko nkajní nixín la ko ijnko nonte nixín káxin tí nkajní saoxín la ko tí nonte saoxin tsík'itjáyán la ko kjaxín kohya ntayaon. ² Janhan Juan k'uíkuan tí chjasin jíe tjóá. Táha mé tí Jerusalén nixín k'uínkajínxín nkajní kuixín tí tjen Dios la kuenté tsíkóyóxín éxí ijnko chojni chjin tsothe tsík'itsa káxin tsákja tí xí. ³ Ntá kuínhan ijnko itén ijnko nkeixo itsen kuixín nkajní ntáχρο káxin:

—Dios itjen tí síin chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín. ⁴ Jehe ch'án mé sinchexámá kaín ntakon sín la í tsokohya nkeixo its'en la tsokohya nkeixo tsotsjánka la ko ts'áváhya sín la ko tsokohya kjuatjoté káxin kaín tí nkehe k'uékónhen ósé la ó kjuixín k'uátsínka.

⁵ A ntá tí nkeixo tjetjaxín tí trono ntáχρο ch'án káxin:

—Janhan mé t'ána kaín nkehe nixín.

Kjaxín ntáχρο ch'án káxin:

—Ikjian tíha káxin tíha mé palabra chaxín la chrókuítekáván kaín tíha.

⁶ Ntá chr'éxín chrónka ch'án káxin:

—Kaín nkehe la ó kjuixín tsík'óna. Janhan la tí xrankíxixín la ko tí tsjixixín éxí tí letra xrankíxixín A la ko tsjixixín Zeta. Tí nkeixo t'énxín ntá la janhan tsojtahá sín tí ntá its'i sín mé tí ntá tjanjón kjuachón la ninkehó ts'ixínkiéhya sín tíha. ⁷ Tí nkeixo tsjacha tsítóehya tí janhan la ts'áyéhe sín kaín tí nkehe tsojtahá sín. La janhan mé ts'óna Dios kuènte sín, a ntá jehe sín mé xjanna ts'íkaán tí jehe sín. ⁸ A ntá tí chojni chrakon la chojni titekakonhya la tí sín chjínxínhin la ko tí chojni ts'oyán kíchó la ko tí chojni tsákja chojni chjin ókjé la ko tí chojni xrinchexroán la ko chojni tínkáchónki nkehe tsíkjangya la ko kaín chojni ch'ia mé tí sín a mé ts'ítuenhen sátsji sín tí síin xrohi tsochexín sín azufre tíó itsi tí yóxin muerte.

Tí Jerusalén nixín

⁹ Ntá ikui ijnko tí yatoxín ángel chóna tí yatoxín copa tsíkaón tí yatoxín chin tsjixixín tsjasótéxín chojni. Ntá ntáχρο ch'án káxin:

—Xrákia tsjáqoha tí tjan tsothe tí Kolélo.

¹⁰ Ntá k'uíkuan ijnko nkehe kjuakoxín Nchakuen Dios la ntá tí ángel sákjuíkian ijnko jna jíe la ko noi la kjuakona ch'án tí chjasin jíe tjóá mé tí Jerusalén ts'ínkajínxín nkajní tsíkíxín tí tjen Dios. ¹¹ A ntá tí chjasin a mé tjákiníxín kjuachaxin kuènte Dios. A ntá tjákiní éxí ijnko xro imá náxrjón tjehe éxí xro jaspe éxí xrosenta tsjehe. ¹² A ntá jnkontajén tí chjasin chóna tjat'ó noi la chóna teyó puerta la jnkojnko ángel jnkojnko puerta tjejónta la ihníé tí teyó tí sín tsík'axrjénxín sín Israel ts'ínixín jnkojnko puerta. ¹³ La iní puerta la nó tjitoxín yaon la iní puerta la nó norte la iní puerta la nó tjiatóxin yaon la iní puerta la nó sur. ¹⁴ Tí tjat'ó tsík'antajén tí chjasin chóna teyó xro chónatxín fuerza tí tjat'ó la jnkojnko ihníé tí teyó tí sín k'uájiko tí Kolélo a mé ts'ínixín jnkojnko tí xro a.

¹⁵ A ntá tí ángel tjenixjana chóna ijnko nta vara oro, éxí tji tsjehe, tsjachoxín tí chjasin la tí puerta kuènte chjasin la ko tí tjat'ó t'ínkáuènxín. ¹⁶ Tí chjasin la cuadrada la tí kjinjínxín jnkokón la ko tonxín la jnkokón. A ntá tí ángel kjuachoxín tí chjasin tí nta vara éxí tji tsjehe tsíkjachoa ch'án tí chjasin mé chóna dos mil dos cientos kilómetro tí kjinjínxín la ko tí ntetoxín la ko tí tonxín la jnkokón. ¹⁷ Ntá tsíkjachoa ch'án tí tjat'ó tsíkjintajín tí chjasin a la chóna sesenta y cuarto metro káxin éxí tjachroa chojni chjasintajni mé xíkaha kjuachoa tí ángel.

¹⁸ Tí tjat'ó tsík'antajén tsík'óna xro jaspe, a ntá tí chjasin tsík'óna jehó chica oro tóyóhe jehó xrosenta tjóá. ¹⁹ Tí xro tsík'óna xrankíxixín tsík'antajén tí tjat'ó la nchónhya xro chjini náxrjón tsínkíkjan. A ntá tí xro xrankíxixín la jaspe, a ntá tí xro yóxin la zafiro, la tí xro nixín la ágata, a ntá tí noóxin la esmeralda. ²⁰ A ntá tí n'óxin xro la xro mármol la tí injonxín la

cornalina, la tí yatoxin la crisólito, a ntá tí jnixin la berilo, la tí xro naxin la topacio, la tí texin la crisoprasa. A ntá tí tejnkoxin la jacinto, a ntá tí teyóxin la amatista. ²¹ A ntá tí teyó puerta mé tjejó perla la jnkojnko puerta tsík'óna jnkokoá perla. A ntá tí ntja jié kuènte chjasin la tsík'óna jehó chica oro éxi xrosentá tsjehe.

²² Ntaha la k'uikõnha ninkehó njnko tí chjasin a, kixin Ìnchéni Dios chóna kaín xin kjuachaxin la jehe ch'án la ko tí Kolélo mé tí njnko ntiha. ²³ Tí chjasin a mé t'ichjánxinha yaon la ko ni nitjó ts'inkaséyanxin. Kixin tí t'inkaséyanxin la Dios la ko tí Kolélo mé tí xrohi kuènte. ²⁴ A ntá tí chojni kuènte kaín nación tsikaá la ts'ikonxin tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín. ²⁵ A ntá tí puerta kuènte chjasin la tsík'jeha tí nchakotjin la ntaha la tsokohya ts'ixin tie. ²⁶ Ntaha sátsjiko kaín xin nación tí nkehe náxrjón k'uéchóna sín chjasintajni. ²⁷ A ntá ntaha mé xitjahya ts'ixenhen ninkehó nkehe tjuáha, la ninkexró chjinoxínhin o chojni ch'ia. Jehó ts'ixenhen tí sín ts'inixin ihnjé tí libro ts'inixin ihnjé tí sín tsaá, mé tí libro chóna tí Kolélo.

22

¹ A ntá tí ángel kjuákona ijnko ntario tjóá, a ntá tí ntá a mé tjanjon kjuachón. Táha mé t'ikonxinni éxi xrosentá la mé k'uaxrjexin tí trono kuènte Dios la ko tí Kolélo. ² A ntá jnkosiné tí calle tjetoan kuènte tí chjasin a la ko nanánko tí ntario ntiha itjen tí inta tjanjon kjuachón mé t'óna to teyó veces jnkojnko nánó kixin t'óna to jnkojnko nitjó. Tí ka kuènte tí nta la xroan tsitoxin jina tí nación síin ntiha. ³ La mé ntiha tsokohya ninkehó kjuachjinoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án. ⁴ Ts'ikon sín tí káré Dios la ko tsochóna sín ihnjé ch'án tí totjen sín. ⁵ Ntiha la tsokohya ts'ixin tie la tí sín síin ntiha la t'ichjánxinha sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxin sín ntiha la ko tsochóna sín kjuachaxin kuènte Dios jnkochrixin.

Tí itsi Ìnchéni la kánhyó sé

⁶ A ntá tí ángel mé nixjana ch'án ntáchro kixin:

—Tí itan a mé chaxin la chrókuitekákõhén tí tan a. La ko Ìnchéni mé tí Dios nchexraxinkaon tí sín nixja kjuachaxin ihnjé ch'án mé ichr'án ch'án tí ángel kuènte ch'án kixin tsjakuexin ch'án tí sín ch'ehe ch'án xra, tí nkehe tjoka tsõnhen.

⁷ —Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kuinhan la ko k'uikuán tíha. A ntá chr'éxin kjuixin kuinhan la ko k'uikuán tíha ntá kjuak'éxian toch'ian chrínki toté tí ángel kixin xikaha kjuákona la ntá chrókuikosáyaha ch'án. ⁹ A ntá jehe ch'án ntáchro kixin kixin:

—Xikahya sích'e kixin janhan kjaxin t'aha xra Dios éxi tí jaha xikaha la ko éxi tí sín kichúa mé tí sín nixja itén Dios la ko kaín tí sín tjinkaon chrókuitekaon nkexrí nixja tí libro i. Mé jehó Dios chrókuikosáyehé.

¹⁰ Kjaxin k'uetuanna ch'án kixin:

—Chrókuak'echjinahya tí nkehe jahvá kuinhín kuènte Dios éxi nixja tí libro i kixin ó kuichjina tí yaon tsoxiteyá. ¹¹ A ntá tí sín ch'e jinahya ája nohe sín ch'e sín tí jinahya. A ntá tí nkexro ntoáha ch'e la ája nohe ch'e tí nkehe ntoáha. A ntá tí nkexro ch'e nkehe tóxrjinhin Dios la naxá chrókuich'e xikaha la ko tí nkexro tsikjinchetjóá Dios la naxá jina chrók'uejó sín chrókuitekaon sín tí jehe ch'án.

¹² —Chaxin tjoka ts'inka janhan la ts'inkakian tí nkehe tsotjhará jnkojnkorá kixin nkexrí tí xra chujch'erá. ¹³ Janhan mé tí xrankixín la ko tí tsjixín la janhan mé tí saxón la ko tí tsjixín éxi tí letra xrankixín A la ts'ixixín Zeta.

¹⁴ Náxrjón ts'ejó tí nkexro tsíkjen iké kixin tsochóna sín kjuachaxin tochjinehe sín tí nta tjanjon kjuachón kixin jina ts'ixenxin sín tí puerta kuènte chjasin. ¹⁵ A ntá ntója tsitõhe tí chojni jinahya kuitekakonha la ko tí chojni nchexroan la ko tí sín chóna nõhõnha chojni chjin la ko tí chojni tjáya la ko tí chojni tinkáchõnki tí nkehe tsíkjanõya la ko tí chojni tóxrjinhin xrich'ia.

¹⁶ —Janhan Jesús mé ichr'an tí ángel kuèntana kixin tsochénka kaín njnko kaín tíha. Janhan mé k'uaxrjenixian tí rey David la ko janhan tí konotsé itji tí chjina t'inkáséyan. ¹⁷ Tí Nchakuen Dios la ko tí sín tinkáchõnki tí Kolélo ntáchro kixin:

—Xrákiá.

La tí sín tjejótinhan la ntáchro sín kixin:

—Xrákiá.

A ntá tí nkexro t'enxin ntá tjinkaon ntá la chrók'ui tí ntá tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé ąntsí sinčekjasóte tí jehe sín tsoníhi sín éxí nixja tí libro i. ¹⁹ ą ntá jnkojín nkexro tsjatsen jnkojín palabra chóna tí libro i la Dios tsjatsen tí nkehe chrók'uáyéhe sín chóna tí libro ts'ínixín ihnjé tí sín tsaá la ko Dios tsjatsen tí nkehe chróchóna sín tí tjen tí chjasin tjóá kixin éxí nixja tí libro i.

²⁰ ą ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ¡Xrákiá. Inchéni Jesús!

²¹ Inchéni Jesucristo mé sincheyaonrá kaín rá. Amén.